



# ହା ଡ଼ିଜିଟାଲ

ପ୍ରୋଗ୍ରାମ୍‌ସ୍ ଓ ଡାଟା





হৃদ-জিজ্ঞাসা  
প্রবোধচন্দ্র সেন



জিজ্ঞাসা  
কলিকাতা-৯ ॥ কলিকাতা-২৯

**CHHANDA-JIJNASA**  
*by*  
**PRABODHCHANDRA SEN**

প্রথম প্রকাশ  
১৫ বৈশাখ ১৩৬৭

প্রকাশক : শ্রীশ্রীশকুমার কুণ্ড  
জিজ্ঞাসা ॥ ১এ কল্লেজ রো। কলিকাতা-৯  
১৩৩এ রাসবিহারী অ্যাভিনিউ। কলিকাতা-২৯

মুদ্রাকর : শ্রীস্বশীলকুমার ঘোষ  
স্বশীল প্রিন্টার্স  
২, ঈশ্বর মিল বার্ডি লেন। কলিকাতা-৬

অক্ষরমাত্রিক। মাত্রা শব্দের এই অর্থ ব্যাকরণসম্মত, সুতরাং নির্দোষ। পক্ষান্তরে ‘মাত্রাবৃত্ত’ শব্দের ‘মাত্রা’ মানে mora বা কলা। এই অর্থ ছন্দশাস্ত্রসম্মত। সুতরাং এই অর্থ স্বীকারেও বাধা নেই। কিন্তু একই সঙ্গে এক শব্দকে দুই অর্থে ব্যবহার অযৌক্তিক। রাখালরাজ কিন্তু তাই করেছেন। পারিভাষিক সমতা রাখতে হলে দ্বিতীয় শ্রেণীর ছন্দকে বলা উচিত ‘মাত্রামাত্রিক’। এরকম নামের স্ববিরোধিতা স্পষ্ট। ‘মাত্রাবৃত্ত’ না বলে যদি বলা হত ‘কলামাত্রিক’ তাহলে রাখালরাজের নামকরণে সমতা রক্ষিত হত। কালিদাস রায়ের নামকরণে সমতা আছে।

স্বরমাত্রিক এবং স্বরবৃত্ত নামের ‘স্বর’ শব্দেও অর্থগত অনিশ্চয়তা দেখা যায়। প্রবোধচন্দ্রের মতে স্বরবৃত্ত মানে syllabic, স্বর মানে syllable। রাখালরাজ স্বরমাত্রিক শব্দের ব্যাখ্যা দেন নি, সম্ভবতঃ তাঁর মতেও স্বর মানে সিলেবল্। কিন্তু সুনীতিকুমারের মতে স্বর মানে stress, স্বরবৃত্ত stressed। তিনি প্রবোধচন্দ্রের স্বরবৃত্ত নামটাই গ্রহণ করেছেন, এবং বলেছেন ‘it has been happily named’ কিন্তু প্রবোধচন্দ্রের অভিপ্রেত অর্থটা তাঁর কাছে স্পষ্ট হয় নি। কালিদাস রায় ‘স্বর’ শব্দটা গ্রহণ করেছেন কলা (mora) অর্থে। দেখা যাচ্ছে স্বর শব্দের মানে কারও মতে syllable, কারও মতে stress, কারও মতে mora বা কলা। রাজশেখর স্পষ্ট করেই বলেছেন, স্বরবৃত্ত নামের উদ্দিষ্ট অর্থ জানি না।

সিলেবল্-এর বাংলা প্রতিশব্দ সম্বন্ধেও এই অনিশ্চয়তা। প্রবোধচন্দ্রের (হয়তো. রাখালরাজেরও) মতে সিলেবল্-এর প্রতিশব্দ স্বর। সুনীতিকুমারের মতে অক্ষর এবং কালিদাস রায়ের মতে পাদক। আরও লক্ষিতব্য রাখালরাজ, প্রবোধচন্দ্র ও কালিদাস রায়, কেউই ‘অক্ষর’ শব্দকে সিলেবল্ অর্থে গ্রহণ করেন নি। ব্যতিক্রম শুধু সুনীতিকুমার।

এখানে অগ্নাগ্র ছান্দসিকের মতামতের প্রসঙ্গ উত্থাপন অনাবশ্যক। শুধু এই চার জনের প্রয়োগ থেকেই বোঝা যায়, তিন শ্রেণীর ছন্দের নামকরণে কত মতপার্থক্য, একই নামের অর্থে কত অনিশ্চয়তা। এইজন্যই পরবর্তীকালে অক্ষরবৃত্ত, মাত্রাবৃত্ত ও স্বরবৃত্ত নামের বদলে মিশ্রকলাবৃত্ত, কলাবৃত্ত ও দলবৃত্ত এই তিন নাম গ্রহণ করতে হয়েছে। কলামাত্রিক, দলমাত্রিক বললেও আপত্তির কারণ নেই। তবে বোধ করি কলামাত্রিক, দলমাত্রিক বলাই অধিকতর

ব্যাকরণসম্মত, সর্বভারতীয় ভাষায় অধিকতর গ্রহণযোগ্য। কলাবৃত্ত, মিশ্র কলাবৃত্ত ও দলবৃত্ত, এই তিন নামে অর্থগত অনিশ্চয়তা নেই, আর নূতনত্বের বাধা ছাড়া মেনে নেবার অল্প বাধাও দেখি না। কারও কারও কাছে নূতন মনে হলেও আসলে কিন্তু এগুলির বয়স কম নয়। আশা করি বেঁচে থাকলে দীর্ঘকাল পরে এগুলি আর কারও কাছেই নূতন থাকবে না। নয়া পয়সাও এখন আর নয়া নেই।

পরিশেষে বলা উচিত যে, বিশেষ চেষ্টা সত্ত্বেও এই গ্রন্থের সর্বত্র বানানের সমতারক্ষা বা ভ্রমসংশোধন করা সম্ভব হয় নি। এখানে কয়েকটিমাত্র লক্ষের কথা বলাই যথেষ্ট। ‘পংক্তি’ বানান নিভুল নয়, ‘পঙক্তি’ লেখাই সমীচীন। চতুর্মাত্রিক, পঞ্চমাত্রিক ইত্যাদি ব্যাকরণসম্মত নয়, হওয়া উচিত চতুর্মাত্রক, পঞ্চমাত্রক ইত্যাদি। আশ্রিত-আশ্রিত না লিখে লেখা উচিত আশ্রয় আশ্রিত, আশ্রিতা ধ্বনি হবে আশ্রয়ধ্বনি। ছন্দোগুরু, ছন্দোরীতি, ছন্দোবিভ্লেথ, কিন্তু ছন্দ-জিজ্ঞাসা, ছন্দ-বিতর্ক, ছন্দ-জ্ঞান—বাংলায় এসব ক্ষেত্রে সন্ধিস্থাপন বৈকল্পিক বলেই মনে করি। সন্ধি করা না করা বিষয়ে সম্পূর্ণরূপেই নিজের ভাষাবোধ ও অভিরুচির উপরে নির্ভর করেছি। পক্ষান্তরে ছন্দপতন, ছন্দচর্চা, ছন্দতত্ত্ব ইত্যাদি স্থলে বিসর্গের অস্তিত্ব সমভাবে অস্বীকার করাই বাংলাভাষার প্রকৃতিসম্মত বলে মনে করি।

গ্রন্থশেষে একটি বর্ণানুক্রমিক দৃষ্টান্ত-তালিকা ও একটি পূর্ণাঙ্গ নির্দেশিকা যোজনায় বিশেষ অভিপ্রায় ছিল। কিন্তু অপ্রতিরোধ্য প্রতিকূলতাবশতঃ তা সম্ভব হল না। এজন্য গ্রন্থখানির যে অপরিহার্য অঙ্কহানি হল তার জন্য পাঠকদের কাছে মার্জনা প্রার্থনা করি।

#### স্বীকৃতি

পঞ্চাশ বৎসরেরও অধিক কাল পূর্বে যখন এই গ্রন্থের প্রথম প্রবন্ধগুলি রচিত হয়েছিল তখন আমার কনিষ্ঠ ভ্রাতা শ্রীমান্ সুধীরের মেধাবী মনের সহায়তাই ছিল আমার উৎসাহের প্রধান উৎস। ছন্দশিক্ষাদানে সে-ই আমার সর্বপ্রথম ও সর্বশ্রেষ্ঠ ছাত্র। এই প্রবন্ধগুলি রচনার সময়ে তার নিত্যসাহচর্য ও সহকারিতা যে আমার কত বড় সম্বল ছিল সে স্মৃতি আমার মনে আজও অমলিন রয়েছে। সে কথা স্মরণ করে এ গ্রন্থের প্রথম পর্বটি তাকেই উৎসর্গ করলাম। দ্বিতীয় পর্বের প্রবন্ধগুলি রচনা ও প্রকাশের সময়ে অল্পরূপ সাহচর্য ও সহকারিতা পেয়েছি

আমার ভ্রাতৃস্থানীয় শ্রীবিকাশচন্দ্র নন্দীর কাছে। তার পরের পর্বায়ে যাদের কাছে উৎসাহ ও প্রেরণা পেয়েছি তাঁদের মধ্যে সর্বাগ্রগণ্য আমার সোদরপ্রতিম শ্রীবিনয়েন্দ্রমোহন চৌধুরী। তাই এই গ্রন্থের দ্বিতীয় পর্বটি উৎসর্গ করলাম এই দুইজনের যুগ্ম নামে।

প্রথম ও দ্বিতীয়, এই উভয় পর্বেই আমার রচনাগুলিকে গ্রন্থাকারে প্রকাশের জন্য বারবার অনুরোধ এবং কখনও কখনও অনুরোধ করতেন আমার অর্ধশতাব্দীরও অধিক কালের পরম স্বজন্ম শ্রীনীহারবরুণ রায়। এতদিন পরে তাঁর সে অনুরোধ রক্ষা করতে পারাতে আমি যতখানি তৃপ্ত হয়েছে, আশা করি এই গ্রন্থ পেয়ে তিনিও ততখানি আনন্দিত হবেন।

এই গ্রন্থ প্রকাশের কাজে অনেকেই আমাকে সাগ্রহে সহায়তা করেছেন। এঁদের মধ্যে আছেন আমার দুই জামাতা শ্রীভবতোষ দত্ত ও শ্রীবিজ্ঞানবন্দ্যোপাধ্যায়, আর দুই কন্যা শ্রীমতী সজ্জমিত্রা বন্দ্যোপাধ্যায় ও শ্রীমতী স্নগতা সেন। ছাত্রছাত্রীদের মধ্যে আছেন শ্রীঅমিয়কুমার সেন, শ্রীনীলরতন সেন, শ্রীরামবহাল তেওয়ারী, শ্রীজয়কুমার চট্টোপাধ্যায়, শ্রীগৌরচন্দ্র সাহা ও শ্রীমতী পম্পা মজুমদার। গুরুতর দৃষ্টিক্ষীণতা সত্ত্বেও প্রথম পর্বের প্রফ দেখার দায়িত্ব আমি নিজেই নিয়েছিলাম। দ্বিতীয় পর্ব ও অনুষঙ্গ বিভাগের প্রফ দেখা প্রভৃতি মুদ্রণঘটিত সবরকম দায়িত্ব নিতে এগিয়ে এলেন পরম স্নেহভাজন শ্রীমান শঙ্কর ঘোষ। তাঁর ছন্দজ্ঞান ও বিচারবুদ্ধি সযত্নে আমার পূর্ণ আস্থা আছে। তাই তাঁর উপরে সম্পূর্ণ দায়িত্ব দিয়ে নিশ্চিন্ত হতে পেরেছি। আর, ১০ ভাসা-প্রকাশক শ্রীমান শ্রীশঙ্কর কুণ্ড যে অপরিমিত উৎসাহ, দীর্ঘকালব্যাপী ধৈর্য ও যত্ন নিয়ে, এমনকি ক্ষতিস্বীকারের ঝুঁকি নিয়েও এই গ্রন্থ প্রকাশের দায়িত্ব নিয়েছেন তার তুলনা হয় না। তাঁর প্রতি আমার কৃতজ্ঞতারও সীমা নেই। এঁদের সকলের সমবেত সহায়তার প্রতিদানে আমি শুধু জানাতে পারি আমার আন্তরিক স্নেহ ও শুভকামনা।

প্রবোধচন্দ্র সেন

কলিকতা

শান্তিনিকেতন





## বিষয়ক্রম

প্রথম পর্ব ১৩২৯-১৩৩০

বাংলা ছন্দ : প্রবাসী ১৩২৯ পৌষ-ফাল্গুন	১-৪১
অক্ষর ও মাত্রা ২ অক্ষরবৃত্ত ৪ মাত্রাবৃত্ত ১১ স্বরবৃত্ত ১৪ স্বরবৃত্ত ছন্দের বিশেষত্ব ২৯	
ছন্দের শ্রেণী বিভাগ : প্রবাসী ১৩২৯ চৈত্র ১৩৩০ বৈশাখ	৪২-৬৫
স্বরবৃত্ত ছন্দ ৪৩ মাত্রাবৃত্ত ছন্দ ৫৩ অক্ষরবৃত্ত ছন্দ ৫৮	
বাংলা ছন্দ ও সংগীত : প্রবাসী ১৩৩০ মাঘ-চৈত্র	৬৬-১০২
মাত্রা ও লয় ৬৯ যতি ও তাল ৮৪ স্বর ৯৮	

## সংযোজন

নিশীথে	১০৩
যৌবন-বোধন	১০৫
স্মৃতিযজ্ঞ	১০৭
চঞ্চল	১০৮

দ্বিতীয় পর্ব ১৩৩৮-১৩৩৯

বাংলা ছন্দের বিবর্তন : বঙ্গীয় সাহিত্যপরিষৎ পত্রিকা ১৩৩৮ ভাদ্র	১১১-১২
বাংলা ছন্দে স্নেহিতরঙ্গ : বিচিত্রা ১৩৩৮ পৌষ	১১৩-৩০
বাংলা ছন্দে রবীন্দ্রনাথের দান : পুস্তিকা ১৩৩৮ পৌষ	১৩১-৫৬
বাংলা অক্ষরবৃত্ত ছন্দের স্বরূপ : বিচিত্রা ১৩৩৮ অগ্রহায়ণ	১৫৫-৭৪
ছন্দ-জিজ্ঞাসা ১ : বিচিত্রা ১৩৩৮ মাঘ	১৭৫-২০২
ছন্দ-জিজ্ঞাসা ২ : বিচিত্রা ১৩৩৮ ফাল্গুন	২০৩-৩০
বাংলা ছন্দের পরিভাষা ২০৩	
বাংলা ছন্দের ত্রিধারা ২১৪	
রবীন্দ্রনাথের ছন্দ-পরিভাষা ২১৯	
ছন্দ-জিজ্ঞাসা ৩ : বিচিত্রা ১৩৩৯ বৈশাখ	২৩১-৬১

ষৌগিক ছন্দে যুগ্মধ্বনি ২৩১	
ছন্দ-বিচার : বিচিত্রা ১৩৩২ জ্যৈষ্ঠ	২৬২-৭৭
কবির পুনশ্চ বক্তব্য ২৭৫	
বাংলা স্বরবৃত্ত ছন্দের স্বরূপ : বিচিত্রা ১৩৩২ ভাদ্র	২৭৮-৩০০
স্বরবৃত্ত ছন্দ ২৮২ অমূল্য ৩০০	
ছন্দ-সংকট : উত্তরা ১৩৩২ ভাদ্র	৩০১-১৮
ছন্দ-প্রসঙ্গ : পঞ্চপুষ্প ১:৩৮ মাঘ	৩১২-২৫
ছন্দোবিশ্লেষ : প্রবাসী ১৩৩৮ ফাল্গুন-চৈত্র	৩২৬-৫৪
বাংলা ছন্দের ধ্বনি ও মাত্রা : বিচিত্রা ১৩৩৮ চৈত্র	৩৫৫-৬৪
বাংলা ছন্দের শ্রেণীবিভাগ : পরিচয় ১৩৩২ বৈশাখ	৩৬৫-৭৭
ছন্দ ও ছন্দোবদ্ধ : বিচিত্রা ১৩৩২ শ্রাবণ	৩৭৮-২৭
স্বরবৃত্ত ছন্দের আইন-কাহুন : পূর্বাশা ১:৩২ আশ্বিন	৩৯৮-৪০২

### অ মু ষ ঙ্গ

পাঠ-পরিচয়	৪০৫-৪১৬
প্রথম পর্ব ৪০৫ দ্বিতীয় পর্ব ৪১১	
পরিভাষা-পরিচয়	৪১৭-২৭
বাংলা ছন্দের পরিভাষা	৪২৮-৪৬
অমুঘঙ্গ ৪২১	
পত্রধারা ১ : ছন্দপ্রসঙ্গ	৪৪৭-৭২
পত্রধারা ২ : পরিভাষা-প্রসঙ্গ	৪৭৩-৭২
বাংলার ছন্দ ও তাল	৪৮০-২৭
পরিশেষ	৪৯৮-৫০২
ক। বাংলা ছন্দ-চিন্তার ক্রমবিকাশ ৪৯৮	
খ। গ্রন্থকারের ছন্দপ্রবন্ধ ৫০০	
গ্রন্থকারের জীবনভাবাবলী	৫০৩

প্রথম পর্ব

১৩২৯-১৩৩০

শ্রীমান্ স্বধীর সেন

পরমকল্যাণীয়েষু



## বাংলা ছন্দ

বাংলার সাহিত্যসম্পদ আজ নিঃস্ব বাঙালিকেও বিশ্বসমাজে বরণ্য করেছে। আর সাহিত্যের এই রসপ্রবাহই বাংলার গ্রামে গ্রামে দরিদ্র কুটীরবাসীর দ্বারে দ্বারে এক নবজীবনের আনন্দবার্তা বয়ে নিয়ে যাচ্ছে। বাংলা সাহিত্যের ভিতর দিয়েই বাঙালি জাতীয় জীবনের সার্থকতা লাভ করে ধন্য হবে। কেবল যে রসমাধুর্যই বাঙালির কাব্যসাহিত্যকে সম্পদশালী করে তুলেছে তা নয়, ছন্দপ্রাচুর্যও তাকে অপূর্ণ বৈচিত্র্য ও শ্রী দান করেছে। বাংলা সাহিত্যের এই ছন্দশাখা যে কত অসংখ্য বর্ণের বিচিত্র কুসুমরাশিতে রমণীয় হয়ে উঠেছে তাই দেখিয়ে পাঠকগণকে একটু আনন্দদান করাই আমার উদ্দেশ্য। কিন্তু গোড়া থেকেই এ কথা বলে রাখা ভাল যে, সাহিত্যজীবনের নব নব উদ্যায় বাংলার কাব্যোত্তানে এই 'অসংখ্য রঙীন ফুলগুলি একে একে কি করে ফুটে উঠেছে ইতিহাসের দিক দিয়ে তা দেখানো কিংবা ছন্দের নৃতালীলা ও স্বরবৈচিত্র্য কেমন করে কাব্যের রসকে বা ভাবের অনির্বচনীয়তাকে রসজ্ঞের অন্তরের মণিকোঠায় পৌঁছিয়ে দেয় সেই তত্ত্বকে ফুটিয়ে তোলা আমার উদ্দেশ্য নয়। যোগ্যতর ব্যক্তি তত্ত্বরসপিপাসুর এ পিপাসা নিবৃত্তি সম্পন্ন। আমি কেবল সাদা কথায় সিধে রকমে বাংলার সমস্ত ছন্দগুলিকে স্তরে স্তরে বিগুস্ত করে, তাদের শ্রেণীবিভাগ করে এবং তাদের গায়ে এক-একটা নামের লেবেল এঁটে দিয়েই খালাস পাব। এই বিচিত্র ছন্দরাশিকে গুচ্ছে গুচ্ছে মাজিয়ে যথেষ্ট দৃষ্টান্ত উপস্থিত করলে পাঠক চোখ বুন্ডিয়েই বুঝতে পারবেন, দীনা বাংলাভাষা ছন্দসম্পদে নিতান্তই দীনা নয় এবং পৃথিবীর কোনো ভাষাই এ বিষয়ে বাংলা ভাষার চাইতে অধিকতর ঐশ্বর্যশালিনী কি না সন্দেহের বিষয়।

বাংলা ছন্দের আলোচনা যে আর কখনও হয় নি তা নয়। বহু দিন থেকেই মাসিক পত্রিকাতে ছন্দবিষয়ক প্রবন্ধ মাঝে মাঝে দেখতে পাওয়া যাচ্ছে। কিন্তু তার অধিকাংশই ছন্দের আংশিক আলোচনা মাত্র। বাংলার কবিগুরু শ্রীযুক্ত রবীন্দ্রনাথ ঠাকুর মহাশয় ১৩২৪ সালে চৈত্রসংখ্যা 'সবুজপত্র'

‘ছন্দ’-নামক প্রবন্ধে বাংলা ছন্দের প্রাণশক্তি কোথায়, ছন্দের ধ্বনিবৈচিত্র্য কিরূপ বিচিত্র উপায়ে কাব্যের ভাবকে ফুটিয়ে তোলে এবং মোটামুটি বাংলা ছন্দকে কয় শ্রেণীতে বিভক্ত করা যায়, এ সম্বন্ধে বিস্তৃত আলোচনা করেছিলেন। এর আগেও তিনি সবুজপত্রে এ সম্বন্ধে আরও আলোচনা করেছিলেন। কিন্তু আমাকে নিতান্ত সভয়ে বলতে হচ্ছে যে, যদিও রবীন্দ্রনাথ ওই প্রবন্ধে ছন্দরসজ্জদের চিস্তার বহু উপাদান জুগিয়েছেন এবং যদিও তিনি বাংলা ছন্দের মূলতত্ত্বটি বিশাংকপে ফুটিয়ে তুলেছেন, তবু এ বিষয়ে আলোচনার আরও অনেক কথা বাকি রয়ে গেছে। তার পর বাংলা ছন্দের জাহ্নবীর সত্যেন্দ্রনাথ দত্ত মহাশয় ১৩২৫ সালের বৈশাখসংখ্যা ‘ভারতী’তে প্রকাশিত ‘ছন্দ-সরস্বতী’-শীর্ষক রচনায় বাংলা ছন্দের বিষয়জনক জাহ্নবীর পরিচয় প্রদান করেছেন। কিন্তু তিনি রচনাটি ঠিক সাধারণ প্রবন্ধের আকারে লেখেন নি, রূপকের মায়াজালের আড়াল থেকে ছন্দের ভেলকিবাজি দেখিয়েছেন। তাই তাঁর ছন্দের নামকরণ বা শ্রেণীবিভাগ রূপকের আড়ালে দাঁড়িয়েই স্বীয় রূপজ্যোতিতে পাঠককে মুগ্ধ করেছে। বিশেষকপে এই দুটি অতি-উপাদেয় প্রবন্ধের নিকট যথাযোগ্য ঋণ স্বীকার করে আমি আসল কথার অবতারণা করছি। জানি না আমার এই নব নামকরণ ও স্তরবিচ্যাস স্বধীসমাজে আদৃত হবে, না আমি “গমিষ্যা-ম্যুপহাস্ততাম্ প্রাংস্তলভ্যে ফলে লোভাহুদ্বাহরিব বামনঃ।”

### অক্ষর ও মাত্রা

সংস্কৃত ছন্দশাস্ত্রকার সংস্কৃত ছন্দকে প্রধানতঃ দুই ভাগে বিভক্ত করেছেন। এক ভাগের নাম বৃত্ত, আর-এক ভাগের নাম জাতি।

পঞ্চ চতুষ্পদী তচ্চ বৃত্তং জাতিরিতি দ্বিধা।

—গঙ্গাদাস, চন্দ্রামঙ্গলী ১৮

যেসকল ছন্দে সাধারণতঃ অক্ষরের সংখ্যা গুনে ছন্দের পরিমাণ স্থির করতে হয় সেগুলিকে বলা ‘বৃত্ত’, আর বিশেষভাবে মাত্রার পরিমাণের উপর যেসব ছন্দ নির্ভর করে সেগুলোর নাম ‘জাতি’।

বৃত্তম্ অক্ষরসংখ্যাতঃ জাতির্মাত্রাক্রতা ভবেন্।

—গঙ্গাদাস, ‘চন্দ্রামঙ্গলী’ ১৮



অঙ্কুপ, ত্রিঙ্কুপ, প্রভৃতি বৃত্ত ছন্দ ; গাথা, পঙ্কটিকা প্রভৃতি জাতি ছন্দের অন্তর্গত। এ স্থলে এ কথা বলা প্রয়োজন যে, সংস্কৃত ছন্দশাস্ত্রে ‘জাতি’ ছন্দ ‘মাত্রাবৃত্ত’ নামেও পরিচিত হয়ে থাকে। স্তত্রাং জাতিকে যদি মাত্রাবৃত্ত নাম দেওয়া যায়, তা হলে শুধু বৃত্তকেও ‘অক্ষরবৃত্ত’ নাম দিয়ে মাত্রাবৃত্ত থেকে তার পার্থক্য রক্ষা করা প্রয়োজন। বাংলা ছন্দেরও দুটি প্রধান ভাগকে অক্ষরবৃত্ত ও মাত্রাবৃত্ত অভিধা দেওয়া যায়।

কিন্তু কি করে এ দুটো শ্রেণী ভাগ করা যায় তা দেখানোর আগে ‘অক্ষর’ ও ‘মাত্রা’ এ দুটো পরিভাষার সজ্ঞানিবেশ করা প্রয়োজন। প্রথমেই মনে রাখা উচিত, ছন্দশাস্ত্রের অক্ষর আর ব্যাকরণশাস্ত্রের অক্ষর এক জিনিস নয়। ব্যাকরণে অক্ষর বা বর্ণ কাকে বলে তা পাঠশালার ছাত্রদের থেকে শুরু করে কারও অজানা নেই। কিন্তু ছন্দের অক্ষর তা নয়, ছন্দশাস্ত্রের মতে শব্দের অন্তর্গত যে বর্ণ বা বর্ণসমষ্টি একসঙ্গে উচ্চারিত হয় তাকেই অক্ষর বলা হয়। অর্থাৎ ইংরেজিতে যাকে বলে সিলেবল্ তারই নাম অক্ষর। যথা, বাগর্থ্যবিব—যে-কোনো পাঠশালার ছাত্র বলে দিতে পারে ব্যাকরণের দিক্ থেকে এখানে এগারোটি বর্ণ আছে। কিন্তু ছন্দশাস্ত্রবিদরা বলবেন এখানে পাঁচটি মাত্র অক্ষর আছে, কেন না এখানে বা-গ-থা-বি-ব—বাগ্‌যন্ত্রের এই পাঁচটি স্বতন্ত্র প্রয়াস থেকে এই সমগ্র কথাটা উচ্চারিত হচ্ছে। যেমন সংখ্যার দিক্ দিয়ে বাগ্‌যন্ত্রের উচ্চারণপ্রয়াসেব unit বা একককে বলা যায় ‘অক্ষর’, তেমনি কালের দিক্ দিয়ে উচ্চার্য শব্দের ওজন বা পরিমাণের একক বা unitকে বলা যায় ‘মাত্রা’। যথা—অর্থ এবং অথ, সংখ্যার দিক্ দিয়ে দেখতে গেলে এই দুটা শব্দের প্রত্যেকটিতেই দুটা করে অক্ষর আছে। কিন্তু আর-এক দিক্ থেকে দেখলে বোঝা যাবে প্রথম শব্দটি ওজনে দ্বিতীয় শব্দটির দেড়গুণ, কেন না প্রথমটার ঘাড়ে একটা রেফের বোঝা চাপানো হয়েছে। বস্তুতঃ প্রথম শব্দটি উচ্চারণ করতে দ্বিতীয়টির দেড়গুণ সময় লাগে। এখন দেখতে হবে এই কাল বা ওজনের দিক্ থেকে একক বলব কাকে। সন্দেহই জানে বিপুল সংস্কৃত রীতিতে উচ্চারণ করতে গেলে দীর্ঘস্বর হ্রস্বস্বরের বিপুল সময় নেয়। আসলেও হ্রস্বস্বরকে দ্বিগুণ করেই দীর্ঘস্বর হয়। তা ছাড়া হ্রস্বস্বরাস্ত্র বাঞ্জনবর্ণের উচ্চারণেও হ্রস্বস্বরের সমান সময়ই লাগে। অ আর ক, এই দুটা বর্ণ উচ্চারণ করলেই এ কথার সত্যতা টের পাওয়া যাবে। স্তত্রাং হ্রস্বস্বর ও হ্রস্বস্বরাস্ত্র বাঞ্জনকে

মাত্রার একক বা একমাত্রিক বর্ণ বলা যেতে পারে এবং দীর্ঘস্বরাস্ত্র ব্যঞ্জনবর্ণকে দ্বিমাত্রিক বর্ণ বলা যায়। শুধু তাই নয়, একমাত্রিক বর্ণের পরে যুক্তবর্ণ, অহ্‌স্বর এবং বিসর্গ থাকলে একমাত্রিক বর্ণটিও দ্বিমাত্রিক হয়ে যায়। যথা— পূর্বোক্ত ‘অর্থ’ শব্দটি। এখানে রকার ও থকারের যুক্তবর্ণ পরে থাকায় পূর্ববর্তী অকারটিকে দ্বিমাত্রিক বলে ধরতে হবে; কেননা অকারের উপর ভর দিয়েই রেফ থ-এর মাধ্যম উঠেছে; কাজেই অকারের শক্তি দ্বিগুণ। এই হিসাবেই দেখা যাবে অর্থ শব্দের অকারে দুই মাত্রা, আর থকারে এক মাত্রা, সবমুহুর্তে তিন মাত্রা; কিন্তু ‘অর্থ’ শব্দে দুই মাত্রা। বন— দুই মাত্রা, বর্ণ— তিন মাত্রা। ব্রণ— এখানেও দুই মাত্রা, কেননা ব্ ও ব্ অকারের উপর ভর দিয়ে নিজেদের ওজন তার উপর চাপিয়ে দেয় নি, বরং অকারই নিজের কৃষ্ণিতে ওই দুই বর্ণকে আশ্রয় দান করেছে। এইরূপ বিধ, পূর্ব, দ্বঃথ, কংস প্রভৃতি শব্দে তিন মাত্রা; আনন্দ, অনন্ত, তরঙ্গ প্রভৃতি শব্দে চার মাত্রা। ছন্দের পরিভাষায় একমাত্রিক বর্ণকে ‘লঘু’ ও দ্বিমাত্রিক বর্ণকে ‘গুরু’ বলে। ছন্দে ত্রিমাত্রিক বর্ণের ব্যবহার হয় না।

সানুস্বারচ্চ দীর্ঘচ্চ বিসর্গী চ গুরুত্ব ভবেৎ ।

বর্ণঃ সংযোগপূর্বচ্চ ।

—গঙ্গাদাস, ‘ছন্দোমঞ্জরী’ ১১১

সুতরাং দেখা গেল অক্ষরের হিসাবে যা এক অক্ষর, মাত্রার হিসাবে তা একমাত্রিক বা দ্বিমাত্রিক দুই হতে পারে। পূর্বের দৃষ্টান্তটাই আবার ধরা যাক। বা-গ-র্থী-বি-ব—অক্ষরের হিসাবে এখানে পাঁচ অক্ষর বটে, কিন্তু মাত্রার হিসাবে আট মাত্রা; কারণ বা-গ-র্থী-বি-ব পদটিতে প্রথম তিন অক্ষর গুরু বা দ্বিমাত্রিক এবং পরের দুই অক্ষর লঘু বা একমাত্রিক।

### অক্ষরবৃত্ত

এই তো গেল সংস্কৃত ছন্দশাস্ত্রের হিসাবনিকাশ। কিন্তু বলা বাহুল্য সংস্কৃতের হিসাব বাংলায় অবিকল খাটে না।

প্রথমতঃ, অক্ষরবৃত্তের কথা। বাংলা অক্ষরবৃত্তে সাধারণতঃ শব্দের অন্তস্থিত অ-স্বর অর্থাৎ হলন্ত-উচ্চারিত ব্যঞ্জনবর্ণও এক অক্ষর বলেই গণ্য হয়, যদিও সংস্কৃত নিয়ম অনুসারে এমন বর্ণ অক্ষর বলে গণ্য হতে পারে না। যথা—

× ×

পাখী সব করে রব রাতি পোহাইল ।

×

কাননে কুম্ম-কলি সকলি ফুটিল ॥

—মদনমোহন, 'শিশুশিক্ষা' প্ৰথম ভাগ, প্রভাতবর্ণন

এ স্থলে প্রথম ছত্রের চতুর্থ ও অষ্টম এবং দ্বিতীয় ছত্রের ষষ্ঠ অক্ষর সংস্কৃত  
নিয়মে অক্ষররূপে পরিগণিত হতে পারে না, কেননা তাদের স্বরাস্ত উচ্চারণ  
হয় না। কিন্তু বাংলায় তারাও অক্ষর, তার একমাত্র কারণ হচ্ছে এই যে,  
শব্দের অন্তে অ-স্বর ব্যঞ্জন থাকলে তার পূর্ববর্তী বর্ণের আমরা দীর্ঘ উচ্চারণ  
করে থাকি। কিন্তু বাংলা অক্ষরবৃত্তে অ-স্বর ব্যঞ্জনবর্ণ যদি শব্দের মধ্যে স্থান  
পায় তবে বাংলা ছন্দ তার মর্গাদা রক্ষা করে না, তাকে অন্যান্য বর্ণের সঙ্গে  
সমান তালে সমান ওজনে উচ্চারণ করে যায়। এখানে ছোট বড় সব সমান,  
পূর্ণ সাম্য। যথা—

× × ×

১। নিশার স্বপন সম তোর এ বারতা

× × । ×

রে দূত! অমরবৃন্দ যার ভুজবলে

× । ×

কাতর, সে ধন্যবে রাঘব ভিখারী

। ×

বধিল সম্মুখ-রাণ ?

—মধুসূদন, 'মেঘনাদবধ', প্রথম সর্গ, পংক্তি ৮০

× । ।

২। দানব-নন্দিনী আমি ; রক্ষঃকুলবধু ;

× × ×

রাবণ স্বস্তর মম, মেঘনাদ স্বামী,

আমি কি ডরাই সখি, ভিখারী রাঘবে ?

—মধুসূদন, 'মেঘনাদবধ', তৃতীয় সর্গ, পংক্তি ৭৮

উদ্ভূত দৃষ্টান্ত-দুটিতে ×-চিহ্নিত কোনো বর্ণেরই স্বরাস্ত উচ্চারণ হবে না,

তথাপি এগুলো বাংলা অক্ষরবৃত্তে এক-একটি অক্ষর বলে গণ্য হয়েছে। তার কারণ উদ্ভূত ছত্র-কয়টি পড়লেই বোঝা যাবে এগুলোর পূর্ববর্তী প্রত্যেকটি স্বরের দীর্ঘ উচ্চারণ হচ্ছে। স্বতরাং এ বর্ণগুলোর স্বরাস্ত উচ্চারণ না হওয়াতে প্রতি পংক্তিতে ওজনের যে কমতি পড়ে যায়, পূর্ববর্তী স্বরগুলোর দীর্ঘ উচ্চারণে তার পূরণ হয়ে যাচ্ছে, স্বতরাং ছন্দপতন হয় নি। কিন্তু তা বলে এ ছন্দকে মাত্রাবৃত্ত বলা চলবে না। কারণ পরে যুক্তবর্ণ থাকা সত্ত্বেও দৃষ্টান্তিত অক্ষরগুলো দ্বিমাত্রিক বলে গণ্য হয় নি। আসল কথা, এখানে হসন্ত, স্বরাস্ত এবং যুক্তাক্ষরের পূর্ববর্ণ, সকলেই এক ওজনে উচ্চারিত হচ্ছে, অক্ষরবৃত্ত ছন্দে সকলকেই সমান আসন দিচ্ছি। এই সাম্যরক্ষা দোষই হক আর গুণই হক, এইটেই হচ্ছে বাংলা অক্ষরবৃত্তের বিশেষত্ব। এই বিশেষত্বটুকু না থাকলে এ ছন্দের কোনো মূল্যই থাকত না। কারণ এই সাম্যরক্ষার ক্ষমতাই অক্ষরবৃত্তের ধনিকে উর্ধ্ব হতে উর্ধ্বতর স্তরে উঠিয়ে নিতে পারে বা নিম্ন হতে নিম্নতর স্তরে নামিয়ে আনতে পারে। বস্তুতঃ অক্ষরবৃত্ত ছন্দ বর্ণের জাতিভেদ না মানলেও সে কোনো বর্ণেরই অমর্যাদা করে না, যদিও প্রথম দৃষ্টিতে তাই মনে হয়। দৃষ্টান্ত দিয়ে বিষয়টাকে বিশদ করছি। যথা—

১। ঈশানের পুঞ্জমেঘ অন্ধবেগে ধেয়ে চলে আসে

বাধাবন্ধ-হারা,

গ্রামান্তের বেণুকুঞ্জে নীলাঙ্গন-ছায়া সঞ্চারিয়া

হানি দীর্ঘ ধারা।

—রবীন্দ্রনাথ, ‘কল্পনা’, বর্ণশেষ্য

২। স্তম্ভিত তমিশ্রপুঞ্জ কম্পিত করিয়া অকস্মাৎ

অর্পরাত্রের উচ্ছ্বাস উচ্ছ্বাসি

সত্ত্বশূট ব্রহ্মমন্ত্র আনন্দিত ঋষিকণ্ঠ হতে

আন্দোলিয়া ঘন তন্দ্রারশি।

—রবীন্দ্রনাথ, ‘কল্পনা’, রাত্রি

উদ্ভূত দৃষ্টান্ত-দুটো পড়লেই বোঝা যাবে ছন্দের তন্ত্রী কত উঁচু স্তরে বাধা হয়েছে। দ্বিতীয়টির ধনিস্তর প্রথমটির চাইতেও উপরে। কিন্তু এর কারণ কি? কারণ স্পষ্টই বোঝা যাচ্ছে—যুক্তাক্ষরের প্রাধান্য। একটু লক্ষ করলেই দেখা যাবে, প্রথম দৃষ্টান্তটিতে গুরুস্বর আছে মাত্র আটটি আর দ্বিতীয়টিতে আছে

ঘোলোটি। এইজগাই দ্বিতীয়টির ধ্বনিগাষ্ঠীও এত বেশি। কিন্তু প্রশ্ন হতে পারে দুটো উদাহরণেই তো গুরুস্বরের চাইতে লঘুস্বর অনেক বেশি, ছন্দের গাষ্ঠীও তাদের উপর নির্ভর না করে গুরুস্বরগুলোর উপরেই নির্ভর করে কেন? এর উত্তর এই যে, অক্ষরবৃত্ত ছন্দ গুরুস্বরকে লঘুস্বরের সঙ্গে একাসনে না বসিয়ে লঘুস্বরকেই গুরুস্বরের সঙ্গে একাসনে বসায়। স্তবরা: পাঁচটা স্বরের মধ্যে যদি একটাও গুরুস্বর থাকে তবে ওই একটিমাত্র গুরুস্বরই বাকি চারটি লঘুস্বরকে এমন শক্তি ও গাষ্ঠীও দান করে যে, ওই চারটি লঘুস্বর থেকেই অতি গুরুগাষ্ঠীর ধ্বনি উদ্গত হতে থাকে; তখন মোট মাত্রাপরিমাণ অনেক বেড়ে যায় এবং তার ধ্বনি আকাশের অতি উর্ধ্বস্তরে উঠে যায়। যথা—

X

X

আন্দোলিয়া ঘন তন্দ্রাশি

—ববীন্দ্রনাথ, 'কল্পনা', রাত্রি

এই পদটিতে দশটি অক্ষরের মধ্যে মাত্র দুটি গুরুস্বর সবগুলোকে আঘাত করে কি এক শক্তির সঞ্চার করছে আর তাদের মধ্যে থেকে কি গাষ্ঠীর আওয়াজ নির্গত করছে তা অনায়াসেই বোঝা যায়। যদি লেখা হত—

আলোড়িয়া ঘন তমোরাশি

তবে অমনি সমগ্র ধ্বনিস্তরটাই অনেক নীচে নেমে যেত। মেঘনাদবধ কাব্যখানি পড়লেই দেখা যায় কবি কেমন অবলীলাক্রমে নিজের প্রয়োজনমতো ছন্দের ছন্দভিত্তি যুক্তবর্ণের করাদাত করে কানো। ধ্বনিকে আশ্রয় উঠতে উচ্চতর স্তরে তুলে নিয়েছেন, আবার নিজের প্রয়োজনমতো অক্ষরবৃত্তের প্রয়োগ দ্বারা ধ্বনির স্তরকে অনেক নীচে নামিয়ে এনেছেন। ভাবের ওঠানামার সঙ্গে সঙ্গে ধ্বনির এই ওঠানামার শক্তিই অক্ষরবৃত্ত ছন্দকে বাংলা কাব্যসাহিত্যে এমন মহীয়ান করে তুলেছে। এইজগাই বাংলার সমস্ত মিত্রাক্ষর এবং অমিত্রাক্ষর কাব্যগ্রন্থে, কাব্যনাট্যে এবং গাষ্ঠীর কবিতামাত্রেরই এই ছন্দের ব্যবহার হচ্ছে।

বাংলা অক্ষরবৃত্তের এই উত্থানপতনের ক্ষমতাকেই ববীন্দ্রনাথ নাম দিয়েছেন 'শোষণশক্তি'। কারণ এই ছন্দ অক্ষরের অখ্য ঠিক রেখে নিজের মধ্যে বহুলপরিমাণে ব্যঞ্জনবর্ণ শোষণ করে নিতে পারে। এ স্থলে তাঁর প্রদত্ত উদাহরণগুলি উদ্ধৃত করার লোভ সংবরণ করতে পারলাম না।—

পাষণ মিলায়ে যায় গায়ের বাতাসে ।

—বলরামদাস, ‘পদরত্নাবলী’ ( রবীন্দ্রনাথ ), ২৭

এ হল ধ্বনির প্রথম স্তর । তার পর—

পাষণ মুঁছিয়া যায় গায়ের বাতাসে ।

—রবীন্দ্রনাথ, ‘ছন্দ’, সবুজপত্র ১৩২৪ বৈশাখ

এখানে একটিমাত্র যুক্তবর্ণের ঝংকারে সমগ্র ধ্বনিটা এক স্তর উপরে উঠে গেল ।  
তার পর—

পাষণ মুঁছিয়া যায় অপের বাতাসে ।

—পূর্বোক্ত

সমগ্র পংক্তিটার ধ্বনিমাত্রা বেড়ে যাওয়াতে আওয়াজ অনেক উপরে উঠে গেল ।

পাষণ মুঁছিয়া যায় অপের উচ্ছ্বাসে ।

—পূর্বোক্ত

আর-এক স্তর উঠে গেল ।

সঙ্গীত তরঙ্গি উঠে অপের উচ্ছ্বাসে ।

—পূর্বোক্ত

এখানে স্থর একেবারে পঞ্চমে উঠে গেছে ।

সঙ্গীত-তরঙ্গ-রঙ্গ অপের উচ্ছ্বাস ।

—পূর্বোক্ত

ধ্বনি বৃষ্ট স্তরে উঠে গেছে । আর-এক মাত্রা বৃদ্ধি হলে সপ্তমে উঠে যাবে বটে, কিন্তু তন্ত্রী ছিঁড়ে যাবার আশঙ্কা আছে ।

কিন্তু এ কথা বললে ভুল হবে যে, উদ্ধৃত ছয়টি পংক্তির প্রত্যেকটিতেই সমান মাত্রা । কেননা, সবগুলোতেই মাত্রা যদি সমান হত তা হলে ধ্বনির স্তরগুলো উচ্চতার হিসাবে পর পর সজ্জিত করা যেত না । অবশ্য প্রত্যেক পংক্তিতেই অক্ষরের সংখ্যা সমান, অর্থাৎ চোদ্দো । কিন্তু একটির পর একটিতে ধ্বনির পরিমাণ যেমন বেড়ে চলেছে, মাত্রার পরিমাণও তেমনি বেড়ে চলেছে । কারণ মাত্রার পরিমাণই ধ্বনিকে নিয়ন্ত্রিত করে এবং মাত্রার আধিক্যই ধ্বনির গাঙ্গীর্ঘবৃদ্ধির হেতু । প্রথম স্তরের পংক্তিটিতে মাত্রাসংখ্যাও অক্ষরসংখ্যার মতোই চোদ্দো, কারণ এখানে একটাও গুরুস্বর নেই । সর্বশেষ পংক্তিটিতে মাত্রাসংখ্যা উনিশ, কারণ গুরুস্বর পাঁচটি, তা ছাড়া গুরুস্বরগুলোর সঙ্গুণে লঘুস্বরগুলোও ভারী হয়ে উঠেছে । সেজন্যই ধ্বনির এত গাঙ্গীর্ঘ ।



ধনিকের গাভীরের স্তরে স্তরে উন্নীত করার বিচিত্র ক্ষমতা ছাড়া ভাবকেও ক্রমে ক্রমে গুরুগম্ভীর করে তোলবার একটা অদ্ভুত ক্ষমতা বাংলা অক্ষরবৃত্তের আছে। এ ছন্দের এই অদ্ভুত ক্ষমতা কবি মধুসূদন যে দিন আবিষ্কার করেন, সে দিন থেকেই বাংলা ছন্দের শক্তি ও ঐশ্বর্য সহস্রগুণে বেড়ে গেছে। তার পর থেকেই বাংলায় মেঘনাদবধ, বৃত্তসংহার, কুরুক্ষেত্র প্রভৃতি গভীর ও গম্ভীর কাব্য রচনা সম্ভব হয়েছে। মাইকেল মধুসূদনের আগে কবির হৃদয়ের ভাবশ্রোত যতই তীব্র হক না কেন তাকে পয়ারের ঢুটি ছত্রের মধ্যেই গণ্ডিবদ্ধ হয়ে থাকতে হত, আর সে শ্রোত আপনার অন্তরের খরবেগে উচ্ছ্বসিত হয়ে কেবলি ফোঁপাতে থাকত—

স্বাধীনতাহীনতায় কে বাঁচিতে চায় হে,

কে বাঁচিতে চায় ?

দাসত্বশৃঙ্খল বল কে পরিবে পায় হে,

কে পরিবে পায় ?

—রঙ্গলাল, ‘পদ্মিনী-উপাখ্যান’, ক্ষত্রিয়দিগের প্রতি রাজ্যব উৎসাহবাক্য

কিন্তু পয়ারের গণ্ডি কিছুতেই ভাঙল না, দাসত্বশৃঙ্খল মোচন হল না। তার পর যখন একদিন বিদ্রোহী কবি মধুসূদন এসে ‘পয়ার পায়ের বেড়ি ভাঙি কবিতার’ বিদ্রোহধ্বজা উড়িয়ে দিলেন, সে দিন বাংলার সাহিত্যে কাব্যের বান ডেকে এসেছিল। বাংলা অক্ষরবৃত্তের যে বিচিত্র শক্তির ফলে এমন অঘটন ঘটা সম্ভব হয়েছিল, সে শক্তিটি হচ্ছে এই যে— ভাবশ্রোতের তীব্রতা ও গভীরতার সঙ্গে তাল রেখে এ ছন্দকে যতদূর ইচ্ছা প্রসারিত করে নেওয়া যায় এ কবি নিজের প্রয়োজনমতো এর অধঃপ্রত্যয়ের বহু স্থানে যতিস্থাপনের দ্বারা এর গতিভঙ্গিকে বিচিত্র লীলায় লীলায়িত করে তুলতে পারেন। এখানে কয়েকটিমাত্র ছত্র উদ্ধৃত করে অক্ষরবৃত্ত ছন্দের এই বিচিত্র গতিভঙ্গির একটা দৃষ্টান্ত দিচ্ছি। যথা—

দুর্ভাবনা ।

দুঃস্বপ্ন-জননী, | ভেবো না আমার তরে  
বোন, | সুখে আছি, | মগ্ন হয়ে জীবনের  
মাঝখানে, | কে জেনেছে জীবনের সুখ ? |  
মরণের তটপ্রান্তে বসে | এ যেন গো  
প্রাণপণে | জীবনের একান্ত সন্তোষ ।

—রবীন্দ্রনাথ, ‘রাজা ও রানী’, পঞ্চম অঙ্ক, বহু দৃশ্য

উদ্ধৃত ছত্রকয়টিতে যতিচিহ্নগুলোর দিকে দৃষ্টিপাত করলেই দেখা যাবে কত বিচিত্র উপায়ে এ ছন্দে যতি দেওয়া যায়। যতির এই বিচিত্র সন্নিবেশের ফলে ছন্দ কেমন অদ্ভুত রকমে মোড় ফিরে ফিরে স্বীয় গতিপথকে তরঙ্গিত করে তুলেছে। কোথাও চার, কোথাও ছয়, কোথাও আট, কোথাও দশ এবং কোথাও বারো অক্ষরের পরে যতি পড়ে তার একটানা গতিকে বৈচিত্র্য দান করেছে। বাংলা অক্ষরবৃত্ত রচনায় যথেষ্ট স্বাধীনতা রয়েছে এবং এই স্বাধীনতার ফলেই কবি এ ছন্দকে একঘেয়ে হতে না দিয়ে নব নব ভঙ্গিতে তরঙ্গিত করে তুলতে পারেন।

বাংলা অক্ষরবৃত্তের পরিচয় সমাপ্ত করার আগে সংস্কৃত অক্ষরবৃত্তের সঙ্গে এর পার্থক্য দেখিয়ে দেওয়া প্রয়োজন। সংস্কৃত ছন্দ বিবিধ তরঙ্গভঙ্গিতে দোলায়মান, তার প্রতি পংক্তির অক্ষরগুলো লঘুগুরুভেদে এমনি বিচিত্র উপায়ে ছলে ওঠে যে, তার ধ্বনিটাও তরঙ্গে তরঙ্গে উচ্ছলিত হয়ে পাঠকের হৃদয়ে গিয়ে দোলা দিতে থাকে। যথা ইন্দুবজ্রা ছন্দ—

|| || | || || | | || || ||

বৈদেহি পশ্চামলয়াধিভক্তঃ

মংসেতুনা ফেনিলমম্বুরাশিম্।

ছায়াপথেনেব শরংপ্রসন্নম্

আকাশমাবিকৃতচারুতারম্ ॥

—কালিদাস, 'রঘুবংশ', ত্রয়োদশ সর্গ, ৩

এই শ্লোকটি যথারীতি উচ্চারণ করে পড়ে গেলেই তার অদ্ভুত ধ্বনিকম্পন পাঠকের মনে দোলা দিতে থাকবে। কিন্তু বাংলা অক্ষরবৃত্তের এই তরঙ্গলীলা নেই, তার হ্রস্ব একঘেয়ে; কেবল মাঝে মাঝে যুক্তাক্ষরের সংঘাতে তার একটানা স্রোতকে ক্ষুদ্র করে তুলে পাঠকের শ্রুতি ও চিত্তকে ধাক্কা দিয়ে দিয়ে সচেতন করে তোলে। যথা—

পাঠাইব রামানুজে শমন-ভবনে

×      ×      ×

লঙ্কার কলঙ্ক আজি ভঞ্জিব আহবে।

—মধুসূদন, 'মেঘনাদবধ', ষষ্ঠ সর্গ, পংক্তি ৫৩০

মাত্র তিনটি গুরুস্বর এই শ্লোকটিকে একান্ত নিস্তরঙ্গতা থেকে রক্ষা করেছে।

পঞ্চাশত্রে সংস্কৃত ছন্দ নৃত্যপরায়ণ হলেও সে প্রতি চরণে প্রতি শ্লোকে এক তালেই নাচতে থাকে, তার গতিবৈচিত্র্য নেই। তাতে তার একতালা নৃত্যটাই ক্রমে একঘেয়ে হয়ে আসে। কিন্তু বাংলা ছন্দের শ্রোত নিস্তরঙ্গ হলেও সে শ্রোত একটানা না চলে বহুবিচিত্র পর্বত-উপত্যকা বকুর সমতল ভূমির উপর একে বেকে প্রবাহিত হয়ে পাঠককে স্বীয় গতিপথের অপূর্ণ সৌন্দর্যস্বপ্নমায় মুগ্ধ করতে থাকে। ‘হুঁতাবনা হুঃস্বপ্ন-জননী’ ইত্যাদি কাব্যংশটি পড়লেই এ কথা বেশ বোঝা যাবে।

### মাত্রাবৃত্ত

দ্বিতীয়তঃ, মাত্রাবৃত্তের কথা। এ সম্বন্ধে একমাত্র বক্তব্য এই যে, বাংলায় সংস্কৃতের মতো স্বরবর্ণের হ্রস্ব-দীর্ঘ উচ্চারণ নেই, বাংলায় সব স্বরেরই লঘু বা একমাত্রিক উচ্চারণ। কেবল ঐকার ও ঔকারের গুরু বা দ্বিমাত্রিক উচ্চারণ হয়। তা ছাড়া হসন্তবর্ণ, অল্পস্বার বা বিসর্গ পরে থাকলেও পূর্ববর্তী স্বরের দুই মাত্রা গণনা করা হয়। অক্ষরবৃত্তের মতো এ ছন্দে অক্ষরসংখ্যা ঠিক রেখে যথেষ্ট যুক্তবর্ণের প্রয়োগ করা যায় না। কিন্তু এ ছন্দে মাত্রার পরিমাণ ঠিক রেখে ইচ্ছামত যুক্তবর্ণ ব্যবহার করা যায় এবং তাতে অক্ষরসংখ্যা কমে যায়। মাত্রাবৃত্ত ছন্দে যথেষ্টপরিমাণ যুক্তাক্ষরের প্রয়োগে ছন্দের সৌন্দর্য বা ধ্বনিব মাদুর্গন্ধ হয়। কারণ তাতে ছন্দপ্রবাহের একটানা ভা দূর হয়ে নানা রকম ঢেউ খেলতে থাকে। মাত্রাবৃত্তের কয়েকটা উদাহরণ দিলেই তার স্বভাবটি আপনা থেকেই স্পষ্ট হয়ে উঠবে। যথা—

১। লজ্জি এ | সিন্ধুরে | প্রলয়ের | নৃত্যে  
 ওগো কার | তরী দায় | নিভীক | চিত্তে,  
 অবহেলি | জলধির | ভৈরব | গর্জন  
 প্রলয়ের | ডঙ্কার | ওঙ্কার | তর্জন ?

—নজরুল, ‘অগ্নিবীণা’, খেয়াপ রর তরঙ্গী

এখানে প্রতি পংক্তিচ্ছেদে চার মাত্রা আছে, কেবল প্রথম ও দ্বিতীয় পংক্তির শেষ ভাগে তিন-তিন মাত্রা। কিন্তু বিভিন্ন পংক্তিচ্ছেদে অক্ষরসংখ্যার কোনো সামঞ্জস্য নেই।

২। কি কথা উঠে | মর্মরিয়া | বকুলতরু | -পল্লবে,

ভ্রমর উঠে | গুঞ্জরিয়া | কি ভাষা।

উর্ধ্বমুখে | সূর্যমুখী | স্মরিছে কোন্ | বল্লভে,

নিবরিণী | বহিছে কোন্ | পিপাসা।

—ববীন্দ্রনাথ, 'কল্পনা', মদনভাস্মের পরে

শেবাংশগুলো বাদে প্রতি পংক্তিচ্ছেদে পাঁচটি করে মাত্রা আছে। কিন্তু অক্ষর-সংখ্যার সামঞ্জস্য নেই। প্রথম ও তৃতীয় ছত্রের শেবাংশে চার মাত্রা এবং দ্বিতীয় ও চতুর্থ ছত্রের শেবাংশে তিন মাত্রা করে আছে।

৩। এ নহে মুখর | বনমর্গর | -গুঞ্জিত,

এ যে অজাগর | -গরজে সাগর | ফুলিছে,

এ নহে কুঞ্জ | কুন্দকুসুম | -রঞ্জিত,

ফেনহিল্লোল | কলকল্লোলে | হুলিছে।

—ববীন্দ্রনাথ, 'কল্পনা', দুঃসময়

শেবাংশগুলো বাদে প্রতি ভাগে ছয় মাত্রা। প্রথম-তৃতীয় ও দ্বিতীয়-চতুর্থ ছত্রের শেবাংশে যথাক্রমে চার ও তিন মাত্রা আছে।

৪। খেত ললাটে লাঞ্ছনা | রক্তচন্দন,

বক্ষে গুরু শিলা | হস্তে বন্দন,

নয়নে ভাস্বর | সত্য-জ্যোতিশিখা,

স্বাধীন দেশবাণী | কণ্ঠে মন বোলে,

সে ধ্বনি উঠে রবি | ত্রিংশ কোটি আজি | মানব-কল্লোলে।

—নজরুল, 'বিষের বাণী', বন্দী বন্দন।

এখানে প্রতি ভাগে সাতটি করে মাত্রা আছে, কিন্তু অক্ষরসংখ্যার স্থিরতা নেই।

আশা করি উদ্ভূত উদাহরণগুলি থেকেই পাঠক মাত্রাবৃত্ত ছন্দের স্বরূপ উপলব্ধি করতে পেরেছেন। ধ্বনির গাঙ্গীর্থ এবং বাক্যের সম্প্রসারণক্ষমতা অক্ষরবৃত্ত ছন্দের বিশেষত্ব; স্বতরাং সে গুরুগম্ভীর ভাবের উপযুক্ত বাহন। এজন্যই বৃহৎ কাব্যে, নাটকে এবং গম্ভীরভাবপ্রকাশক কবিতাদিতে অক্ষরবৃত্ত ছন্দের ব্যবহার এত বেশি। কিন্তু হ্রস্ববৈচিত্র্যই মাত্রাবৃত্ত ছন্দের বিশেষত্ব। এজন্যই এ ছন্দ গীতিকবিতার পক্ষে বিশেষ উপযোগী। কিন্তু এ ছন্দ গম্ভীর ভাবের কবিতার পক্ষে একেবারেই অযোগ্য, তাই মাত্রাবৃত্ত ছন্দে অমিত্রাক্ষর কবিতা

রচনা করা অসম্ভব। অক্ষরবৃত্ত ও মাত্রাবৃত্তে ধ্বনিবৈষম্য অর্থকেও কেমন দুই স্বতন্ত্র উপায়ে ফুটিয়ে তোলে এবং দুই বিভিন্ন শক্তিতে শক্তিশালী করে তোলে তা নিম্নোক্ত কাব্যংশ-দুটো পড়লেই বেশ বোঝা যাবে।—

১। অক্ষরবৃত্ত

দেবতার দীপ হস্তে যে আসিল ভবে  
সেই রুদ্রদূতে, বলো, কোন্ রাজা কবে  
পারে শাস্তি দিতে! বন্ধনশৃঙ্খল তার  
চরণবন্দনা করি করে নমস্কার,  
কারাগার করে অভ্যর্থনা।...

আপনার

মগ্নস্বপ্ন, বিধিদ্ভুত নিত্য-অধিকার—  
যে নির্লজ্জ ভয়ে লোভে করে অস্বীকার  
সভামাঝে, দুর্গতির করে অহংকার,...  
সেই ভীকু নতশির চিরশাস্তিভারে,  
রাজকারা-বাহিরেতে নিত্যকারাগারে।

—রবীন্দ্রনাথ, 'সকরিতা', নমস্কার

২। মাত্রাবৃত্ত

আজি কারার সারাদেহে মুক্তি-ক্রন্দন  
ধ্বনিছে হাহা-স্বরে ছিঁড়িতে বন্ধন,  
নিখিল গেহ যেথা বন্দী-কারাগৃহ  
সেথা কেন রে কারাত্রাসে মরিবে বীরদলে?  
'জয় হে বন্ধন' গাহিল তাই তারা মুক্ত নভতলে।

—নজরুল, 'বিশেষ বাঁশী', বন্দীবন্দনা

দুটোতেই প্রচুর শক্তি রয়েছে। কিন্তু প্রথমটিতে পৌরুষশক্তি যেন সমস্ত বাধাবিঘ্ন তুচ্ছ করে আপনার গতিবেগে আপনি বীরদর্পে পা ফেলে ছুটে চলেছে। দ্বিতীয়টিতে নারীশক্তি যেন পদে পদে নিয়ন্ত্রিত হচ্ছে এবং ওই নিয়ন্ত্রণের ফলেই তার ভিতরকার শক্তি দ্বিগুণ বেগে উচ্ছ্বসিত হ'ল উঠেছে।\*

## স্বরবৃত্ত

অক্ষরবৃত্ত এবং মাত্রাবৃত্ত ছাড়া বাংলা কবিতার আর-একটি নিজস্ব ছন্দ আছে যা সে সংস্কৃত বা অন্য কোনো ভাষার কাছে ধার করে পায় নি। এ ছন্দকে বাংলা ভাষা নিজের প্রকৃতি থেকে সৃষ্টি করেছে। সাধু বাংলা চিরকাল পণ্ডিতসমাজে আদর পেয়ে আসছে এবং সেজগতই সে দেবভাষা সংস্কৃতের সঙ্গে অতি নিকট সম্পর্ক দাবি করে ক্ষীত হয়ে উঠেছে। কিন্তু কথিত বাংলা চিরকাল বাঙালি নরনারীর মুখে মখেই ব্যবহৃত হয়ে আসছে এবং পণ্ডিতসমাজের চোখের আড়ালে নিজের স্বরে-তালে ও নিজের ছন্দে বাংলার আবালবৃদ্ধবনিতার মনোরঞ্জন করে আসছে। এই কথিত বাংলার ছন্দ বহুদিন ধরে ছড়া-পাঁচালির রূপ ধরে শিশুর নিদ্রাকর্ষণ করে, মেয়েদের শাস্ত্রজ্ঞানের বাহন হয়ে, গ্রামা জেলে-চাষীদের বাউল প্রভৃতি গানের উৎসমূলে কথা জুগিয়েই নিজেকে ধন্য মনে করছিল। কিন্তু এমনি করে দিনে দিনে যখন তার ভাঙারে নানা ভাষা নানা ভাব থেকে শক্তি ও সম্পদ সঞ্চিত হয়ে তাকে ঐশ্বর্যশালী করে তুলল তখন পণ্ডিতগণের দৃষ্টি তার উপরে পড়ল। তখন থেকেই কথিত বা প্রাকৃত বাংলাভাষা সাহিত্যের আসরে একটুখানি স্থান পেয়েছে। এখন গণ-পণ্ডিত উভয় ক্ষেত্রেই প্রাকৃত বাংলা স্বীয় শক্তির পরিচয় দিয়ে সাহিত্যিকগণকে বিস্মিত করে দিয়েছে। সম্ভবতঃ প্যারীচাঁদ মিত্র ও রাধানাথ শিকদারের পরিচালিত ‘মাসিক পত্রিকা’-নামক মাসিক পত্রিকাতেই প্রাকৃত বাংলার সরল সহজ সৌন্দর্যের প্রতি শিক্ষিতসমাজের মনোযোগ আকর্ষণের প্রথম প্রয়াস হয়েছিল। টেকচাঁদ ঠাকুরের (প্যারীচাঁদ মিত্রের) ‘আলালের ঘরের দুলাল’ সে প্রয়াসের অতি উৎকৃষ্ট ফল। কিন্তু তাঁদের সে চেষ্টা বিশেষ সাফল্যলাভ করে নি। আজকাল আবার কয়েক বৎসর ধরে এ দিকে একটা নব উত্তম দেখা দিয়েছে এবং তার ফলে ‘ঘরে-বাইরে’ প্রভৃতি কয়েকখানি গ্রন্থ প্রকাশিত হয়ে প্রাকৃত বাংলার গৌরব ঘোষণা করেছে। তথাপি এখনও অধিকাংশ সাহিত্যিক এই সহজশক্তিশালী প্রাকৃত বাংলাকে সাদরে অভ্যর্থনা করে নেন নি। কিন্তু গণলেখকসমাজে এ ভাষা স্বীয় যোগ্য আসন লাভ না করলেও বাংলার কবিসমাজ তার গলায় বিজয়মালা অর্পণ করেছেন এবং তার বর্ধিষ্ণু শক্তি ও শ্রী দিনে দিনেই বাংলার কাব্যরসিকগণের শ্রবণ হৃদয় ও মন মুগ্ধ করছে।

এখন এই প্রাকৃত বাংলার ছন্দের প্রকৃতি ও বিশেষত্ব কোথায় তা দেখাবার চেষ্টা করব। প্রথমেই কয়েকটা নমুনা দিচ্ছি।—



১। বিষ্টি পড়ে | টাপুর টুপুর | নদেয় এল | বান,

X

শিবঠাকুরের | বিয়ে হল | তিন কণ্ঠে | দান।

২। জলম্পর্শ | করব না আর, | চিতোর-রাজার | পণ

বুঁদির কেজা | মাটির পরে | থাকবে যত | ক্ষণ।

—রবীন্দ্রনাথ, 'কথা', নকল গড়

৩। রাত পোহাল | ফরসা হল | ফুটল কত | ফুল,

X

কাঁপিয়ে পাখা | নীল পতাকা | জুটল অলি | -কুল।

—দীনবন্ধু 'বিবিধ গল্প-পুত্র' (গ্রন্থাবলী), প্রভাত

উপরের নমুনা-তিনটির ধ্বনি থেকেই বেশ টের পাওয়া যাচ্ছে, ওই তিনটে একই ছন্দে রচিত। কিন্তু অক্ষরের হিসাব করতে গেলে দেখা যাবে সব গরমিল হয়ে যাচ্ছে। মাত্রাও সব চরণে সমানসংখ্যক নয়। অথচ প্রত্যেক চরণেই যে-কোনো হিসাব থেকে ওজন যে ঠিক আছে তাতে সন্দেহ নেই, কেননা এদের মধ্যে কোনো-রকম ঈক্যের সূত্র না থাকলে ভাল ঠিক থাকত না, ছন্দপতন হয়ে যেত। একটু লক্ষ করলে দেখা যাবে এখানে প্রত্যেক ছেদেই স্বরবর্ণের অর্থাৎ স্বরাস্ত্র ব্যঞ্জনবর্ণের সংখ্যা সমান আছে, কেবল শেষ ছেদে একটি করে স্বরাস্ত্র ব্যঞ্জন। (তা ছাড়া X-চিহ্নিত দুটো জায়গায় ব্যতিক্রম দেখা যাবে,—এক জায়গায় একটা স্বর কম, আর-এক জায়গায় একটা স্বর বেশি। কিন্তু এ ব্যতিক্রম সাধারণ নিয়ম দুর্বল হয় না, বরং প্রবলই হয়। এ সঙ্গন্ধে যথাস্থানে আর বলা যাবে।) এজন্যই ছন্দু তাদের উপর ভর দিয়ে মোজা দাঁড়িয়ে থাকতে পেরেছে, কোনো দিকে কাত হয়ে পড়ছে না। যেহেতু এ ছন্দ প্রতি চরণের অন্তর্গত অক্ষরসংখ্যার বা মাত্রাসংখ্যার উপরে নির্ভর না করে স্বরসংখ্যার উপরে নির্ভর করছে, সেহেতু এ ছন্দকে 'স্বরবৃত্ত' নাম দেওয়া সংগত মনে করি।

ছন্দের নামকরণের সময় সকলের আগে দেখতে হবে কোন্ মূলসূত্র বা ঐক্যভিত্তির উপরে নির্ভর করে ছন্দের শৌধটি দাঁড়িয়েছে, এবং সে দিকে লক্ষ রেখেই তার নামকরণ করতে হবে। অক্ষরবৃত্ত নির্ভর করে অক্ষরসংখ্যার উপরে, মাত্রাবৃত্ত মাত্রাসংখ্যার উপরে, এবং স্বরবৃত্ত স্বরসংখ্যার উপরে। এখানেই বাংলা ছন্দের তিন ধারার পার্থক্য।

মাত্রাবৃত্ত ছন্দের সঙ্গে স্বরবৃত্তের গোলমাল হয়ে যাবার বিশেষ কোনো আশঙ্কা নেই। কিন্তু অক্ষরবৃত্তের সঙ্গে স্বরবৃত্তের পার্থক্য কোথায়, এ প্রশ্ন হতে পারে। ছন্দশাস্ত্রে অক্ষরের এই সংজ্ঞা দেওয়া হয়েছে যে, যে বর্ণ বা বর্ণসমষ্টি একসঙ্গে উচ্চারিত হয় তাকেই ‘অক্ষর’ বলা হয় এবং এ অক্ষর আর ইংরেজি সিলেবল্ (syllable) একই জিনিস। কিন্তু যে কয়টি ব্যঞ্জনবর্ণ একটি স্বরবর্ণকে আশ্রয় করে থাকে সে কয়টিই একসঙ্গে উচ্চারিত হয়। সুতরাং কোনো শব্দে বা ছন্দে স্বরসংখ্যা যত, অক্ষর বা সিলেবল্-এর সংখ্যাও তত। কাজেই স্বরবৃত্তকে অক্ষরবৃত্ত থেকে পৃথক করার উপায় কি, এ প্রশ্ন হতে পারে। দুটো দৃষ্টান্ত দিচ্ছি—

আমারে ফিরায়ে লহ, অয়ি বহুধ্বরে।

—রবীন্দ্রনাথ, ‘সোনার তবী’, বহুধ্বরা

এ ছন্দে স্বরসংখ্যা যত, অক্ষর বা সিলেবল্-এর সংখ্যাও তত। আবার—

হাস্তমুখে অদৃষ্টেরে করব মোরা পরিহাস।

—ববীন্দ্রনাথ, ‘কল্পনা’, ততভাগাব গান

এখানেও স্বরসংখ্যা এবং অক্ষরসংখ্যা একই। সুতরাং কোনটা কি ছন্দে রচিত, তা নিরূপণ করার উপায় কি? এ পার্থক্য নির্ণয় করার কয়েকটা উপায় আছে।

প্রথমতঃ, তাদের ধ্বনিই তাদের পার্থক্য বুঝিয়ে দেয়। অক্ষরবৃত্তের ধ্বনি গম্ভীর কিন্তু একঘেয়ে; স্বরবৃত্তের ধ্বনি চপল এবং নৃত্যপরায়ণ। অক্ষরবৃত্তে যুক্তবর্ণের বৃদ্ধির সঙ্গে সঙ্গে তার গাম্ভীর্য বাড়তে থাকে, কিন্তু স্বরবৃত্তে যুক্তবর্ণ তার চাপল্য এবং নৃত্যপরায়ণতাকেই বাড়িয়ে তোলে। উদ্ভূত ছত্র-দুটো পড়লেই ধ্বনির পার্থক্যটা ধরা পড়ে।

দ্বিতীয়তঃ, স্বরবৃত্তে যত ঘন ঘন ছেদ বা যতি পড়ে, অক্ষরবৃত্তে তত ঘন ঘন পড়ে না। এই ঘন ঘন যতিই স্বরবৃত্তের নৃত্যচপলতার কারণ। উদাহরণ যথা—

আমারে ফিরায়ে লহ, | অয়ি বহুধ্বরে |

এখানে দুটোমাত্র যতি। কিন্তু

হাস্তমুখে | অদৃষ্টেরে | করব মোরা | পরিহাস |

এখানে যতি পড়েছে চার বার।

তৃতীয়তঃ, কথিত বাংলায় হলন্ত বর্ণের সংখ্যা খুব বেশি এবং এসমস্ত

হলন্ত বর্ণের ঝোঁকে কথিত বাংলায় একটা তালের সৃষ্টি হয়। কিন্তু স্বরপ্রধান সাধু বাংলায় তাল নেই, সুরের গান্ধীর্থ আছে। এজন্যই আজ পর্যন্ত কোনো কবি অক্ষরবৃত্ত ছন্দে কথিত বাংলার ব্যবহার করতে সাহস পান নি। অক্ষরবৃত্ত ছন্দ কথিত বাংলার হলন্ত বর্ণকে গ্রাহ্য করতে পারে না, অগ্রাহ্য করতে পারে না; কাজেই পাশ কাটিয়ে যায়। কর্ব ধব্ব প্রভৃতি শব্দকে অক্ষরবৃত্ত দুইও ধরতে পারে না, তিনও ধরতে পারে না; অথচ খর্ব গর্ব প্রভৃতি শব্দ অনাক্ষসে ব্যবহারে লাগায়। কর্বত ধব্বত প্রভৃতি শব্দ অক্ষরবৃত্তের ধাতে সন্ম না, অথচ মর্ত্য গর্ত প্রভৃতি খুব সহ হয়। কাজেই যেখানে সাধু ভাষার (যথা—ধরিব করিব প্রভৃতির) প্রয়োগ দেশা যাবে, সেখানেই অক্ষরবৃত্তের ব্যবহার হয়েছে বুঝতে হবে এবং যেখানে কথিত বাংলার প্রয়োগ ও কাজেই হলন্ত বর্ণের প্রাচুর্য, সেখানেই স্বরবৃত্তের তাল কানে ধরা দেবে।

কিন্তু ঃ তিনটি পার্থক্য প্রকৃতপক্ষে একটাকে অক্ষরবৃত্ত ও অপরটাকে স্বরবৃত্ত বলার কারণ হতে পারে না। কেননা এ তিন পার্থক্য ওই দুই ছন্দের বৈশিষ্ট্য নির্দেশ করছে মাত্র, তাদের প্রকৃতিগত ভিন্নতা বুঝিয়ে দিচ্ছে না। এ ভিন্নতা নিরূপণ করার প্রধান উপায় এই ঃ—বাংলা অক্ষরবৃত্তে কেবল স্বরবর্ণ বা স্বরাস্ত্র ব্যঞ্জনবর্ণই অক্ষরসংখ্যার নিয়ামক নয়, কারণ পূর্বেই বলা হয়েছে যে, বাংলা অক্ষরবৃত্তে পদাস্ত্রস্থিত অ-স্বর বা হলন্ত উচ্চারিত ব্যঞ্জনও অক্ষর বলে গণ্য হয়। স্বরবৃত্তে স্বরহীন ব্যঞ্জনকে গণনা করা হয় না। যথা—

ওধ্ বৈকুণ্ঠে তরে | বৈষ্ণব্ধ গান্ ?

—ববীন্দ্রনাথ, 'সোনার তরী', বৈষ্ণব কবিতা

এখানে তিনটি অক্ষরের হলন্ত উচ্চারণ হচ্ছে, কিন্তু তথাপি পদের অস্তে আছে বলে তারা অক্ষর বলে গণ্য হয়েছে। স্বরবৃত্তে এমন হবার জো নেই। যথা—

ধ্যানে তোমারু | রূপ্ দেখি গো | স্বপ্নে তোমারু | চরণ্ চুমি।

—সত্যেন্দ্রনাথ, 'অত্র-অবীর', গঙ্গাজলি বঙ্গভূমি

এখানে চারটি বর্ণের হলন্ত উচ্চারণ হচ্ছে, আর এদের গণনার মধ্যেও ধরা হয় নি। সুতরাং এ ছন্দ স্বরবৃত্ত। যেখানে পদাস্ত্রস্থিত স্বরহীন ব্যঞ্জন নেই, সেখানে ধ্বনির বৈচিত্র্য, যতি এবং ভাষার সাহায্যে ছন্দ ঠিক করতে হয়।

সপ্ত দিবানিশি লঙ্কা | কাঁদালা বিষাদে ।

—মধুসূদন, ‘মেঘনাদবধ’, নবম সর্গ, ৪৪৩

ধ্বনি গম্ভীর, দীর্ঘ ছেদের পর যতি এবং সাধু ভাষার প্রয়োগ আছে। স্তত্রাং ছন্দ অক্ষরবৃত্ত।

সিন্ধু তুমি | বন্দনীয় | বিশ্ব তুমি | মাহেশ্বরী ।

—সত্যেন্দ্রনাথ, ‘অত্র-আবীর’, সমুদ্রাষ্টক

ধ্বনি নৃত্যপর, যতি ঘন ঘন, স্তত্রাং ছন্দ স্বরবৃত্ত। স্বরবৃত্তের আর-একটা দৃষ্টান্ত দিই।—

কতই কথা | লিখছে সাগর | লিখছে বারো | মাস,

উতলা ঢেউ | লিখছে সাগর | -মখন-ইতি | -হাস।

—সত্যেন্দ্রনাথ, ‘অত্র-আবীর’, পূবীর চিঠি

প্রথম দেখলেই মনে হবে ছন্দপতন হয়েছে, কেননা দুই ছত্রেরই প্রথম চরণে পাঁচটি করে স্বরবর্ণ দেখা যাচ্ছে। দেখা যাচ্ছে বটে, কানে কিন্তু পাঁচটি স্বর শোনা যাচ্ছে না; কাজেই কোথাও কোনো খটকা লাগছে না। তার কারণ কি? কারণটি হচ্ছে এই।—‘কতই’ এবং ‘ঢেউ’, এ দুটো শব্দের ‘অই’ এবং ‘এউ’, এই জোড়াস্বর-দুটোকে এক-একটি স্বর বলে শোনা যাচ্ছে এবং তারা এক-একটি স্বর বলেই গণ্যও হয়েছে। কেননা, এখানে ই এবং উ-র পূর্ণ উচ্চারণ হচ্ছে না, এরা অর্ধস্বর মাত্র। ‘ইতিহাস’-এর ই এবং ‘কতই’-এর ই উচ্চারণ করলেই টের পাওয়া যাবে ‘ইতিহাস’-এর ই-র পূর্ণ উচ্চারণ হচ্ছে, আর ‘কতই’ শব্দের ই-র অর্ধ উচ্চারণ হচ্ছে। তেমনি ‘উতলা’র উ পূর্ণ-উ, কিন্তু ‘ঢেউ’-এর উ অর্ধ-উ। স্বরবৃত্ত ছন্দে হলন্ত ব্যঞ্জনবর্ণের মত অর্ধস্বরেরও গণনা হয় না। স্তত্রাং পূর্বোক্ত ছন্দটিতে পতন ঘটে নি। আর-একটা দৃষ্টান্ত—

এই সন্দের | ভীষণ মধুর | কাছে থেকেও | দূর।

—সত্যেন্দ্রনাথ, ‘অত্র-আবীর’, পূবীর চিঠি

এখানে ‘এই’ এবং ‘এও’, এ দুটো যুক্তস্বরকে এক-এক স্বর বলে ধরা হয়েছে।

এ স্থলে একটা খুব প্রয়োজনীয় কথা উল্লেখ করা সংগত মনে করি। বাংলা বর্ণমালায় ‘ঐ’ এবং ‘ঔ’-কে এক-একটি স্বরবর্ণ বলে গণ্য করা হয়। কিন্তু বাংলায় অই এবং অউ, এ দুটো যুক্তস্বরের উচ্চারণ ঐ এবং ঔ-এর উচ্চারণ থেকে অভিন্ন। তা যদি হয়, তবে ‘আই’, ‘এই’, ‘ওই’, ‘এও’ প্রভৃতি যুক্তস্বরকেও

বাংলা বর্ণমালায় স্থান দেওয়া উচিত। এ কথার এ উত্তর দেওয়া যেতে পারে না যে, ‘ঐ’ এবং ‘ঔ’ সংস্কৃত বর্ণমালায় আছে বলেই বাংলা ধ্বনির বর্ণমালায়ও স্থান পাবে, আর ‘আই’, ‘এই’ প্রভৃতি যুক্তস্বরগুলো সংস্কৃত বর্ণমালায় নেই বলে বাংলায়ও থাকবে না। সংস্কৃত ভাষায় ঐকার এবং ঔকারের উচ্চারণ আছে বলেই ও দুটো সংস্কৃত বর্ণমালায় স্থান পেয়েছে। বাকি যুক্তস্বরগুলোর উচ্চারণ সংস্কৃত ভাষায় নেই, তাই সেগুলোকে সংস্কৃত বর্ণমালায় স্থান দেবার প্রয়োজনই হয় নি। কিন্তু বাংলা ভাষায় এসমস্ত যুক্তস্বরের উচ্চারণ যখন আছে, তখন বাংলা বর্ণমালায় তাদের স্থান না দেবার কোনো সংগত কারণ নেই। এ দিক দিয়ে দেখতে গেলে বাংলা বর্ণমালা অসম্পূর্ণ রয়ে গেছে। বাংলা ছন্দের আলোচনায় বাংলা বর্ণমালা বা বাংলা উচ্চারণতত্ত্বের বিস্তৃত আলোচনা শোভা পায় না। কিন্তু স্বরবৃত্তের আলোচনাকালে বাংলা স্বরতত্ত্বকে তো একেবারে উপেক্ষা করা গেলো না। তাই এ বিষয়ে সংক্ষেপে আলোচনা করা গেল। বাংলার বৈয়াকরণিক বাংলা স্বরবর্ণমালার যে অসম্পূর্ণতা উপেক্ষা করেছেন, বাংলা স্বরবৃত্ত ছন্দের কবি সে ক্রটিকে সংশোধন করে নিয়েছেন।

‘অই’, ‘অউ’, ‘এই’, ‘এউ’, ‘এও’ প্রভৃতি যুক্তস্বরের অন্তর্স্থিত ই, উ, ও, প্রভৃতি অর্ধস্বরকে স্বরবৃত্তের হিসাবে গণনা করা হয় না বটে, কিন্তু তা বলে তাদের যে কোনো মূল্য নেই তা নয়। এই অর্ধস্বরগুলো হসন্ত বাঞ্ছনবর্ণের মতোই পূর্ববর্তী স্বরকে গুরুত্বদান করে তার মাত্রা বাড়িয়ে দেয় এবং ছন্দকে তরঙ্গিত করে তোলে। যথা—

কতই কথা | লিখে সাগর | লিখে বারো | মাস।

এখানে অর্ধস্বর ই এবং হলন্ত থ, র, স, এই চারটে বর্ণ ছন্দকে আঘাত করে করে নাচিয়ে তুলছে। যদি লেখা হত

কত কথা | লিখে সাগর | লিখে বারো | মাস।

তা হলে ছন্দ কেমন তরঙ্গহীন একঘেয়ে হয়ে পড়ত।

অন্নদা তুই | অন্ন দিতে | পিছপা নহিস | বৈরীকে,

গৌরী তুমি | তৈরি তুমি | গিরিরাজের | গৈরিকে।

—সত্যেন্দ্রনাথ, ‘অত্র-আবীর’, গঙ্গাহৃদি বঙ্গভূমি

এখানে ‘উই’, ‘অই’ (ঐ) এবং ‘অউ’ (ঔ), এই তিনটে যুক্তস্বরের মূল্য কতখানি তা অনায়াসেই বোঝা যায়। পূর্বে বলা হয়েছে সংস্কৃত দীর্ঘস্বরগুলোরও বাংলায়

ব্রহ্ম উচ্চারণই হয়। বাংলায় দীর্ঘ-ঈকার ও দীর্ঘ-উকারের উচ্চারণ ব্রহ্ম-ইকার ও ব্রহ্ম-উকারের উচ্চারণ থেকে একটুও পৃথক নয়। কিন্তু দীর্ঘ উচ্চারণের অভাবে ভাষা অলস ও পঙ্গু হয়ে পড়ে। সংস্কৃত ভাষায় স্বরের ব্রহ্ম-দীর্ঘ উচ্চারণ আছে, ইংরেজিতেও আছে। তা ছাড়া ইংরেজিতে স্বরের উপর অ্যাকসেন্ট বা ঝোঁক দিয়ে উচ্চারণ করার বিধি আছে। তাই সে ভাষা কখনও অলসতা প্রকাশ করে না। বাংলা ভাষার এ দৈন্য দূর করছে তার যুক্তস্বরগুলো।

পূর্বে বলা হয়েছে, বাংলা মাত্রাবৃত্ত ছন্দে সব স্বরেরই এক মাত্রা, কেবল ‘ঐ’ এবং ‘ঔ’ দ্বিমাত্রিক। ঠিক একই কারণে ‘উই’, ‘এই’, ‘ওই’ প্রভৃতি স্বরগুলোকেও মাত্রাবৃত্তে দ্বিমাত্রিক বলেই ধরা হয়।—

ঐ আসে ঐ | অতিভৈরব | হরষে  
জলসিক্ত | ক্ষিতিসৌরভ | রভসে  
ঘনগৌরবে | নবর্যোবনা | বরষা  
শ্রামগন্তীর | সরসা।

—রবীন্দ্রনাথ, ‘কল্পনা’, বর্ষ মঙ্গল

এখানে যেমন ‘ঐ’ এবং ‘ঔ’-কে দ্বিমাত্রিক ধরা হয়েছে। তেমনি—

কাছে ‘যাই’ যার | দেখিতে দেখিতে | চলে যায় ‘সেই’ | দূরে,  
হাতে ‘পাই’ যারে | পলক ফেলিতে | তারে ছুঁয়ে ‘যাই’ | ঘুরে।  
কো‘থাও’ থাকিতে | না পারি ক্ষণেক, | রাখিতে পারি নে | কিছু,  
মত্ত হৃদয় | ছুটে চলে যায় | ফেনপুঞ্জের | পিছু।

— ?

এখানেও ‘আই’, ‘এই’ এবং ‘আও’-কে দ্বিমাত্রিক ধরা হয়েছে।

নাই আর দেয়ি, | ভৈরব ভেরী | বাহিরে উঠেছে | বাজি।’

—রবীন্দ্রনাথ, ‘কল্পনা’, বিদায়-১

এখানে ‘আই’ কেমন করে ঐ-কারের সঙ্গে সমান তাল রাখছে তা লক্ষ করার বিষয়।

১ ধ্বনিগত তালসাম্য পরিষ্কৃত করবার প্রয়োজনে মূলপাঠ লেখক-কর্তৃক স্থান পরিবর্তিত।  
মূলে আছে ‘আর নাই দেয়ি, ভৈরব ভেরী’।



স্বরবৃত্তের আরও একটা দৃষ্টান্ত দেওয়া দরকার।—

দুঃখে যখন | বাজিয়ে তোলে | প্রাণ,  
তীব্র হুখে | গাই যে বসে | গান।

—পারীমোহন, ‘দুঃখ ও কাব্য’, প্রবাসী ১৩২৭ কার্তিক

এখানে দ্বিতীয় ছত্রের দ্বিতীয় চরণে ছন্দপতন হয় নি। কেননা ‘আই’কে দেখতে দুটো দেখা গেলেও আসলে সে একটিমাত্র স্বর, হুতরাং ‘গাই’ এক সিলেব্‌ল। কিন্তু প্রথম ছত্রের দ্বিতীয় চরণে ছন্দের পতন অনিবার্য বলেই মনে হয়। অথচ এখানেও কানে বেতাল ঠেকছে না। কারণ এখানে ‘ই’ এবং ‘য়ে’, এ দুটো অক্ষর বস্তুতঃ এক অক্ষরের মতোই উচ্চারিত হচ্ছে। সংস্কৃতের রীতিতে উচ্চারণ করলে ‘য়ে’ আর ‘ইয়ে’ তুল্যমূল্য। আসলে ‘বাজিয়ে’ শব্দটি এখানে ‘বাজ্‌য়ে’-র মতো উচ্চারিত হয়েছে। ‘ইয়ে’কে এক অক্ষরের মতো উচ্চারণ করাতে আরও একটু লাভ এই হ-। যে, ‘জ’ বর্ণটি হসন্ত হয়ে পড়েছে এবং তাতে ছন্দ তরঙ্গিত হয়ে উঠেছে। যথা—

|                    |                    |  
দুঃখে যখন | বাজ্‌য়ে তোলে | প্রাণ,  
|                    |                    |  
তীব্র হুখে | গাই যে বসে | গান।

কিন্তু স্বরবৃত্ত ছন্দের সর্বত্র ‘ইয়ে’ একাক্ষরের মতো উচ্চারিত হয় না। কারণ, লক্ষ করলেই দেখা যাবে, এখানে দ্রুত উচ্চারণ করতে হয়েছে বলই ‘ইয়ে’র একাক্ষরের মতো উচ্চারণ হয়েছে। হুতরাং যেখানে দ্রুত উচ্চারণের প্রয়োজন নেই সেখানে তার একাক্ষরের মতো উচ্চারণও হবে না। যদি ‘ইয়ে’র অব্যবহিত পরেই যতি থাকে, তা হলে দ্রুত উচ্চারণের প্রয়োজন হবে না; হুতরাং তখন তার দ্বিস্বর উচ্চারণই হবে। ‘বাজিয়ে তোলে’-কে উলটিয়ে নিয়ে পড়বার চেষ্টা করলেই এইটে টের পাওয়া যাবে। ‘বাজিয়ে তোলে’—এখানে চার স্বর। কিন্তু ‘তোলে বাজিয়ে’ বললে পাঁচ স্বর হয়ে যাবে, কাজেই ছন্দপতন হবে।

অমন আড়াল দিয়ে | লুকিয়ে গেলে | চলবে না।

—রবীন্দ্রনাথ, ‘গীতাঞ্জলি’, ২৭

এখানে ‘দিয়ে’র পরেই যতি আছে, হুতরাং ‘ইয়ে’র দ্বিস্বর উচ্চারণ। কিন্তু ‘লুকিয়ে’র পরে যতি নেই, কাজেই ‘ইয়ে’র উচ্চারণ একস্বরের মতো। একজগ্‌ই

কাঁপিয়ে পাখা | নীল পতাকা | জুটল অলি | -কুল।

—দীনবন্ধু মিত্র, ‘বিবিধ গদ্য-পদ্য’ (গ্রন্থাবলী), প্রভাত

এখানে ছন্দপতন হয় নি। ‘কাঁপিয়ে পাখা’ বলতে চার স্বর গণনা করা হয়েছে।

‘ইয়ে’র যেমন স্থানবিশেষে একস্বরের মতো উচ্চারণ হয় তেমনি হাওয়া হোওয়া প্রভৃতি শব্দের ‘ওয়া’কেও একস্বর বলেই ধরা হয়। কিন্তু ‘ওয়া’র উচ্চারণ সর্বত্রই একস্বর এবং সে উচ্চারণ অন্তঃস্থ ব-এর তুল্যা। যথা—

১। কে বলে নেই | হাওয়ায় নিশান | পারিজাতের | সৌরভের।

—সত্যেন্দ্রনাথ, ‘অত্র-আবীর’, গঙ্গাহৃদি বঙ্গভূমি

২। তোমার হোওয়া | লাগলে পরে | একটুকুতেই | কাঁপন ধরে।

—রবীন্দ্রনাথ, ‘গীতবিতান’, প্রকৃতি ২০৪

প্রথম দৃষ্টান্তে ‘হাওয়া’র পরে বতি নেই, দ্বিতীয়টিতে ‘হোওয়া’র পরে আছে। কিন্তু দুটোতেই ‘ওয়া’র একস্বর উচ্চারণ।

এবার স্বরবৃত্ত ছন্দের যথার্থ ব্যতিক্রমের কয়েকটা দৃষ্টান্ত দিচ্ছি। যথা—

১। মেঘের উপর | মেঘ করেছে | রঙের উপর | রং,

×

মন্দিরেতে | কাঁসর-ঘণ্টা | বাজল ঠং | ঠং।

—রবীন্দ্রনাথ, ‘কড়ি ও কোমল’, বৃষ্টি পড়ে টাপুর টুপুর

×

২। গ্রহবিপ্র | আশীর্বাদ | করি’

×

ধানদূর্বা | দিন তাহার | মাথে।

—রবীন্দ্রনাথ, ‘কথা’, বিবাহ

×

×

৩। ‘গব্ গব্ গব্’ | গর্জে দেয়া | ‘বব্ বব্ বব্’ | বৃষ্টি,

চন্দ্র ভায়া | সীতরে চলেন | নাইক তাতে | দৃষ্টি।

—হুম্মিল বসু, ‘চন্দ্র ভায়ায় পদ্মাপার’, প্রবাসী ১৩২৮ চৈত্র

উক্ত দৃষ্টান্ত-তিনটেতেই চিহ্নিত স্থানগুলোতে এক-একটি স্বর কম আছে। কিন্তু এ



অভাবে ছন্দের পতন না বলে ব্যতিক্রম বলাই সংগত। কেননা, এসকল স্থলে কোনো একটা স্বরকে একটু টেনে উচ্চারণ করা হয় বলে মোটের উপর ছন্দের ওজন ঠিক থেকে যায়, হ্রতরাং পতন হয় না। দৃষ্টান্তের ‘ঠং’, ‘বাদ’ এবং ‘ধান’, এই তিনটে শব্দের স্বরগুলোকে একটু দীর্ঘ উচ্চারণ করা হয়। কিন্তু ‘গব্ গব্ গব্’ এবং ‘বব্ বব্ বব্’, এ দু-জায়গায় প্রত্যেকটা স্বরকেই একটু টেনে উচ্চারণ করতে হয় বলে ব্যতিক্রমটা কানে বড় ঠেকে না। এরকম ব্যতিক্রমের দৃষ্টান্ত ইংরেজি ছন্দেও অনেক পাওয়া যায়। যথা—

× ×

১। Hark', | hark', | the hor' | -rid sound'.

—John Dryden, 'Alexander's Feast', Golden Treasury

×

But the te' | -der grace' | of a day' | that is dead'.

—Alfred Tennyson, 'Break, break, break', Golden Treasury

এখানে চিহ্নিত পদগুলোতে এক-একটি স্বর বা সিলেব্ল্ কম আছে।

স্বরবৃত্তের এ ব্যতিক্রম আধুনিক কবিদের রচনায় খুব কমই দৃষ্ট হয়। কিন্তু গ্রাম্য ছড়া পাঁচালি প্রভৃতিতে এ ব্যতিক্রম বহুলপরিমাণে দেখা যায়। যথা—

বৃষ্টি পড়ে | টাপুর টুপুর, | নদেয় এল | বান,

×

শিবঠাকুরের | বিয়ে হল, | তিন কণ্ঠে | দান।

×

×

এক কণ্ঠে | রাঁধেন বাড়েন, | এক কণ্ঠে | থান,

×

×

এক কণ্ঠে | না খেয়ে | বাপের বাড়ি | যান ॥

—রবীন্দ্রনাথ, 'লোকসাহিত্য', ছেলে-ভুলানো ছড়া

এ ছড়াটিতে পাঁচ জায়গায় ব্যতিক্রম আছে। আধুনিক কালে রচিত ছেলেদের ছড়াতেও এ ব্যতিক্রমের অভাব নেই। যথা—

×

×

দুধ দেবে, | ছানা দেবে, | ক্ষীর দেবে | আর ;

ময়দা দেবে, | হুজি দেবে, | সাজাইয়া | ভার।

আধা ছানার | গোলা দেবে, | রসগোলা | কত ;

× ×

সরভাজা | সীতাভোগ | কিনতে পাবে | যত ।

×

আম দেবে, | কাঁঠাল দেবে, | দেবে তালের | শাঁস ;

ষড় করে | পুষতে দেবে | পায়রা ময়ূর | হাঁস ।

— ?

এখানেও পাঁচটি ব্যতিক্রম আছে। প্রাচীন কালের কয়েকটা ছড়ার দৃষ্টান্ত দিচ্ছি।—

×

১। কটা মাথা | কার ঘাড়ে ।

রাজার ঘাটে | ডকা মারে ॥

—দক্ষিণায়ল্লন, 'ঠাকুরদাদার ঝুলি', শঙ্খমালা

×

২। সেই কপালে | সেই টিপ ।

সাধুর ভিটায় | সোনার দীপ ॥

—দক্ষিণায়ল্লন, 'ঠাকুরদাদার ঝুলি', শঙ্খমালা

×

৩। যে রজন | খেয়েছি আমি | বারো বংসর | আগে,

×

×

আজ কেন | জিতে আমার | সেই রজন | লাগে ॥

—দক্ষিণায়ল্লন, 'ঠাকুরদাদার ঝুলি', শঙ্খমালা ১

এখানেও পাঁচটি ব্যতিক্রম আছে। কেবল প্রাচীন ছড়ায় কেন, প্রাচীন সব রচনাতেই এরকম বহু দৃষ্টান্ত দেখা যায়। ময়নামতীর গান থেকে নমুনা দেখাচ্ছি।—

১ এই তিনটি দৃষ্টান্তই বীণেশচন্দ্র সেন-রচিত 'বঙ্গভাষা ও সাহিত্য' গ্রন্থ (চতুর্থ সং ১৯২১, পৃ ৭৩ এবং ৭৮) থেকে উদ্ধৃত।

× ×

থায় না কেনে | বনের বাঘ, | তাক নাই | ডর।

×

নিত্‌কলকে | মরণ হউক | শ্রামির পদ | -তল ॥

×

তুমি হব্‌ | বটবৃক্ষ, | আমি তোমার | লতা।

রাঙা চরণ | বেড়িয়া লম্‌, | পালাইয়া যাবু | কোথা ॥

—‘ময়নামতীর গান’, অন্ননার উক্তি<sup>১</sup>

এ দৃষ্টান্তে চার স্থলে এক-একটি স্বরবর্ণ কম আছে। কৃত্তিবাসের আত্মপরিচয় থেকে কয়েকটি ছত্র উদ্ধৃত করছি।—

বঙ্গদেশে | প্রমাদ হইল | সকলে অ | -স্থির।

×

বঙ্গদেশ | ছাড়ি ওয়া | আইলা গঙ্গা | -তীর ॥...

রঘুবংশের | কীর্তি কেবা | বর্ণিবারে | পারে।

×

×

কৃত্তিবাস | রচে গীত | সরস্বতীর | বরে ॥

—কৃত্তিবাসের আত্মবিবরণ<sup>২</sup>

এখানে তিন জায়গায় এক-একটি করে স্বরবর্ণের অভাব আছে। এরকম ব্যতিক্রমের অসংখ্য দৃষ্টান্ত দেওয়া যেতে পারে। বলা হইল, উদ্ধৃত সমস্তগুলো দৃষ্টান্তই স্বরবৃত্ত ছন্দে রচিত এবং অধিকাংশ স্থলেই প্রাতি ছত্রে তেরো বা চোদ্দোটি করে স্বর বা সিলেবল আছে।

এই স্বরবৃত্ত ছন্দ বাংলা ভাষার সমবয়সী। যে দিন থেকে বাংলা ছড়া পাঁচালি প্রভৃতি রচনার সূত্রপাত হয়েছে সে দিন থেকে এ ছন্দও বাংলা কাব্যলক্ষ্মীর বাহন

১ দীনেশচন্দ্র সেন-রচিত ‘বঙ্গভাষা ও সাহিত্য’ গ্রন্থ (চতুর্থ সং ১৯১১, পৃ ৫৫) থেকে উদ্ধৃত। এ ক্ষেত্রে দীনেশচন্দ্র অনুসরণ করেছেন গ্রীয়ারসনের খৃত পাঠ। ঐষ্টবা কলকাতা বিশ্ববিদ্যালয় -প্রকাশিত ‘গোপীচন্দ্রের গান’ গ্রন্থের (১৯১২ সং, সম্মানসংখ্য, ২৯০) শাদটাকার উদ্ধৃত গ্রীয়ারসনের পাঠ।

২ দীনেশচন্দ্র সেন-রচিত ‘বঙ্গভাষা ও সাহিত্য’ গ্রন্থ (চতুর্থ সং ১৯২১, পৃ ১২৩ ও ১২৮) থেকে উদ্ধৃত।

হয়েছে। এ ছন্দে রচিত প্রাচীন কবিতা প্রভৃতিতে এই অভাবাত্মক ব্যতিক্রমের বহুল ব্যবহার দেখে আমার মনে হয় কালক্রমে এই ব্যতিক্রমই সাধারণ নিয়মে পরিণত হয়েছিল। এ ব্যতিক্রম সচরাচর শব্দের অস্তেই দেখা যায়। তার বিশেষ কারণও আছে। এ ছন্দে যদি শব্দের অস্তে কোনো বর্ণের হলন্ত উচ্চারণ হয় তবে তার অব্যবহিত পূর্বের স্বরটির দীর্ঘ উচ্চারণ করতে হয় এবং ওই দীর্ঘতাই একটি স্বরের অভাব পূরণ করে দেয়। কিন্তু শব্দের মধ্যে তা হবার হ্রবিধা নেই, কেননা পরবর্তী বর্ণগুলো সে ফাঁকটা পূর্ণ করবার জগ্য ব্যস্ত হয়ে পড়ে। শব্দের অস্তে বর্ণের হলন্ত উচ্চারণ হলে সে ফাঁক পূর্ণ করার কেউ থাকে না, কাজেই ছন্দের সুরেই সেটা ভরাট হয়ে যায়। আমার বিশ্বাস শব্দের অন্তস্থিত হলন্ত বর্ণের ফাঁকটা সুর দিয়ে ভরতি করাই কালক্রমে সাধারণ নিয়ম হয়ে পড়েছিল। তার একটু বিশেষ সুরোগও ছিল। তখনকার দিনে কাব্য ছড়া প্রভৃতি সব কিছুই সুর করে পড়া ও গাওয়া হত। সুতরাং গানের সুরে ছন্দের সব ফাঁক ভরতি হয়ে যেত বলে এই এক-আধটা স্বরের অভাব কানে বড় টের পাওয়া যেত না। আজকাল কোনো কবিতাই সুর করে পড়া হয় না, সুতরাং স্বরবৃত্ত ছন্দের এই অভাবাত্মক ব্যতিক্রমের অভ্যাসটা বদলে গেছে।

প্রাচীন বাংলা স্বরবৃত্তে যে এই একটিমাত্র পরিবর্তনই দেখা দিয়েছিল তা নয়। বৌদ্ধ ধর্মের অবসানের পরে হিন্দু ধর্মের অভ্যাসের সঙ্গে সঙ্গে যখন এ দেশে সংস্কৃত ভাষার চর্চা বহুলপরিমাণে আরম্ভ হয়েছিল তখন সংস্কৃত ছন্দও ধীরে ধীরে বাংলা ছন্দের উপরে স্বীয় প্রাধাত্য স্থাপন করেছিল। ফলে চোন্দো স্বরের স্বরবৃত্তের পরিবর্তে অক্ষরবৃত্তের পয়ার বাংলা ছন্দের প্রধান আসন অধিকার করেছিল। চোন্দো স্বরের স্বরবৃত্তে প্রতি পংক্তিতে চারটে যতি থাকে এবং প্রতি চার স্বরের পরে একটা যতি পড়ে। কিন্তু সংস্কৃত ছন্দে অত ঘন ঘন যতির ব্যবস্থা নেই। সুতরাং সংস্কৃত ছন্দের তালে তৈরি ধাঁদের কান, সেই সংস্কৃত পণ্ডিতদের হাতে পড়ে বাংলার নিজস্ব ছন্দটির প্রকৃতি সম্পূর্ণ বদলে গেল। সংস্কৃত কবিতা প্রথমতঃ স্বরবৃত্তের দুটো যতি তুলে দিলেন; বাকি রইল আরও দুটো—একটা আটের পর, আর-একটা ছয়ের পর। তা ছাড়া বাংলা স্বরবৃত্তের প্রকৃতি সম্বন্ধে অনভিজ্ঞ কবিতা স্বরসংখ্যা বা সিলেবল্-এর দিকে লক্ষ না রেখে সংস্কৃত অক্ষরবৃত্তের অনুকরণে কেবল আট-ছয়ের ঘর ভরতি করে যেতে লাগলেন। এমনি করে চোন্দো স্বরের স্বরবৃত্ত ছন্দের বিকৃতি থেকে চোন্দো অক্ষরের অক্ষরবৃত্ত পয়ারের উৎপত্তি হয়েছে।

পয়ার রচনায় যে সংস্কৃত ছন্দের কোনো আদর্শ ছিল না তাও নয়। সম্ভবতঃ জয়দেবের

সরসমংশমপি | মলয়জপকম্।

পশ্চতি বিষমিব | বপুষি সশঙ্কম্ ॥

—জয়দেব, 'গীতগোবিন্দ', গীত ৯।২

প্রভৃতি কবিতা এইসকল পয়ার-রচয়িতাদের আদর্শ ছিল। তার পর

পততি পতত্রে বিচলতি পত্রে

শঙ্কিতভবদুপযানম্।

রচয়তি শয়নং সচকিতনয়নং

পশ্চতি তব পশ্যানম্ ॥

—জয়দেব, 'গীতগোবিন্দ', গীত ১১।৩

প্রভৃতি কবিতা বোধ করি বাংলা ত্রিপদী ছন্দের পথপ্রদর্শক।

এমনি করে বাংলা স্বরবৃত্ত ছন্দ অক্ষরবৃত্তের প্রভাবের নীচে একেবারে চাপা পড়ে গেল। বহু দিন বাংলা সাহিত্যে স্বরবৃত্ত ছন্দের দেখা পাওয়া যায় নি। অনেক কালের পরে আজকাল আবার এ ছন্দ নবীন প্রতিভার সোনার কাঠির স্পর্শে বাংলা সাহিত্যে সজীব হয়ে উঠেছে।

এই অভাবায়ুক ব্যতিক্রমের পরিণামে স্বরবৃত্ত থেকে কি করে অক্ষরবৃত্তের উৎপত্তি হল তা আধুনিক কালের দুই-একটি রচনা থেকেও অহুমান করা যায়। পূর্বোক্ত 'গ্রহবিপ্র আশীর্বাদ করি' প্রভৃতি দুটো ছত্রই অনেকটা 'অক্ষরবৃত্তের মতো' শোনায়। আর-একটা দৃষ্টান্ত দিচ্ছি।—

+ +  
'জয় রানা | রাম সিঙের | জয়',  
মেত্রিপতি | উর্ধ্বস্বরে | কয়।  
কনের বক্ষ | কৈপে উঠে | ডরে,

+ +  
দুটি চক্ষু | ছল্ ছল্ | করে,  
+  
বরষাত্রী | ঝাঁকে সম | -স্বরে,

'জয় রানা | রাম সিঙের | জয়' ॥

—রবীন্দ্রনাথ, 'কথা', বিবাহ

উদ্ধৃত কবিতাটিতে তিন স্থলে এক-একটি স্বরের অভাব আছে। ‘ছন্ ছন্’, এখানে দুটো স্বরের অভাব আছে। এ কয়টা ব্যতিক্রম ছাড়া এ স্থলে স্বরবৃত্তের সব লক্ষণ বিদ্যমান আছে, অথচ এর ধ্বনিটা কেমন অক্ষরবৃত্তের মতো শোনায়। এর কারণ কি? অন্ততঃ এই ব্যতিক্রমগুলো যে এর একটা প্রধান কারণ তাতে সন্দেহ নেই।

অক্ষরবৃত্ত যে স্বরবৃত্তের ব্যতিক্রম থেকেই উৎপন্ন হয়েছে তাতে সন্দেহ নেই। কিন্তু স্বরবৃত্ত ছন্দে যথেষ্ট ব্যতিক্রম করলেই যে এ ছন্দ পাওয়া যাবে তা নয়। এ ব্যতিক্রমও একটা বাধাবীধি নিয়ম মেনে চলে। সে নিয়মটি এই যে, সাধারণতঃ শব্দের মধ্যস্থিত হলন্ত বর্ণকে গণনা না করে শব্দের অন্তস্থিত হলন্ত বর্ণের স্থানে এক স্বর গণনা করে ছন্দ রচনা করলেই অক্ষরবৃত্ত ছন্দ পাওয়া যায় এবং তাতে অধিকাংশ স্থলেই চার বা তার চেয়ে কম-সংখ্যক স্বরের পরে যতি পড়ে না। এ ছন্দে কচিৎ চার এবং অধিকাংশ স্থলে ছয়, আট বা দশ অক্ষরের পরে যতি স্থাপিত হয়। যথা—

মহাভারতের কথ্য | অমৃত-সমান্।

কাশীরাম্ দাস্ ভণে | শুনে পুণ্যবান্ ॥

এখানে যতি পড়েছে আট এবং ছয় অক্ষরের পরে, আর পাঁচটি শব্দের অন্তস্থিত হলন্ত-উচ্চারিত বর্ণকেও গণনার মধ্যে ধরা হয়েছে। এইটাই অক্ষরবৃত্ত ছন্দের লক্ষণ। স্বরবৃত্তের ব্যতিক্রমবিশেষ থেকে উৎপন্ন বলে অক্ষরবৃত্তকে একটি স্বতন্ত্র ছন্দ বলে গণ্য না করে এ ছন্দকে ‘ভঙ্গ-স্বরবৃত্ত’ বা ‘ব্যতিক্রান্ত স্বরবৃত্ত’ নাম দেওয়া যায়। কিন্তু স্বরবৃত্তের ব্যতিক্রমবিশেষ থেকে উৎপন্ন বলে এ ছন্দকে তুচ্ছ করা যায় না। এ ছন্দেরও যথেষ্ট স্বাভাব্য বা বৈশিষ্ট্য আছে। এর অসাধারণ ক্ষমতা সন্দেহ প্রবন্ধের আরম্ভেই অনেক কথা বলেছি। স্তবরাং খুব স্বল্প বিশ্লেষণ করে বলতে গেলে বলা উচিত, বাংলা ছন্দপ্রবাহিগীর প্রধান ধারা তিনটে নয়, দুটো— মাত্রাবৃত্ত আর স্বরবৃত্ত। কিন্তু স্বরবৃত্ত থেকে এক নতুন ধারা উদ্ভূত হয়ে বাংলা কাব্যসাহিত্যকে অপূর্ব শক্তি ও সৌন্দর্য দান করেছে।

## স্বরবৃত্ত ছন্দের বিশেষত্ব

সাধু বাংলা ও প্রাকৃত বাংলার মধ্যে আসল পার্থক্য হচ্ছে এই।— সাধু বাংলায় তাল নেই, নৃত্য নেই, আছে কেবল একঘেয়ে স্বর ; সে কখনও ছেলে ছলে টলে এঁকে-বঁকে যায়, কখনও এলিয়ে পড়ে লতিয়ে চলে ; কিন্তু কখনও সে নর্তনভঙ্গিতে তালে তালে পা ফেলে চলে না। পক্ষান্তরে ওই নৃত্যরূপী প্রাকৃত ভাষার বিশেষত্ব। উঠবে পড়িবে টলিবে চলিবে ধরিতেছে করিতেছে প্রভৃতি শব্দের সঙ্গে উঠবে পড়বে টলবে চলবে ধরছে করছে প্রভৃতি শব্দের তুলনা করলেই এ পার্থক্যটা ধরা পড়বে। সাধু শব্দগুলো গড়িয়ে গড়িয়ে চলেছে ; কিন্তু অসাধু শব্দগুলো সৈয়দুলের মতো তালে তালে পা ফেলে মার্চ করে চলেছে। এর কারণ হচ্ছে সাধু ভাষায় স্বরের বাহুল্য এবং প্রাকৃত ভাষায় হসন্ত বর্ণের বাহুল্য। সাধু বাংলায় সংস্কৃতের কাছে ধার-করা যুক্তবর্ণ ছাড়া হসন্ত বর্ণ নেই বললেই হয়। শব্দের মাঝখানে তো একেবারেই নেই। কিন্তু কথিত বাংলায় হসন্ত বর্ণের ছড়াছড়ি এবং এগুলো শব্দের মাঝখানে থেকে পরস্পরের গায়ে ঠোকাঠেকি ঠোকাঠুকি করে এক অদ্ভুত তালের সৃষ্টি করে। এজন্তে সাধু বাংলা যুক্তবর্ণের বহুল প্রয়োগ দ্বারা অক্ষরবৃত্তে গম্ভীর হয়ে উঠতে পারে। যথা—

চম্পক-অঙ্গুলি-ঘাতে | সংগীত-বংকারে।

—রবীন্দ্রনাথ, 'চিত্রা', বিজয়িনী

এবং মাত্রাবৃত্তে গানের স্বরে ঝংকার তুলতে পাবে। যথা—

ও কি শিজিত | ধনিছে কনক | -মঞ্জীরে ?

—রবীন্দ্রনাথ, 'কল্পনা', অসময়

অথবা যুক্তবর্ণ একেবারে বর্জন করে একঘেয়ে স্বরের ধারায় বয়ে যেতে পারে। যথা—

পাখি উড়ে যাবে | সাগরের পার,

স্বথময় নীড় | পড়ে রবে তার,

মহাকাশ হতে | ওই বারে বার

আমারে ডাকিছে | সবে।

—রবীন্দ্রনাথ, 'কল্পনা', বিদায়-১

কিন্তু এ ভাষা কিছুতেই প্রাকৃত বাংলার মতো ঘন দ্রুততালে নৃত্যচপল হয়ে উঠতে পারে না। যথা—

মেঘলা | থম্‌থম্‌ | স্বৰ্ধ | ইন্দু  
 ডুবল | বাদলায়, | দুলাল | সিদ্ধু ।  
 হেমক | -দষে | তৃণ | -স্তম্বে  
 ফুটল | হর্ষে | অশ্রু | -বিন্দু ॥

—সত্যেন্দ্রনাথ, 'বেলাশেষের গান', ছন্দহিলোল

প্রাকৃত বাংলায় সাধু বাংলার তুলনায় স্বরসংখ্যা অনেক কম এবং হ্রস্ব বর্ণের সংখ্যা অনেক বেশি। এজ্জাই স্বরবৃত্ত ছন্দে এমন অভূত নৃত্যতালের তরঙ্গসঞ্চারণ করা সম্ভব হয়েছে। অবশ্য এ কথাও বলা প্রয়োজন যে, স্বরবৃত্ত ছন্দে কেবল যে প্রাকৃত বাংলারই ব্যবহার হয় তা নয়; বরং এ ছন্দে সংস্কৃত যুক্তবর্ণের সদ্যব্যবহার করলে ছন্দের দ্বিগুণ শোভাবৃদ্ধি হয়। উদ্যত ছত্র-চারটিতে আটটি যুক্তাক্ষরবিশিষ্ট সংস্কৃত শব্দের ব্যবহারে ছন্দের তরঙ্গভঙ্গ কেমন মুখর হয়ে উঠেছে তা অনায়াসেই বোঝা যায়। কিন্তু স্বরবৃত্তে যে ভাষা ব্যবহৃত হয় সে ভাষায় ইয়াছে ইয়াছিল ইতেছে ইতেছিল প্রভৃতি ঢিলে-ঢালা রকমের স্বরবহুল প্রত্যয়ান্ত শব্দের ব্যবহার অসম্ভব। এই স্বরবর্ণের অল্প প্রয়োগই স্বরবৃত্ত ছন্দে ব্যবহৃত ভাষার বিশেষত্ব।

এ দিক দিয়ে দেখতে গেলে প্রাকৃত বাংলার সঙ্গে ইংরেজি ভাষার বেশ সাদৃশ্য আছে এবং ইংরেজি ছন্দের সঙ্গে বাংলা স্বরবৃত্তের তুলনা করা যায়। যে-কোনো একখানা ইংরেজি বই খুলে পড়লেই দেখা যাবে, এ ভাষায় স্বরান্ত ব্যঞ্জনবর্ণ ও হলন্ত ব্যঞ্জনবর্ণের সংখ্যা প্রায় সমান। প্রায় প্রত্যেক শব্দেরই মাঝখানে দু-একটি করে হলন্ত বর্ণ থাকে এবং এ বর্ণটি তার পূর্ববর্তী ও পরবর্তী বর্ণের মাঝখানে একটা ঢেউ তোলে। তা ছাড়া ইংরেজিতে একস্বর (monosyllabic) শব্দ অসংখ্য এবং তাদের অন্ত্রে প্রায়ই এক-একটি হলন্ত বর্ণ থাকে। সুতরাং দুটো একস্বর শব্দকে পাশাপাশি বসালেই তাদের মাঝখানে একটা হলন্ত বর্ণ পাওয়া যায় এবং এইটেই দুটো শব্দের মধ্যে একটা তরঙ্গভঙ্গি সৃষ্টি করে। কিন্তু ইংরেজি ছন্দের তরঙ্গলীলার প্রধান হেতু হচ্ছে এ ভাষার অ্যাকসেন্ট (accent) অর্থাৎ বোঁক দিয়ে উচ্চারণ করার ব্যবস্থা। ওই বোঁকের ব্যবস্থা থাকাতোই এ ভাষায় স্বর গুরুত্ব লাভ করে। যথা—lo-ver (লা'-ভার), daugh-ter



( ডে-মন্ ), de-mon ( ডি-মন )। এখানে মধ্যস্থলে হলন্ত বর্ণ না থাকা সত্ত্বেও আ, অ এবং ই-র উপরে ঝাঁক থাকাতে এদের গুরু উচ্চারণ হচ্ছে। এ বিষয়ের দিকে লক্ষ রেখে যদি ইংরেজি শব্দগুলোকে পর-পর এমনভাবে সাজানো যায় যে প্রতি দুই স্বরের মধ্যে একটি করে গুরুস্বর অর্থাৎ অ্যাক্সেন্ট থাকে, তা হলেই একটা ধারাবাহিক তরঙ্গলীলার উৎপত্তি হয় এবং ইংরেজি ছন্দোলক্ষ্মী ওই লহরীমালায় দুলতে থাকেন। যথা—

১। And ) out'a | -gain' I | curve' and | flow'  
To ) join' the | brim'-ming | ri'-ver,  
For ) men' may | come' and | men' may | go',  
But ) I' go | on' for | e'-ver.

—Alfred Tennyson, 'The Brook', Golden Treasury

২। Life' is | re'i-al | life' is | earn'-est,  
And' the | grave' is | not' its | goal';  
"Dust' thou | art', to | dust' re | -turn'-est"  
Was' not | spo'-ken | of' the | soul'.

—H. W. Longfellow, 'A Psalm of Life', Voices of the Night

ইংরেজি ছন্দশাস্ত্রকারেরা এ ছন্দকে দু' ভাগে বিভক্ত করে থাকেন। যে ছন্দে প্রতি পংক্তিচ্ছেদে দুটো স্বরের মধ্যে প্রথমটা লঘু দ্বিতীয়টা গুরু তার নাম Iambus ; যে ছন্দে প্রথমটা গুরু দ্বিতীয়টা লঘু তার নাম Trochee। কিন্তু আসলে এ দুটো ছন্দই এক। Iambus-এর প্রথম স্বরটাকে একটু আলগা উচ্চারণ করলেই এ ছন্দ Trochee থেকে অভিন্ন হয়ে যায়। উক্ত দৃষ্টান্ত-দুটো থেকেই তা বেশ বোঝা যায়। প্রথম দৃষ্টান্তটি Iambus-এর, দ্বিতীয়টি Trochee-র।

দুই স্বরের ছন্দ ছাড়া ইংরেজিতে তিন স্বরের ছন্দও আছে। এ ছন্দে প্রতি পাদে একটি গুরু ও দুটো লঘু স্বর থাকে। কিন্তু এ তিন স্বরের সাজানোর প্রকারভেদে এ ছন্দের তিনটে আকারভেদ হয়। প্রথমটা গুরু ও বাকি দুটো লঘু হলে তার নাম Dactyl ; মধ্যস্বর গুরু এবং বাকি দুটো লঘু হলে Amphibrach ; শেষের স্বর গুরু হলে তার নাম Anapaest। যথা—

## ১। আদিগুরু (Dactyl)—

Touch her not | scorn-ful-ly ;

Think of her | mourn-ful-ly,

Gent-ly and | hu-man-ly.

—T. Hood., 'The Bridge of Sighs', Golden Treasury

## ২। মধ্যগুরু (Amphibrach)—

Most friend-ship | is feign-ing,

Most lo-ving | mere fol-ly.

—W. Shakespeare ; 'Blow, blow...', Golden Treasury

## ৩। অন্তগুরু (Anapaest)—

Like the dawn | of the morn'.

Or the dews | of the spring'.

—Henry Francis Lyte, 'Agness', Golden Treasury

কিন্তু ইংরেজিতে মোটের উপর গুরুস্বরের সংখ্যা খুব বেশি এবং লঘুস্বরের সংখ্যা খুব কম হওয়াতে এ ভাষায় দুই স্বরের ছন্দই সর্বদা ব্যবহৃত হয়, তিন স্বরের ছন্দের প্রয়োগ খুব বিরল। পূর্বে বলা হয়েছে যে, ইংরেজি ভাষা ও প্রাকৃত বাংলা এবং ইংরেজি ছন্দ ও বাংলা স্বরবৃত্ত ছন্দের মধ্যে যথেষ্ট সাদৃশ্য আছে। কেবল হসন্তবর্ণের প্রাচুর্য ও স্বরবর্ণের অল্পতাই যে এই সাদৃশ্যের একমাত্র হেতু তা নয়। ইংরেজি ছন্দ সম্বন্ধে যে কয়েকটি সাধারণ নিয়মের উল্লেখ করেছি, বাংলা স্বরবৃত্ত ছন্দেও সে নিয়মগুলি অবিকল খাটে। কেবল প্রভেদ এই যে, ইংরেজিতে ঝাঁকের ব্যবস্থা বাঁধা-ধরা এবং ছন্দে এ ব্যবস্থার প্রবলতা খুব বেশি ; কিন্তু বাংলায় ঝাঁকের ব্যবস্থাও শিথিল এবং তার শক্তিও অতি মৃদু। আর-একটি প্রভেদ এই যে, ইংরেজিতে শব্দের আদি মধ্য অন্ত সর্বত্রই ঝাঁক থাকতে পারে, কিন্তু বাংলায় এ ঝাঁক সর্বদাই শব্দের আদিতে থাকে। বাংলায় যুক্ত বর্ণ বা হসন্ত বর্ণের সাহায্যে এই ঝাঁকের অভাব পূরণ করে নিতে হয়।

পূর্বোক্ত নিয়মগুলো মেনে স্বরবর্ণ বা সিলেবলগুলোকে লঘুগুরুক্রমে সাজিয়ে

গেলেই যেমন ইংরেজি ছন্দের ধ্বনিতরঙ্গের উৎপত্তি হয়, তেমনি কথিত বাংলাতেও ওই নিয়মগুলোর সাহায্যেই অতি অভূত উপায়ে নব নব ছন্দের সৃষ্টি করা হয়েছে। দু-একটা উদাহরণ দিয়ে বিষয়টা বিশদ করছি।—

Tell me | not in | mourn-ful | num-bers,  
Life is | but an | emp-ty | dream'.

—H. W. Longfellow, 'A Psalm of Life', Voices of the Night

এ দুটো ইংরেজি ছত্রের সঙ্গে

মোর্ন | নৃত্যে | ময় | থঞ্জন,  
মের্‌স | -মুদ্রে | চ'লছে | ম'হন।

—সত্যেন্দ্রনাথ, 'বেলাশেখের গান', ছন্দহিন্দোল

এ দুটো বাংলা ছত্র মিলিয়ে পড়লেই দুই ভাষা এবং দুই ছন্দের প্রকৃতিগত সাদৃশ্য স্পষ্ট হয়ে উঠবে। গুরুলঘু স্বরের এই পর্যায়ক্রমিক সমাবেশে যে চলনভঙ্গির উৎপত্তি হয়েছে সে যেন সৈন্তদলের যুদ্ধযাত্রা। পর্যায়ক্রমে গতি এবং যতি, পদোত্তোলন এবং পদক্ষেপের ফলে এ ছন্দে গমনের বেগ এবং নর্তনের স্পন্দ দু-ই রয়েছে। যত দিন প্রাকৃত বাংলার অন্তর্নিহিত এই শক্তিতত্ত্ব আবিষ্কৃত হয় নি, তত দিন বাংলা ছন্দকে এভাবে তালে তালে মার্চ করিয়ে নেওয়া সম্ভব ছিল না। আবার

Pic-ture it, | think of it, |  
Dis-so-lute | Man'!

—T. Hood, 'The Bridge of Sighs', Golden Treasury

এ শ্লোকাংশের সঙ্গে

সিন্ধুর টিপ্ | সিংহ' দ্বীপ্ |  
কাঞ্'চনময়্ | দেশ্'!

—সত্যেন্দ্রনাথ, 'কুহ ও কেকা', সিংহল

এ দুটো ছত্র মিলিয়ে পড়লেই ইংরেজি ছন্দের সঙ্গে বাংলা স্বরবৃত্তের নিগূঢ় ঐক্যটি প্রকাশ হয়ে পড়বে। কিন্তু প্রাকৃত বাংলাতেই ছন্দের এ স্পন্দন সম্ভবপর, সাধু বাংলায় ছন্দের এমন ধ্বনিকল্পন সৃষ্টি করা একেবারেই অসম্ভব।



আজকে তোমায় | দেখতে এলাম | জগৎ-আলো | নূরজাহান ।

সন্ধ্যারাতের | অন্ধকার আজ | জোনাক-পোকায় | স্পন্দমান ॥

—সত্যেন্দ্রনাথ, ‘অত্র-আবীর’, কবর-ই-নূরজাহান

এখানে ছন্দ কেমন আপন শক্তিতেই স্পন্দিত হয়ে উঠেছে ; কেবল দু-জায়গায় বহুতীক্রম আছে । কিন্তু

কিশোর যারা | প্রাণের টানে | চাইবে তারা | কিশোরী ।

হায় কি পাপে | রয়েছে দেশ | বিধির বিধান | বিসরি ॥

—সত্যেন্দ্রনাথ, ‘অত্র-আবীর’, সূতা-স্বরধর

এখানে ছন্দের স্বাভাবিক অনেকটা মৃদু হয়ে এসেছে ; কেবল দু-জায়গায় পদক্ষেপ সজোরে পড়েছে ।

বাংলায় গুরুস্বরের অপেক্ষাকৃত অভাবহেতু যদিও চতুঃস্বরের ছন্দই প্রধানতঃ ব্যবহৃত হয়, তথাপি গুরুস্বরবহুল শব্দগুলোকে বেছে বেছে প্রয়োগ করলে বাংলায় দ্বিস্বর এবং ত্রিস্বরের ছন্দও বেশ স্তন্দর কবিতা রচনা করা যায় । তার অভাব পূর্বেই দেওয়া হয়েছে । অবশ্য ইংরেজির মতো অত অনায়াসে বাংলায় দ্বিস্বর বা ত্রিস্বরের ছন্দ ব্যবহার করা যায় না । ইংরেজিতে প্রতি শব্দের নিজস্ব একসেন্ট বা ঝাঁকগুলোর যথাযোগ্য সদ্ব্যবহার করলে ইংরেজি ছন্দে প্রতি পাদের আদি মধ্য বা অন্তে গুরুত্ব স্থাপন করা যায় । বাংলাতেও তেমনি হলন্ত বা যুক্তবর্ণের সাহায্যে প্রতি পাদের সকল স্থানেই গুরুত্ব স্থাপন করা যায় ।  
যথা Amphibrach—

Dear Harp of | my Coun-try ! | in dark-ness | I found thee ;  
The cold chain | of si-lence | had hung o'er | thee long .

—Thomas Moore, ‘Dear Harp of my Country’, Irish Melodies

বসন্তে | ফুটন্ত | কুহুমটি ! -প্রায়

জীবন সে | দিনান্তে | ঝরেই কি | যায় ?

—লেখক

এখানে উভয় স্থলেই প্রতি পাদে মধ্যস্থরে গুরুত্ব রয়েছে। আরও কয়েকটা উদাহরণ দিলেই বাংলা ছন্দের শক্তির পরিচয় পাওয়া যাবে।

১। Iambus—

মহৎ | ভয়ের | মৃত্যু | সাগর, |  
বরন | তোমার | তমঃ | -শ্রামল ;  
মহেশ্বরের প্রলয় -পিনাক  
শোনাও আমায় শোনাও কেবল ॥

—সত্যেন্দ্রনাথ, 'অত্র-আবীর', সিন্ধুতাণ্ডব

২। Trochee—

পাখনায় | নাই ফাঁস,  
মন তার | নয় দাস,  
নীড় তার | মোর বুক,—  
এই মোর | এই হৃথ ।  
প্রেম তার বিশ্বাস,  
প্রেম তার বিস্ত,  
প্রেম তার নিখাস,  
প্রেম তার নিত্য ॥

—সত্যেন্দ্রনাথ, 'অত্র-আবীর', পিয়ানোর গান

৩। Dactyl—

ওই | সিন্ধুর টিপ্ | সিংহল দ্বীপ্ | কাঞ্চনময়্ | দেশ্  
ওই | চন্দন বার | অপের বাস, | তাম্বুলবন | কেশ্,  
বার | উত্তাল তাল -কুঞ্জের বায়্ মন্থর নি-বাস,  
আর | উজ্জল বার অম্বর, আব্ উজ্জল বার হাস ॥

—সত্যেন্দ্রনাথ, 'রূহ ও কেকা', সিংহল

যদিও দ্বিতীয় এবং তৃতীয় দৃষ্টান্তটিতে প্রতি পাদেই সবগুলো স্বরই গুরু, তথাপি ছন্দের বোঁক স্বভাবতঃ প্রথম স্বরের উপরেই পড়েছে বলে এ ছোটোকেও আদিগুরু ( অর্থাৎ Trochee ও Dactyl ) বলেই ধরা গেল।

বাংলায় নিজস্ব চতুঃস্বরের ছন্দ ছাড়া ইংরেজি বিশ্বর এবং ত্রিস্বর ছন্দ

রচনাও কেবল যে চলে তা নয়। বাংলায় দুই স্বর ও তিন স্বরের মিশ্রণে এক নতুন ছন্দের সৃষ্টি হয়েছে। কিন্তু ইংরেজিতে এই যৌগিক পঞ্চস্বরের ছন্দ রচনা করা চলে না। এ হিসাবে বাংলা স্বরবৃত্ত ইংরেজি ছন্দকেও জিতেছে। দুই স্বর ও তিন স্বরের মিশ্র ছন্দের উদাহরণ।—

কার ইঙ্-গিত্-বলে সিদ্ধুর ঢেউ চলে,

বজ্রের বেগ বাধা কার নিয়মে ?

খুলুণ্-ঠন্-রত জুর নিষ্-ঠুর বত

কার দুই পায় নত হয় চরমে ?

—সত্যেন্দ্রনাথ, 'জয়ধ্বনি', ভারতী ১৩২৫ বৈশাখ

তিন স্বর ও দুই স্বরের মিশ্রছন্দের একটা দৃষ্টান্ত দিচ্ছি।—

সংসারে একদিন | থাকবে না কেউ ভাই,

আর তবে যত্নার | ভয় কি রে, ভয় নাই।

নিঃশেষে ছঃখীর | অশ্রুটি শেষ কর,

সত্যেরে বন্ধের | খুন দিয়ে বেশ কর ॥

—লেখক

যদিও বাংলা স্বরবৃত্ত ছন্দ স্বীয় শক্তিতে সমস্ত ইংরেজি ছন্দের ধ্বনি প্রায় অবিকল প্রকাশ করতে পারে এবং যদিও কোনো কোনো বিষয়ে বাংলা স্বরবৃত্ত ইংরেজি ছন্দের চাইতেও অধিকতর ক্ষমতা দেখিয়েছে, তথাপি একটি অতি গুরুতর বিষয়ে বাংলা ছন্দ এখনও ইংরেজি ছন্দের অনেক পিছনে পড়ে আছে। ছন্দের যে শক্তিতে ইংরেজি ভাষায় *Paradise Lost*, *Childe Harold* প্রভৃতি অতি গুরুগম্ভীর বৃহৎ কাব্য রচিত হতে পেরেছে, বাংলা স্বরবৃত্তের সে ক্ষমতা আছে কি না, তা এখনও আবিস্কৃত হয় নি। বাংলা স্বরবৃত্তে 'পলাতক'র মতো অতি উৎকৃষ্ট কবিতাগ্রন্থ এবং 'গঙ্গাহৃদি বনভূমি' প্রভৃতি অপূর্ব কবিতা রচনা করা যায় তা দেখা গেছে। কিন্তু এ ছন্দে 'মেঘনাদবধ'এর মতো কাব্য বা 'বহুঙ্করা'র মতো কবিতা রচিত হতে পারে কিনা, এখনও তা জানা যায় নি। অর্থাৎ বাংলা স্বরবৃত্ত ছন্দ ছড়া-পাঁচালি ছেড়ে মহাকাব্যের বাহন হতে পারে কি না, এইটে হচ্ছে প্রশ্ন। আমার বিশ্বাস ইংরেজি ছন্দে যখন গম্ভীর ও গভীর কাব্য রচনা করা সম্ভব হয়েছে তখন বাংলা স্বরবৃত্তেও তা পায়ার সম্ভাবনা রয়েছে। দেখা গেছে

যেখানে হলন্ত বর্ণের সংখ্যাটা কিছু বেশি, সেখানে নাচুনি ভালটাই ওঠে সহজে, গম্ভীর স্বর প্রকাশ করা শক্ত। ইংরেজিতেও হলন্ত বর্ণের অভাব নেই এক ও ভাষার Trochee প্রভৃতি ছন্দে নৃত্যেরও অভাব নেই, অথচ ওই ভাষায় যখন *Paradise Lost* লেখা গেল তখন বাংলা স্বরবৃত্তেও গম্ভীর কাব্য রচনা করার সম্পূর্ণ আশা আছে বলে মনে করি। আশা করি বাংলার কবিবৃন্দ এ দিকে দৃষ্টিপাত করে মাতৃভাষার রত্নভাণ্ডারের আর-একটি কক্ষ উন্মুক্ত করবেন। বাংলার অমর কবি মধুসূদন পয়্যারের বেড়িপরী অক্ষরবৃত্ত ছন্দের শৃঙ্খল উন্মোচন করে বাংলা ভাষায় গুরুগম্ভীর মেঘমগ্ন ধ্বনিত করেছেন। বাংলার কোন্ ভবিষ্য কবি স্বীয় প্রতিভাবলে বাংলা স্বরবৃত্ত ছন্দেও মহাকাব্যের দুন্দুভিধ্বনি নিনাদিত করবেন তা জানি নে। আজ পর্যন্ত কোনো কবিই যে স্বরবৃত্ত ছন্দে গম্ভীর কবিতা রচনার প্রয়াস করেন নি তা নয়। বাংলার মহাকবি শ্রীযুক্ত রবীন্দ্রনাথ ঠাকুর মহাশয় বহু বিষয়ে বাংলা সাহিত্যিকগণের পথপ্রদর্শক, বাংলার কাব্যোচ্চানে বসন্তসমাগমের তিনিই একমাত্র অগ্রদূত বললে অত্যুক্তি হয় না। বাংলা স্বরবৃত্ত ছন্দের পুরোবর্তী এই বিশাল ক্ষেত্রের দিকে তাঁর দৃষ্টি যে আকৃষ্ট হয় নি তা মনে হয় না। অন্ততঃ একটি কবিতায় এক বার তিনি স্বরবৃত্তের গতি ভেঙে দিয়ে তাকে ছত্রের পর ছত্রে যথেষ্ট প্রসারিত করে নেবার প্রয়াস পেয়েছেন। ছন্দপারদর্শী সত্যেন্দ্রনাথ দত্ত মহাশয়ের কয়েকটি কবিতাতেও এ প্রয়াসের নিদর্শন দেখা যায়। এ স্থলে রবিবাবুর ‘পরমায়ু’-নামক কবিতা থেকে প্রথম কয়েকটি ছত্র উদ্ধৃত করছি। পাঠক তার গতি এক বতির বিচিত্র ভঙ্গির দিকে একটু লক্ষ করলেই বুঝতে পারবেন, এ ছন্দ অক্ষরবৃত্তের চাইতে ঢের বেশি স্বাভাবিক অথচ অক্ষরবৃত্তের মতো গাম্ভীর্য প্রকাশের সব শক্তিই এ ছন্দের রয়েছে।—

যারা আমার গাঁবসকালের গানের দীপে জালিয়ে দিলে আলো  
আপন হিম্মার পরশ দিয়ে, এই জীবনের সকল সাদা-কালো  
বাদ্যের আলো-ছায়ায় লীলা, বাইরে বেড়ায় মনের মাহুষ যারা,  
তাদের প্রাণের স্বরনাশ্রোতে আমার পরান হয়ে হাজার ধারা  
চলছে বয়ে চতুর্দিকে। কালের যোগে নয় ত মোহনের আয়ু,  
নয় সে কেবল দিগন্তরাতির সাতনলি হার, নয় সে নিশাসবাহু।



কিন্তু এখানেই বাংলা স্বরবৃত্ত ছন্দের অদ্ভুত ক্ষমতা শেষ হল না। বাংলা শব্দের প্রত্যেকটি স্বরকে অতি সূক্ষ্মভাবে বিশ্লেষণ করে লঘুগুরুভেদে তাদের এমনভাবেও সাজানো যায় যে, তাতে বাংলা স্বরবৃত্ত ছন্দে শুধুই ইংরেজি কেন, সংস্কৃত আরবি ফারসি প্রভৃতি ভাষারও বহু ছন্দের তালকে ধরে রাখা যায়। একটা দৃষ্টান্ত দিচ্ছি।—

পিঙ্গল বিহ্বল | ব্যথিত নভতল, | কই গো কই মেঘ, | উদয় হও,  
সন্ধ্যার তন্দ্রার | মুরতি ধরি' আজ | মন্ত্রমহুর | বচন কও।  
সূর্যের রক্তিম নয়নে তুমি মেঘ, দাও হে কজ্জল, পাড়াও ঘুম,  
বৃষ্টির চুষন বিথারি চলে যাও, অঙ্গে হর্ষের পড়ুক ধুম ॥

—সত্যেন্দ্রনাথ, 'কুহ ও কেকা', বঙ্কের নিবেদন

সংস্কৃত ছন্দের সঙ্গে যাদের ঘনিষ্ঠ পরিচয় আছে, এ কয়টা ছত্র পড়ামাত্রই তাদের কানে 'মন্দাক্রান্তা' ছন্দের মন্ত্র ধরা দেবে। একটু লক্ষ করলেই দেখা যাবে, এখানে প্রথম পংক্তিচ্ছেদে চারটি গুরুস্বর, দ্বিতীয় পংক্তিচ্ছেদে পাঁচটি লঘু ও একটি গুরু স্বর এবং তৃতীয় পংক্তিচ্ছেদে যথাক্রমে একটি গুরু একটি লঘু ও দুটি গুরু স্বর এবং চতুর্থ ছেদে একটি লঘু ও দুটি গুরু স্বর আছে। প্রত্যেক চরণেই এ স্বরগুলো অবিকল এক প্রণালীতেই সজ্জিত হয়েছে। সুতরাং এখানে সংস্কৃত মন্দাক্রান্তা ছন্দের পর্যায়ক্রম সম্পূর্ণ অব্যাহত রয়েছে। মন্দাক্রান্তার সূত্র হচ্ছে এই।—

| | | | - - - - | | - | | - | |

মন্দাক্রান্তা | -সুধিরসনগৈ | -মোতনো তো গযুগম।

—গঙ্গাদাস, 'ছন্দোমঞ্জরী' ২। ১৩৪

এমনি করে যদি বাংলা শব্দের লঘু ও গুরু স্বরগুলোকে নিপুণভাবে কাজে লাগানো যায়, তা হলে স্বরবৃত্তের সাহায্যে বহু সংস্কৃত ছন্দ বাংলায় প্রবর্তিত করা যায়। যথাস্থানে আমরা বাংলার রচিত বহু সংস্কৃত ছন্দের দৃষ্টান্ত দেব।

কেবল সংস্কৃত কেন, এ প্রণালী অবলম্বন করে আরবি ফারসি প্রভৃতি অজ্ঞাত ভাষার বহু ছন্দকেও যে বাংলায় চালানো যায় তার অনেক প্রমাণ ইতিমধ্যেই পাওয়া গেছে। আরবি হজ্জব্ ছন্দের একটা দৃষ্টান্ত দিচ্ছি।—

হে মোর ভৈরব | ভীষণ হৃন্দর,  
তোমার কবুর | নিনাদ গভীর  
ডুবাক বিধের | হৃদয়-কন্দর,  
কাপাক অন্তর | নিদয় দস্তীর।

—লেখক

গুধু তাই নয়, লঘু ও গুরু স্বরগুলোর নব নব সমাবেশের দ্বারা বাংলায় অসংখ্য নূতন ছন্দের আবিষ্কারের সম্ভাবনাও রয়েছে। কেবল কানের উপর নির্ভর করে স্বরগুলোকে লঘুগুরুভেদে এমন নূতন পর্যায়ক্রমে সজ্জিত করা সম্ভবপর, যা অল্প কোনো ভাষায় নেই। স্বতরাং এ দিক থেকে বাংলায় নব নব ছন্দ রচনার যে বিশাল ক্ষেত্র উন্মুক্ত রয়েছে, আশা করা যায় বাংলার ভবিষ্যৎ কবিরা তার সদ্যব্যবহার করে বাংলা কাব্যসাহিত্যকে অপূর্ব শ্রী ও সম্পদে সমৃদ্ধ করবেন।

বাংলা ছন্দের জাদুকর স্বকবি সত্যেন্দ্রনাথ দত্ত মহাশয়ই সর্বপ্রথম বাংলা ভাষায় এই অতি নিগূঢ় শক্তি আবিষ্কার করে সাহিত্যিকগণকে বিস্মিত করে দিয়েছেন। তিনিই বাংলার গুপ্ত ছন্দভাণ্ডারের এই চাবিটি বাংলার কবিসম্প্রদায়ের হস্তে তুলে দিয়েছেন। এজন্য বাংলার কবিরা চিরকাল তাঁকে কৃতজ্ঞ-হৃদয়ে স্মরণ করবেন। সত্যেন্দ্রনাথ এই স্বরবৃত্ত ধারার বহু ছন্দে বহু কবিতা রচনা করে স্বরবৃত্তের অদ্ভুত শক্তি ও সম্পদের পরিচয় দিয়েছেন। যারা কবি সত্যেন্দ্রনাথের কাব্যগ্রন্থগুলির সঙ্গে পরিচিত আছেন তাঁরা সকলেই তাঁর এ কৃতিত্ব স্বীকার করেন। তার পরে বাংলার তরুণ কবি কাজী নজরুল ইসলাম বাংলা ছন্দ নিয়ে যে অদ্ভুত ভেলকিবাজি দেখিয়েছেন তাতে তাঁর অসামান্য প্রতিভার পরিচয় পাওয়া যায়। তিনি মূলের ভাব এবং ছন্দ অক্ষুণ্ণ রেখে হাকেকের কতকগুলি ফারসি গজলের বাংলা অনুবাদ করেছেন। এইটেও তাঁর অপূর্ব প্রতিভারই পরিচায়ক। 'বা হক, আমরা যখন যথাস্থানে বাংলা স্বরবৃত্ত ছন্দের বিস্তৃত শ্রেণীবিভাগে প্রবৃত্ত হব তখন পাঠক অবশ্যই বাংলা ছন্দের বিপুল সম্পদের পরিচয় পেয়ে বিস্মিত হবেন।

বাংলা ছন্দের এই যে অপূর্ব ঐশ্বর্যশালিতা, বাংলা ভাষার স্বরব্যবহারের অপূর্ব সামঞ্জস্যই তার মূলকারণ। প্রাকৃত বাংলায় হৃদয় বর্ণের (স্বতরাং গুরুস্বরসমূহ) সংখ্যা সাধু বাংলার চাইতে অনেক বেশি, কিন্তু ইংরেজি ভাষার

থেকে কম। এইজন্যই বাংলা স্বরবৃত্তে চতুঃস্বরের ছন্দই সাধারণতঃ ব্যবহৃত হয়। অথচ বেছে বেছে গুরুস্বরবহুল শব্দগুলোকে প্রয়োগ করলে বাংলায় অনান্যাসে দ্বিস্বরের, ত্রিস্বরের এবং তাদের মিশ্রণে পঞ্চস্বরের ছন্দ রচনা করা যায়। কিন্তু ইংরেজিতে হসন্ত বর্ণ এবং কাজেই গুরুস্বরের সংখ্যা অত্যন্ত বেশি হওয়াতে সে ভাষায় চতুঃস্বরের বা পঞ্চস্বরের ছন্দ মোটেই রচনা করা যায় না। আবার স্বরবহুল সাধু বাংলা শব্দ এবং হসন্তবহুল প্রাকৃত বাংলা কিংবা যুক্ত-বর্ণবহুল সংস্কৃত শব্দের যথাযোগ্য মিশ্রণ করে সংস্কৃত প্রভৃতি বহু ভাষার ছন্দ বাংলায় ব্যবহার করা যায়। কিন্তু একান্ত হসন্তবহুল ইংরেজিতে সেসব ছন্দ মোটেই আনা যায় না। পূর্বোক্ত মন্দাক্রান্তা ছন্দের দৃষ্টান্তটাই ধরা যাক। এ ছন্দের অষ্টান্ন পর্যায়ক্রম ইংরেজিতে আনা যদি বা সম্ভব হয়, তথাপি দ্বিতীয় পংক্তিদ্বয়ের 'ব্যথিত নভতল' প্রভৃতি শব্দের পাঁচটি লঘুস্বর ইংরেজিতে একত্র পাওয়া তো একেবারেই অসম্ভব। তা ছাড়া ইংরেজি উচ্চারণে যে বোঁকের ব্যবস্থা থাকতে তার ছন্দের বৈশিষ্ট্য ফুটে ওঠে সেই বোঁকের ব্যবস্থাই ইংরেজিতে অগ্র ছন্দ প্রবর্তনের একান্ত অন্তরায়। অপর দিকে সাধু বাংলায় হসন্তের এত অভাব যে, এ ভাষায় গুরুস্বর পাওয়াই দুষ্কর। হস্তরাস গুরুস্বরের অভাবহেতু সাধু বাংলায় ছন্দের স্পন্দন তোলার আশাই করা যায় না। হসন্তবহুল কথিত বাংলা, স্বরবহুল সাধু বাংলা এবং যুক্তাক্ষরবহুল সংস্কৃত শব্দের মিশ্রণে যে অপূর্ব ভাষার সৃষ্টি হয়েছে তার সাহায্যেই ছন্দোজগতে এই দিগ্‌বিজয় করা সম্ভব হয়েছে।

আশা করি এখন অক্ষরবৃত্ত, মাত্রাবৃত্ত ও স্বরবৃত্ত, বাংলা ছন্দপ্রবাহিণীর এই ত্রিধারার বিশিষ্ট স্বরূপ ও শক্তির পরিচয় পাঠকের নিকট পরিষ্কৃত হয়েছে। পরবর্তী প্রবন্ধে দৃষ্টান্তসহ এই তিন ধারার বিভিন্ন শ্রেণীবিভাগ ও তাদের নামকরণে প্রবৃত্ত হবার আশা রইল। \*

## ছন্দের শ্রেণীবিভাগ

সংস্কৃত ভাষায় প্রত্যেক শ্লোকের চারটে করে ভাগ থাকে এবং অধিকাংশ স্থলেই এ চার ভাগের গঠনপ্রণালী অবিকল একরকম। সুতরাং এক ভাগের গঠনভঙ্গি নির্দেশ করে দিলেই সবটা শ্লোকের নির্মাণকৌশল আয়ত্ত হয়ে যায়। এ চার ভাগের প্রত্যেক ভাগকে এক-একটি ‘চরণ’ বা ‘পদ’ বলা হয়। আবার অনেক স্থলেই প্রত্যেক চরণে এক বা ততোধিক জায়গায় যতি বা বিরামের ব্যবস্থা আছে। সংস্কৃত ভাষায় এক যতি থেকে আর-এক যতি পর্যন্ত শ্লোকাংশের কোনো নাম নেই, নামের দরকারও হয় না। কিন্তু বাংলায় এক যতি থেকে আর এক যতি পর্যন্ত যে পঞ্চাংশ, তার উপরেই প্রধানতঃ ছন্দের গঠনকৌশল নির্ভর করে। সুতরাং এরকম এক-একটি অংশকেই বাংলা পণ্ডের ‘পদ’ বলা সংগত। ইংরেজিতেও দুই যতির মধ্যবর্তী অংশের উপরেই সমস্ত ছন্দ নির্ভর করে এবং এ অংশকে ইংরেজিতেও foot বা পদ বলা হয়।

কিন্তু প্রত্যেক পদের নির্মাণপ্রণালীর উপরে ছন্দের অন্তঃপ্রকৃতি নির্ভর করলেও কয়েকটি পদের বিভিন্ন সমাবেশের দ্বারাই তার বাহ্যপ্রকৃতি নিয়মিত হয়। কোনো কবিতার ছন্দের পূর্ণ পরিচয় লাভ করতে হলে তার ভিতরের গঠন ও বাইরের গঠন, এ দুই জানা চাই; অর্থাৎ জানতে হবে এ কবিতায় প্রতি ছন্দে কয়টি করে পদ আছে এবং প্রত্যেক পদ গঠিত হয়েছে কোন্ প্রণালীতে।

সুতরাং কোনো পণ্ডের প্রত্যেক পদের নির্মাণপ্রণালী এবং তার প্রত্যেক ছন্দের অন্তর্গত পদসংখ্যার উপরে লক্ষ রেখেই বাংলা ছন্দের শ্রেণীবিভাগ ও নামকরণ করতে হবে। বৈজ্ঞানিক প্রণালীতে নামকরণ করতে হলে প্রত্যেকটি নাম অর্থছোড়ক হওয়া চাই। অর্থাৎ ছন্দের নাম থেকেই ছন্দের অন্তর্গঠন ও বহির্গঠন অনায়াসে বোঝা যাবে এবং নামগুলোর সঙ্গে এক বার পরিচয় হয়ে গেলে কোনো এক ছন্দের একটি কবিতা পড়লেই তার নাম মনে জেগে উঠবে। এখন আমরা শ্রেণীবিভাগ ও নামকরণ কার্যে প্রবৃত্ত হই। পাঠক

নামের অর্থ ও তৎসঙ্গে প্রদত্ত উদাহরণ থেকেই এরকম নামকরণের সার্থকতা উপলব্ধি করবেন। সুতরাং এ নামকরণের পক্ষে আমার কোনো রকম ওকালতি করা নিষ্প্রয়োজন।

### স্বরবৃত্ত ছন্দ

প্রথমে স্বরবৃত্ত ছন্দটাই ধরা যাক। প্রতি পাদে স্বরের সংখ্যা, স্বরগুলোর গুরুলঘুভেদে বিভিন্ন সন্নিবেশ এবং প্রতি ছত্রের পাদসংখ্যা— এই তিনটি বিষয়ের বিচিত্র সমাবেশের ফলে স্বরবৃত্ত ধারায় বহু শাখাপ্রশাখার উৎপত্তি হয়েছে। এই শাখাপ্রশাখার মধ্যে অনেকগুলো ইংরেজি সংস্কৃত প্রভৃতি ভাষার অনেক ছন্দের অবিকল অমূরূপ। যথাস্থানে সে কথা উল্লেখ করা যাবে।

প্রথমতঃ, দেখা যায় স্বরবৃত্ত ছন্দের প্রতি পাদে দুই স্বর, তিন স্বর, চার স্বর, এমন কি দুই-তিন বা তিন-দুয়ের মিশ্রণে পাঁচ স্বর এবং তিন-চার বা চার-তিনের মিশ্রণে সাত স্বর পর্যন্ত থাকতে পারে। সুতরাং স্বরবৃত্ত ছন্দকে প্রথমতঃ দ্বিস্বরপাদ, ত্রিস্বরপাদ, চতুঃস্বরপাদ, পঞ্চস্বরপাদ এবং সপ্তস্বরপাদ, এই পাঁচ ভাগে বিভক্ত করা যায়। দ্বিতীয়তঃ, প্রত্যেক পাদের আদি, মধ্য কিংবা অন্ত-স্থিত স্বর লঘু বা গুরু হতে পারে। সুতরাং এ দিক থেকে এ ছ+কে আদিগুরু বা আদিলঘু, মধ্যগুরু বা মধ্যলঘু প্রভৃতি বহু নামে অভিহিত করা যায়। তৃতীয়তঃ, এ ছন্দের কোনো-বিতায় যদি প্রতি ছত্রে দুটো, তিনটে, চারটে বা পাঁচটা করে পদ থাকে তবে সে ছ+কে দ্বিপদী, ত্রিপদী, চৌপদী, পঞ্চপদী প্রভৃতি নাম দেব। কিন্তু অনেক সময় কোনো ছত্রে কয়েকটি পূর্ণ পদ এবং শেষে একটা অপূর্ণ পদ থাকে, যেমন তিনটে পূর্ণ পদ ও একটা অপূর্ণ পদ, সে স্থলে ছন্দকে অপূর্ণ চৌপদী প্রভৃতি নাম দেওয়া যায়। এ অপূর্ণতা আবার অনেক রকম হতে পারে। কোথাও একটি স্বরের অভাবে অপূর্ণ, কোথাও দুটো স্বরের অভাবে অপূর্ণ ইত্যাদি।

এখন আমরা এই বিভিন্ন ছন্দের দৃষ্টান্ত দিতে প্রবৃত্ত হব। প্রত্যেক দৃষ্টান্তের সঙ্গে সঙ্গে তার পূর্ণপরিচয়সূচক নাম দেওয়া যাবে এবং বিভিন্ন ভাষার কোনো ছন্দের সঙ্গে কোনো সাদৃশ্য থাকলে যথাস্থানে সে কথারও নির্দেশ করা যাবে। বলা বাহুল্য, এইসকল বিভিন্ন বৈচিত্র্যের সমাবেশের ফলে যে বহুসংখ্যক ছন্দের

উৎপত্তি হতে পারে সেলমন্ত ছন্দের দৃষ্টান্ত এখানে দেওয়া অসম্ভব, নিম্নয়োজনও বটে। আমরা প্রধানতঃ ছন্দের অন্তঃপ্রকৃতির পরিচায়ক দৃষ্টান্ত-সমূহই উদ্ধৃত করব।—

### ১ দ্বিস্বরপাদ

১। আদিগুরু : ইং—Trochee, সং—তুণক

অপূর্ণ আটপদী

হায় রে | বন্ধু, | হুঃখ | মোর সে |

বলতে | চক্ষে | ঝরুছে | জল ;

বেদনা -সিদ্ধ উথলে উঠছে

মোর এ বক্ষে, নাইক তল ॥

—লেখক

২। অন্তগুরু : ইং—Iambus, সং—পঞ্চচামর বা প্রমাণিকা

পূর্ণ আটপদী

মহৎ | ভয়ের | মূরৎ | সাগর, |

বরণ | ভোমার | তমঃ | -শ্রামল ;

মহে -ঋয়ের প্রলয় -পিনাক

শোনাও আমায়, শোনাও কেবল ॥

—সত্যেন্দ্রনাথ, 'অত্র-আবীর', সিদ্ধুতাওর

৩। উভয়গুরু : সংস্কৃত—বিদ্যাম্বালা

পূর্ণ চৌপদী

ভোম্বায় | গান গায় | চরকায় | শোন্ তাই,

খেই নাও, পাঁজ দাও, আমরাও গান গাই ।

ঘর-বার করবার দরকার নেই আর,

মন দাও চরকায় আপনার আপনার ।

চরকার ঘর্ঘর পড়শীর ঘর ঘর,

ঘর ঘর কীরসর, আপনায় নির্ভর ॥

—সত্যেন্দ্রনাথ, 'বিদ্যার-আরতি', চরকার গান

৪। মিশ্র—

পূর্ণ চৌপদী

সাম্র | -বর্ষণ | হর্ষ | -হিলোল,  
ঝিল্লী-গুঞ্জন মজ্জ-হিলোল,  
মূছে' বীণ আর মূছে' বীণকার—  
মূছে' বর্ষার ছন্দ-হিলোল ॥

—সত্যেন্দ্রনাথ, 'বেলাশেষের গান', ছন্দহিলোল

২ দ্বিস্বরপাদ

১। আদিগুরু : ইং—Dactyl, সং—মোটক

অপূর্ণ চৌপদী

ত্রিশ কোটি | দেশবাসী | ডুবছে রে | বতায় ;  
তোমরা কি মেঘ সবে, সইছ যে অতায় ?  
ওঠ্ তোরা, জাগ্ তোরা, আয় ছুটে, আয় না—  
নাথ তাজা প্রাণ দিয়ে দেশ রাখা যায় না ?

—লেখক

২। আদিলঘু : আরবি—মোতাকারেব, সংস্কৃত—ভুজঙ্গপ্রয়াত

পূর্ণ চৌপদী

সমুদ্রের | তরঙ্গের | গভীর তান | ভয়ঙ্কর  
বাজায় কোন্ অনন্তের বেদনগীত, এ সুন্দর !  
বসন্তের আনন্দের কুহুম কার পরান ছায়,  
বিহঙ্গের কুঞ্জনতান জাগায় তার কি বাজায় !  
অরুণ, কার মুখের 'পর করিস তুই কিরণদান,  
আগুন, তার বৃকের ওই পরানটার দে সন্ধান ॥

—লেখক

৩। মধ্যগুরু : ইংরেজি—Amphibrach

অপূর্ণ ত্রিপদী

ওরে জীবন কি | শুধুই রে | দুখ,  
তার দেখিস না আনন্দ-টুক ?  
না না, জীবন সে ব্যথার তো নয়,  
সে যে অনন্ত আনন্দময় ।

ওরে মরণকে কি ভয় রে আর,  
 সে প্রাণের যে তোরণ-দুয়ার ।  
 তাই ফেলিস নে চোখের ও-জল,  
 বল আনন্দ আনন্দ বল ॥

—লেখক

৪। মধ্যলব্ধ : আরবি—মোতদারিক

পূর্ণ ষিপদী

চাইছে বুক | দিব্যস্থখ,  
 স্থখ অভয়, | হৃদ-ক্ষয়,  
 মৃত্যুজিৎ ছন্দগীত,  
 তার নাগাল পায় না মৃত ।  
 নিত্যরূপ, কল্পভূপ,  
 এক অরূপ পূর্ণ সেই,  
 সেই ভূমায় অর্ঘ্য দেই ॥

—কল্পানিধান, 'ধানদূর্বা', স্বর্ণমৃগ

৫। অনন্তগুরু : ইং—Anapaest, সং—তোটক (অপূর্ণ)

অপূর্ণ চৌপদী

ওরে ওঠ্ | তোরা সব | ছেড়ে সং | -শয়,  
 মুছে ফেল হৃদয়ের ব্যথা-সঞ্চয় ;  
 নব শক্তিতে বুক করি' বন্ধন  
 যত দুঃখেতে আজ কর লঙ্ঘন ;  
 মিছা মৃত্যুরে আর বৃথা কোন্ ভয় ?  
 বিনা দুঃখেতে ভাই কোনো স্থখ নয় ।  
 তাই ছুটে চল ছুটে চল ছুটে চল সব,  
 যদি মৃত্যুতে চাস্ চির-গৌরব,  
 বৃকে জ্বল জ্যোতি আজ শত সূর্যের—  
 ওই বাজে সংগ্রামে শোন ধনি তুর্কের ॥

—লেখক



৬। অন্তলঘু : সংস্কৃত—সারঙ্গ

অপূর্ণ চৌপদী

ঐ শব্দ | শোন্ বাজল | ভীম শব্দে | গস্তীর,  
গায় মুক্তি-বন্দন রে নির্ভীক সে কোন্ বীর !  
হয় রাজ্য, নয় ভিক্ষা, নয় মৃত্যু-বন্দন,  
চাই বীর্য, নয় তুচ্ছ স্বর্গেরও নন্দন ।  
বন্দন সে মুক্তের তো অঙ্গের অ-লঙ্কার ;—  
ওই বন্দন কি শুনহিস্ না বঙ্কার সে ডঙ্কার ?  
—লেখক

৭। ত্রিগুরু : ইংরেজি—Dactyl

অপূর্ণ চৌপদী

হাসে সুন্দর মুখ, | খঞ্জন-চোখ, |  
জাফ্রান-রঙ | অঞ্চল ।  
নাহি নৃত্যের শেষ, সংগীত-রেশ  
ফুলবাণ সব চঞ্চল !  
ওই আনন্স চম্পায়  
মান- স্বপ্নের আব্ছায়  
কার যৌবন-লোল হাশ্বের রোল,  
রূপদর্পণ বল্মল ॥  
—করণানিধান, 'ধানদূর্বা'. বসন্তবিলাস

৩ চতুঃস্বরপাদ

১। আদিগুরু :

অপূর্ণ চৌপদী

হায় সে কত | কাল গেল রে, | গাইল বৃথা | বল্‌বুলি,  
হয় নি তবু প্রস্তুতি কাব্যবনে ফলগুলি ;  
আজকে হেসে ছন্দোময়ী যেমনি এল ফাস্তনে,  
অমনি ষত বাংলা কবি তান ধরেছে ফুলবনে ॥  
—লেখক

২। আবিলঘু : আববি—হজব্

দ্বিপদী

আপন বন্ধের | কাঁপন দেখলেই  
যে জন চম্‌কায়, | মরণ তার সে-ই ;  
কি লাভ তার ওই জীবন থাকলেই,  
মরণ-জ্বাস যার বৃকের পার্শ্বে ই ?  
পরের বেদনায় অধীর মন যার,  
কি তার শকাই মরণ-ঝঞ্ঝার ?  
অমর বীরদল তারাই বিশ্বের,  
যাদের প্রাণমন সেবায় নিঃশ্বের ॥

—লেখক

৩। অস্তগুরু : সংস্কৃত—গজগতি

পূর্ণ দ্বিপদী ও চৌপদী

হর-মুকুট ! | হর-মুকুট !

ভূ-স্বরগের | স্রমেষ্-কুট !

গগনে প্রায় | ভিড়ায়ৈ কায় | করিতে চায় | তারকা লুট ।

বিজুলি থির হয়ে নিবিড়

রয়েছে কার বেড়িয়া শির !

হীরা ফটিক উজলি দিক্ ঘিরেছে কার জটারি নীড় ॥

—সত্যেন্দ্রনাথ, 'অত্র-আবীর', হরমুকুট গিরি

৪। অস্তলঘু :

পূর্ণ দ্বিপদী

নয় নয় হিংসা, | রক্তের বগ্না,—

প্রাণহীন বিশ্বে | করতেই ধন্যা,

বন্দীর হস্ত-শৃঙ্খল খুলতে,

দেশ-দেশ মুক্তি-মন্দির তুলতে,

প্রাণ-দান করবে এই সব বীর রে,

আর্তের মুহূৰ্তে চক্ষুর নীর রে !

—লেখক

৫। দ্বিতীয়লঘু : আরবি—রমল

পূর্ণ ত্রিপদী

হায় কি শঙ্কায় | চিত্ত উন্নয়ন,  
কাঁপছে অন্তর, | কাঁপছে প্রাণমন,—  
এই যে দুস্তর সিঁধু দুঃখের  
গর্জে ভীমনাদ বজ্র-লঙ্ঘন,  
তার কি নিষ্ঠুর গর্তে কুস্কির  
ডুববে সব স্বথ লক্ষ দুঃখীর ?

—লেখক

বলা বাহুল্য, প্রতি পাদের অন্তর্গত স্বরগুলোর লঘুগুরুভেদে বিভিন্ন সমাবেশের ফলে চতুঃস্বরপাদের আরও অনেক রকম উপবিভাগ হতে পারে। প্রত্যেক ঊর্ধ্ববিভাগের এক-একটা ধনিবৈশিষ্ট্য আছে, সবগুলোর ধনিও একরকম শোনায় না। কিন্তু বাহুল্যভয়ে আর অধিক দৃষ্টান্ত দিলাম না। এ স্থলে এ কথা বলা আবশ্যক যে, এরকম বাধাবাধি নিয়মের ছন্দ সর্বদা ব্যবহার করা সম্ভবপর নয়, কেননা তাতে কবির চিন্তাধারা পদে পদে বাধা পেতে থাকে। সেজগেই চতুঃস্বরপাদের যে শাখাটা সবচেয়ে মূল্যবান, অর্থাৎ যে শাখায় নিয়মের বাড়াবাড়ি সবচেয়ে কম, সেইটেই সবচেয়ে বেশি ব্যবহৃত হয়। এখন এই অনিয়মিত ধারার কয়েকটা দৃষ্টান্ত দেব। এ পর্যন্ত কোনো ধারারই ত্রিপদী ত্রিপদী প্রভৃতি উপশ্রেণীর দৃষ্টান্ত প্রদর্শিত হয় নি। কিন্তু এই অনিয়মিত ধারায় এই-সমস্ত উপশ্রেণীর দৃষ্টান্ত দেখানো আবশ্যক।

৬। অনিয়মিত—

ক. ত্রিপদী

দুই স্বরের অভাবে অপূর্ণ  
রক্ত আলোর | মদে মাতাল | ভোরে  
আজকে যে যা বলে বলুক তোরে,  
সকল তর্ক হেলায় তুচ্ছ করে  
পুচ্ছটি তোর উচ্ছে তুলে নাচা !  
আয় ছরস্তু, আয় রে আমার কাঁচা।

—রবীন্দ্রনাথ, 'বলাকা', ১

## খ. চৌপদী

তুই স্বরের অভাবে অপূর্ণ  
সামনেকে তুই | ভয় করেছিস, | পেছন তোরে | ঘিরবে—  
এমনি কি তুই ভাগ্যহারা ? ছিঁড়বে বীধন ছিঁড়বে।

—রবীন্দ্রনাথ, 'বলাকা', ৩০

## এক স্বরের অভাবে অপূর্ণ

স্বপ্ন হল | নূতন নাট্য | স্বপ্নধারের | নূতন নাট,  
সাগরপারে গান্ধী করে জাতীয়তাব নান্দী-পাঠ।

—সত্যেন্দ্রনাথ, 'অত্র-আবীর', ইচ্ছাভের জন্ত

## পূর্ণ

ধ্যানে তোমার | রূপ দেখি গো, | স্বপ্নে তোমার | চরণ চুমি,  
মূর্তিমন্ত মায়ের স্নেহ। গন্ধাহদি বঙ্গভূমি !  
দেখছি গো রাজরাজেশ্বরী, মূর্তি তোমার প্রাণের মাঝে,  
বিদ্যতে তোর খড়্গ জলে, বজ্রে তোমার ডকা বাজে ॥

—সত্যেন্দ্রনাথ, 'অত্র-আবীর', গন্ধাহদি বঙ্গভূমি

## গ. পঞ্চপদী

সবল কর | পঙ্কু ইচ্ছা, | পরশ ব্লাও | মনের পক্ষা | -ঘাতে,  
হাত ধরে নাও, পৌছিয়ে দাও সত্যি-বাচার নিত্য-সুপ্রভাতে।

—সত্যেন্দ্রনাথ, 'বিদায়-আরতি', কড়দিনে

## ৪। পঞ্চস্বরপাদ ( মিশ্র )

দুই-তিন এবং তিন-দুয়ের মিশ্র পঞ্চস্বরপাদের দৃষ্টান্ত পূর্বেই দেওয়া হয়েছে  
( পৃ ৩৬-৭ )। আর নূতন দৃষ্টান্ত দেওয়া নিম্নয়োজন।

## ৫। সপ্তস্বরপাদ ( মিশ্র )

পঞ্চস্বরপাদের ত্রায় তিন-চার এবং চার-তিনের মিশ্র সপ্তস্বরের ছন্দও ব্যবহার  
করা যায়। বথা—

(ক) তিন-চারের মিশ্র

মরি কার পরশমণি  
গগনে ফলায় সোনা !  
হৃদয়ে নুপুরধ্বনি  
অজানার আনাগোনা ॥  
সোনালি জঁদা-চেলি  
দিয়ে কে শূন্যে মেলি  
নিখরের পর্দা ঠেলি  
উদাসের আঁচল হেলায় ।  
সাঁঝে আজ কিসের আলো  
ভুলালো মন ভুলালো,  
ফাগুয়ার ফাগ মিলালো  
শরতের মেঘের মেলায় ॥

—সত্যেন্দ্রনাথ, 'বেলাশেষের গান', সাঁঝাই

(খ) চার-তিনের মিশ্র

তোমরা কি গো, হায় নারী, | থাকবে চির-বন্ধনে ?  
থাকবে ক্ষণের সঙ্গিনী, থাকবে শুধুই বন্ধনে ?  
তোমরা তো নও লক্ষ্যহীন, তোমরা তো নও তুচ্ছ গো,  
ভগ্নী মাতা কন্যাগণ, তোমরা সবাই আজ জাগো ।

—লেখক

৬। বিবিধ মিশ্র

উল্লিখিত দৃষ্টান্তসমূহে প্রতি পংক্তির অন্তর্গত প্রত্যেক পাদে গঠনপ্রণালী একই রকম। কিন্তু প্রতি পাদে নির্মাণকৌশল একই রকমের না করে যদি বিভিন্ন পাদ বিভিন্ন প্রণালীতে রচনা করা যায় তবে ছন্দের ধ্বনিবৈচিত্র্য বৃদ্ধি পায়। ছন্দের এ বৈচিত্র্য বাংলায় এখনও বহুলপরিমাণে দেখা যায় না। এ স্থলে কয়েকটি দৃষ্টান্ত দিচ্ছি। তার সবগুলিই কবি সত্যেন্দ্রনাথ দত্তের। দৃষ্টান্তগুলির কয়েকটি বিভিন্ন সংস্কৃত ছন্দের অমুরূপ, বাকিগুলি অনেকটা স্বতন্ত্র। এই উপায় অবলম্বন করে বাংলার বহু নূতন ছন্দ প্রবর্তিত করা যায়, এ কথা পূর্বেই বলেছি।

## ১। অহুর্ষ্টপ্—

আৰ্ত্ত সংসার | ব্যথায় কাঁদছে,  
 গুরে শোনু তুই | যে নস্ বধির।  
 ধুট ধায় ধুম্ | -কেতুর দস্তে,  
 বাড়ে কল্লোল | কধির-নদীর ॥

—সত্যেন্দ্রনাথ, 'ছন্দসরস্বতী', ভারতী ১৩২৫ বৈশাখ

## ২। মালিনী—

নৃত্ত—ন ন ম ষ ষ যু তেয়ং | মালিনী ভোগি লোকৈঃ।

—গঙ্গাদাস, 'ছন্দোমঞ্জরী' ২।১৩৪

উড়ে চলে গেছে বুলবুল, | শূন্যময় স্বর্ণপিঞ্জর ;  
 ফুরিয়ে এসেছে ফান্তন, | যোবনের জীর্ণ নির্ভর।  
 রাগিণী সে আজি মম্বর, উৎসবের কুঞ্জ নির্জন ;  
 ভেঙে দেবে বৃষ্টি অন্তর মঞ্জীরের ক্লিষ্ট নিকণ ॥

—সত্যেন্দ্রনাথ, 'কুহ ও কেকা', রিত্তা

## ৩। মন্দাক্রান্তা—

নৃত্ত—মন্দাক্রান্তা | -সু ধি র স ন গৈ | মৌ ভ নৌ তো গ যু ঞ্জ ম্।

—গঙ্গাদাস, 'ছন্দোমঞ্জরী' ২।১৩৪

ভরপুর অশ্রুর | বেদনা-ভারাতুর | মৌন কোন্ স্রব বাজায় মন।  
 বক্ষের পঙ্কর | কাঁপিছে কলেবর, | চক্ষে দুঃখের নীলাঙ্গন ॥

—সত্যেন্দ্রনাথ, 'কুহ ও কেকা', বক্ষের নিবেদন

## ৪। চণ্ডবৃষ্টিপ্রপাত—

নৃত্ত—বদ্বিহ নবুগলং ততঃ সপ্তরেফাস্তদা চণ্ডবৃষ্টিপ্রপাতো ভবেদগুণকঃ।

—গঙ্গাদাস, 'ছন্দোমঞ্জরী' ২।২২৬

গগনে গগনে নীল নিবিড় ভিড় মেঘের ভিড় গো ভিড়,  
 শোন তাদের শব্দ ভীম ভবকর হ্রস্বভির।

—সত্যেন্দ্রনাথ, 'শব্দমঞ্জরী', বর্ষানন্ত

৫। স্বতন্ত্র—

(ক) তাজা তাজা আজি ফুল ফোটার

এই আলোয় এই হাওয়ার।

কচি কিশলয়ে কুজ ছায়—

সব তরুণ আজ ধরায় ॥

—সত্যেন্দ্রনাথ, 'বেলাশেবের গান', প্রণাম

(খ) নিশাসে কি সৌরভ, কাল চলে মেঘ সব,

পশ্চায় পশ্চায় রূপ ধরু গো।

কালো চোখে বিদ্যুৎ, কোনোখানে নেই খুঁৎ,

অভূত অভূত তুই স্বর্গ ॥

—সত্যেন্দ্রনাথ, 'বিদায়-আরতি', হিন্দোল-বিলাস

আরবি ছন্দের অনেকগুলো এই বিবিধ মিশ্র বিভাগের অন্তর্গত। কিন্তু বাহ্যিকভাবে তার দৃষ্টান্ত এ স্থলে উদ্ধৃত করলাম না।

চতুঃস্বরপাদ স্বরবৃত্তের দ্বিপদী ত্রিপদী প্রভৃতি বিভিন্ন প্রকারের পংক্তির বিভিন্ন সমাবেশের দ্বারা বাংলা কবিতায় বহু ছন্দোবন্ধের উৎপত্তি হয়েছে। তার দৃষ্টান্ত এ স্থলে দেখানো নিম্নপ্রয়োজন। স্বরবৃত্ত ছন্দে অতি উৎকৃষ্ট মূলবন্ধ কবিতাও রচনা করা যায়। কবিসম্রাট রবীন্দ্রনাথের 'পলাতকা'ই তার শ্রেষ্ঠ নিদর্শন।

অতঃপর আমরা মাত্রাবৃত্ত ছন্দের শ্রেণীবিভাগকার্যে প্রবৃত্ত হই :\*

### মাত্রাবৃত্ত ছন্দ

পাঠকগণ অবশ্যই লক্ষ করে থাকবেন যে, স্বরবৃত্ত ছন্দের বেসমস্ত দ্বারায় প্রতি পাদের অন্তর্গত স্বরগুলোর লঘু-গুরুত্বের হিসাব রাখা হয় সেসমস্ত স্থলে প্রতি পাদে মাত্রাপরিমাণও ঠিক থাকে। যেমন আদিগুরু, মধ্যগুরু কিংবা অন্তগুরু জিহ্বার ছন্দের প্রতি পাদেই চার মাত্রা থাকে। আবার ত্রিস্বরপাদ ছন্দের যেসমস্ত শাখায় দুটো গুরু স্বর থাকে কিংবা চতুঃস্বরপাদ ছন্দের

যেসমস্ত শাখায় একটি গুরু স্বর থাকে সেসমস্ত স্থলে প্রতি পাদে পাঁচটি করে মাত্রা পাওয়া যাবে। তেমনি সর্বগুরু ত্রিস্বরপাদ কিংবা দ্বিগুরু চতুঃস্বরপাদ কিংবা একগুরু পঞ্চস্বরপাদের প্রতি পাদে মাত্রাপরিমাণ ছয়। কিন্তু এসব ছন্দে মাত্রাপরিমাণ স্থির থাকলেও এসব ছন্দকে মাত্রাবৃত্ত বলা সংগত নয়। কেননা, প্রতি পাদের স্বরসংখ্যা এবং তাদের লঘুগুরুক্রমের প্রতি লক্ষ রেখেই এসব ছন্দ রচিত হয়, মাত্রাপরিমাণের প্রতি লক্ষ রেখে নয়। মুখ্যতঃ স্বরসংখ্যা এবং তাদের লঘুগুরুক্রমের উপরে দৃষ্টি রাখলেই গাঁপতঃ মাত্রাপরিমাণও নিয়মিত হয়ে যায়। তাই এসব ছন্দকে 'মাত্রাবৃত্ত' নাম দেওয়া সংগত মনে করি না। সংস্কৃত অক্ষরবৃত্ত ছন্দ সূর্যদেও এ কথা অবিকল খাটে। সংস্কৃত অক্ষরবৃত্তেও প্রত্যেক স্বরের লঘুস্ব-গুরুস্বের হিসাব রাখা হয় বলে প্রতি চরণের মাত্রা সমান থাকে, কিন্তু তাই বলে এ ছন্দকে 'জাতি' বা 'মাত্রাছন্দ' বলা হয় না।

যা হক, বাংলায় অধিকাংশ সময়েই স্বরসংখ্যা ঠিক রেখে এবং সন্ধে সন্ধে প্রতি স্বরের ওজন হিসাব করে ছন্দ রচনা করা সম্ভবপর হয় না। তাই কবিরা অনেক সময় কেবল স্বরসংখ্যা ঠিক রেখেই ছন্দ রচনা করেন। এইটেই খাঁটি স্বরবৃত্ত ছন্দ; এ ছন্দে মাত্রাপরিমাণ স্থির থাকে না। আবার অনেক সময় তাঁরা কেবল মাত্রাসংখ্যা ঠিক রেখেই কবিতা রচনা করেন। এইটেই মাত্রাবৃত্ত ছন্দ; এ ছন্দে স্বরসংখ্যা স্থির থাকে না। যথা—

কৃত্ত মোদের | হাঁক দিয়েছে | বাজিয়ে আপন | তুর্ষ।

মাথার 'পরে | ডাক দিয়েছে | মধ্যদিনের | সূর্য ॥

—রবীন্দ্রনাথ, "শলাকা", ৩

এখানে প্রতি পাদের স্বরসংখ্যা চার, কেবল শেষ দুই পাদে দুই। কিন্তু মাত্রাসংখ্যার স্থিরতা নেই। কাজেই এ ছন্দ স্বরবৃত্ত। আবার

ফাঙ্কন | চঞ্চল | কোটা ফুল | বয় না।

অকহেলে | দেয় কেলে | পুষ্পের | গয়না ॥

—সতীশচন্দ্র রায়, "চঞ্চল", প্রবাসী ১৩২৫ চৈত্র

এখানে প্রতি পাদের স্বরসংখ্যার কোনো মিল পাওয়া যায় না। অথচ প্রতি পাদে মাত্রাসংখ্যা চার, কেবল প্রতি ছত্রের শেষ পাদে তিন-তিন মাত্রা। কাজেই ছন্দ মাত্রাবৃত্ত।



এক্ষণে মাত্রাবৃত্ত ছন্দের শ্রেণীবিভাগে প্রবৃত্ত হওয়া বাক। মাত্রাবৃত্ত ছন্দের প্রতি পাদে মাত্রাসংখ্যা এবং প্রতি ছত্রের অন্তর্গত পাদসংখ্যার প্রতি দৃষ্টি রেখে এ ছন্দের শ্রেণীবিভাগ করতে হয়। মাত্রাবৃত্ত ছন্দের প্রতি পাদে চার মাত্রা, পাঁচ মাত্রা, ছয় মাত্রা এবং তিন-চার কিংবা চার-তিনের মিশ্রণে সাত মাত্রা করে থাকতে পারে। সুতরাং এ দিক থেকে মাত্রাবৃত্ত ছন্দকে চতুর্মাত্রপাদ, পঞ্চমাত্রপাদ, ষষ্ঠমাত্রপাদ এবং সপ্তমাত্রপাদ, এই চার ভাগে বিভক্ত করা যায়। প্রতি পাদে অন্তর্গত এই মাত্রাসংখ্যার দ্বারাই এ ছন্দের ভিতরের গঠন নিয়ন্ত্রিত হয়। আবার প্রতি ছত্রের অন্তর্গত পাদসংখ্যার দিক থেকে এ ছন্দকে দ্বিপদী ত্রিপদী চৌপদী প্রভৃতি নাম দেওয়া যেতে পারে। এই শ্রেণীবিভাগ ছন্দের বহির্গঠনকে নিয়মিত করে। অনেক সময় এ ছন্দের শেষ একটি পাদ এক, দুই, তিন, চার, এমন কি পাঁচ মাত্রার অভাবে অপূর্ণ থাকতে পারে। সে স্থলে এ ছন্দকে অপূর্ণ দ্বিপদী, অপূর্ণ ত্রিপদী প্রভৃতি নাম দেওয়া বাবে।

### ১। চতুর্মাত্রক বা চতুর্মাত্রপাদ—

অপূর্ণ চৌপদী ( বাংলা পঙ্খটিকা )

থলে যায় | মুহু আজ | অন্তর | -দৃষ্টি ।

অবচন একি শ্লোক ! অপরূপ সৃষ্টি ।

সাম্যের একি সাম ! পূত হল চিত্ত ।

নিত্যের ইঙ্গিত এ মিলন-তীর্থ !

টুটে ভেদ-নিবেধের শিলাময় জজ্ঞা,

জয়তু যমুনা জয় ! জয় জয় গঙ্গা !

—সত্যেন্দ্রনাথ, 'বেলাশেখের গান', বৃন্দাবনী

### ২। পঞ্চমাত্রক বা পঞ্চমাত্রপাদ—

নন্দপুর | -চন্দ্র বিনা | বৃন্দাবন | অঙ্ককার ।

বহে না চল মল্লানিল লুটিয়া ফুল-গন্ধভার ॥

জলে না গৃহে সন্ধ্যাদীপ, ফুটে না বনে কুন্দনীপ,

ছুটে না কল-কণ্ঠস্থধা পাপিয়া-শিক-চন্দনার ।

নন্দপুর-চন্দ্র বিনা বৃন্দাবন অঙ্ককার ॥

—কালিদাস দাস, 'পর্ণপুট', বৃন্দাবন অঙ্ককার

## ৩। বণ্ণাত্মক বা বণ্ণাত্মপাদ—

মেঘহুর্দিন | হুর্ধোগে আজি | গর্জিছে বারি | -ধার ।  
 সঙ্কটময় পঙ্কিল পথ, শঙ্কিল চারি ধার ॥  
 যে থাকে যেথায়, আজিকে সেথায় মিলিতে সবাই হবে ।  
 বিশ্বনাথের ডকা বেজেছে মেঘভৈরব রবে ॥

—বতীন্দ্রমোহন, 'নাগকেশর', রথবাতা

## ৪। সপ্তমাত্মক বা সপ্তমাত্মপাদ—

## (ক) তিন-চারের মিশ্র

আজি ধ্বনিছে দিগ্ধু | শঙ্খ দিকে দিকে,  
 গগনে কারা যেন চাহিয়া অনিমিখে ।  
 ওই ধু ধু ধু হোমশিখা জ্বলিল ভারতে রে,—  
 ললাটে জয়টীকা গ্রন্থন-হার গলে, চলে রে বীর চলে ।  
 সে কারা নহে কারা, যেখানে ভৈরব রক্ত-শিখা জলে ॥

—নজরুল, 'বিবের বাঁশী', বন্দীবন্দনা

## (খ) চার-তিনের মিশ্র

সংগ্রামে আজি যে | হৃদুভি বাজিছে,  
 প্রাণদান করিতে সত্যই রাজি কে ?  
 নির্ভীক হৃদয়ে দুঃখে না ভরিয়া  
 গৌরব নিবি কে মৃত্যুরে বরিয়া ?  
 কে আলিবি তিমিরে মৃত্যুর দীপ্তি  
 ভেদ করি বত না মিথ্যার গুপ্তি ?  
 কে ধরিবি বৃক্ষেতে দীন-অসহায়রে ?  
 আয় ছুটে আজিকে, আয় ছুটে আয় রে ॥

—লেখক

মাত্ৰাত্মক ছন্দের ত্রিপদী ত্রিপদী প্রভৃতি বিভিন্ন প্রকারের পংক্তির সমাবেশে বাংলা কবিতায় সর্বদাই বহু ছন্দোবদ্ধ দৃষ্টিগোচর হয়ে থাকে। সুতরাং বিভিন্ন ছন্দোবদ্ধের দৃষ্টান্ত প্রদর্শন অনাবশ্যক। কিন্তু মাত্ৰাত্মক ছন্দে মুক্তবদ্ধ কবিতা

দেখা যায় না। তথাপি এই ছন্দেও যে মুক্তবন্ধ কবিতা রচনা করা যায় তাতে সন্দেহ নেই। বাংলা মাত্রাবৃত্ত ছন্দে মুক্তবন্ধ কবিতার অতি উৎকৃষ্ট দৃষ্টান্ত-স্বরূপ বাংলার উদীয়মান কবি কাজী নজরুল ইসলামের ‘বিশ্রোহী’-নামক কবিতাটি উল্লেখযোগ্য।

এ স্থলে আর-একটি কথার উল্লেখ করা প্রয়োজন। যদিও বাংলার স্বরবর্ণগুলো বিস্তৃত সংস্কৃত রীতিতে উচ্চারিত হয় না, তথাপি মাত্রাবৃত্ত ছন্দে মাঝে মাঝে (প্রায়ই সংগীতে) সংস্কৃত উচ্চারণরীতি অবলম্বন করেও কবিতা রচনা করা হয়। দু-একটা দৃষ্টান্ত দিচ্ছি।

### ১। ষণ্মাত্রাপাদ—

দেশ দেশ | নন্দিত করি | মন্দির তব | ভেরী,

আসিল যত বীরবৃন্দ আসন তব ঘেরি।

দিন আগত ঐ,

ভারত তবু কই।

সে কি রহিল লুপ্ত আজি সবজন-পশ্চাতে,—

লউক বিশ্ব-কর্মভার মিলি সবার সাথে।

প্রেরণ কর ভৈরব তব দুর্জয় আহ্বান হে,

জাগ্রত ভগবান হে ॥

—রবীন্দ্রনাথ, ‘গীতবিতান’, অংশ ১৬

### ২। সপ্তমাত্রাপাদ—

এস মঙ্গল, | এস গৌরব,

এস অক্ষয় পুণ্য-সৌরভ,

এস তেজঃ-সূর্য-উজ্জল কীর্তি-অম্বর মাঝ হে।

বীর-ধর্মে পুণ্য কর্মে বিশ্বহৃদয়ে রাজ হে।

শুভ শম্ব বাজহ, বাজ হে।

জয় জয় নরোত্তম, পুরুষসত্তম,

জয় তপস্বী-রাজ হে ॥

—রবীন্দ্রনাথ, ‘গীতবিতান’, অংশ ১৭

৩। অষ্টমাত্রাপাদ—

(ক) পতিতোক্কারিণি | গঞ্জে !

শ্রাম-বিটপি-ঘন | ভটবিদ্রাবিনি, | ধূসর-ভরঙ্গ-ভঞ্জে !

কত নগনগরী তীর্থ হইল তব চুষ্টি চরণযুগ মাই,

কত নরনারী ধৃত হইল মা, তব সলিলে অবগাহি,

বহিছ জননি এ ভারতবর্ষে কত শত যুগ যুগ বাহি,

করি হস্তামল কত মক্ক-প্রাস্তর শীতল পুণ্যতরঙ্গে ॥

—বিজ্ঞানলাল, 'ভীষ্ম', চতুর্থ অঙ্ক, 'পতিতোক্কারিণি গঞ্জে'

(খ) 'রে সতি, রে সতি !' | কাঁদিল পশুপতি | পাগল শিব প্রম | -খেশ ।

যোগমগন হর তাপস যত দিন, তত দিন না ছিল ক্লেশ ॥

শবহাদি আসন, শ্মশান-বিচরণ, ভ্রগত নিরুপণ জ্ঞানে ।

ভিক্ষুক, বিষধর, তিরপিত অস্তর, আশ্রম-রতি নিরবাণে ॥

—হেমচন্দ্র, 'দশমহাবিছা', মহাদেবের বিলাপ

অনেক সময় মাত্রাবৃত্ত ছন্দে সংস্কৃত উচ্চারণ ও বাংলা উচ্চারণ যথেষ্টভাবে মিশ্রিত করা হয়। কিন্তু এরকম যথেষ্ট উচ্চারণ সংগীতে দোষাবহ না হলেও সাধারণ কবিতায় দোষাবহ বটে।—

জ্যোৎস্নাহাসিত | নী-ল আকাশে | যখন বিহগ গা-হে,

স্নিগ্ধ সমীরে | শিহঁরে ধরণী | মুগ্ধ নয়নে | চা-হে ।

—বিজ্ঞানলাল, 'চন্দ্রগুপ্ত', তৃতীয় অঙ্ক, প্রথম দৃশ্য, 'যখন সঘন গগন গরজে'

এখানে হাইকেন-চিহ্নিত স্থান-তিনটিতে সংস্কৃত নিয়মে দীর্ঘ উচ্চারণ করতে হবে। কিন্তু এমন দৃষ্টান্ত কবিতায় অতি বিরল।

### অক্ষরবৃত্ত ছন্দ

অক্ষরবৃত্ত ছন্দের সর্বাপেক্ষা শ্রেণীবিভাগ করা বিশেষ সহজ নয়। কেননা, বাংলার কবিগণ শত শত বৎসর ধরে এ ছন্দে কবিতা লিখে আসছেন এবং তার ফলে এ ছন্দে অসংখ্য ও অদ্ভুত অদ্ভুত রূপবৈচিত্র্য দেখা দিয়েছে। কবিরা নিজের ইচ্ছামতোই কোথাও এক অক্ষর বেশি বা কোথাও এক অক্ষর কম ব্যবহার করেই মনে করেছেন এই একটি নৃতন ছন্দ হয়ে গেল এবং নিজ কল্পনা

থেকে এর একটি স্বতন্ত্র নাম দিয়ে ফেলেছেন। এমনি করে এ ছন্দের অসংখ্য প্রকারভেদ ও অসংখ্য নামের উৎপত্তি হয়েছে। কিন্তু অধিকাংশ স্থলেই এই শ্রেণীবিভাগ ও নামকরণ নিছক খামখেয়ালি বই আর কিছুই নয়। তা ছাড়া, অক্ষরবৃত্তের নামে অনেক কবিতা চলে আসছে, কিন্তু প্রকৃতপক্ষে সেগুলো অক্ষরবৃত্তের এলাকায় পড়ে না। আসলে সেগুলোর ধ্বনি ও গতিভঙ্গি মাত্রাবৃত্তের তায়। ঊনবিংশ শতাব্দীর শেষ ভাগ পর্যন্ত এ ছন্দে নানারকম অভূত প্রকারভেদ দেখা দিচ্ছিল। বোধ করি অবশেষে রবীন্দ্রনাথের হাতে পড়ে এ ছন্দ তার স্বরূপ প্রকাশ করতে পেরেছে। তিনি এর কতকগুলোকে অক্ষরবৃত্তের এলাকাতেই রেখেছেন, আর কতকগুলোকে মাত্রাবৃত্তের অধিকারের মধ্যে নিয়ে গেছেন। রবীন্দ্রনাথই মাত্রাবৃত্ত ছন্দের উদ্ভাবক।

পূর্ব কবিদের খামখেয়ালির একটা দৃষ্টান্ত দিচ্ছি।—

প্রথর রবির কর | শিরে সহ হয় হে।

তার তেজে বালি তাতে, পদে নাহি সয় হে ॥<sup>১</sup>

—লালমোহন, 'কাব্যনির্ণয়', নবম সং-১৩৪২, পৃ ১১৪

এখানে যদি প্রতি ছত্রের শেষ অক্ষরটা না থাকত, তা হলেই এ ছন্দটা হত 'পয়ার'। কিন্তু যেহেতু শেষে একটি 'হে' যোগ করে দেওয়া হয়েছে, সেজন্তে এইটে আর পয়ার রইল না, সম্পূর্ণ বদলে গিয়ে তার নাম হল 'মালতী' ছন্দ। কিন্তু এই মালতীর আগে যদি আর দুটো অক্ষর বসানো যায় তা হলেই এ ছন্দ হয়ে যাবে 'মালতীলতা'! যথা—

তুমি আপনার দোষ কহু | দেখিতে না পাও হে।

দেখি, পাইলে পরের দোষ শত মুখে গাও হে ॥

—লেখক (সম্ভবতঃ)

যা হক, এসমস্ত খামখেয়ালির বিজ্ঞত আলোচনা করার স্থান আমাদের নেই। সুতরাং প্রাচীন শ্রেণীবিভাগ ও 'কুহুমমালিকা', 'চম্পক', 'মালবীপ'

১ 'কাব্যনির্ণয়' গ্রন্থের পাঠের সঙ্গে এই পাঠের কিছু পার্থক্য আছে। এই পার্থক্য সম্ভবতঃ লেখককৃত। প্রবন্ধ রচনাকালে লেখকের হাতের কাছে ছিল এই গ্রন্থের অষ্টম সংস্করণ (১৩১৮ শ্রাবণ)।

প্রভৃতি কাল্পনিক নাম ছেড়ে দিয়ে সাধারণভাবে আধুনিক ছন্দের শ্রেণীবিভাগ ও নামকরণ করব।

এ সম্বন্ধে প্রথম বক্তব্য এই যে, অক্ষরবৃত্ত ছন্দের পাদবিভাগ সাধারণতঃ স্বরবৃত্ত বা মাত্রাবৃত্তের মতো একভাবেই চলে না। এর পাদবিভাগের অনেক বৈচিত্র্য আছে। সুতরাং আমাদের পূর্বপ্রণালী অল্পসারে এ ছন্দকে চতুরক্ষর পাদ, ষষ্ঠাক্ষরপাদ প্রভৃতি শাখায় বিভক্ত না করে একেবারেই দ্বিপদী, ত্রিপদী প্রভৃতি শ্রেণীতে বিভক্ত করা সমীচীন মনে করি। আর সঙ্গে সঙ্গে প্রতি পাদের অক্ষরসংখ্যা দিয়ে গেলেই প্রত্যেক ধারার বিশিষ্ট স্বরূপটি চোখে পড়বে।—

### ১। দ্বিপদী (৬+৫)

ষড়ক্ষরপাদ, অপূর্ণ দ্বিপদী : প্রাচীন নাম 'একাবলি'

ভো নভোমণ্ডল, | বল স্বরূপ,

কে দিল তোমায় এরূপ রূপ।

এ ভব-ভবনে যে দিকে চাই,

সে দিকে তোমারে দেখিতে পাই ॥

—কৃষ্ণচন্দ্র মজুমদার, 'সত্তাবশতক', আকাশ

### ২। দ্বিপদী (৬+৬)

ষড়ক্ষরপাদ, পূর্ণ দ্বিপদী : প্রাচীন নাম 'দীর্ঘ একাবলি'

আজি শচীমাতা, | কেন চমকিলে—

ঘুমাতে ঘুমাতে উঠিয়া বসিলে ?

লুপ্তিত অঞ্চলে 'নিম্ন নিম্ন' বলে

হার খুলি মাতা, কেন বাহিরিলে ?

—শিবনাথ শাস্ত্রী, 'পুষ্পমালা', চৈতন্যের সন্ন্যাস

### ৩। দ্বিপদী (৮+৬)

অষ্টাক্ষরপাদ, অপূর্ণ দ্বিপদী, প্রাচীন নাম 'পন্ন্যার'

সাত কোটি সন্তানেরে, | হে মুগ্ধ জননি,

য়েখেছ বাঙালি করে, মাহুষ কর নি।

—রবীন্দ্রনাথ, 'চৈতালি', বঙ্গমাতা

৪। দ্বিপদী (৮+৮)

অষ্টাক্ষরপাদ, পূর্ণ দ্বিপদী

যেই দিন ও চরণে | ডালি দিম্ এ জীবন,  
হাসি-অশ্রু সেই দিন করিয়াছি বিসর্জন।...  
হাসিবার কাদিবার অবসর নাহি আর,  
হুথিনী জনমভূমি, মা আমার, মা আমার ॥

—কামিনী রায়, 'আলো-ছায়া', মা আমার

৫। দ্বিপদী (৮+১০)

হে নিস্তরু গিরিরাজ, | অভ্রভেদী তোমার সংগীত  
তরঙ্গিয়া চলিয়াছে অমৃদান্ত উদান্ত স্বরিত  
প্রভাতের দ্বার হতে সন্ধ্যার পশ্চিম নীড় পানে  
দুর্গম দুর্গহ পথে কি জানি কি বাগীর সন্ধ্যানে।

—রবীন্দ্রনাথ, 'উৎসর্গ', ২৪

৬। দ্বিপদী (১০+১০)

দশাক্ষরপাদ, পূর্ণ দ্বিপদী

অনাথ ছেলেরে কোলে নিবি, | জননী'র আয় তোরা সব;  
মাতৃহার মা যদি না পায় তবে আজ কিসের উৎসব?  
দ্বারে যদি থাকে দাড়াইয়া, স্নানমুখে বিবাদে বিরস,—  
তবে মিছে সহকার-শাখা, তবে মিছে মঙ্গলকলস ॥

—রবীন্দ্রনাথ, 'কড়ি ও কোমল', কাঙালিনী

৭। ত্রিপদী (৪+৪+৬)

দেখ দ্বিজ | মনসিজ | জিনিয়া মুরতি,  
পদ্মপত্র যুগ্মনেত্র পরশয়ে শ্রুতি।  
অমুপম তত্ত্বাম নীলোৎপল-আভা,  
মুখকচি কত শুচি করিয়াছে শোভা ॥<sup>১</sup>

—কাশীরাম দাস, 'মহাভারত', আদি পর্ব

১ এই পাঠ বঙ্কলোপে ভয়গোপাল তর্কালঙ্কার-কর্তৃক পরিমার্জিত। দ্রষ্টব্য 'সাহিত্যসাধক-চরিত-  
মালা' ১৩ (১৩৪৯ পৃষ্ঠা), পৃ ৫ এবং ১৭।

এর প্রাচীন নাম 'তরল পয়ার'। আসলে এ ছন্দ পয়ারই, তবুও এই যে, একেবারে আট অক্ষরের পরে যতি না পড়ে এখানে প্রতি ছত্রেই প্রথম চার অক্ষরের পর আর-একটা অতিরিক্ত যতি পড়েছে। অর্থাৎ পয়ারের প্রথম পদটাকে ভেঙে দুটো করা হয়েছে।

৮। ত্রিপদী (৬+৬+৮)

কৈলাস ভূধর | অতি মনোহর | কোটি শশী পরকাশ।

গন্ধর্বকিন্মর যক্ষবিজ্ঞাধর অপ্সরাগণের বাস ॥

—ভারতচন্দ্র, 'অঙ্গদামঙ্গল', কৈলাসবর্ণন

প্রাচীন নাম 'লঘু ত্রিপদী'। এরকম ত্রিপদী অক্ষরবৃত্তের চাইতে মাত্রাবৃত্তেই সুন্দর হয়।

৯। ত্রিপদী (৮+৬+৬)

একদা তুলসীদাস | জাহ্নবীর তীরে | নির্জন শ্মশানে।

সন্ধ্যায় আপন মনে একা একা ফিরে মাতি নিজ গানে ॥

—রবীন্দ্রনাথ, 'কথা', স্বামীলাভ

লঘু ত্রিপদীর পদগুলোকে উলটিয়ে নিলে অথবা পয়ারের সঙ্গে ছয় অক্ষর যোগ করে দিলেই এ ছন্দ পাওয়া যায়।

১০। ত্রিপদী (৮+৮+৬)

নদীতীরে বৃন্দাবনে

সনাতন এক মনে

জপিছেন নাম।

হেনকালে দীনবেশে

ব্রাহ্মণ চরণে এসে

করিল প্রণাম ॥

—রবীন্দ্রনাথ, 'কথা', স্পর্শমণি

১১। ত্রিপদী (৮+৮+১০)

বসিয়া প্রভাতকালে

সেতারার দুর্গভালে

শিবাজী হেরিলা এক দিন।

রামদাস গুরু তাঁর

ভিক্ষা মাগি দ্বার দ্বার

ফিরিছেন ঘেন অন্নহীন ॥

—রবীন্দ্রনাথ, 'কথা', প্রতিনিধি



১২। ত্রিপদী ( ৮+১০+৬ )

চাব না পশ্চাতে মোরা, | মানিব না বন্ধন-ক্রন্দন, |

হেরিব না দিক্ ।

গনিব না দিন ক্ষণ, করিব না বিতর্ক-বিচার,

উদ্ধাম পথিক ॥

—রবীন্দ্রনাথ, 'কল্পনা', বর্ধশেষ

১৩। ত্রিপদী ( ৮+১০+১০ )

মোরে কর সভাকবি | ধ্যানমোহ তোমার সভায়, |

হে শর্বরী, হে অবগুষ্ঠিতা !

তোমার আকাশ জুড়ি যুগে যুগে জপিছে যাহারা

বিরচিব তাহাদের গীতা ॥

—রবীন্দ্রনাথ, 'কল্পনা', রাজি

১৪। চৌপদী ( ৬+৬+৬+৬ )

ষড়ক্ষরপাদ, অপূর্ণ চৌপদী

চিরস্থায়ী জন | ভ্রমে কি কখন |

ব্যথিতবেদন | বুঝিতে পারে ?

কি ঘটনা বিধে বুঝিবে সে কিসে

কতু আশীবিধে দংশেনি যারে ॥

—কৃষ্ণচন্দ্র মজুমদার, 'সদ্ভাবশতক', স্থখী হৃঃখীর হৃঃখ বুঝে না

১৫। চৌপদী ( ৮+৮+৮+৬ )

অষ্টাক্ষরপাদ, অপূর্ণ চৌপদী

অধেক জীবন খুঁজি | কোন্ ক্ষণে চক্ষু বুজি |

স্পর্শ লভেছিল যার | এক পল ভর,

বাকি অর্ধ-ভয় প্রাণ আবার করিছে দান

কিরিয়া খুঁজিতে সেই পরশ-পাথর ।

—রবীন্দ্রনাথ, 'সোনার ভরী', পরশপাথর

১৬। চৌপদী ( ১২ + ১২ + ১২ + ৩ )

“প্রভু বুদ্ধ লাগি | আমি ভিক্ষা মাগি,

ওগো পুরবাসী, কে রয়েছে জাগি”,—

অনাথপিণ্ড কহিলা অদ্ভুত

-নিনাড়ে।

—রবীন্দ্রনাথ, ‘কথা’, শ্রেষ্ঠভিক্ষা

এ ছন্দকেই ‘দীর্ঘ চৌপদী’ বলা উচিত। কেননা এর প্রথম তিন পদের মধ্যস্থলে একটি করে ষতি আছে। আসলে তিনটি দ্বিপদী ছত্র ও একটি অপূর্ণ পদ নিয়ে এ ছন্দ রচিত হয়েছে।

দৃষ্টান্তস্বরূপ অক্ষরবৃত্ত ছন্দের কেবল প্রধান প্রধান কয়েকটা প্রকারভেদই দেখানো গেল। এ ছন্দের আরও অনেক প্রকারভেদ রয়েছে। বাহুল্যভয়ে আর দৃষ্টান্ত দেওয়া গেল না। এ ছন্দের উদ্ভূত নমুনাগুলো থেকেই পাঠক অনায়াসে বাকি প্রকারভেদগুলোর শ্রেণীবিভাগ ও নাম অনুমান করে নিতে পারবেন। যা হক, উক্ত দৃষ্টান্তগুলো থেকে বেশ বোঝা যাচ্ছে যে, অক্ষরবৃত্ত ছন্দে প্রতি পাদে চার, ছয়, আট এবং দশটি করে অক্ষর থাকতে পারে। অত্র কোনো-সংখ্যক অক্ষর নিয়ে এ ছন্দে পদ রচনা করতে গেলে পদগুলো খোঁড়া হয়ে যাবে। জীবমাত্রেরই দুই, চার, ছয়, আট প্রভৃতি জোড়-সংখ্যক পা আছে বলেই তারা চলতে পারে, বিজোড়-সংখ্যক পা নিয়ে খোঁড়াতে হয়। এ ছন্দেরও তাই। তিন, পাঁচ, সাত প্রভৃতি-সংখ্যক অক্ষরে এ ছন্দ চলতেই পারে না।

এই বিশেষ প্রকৃতিটি বজায় রেখে অক্ষরবৃত্তে দুটি উপায়ে অতি স্বাধীনভাবে কবিতা রচনা করা যায়—একটি ‘অমিত্রাক্ষর’ ছন্দ, আর-একটি ‘মুক্তবন্ধ’ ছন্দ। সকলেই জানে চোদ্দোর পরে মিল না দেওয়াটাই অমিত্রাক্ষরের বিশেষত্ব নয়। “মহাভারতের কথা সমান অমৃত” লিখলেই মহাভারত অমিত্রাক্ষর হয়ে যেত না। আসলে প্রতি ছত্রের পরে মিল থাক বা না থাক, ষতিস্থাপনের বৈচিত্র্যই অমিত্রাক্ষরের বৈশিষ্ট্য। নানা ভঙ্গিতে চার, ছয়, আট, দশ অক্ষরের পরে ষতিস্থাপনেই অর্থাৎ এ ছন্দের পাদগুলোকে বহু বিভিন্ন পরিমাপের করাতেই এর গাভীরগরিমা পরিস্ফুট হয়ে ওঠে। প্রতি ছত্রে চোদ্দো অক্ষর রাখা কিংবা চোদ্দোর পরে মিল না দেওয়াটা অবাস্তব মাত্র।

সুতরাং এ দুটো অনাবশ্যক বাধাবোধকে না মেনে অক্ষরবৃত্ত ছন্দে যে কবিতা রচনা করা যায় তাকেই ‘মুক্তবন্ধ’ ছন্দ বলা যায়। মুক্তবন্ধ ছন্দে প্রতি ছত্রে দুই থেকে দশ পর্যন্ত যে-কোনো জোড়-সংখ্যক অক্ষরবিশিষ্ট একটি বা দুটি পাদ থাকে, এই তার বিশেষত্ব। ছত্রের শেষের দিকের মিলগুলো কবির ইচ্ছামতো নিয়ন্ত্রিত হয়। রবীন্দ্রনাথের ‘বলাকা’র কতকগুলো কবিতাই মুক্তবন্ধ অক্ষরবৃত্তের সর্বপ্রথম এবং সর্বোৎকৃষ্ট উদাহরণ।

যে ঐশ্বর্যশালী অহোরাত্র ঐশ্বর্ষের হাওয়াতে লালিত-পালিত ও বর্ধিত হয়ে ওঠে, সে তার সহজলব্ধ সম্পদের প্রাচুর্য সহজে উপলব্ধি করতে পারে না। বাংলার মতো নদীমাতৃক দেশে যাদের জীবন পরিপুষ্ট তারা বাংলার নদীগুলির প্রকৃত মাধুর্য সজাগভাবে অহুত্ব করে না, কিন্তু অলক্ষ্যে তাদের মধুধারাতেই বাঙালির জীবন মধুময় হয়ে ওঠে। তেমনি বাংলা কাব্যের ক্ষেত্রেও ছন্দের গঙ্গা, বঙ্গপুত্র ও মেঘনা এই তিন ধারা কেমন করে বাঙালির জীবনকে সরস ও সতেজ করে তুলছে, রসমুগ্ধ বাঙালি সহজে তা অহুত্ব করতে পারে না। কিন্তু যখন চোখ খুলে বিভিন্ন দেশের ছন্দের ক্ষীণ ধারাগুলোর দিকে দৃষ্টিপাত করা যায়, তখন নিজের মাতৃভাষার এই অপূর্ব সম্পদ দেখে হৃদয় গৌরবে পূর্ণ হয়ে ওঠে। কোন্ ভাষায় ছন্দের এমন তিনটি বিশাল ধারা আছে, আর কোন্ ভাষায় এক ধারা থেকে বহু ধারা নির্গত হয়ে সমগ্র কাব্যক্ষেত্রে এমন শ্রামল ও স্থলীতল করে তুলেছে, তা তো জানি নে। জানি এই যে, বাংলা ভাষার ছন্দের ভাণ্ডার রিক্ত নয়, তাতে অপরিমেয় ধনরত্নরাশি স্তরে স্তরে সজ্জিত হয়ে আছে এবং নিঃস্ব যে বাঙালি, সে-ই আজ তার অধিকারী। এইটেই আমাদের গৌরব।\*

## বাংলা ছন্দ ও সংগীত

গানের ছন্দের সঙ্গে কাব্যের ছন্দের সাদৃশ্য কোথায় ও পার্থক্য কোথায় সে বিষয়ে একটু আলোচনা করব। সকলেই জানেন যে, যদিও কাব্য ও সংগীতের মধ্যে ভাবগত পার্থক্য অপরিসীম, তথাপি তাদের মধ্যে কোথাও একটু যোগ যেন রয়ে গেছে। কাব্যজগতের দিক্চক্রবাল যেখানটিতে নিজেকে নিজেকে অতিক্রম করে গিয়ে অনন্তকে স্পর্শ করেছে ঠিক সেখানটিতেই সংগীত-লোক শুরু হয়ে অনন্ত ভাবজগতে প্রসারিত হয়ে গেছে। কাব্যের শক্তির যেখানটিতে শেষ সীমা, সেখানটিতেই সে সংগীতরাজ্যের পরিধিতে সংলগ্ন হয়ে আছে; কিন্তু কিছুতেই সে ওই পরিধির ভিতরে নিজেকে ছড়িয়ে দিতে পারে না। কাব্যশক্তির লক্ষণই হচ্ছে এই যে, কাব্য প্রধানতঃ বাক্য ও অর্থের সাহায্যে প্রথমে মানসলোকে ছড়িয়ে পড়ে এবং তার পরে ওই মনোজগতের অন্তর্গত ইঞ্জিয়ার অহুভূতিজাত অনন্ত রূপের মধ্যে আত্মপ্রকাশ করে রূপের অতীত অসীম সৌন্দর্যলোকের দিকে ইঙ্গিত করতে থাকে। সেখানটিতেই আমাদের মন কাণ্ড্যের বচনকে অতিক্রম করে গিয়ে কাব্যের অনির্বচনীয়তাকে স্পর্শ করে অগাধ আনন্দের মধ্যে মগ্ন হয়ে সার্থকতা লাভ করে, আর সেখানটিতেই কাব্যের ধ্বনি এবং ছন্দও হিসাবের রাজ্যকে অতিক্রম করে কেবলি সংগীতের সুর ও লয়ের মধ্যে ছড়িয়ে পড়ার তীব্র আগ্রহে ও আকুলতায় পূর্ণ হয়ে ওঠে। পক্ষান্তরে সংগীতশক্তির আত্মপ্রকাশের প্রক্রিয়া এর প্রায় সম্পূর্ণ বিপরীত। সংগীত প্রথমেই কথাকে অতিক্রম করে গিয়ে মনকে অনির্বচনীয়তার নিবিড় আনন্দস্পর্শে সাক্ষ্য দান করে; পরে কথার ও ভাবের রাজ্যসীমায় এসে পৌঁছে কথা ও ভাবকে অনির্বচনীয়তা ও অনন্তের মহিমায় স্পন্দিত করে তোলে এবং কথাকে চিরন্তনতা ও অসীমের দিকে ছুটিয়ে নিয়ে গিয়ে তাকে অমরতা দান করে। হুতরাং দেখতে পাওয়া যাচ্ছে—কাব্যের গতি কথা, ভাব এবং রূপের থেকে অনন্ত, অরূপ ও অনির্বচনীয়তার আনন্দজগতের দিকে; কাব্যের গতি সীমা ও বহুত্বের জগৎ থেকে অনন্ত অনির্বচনীয়তার দিকে আরোহণ। কিন্তু সংগীত অনন্ত

অনির্বচনীয়তার আনন্দজগৎ থেকে সীমা ও রূপের জগৎকে উর্ধ্বদিকে আকর্ষণ করতে থাকে ; সংগীতের গতি কথা ও রূপের জগৎকে অরূপ ও অনির্বচনীয়তার দিকে উৎকর্ষণ। কাব্য চায় সংগীতের মধ্যে আত্মপ্রকাশ করে সার্থকতা লাভ করতে, আর সংগীত চায় কাব্যকে আপন অন্তরের অনির্বচনীয় আনন্দে মগ্নিত করে সার্থকতা দান করতে। এই নিগূঢ় সত্যটিকে আপনার কবিচিন্তে উপলব্ধি করেই রবীন্দ্রনাথ বলেছেন—

স্বর আপনারে ধরা দিতে চাহে ছন্দে,

ছন্দ ফিরিয়া ছুটে যেতে চায় স্বরে।

—রবীন্দ্রনাথ, 'উৎসর্গ', ১৭

সৌন্দর্যতত্ত্বের দিক থেকে কাব্য ও সংগীতের অন্তর্গত সাদৃশ্যের আলোচনা আমাদের আলোচ্য বিষয়ের বহির্ভূত। আমাদের উদ্দেশ্য বাহ্য গঠনের দিক থেকে কাব্য ও সংগীতের রচনাপ্রণালীর সাদৃশ্য ও পার্থক্যের আলোচনা করা। কাব্যের ছন্দ ও গানের ছন্দ কোন্ ঐক্যভূমিতে পরস্পরের সাযুজ্য লাভ করেছে, আমরা সেইটেই দেখাতে চেষ্টা করব। প্রথমেই মনে রাখতে হবে গানেই হক বা কাব্যেই হক, ছন্দ কোনোটারই মুখ্য উদ্দেশ্য নয়। গান এবং কাব্য, উভয়ত্রই ছন্দ গোণ ; মুখ্য-উদ্দেশ্যরূপ সৌন্দর্য্যষ্টির সে সহায়ক বা বাহন মাত্র। কিন্তু যেহেতু কোনো একটি সীমারেখায় পরস্পরের সহিত সংলগ্ন থেকেও কাব্য ও সংগীত স্বরূপতঃ সৌন্দর্য্যলোকের দুটি বিভিন্ন ক্ষেত্রে প্রসারিত হয়ে যায়, সেজগতে তাদের বাহন হৃদয়লোভ কোনো একটি সামান্যক্ষেত্রে পরস্পর মিলিত হয়েও দুটি বিভিন্ন পথেই আপন আপন উদ্দেশ্য সিদ্ধ করে।

কাব্যে ছন্দের উদ্দেশ্য কাব্যের কথা ও ভাবকে সৌন্দর্য্যবশময় মগ্নিত করে কথা ও রূপকে অনির্বচনীয়তা ও অরূপের মধ্যে মূর্তি দেওয়া। গানে ছন্দের উদ্দেশ্য গানের অরূপ নিবিড় আনন্দরসকে কথার মধ্যে ধরিয়ে দিয়ে মনের আয়ত্তের মধ্যে পৌঁছিয়ে দেওয়া। কাব্যের ছন্দের কারবার প্রধানতঃ কথাকে নিয়ে, কিন্তু কথার অতীত অরূপ অসীমের দিকে তার ব্যঞ্জনা। গানের ছন্দের উদ্দেশ্য কথার অতীতকে আভাসে ইঙ্গিতে মনের গোচরে ফুটিয়ে তোলা ; কথার অতীতকে কথার মধ্যেই মূর্তি দান করা তার সাধনা। সহজেই বোঝা যাচ্ছে, যেহেতু কথার অতীত স্বরূপকে

ফুটিয়ে তোলাই গানের ছন্দের প্রতিজ্ঞা, সেজগেই গানের ছন্দের সাধনা কাবোর ছন্দের চাইতে অনেকাংশে বৃহত্তর ও মহত্তর। কথাকে একটা বিশেষ ভাবে ছলিয়ে দিয়ে তার ভিতরকার ভাবকে ব্যক্ত করে অনির্বচনীয়তার দিকে ইঙ্গিত করে দেওয়াই কাব্যছন্দের কাজ। কিন্তু গানের ছন্দকে হ্রের স্বস্বতম ধ্বনিস্পন্দনকেও যথাযথরূপে মুক্তি দিয়ে অথচ আকৃষ্ট করে মনের পরিধির মধ্যে এনে পৌঁছিয়ে দিতে হয়। হ্রতরাং গানের ছন্দে স্বস্বাতিস্বস্ব বিশ্লেষণের প্রয়োজন হয়। সংগীতের হ্রের যথার্থ স্বরূপটিকে বিশ্লেষণের বা হিসাবের সীমার মধ্যে আনা অসম্ভব বললেও হয়। কিন্তু কাবোর ছন্দে এত স্বস্বাতিস্বস্ব বিশ্লেষণের প্রয়োজন হয় না। যদিও কাব্যে ছন্দ ধ্বনিকে নব নব বিচিত্র উপায়ে তরঙ্গিত ক'রে এবং ভাবকে ওই ধ্বনিতরঙ্গের মধ্য দিয়ে লীলায়িত ক'রে মনের স্তরে স্তরে স্পন্দিত করে তোলে, তথাপি ভাব বা বাগর্থই মুখ্য, ছন্দ বা বাগর্থের বাহন ধ্বনির নিয়ন্ত্রণরীতি গোপন। কথাকে নাড়া দিয়ে তার ভাবকে ফুটিয়ে তোলাই কাব্যছন্দের উদ্দেশ্য এবং এই ভাবকে ফুটিয়ে তোলার মধ্যেই তার সার্থকতার অবসান। কাজেই কাব্যে ধ্বনির নিয়ামক ছন্দশাস্ত্রের পরিধি সংকীর্ণ। ধ্বনিলীলার স্বস্বাতিস্বস্ব সমস্ত প্রক্রিয়াকে কান তথা মনের গোচর করা কাব্যছন্দের উদ্দেশ্য নয়। কিন্তু গানের ক্ষেত্রে ছন্দের পরিধি আর ধ্বনিলীলার পরিধি সমায়তন। ধ্বনিলীলার স্বস্বতম থেকে সর্বপ্রকার প্রকাশকে ফুটিয়ে তোলাতেই গানের ছন্দের সার্থকতা। হ্রতরাং গানের ক্ষেত্রে ছন্দশাস্ত্র ও ধ্বনিশাস্ত্র সমপরিসর এবং সেজগেই গীতছন্দের বিকাশভঙ্গি এত বিচিত্র ও অফুরন্ত।

গীতছন্দের এই অফুরন্ত বিকাশভঙ্গির আলোচনা করা আমাদের উদ্দেশ্য নয়। স্বস্বতার দিক দিয়ে গানের ছন্দ কাব্যছন্দকে প্রথম সোপানেই ছাড়িয়ে গেছে বটে, কিন্তু এই প্রথম সোপানটিতেই একটি অতি ক্ষুদ্রপরিসর সামান্য-ভূমিতে এই দুই ছন্দ পরস্পরের সাযুজ্য লাভ করে। অথচ ঐ ক্ষুদ্র ভূমিটুকুর মধ্যেও ওই দুই ছন্দের গতিলীলা কত বিভিন্ন দিকে, তাই দেখাতে চেষ্টা করব। গানের ছন্দ হ্রের ক্ষীণতম ও স্বস্বতম আবেগকেও ফুটিয়ে তুলতে চায়, সেইজন্য গীতছন্দের বিভাগ-উপবিভাগ অনেক এবং তার পারিভাষিক সংজ্ঞাও অল্প নয়। কাব্যছন্দের উদ্দেশ্য অত ব্যাপক ও গভীর নয় বলে তার বিভাগ ও পারিভাষিক শব্দ গীতছন্দের তুলনায় অনেক কম। তথাপি

পরস্পরের আংশিক সাদৃশ্যহেতু উভয় শাস্ত্রেই কতকগুলো সামান্য পারিভাষিক শব্দের ব্যবহার হয়। আমরা এ শব্দগুলির সংজ্ঞানির্দেশ এবং উক্ত দুই শাস্ত্রে এদের অর্থগত তারতম্য ও সার্থকতা সম্বন্ধে একটু আলোচনা করেই কাব্যছন্দ ও গীতছন্দের আলোচনায় নিবৃত্ত হব।

কাব্য ও সংগীত উভয় ক্ষেত্রেই মাত্রা, লয়, যতি ও তাল, এ কয়টা পারিভাষিক শব্দের ব্যবহার হয়। আমরা একে একে এ কয়টা পরিভাষার আলোচনায় প্রবৃত্ত হব।

## মাত্রা ও লয়

### ১

প্রথমেই মাত্রার কথা বলা প্রয়োজন। কবিতার ক্ষেত্রে মাত্রা শব্দটি খুবই সাধারণ বা স্থূল ভাবে ব্যবহৃত হয়। কবিতায় মাত্রার খুব সূক্ষ্ম হিসাব রাখা নিশ্চয়োজন। কিন্তু গানের ক্ষেত্রে মাত্রার অতি সূক্ষ্ম বিশ্লেষণ করা একান্ত প্রয়োজন। তিলার্থ-ব্যতিক্রমেও গানের সুরের ধারা বাধা পায়, কাজেই রসভঙ্গ হয়। কবিতার ছন্দেও ধরনির কালপরিমাণ নিয়ন্ত্রিত করার উদ্দেশ্যে মাত্রার হিসাব রাখতে হয়। কিন্তু তত্পরি কবিতায় স্থায়ীভাবে মাত্রার কোনো প্রকারভেদ নেই। কবিতার সব মাত্রাই একজাতীয় ও সমান স্থায়ী। কিন্তু গানে সব মাত্রা সমানভাবে চলে না, তার গতির বিভিন্ন তন্ত্রি ও লীলা আছে। সুতরাং কবিতার মাত্রা একঘেয়ে ও একরঙা। গানের মাত্রার স্বরূপ বিচিত্র। সেইজগ্রেই কবিতা গানের তুলনায় অনেকটা একঘেয়ে শুনতে হয়। এ সম্বন্ধে যথাস্থানে আরও হৃৎকটি কথা আলোচনা করব। এখন গানের মাত্রা ও কবিতার মাত্রার পার্থক্যটি বিশদ করতে চেষ্টা করব।

কবিতার মাত্রা থেকে গানের মাত্রা দুটো বিশিষ্ট উপায়ে পার্থক্য লাভ করে আভিজাত্য- ও শ্রী-সম্পন্ন হয়ে ওঠে।

প্রথমতঃ, কবিতায় অক্ষরগুলোর মাত্রার তারতম্য বিশেষ নেই, সবগুলো অক্ষরই প্রায় সমমাত্রায় একভাবেই প্রবাহিত হয়ে চলে। আমরা আগেই দেখেছি কবিতার অক্ষরগুলো হয় একমাত্রক, নয় দ্বিমাত্রক হবে। অন্তর্থাৎ হবার জো নেই।

॥ ॥

জগতের মাঝে কত বিচিত্র ভূমি হে,—

॥

ভূমি বিচিত্র-রূপিণী ।

—রবীন্দ্রনাথ, 'চিত্রা', চিত্রা

এখানে কেবল চিহ্নিত অক্ষরগুলো দ্বিমাত্রক, বাকি সবগুলো একমাাত্রক। সর্বত্রই এই রকম। কবিতায় কোনো বর্ণের দুইএর অধিক বা একের কম মাত্রা থাকে না। কিন্তু গানে এক-একটি বর্ণ ত্রিমাাত্রক, চতুর্মাাত্রক প্রভৃতি বহুমাাত্রক তো হতে পারেই, আবার অল্প দিকে এক-একটি বর্ণ অর্ধমাাত্রক, সিকিমাাত্রক প্রভৃতি অনেক প্রকার ভগ্নমাাত্রকও হতে পারে। পূর্বেই বলা হয়েছে যে, এই মাত্রাবৈচিত্র্যের ফলে ছন্দ (মাত্রাবৃত্ত) তরঙ্গিত হয়ে ওঠে। মধ্যে মধ্যে দ্বিমাাত্রক বর্ণের অস্তিত্বহেতুই মাত্রাবৃত্ত ছন্দ ও-রকম গতিভঙ্গিতে ছলে উঠতে পারে, নতুবা এ ছন্দ একেবারে একঘেয়ে হয়ে পড়ত। উপরের পঞ্চাংশটি পড়লেই এর স্বার্থার্থ উপলব্ধি হবে, শুধু তিনটি গুরু স্বরের প্রভাবেই এ ছন্দের স্বরটা কেমন তরঙ্গায়িত হয়ে উঠেছে। ঠিক এই কারণেই গানের স্বরপ্রবাহ এমন বিচিত্র উপায়ে নৃত্যপরায়ণ হয়ে উঠতে পারে। কিন্তু কবিতায় কোন্ বর্ণ গুরু এবং কোন্ বর্ণ লঘু হবে তা পূর্ব থেকেই নির্দিষ্ট থাকে বলে ছন্দরচয়িতার স্বাধীনতা কম, কেবল লঘুগুরু বর্ণের সন্নিবেশকৌশলের উপরেই তাঁর কৃতিত্ব নির্ভর করে। কিন্তু গানে মাত্রাপরিমাণ নির্দেশ করা সম্বন্ধে স্বররচয়িতার প্রায় সম্পূর্ণ স্বাধীনতা রয়েছে। তা ছাড়া, তাঁর স্বাধীনতার ক্ষেত্রের পরিসরও খুব বেশি; তিনি সিকিমাত্রা বা তার নীচু থেকে চার মাত্রা বা তার উর্ধ্বেও বিচরণ করতে পারেন। কিন্তু কাব্যছন্দ-রচয়িতার শুধু একমাাত্রক এবং দ্বিমাাত্রক বর্ণ নিয়েই কারবার; স্তবরাং তাঁর বিচরণভূমি অতি সংকীর্ণ। কবিতায় একটি বর্ণ এক মাত্রার কম বা দুই মাত্রার বেশি হতে পারে না। কিন্তু গানে একটি বর্ণ সিকিমাত্রক থেকে বহুমাাত্রক হতে পারে। সেইজন্যই গানের গতিবৈচিত্র্য কবিতার চাইতে ঢের বেশি। যেখানে কয়েকটি সিকিমাত্রক বর্ণ একত্র, হয় সেখানে গানের ধ্বনিপ্রবাহ অত্যন্ত খরগতি; যেখানে এক-একটি বর্ণের পরিমাণ অর্ধমাত্রা সেখানকার গতি অনেকটা মন্দর; আবার সেখানে এক-একটি বর্ণই বহুমাত্রাব্যাপী সেখানে



স্বরের গতি খুব ধীর এবং গম্ভীর। এইরূপে মাত্রাবৈচিত্র্যে স্বরের গতিবেগ অতি অদ্ভুত উপায়ে নিয়ন্ত্রিত হয়। যে-কোনো একটি গানের গতির প্রতি লক্ষ রাখলেই গানের মাত্রাবৈচিত্র্যের এই অসীম শক্তি ধরা পড়বে। গানে মাত্রাবৈচিত্র্যের আর-একটি গৌণ ফল প্রতি পাদের অন্তর্গত অক্ষরসংখ্যার অসমতা। আমরা পূর্বেই দেখেছি মাত্রাবৃত্ত ছন্দে পাদের অক্ষরসংখ্যা খুবই অনিয়মিত; গুরুস্বরের আধিক্য বা অল্পতা হেতু অক্ষরসংখ্যা কমে কিংবা বাড়ে। যেমন—

॥ ॥  
 শ্রদ্ধা সজল মেঘকজ্জল দিবসে

বিবশ গ্রহর অচল অলস আবেশে ।

—ରବୀନ୍ଦ୍ରନାଥ, 'କଲ୍ଲନା', ବର୍ଷାମିତ୍ରଜ

এখানে প্রথম ছত্রে দুটো গুরুস্বর অক্ষরসংখ্যা কমিয়ে তেরো করেছে ; দ্বিতীয় ছত্রে ও-রকম গুরুস্বর নেই বলে অক্ষরসংখ্যা পনেরো। কিন্তু উভয় ছত্রেই মাত্রাসংখ্যা সমান অর্থাৎ পনেরো। গানের এক পাদের সঙ্গে আর-এক পাদের অক্ষরসংখ্যার পার্থক্য আরও অনেক বেশি হতে পারে। যেখানে ভগ্নমাত্রক বা অল্পমাত্রক বর্ণ বেশি সেখানে অক্ষরসংখ্যাও বেশি। পক্ষান্তরে বহুমাত্রক বর্ণের আধিক্যে অক্ষরসংখ্যা অনেক কমে যায়।

এই তো গেল গানে মাত্রার গুণনবিষয়ক বা ভগ্নাংশবিষয়ক প্রকারভেদ। দ্বিতীয় প্রকারভেদ হচ্ছে মাত্রার স্থায়িত্ব নিয়ে। প্রথমেই মাত্রা সংজ্ঞানির্দেশ করার সময়ে বলা হয়েছে যে, কালের দিক দিয়ে ধ্বনিপরিমাণের একক বা unitকে 'মাত্রা' বলা হয়। একটি লঘুস্বর বা লঘুস্বরাস্ত বাঞ্ছনবর্ণ (যথা অ, ই, ক, খ) উচ্চারণ করতে যে সময় লাগে, সে সময়পরিমাণকে একমাত্রা বলে অভিহিত করেছি। মাত্রার এ সংজ্ঞা কাব্য ও সংগীত উভয়ত্রই সমভাবে খাটে। এই একমাত্রা-কালের দ্বিগুণ বা ত্রিগুণকে দুই মাত্রা বা তিন মাত্রা এক তার অর্ধেক বা সিকি-পরিমাণ কালকে অর্ধ মাত্রা বা সিকি মাত্রা বলব। গানে কেউ মাত্রা প্রভৃতিরও ব্যবহার আছে। কিন্তু গানে মাত্রাপরিমাণের আরও স্বল্প বিচার করা প্রয়োজন।

একটি লঘুস্বরের উচ্চারণে যে সময় লাগে তাকে এক মাত্রা বা মাত্রার একক বলে অভিহিত করেছি। কিন্তু একটু তলিয়ে দেখলেই মনে সংশয়

জাগবে, এ সংজ্ঞা ঠিক হল কি না। কেননা, একটি লঘুস্বরের উচ্চারণে কত সময় লাগবে তার তো কোনো স্থিরতা নেই। বস্তুতঃ ওই সংজ্ঞাটি আপেক্ষিক। কারণ, ওটা বিভিন্ন সময়ে একই ব্যক্তির অথবা একই সময়ে বিভিন্ন ব্যক্তির উচ্চারণের উপরে সম্পূর্ণ নির্ভর করে। আমি হয়তো এখন রেগে বা অগ্ন্য কোনো ব্যস্ততায় খুব দ্রুতগতিতে কথা বলছি, আবার হয়তো অগ্ন্য সময়ে নিস্তেজ অবসন্ন হয়ে খুব ধীরে ধীরে কথা বলব। সুতরাং আমার কথার এক মাত্রার সময়পরিমাণের কোনো স্থিরতা নেই। ব্যস্ততার সময়ে এক মাত্রার উচ্চারণে যে সময় লাগে, ধীরতার সময়ে তার পরিমাণ দেড়গুণ কি দ্বিগুণ পর্যন্ত বেড়ে যেতে পারে। সুতরাং মাত্রার কোনো নিরপেক্ষ সংজ্ঞা হল না। যদি বলা যায়, বিশেষ ব্যস্ততা বা ধীরতা বাদ দিয়ে স্বভাবতঃ অহুস্তেজিত বা অনবসন্ন অবস্থায় আমার এক বর্ণের উচ্চারণে যে সময় লাগে সেইটাই মাত্রার যথার্থ নিরপেক্ষ পরিমাণ, তথাপি ঠিক হবে না। কারণ, সকল লোকে সমান গতিতে উচ্চারণ করে না; এক বর্ণের উচ্চারণে আমার যে সময় লাগে অন্নের ঠিক সে সময় লাগে না— কারও বেশি লাগে, কারও কম লাগে।

সুতরাং সম্পূর্ণ নিরপেক্ষ মাত্রাপরিমাণ নির্ণয়ের উপায় কি? প্রশ্নটার উত্তর দেবার আগে ওটাকে আরও একটু বিশদ করে বুঝিয়ে বলা দরকার, কেননা এর উপরেই কবিতার সঙ্গে সংগীতের একটা প্রধান পার্থক্য নির্ভর করে। মনে কর ফেউ একটা গান করছে। এখন গানটির প্রত্যেক বর্ণের বিভিন্ন মাত্রাপরিমাণ নির্দেশ করা আছে, কোনোটার সিকি মাত্রা, কোনোটার দেড় দুই তিন বা চার ইত্যাদি। এ স্থলে গায়কের ছোটো বিষয়ের দিকে লক্ষ রাখতে হবে।—

প্রথমতঃ, দেখতে হবে যেন গানের আদ্যন্ত সর্বত্র মাত্রার সমতা রক্ষা হয়; অর্থাৎ গানের প্রথমেরই এক মাত্রা যতটুকু কাল স্থায়ী হয়, গানের শেষ পর্যন্ত যেন মাত্রার ওই স্থায়িত্বকালের স্থিরতা বা সমতা ( uniformity ) রক্ষা হয় এবং ভগ্নমাত্রা ও গুণমাত্রাগুলোর স্থায়িত্বেও যেন এককের স্থায়িত্বের সমানুপাতিক হয়। মাত্রার এই সমতার উপরেই সমগ্র গানটির ধ্বনিপ্রবাহের গতিসাম্য নির্ভর করে। ধ্বনিপ্রবাহের এই গতিসাম্যকেই সংগীতশাস্ত্রে ‘লয়’ নামে অভিহিত করা হয়। যদি লয় ঠিক না থাকে অর্থাৎ গানের গতি যদি সর্বত্র সমান না হয়ে কোথাও দ্রুত কোথাও বিলম্বিত হয় তবে সংগীতের সমস্ত মাধুর্যই নষ্ট হয়ে যায়। ধ্বনির

এই গতিসাম্য বা লয়ই সংগীতের মাধুর্যের মূলকারণ। স্তূতরাং দেখা গেল যে, প্রতি মাত্রার স্থায়িত্বকাল যথানুপাতে স্থানির্দিষ্ট হলেই সমগ্র সংগীতটির লয়ও স্থির হয়ে যায়। এখন আমরা লয়ের এ সংজ্ঞা দিতে পারি যে, সংগীতের আত্মস্ব সর্বত্র মাত্রার কালপরিমাণের সমতা বা সমানুপাত রক্ষা করাকেই ‘লয়’ বলে।

দ্বিতীয়তঃ, মাত্রার সমতা রক্ষা হলে লয় ঠিক থাকে বটে, কিন্তু একটি মাত্রা কত ক্ষণ স্থায়ী হবে সে প্রশ্ন স্বভাবতঃই মনে উদ্ভিত হয়। সংগীত সম্বন্ধে যাদের কিছুমাত্রও অভিজ্ঞতা আছে তাঁরাই জানেন যে, শুধু লয় ঠিক থাকলেই গানের মাধুর্য সম্পূর্ণ রক্ষা হয় না, লয়ের গতিবেগের ক্রমও (rate) নির্দিষ্ট হওয়া দরকার; কোনো গান দ্রুত লয়ে এবং কোনো গান বিলম্বিত লয়ে গীত হলেই ভালো শোনায়। স্তূতরাং যে গান দ্রুত লয়ে গীত হবে সে গানের মাত্রাও অল্পক্ষণস্থায়ী হবে, আবার বিলম্বিত লয়ে গাওয়া হলেই মাত্রার স্থায়িত্বকালেরও বৃদ্ধি হবে।

কাজেই দেখা যাচ্ছে সংগীতে মাত্রার কোনো বাধাবীধি স্থায়িত্বকাল নির্দিষ্ট নেই, গানভেদে মাত্রাপরিমাণও বিভিন্ন হয়। সংগীতে ধ্বনিপ্রবাহের এই গতিক্রম বা লয় অনেক প্রকার হতে পারে। কোনো গান দ্রুত লয়ে, কোনো গান অতিদ্রুত, বিলম্বিত, অতিবিলম্বিত, ঈষৎ-বিলম্বিত বা মধ্য লয়ে গাওয়া হয়। কিন্তু এ বিশেষণগুলো সবই আপেক্ষিক শব্দ, এগুলো গায়ক বা শ্রোতার প্রতিশক্তির উপর নির্ভর করে। আমি যে লয়টিকে দ্রুত মনে করছি, তুমি হয়তো তাকেই মধ্য বা বিলম্বিত মনে করতে পার। স্তূতরাং ১-বর লয় বা গতিক্রম বিভিন্ন ব্যক্তির প্রতিশক্তির উপরে নির্ভর করে বলে এ লয় ব্যক্তিভেদে বিভিন্ন হয়। যাতে এ ভিন্নতা না হয়ে সর্বত্র লয়ের সমতা রক্ষা হয়, সেজন্তে অনেক সময় ‘মাত্রামান’ (metronome) -নামক যন্ত্রের সাহায্য লওয়া হয়। ওই যন্ত্রের সাহায্যে প্রতি মাত্রার স্থায়িত্বকাল স্থানির্দিষ্ট করা যায়, স্তূতরাং গানের সর্বত্র গতিসাম্য বা লয় এবং ব্যক্তিনির্বিশেষে গতিক্রম বা লয়ের প্রকারভেদও স্থির থাকে। এ বিষয়ে আমাদের অধিকতর আলোচনা নিম্নয়োজন।

এখন আমরা কবিতায় এই মাত্রা ও লয়ের প্রয়োজনীয়তা কতখানি ভাই দেখতে চেষ্টা করব।\*

## ২

আমরা দেখেছি গানে মাত্রার সমতা ( অর্থাৎ ধ্বনির গতিসাম্য ) এবং ধ্বনির গতিক্রম গানের লয় ও লয়ের প্রকারভেদকে নিয়ন্ত্রিত করে। আবার ওই গতিক্রম বা লয়ের দ্রুততা- ও ধীরতা-ভেদে মাত্রারও স্থায়ীকাল পরিবর্তিত হয়। কবিতায় এসমস্ত সূক্ষ্ম বিচারের প্রয়োজন হয় না। কবিতায় গানের মতো মাত্রার কালপরিমাণ নির্দিষ্ট করে দেওয়া অনাবশ্যক। সংগীতশাস্ত্রে মোটামুটিভাবে এক মাত্রার কালপরিমাণ নির্দিষ্ট থাকে না বটে, কিন্তু প্রত্যেকটি বিশেষ গানে এক মাত্রা কত ক্ষণ স্থায়ী হবে তার নির্দেশ থাকে। লয় দ্রুত হলে মাত্রা অল্পস্থায়ী হয়, লয় মন্থর হলে মাত্রার স্থিতিকাল বেড়ে যায়। একটি লঘু স্বরের উচ্চারণে যে সময় লগে তাই এক মাত্রার পরিমাণ, এটি সাধারণ সংজ্ঞা এবং এ সংজ্ঞা সংগীতে ও কাব্যে সমভাবে খাটে। কিন্তু গানে লয়ভেদে একটি লঘু স্বরের উচ্চারণকাল বাড়তেও পারে, কমতেও পারে; এবং সংগীতশাস্ত্রে মাত্রাপরিমাণের বাড়তি-কমতির সূক্ষ্ম হিসাব রাখতে হয়। কিন্তু কাব্যছন্দে তা নয়। কবিতায় ধ্বনির গতিসমতা ( অর্থাৎ লয় ) এবং গতিক্রমের ( অর্থাৎ লয়ভেদের ) গণনা করা হয় না; হ্রতরাং লয়ভেদে কবিতাবিশেষে মাত্রাপরিমাণেরও বাড়তি-কমতি গণ্য হয় না। অর্থাৎ কবিতায় সকল প্রকার ছন্দেই মাত্রাপরিমাণ মোটামুটি স্থির থাকে বলে ধরে নেওয়া হয়; হ্রতরাং এক মাত্রা বলতে যে কতটা কাল বোঝায় তার হিসাব রাখা হয় না। কাজেই কবিতায় মাত্রার সংজ্ঞাটা অনেকটা অস্পষ্ট ও অনির্দিষ্টই থেকে যায়। একটি লঘু স্বরের উচ্চারণকালই এক মাত্রা, সে কালটুকুতে কত অল্পপল বা পল বোঝায় তার হিসাব রাখা কাব্যের ছন্দে নিষ্প্রয়োজন বলে গণ্য হয়।

কিন্তু তা হলেও গীতছন্দের মাত্রা- ও লয়-সম্পৃক্ত বিশেষত্বগুলোর সহিত কাব্যছন্দের যে কিছুমাত্র সঘন্ব নেই তা নয়। কারণ উভয় ছন্দই ধ্বনি এবং ধ্বনিশাস্ত্রকে অবলম্বন করে আপন আপন অস্তিত্ব রক্ষা করছে। কাজেই এ দু'এর মধ্যে থানিকটা সামান্যত্ব আছে। কাব্যছন্দেও যে সংগীতধর্ম অন্ততঃ অতি অল্পপরিমাণে বিস্তারিত আছে, যে-কোনো একটি কবিতার যথারীতি আবৃত্তি করলেই এ তথ্যটি পরিস্ফুট হয়ে উঠবে। কিন্তু কবিতায় সংগীতের প্রকৃতি উপলব্ধি করতে হলে খুব তীক্ষ্ণ অন্তর্দৃষ্টি থাকা প্রয়োজন। একটু নিগূঢ়ভাবে দেখলেই কবিতাতেও সংগীতের মাত্রা- ও লয়-সম্পর্কীয় লক্ষণগুলো লক্ষ করা যায়। কিন্তু

কবিতায় এ লক্ষণগুলো স্পষ্ট ব্যক্ত নয়। কারণ পূর্বেই বলেছি গানে ধ্বনির যত সূক্ষ্ম বিশ্লেষণ করতে হয়, কবিতায় তত প্রয়োজন হয় না।

প্রথমতঃ, লয়ের কথা। আপাততঃ কবিতায় লয়ের অস্তিত্ব টের পাওয়া যায় না এবং কাব্যছন্দ-শাস্ত্রে লয়ের কথা আলোচিতও হয় না বটে, কিন্তু তথাপি যথাযথরূপে কবিতা আবৃত্তি করতে হলে লয় রক্ষা করা আবশ্যক, অর্থাৎ সমগ্র কবিতাটা সমান গতিতে আবৃত্তি করা প্রয়োজন। গানে লয় সন্ধ্যা যতটা সচেতন ও সচেষ্ট থাকতে হয়, কবিতা আবৃত্তি করার সময় ততটা প্রয়াস আবশ্যক হয় না। তবু আবৃত্তি করার সময় যদি প্রতি মাত্রার স্থিতিশীল অর্থাৎ লয় ঠিক না থাকে তবে আবৃত্তি হৃদয় হয় না, প্রতি পদেই ঋতিকটুতাদোষ ঘটে। সেজন্যে কবিতার ক্ষেত্রে লয় শব্দের ব্যবহার না হলেও আবৃত্তিকারের স্বাভাবিক ঋতিকটুর প্রথরতাভেদে লয়ের পার্থক্যহেতু ব্যক্তিভেদে কবিতার আবৃত্তি মধুর বা কটু হয়। ঋতিকটুর পুনঃপুনঃ চর্চা দ্বারা লয় রক্ষা করার ক্ষমতা আয়ত্ত হয়ে গেলেই আবৃত্তি মার্জিত ও হৃদয় হয়।

দ্বিতীয়তঃ, ধ্বনির গতিক্রম বা লয়ভেদের কথা। একটু লক্ষ করলেই দেখা যাবে, সব কবিতাই সমান লয়ে আবৃত্তি করলে ভালো শোনায় না। কোনো কবিতা একটু দ্রুত লয়ে এবং কোনো কবিতা একটু ধীর লয়ে আবৃত্তি করলেই ঋতিমধুর হয়। কাজেই দেখা যায় কবিতাতেও ধ্বনির গতিক্রমভেদে লয়ভেদ হয়। যদিও ছন্দশাস্ত্রে এসমস্ত সূক্ষ্ম ভেদের প্রতি কোনো লক্ষ রাখা হয় না এবং ধ্বনির গতিক্রমের কোনো হিসাব রাখা হয় না, তথাপি কবিতাতেও ধ্বনির যে অল্পবিস্তর লীলাবৈচিত্র্য আছে সে বিষয়ে কোনো নন্দেহ থাকতে পারে না। কারণ কানই আপন ঋতির উপরে নির্ভর করে এ বিষয়ে সাক্ষ্য দান করে।

তৃতীয়তঃ, মাত্রার কথা। দেখা গেল যে, কবিতাভেদে লয়েরও দ্রুততা মধুরতা প্রভৃতি ভেদ হয়ে থাকে। তাই যদি হয় তবে কবিতাভেদে মাত্রারও স্থিতিকাল পরিবর্তিত হয়। কারণ মাত্রার স্থিতিকালের উপরেই লয়ের গতিক্রম নির্ভর করে। সুতরাং খুব তীক্ষ্ণ দৃষ্টিতে দেখলে কাব্যছন্দ-শাস্ত্রেও মাত্রার একটা অপরিবর্তনীয় স্থিতিপরিমাণ নির্দিষ্ট নেই। কবিতাভেদে ও আবৃত্তিকারভেদে মাত্রাপরিমাণ একটু এদিক-ওদিক পরিবর্তিত হয়ে থাকে। দ্রুত-আবৃত্ত কবিতায় মাত্রা যত ক্ষণ স্থায়ী হবে, ধীর-আবৃত্ত কবিতায় মাত্রা তার চেয়ে বেশি স্থায়ী

হবে, এ কথা সহজেই বোঝা যায়। কিন্তু তা হলেও ছন্দশাস্ত্রে মাত্রার এ পরিবর্তনশীলতা গণ্য নয়, গণনা করা অনাবশ্যক। কেননা, কবিতায় লয়ভেদ ও তজ্জনিত মাত্রার পরিবর্তন অতি সামান্য এবং শ্রুতির উপরে তার ক্রিয়াফলও বেশি নয়। তা হলেও শ্রোতা ও পাঠকের অলক্ষে এই মাত্রা ও লয়ের প্রকারভেদ আবৃত্তিকালে কবিতাবিশেষকে মধুর বা কর্কশ করে তোলে। কিন্তু গানে লয়ের গতিবেগ ও মাত্রার এ পরিবর্তনের উপরে গানের প্রকৃত স্বরূপ ও শ্রুতিমধুরতা খুব বেশি নির্ভর করে এবং এজগ্রেই গানে এগুলোর খুব সূক্ষ্ম বিশ্লেষণ ও সূক্ষ্ম হিসাব রাখা প্রয়োজন হয়।

এক্ষণে আমরা দৃষ্টান্তের সাহায্যে বিষয়টাকে আর-একটু বিশদ করতে চেষ্টা করব। আশা করি দৃষ্টান্তগুলো থেকেই পাঠক বুঝতে পারবেন যে, যদিও কাব্যছন্দের ক্ষেত্রেও ধ্বনির মাধুর্য ও সার্থকতা আসলে সুরের লয় ও মাত্রার স্থিতিপরিমাণের উপরে অনেকটা নির্ভর করে তথাপি তাদের ক্রিয়াফল কার্যতঃ এতটা অকিঞ্চিৎকর যে ছন্দশাস্ত্রে তাদের হিসাব রাখা অনাবশ্যক।

প্রথমে মাত্রাবৃত্তের দৃষ্টান্তই দেখা যাক।—

যুগে যুগে | অভিসার |  
করি লঘু | পক্ষে ;  
নাই লীলা-দেবতার  
অনিমেঘ চক্ষে ।  
আকাশের ছই তীর  
হতে নাহি দিই থির,  
টিকি নাকে। পৃথিবীর  
সীমামেরা বক্ষে ॥

আকাশের ফুল মোরা,  
হ্রাসিত মোরা হ্রালোকে ,  
স্বপনের ফুল মোরা  
ভুলভরা ভুলোকে ।

চরণে হাজার হিয়া  
কৈদে মরে গুমরিয়া,  
ধূলি হতে ফুল নিয়া  
পরি মোরা অলকে ॥

—সত্যেন্দ্রনাথ, 'তুলির লিখন', বিদ্যাংগণা

এটা চতুর্মাত্রক ছন্দের দৃষ্টান্ত। এ ছন্দে ঘন ঘন ষতি পড়ে। আর উপরের লাইনগুলি পড়লেই বোঝা যাবে এ ছন্দের স্বাভাবিক লয় দ্রুত।

পঞ্চমাঙ্গক ছন্দের লয়ও দ্রুত বটে, কিন্তু চতুর্মাত্রক ছন্দের চাইতে কিছু মন্থর। যথা—

জ্ঞানের মণি | প্রদীপ নিয়ে | ফিরিছ কে গো | দুর্গমে,  
হরিছ এক প্রাণের লীলা জন্তু-জড়-জগমে।  
অন্ধকারে নিত্য-নব পন্থা কর আবিষ্কার,  
সত্যপথ-যাত্রী ওগো, তোমায় করি নমস্কার ॥

—সত্যেন্দ্রনাথ, 'অত্র-আবীর', মনীষী-মঞ্জল

ষণ্মাত্রক ছন্দের গতি আরও মন্থর। যথা—

সে দিন নদীর | নিকষে অরুণ |  
আঁকিল প্রথম | সোনার লেখা ;  
জ্ঞানের লাগিয়া তরুণ তাপস  
নদীতীরে ধীরে দিলেন দেখা ।...  
মনে হল মোর নবজনমের  
উদয়শৈল উজ্জল করি'  
শিশিরধৌত পরম প্রভাত  
উদিল নবীন জীবন ভরি' ॥

—রবীন্দ্রনাথ, 'কাহিনী', পতিভা

কেবল যে ছন্দভেদেই লয় দ্রুত বা মন্থর হয় তা নয়, রচনাভেদে একই ছন্দের লয়ে অনেক পার্থক্য হতে পারে। ষণ্মাত্রকেরই আর-একটা নমুনা দিচ্ছি। পাঠক দেখতে পাবেন রচনাভেদে এটার লয় পূর্বোদ্ধৃত পংক্তি-কয়টির চাইতে কত বেশি ধীর। যথা—

জগতের মাঝে | কত বিচিহ্ন | তুমি হে,—

তুমি বিচিহ্ন | -রূপিণী ।

অযুত আলোকে বলসিছ নীল-গগনে,

আকুল পুলকে উলসিছ ফুল-কাননে,

দ্যালোকে ভুলোকে বলসিছ চল-চরণে,

তুমি চঞ্চল-গামিনী ॥

—রবীন্দ্রনাথ, 'চিহ্ন', চিত্রা

মাজারূপ ছন্দে যুক্তবর্ণের সাহায্যে ধ্বনিপ্রবাহ যেমন বৈচিত্র্য লাভ করে,  
স্বরবর্ণের বাহুল্যে তেমনি মন্থর ও একঘেয়ে হয়ে ওঠে ।

এবার স্বরবৃত্তের দৃষ্টান্ত দেব । এ ছন্দ সাধারণতঃ নৃত্যপরায়ণ ও দ্রুতগতি ।  
যথা—

পিছল পথে | নাইক বাধা, | পিছনে টান | নাইক মোটে,

পাগলা ঝোরার পাগল নাটে নিত্যনূতন সঙ্গী জোটে !

লাকিয়ে প'ড়ে ধাপে ধাপে, ঝাঁপিয়ে প'ড়ে উঠ হতে,

চড়চড়িয়ে পাহাড় ফেড়ে নৃত্য ক'রে মত্ত শ্রোতে,—

গুহার তলে গুমরে কৈঁদে, আলোয় হঠাৎ হেসে উঠে',

ঐরাবতের বৈরী হয়ে কৃষ্ণমৃগের সঙ্গে ছুটে',

স্তম্ভ বিজ্ঞান যোজন জুড়ে ঝঙ্কারেদের শব্দ ক'রে,

অসাড় প্রাচীন জড় পাহাড়ের কানে মোহন মন্ত্র প'ড়ে,—

পরান ভরে নৃত্য করে মত্ত ছিলাম স্বাধীন স্বখে,

ছন্দছাড়া আজকে আমি যাচ্ছি মরে মনের দুখে ;

যাচ্ছি মরে মনের দুখে পূর্ব স্বখে স্মরণ করে ;

বারির মুখে বারার মতন শীর্ণ ধারায় পড়ছি বয়ে ।

—সত্যেন্দ্রনাথ, 'কুহ ও কেকা', পাগলা ঝোরা

এখানে ছন্দ যেন পাগলা ঝোরার মতোই উন্মত্ত হয়ে নৃত্য করতে করতে  
ছুটে চলছে । কিন্তু এই চতুঃস্বরের ছন্দেই কেমন ধীর গতির গভীর কবিতাও  
রচনা করা যায় তা নিম্নের ছত্র-ক'টি পড়লেই বোঝা যাবে ।—



ভাবসাধনার | এই ভুবনে | এস তোমার | নূতন বাণী | লয়ে,  
বিরাজ কর ভারত-হিয়ার ভক্তমালা নূতন মণি হয়ে ;  
ব্যথাভরা চিত্ত মোদের— খানিক ব্যথা ভুলব তোমায় হেরি ;  
সত্যসাধন-নিষ্ঠা শিখাও, রাজাও গভীর উদ্‌বোধনের ভেরী ।

—সত্যেন্দ্রনাথ, 'বিদায়-আরতি', বড়দিনে

কিন্তু দুই স্বরের ও তিন স্বরের ছন্দ অত্যন্ত খরগতি । সে ছন্দকে গান্ধীর্ষ ও মন্থরতা দান করা একরকম অসম্ভব বললেই হয় ।

এ দিক্‌ থেকে দেখতে গেলে অক্ষরবৃত্তই গান্ধীর্ষ ভাবের সবচেয়ে উপযুক্ত বাহন । এ কথা পূর্বেই বিশদরূপে বোঝাবার চেষ্টা করেছি । এ স্থলে অক্ষরবৃত্তের আরও ছোট্টা দৃষ্টান্ত দিচ্ছি । পাঠক পূর্বের মাত্রাবৃত্ত ও স্বরবৃত্তের দৃষ্টান্তগুলোর সঙ্গে মিলিয়ে পড়লেই বুঝতে পারবেন, এ ছন্দের লয় কত ধীর গতিতে চলে । যথা—

১ । হে আদি-জননী সিন্ধু, | বহুঙ্করা সন্তান তোমার,  
একমাত্র কণ্ঠ্য তব কোলে । তাই তন্ত্রা নাহি আর  
চক্রে তব, তাই বক্ষ জুড়ি সদা শঙ্কা, সদা আশা,  
সদা আন্দোলন ; তাই উঠে বেদমন্ত্রসম ভাবা  
নিরন্তর প্রশান্ত অশ্বরে, মহেন্দ্রমন্দির-পানে  
অন্তরের অনন্ত প্রার্থনা, নিয়ত মঙ্গলগানে  
ধ্বনিত করিয়া দিশি দিশি ; তাই ঘুমন্ত পৃথ্বীরে  
অসংখ্য চুম্বন কর আলিঙ্গনে সর্ব অঙ্গ ঘিরে  
তরঙ্গবন্ধনে বাঁধি, নীলাশ্বর-অঞ্চলে তোমার  
সযত্নে বেষ্টিয়া ধরি সন্তুর্পণে দেহখানি তার  
স্বকোমল স্বকোশলে ।

—রবীন্দ্রনাথ, 'সোনার তরী', সমুদ্রের প্রতি

২ । বৃন্তহীন পুষ্পসম | আপনাতে আপনি বিকশি'  
কবে তুমি ফুটিলে উর্বশী !

আদিম বসন্তপ্রাতে উঠেছিলে মস্থিত সাগরে,  
ডান হাতে স্তম্বপাঙ্গ, বিষভাণ্ড লয়ে বাম করে ;

ভরসিত মহাসিন্ধু মন্ত্রশাস্ত্র তৃজ্ঞের মতো  
পড়েছিল পদপ্রান্তে, উচ্ছ্বসিত ফণা লক্ষ্যত

করি অবনত ।

কুন্দভ্রম নয়কান্তি হরেন্দ্রবন্দিতা,

তুমি অনিন্দিতা ।

—রবীন্দ্রনাথ, 'চিত্রা', উর্বশী

উদ্ভূত দৃষ্টান্ত-দুটোতে সমুদ্রের গভীর এবং গভীর গর্জনধ্বনি যেমনভাবে প্রতিধ্বনিত করা হয়েছে, অক্ষরবৃত্ত ছাড়া অগ্র ছন্দে তা সম্ভব হত না ।

যা হক, এখন আবার আমাদের আসল কথার অবতারণা করা যাক । পূর্বোদ্ভূত সবগুলো দৃষ্টান্ত একে একে পড়ে গেলে আপনা থেকেই এ সত্যটা মনে জেগে উঠবে যে, সব কবিতা সমান গতিতে বা সমান লয়ে পড়া যায় না বা পড়লে ভাল শোনায় না । এক-এক ছন্দের কবিতা এক-একটা বিশেষ লয়ে পড়লেই যেন তাদের ভিতরকার সমস্ত ভাবসৌন্দর্য ভাষার ও ছন্দের ভিতর দিয়ে বিকশিত হয়ে ওঠে । কবিতাভেদেও লয়ের পার্থক্য হয় । কোনো কোনো কবিতায় যতি ও তাল যেন অত্যন্ত ব্যস্ত ও দ্রুত, তার লয়ও যেন গতির আবেগে উন্নত হয়ে ছুটতে থাকে । আবার অগ্র কবিতায় যতি ও তাল যেন এক-একটা বিশাল তরঙ্গের মতো অনেক ক্ষণ পরে উথিত হয়ে মনকে স্তম্ভিত করে দিতে থাকে, তার লয়ও যেন আপন গুরুগভীর ও মধুর গতিতে মনকে কোন্ অকূল সমুদ্রের অতল গভীরতার মধ্যে তলিয়ে দিতে থাকে ।

লয়ের এই গতিবেগের পার্থক্যে মাত্রার স্থিতিকালেরও পার্থক্য হয়, এ কথা আগেই বোঝানো হয়েছে । মাত্রাবৃত্তের প্রথম দৃষ্টান্তটির সঙ্গে অক্ষরবৃত্তের প্রথম দৃষ্টান্তটির তুলনা করলেই টের পাওয়া যাবে যে, একটার এক-একটি বর্ণ বহু ক্ষণ স্থায়ী হয় আর-একটার এক-একটি বর্ণ তার চেয়ে বেশি স্থায়ী হয় । আর, এ কথাও টের পাওয়া যাবে যে,—এ পার্থক্য এত সূক্ষ্ম ও এত পরিবর্তনশীল যে তাকে হিসাবের মধ্যে কিছুতেই আনা যায় না । এজগতেই কাব্যছন্দে মাত্রার স্থায়িত্বভেদের কোটনা গণনা করা হয় না এবং স্থবিধার জন্তে সব কবিতারই মাত্রাকে সমকালস্থায়ী বলে গণ্য করা হয় । কিন্তু গানভেদে মাত্রার স্থায়িত্বভেদ খুবই প্রচুর এবং মাত্রার এ পরিবর্তনশীলতা নিয়ম মেনে চলে । সেজগতে সংগীতশাস্ত্রে তার সূক্ষ্ম বিশ্লেষণ ও হিসাব রাখা প্রয়োজন হয় ।

আশা করি এতক্ষণে আমরা কবিতায় ও গানে লয় ও মাত্রার সার্থকতা ও প্রয়োজনীয়তার পার্থক্য পাঠকের নিকট অনেকটা স্পষ্ট করে তুলতে পেরেছি। এক্ষণে কাব্যে ও গানে যতি ও তাল সম্বন্ধে কয়েকটি কথা বলেই এ প্রসঙ্গ শেষ করব। কিন্তু সে আলোচনা করার পূর্বে কবিতার মাত্রা সম্বন্ধে আরও কয়েকটি কথা বলা আবশ্যক।

পূর্বে মাত্রা সম্বন্ধে যা বলেছি তা মাত্রাবৃত্ত ছন্দ সম্বন্ধেই বিশেষভাবে খাটে। স্বতরাং মাত্রাবৃত্তের মাত্রা বিষয়ে আর বিশেষ কিছু বলার দরকার নেই। কিন্তু অক্ষরবৃত্ত ও স্বরবৃত্ত ছন্দে মাত্রানির্ণয় ও মাত্রার প্রয়োজনীয়তা সম্বন্ধে একটু আলোচনা করা সংগত। কেবল কাব্যছন্দের দিকেই যদি আমরা দৃষ্টি নিবদ্ধ রাখি, তা হলে অক্ষরবৃত্ত ও স্বরবৃত্তের মাত্রানির্ণয়ের প্রয়াস সম্পূর্ণ অনাবশ্যক। কেননা, ওই দুটি ছন্দ মাত্রাপরিমাণের উপরে নির্ভর করে রচিত হয় না; মাত্রাই ও দুটি ছন্দের নিয়ামক নয়। মাত্রাবৃত্তে কিংবা মাত্রাপরিমাণের উপরেই ছন্দের স্বরূপ ও সার্থকতা নির্ভর করে এবং এজগতেই ছন্দকে 'মাত্রাবৃত্ত' বলে অভিহিত করা হয়েছে। এক্ষণে কথ্য ছন্দের নামকরণের সময়ে আলোচিত হয়েছে।

কেবল কাব্যছন্দের দিকে দৃষ্টি না রেখে যদি গানের ছন্দটাও আমাদের চোখের সামনে রাখি, তা হলে অক্ষরবৃত্ত ও স্বরবৃত্ত ছন্দেও মাত্রানির্ণয় করা আবশ্যক হয়ে ওঠে। কেননা, ওই ছন্দে রচিত গান যখন সুরে লয়ে গাওয়া হয় তখন এদেরও মাত্রার হিসাব রাখা প্রয়োজন। গান যে শুধু মাত্রাবৃত্তেই রচিত হয় তা নয়, বরং অধিকাংশ গানই সচরাচর স্বরবৃত্তে বা অক্ষরবৃত্তে রচিত হয়ে থাকে। কিন্তু গাইতে হলেই যখন মাত্রা ও লয়ের হিসাব রাখতে হয় তখন গানের তরফ থেকে এ দুটি ছন্দেও কি করে মাত্রানির্ণয় করা সংগত তাই দেখাতে চেষ্টা করব। কিন্তু এ কথা এ স্থলে বলে রাখা উচিত যে, এ দুটি ছন্দের যেসব কবিতা সুরে লয়ে গাওয়া যায় কেবল যেসব কবিতারই শুধু গানের পরিমাপে মাত্রা নির্ণয় করা যায় তা নয়; যেসব কবিতা গাওয়া হয় না সেগুলোরও মাত্রার হিসাব গানের পরিমাপে করা যায়। দৃষ্টান্ত দিলেই এ কথা পরিষ্কার হবে।—

|     |

বন্দরে বন্ধনকাল এবারের মত হল শেষ।

এটা অক্ষরবৃত্ত ছন্দের নমুনা। এ পংক্তিটিতে আঠারোটি অক্ষর আছে। কিন্তু মাত্রাবৃত্ত ছন্দের রীতি অনুসারে এখানে বিশটি মাত্রা পাওয়া যাবে। কেননা, চিহ্নিত স্বর-দুটোকে মাত্রাবৃত্তে দ্বিমাত্রক বলে ধরতে হবে। কিন্তু গানের রীতি অনুসারে এখানে মাত্রাও বিশটি বলেই গণ্য করতে হবে। মাত্রাবৃত্ত ছন্দে এক মাত্রা এমন একটি আদর্শ কালপরিমাণ যা সকল কবিতাতেই সমভাবে খাটে। মোটামুটিভাবে একটি লঘু স্বরের উচ্চারণকালই এ ছন্দের সেই আদর্শকাল এবং এ আদর্শ সর্বত্র সম্পূর্ণ অপরিবর্তনীয় বলে ধরে নেওয়া হয়। কিন্তু সংগীতে এ আদর্শকালটি গানভেদে পরিবর্তিত হয় এবং কোথাও দীর্ঘক্ষণস্থায়ী, কোথাও অল্পক্ষণস্থায়ী হয়। সুতরাং মোট কালপরিমাণ বেড়ে গেলেও মাত্রাসংখ্যা স্থিরই থেকে যায়। কবিতাতেও এ হিসাব অনেকটা চালানো যায়। আর-একটা দৃষ্টান্ত দিই।—

কৃন্দন্ত্র নয়কান্তি হরেপ্রবন্দিতা।

—রবীন্দ্রনাথ, 'চিত্রা', উর্ধ্বশী

এখানে অক্ষরসংখ্যা চোদ্দো। কিন্তু মাত্রাসংখ্যা কত, সেইটেই হচ্ছে প্রশ্ন। প্রথমেই দেখা যায় এখানে গুরুস্বর ছয়টি এবং লঘুস্বর আটটি। সুতরাং চোদ্দোটি লঘুস্বরের উচ্চারণে যে সময় লাগে উক্ত পংক্তিটি যথাযথরূপে উচ্চারণ করতে তার চেয়ে বেশি সময় লাগবে, তা সহজেই বোঝা যায়। একটি লঘুস্বরের উচ্চারণে সাধারণতঃ যে সময় লাগে সেই অপরিবর্তনীয় আদর্শকালটিকে একক ধরে হিসাব করলে উক্ত পংক্তিতে মাত্রাসংখ্যা চোদ্দো তো নয়ই, বরং বিশ। কেননা, এখানে ছয়টি গুরু বা দ্বিমাত্রক এবং আটটি লঘু বা একমাত্রক স্বর আছে। এটি হল কাব্যছন্দের হিসাব। কিন্তু গানের হিসাবের দিকে লক্ষ রাখলে বলতে হবে এখানে মাত্রাসংখ্যা বিশটিই। কিন্তু ছন্দ এখানে ধীর লয়ে চলছে বলে এখানে মাত্রাপরিমাণও সাধারণ একক মাত্রার চাইতে কিছু বেশি। আরও একটু বিশদ করছি। একটা মাত্রাবৃত্ত ছন্দের দৃষ্টান্ত দিচ্ছি।—

হাজার হাজার, বছর কেটেছে, | কেহ ত কেহ নি | কথা ;

ভ্রমর কিরেছে | মাধবীকুঞ্জে, | তরুরে ঘিরেছে | লতা।

—রবীন্দ্রনাথ, 'কল্পনা', প্রকাশ

এ দৃষ্টান্তটির সঙ্গে ঠিক এক লয়ে অর্থাৎ মাত্রাবৃত্তের ধরনে নিম্নের পংক্তিটি পড়ুন।—

কুন্দভ্রম | নগকান্তি | সুরেন্দ্রবন | -দিতা ।

পড়লেই বুঝতে পারবেন, এর প্রথম তিন পাদে ছয়টি করে মাত্রা আছে এবং শেষ পাদে দুই মাত্রা। সুবিস্তৃত বিশটি মাত্রা। পড়ার ধরন থেকেই বোঝা যাবে, উপরের তিনটি পংক্তিতেই বিশ মাত্রা করে আছে। স্তত্রাং তৃতীয় ছত্রটিতে কেমন করে বিশ মাত্রার হিসাব পাওয়া যায় তা সহজেই দেখা গেল। কিন্তু মনে রাখতে হবে এখানে মাত্রার একক পরিমাণ অপরিবর্তনীয় আদর্শস্থানীয়, অর্থাৎ এক লঘুস্বরের উচ্চারণের সমস্থায়ী।

এখন আবার গেই ছত্রটিই অক্ষরবৃত্তের তালে আবৃত্তি করুন।—

কুন্দভ্রম নগকান্তি | সুরেন্দ্রবন্দিতা ।

পড়লেই বোঝা যাবে এ ছন্দ কেমন ধীরগম্ভীর লয়ে চলেছে। অর্থাৎ এর লয় মন্দর। এখন সমগ্র পংক্তিটা পড়তে মোট যে পরিমাণ সময় লেগেছে তাকে চোদ্দোটি অক্ষরের মধ্যে সমভাগে পরিবেষণ করে দিন। তা হলে প্রত্যেক অক্ষরের ভাগে যে সময়টুকু পড়েছে তাকেও এক হিসাবে অর্থাৎ গীতছন্দের হিসাবে একমাত্রা বলা যায়। এ হিসাবে এখানে চোদ্দোটি মাত্রা আছে, কিন্তু এর প্রত্যেকটি মাত্রা অপরিবর্তনীয় আদর্শকাল অর্থাৎ একটি লঘুস্বরের স্বাভাবিক উচ্চারণসময়ের চাইতে একটু বেশি হবে। অতএব দেখা গেল এক হিসাবে উক্ত ছত্রটিতে বিশ মাত্রা এবং আর-এক হিসাবে চোদ্দো মাত্রা আছে। বলা বাহুল্য, স্থানীয় প্রকারের মাত্রা প্রথম প্রকারের মাত্রার চাইতে ওজনে কিছু বেশি হবে। যদি লেখা হত—

কুসুম-ধবল-রূপ | সুরেশ-পূজিতা ।

তা হলে এখানে অক্ষরসংখ্যা তো চোদ্দো হতই, মাত্রাসংখ্যাও চোদ্দোই হত এবং গীতছন্দ ও কাব্যছন্দের হিসাবে এ স্থলে মাত্রাপরিমাণের কোনো পার্থক্য থাকত না। আশা করি এতক্ষণে কাব্যরীতি ও সংগীতরীতিতে মাত্রার আদর্শ ও পরিমাণ স্পষ্ট হয়েছে।

এবার একটা স্বরবৃত্তের দৃষ্টান্ত দিই।—

আমরা সুরের | ক্ষীত বৃকের | ছায়ায় তলে | নাহি চরি ।

আমরা দুখের | বক্র মুখের | চক্র দেখে | ভয় না করি ॥

—রবীন্দ্রনাথ, 'কল্পনা', হতভাগ্যের গান

কাব্যছন্দের রীতিতে হিসাব করলে এখানে প্রথম পংক্তিতে বিশ ও দ্বিতীয় পংক্তিতে বাইশ মাত্রা পাওয়া যাবে। অথচ গানের রীতিতে হিসাব করলে উভয় পংক্তিতেই যোলোটি করে মাত্রা গুনতে হবে। প্রত্যেকটি হলন্ত বর্ণ পূর্ববর্তী স্বরবর্ণের উপরে নির্ভর করে তাকে ওজনে একটু ভারী করে তুলছে এবং তাতে প্রতি মাত্রার পরিমাণ একটু বেড়ে যাচ্ছে মাত্র। সুতরাং গানের হিসাবে এখানে মাত্রা-ও স্বর-সংখ্যা সমানই ধরতে হবে। এ বিষয়ে যথাস্থানে অনেক কথা বলা হয়েছে, আর বাক্যব্যয় করার দরকার নেই।

কিন্তু একটা বিষয়ে সতর্ক হওয়া আবশ্যিক। আমরা গানের রীতিতে কোনো ছত্রের যে মাত্রার হিসাব করেছি সেটাকে যেন কেউ প্রকৃত গানের মাত্রা বলে মনে না করেন। তা মনে করলে ভুল হবে। কেননা, গানে স্বররচয়িতার ইচ্ছা অনুসারে এক একটি বর্ণ তিন চার প্রভৃতি বহুমাত্রাব্যাপী হয়ে স্বর অনেক প্রসারিত হয়ে যেতে পারে। কিন্তু কবিতার প্রত্যেক বর্ণের মাত্রা নির্দিষ্ট থাকে এবং কোনো বর্ণেই দুই মাত্রার বেশি থাকতে পারে না। সুতরাং কবিতার মাত্রা গানের মাত্রার চাইতে স্বভাবতই অনেক কম হয়ে থাকে। সুতরাং এ বিস্তৃত আলোচনার সারমর্ম হচ্ছে এই যে, কাব্য ছন্দের রীতিতে হিসাব করলে মাত্রার একক বা আদর্শকালপরিমাণ অপরিবর্তনীয় অর্থাৎ সর্বত্র সমান এবং বর্ণের গুরুত্বের উপরেই তার সংখ্যা সম্পূর্ণ নির্ভর করে। কিন্তু গানের ছন্দের রীতিতে হিসাব করলে মাত্রার একক-পরিমাণ কবিতাভেদে বাড়ে বা কমে; অক্ষরবৃত্তে অক্ষরসংখ্যার এবং স্বরবৃত্তে স্বরসংখ্যার পরিমাণ সমানই থাকে।\*

### যতি ও তাল

এক্ষেণে আমরা যতি ও তাল সম্বন্ধে কয়েকটি কথা বলব। কবিতায় বা গানে স্বরেরক্ষণিক নিম্নরূপতাকেই যতি বা বিরাম বলে। অর্থাৎ জিহ্বা যেখানে স্বভাবতই একটু বিশ্রাম করে তাকে ‘যতি’ বলে।

যতির্জিহ্বেষ্টবিশ্রামস্থানম্।

—গঙ্গাদাস, ‘ছন্দোমঞ্জরী’ ১১৮

প্রথমেই একটা কথা মনে রাখা দরকার যে, ধ্বনির বা স্বরের বিরাম হলেও কালের বিরাম হয় না, কাল চলতেই থাকে। স্তবরাং বর্ণকে আশ্রয় করে যে ধ্বনি প্রবাহিত হতে থাকে শুধু তারই যে মাত্রা বা কালপরিমাণ আছে তা নয়, যতিরও মাত্রা বা কালপরিমাণ আছে। কিন্তু কাব্যছন্দের এই যতি বা বিরামকালের হিসাব রাখা নিশ্চয়োজ্ঞন। কাজেই কাব্যে যতির মাত্রাপরিমাণ গণ্য করা হয় না। কিন্তু যারা নূতন নূতন ছন্দ রচনা করেন তাঁদের পক্ষে ধ্বনিতত্ত্বের এসব সূক্ষ্ম বিশ্লেষণ প্রয়োজন। তাতে নব নব ছন্দ উদ্ভাবনার সহায়তা হয়। সাধারণভাবে ছন্দের আলোচনার ক্ষেত্রে এসব সূক্ষ্ম হিসাব রাখতে হয় না; নূতন নূতন সৃষ্টি করতে গেলেই এসব সূক্ষ্ম তত্ত্বের সংবাদ রাখা প্রয়োজন হয়। একটা দৃষ্টান্ত দিই।—

নামে সন্ধ্যা তন্দ্রালসা,

সোনার আঁচল-খসা,

হাতে দীপশিখ;

দিনের কল্লোল'পর

টানি দিল ঝিল্লিস্বর

ঘন যবনিকা।

—রবীন্দ্রনাথ, 'কল্পনা', অশেষ

উদ্ভূত শ্লোকটি পড়লেই বোঝা যায় যে, একটি পাদে আকৃতি শেষ করে আর-একটি পাদ শুরু করা পর্যন্ত খানিকক্ষণ থেমে থাকতে হয়। এই সময়টুকুই ধ্বনিবিরতি বা যতির মাত্রাপরিমাণ। কিন্তু কবিতায় এই সময়টুকুর হিসাব রাখার বিশেষ প্রয়োজন নেই, যদিও গানে তার সার্থকতা আছে। অবশ্য কবিতাতেও এই যতিটুকু ধ্বনির চাইতে এতটুকু কম প্রয়োজনীয় নয়। এই যতি ও গতিকে নিয়েই সমগ্র কবিতার সার্থকতা। কারও প্রয়োজনীয়তা কম নয়। তবে কবিতায় যতিকালটুকুর হিসাব না রাখলেও চলে, ধ্বনির গতির হিসাব রাখলেই বিরতি আপনি নিয়ন্ত্রিত হয়ে যায়। কিন্তু গানের স্বরের গতির হ্রাস তার বিরামের দিকেও যথেষ্ট সতর্ক থাকতে হয়।

দ্বিতীয়তঃ, উপরের কবিতাটি থেকেই বোঝা যাবে যে, কবিতাতেও যতি সর্বত্র সমান নয়; তার স্থিতিকাল কোথাও কিছু বেশি, কোথাও কিছু কম। উপরের কবিতাটিতেই প্রত্যেক পংক্তিতে প্রথম ছুটো যতিতে যতক্ষণ থামতে হয়, তৃতীয় যতিতে তার চেয়ে বেশি থামতে হয়। এরূপ সর্বত্রই দেখা যাবে। আর-একটা দৃষ্টান্ত দিই।—

সংসারে সবাই যবে | সারাক্ষণ শত কর্মে রত,  
 তুই শুধু ছিন্নবাধা | পলাতক বাগকের মতো  
 মধ্যাহ্নে মাঠের মাঝে | একাকী বিবল তরুচ্ছায়ে  
 দূরবনগন্ধবহ | মন্দগতি ক্লান্ত তপ্তবাসে  
 সারাদিন বাজাইলি বাঁশি । ওরে তুই ওঠ আজি ।  
 জাগুন লেগেছে কোথা ? | কার শব্দ উঠিয়াছে বাজি  
 জাগাতে জগৎজনে ? | কোথা হতে ধনিছে ক্রন্দনে  
 শূন্যতল ? | কোন্ অন্ধকারমাঝে | অর্জর বন্ধনে  
 অনাথিনী মাগিছে সহায় ? | ক্ষীতকায় অপমান  
 অক্ষমের বন্ধ হতে | রক্ত শুবি করিতেছে পান  
 লক্ষ মুখ দিয়া ।

—রবীন্দ্রনাথ, 'চিত্রা', এবার কিরাও মোরে

এ পংক্তিগুলি অক্ষরবৃত্ত ছন্দে রচিত। এখানে কোথাও চার, কোথাও ছয়, কোথাও আট এবং কোথাও দশ অক্ষরের পরে যতি পড়েছে। এরকম যুক্তসংখ্যক বর্ণের পরে যতি পড়াই এ ছন্দের প্রকৃতি। আরও দেখা যায় প্রত্যেক পংক্তির অন্তেই যতি বা বিরাম আছে। শুধু অক্ষরবৃত্ত কেন, প্রত্যেক ছন্দেই পংক্তিশেষে যতিপড়া অনিবার্য, নতুবা ছন্দরচনাই হয় না। পংক্তিশেষের যতি কোনো চিহ্নে চিহ্নিত হয় নি, শুধু পংক্তিমধ্যস্থ যতি এক-একটি দণ্ডচিহ্ন দ্বারা নির্দিষ্ট হয়েছে।

এ যতিগুলিকে দু' ভাগে বিভক্ত করা যায়— কতকগুলো ভাবগত যতি আর কতকগুলো ছন্দোগত যতি। যেখানে কবিতার অর্থের মধ্যেই একটি ছন্দ রয়েছে, স্বভাবতঃই সেখানে একটি যতি পড়েছে; আবার যেখানে অর্থের বা কবিতার ভাবের বিরতি নেই, এমন অনেক স্থলেও যতি পড়েছে ছন্দের দাবিতে। প্রথম প্রকারের যতিকে 'ভাবগত যতি' এবং দ্বিতীয় প্রকারের যতিকে 'ছন্দোগত যতি' বলেছি।

আর-এক দিক থেকেও যতিকে দু' ভাগে বিভক্ত করা যায়। যেখানে ভাবগত যতির সম্ভাবনা আছে সেখানে ছন্দোগত যতিও অবশ্যই থাকে। সেজন্যে যেখানে ভাবগত যতি থাকে সেখানে ধ্বনির পূর্ণ বিরতি হয়। এরকম যতিকে বলব 'পূর্ণযতি'। আর যেখানে শুধু ছন্দোগত ধ্বনিবিরতিমাত্রই আছে,



ভাবের বিরতি নেই, সেখানে বিরামকাল বেশি স্থায়ী নয়। এপ্রকার যতিকে বলব 'অর্ধ-যতি'। তা ছাড়াও আর-এক প্রকার যতি আছে, তাকে 'ঈষদযতি' নামে অভিহিত করা যায়। এ যতির কথা পরে যথাস্থলে বলব।

গানেই হক বা কবিতাতেই হক, এই যতিস্থাপনের বৈচিত্র্যই তালের সৃষ্টি করে। পূর্বেই বলেছি ধ্রুনির গতি এবং বিরতিই ছন্দকে সার্থক করে। গতি এবং যতি যত নব নব উপায়ে পরস্পরকে অভিব্যক্ত করে তোলে ততই নূতন নূতন ছন্দ উদ্ভাবিত হয়। গতি ও যতির বিভিন্ন সন্নিবেশের ফলেই ধ্রুনির তরঙ্গলীলার উদ্ভব হয়। গানে বা কবিতায় ধ্রুনির এই তরঙ্গলীলাকেই 'তাল' বলা যায়। কাব্যে এবং সংগীতে, উভয়ত্রই এই তালের নানারকম হিসাব রাখতে হয় এবং এই হিসাবের উপরেই উভয় ছন্দশাস্ত্র বিশেষভাবে নির্ভর করে। তাল জিনিসটা কিন্তু আসলে স্বর বা ধ্রুনি মোটেই নয়। স্বর বা ধ্রুনির গতিভঙ্গিকেই 'তাল' বলা হয়। কত বিচিত্র উপায়ে ধ্রুনির উত্থানপতন বা গতিবিরতি সাধিত হয় তা নির্ণয় ক'রে তাকে হিসাবের মধ্যে ধরে রাখাই তালের কাজ। ধ্রুনির এক বার উত্থান বা গতি থেকে পরবর্তী পতন বা বিরতি পর্যন্ত যে মাত্রাপরিমাণ বা কাল, তাকেই গানে এক-একটি 'তাল-বিভাগ' বলা যায়। গানে যা তালবিভাগ, কবিতায় তাকেই 'পদ' বা 'পাদ' বলেছি।

যদিও একই প্রকার হিসাব থেকে গানের তালবিভাগ ও কবিতার পাদের উৎপত্তি, তথাপি এ দুটো জিনিস কখনই এক নয়। এ দু'এর মধ্যে অনেক পার্থক্য আছে। এই পার্থক্যের হেতু হচ্ছে গানে ও কবিতায় মাত্রা-আদর্শের অনৈক্য। এ অনৈক্যের কথা পূর্বেই বলা হয়েছে। একটা দৃষ্টান্ত দিয়ে কথাটা বিশদ করছি।—

আমার নিশীথ রাতের | বাদলধারা, |

এস হে গোপনে।

—রবীন্দ্রনাথ, 'গীতবিতান', প্রেম ৩৮

এটা স্বরবৃত্ত ছন্দ। এক যতি থেকে আর-এক যতি পর্যন্ত যে অংশ, তাকে পাদ বলা হয় এবং এখানে প্রতি পাদে চারটি স্বর আছে। সবস্থলে এখানে চোদ্দোটি স্বর আছে। সুতরাং এক হিসাবে চোদ্দো মাত্রা আছে বলতে পারি। প্রতি পাদে চার মাত্রা। কিন্তু গানের স্বরের ধারায় যখন এ কথাগুলো ব্য

চলবে তখন তার প্রকৃতি সম্পূর্ণ বদলে যাবে; অনেক জায়গায় মাত্রা বেড়ে যাবে, হুতরাং পাদগুলোও নূতন আকার ধারণ করবে। যথা—

আমার | নি • শী থ | রা • তে র | বা • দ ল | ধা • রা • |

• • এ স | হে • • • • | • • গো প | নে • • • • | • •

এখানে বিন্দুচিহ্নগুলো অতিরিক্ত মাত্রা-জ্ঞাপক। দেখা যাচ্ছে কবিতার একমাত্রক বর্ণ গানে দ্বিমাত্রক, চতুর্মাত্রক, এমন কি ষ্ণমাত্রকও হয়েছে। আর, পাদসংখ্যাও অনেক বেড়ে গেছে। কবিতায় ছিল চোদ্দো মাত্রা, গানে হয়েছে চৌত্রিশ মাত্রা। কবিতায় ছিল চাব পাদ, গানে আট পাদেরও বেশি। কবিতায় ও গানে, উভয়ত্রই প্রতি পাদে চার মাত্রা আছে। কিন্তু উপরের বিভাগগুলোর দিকে একটু দৃষ্টি দিলেই টের পাওয়া যাবে এর প্রতি পাদের বর্ণ-বিভাগে কি বিপর্যয় উপস্থিত হয়েছে। কোথাও কোথাও এর চাইতে আরও অনেক বেশি বিপর্যয় উপস্থিত হয়ে থাকে। সব জায়গাতেই এমনটি হয়ে থাকে তা নয়। কোনো কোনো জায়গায় কবিতার ও গানের পাদসংখ্যা ও মাত্রাসংখ্যা ঠিক সমানই থেকে যায়। যথা—

কাঁপিছে দেহলতা থরথর,  
চোখের জলে আঁখি ভরভর।  
দোহুল তমালেরি বনছায়া  
তোমারি নীল বাসে নিল কায়্যা,  
বাদল-নিশীথেরি ঝরঝর  
তোমারি আঁখি'পরে ভরভর ॥

—রবীন্দ্রনাথ, 'গীতিবিতান', প্রকৃতি ৩৫

এখানে প্রতি ছত্রে তিনটি করে পাদ আছে। প্রথম পাদে তিন মাত্রা এবং বাকি দুই পাদে চার মাত্রা করে আছে। গানেও তাই। এ স্থলে গানে ও কবিতায় তফাত নেই।

যা হক, আমাদের কথা হচ্ছিল এই।— ধ্বনির এক যতি থেকে আর-এক যতি পর্যন্ত যে অংশ, তাকে কবিতায় বলা হয় পাদ এবং তার গঠনের উপরেই কবিতার গঠন নির্ভর করে; তেমনি স্বরের এক ভঙ্গি থেকে আর-এক ভঙ্গি পর্যন্ত যে অংশ তাকে বলা হয় তালবিভাগ এবং এই তালবিভাগের উপরেই গানের গঠনপ্রণালী নির্ভর করে।

একটি পাদ বা তালবিভাগের মধ্যে কয়টি মাত্রা থাকে তার হিসাব থেকেই গানের বা কবিতার তালের বহু প্রকারভেদ হয়ে থাকে। প্রথমে গানের কথাই ধরা যাক। গানে প্রধানতঃ তালের তিনপ্রকার রূপ দেখা যায়। কোনো গানে চার মাত্রার পরেই তাল দিতে হয় ; এরকম তালকে চতুর্মাত্রক বা 'সমপদী' তাল বলা যায়। আবার কোনো গানে তিন মাত্রার পরেই তাল দিতে হয় ; এ তালকে ত্রিমাত্রক তাল বা 'অসমপদী' তাল নামে অভিহিত করা যায়। আবার কোনো কোনো গানে তালবিভাগের মাত্রাসংখ্যার সমতা নেই ; একবার তিন মাত্রার পরে আর-এক বার দু মাত্রার পরে তাল দিতে হয় অথবা একবার তিন মাত্রার আবার চার মাত্রার পরে তাল দিতে হয়। এরকম তালকে 'বিষমপদী' তাল বলা যায়। পূর্বোদ্যত সংগীতের দৃষ্টান্ত-ছুটোর মধ্যে প্রথমটি চতুর্মাত্রক বা সমপদী এবং দ্বিতীয়টি বিষমমাত্রক বা বিষমপদী তালের দৃষ্টান্ত। আরও দৃষ্টান্ত দিচ্ছি।—

১। জ্ঞা • গ র | নে • যা ংয় | বি • ভা ব | রী • • • |

—রবীন্দ্রনাথ, 'গীতবিতান', প্রেম ২০১

এটা চতুর্মাত্রক তাল।

২। দে • শ | দে • শ | ন • ন্দি | ত ক রি | ম • ন্দি | ত ত ব |

ভে • • | রী • • |

—রবীন্দ্রনাথ, 'গীতবিতান', স্বদেশ ১৩

এটা অসমপদী বা ত্রিমাত্রক তাল।

৩। মা • ত | ম • ন্দি | পু • ংগ্য | অ • ঙ্গ | গ ন ।

ক র ম | হো • ঙ্গ | জ ল | আ • জ | হে • ।

—রবীন্দ্রনাথ, 'গীতবিতান', স্বদেশ ১৭

এখানে ষষ্ঠাক্রমে তিন-দুই-দুই-এর পরে তাল হবে। সুতরাং তাল বিষমপদী। গানের এ তিনপ্রকার তালের আবার বহুপ্রকার উপবিভাগ ও বহু নাম আছে। আমাদের পক্ষে ওসমস্ত কথা আলোচনার বিশেষ প্রয়োজন নেই।

কবিতার তালের সঙ্গে উক্ত তিনপ্রকার তালের কি সাদৃশ্য আছে, এখন তাই আলোচনা করব। কাব্যছন্দের শ্রেণীবিভাগ ও নামকরণের উপরে তালের এই প্রকারভেদের খুব বেশি প্রভাব আছে। তালের দিকেই সম্পূর্ণ লক্ষ রাখলে ছন্দের সম্পূর্ণ নূতন আর-এক রকম শ্রেণীবিভাগ ও নামকরণ করতে হয়। এই নূতন শ্রেণীবিভাগ ও নামকরণ কেমন হবে, এখন তাই দেখাতে চেষ্টা করব।

প্রথমেই মনে রাখা দরকার যে, গানের রীতির প্রতি লক্ষ রেখে মাত্রার যে আদর্শ পূর্বে নির্ণয় করেছি তাকেই কাব্যেও মাত্রার একমাত্র আদর্শ বলে ধরলে ছন্দের অক্ষরবৃত্ত, মাত্রাবৃত্ত ও স্বরবৃত্ত এই তিনটি প্রধান ধারাই থাকে না। আর 'সংগীত-আদর্শের' এই মাত্রার উপরে নির্ভর করেই যদি কবিতার পাদ্যের প্রকারভেদ নির্ণয় করা যায় তবে সম্পূর্ণ নতন ধরনে ছন্দের তিনটি প্রধান শ্রেণী পাওয়া যাবে— সমপদী, অসমপদী এবং বিষমপদী।

দৃষ্টান্ত দিলেই বিষয়টা বোঝা সহজ হবে।—

১। হা রে নিরানন্দ দেশ, | পরি জীর্ণ জরা,  
বহি বিজ্ঞতার বোঝা, ভাবিতেছ মনে—  
ঈশ্বরের প্রবঞ্চনা পড়িয়াছে ধরা  
স্বচতুর স্মৃদ্ধৃষ্টি তোমার নয়নে।

—রবীন্দ্রনাথ, 'সোনার তরী', দ্বাদশাব্দ

আমাদের শ্রেণীবিভাগ অনুসারে একে অক্ষরবৃত্ত 'দ্বিপদী' ছন্দ বলব। কারণ সাধারণ শ্রুতিতে এখানে প্রতি পংক্তিতেই আট অক্ষরের পরে একটি ও ছয় অক্ষরের পরে একটি বসি পড়েছে।

কিন্তু পূর্বোক্ত তালের হিসাবে এটার অন্য নাম হবে। প্রথমতঃ, সংগীত-আদর্শের দিকে লক্ষ রাখলে এখানে প্রতি ছত্রে চোদ্দো অক্ষর না বলে চোদ্দো মাত্রা বলতে হবে। দ্বিতীয়তঃ, খুব প্রথর তালশ্রুতির উপরে নির্ভর করলে এখানে প্রত্যেক চার মাত্রার পরেই একটি ছেদরেখা টানতে হবে। ফলে এটার আকৃতি অন্তরকম হয়ে যাবে। এটা দাঁড়াবে এরকম।—

হা রে নিরা | -নন্দ দেশ, | পরি জীর্ণ | জরা,  
বহি বিজ্ঞ | -তার বোঝা, | ভাবিতেছ | মনে  
ঈশ্বরের | প্রবঞ্চনা | পড়িয়াছে | ধরা  
স্বচতুর | স্মৃদ্ধৃষ্টি | তোমার ন | -য়নে।

সুতরাং এ ছন্দটা হল সমমাত্রক অর্থাৎ 'চৌপদী' ছন্দ। এ ছন্দের এরকম বিশ্লেষণের একটা বিশেষ সার্থকতা আছে। কারণ এর দ্বারাই এ ছন্দের (যাকে সাধারণতঃ 'পয়ার' বলেই অভিহিত করা হয়) উৎপত্তির ইতিহাসের দিকে একটা গভীর ইঙ্গিত ঘুটে ওঠে। পূর্বেই বলেছি স্বরবৃত্ত ছন্দ থেকেই অক্ষরবৃত্তের উৎপত্তি হয়েছে এবং চোদ্দো অক্ষরের পয়ার চোদ্দো স্বরের স্বরবৃত্তের

বিকারমাত্র। স্বরবৃত্ত ছন্দে প্রতি চার স্বরের পরেই একটি করে ষতি থাকে। কিন্তু সংস্কৃত ভাষার ও গানের স্বরের প্রভাবে ওই ষতির সংখ্যা কমে গিয়ে অর্থাৎ স্বরবৃত্তের পাদগুলো আরও ঠেসে গিয়ে এই পয়ারের উৎপত্তি হয়েছে। উক্ত বিশ্লেষণেই ওই চতুঃস্বরপাদ স্বরবৃত্তের ও গানের প্রভাবেই ইঙ্গিতটা টের পাওয়া যায়। ‘পয়ার’ শব্দটি ‘পদচার’ শব্দ থেকে উৎপন্ন হয়েছে, রবীন্দ্রনাথের ঐ কথাটি সত্য হলে পয়ারের উৎপত্তি সম্বন্ধে আমার যুক্তিগুলো আরও দৃঢ়তা লাভ করে। যা হক, অক্ষরবৃত্তের প্রায় সর্বত্রই গোড়ায় এই চতুর্মাত্রক তালের সন্ধান পাওয়া যাবে। আর-একটা দৃষ্টান্ত দিচ্ছি।—

২। আজিকে হ | -য়েছে শান্তি,  
জীবনের | ভুলভ্রান্তি  
সব গেছে | চুকে।  
রাজিদিন | ধুকধুক  
তরঙ্গিত | সুখদুখ  
থামিয়াছে | বুকে ॥

—রবীন্দ্রনাথ, ‘চিত্রা’, মৃত্যুর পরে

এখানেও ওই চতুর্মাত্রক তাল অনায়াসেই ধরা পড়ে।

এবার স্বরবৃত্ত ছন্দ থেকে এই চতুর্মাত্রক তালের একটা দৃষ্টান্ত দিচ্ছি।—

৩। লুকিয়ে ছিল | যে মর্যাদা | নারীর হৃদয় | -তলে,  
উঠল জাগি | দিগ্বিজয়ী | বীরের জাগ | বলে।  
যুক্তকরে অশ্রুমাথা দিব্যাহাসি হেসে,  
করল বরণ অগ্নিদেবে নববধূর বেশে ॥

—কল্পপানিধান, ‘ধানদূর্বা’, ব্রহ্মলতা

এ ছন্দের কবিতায় চতুর্মাত্রক তালের স্বচ্ছন্দ গতি। পূর্বে পয়ারের যে দৃষ্টান্ত দিয়েছি, এর সঙ্গে মিলিয়ে পড়লেই বোঝা যায় সেটা কতখানি আড়ষ্ট হয়ে গেছে। অবশ্য অক্ষরবৃত্তের যে আভিজাত্য আছে সে সম্বন্ধে আগেই অনেক কথা বলেছি।

এখন মাত্রাবৃত্তের একটা চতুর্মাত্রক তালের দৃষ্টান্ত দিচ্ছি।—

৪। এস ভূষ | -গার দেশে | এস কল | -হাস্তে,  
গিরিদরী | -বিহারিণী | হরিণীর | লাস্তে।

ধূসরের উষরের কর তুমি অস্ত,  
 জ্বালিয়া ও পরশে কর গো ত্রি-মস্ত ।  
 ভরা ঘট এস নিয়ে ভরসায় ভরনা,  
 স্বরনা !

—সত্যেন্দ্রনাথ, 'বিদায়-আরতি', স্বরনা

চতুর্মাত্রক তালের যে কয়টা দৃষ্টান্ত দেওয়া গেল তাব থেকে এ কথা স্পষ্ট হয়ে ওঠে যে, গানের বীতিতে কাব্যছন্দের এরকম শ্রেণীবিভাগ করলেও আমাদের পূর্বোক্ত শ্রেণীবিভাগ অব্যাহতই থেকে যায়। কারণ সমপদী, অসমপদী বা বিষমপদী, যেসকল তালই হক না কেন, প্রত্যেক বিভাগের মধ্যেই অক্ষরবৃত্ত, মাত্রাবৃত্ত ও স্বরবৃত্ত এই তিনটি প্রকারভেদ থাকবেই। উদ্যুত প্রথম, তৃতীয় ও চতুর্থ, এই দৃষ্টান্ত-তিনটি পরীক্ষা করলেই এর যথার্থ উপলব্ধি হবে। সুতরাং কাব্যছন্দের শ্রেণীবিভাগ করবার সময়ে কাব্যের ভাষার বৈশিষ্ট্য ও তালের প্রকারভেদ, এ দুটো বিষয়ের দিকেই লক্ষ রাখা দরকার। আমরা শ্রেণীবিভাগ করবার সময়ে তাই করেছি, কিন্তু কাব্যের ভাষা-বৈশিষ্ট্যকেই প্রাধান্য দিয়েছি। কারণ গানে শুধু তালের উপরে লক্ষ রেখেই শ্রেণীবিভাগ করা হয়, ভাষার রচনাপ্রণালীর দিকে দৃষ্টি থাকে না বললেই হয়। কিন্তু কাব্যের রচনাবৈচিত্র্যই সর্বপ্রথমে মনের উপরে প্রভাব বিস্তার করে। এজন্যে ভাষার রচনাবিধিকেই প্রাধান্য দিয়ে ছন্দকে প্রধানতঃ অক্ষরবৃত্ত, মাত্রাবৃত্ত ও স্বরবৃত্ত এই তিন ভাগে বিভক্ত করেছি ; তালকেই প্রাধান্য দিয়ে সর্বপ্রথমই ছন্দকে সম, অসম ও বিষম এই তিন ভাগে বিভক্ত করি নি। রচনাবৈশিষ্ট্যের পরেই তাল বা তালবিভাগের প্রাধান্য। গানের ক্ষেত্রে যা তালবিভাগ, কাব্যছন্দের ক্ষেত্রে তাই পাদবিভাগ। সুতরাং অক্ষরবৃত্ত প্রভৃতি প্রধান শ্রেণীর পরেই পাদরচনার বৈশিষ্ট্যের প্রাধান্য স্বীকার করে চতুরক্ষরপাদ, অষ্টাক্ষরপাদ, চতুর্মাত্রপাদ, পঞ্চমাত্রপাদ, চতুঃস্বরপদে প্রভৃতি উপবিভাগ করেছি। ছন্দের শ্রেণীবিভাগ করবার সময়েই এ কথা বলেছি। সুতরাং এখানে এ বিষয়ে বিস্তৃত আলোচনা করা নিম্নয়োজন।

এখন অসমমাত্রক তালের দৃষ্টান্ত দিচ্ছি।—

আজি কি তোমার | মধুর মুরতি-|  
 হেরিলু শারদ | প্রভাতে ।

হে মাতঃ বন্ধ, শ্রামল অন্ধ

ঝলিছে অমল শোভাতে ।

পারে না বহিতে নদী জলধার,

মাঠে মাঠে ধান ধরে নাকো আর,

ডাকিছে দোয়েল, গাহিছে কোয়েল

তোমার কানন-সভাতে ।

মাঝখানে তুমি দাঁড়ায়ে জননী

শরৎকালের প্রভাতে ॥

—রবীন্দ্রনাথ, ‘কল্পনা’, শরৎ

এটা মাত্রাবৃত্ত ছন্দে রচিত। অমনি পড়ে গেলে প্রত্যেক ছয় মাত্রার পরে একটা করে ষতি পাওয়া যায়। কিন্তু আরও একটু লক্ষ করলে এই ছয় মাত্রার প্রত্যেকটি পাদে ঠিক মধ্যস্থলে একটা করে স্বল্প ছন্দ আবিষ্কার করা যায়। প্রত্যেক তিন মাত্রার পরেই একটা ঈষদ্ব্যতি বা একটুখানি স্থরের বিরতি যেন ঐতিশক্তির কাছে ধরা দেয়। বস্তুতঃ খুব তীক্ষ্ণ দৃষ্টিতে দেখলে বলতে হয় যে, তিন-তিনটি মাত্রার এক-একটি ক্ষুদ্র পাদ বা মাপকাঠির সাহায্যেই এ ছন্দ রচিত হয়। এরকম দুটো মাপকাঠিতেই এর এক পাদ হয়। সেজগ্রেই এই ষম্মাত্রক ছন্দের কবিতায় প্রতি পাদে তিন মাত্রার পরেই একটা ঈষদ্ব্যতির অস্তিত্ব অনুভূত হয় এবং এটাই এ ছন্দের স্বরূপ। তবে কোথাও কোথাও কোনো পাদের মধ্যবর্তী এই ঈষদ্ব্যতিটি প্রায় টেরও পাওয়া যায় না। পূর্বের দৃষ্টান্তটিতেই এর নমুনা আছে।—

মাঠে মা : ঠে ধান | ধরে না : কো আ

এবং

মাঝখা : নে তুমি | দাঁড়ায়ে জননী ।

এখানে কোলনচিহ্নিত তিনটি জায়গায় পাদমধ্যবর্তী ছন্দ বা ঈষদ্ব্যতিটি কানে ধরা দেয় না, ওই ষতিটি লুপ্ত হয়ে দুটো ক্ষুদ্র ভাগ একত্র জোড়া লেগে গেছে। কিন্তু ওই ঈষদ্ব্যতি থাকাটাই এর যথার্থ প্রকৃতি এবং তিন মাত্রার মাপকাঠিটাই এর ভিতরের গঠনের আসল আদর্শ। এই ঈষদ্ব্যতির সাহায্যেই এ ছন্দের তালস্বরূপ হয়ে থাকে। এজগ্রেই এ ছন্দকে ত্রিমাত্রক বা অসমপদী তালের ছন্দ বলেছি। উক্ত দৃষ্টান্তটি মাত্রাবৃত্ত ছন্দে অসমপদী তালের নমুনা।

এবার স্বরবৃত্ত ছন্দ থেকে অসমপদী তালের একটা উদাহরণ দেব।—

ওই সিংহলদ্বীপ | স্নন্দর শ্রাম, | নির্মল তার | রূপ,  
তার কণ্ঠের হার ল'কর ফুল, কর্পূর কেশ-ধূপ ;  
আর কাঞ্চন তার গৌরব, আর মৌক্তিক তার প্রাণ,  
আর সঞ্চল তার বুদ্ধের নাম, সম্পদ নির্বাণ ॥

—সত্যেন্দ্রনাথ, 'কুহ ও কেকা', সিংহল

গানের রীতিতে এখানে প্রতি পদে তিনটি করে মাত্রা পাওয়া যাবে, যদিও বিস্তৃত কাব্যছন্দের ভাষায় একে মাত্রাবৃত্ত না বলে স্বরবৃত্ত বলেছি। তিন মাত্রার মাপকাঠিতে রচিত হয়েছে বলেই একে ত্রিমাত্রক বা অসমপদী তালের ছন্দ বলব।

অক্ষরবৃত্তে এ তালের দৃষ্টান্ত এই।—

একবার তোরা | মা বলিয়া ডাক,  
জগৎজনের শ্রবণ জুড়াক,  
হিমালয়-পাষণ কেঁদে গলে যাক,  
মুখ তুলে আজি চাহ রে।

—রবীন্দ্রনাথ, 'গীতবিতান', জাতীয় সংগীত ১১

এ ছন্দে হেমচন্দ্র ও নবীনচন্দ্র অনেক কবিতা লিখে গেছেন। রবীন্দ্রনাথও প্রথম জীবনে অক্ষরবৃত্তে এই অসমপদী তালের অনেক কবিতা রচনা করেছেন। কিন্তু অক্ষরবৃত্তে এ তাল তাল শোনায় না। যেখানে যুক্তবর্ণ উপস্থিত হয় সেখানেই পদে পদে তালভঙ্গ হয়, শ্রুতিকটুতা দোষ ঘটে। এই তথ্যটি লক্ষ করেই রবীন্দ্রনাথ বাংলায় মাত্রাবৃত্তের প্রবর্তন করেছেন। 'মানসী'তে তিনি সর্বপ্রথম যুক্তবর্ণের পূর্বস্বরকে দ্বিমাত্রক বলে ধরে এই নূতন ছন্দ ব্যবহার করতে শুরু করেন। এখন অসম তালের ছন্দ সর্বদাই মাত্রাবৃত্তে রচিত হয়ে থাকে। অক্ষরবৃত্তে অসম তাল সম্পূর্ণ অপ্রচলিত হয়ে গেছে। আর-একটা উদাহরণ দিচ্ছি রবীন্দ্রনাথের 'প্রভাতসংগীত' থেকে। পাঠক পড়লেই বুঝতে পারবেন এ রচনাটা মার্জিত শ্রুতিকটুর উপরে কতখানি অত্যাচার করে।—

বায়ুর হিল্লোলে | ধরিবে পল্লব | মর মর যুহু | তান,  
চারি দিক্ হতে কিসের উল্লাসে পাখিতে গাহিবে গান ॥

—রবীন্দ্রনাথ, 'প্রভাতসংগীত', আত্মদর্শন



এখানে যুক্তবর্ণগুলো যেন গুরুভার প্রস্তুতগতির মতো স্বরপ্রবাহের গতিরোধ করে ঠাড়িয়ে আছে। আমাদের ছন্দচেতনাও যেন সে গুরুভারে নিপীড়িত হচ্ছে। হুতরাং এ ভারটাকে যদি একটু লঘু করে দেওয়া যায় তবেই ছন্দের শ্রোত আবার অবোধ গতিতে বয়ে চলবে।—

বায়ুহিল্লোলে | ধরে পল্লব | মর মর মৃদু | তান,

চারি দিক হতে কি যে উল্লাসে পাখিরা গাহিছে গান ॥

কাব্যে বিষম তালটাও মাত্রাবৃত্ত ছন্দেই শোভা লাভ করে। সেজন্যে অক্ষরবৃত্তে বা স্বরবৃত্তে এ তালের ছন্দ সচরাচর রচিত হয় না। বিষম তাল অনেকরকম হতে পারে। যেমন—

১। বিপদে মোরে | রক্ষা কর, | এ নহে মোর | প্রার্থনা,

বিপদে আমি | না যেন করি | ভয়।

দুঃখ ঠাপে ব্যথিত চিতে নাই বা দিলে সাহসনা,

দুঃখে যেন করিতে পারি জয়।

সহায় মোর না যদি জুটে

নিজের বল না যেন টুটে,

সংসারেতে ঘটিলে ক্ষতি লভিলে শুধু বঞ্চনা

নিজের মনে না যেন মানি ক্ষয় ॥

—রবীন্দ্রনাথ, ‘গীতাঞ্জলি’, ৪

এখানে প্রতি পাঁচ মাত্রার পরেই যতি আছে। কিন্তু খুব স্বল্প শক্তির নিকট প্রতি পদে তিন মাত্রার পরে একটা যতির আভাস ধরা পড়বেই। হুতরাং আসলে এখানে তিন মাত্রার অসমপদের সঙ্গে দুই মাত্রার একটা সমপদের যোগেই পাঁচ মাত্রার এক-একটি পদ রচিত হয়েছে। এই অসম ও সম তালের মিশ্র তালকেই ‘বিষম তাল’ বলা হয়েছে।

২। জড়িয়ে আছে বাধা, | ছাড়ায়ে যেতে চাই, |

ছাড়াতে গেলে ব্যথা | বাজে।

মুক্তি চাহিবারে তোমার কাছে ঝুঁই,

চাহিতে গেলে মরি লাঞ্জে।

—রবীন্দ্রনাথ, ‘গীতাঞ্জলি’, ১৪৪

এটা সপ্তমাত্রক অপূর্ণ চৌপদী ছন্দ। কারণ প্রথম তিন পদে সাতটি করে মাত্রা

ও শেষ পদে দুটোমাত্র মাত্রা আছে। কিন্তু এর তাল বিষম, কারণ প্রতি পদেই তিন মাত্রার পরে একটা ঈষদৃষ্টি আছে। এ যতি প্রত্যেক পদকে একটি তিন মাত্রার অসমভাগ এবং আর-একটি চার মাত্রার সমভাগে বিভক্ত করেছে। সেজন্মেই তাল বিষমপদী।

৩। জীবনে যত পূজা | হল না সারা,

জানি হে জানি তাও | হয় নি হারা।

—রবীন্দ্রনাথ, 'গীতাঞ্জলি', ১৪৬

এটা সপ্তমাত্রক অপূর্ণ দ্বিপদী ছন্দ। কারণ প্রথম পদে সাত ও দ্বিতীয় পদে পাঁচ মাত্রা আছে। কিন্তু প্রতি পদেই তিন মাত্রার পরে একটি করে ঈষদৃষ্টি দুটো অসমান ভাগ সৃষ্টি করেছে। অতএব বিষম তাল।

৫। গাহিছে কাশীনাথ নবীন যুবা, ধ্বনিতে সভাগৃহ ঢাকি,

কণ্ঠে খেলিতেছে সাতটি সুর, সাতটি যেন পোষা পাখি।

—রবীন্দ্রনাথ, 'সোনার তরী', গানভঙ্গ

এ ছন্দের তাল অতি বিচিত্র। প্রত্যেক পংক্তিতে যথাক্রমে তিন-চার-পাঁচ, ও তিন-চার-দুই মাত্রা রয়েছে। কিন্তু একটু লক্ষ করলেই দেখা যাবে, এ ছন্দটা এর অব্যবহিত পূর্ববর্তী অর্থাৎ তৃতীয় দৃষ্টান্তটির সম্প্রসারণমাত্র। তৃতীয় দৃষ্টান্তের সাত-পাঁচের অপূর্ণ দ্বিপদীর সঙ্গে সাত-দুইএর আর-একটা দ্বিপদ যোগ করলেই এ ছন্দ পাওয়া যায়। সুতরাং এ ছন্দের যথার্থ স্বরূপ হচ্ছে এ-রকম।—

গাহিছে কাশীনাথ | নবীন যুবা, |

ধ্বনিতে সভাগৃহ | ঢাকি',

কণ্ঠে খেলিতেছে | সাতটি সুর, |

সাতটি যেন পোষা | পাখি।

এর স্বরূপটি একটি অতিরিক্ত মিলের সাহায্যে বিশেষভাবে ফুটে উঠেছে নীচের দৃষ্টান্তটিতে।—

কোশল-নৃপতির তুলনা নাই,

জগৎ জুড়ি' যশোগাথা ;

কীণের তিনি সদা শরণটাই,

দীনের তিনি পিতামাতা।

—রবীন্দ্রনাথ, 'কথা', দত্তকবিক্রম

বলা বাহুল্য এখানেও বিষম তাল।

বিষম তালের আর-এক রকম দৃষ্টান্ত দিচ্ছি।—

৫। ছিলাম নিশিদিন | আশাহীন প্রবাসী  
বিরহ-তপোবনে আনমনে উদাসী।  
আধারে আলো মিশে দিশে দিশে খেলিত ;  
অটবী বায়ুবশে উঠিত সে উছাসি।  
কখনো ফুল দুটো আঁখিপুট মেলিত,  
কখনো পাতা বারে পড়িত রে নিশাসি ॥

—রবীন্দ্রনাথ, ‘মানসী’, বিরহানন্দ

এটা বিপর্যস্ত সপ্তমাত্রক দ্বিপদী ছন্দের দৃষ্টান্ত। রবীন্দ্রনাথের রচনায় এই একটিমাত্র দৃষ্টান্ত ছাড়া এ ছন্দ আর কোথাও দেখি নি। প্রতি পংক্তিতে সাত মাত্রার দুটো পদ আছে। প্রত্যেক পদ আবার ঐক্যবৃত্তির দ্বারা দুই ভাগে বিভক্ত। কিন্তু এ বিভাগের মধ্যে সন্নিবেশবিপর্যয়ের দ্বারা বেশ একটু বৈচিত্র্য আনা হয়েছে। প্রত্যেক পংক্তিতেই প্রথম পদ তিন-চার ও দ্বিতীয় পদ চার-তিন মাত্রায় ছিন্ন হয়েছে।

এতক্ষণে আমরা তালের দিক থেকে ছন্দের প্রধান তিন ভাগ—সম, অসম এবং বিষম ছন্দের আলোচনা করেছি। গানে তালবিভাগের অন্তর্গত মাত্রার সমাবেশপ্রণালীভেদে তালের অনেক প্রকারভেদ আছে। তার আলোচনা করা আমাদের পক্ষে অনাবশ্যক। কবিতাতেও পদের অন্তর্গত স্বরবর্ণের দ্বারা লঘু-গুরুভেদে তালের নানারকম উপবিভাগ হয়ে থাকে। তাতে ছন্দের তাল আদিগুরু, মধ্যগুরু, অন্তগুরু প্রভৃতি নানা শ্রেণীতে বিভক্ত হয়ে থাকে। ছন্দের শ্রেণীবিভাগ করার সময়ে এ বিষয়ে বিস্তৃত আলোচনা করেছি। সুতরাং এ স্থলে আর কিছু বলা নিম্প্রয়োজন। তবে এ কথা স্মরণ রাখা দরকার যে, তালের এরকম উপবিভাগ স্বরবৃত্ত ছন্দেই হতে পারে। অক্ষরবৃত্ত বা মাত্রাবৃত্ত ছন্দে এরকম বৈচিত্র্যের অবসর নেই। স্বরবৃত্ত ছন্দে স্বরের লঘুগুরুভেদে তালের যে বৈচিত্র্য সাধিত হয় তাকেই কাব্যের ভাষায় ‘ছন্দস্পন্দন’ নামে অভিহিত করেছি।

কাব্যের ক্ষেত্রে ছন্দের স্পন্দন বা নৃত্যলীলার একটা বিশেষ সার্থকতা আছে। সবাই জানেন যে, বিশ্বজগতের ভিতরকার মূলপ্রণালী নির্ণয় করতে গিয়ে

জড়বিজ্ঞান সর্বত্র কতকগুলো বিচিত্র আণবিক স্পন্দন বা চঞ্চল নৃত্যপরায়ণতাই আবিষ্কার করেছে। ধ্বনিতত্ত্বে এ কথা যেমন খাটে, মানুষের মানস ক্ষেত্রেও এ কথা তেমনি খাটে বলতে পারি। তাই কবিতার ভিতরকার যা মূলসত্য অর্থাৎ রস, কবিতার ছন্দ সেই রসকে ধ্বনির স্পন্দনের ভিতর দিয়েই আমাদের চিত্তস্পন্দনের সঙ্গে সমান তালে ফুটিয়ে তুলতে চায় এবং এই চিত্তস্পন্দনের ভিতর দিয়েই আমাদের মর্মকে স্পর্শ ক'রে রসকে আমাদের মানসলোকে সার্থক করে তুলতে চায়। কিন্তু ধ্বনিস্পন্দনের এই বিচিত্র সূক্ষ্ম লীলা ব্যাকরণের অর্থাৎ বিশ্লেষণের সূত্রে বেঁধে দেওয়া অসম্ভব। হুতরাং সে প্রয়াস আমরা করব না। তবে বাংলা কবিতায় ছন্দস্পন্দনের রীতিবৈশিষ্ট্য এবং কোন্ কোন্ বিশেষ উপায়ে তা আমাদের চিত্তকে দোলা দেয় সে সম্বন্ধে অনেক কথা বলা যায় এবং বলা দরকারও বটে। আমরা পরে সে বিষয়ের আলোচনা করতে চেষ্টা করব।

### সুর

ছন্দ ও সংগীতের আলোচনায় প্রবৃত্ত হয়ে আমরা মাত্রা, লয়, যতি ও তাল, উভয় শাস্ত্রের এ কয়টা সামান্য পরিভাষা এবং উক্ত দুই শাস্ত্রে এদের সার্বিকতা ও পার্থক্য কি, তাই বিশদ করতে চেষ্টা করেছি। বলা বাহুল্য, উভয় শাস্ত্রেই এমন কতকগুলো বিশেষ স্বতন্ত্র ধর্ম আছে যা এক পক্ষে খাটে, অত্র পক্ষে খাটে না। কাব্যছন্দের আলোচনা করাই আমাদের উদ্দেশ্য এবং এ ক্ষেত্রের বিশেষ ধর্মগুলোর আলোচনা পূর্বেই করা হয়েছে। কিন্তু সংগীতশাস্ত্রের সঙ্গে কাব্যছন্দের থানিকটা সাদৃশ্য আছে বলে উভয়ের মধ্যে একটু তুলনা করার উদ্দেশ্যেই সংগীতের অবতারণা করা হয়েছে। সংগীতের আলোচনা গোঁণ এবং কাব্যছন্দের আলোচনাই আমাদের মূখ্য উদ্দেশ্য। এইজন্যই কাব্যছন্দের কথা বিশেষভাবে বিশ্লেষণ করে সংগীতের কথা সংক্ষেপে সমাপ্ত করেছি।

এ কথা মনে রাখা দরকার যে, লয় ও তাল সংগীতের ক্ষেত্রে যতই প্রয়োজনীয় হক না কেন এগুলোই সংগীতের মূলতত্ত্ব নয় : সংগীতের অন্তরতম মূলতত্ত্ব হচ্ছে স্বর। মাত্রা লয় প্রভৃতি স্বরের বাহনমাত্র, স্বরের গতিপ্রকৃতিকে

ফুটিয়ে তোলার মধ্যেই এদের সার্থকতা। সংগীতের স্বরই অনির্বচনীয় আনন্দরসকে মানুষের মনের স্পর্শসীমার মধ্যে এনে পৌঁছিয়ে দেয়। সংগীতে যেমন স্বর, কাব্যে তেমনি ভাব। ভাব বলতে শুধু শব্দের অর্থকেই বুঝি নে। ভাব বলতে বুঝি এমন একটা ইঙ্গিত, এমন একটা সৌরভ, এমন একটা স্বপ্না বা চকিতের মধ্যেই আমাদের মানসলোকে অদ্ভুত সৌন্দর্য-সৃষ্টির মায়াজাল বিস্তার করে। কাব্যেও তাল লয় মাত্রা প্রভৃতি গোণ, এই ভাবকে ফুটিয়ে তোলার মধ্যেই এদের সার্থকতা। যা হক, কাব্য এবং সংগীত, উভয়েরই চরম লক্ষ্য এবং পরম সার্থকতা হচ্ছে সৌন্দর্য বা আনন্দরসের সৃষ্টি। সংগীতে এই সৌন্দর্য প্রকাশ লাভ করে স্বরের উপরে নির্ভর ক'রে এবং স্বর প্রবাহিত হয় লয় তাল প্রভৃতির আশ্রয়ে। কাব্যেও তেমনি সৌন্দর্য ফুটে ওঠে ভাবের ভিতর দিয়ে এবং ভাব বিকশিত হয় ছন্দের সাহায্যে। কিন্তু তা বলে যে এ দু'এর মধ্যে কোনো জায়গায় কোনো যোগ নেই তা নয়। সংগীতে স্বর যদিও প্রধানতঃ ধ্বনিকে অবলম্বন করেই সৌন্দর্য সৃষ্টি করে, তবু স্বরের মধ্যেও কাব্যের ভাবব্যঞ্জনার আভাস রয়ে যায়। আবার, কাব্যের ভাবও সম্পূর্ণ স্বরনিরপেক্ষ নয়। কেননা, কাব্যছন্দেরও ধ্বনিনিরপেক্ষ কোনো অস্তিত্ব নেই।

কিন্তু গানের স্বর ও কাব্যের স্বরের মধ্যে গুরুতর প্রকৃতিগত পার্থক্য রয়ে গেছে। সংগীতে ভাব স্বরের অনুবর্তন করে; কিন্তু কাব্যে স্বরই ভাবের অনুসরণ করে। সেজ্ঞেই কাব্য আবৃত্তি করার সময়ে গানের রসনা বুদ্ধিবৃত্তির অনুসরণ ক'রে ও কথার অর্থকে অব্যাহত রেখে কোথাও চলে, কোথাও থামে। কবিতায় ছন্দধ্বনি স্বরকেই প্রাধান্য দিয়ে কথার অর্থকে সহজে গোণ আসন দেয় না। কাব্যে অর্থের অনুযায়ী হয়েই স্বর কখনো তীব্র, কখনো মৃদু, কখনো গম্ভীর, কখনো তরল, কখনো মন্থর, কখনো দ্রুত হয়ে থাকে। সকলেই লক্ষ করে থাকবেন, কবিতা আবৃত্তি করার সময়ে আমরা শুধু যে ছন্দ বা তাল বাঁচিয়েই কথাগুলোকে আওড়ে যাই তা নয়। যদি শুধু তাই হত তবে কবিতার প্রাণটাই জড় শব্দপুঞ্জের নীচে চাপা পড়ে মারা যেত। আর, ছন্দও কবিতার ভাবকে গতিদান না করে বরং পাষণপ্রাচীরের মতো তার গতিরোধ করেই দাঁড়াত। কিন্তু প্রকৃত তথ্য তো তা নয়, ছন্দ কাব্যের বাধা না হয়ে তার সহায় হয়েছে। তার কারণ কাব্যের ভাবকে

বহন করে বলেই ছন্দের প্রয়োজনীয়তা। ভাবের উপরে প্রভুত্ব করা ছন্দের কাজ নয়, বরং ছন্দের উপরেও ভাবের যথেষ্ট প্রভাব রয়েছে। সেজন্যেই শুধু যতি তাল লয় মাত্রা রক্ষা করে যন্ত্রের মতো আবৃত্তি করে গেলেই কবিতার যথার্থ আবৃত্তি হয় না। তাতে কবিতার যথার্থ ভাবটি ছাড়া পায় না; ছন্দের খাঁচাটাই তখন কাব্যের মুক্তির প্রধান বাধা হয়ে দাঁড়ায়। এজন্যেই কবিতা আবৃত্তি করার সময়ে ছন্দের তাল-লয়কে অতিক্রম করে গিয়ে কবিতার ভাবকে ফুটিয়ে তুলতে হয়। এখানটাতেই ছন্দ হাজার চেষ্টা করেও কাব্যের যথার্থ স্বরূপটির নাগাল পায় না, তাকে স্পর্শ করতে পারে না। স্তত্রাং নিজেকে নিজে অতিক্রম করে যাওয়ার মধ্যেই ছন্দের সার্থকতা। আর, এ অতিক্রমই হচ্ছে ছন্দের রাজ্য ছাড়িয়ে ভাবের ও স্বরের রাজ্যে প্রবেশের উপক্রম। কাজেই আবৃত্তি করার সময়ে শুধু ছন্দ খাঁচাটাই চলে না; তার সঙ্গে একটু ভাবের আভাস, একটু স্বরের স্পর্শও যোগ করে দিতে হয়। এজন্যেই দেখা যায় আবৃত্তি করার সময়ে আমাদের কণ্ঠ জড়যন্ত্রের মতো শব্দগুলোকে শুধু উচ্চারণ করে যায় না; ভাবের গভীরতা, তীব্রতা ও ওজস্বিতার সঙ্গে সঙ্গে আমাদের কণ্ঠস্বরও কোথাও তীব্র, কোথাও গভীর, কোথাও দৃপ্ত হয়ে ওঠে। এখানেই আমাদের চিত্ত কবিতার ভাবে অনুপ্রাণিত হয়ে উঠে, আমাদের কণ্ঠের ভিতর দিয়ে আত্মপ্রকাশ করে। সেইজন্যেই তো কবিতার আবৃত্তি সজীব সচেতন ও প্রাণের স্পন্দনে এমন স্পন্দিত হয়ে ওঠে। আর, এখানেই কাব্যের ভাব বিস্তৃত কাব্যছন্দের এলাকা ছাড়িয়ে গিয়ে সংগীতের স্বরের স্পর্শলাভের জন্য ব্যাকুল হয়ে ওঠে। কিন্তু এখানেই শেষ। সংগীতস্বরের আভাসলাভ ও তার মধ্যে আত্মপ্রসারের এই ব্যাকুলতার মধ্যেই কাব্যছন্দের চরম তৃপ্তি।

গানের স্বরের প্রক্রিয়া অন্যরকম, তার অভিব্যক্তির পন্থা স্বতন্ত্র। গানের স্বর ধ্বনিকে আশ্রয় করেই আনন্দকে রূপদান করে, কথার ভাবকে আশ্রয় করে নয়। সেজন্যেই গানের স্বর স্বচ্ছন্দগতিতে বিচিত্র ভঙ্গিতে প্রবাহিত হয়ে চলে, গানের কথাকে সে গ্রাসও করে না। গানের স্বরের কাছে কথা ও তার অর্থের কোনো মর্যাদা নেই বললেই হয়। কথার অর্থ যেখানে থেমেছে, স্বর হয়তো সেখানেও চলেছে, কথার অর্থ যেখানে গতি রয়েছে, স্বর হয়তো সেখানেই মোড় ফিরে যায়—এমন সর্বদাই দেখা যায়। গানের স্বরের ধারায় পড়ে শ্রোতের বেগে

গানের কথাগুলো নিজ নিজ স্বতন্ত্র রূপকে পর্যন্ত বজায় রাখতে পারে না, স্বরের বেগে শব্দগুলো ছিন্নবিচ্ছিন্ন হয়ে যায় ; কোনো শব্দের বর্ণগুলো পরস্পর সংশ্লিষ্ট থাকতে না পেয়ে বিচ্ছিন্ন হয়ে এ-শব্দের বর্ণ ও-শব্দের গায়ে গিয়ে পড়ে । শব্দগুলো নিজেই যখন এমন ছাড়া-ছাড়া বিচ্ছিন্ন হয়ে যায় তখন তারা অর্থের সমতা রক্ষা করবে কেমন করে ? তাই বলছিলাম গানের হর বাক্ ও অর্থকে জগ্ৰাহ ক'রে ধ্বনির সাহায্যেই সৌন্দর্য ও আনন্দকে সৃজন করতে চায় । তাই গানে ধ্বনিকে এত বিশ্লেষণ করা হয় ; তাই গানে ষড়্জ, ঋষভ প্রভৃতি স্বরের সাতটি গ্রাম, উচু নীচু মাঝারি প্রভৃতি সপ্তকের বিভাগ, কড়ি কোমল প্রভৃতি স্বরের সূক্ষ্ম ভেদ, এসমস্ত বৈচিত্র্য দেখতে পাই ।

গানের স্বরের এসমস্ত ভেদকে মাত্রা লয় প্রভৃতি থেকে গৃথক করে দেখা দরকার । কালের দিক্ থেকে ধ্বনির আদর্শ মাপকাঠিকে মাত্রা বলা হয় ; কাল বোপে স্বরের স্ফুটিপরিমাণই হচ্ছে মাত্রাপরিমাণ । এ দিক্ থেকে এক-একটি বর্ণ সিকিমাত্রা থেকে শুরু করে চার পাঁচ প্রভৃতি বহুমাত্রাব্যাপী স্থায়ী হতে পারে, স্বতরাং কালের স্থিতির দিক্ থেকে বহুমাত্রাপরিমাণ হতে পারে । ঠিক তেমনি ধ্বনির তীব্রতা বা মৃদুতার দিক্ থেকেও বহু বিভাগ । ধ্বনির এই উচ্চতানীচতাভেদ অসংখ্যরকম হতে পারে । ষড়্জ ঋষভ প্রভৃতি এরই প্রকারভেদ মাত্র । কিন্তু এসমস্ত প্রকারভেদ সম্পূর্ণরূপে মাত্রানিরপেক্ষ, অর্থাৎ কোন্ মাত্রার বর্ণ তীব্রতার কোন্ গ্রামে থাকবে বা কোন্ গ্রামে মাত্রাপরিমাণ কত তার কোনো স্থিরতা নেই । ধ্বনির স্থিতি যেমন মাত্রাভেদ নির্ণয় করে, তার তীব্রতাও তেমনি স্বরের ভেদ নিয়ন্ত্রিত করে । আবার ধ্বনির গতির সমতাকেই লয় বলে এবং এই গতির ক্রমভেদে লয়ভেদ হয় । আর ধ্বনির গতিভঙ্গিতেই তালের সৃষ্টি ।

মাত্রা লয় যতি তাল ও হর গানের ক্ষেত্রে যে অপরূপ অরূপসৌন্দর্যের তাজমহল গড়ে তোলে, কাব্যের ক্ষেত্রে তা গড়ে ওঠে শব্দ স্পর্শরূপ রস গন্ধ প্রভৃতির মানসী মূর্তির মাধ্যমীতে । কিন্তু কাব্যেও মাত্রা প্রভৃতির কিঞ্চিৎ সার্থকতা আছে ; এরা সেই সৌন্দর্য-ইমারতের স্থূল উপাদান জোগায় । সেজগ্রেই এগুলোকে হিসাবের বিচারে অল্পবিস্তর পরিমাপ করা যায় । কিন্তু কাব্যে স্বরের যে আভাস পাই তার কোনো বিশ্লেষণ নেই, ভাবের আবেগে চিন্তে যে গতির সঞ্চার হয় তার থেকেই কাব্যে ওই স্বরের উৎপত্তি হয় । কিন্তু

সে স্বর গানের স্বরের মতো। আপন গতিতেই আপনি বয়ে চলে না, ভাবের আবেগের অনুসরণ করেই কণ্ঠস্বরকে নিয়ন্ত্রিত করে।

সংগীত ও ছন্দ সম্বন্ধে আমরা যে বিষয়গুলোর আলোচনা করলাম, আশা করি তার থেকে এটুকু স্পষ্ট হয়েছে যে, কাব্যের ছন্দ ও গানের ছন্দ কোনো কোনো বিষয়ে সদৃশধর্মী বটে, কিন্তু সমানধর্মী নয়। যে ক্ষেত্রে তাদের মধ্যে সাদৃশ্য আছে সেখানেও তাদের গতি এক দিকে নয়, এ সাদৃশ্যটাও বিভিন্নমুখ। এ দু'এরই যা হচ্ছে বৈশিষ্ট্য বা স্বতন্ত্র সার্থকতা, তা সম্পূর্ণ পৃথক ক্ষেত্রে সম্পূর্ণ ভিন্ন উপায়ে এদের ভিতরকার স্বরূপ বা সৌন্দর্যমূর্তিকে আকৃতি দান করে। অতএব কাব্য ও সংগীতের ছন্দের যথার্থ পরিচয় লাভ করতে হলে এই দুই শাস্ত্রের স্বতন্ত্র আলোচনা করা আবশ্যিক।\*



### নিশীথে

ঐ স্বদূরে গভীর তিমির নিবিড় করি গগন-তলা জুড়ে  
 স্তব্ধ যেন হরের তপোবনে ;  
 দখিন হতে মলয়-বাতাস নীরব পদে যাচ্ছে বয়ে দূরে  
 বক্ষ ছুঁয়ে স্নিগ্ধ পরশনে ।

জগৎ-জোড়া প্রাণের তলে শূন্যতাময় রিক্ত হৃদিখানি  
 হাহাকারে পূর্ণ হয়ে আছে ;  
 কিসের যেন কঠিন অভাব ঘুরছে বুকে মর্মব্যথা হানি—  
 বক্ষমণি নেইক যেন কাছে ।

ঐ যে দূরে— অনেক দূরে যাচ্ছে শোনা স্বচ্ছ তিমির ভেদি  
 অশ্রুধারা কণ্ঠভরা গীতি ;  
 নিরাশ্রয়া নিঃসহায়া কাহার যেন পড়ছে ভেঙে হৃদি,  
 আত্মহারা উপেক্ষিতা প্রীতি ।

দুঃখ-ব্যথার স্বপ্ন মাঝে ক্ষীণস্বরে বাজছে যেন কানে  
 স্তব্ধ ব্যাকুল বাক্যহারা ব্যথা ;  
 একলা সে কোন্ গহন বনে অন্তবিহীন দুঃখভরা প্রাণে  
 কাঁদছে যেন নির্বাসিতা সীতা ।

হায় রে, যেন আশান'পরে মাতৃপরান বিলুপ্তিত বেশে  
 পুত্রহারা ভাবছে অভাগিনী ;  
 জগৎ-জোড়া আধার মাঝে ছড়িয়ে দিয়ে বীধন-ছাড়া কেশে  
 চক্ষু মুছে একলা নিশীথিনী ।

গগনতলে হুপুর হল চলছে ছুটে দণ্ডগুলি বাকি,  
 আদেশ কাহার যাচ্ছে পাছে পাছে ;  
 আড়ালে তার ঝঙ্কস্নানে চক্ষু-দুটি হস্ত দিয়ে ঢাকি  
 দুর্ভাবনা স্তব্ধ হয়ে আছে ।

ছিন্নবেশা কোন্ ভিখারী পথের পাশে বৃক্ষগুলি ঘেরি  
 যাচ্ছে চলে মর্মরিয়া পাতা ;  
 বৃকের তলে হৃদয় মাঝে শঙ্কা যেন বক্ষ দিয়ে ঘেরি  
 রাখছে ঢেকে কোন্ অজানা ব্যথা ।

কিসের যেন তৃষ্ণা গভীর, কাহার যেন স্পর্শলাভের আশা  
 জগৎভরে বেড়ায় ঘুরে ঘুরে ;  
 কাহার যেন মুখের বাণী প্রাণের মাঝে করছে যাওয়া-আসা,  
 পড়ছে ভেঙে বৃকের তীরে তীরে ।

কোথায় যেন যক্ষ এবে ডাকছে মেঘে লক্ষ অহুনয়ে  
 কোন্ অলকায় বার্তাখানি নিতে ;  
 হায় রে, বছর কাটবে কবে কখন তারে চিত্ত ভরে পেয়ে  
 সর্বজীবন উঠবে জেগে মেতে ।

এমনি কালে একলা আমার  
 চক্ষু-দুটি মুগ্ধ কত স্বপ্নভাবাবেশে ;  
 হায় রে, এখন বন্ধু আমার,  
 মোদের মাঝে কোন্ পারাবার,  
 কোথায় তুমি কোন্ অচেনা দেশে ?  
 চিত্ত আমার নিদ্রাহারা জাগছে আজি,  
 জাগছে ওগো তোমার তরেই, জাগছে অনিমেঘে ॥

## যৌবন-বোধন

পুষ্পিতাগ্রা হৃদয়

প্রাণে মনে মহা মুক্তিপণ জাগুক আজ,  
বুকে বুকে অগ্নিশিখার কেতন উড়ুক হায় ;  
অপমানে নত নীৰ্ব'পর পড়ুক বাজ,  
ললাটেতে মৃত্যুতিলক জলুক আগুন-প্রায় ।

আঘাতে আহত বক্ষ'পর শোণিত লাল  
দিকে দিকে শব্দা জাগুক মরণসমুদ্রের ;  
মরণে মরণে ত্রস্ত হোক মহান্ কাল,  
লোকে লোকে দুঃখ-ব্যথার রোদন উঠুক চের

মুখরিত করি' বিশ্বলোক প্রলয়গান  
পলে পলে ছিন্ন করুক জগৎ-বাণীর তার ;  
তারকা-তপনে বিদ্রোহের বিষম বান  
অবিরত ধ্বংস আনুক ভীষণ চমৎকার !

সহে না সহে না আর যে ভাই, চোখের জল,  
অপমানে থিন্নমলিন জীবন-ফাগুন-কাল :  
আজিকে পুড়িয়া হোক না ছাই হুথের ছল,  
চারিদিকে হিংস্রভীষণ লাগুক আগুন লাল ।

বৃথা এ গুমরি' কান্না তোয়, বৃথাই হায়,  
কে শুনিবে আর্তনাদের হৃদয়-বিদার রব ?  
শিখাতে শিখাতে বহি ঘোর গগন ছায়,  
শোন না কি অত্যাচারের নিদয় জয়োৎসব ?

রেখে দে আজিকে অশ্রুপাত, হৃদয় বাঁধ,  
 জীবনের দৃষ্ট তেজের কঠিন আধার কব্ ;  
 জাগা রে বৃকেতে যৌবনের প্রলয়-সাধ,  
 শতকোটি বঙ্গা তুফান নাচুক বৃকের 'পর ।

কাঁপায়ে ধরণী তাণ্ডবের চলুক নাচ,  
 দে উড়ায়ে দীর্ঘ অযুত ভুবনকমল-দল ;  
 কোটি রাঙা শিখা থাণ্ডবের জলুক আজ,  
 শিরে নে রে ধ্বংসবিনাশ, তরুণ পাগল-দল !

ঝলকে ঝলকে রক্ত-শ্রোত মরণজয়  
 পথে পথে মৃত্যুরাজের বিঘাণ বাজাক, হায় ;  
 পলকে পলকে খড়্গাঘাত কিরণময়  
 দিকে দিকে মুক্তিরথের কেতন উড়াক বায় !

আজিকে আসনে যৌবনের বহুক ছুথ,  
 তারি তরে শঙ্খনিদাদ জাগাক মরণ-গান ;  
 ছিঁড়িয়া আনিয়া হৃৎকমল দে স্তম্ভটুক,  
 তারি পায়ে অঞ্জলি হায় তরুণ-জীবন-দান ॥

## স্মৃতিযজ্ঞ

শাদূলবিক্রীড়িত ছন্দ

কঁাদছিল একলা কিসের ব্যথায় আজি হেথায়  
অশ্রুর ধারায় সিক্ত চোখ ?  
তোর ওই কণ্ঠে রোদন অপার সহে না আর,  
হৃৎথের আগার রিক্ত হোক ।  
দান্ত্রের লজ্জা, কলঙ্ক আর বেদনাভার  
বক্ষের পাঁজর করছে চূর ?  
সন্তান তোর সে দাসত্বলীন মমতাহীন,  
অক্ষম এ লাজ করতে দূর ?

একাধিন বুদ্ধ-অশোকরাজের ত্রিশরণের  
ধর্মের ছায়ায় বিশ্বজন,  
আর তোর অশ্বঘোষের ভাসের কালিদাসের  
কাব্যের স্বধায় মুগ্ধমন ।  
তিব্বত চীন তো তোমার ক্ষেমের মহা প্রেমের  
ধর্মের জোরেই সভ্য হয় ;  
তোর বুক-স্তন্য পিয়াই জগৎ এত মহৎ,  
নয় এর কিছুই মিথ্যা নয় ॥

গৌরব তোর যে বিলায়বিহীন হলো কি ক্ষীণ ?  
মন্দারকুহুম শুষ্ক, হায় ?  
উজ্জল মুক্তা গরব-মালায় ঝরে কি ঝায়  
সন্ধ্যার মলিন পুষ্প-প্রায় ?  
একদিন হায় মা, ধ্যানের জ্ঞানের তরবারের  
বিদ্যুৎ-বিভায় ছাইলে লোক ;  
আজ তার পূর্ব-স্মৃতির ষাগের অবশেষের  
ভস্মের ধুলায় ছায় ত্রিলোক ॥

## চঞ্চল

সতীশচন্দ্র রায়

ফাগুন চঞ্চল, ফোটা ফুল রয় না,  
সুখ-স্মৃতি শোকভার চিরদিন বয় না ।  
বৈশাখে হয় তার  
মরণের অভিসার,  
অবহেলে ফেলে দেয় পুষ্পের গয়না ;  
সুখ-স্মৃতি শোকভার কখনো সে বয় না ।

আমি কেন নিশ্চল, যেতে নই উৎসুক,  
সীধা রই, শিরে বই ক্ষণিকের দুখ-সুখ ?  
পদে পদে গুরুভার  
বহিতে না পারি আর,  
জড়তায় বারেবার ভেঙে ভেঙে পড়ে বুক,  
নিশিদিন শিরে বই নিমেষের দুখ-সুখ ?

গেলে সুখ উন্মুখ স্মৃতি করে ক্রন্দন,  
ভালোবাসা বসে রয় দুরাশায় উন্মন ।  
যাহা লই যাহা পাই  
এই আছে এই নাই,  
ফাঁকি মোরে দেয় তাই, বিচ্ছেদে ভরে মন !  
গেলে সুখ উন্মুখ স্মৃতি করে ক্রন্দন !

চঞ্চল, আমি ভাই লই তোর সঙ্গ,  
বাক্যায় বয়ে যাই জলধি-তরঙ্গ ।  
ভরবারি থরশান  
হোক আজি মোর প্রাণ,  
জড়তার কারাগার করি' ছার ভঙ্গ  
যাহা কিছু অস্থির তারি লই সঙ্গ ॥

ଦ୍ଵିତୀୟ ପର୍ବ

୧୭୭୮-୧୭୭୯

ଶ୍ରୀବିକାଶଚନ୍ଦ୍ର ନନ୍ଦୀ

ଶ୍ରୀବିନୟେନ୍ଦ୍ରମୋହନ ଚୌଧୁରୀ

ଅନୁଷ୍ଠାନପ୍ରତିନିଧି





## বাংলা ছন্দের বিবর্তন

বাংলা ভাষার উচ্চারণপদ্ধতি ও বাংলা স্বরবর্ণের প্রকৃতির দ্বারাই বাংলা ছন্দ নিয়ন্ত্রিত হচ্ছে। বাংলা ভাষার উচ্চারণের একটা বিশেষ লক্ষণ এই যে, প্রত্যেক শব্দ বা শব্দসমষ্টির আদিস্বরের উপরে ঝাঁক বা অ্যাকসেন্ট পড়ে। ইংরেজি ভাষার অ্যাকসেন্ট-শব্দগত; প্রত্যেক শব্দের কোনো বিশেষ স্বর বা সিলেবল্-এর ওই অ্যাকসেন্ট-অপরিবর্তনীয়রূপে নির্দিষ্ট আছে। বাংলার অ্যাকসেন্ট-পদ্ধতি উচ্চারণগত, শব্দগত নয়; এবং ওই অ্যাকসেন্ট বা ঝাঁক সর্বদাই শব্দ বা শব্দসমষ্টির প্রথম স্বরটিকে আশ্রয় ক'রে আত্মপ্রকাশ করে। তাই সকলপ্রকার বাংলা ছন্দে উচ্চারণের ঝাঁক পর্বের আদিস্বরের উপরেই স্থাপিত হয়। ইংরেজির মতো মধ্যগুরু বা অন্ত্যগুরু পর্ব বাংলায় হয় না। ওই উচ্চারণের ঝাঁক থেকে ধ্বনির গতি শুরু হয় এবং যেখানে এই গতির অবসান হয় সেখানে যতি বা ধ্বনিবিরতি। এই ঝাঁক ও যতির মধ্যবর্তী যে অংশ তাকেই ‘ছন্দপর্ব’ বলেছি। এই ছন্দপর্বের গঠনপ্রণালীর উপরেই ছন্দের প্রকৃতি নির্ভর করে। বাংলায় এই ছন্দপর্ব তিনটি বিভিন্ন উপায়ে গঠিত হয় বলে বাংলা ছন্দকে তিনটি প্রধান শ্রেণীতে বিভক্ত করা যায়। যথা— অক্ষরবৃত্ত, মাত্রাবৃত্ত ও স্বরবৃত্ত।

স্বরবৃত্ত ছন্দের প্রত্যেকটি পর্ব ধ্বনি বা স্বরের অর্থাৎ সিলেবল্-এর সংখ্যার উপরে নির্ভর করে। ইংরেজি ছন্দও পর্বের অন্তর্গত ধ্বনি বা স্বরের সংখ্যার দ্বারা নিয়ন্ত্রিত হয়।

মাত্রাবৃত্ত ছন্দের পর্ব ধ্বনির মাত্রাসাম্যের দ্বারা নিয়ন্ত্রিত হয়। বাংলায় সংস্কৃতের ন্যায় দীর্ঘস্বর নেই বটে, কিন্তু বহু যুগ্মস্বর আছে। দুটি ভিন্নজাতীয় স্বরবর্ণ ঘনিষ্ঠভাবে মিলিত হয়ে যে মিশ্রস্বরের সৃষ্টি হয় তাকেই ‘যুগ্মস্বর’ বলে অভিহিত করেছি। এই যুগ্মস্বরের সাহায্যে বাংলা ছন্দে এমন ধ্বনিবৈচিত্র্য ও স্বরতরঙ্গ সৃষ্টি করা সম্ভব হয়েছে। মাত্রাবৃত্ত ছন্দে অযুগ্মস্বর লঘু বা একমাত্রক এবং যুগ্মস্বর গুরু বা দ্বিমাত্রক বলে গণিত হয়।

বাংলার বহুপ্রচলিত মামুলি ছন্দকে অক্ষরবৃত্ত নাম দিয়েছি—যেহেতু ওই ছন্দ দৃশ্যমান অক্ষরসংখ্যার উপরে নির্ভর করে। কিন্তু শুধু অক্ষরগণনার উপরে ভিত্তি করে কোনো ছন্দ রচিত হতে পারে না; কারণ ছন্দের মূলতত্ত্ব অক্ষর নয়, ধ্বনি। প্রকৃতপক্ষে বাংলার লিপিপদ্ধতিতে যদি যুক্তবর্ণের ব্যবস্থা না থাকত

তবে অক্ষরবৃত্ত ছন্দের উৎপত্তি হতে পারত না। পক্ষান্তরে যুগ্মস্বরগুলিকেও একাক্ষরের দ্বারা প্রকাশ করার ব্যবস্থা যদি বাংলায় থাকত তা হলেও অক্ষরবৃত্ত ছন্দের রূপ সম্পূর্ণ পরিবর্তিত হয়ে যেত।

কিন্তু অক্ষরগণনার ভিত্তির উপরে প্রতিষ্ঠিত হলেও অক্ষরবৃত্ত ছন্দের মূলে একটি ধ্বনিতত্ত্ব আছে; নতুবা এরকম ছন্দরচনা সম্ভব হত না। সেই তত্ত্বটি এই যে, অক্ষরবৃত্ত ছন্দের অন্তর্গত প্রত্যেকটি শব্দ শেষাংশে মাত্রাবৃত্তধর্মী ও অগ্রাংশে স্বরবৃত্তধর্মী। সুতরাং অক্ষরবৃত্ত আসলে মাত্রাবৃত্ত ও স্বরবৃত্তের মিশ্রণজাত একটি যৌগিক ছন্দ। এ ছন্দের গতি অত্যন্ত মন্থর ও নিস্তরঙ্গ, এর ধ্বনি একঘেয়ে, যতি অনিয়মিত এবং পর্ববিভাগ অস্পষ্ট। এরূপ হবার কারণ এই যে, বহু শতাব্দী যাবৎ কবিদের অজ্ঞাতসারে খাঁটি প্রাকৃত বাংলার স্বরবৃত্ত ধ্বনি, সংস্কৃত ছন্দের অনুকরণ এবং সংগীতের সুরের মিশ্রণে এই ছন্দের উৎপত্তি হয়েছে। বহু দিনের বহু অভ্যাসের স্তর উদ্ঘাটিত না করলে এই ছন্দের প্রকৃত স্বরূপ নির্ণয় করা সম্ভব নয়।

অক্ষরবৃত্ত ছন্দে বাংলা ভাষার যথার্থ রূপটি চাপা পড়ে গেছে। এই ছন্দে ধ্বনিবৈচিত্র্য ফুটিয়ে তোলা সম্ভব নয়, কারণ এ ছন্দ অত্যন্ত একঘেয়ে। অক্ষরবৃত্তের এই ত্রুটি সংশোধন করার জন্ম বহুকাল যাবৎ, বিশেষতঃ ভারতচন্দ্রের সময় থেকে বিশেষ চেষ্টা চলছে। তখনকার সকল কবিই সংস্কৃত ছন্দের আশ্রয় নিয়ে বাংলা ছন্দে বৈচিত্র্য সাধনের চেষ্টা করেছেন। কিন্তু সংস্কৃত ছন্দের ধ্বনি বাংলা ভাষার প্রকৃতিবিরুদ্ধ বলে তাঁদের সব চেষ্টা বিফল হয়েছে। অবশেষে যখন রবীন্দ্রনাথ বাংলা সাহিত্যে মাত্রাবৃত্ত ও স্বরবৃত্ত ছন্দের প্রবর্তন করলেন তখন থেকে বাংলা ছন্দে বহু বৈচিত্র্য ঘটিয়ে তোলা সম্ভব হয়েছে। রবীন্দ্রনাথের ‘মানসী’ কাব্যের ‘ভুলভাঙা’ কবিতাটি বাংলার সর্বপ্রথম মাত্রাবৃত্ত ছন্দের কবিতা। আর তাঁর ‘ছবি ও গান’ কাব্যে স্বরবৃত্ত ছন্দ প্রবর্তনের প্রথম প্রয়াস দেখা যায়; কিন্তু ‘ক্ষণিকা’র সময় থেকেই বাংলা সাহিত্যে স্বরবৃত্ত ছন্দের প্রকৃত শক্তি ও সৌন্দর্য ফুটে উঠেছে।\*

সাহিত্যপরিষৎ-পত্রিকা ১৩৩৮ ভাদ্র

\* ১৩৩৮ সালে বঙ্গীয় সাহিত্যপরিষদের দ্বিতীয় মাসিক অধিবেশনে ( ১৩ ভাদ্র, ৩০ আগষ্ট ১৯৩১ ) প্রদত্ত ভাষণের সারমর্ম— বক্তাকর্তৃক লিখিত।

## বাংলা ছন্দে ধ্বনিতরঙ্গ

বাংলা ছন্দের মূল প্রবাহ হচ্ছে তিনটি—অক্ষরবৃত্ত, মাত্রাবৃত্ত ও স্বরবৃত্ত। তার মধ্যে অক্ষরবৃত্তে অনেকটা আড়ষ্টতা আছে ; এর গতি স্বচ্ছন্দ নয়। এ ছন্দকে কেটে ছেঁটে, এর সঙ্গে সংযোগ-বিয়োগ করে এর বাইরের রূপে অনেকটা পরিবর্তন করা যায়। কিন্তু এর ভিতরের গঠনে বিশেষ বৈচিত্র্যসাধন করা যায় না।

মাত্রাবৃত্ত ও স্বরবৃত্ত ছন্দে সংযোগ-বিয়োগের দ্বারা বাহ্য আকৃতিতে যেমন অনেক পরিবর্তন সাধন করা যায় তেমনি একটু চেষ্টা করলেই এদের অন্তঃপ্রকৃতিতেও অনেক বৈচিত্র্য ঘটানো যায়। এদের গতিতে স্বচ্ছন্দতা ও প্রকৃতিতে লীলাবৈচিত্র্য আছে। এ স্থলে সে সম্বন্ধেই কিছু আলোচনা করা প্রয়োজন।

অন্ততঃ ভারতচন্দ্রের যুগ থেকেই বাংলার কবিরা অনুভব করে আসছেন যে বাংলা ছন্দ জিনিসটা বড়ই একঘেয়ে, ওকে কেটে ছেঁটে বাড়িয়ে কমিয়ে, ঘন ঘন মিল দিয়ে কিংবা খুব ঘটা করে অনুপ্রাসের অলংকার দিয়ে যে ভাবেই রচনা করা যাক না কেন কিছুতেই ওর একঘেয়ে ধ্বনিতে বৈচিত্র্য দেখা দেয় না। দিগক্ষরা, পয়ার, ত্রিপদী, চোপদী সকলেরই মূল ধ্বনিটা এক, বৈচিত্র্যহীন। বাংলা ছন্দের এই মৌলিক ক্রটির অবসান ঘটাবার অভিপ্রায়েই প্রায় দুশো বছর ১৭২ বাংলায় সংস্কৃতের ধ্বনিতরঙ্গ (rhythm) প্রবর্তনের অবিরাম চেষ্টা চলে আসছে। পরম ছন্দোবিৎ ভারতচন্দ্রই এ প্রচেষ্টার প্রথম প্রবর্তক। কিন্তু বহুকাল ধাবং বাঙালি কবিদের এই চেষ্টা সফল হয় নি। তার কারণ তাঁর ব্যবহৃত ছন্দটা ছিল অক্ষরবৃত্ত, ছন্দরচনার পদ্ধতিটা ছিল অক্ষরগোণা, আর ভাষাটা ছিল সাধুভাষা। আর সাধুভাষায় যে বাংলার যথার্থ প্রকৃতি, অর্থাৎ খাটি বাংলার শক্তি, লীলা ও মাধুর্য নেই তা আজকাল কারও অজানা নয়। কাজেই ওই সব কবিদের সব চেষ্টাই যে ব্যর্থ হয়েছে তাতে বিস্মিত হবার কিছু নেই।

বাংলায় সংস্কৃত ছন্দ অর্থাৎ সংস্কৃত ধ্বনিতরঙ্গ প্রবর্তনের ইতিহাস খুবই বিস্ময়কর। কিন্তু এ স্থলে আমরা সে আলোচনা করব না ; কারণ বাংলা ছন্দের ইতিহাস আলোচনা এ প্রসঙ্গের উদ্দেশ্য নয়। প্রাচীন বাংলা ছন্দের আলোচনা

করাও আমাদের অভিপ্রেত নয়। এ স্থলে আমরা শুধু আধুনিক অর্থাৎ রাবীন্দ্রিক যুগের ছন্দের বিষয়েই আলোচনা করব; বিশেষভাবে “মানসী”র ( ১২২৪-২৭ ) থেকে বর্তমান সময় পর্যন্ত বাংলা কাব্যসাহিত্যে যে ছন্দ প্রচলিত আছে শুধু তাই আমাদের আলোচ্য বিষয়।

যা হক, যে সময় থেকে রবীন্দ্রনাথ বাংলা কাব্যে মাত্রাবৃত্ত ও স্বরবৃত্ত ছন্দের প্রবর্তন করলেন সে সময় থেকেই বাংলা ছন্দের ধ্বনিতরঙ্গ ( rhythm ) উৎপন্ন করা সম্ভব হয়েছে। রবীন্দ্রনাথ নিজেও বাংলা ছন্দে ধ্বনিতরঙ্গ উৎপাদনের অনেক চেষ্টা করেছেন। যথা—

- (১)                      অন্ধকারে সূর্যালোকে  
                             সস্তুরিয়া মৃত্যুশ্রোতে  
                             নৃত্যময় চিত্ত হতে  
                                     মত্ত হাসি টুটে।  
                             বিশ্বমাঝে মহান্ যাহা  
                                     সঙ্গী পরানের  
                             ঝঙ্কারে ধায় সে প্রাণ  
                                     সিন্ধুমাঝে লুটে।

—হরন্তু আশা, মানসী, রবীন্দ্রনাথ

- (২)                      তখন তারা দৃষ্টবেগের বিজয়-রথে  
                             ছুটছিল বীর মস্ত অধীর, রক্তধুলির পথবিপথে।  
                             তখন তাদের চতুর্দিকেই রাত্রিবেলার প্রহর যত  
                                     স্বপ্নে চলার পথিক-মতো  
                             মন্দ-গমন ছন্দে লুটায় মন্দের কোন্ ক্রান্ত বায়ে;  
                             বিহঙ্গমান শান্ত তখন অন্ধরাতের পক্ষছায়ে।

—বিষয়া, পুরবী, রবীন্দ্রনাথ

উক্ত দৃষ্টান্ত দুটিতেই ধ্বনিতরঙ্গের লীলা খুব স্পষ্ট। রবীন্দ্রনাথের পূর্ববর্তী বাঙালি কবির শত শত বৎসর চেষ্টা করেও যা করতে পারেন নি, রবীন্দ্রনাথ অনায়াসেই তা পারলেন। কারণ আজ পর্যন্ত এ দেশে যত কবি আবির্ভূত হয়েছেন তার মধ্যে রবীন্দ্রনাথই হচ্ছেন একমাত্র ছন্দজ্ঞাত। তাঁর অনুলিপির্শে বাংলার ছন্দ-সরস্বতীর বীণার তারে যে কত বিচিত্র সুরতালের

ধ্বনিতরঙ্গের উৎপত্তি হয়েছে তার সংখ্যা নেই। লক্ষ করার বিষয়, উপরে যে ধ্বনিতরঙ্গের নিদর্শন দেওয়া হল তার কোনোটিই অক্ষরবৃত্ত ছন্দ নয়; প্রথমটি পঞ্চমাত্রিক মাত্রাবৃত্ত, দ্বিতীয়টি চতুঃস্বর স্বরবৃত্ত ছন্দ। রবীন্দ্রনাথই প্রথম দেখলেন যে সংখ্যা-গোণা অক্ষরবৃত্ত ছন্দ এবং সাধুভাষার মধ্যে ছন্দের বিদ্যুৎ-চমক সৃষ্টি করার ক্ষমতাটি মারা পড়েছে। তাই তিনি মাত্রাবৃত্ত ও স্বরবৃত্ত ছন্দ এবং ষাটি বা চলতি বাংলা ভাষার যোগে ঐ বিচিত্র ধ্বনিতরঙ্গ সৃষ্টি করতে পেরেছেন।

রবীন্দ্রনাথের পছন্দ অনুসরণ করেই সত্যেন্দ্রনাথ ছন্দ-জিজ্ঞাসার পথে আরও কতকটা অগ্রসর হয়েছেন। তিনিই অতি সূক্ষ্ম বিশ্লেষণের দ্বারা বাংলা ধ্বনিতরঙ্গের মূল কথাটি আবিষ্কার করেছেন, যার ফলে এখন বাংলায় নব নব ও বিচিত্র উপায়ে স্বরতরঙ্গের সৃষ্টি করা সম্ভবপর হয়েছে। কিন্তু মনে রাখা উচিত যে, সত্যেন্দ্রনাথ আসলে রবীন্দ্রনাথের আবিষ্কৃত ছন্দতত্ত্বের উপরই কারুকার্য করেছেন মাত্র, রবীন্দ্রিক ছন্দের এলাকা তিনি সম্পূর্ণ অতিক্রম করে যেতে পারেন নি। তথাপি তিনি বাংলার কাব্যসরস্বতীর বীণায় যে তারটি যোজনা করে গেছেন তার মূল্য কম নয়; তাঁর এ দান আমাদের সাহিত্যের ইতিহাসে চিরকাল অক্ষয় হয়ে বিরাজ করবে।

বাংলা ছন্দে কি রূপে স্বরতরঙ্গের সৃষ্টি করা যায় এখন আমরা তাই আলোচনা করব। বাংলায় দীর্ঘস্বর কার্যতঃ না থাকলেও বাংলার সমস্ত মূল ধ্বনিগুলিকে ছন্দের তরফ থেকে তিন ভাগে বিভক্ত করা যায়—(১) লঘুস্বর এবং লঘুস্বরাস্ত্র ব্যঞ্জন, যথা—অ, আ, ই, ঈ, ক, কা, কি, কী, ইত্যাদি। এগুলি সবই অযুগ্ম ব'লে, এদের অযুগ্ম স্বরও বলা যায়। (২) যুগ্মস্বর বা যুগ্মস্বরাস্ত্র ব্যঞ্জন, যথা—অই, (ঈ), অউ, (ঔ), আই, উই, এউ, থৈ, বৌ, ভাই, দুই, ঢেউ ইত্যাদি। এ যুগ্মস্বরগুলি সবই স্বরাস্ত্রিক। (৩) ব্যঞ্জনাস্ত্রিক যুগ্মধ্বনি, যথা—অন্, ইন্, অর, উর, উথ্, মন্, দিন্, ঘর, দূর, স্থ্ ইত্যাদি। প্রথম শ্রেণীর অযুগ্ম ধ্বনিগুলি লঘু অর্থাৎ একমাত্রিক, দ্বিতীয় এবং তৃতীয় শ্রেণীর যুগ্মধ্বনিগুলি গুরু অতএব দ্বিমাত্রিক।

বাংলায় দীর্ঘস্বর না থাকলেও এই একমাত্রিক ও দ্বিমাত্রিক ধ্বনিগুলির পর্যায়বিভাগের দ্বারা বাংলা ভাষায় যে বহু রকমের স্বরতরঙ্গ উৎপন্ন করা সম্ভবপর তা সহজেই অনুমান করা যায়। বাংলায় স্বরতরঙ্গ সৃষ্টির মোটামুটি তিনটি উপায় আছে বলা যেতে পারে। প্রথম উপায় হচ্ছে প্রচলিত মাত্রাবৃত্ত ছন্দে স্বরের সংখ্যা যথাসম্ভব কমিয়ে দেওয়া; তাতেই নির্দিষ্ট মাত্রা স্থির রাখার জন্তে যুগ্ম বা

ষিমাঙ্গিক ধ্বনির প্রয়োগ বেশি হয়, ফলে ছন্দ তরঙ্গিত হয়ে ওঠে। উপরের প্রথম দৃষ্টান্তটিতেই এই উপায় প্রযুক্ত হয়েছে। আরও দৃষ্টান্ত দিচ্ছি—

- (১) কলস-ঘায়ে উর্মি টুটে  
রশ্মিরাশি চূর্ণি উঠে,  
প্রাস্ত বায়ু প্রাস্তনীর  
চূষি যায় কভু।

—অপেক্ষা, মানসী, রবীন্দ্রনাথ

এটা পঞ্চমাত্রিক ছন্দ। কিন্তু এর কোনো পর্বেই পাঁচটি স্বর নেই; চার কিংবা তিন স্বরের সাহায্যেই পাঁচ মাত্রার পরিমাণ রক্ষা করতে হয়েছে। তাই যুগ্ম ধ্বনির ঘায়ে ছন্দের স্থির জলে উর্মি জেগে উঠেছে। আরেকটা দৃষ্টান্ত—

- (২) এ নহে মুখর বন-মর্মর গুঞ্জিত,  
এ যে অজাগর-গরজে সাগর ফুলিছে;  
এ নহে কুঞ্জ কুন্দ-কুম্ম-রঞ্জিত,  
ফেন-হিল্লোল কল-কল্লোলে হুলিছে।

—হুঃসময়, কল্পনা, রবীন্দ্রনাথ

এটা ষষ্ঠ্যাত্রিক ছন্দ, অথচ কোনো পর্বেই ছয়টি লঘুমাত্রা নেই। তাই যুগ্মধ্বনির সংখ্যাও বেড়ে, ছন্দও হিল্লোলিত হয়ে উঠেছে। যুগ্মধ্বনির সংখ্যাবৃদ্ধি না হলে অল্পপ্রাসের প্রাচুর্যও এ ছন্দে কিছুতেই তরঙ্গ দেখা দিত না।

ছন্দতরঙ্গ উৎপাদনের দ্বিতীয় উপায় হচ্ছে প্রচলিত স্বরবৃত্ত ছন্দে মাত্রা-পরিমাণ বাড়িয়ে দেওয়া। তাতেও যুগ্মধ্বনির সংখ্যা বেশি হয় এবং ছন্দ লাগলীলায় ঢুলতে শুরু করে। পূর্ববীর “বিজয়ী” কবিতাটি ছন্দতরঙ্গের এই প্রণালীর একটি উৎকৃষ্ট দৃষ্টান্ত। এখানে আরেকটি উদাহরণ দিচ্ছি—

- (৩) বেণুশাখার অন্তরালের অন্তপারের রবি  
ঐক্বে মেঘে মুহুর্বে আবার শেষ বিদায়ের ছবি।

\* \* \*

স্কিল্লি ঘেমন শালের বনে নিদ্রানীরব রাতে  
অন্ধকারের জপের মালায় একটানা সুর গাঁথে।

—আনন্দনা, পূর্ববীর, রবীন্দ্রনাথ

এটা চতুঃস্বর ছন্দ। অথচ প্রতিপর্বেই চারের বেশি মাত্রা আছে; এ ভাবে

যুগ্মধ্বনির পরিমাণ বেশি হওয়াতে ছন্দকে বাধ্য হয়ে তরঙ্গায়িত হতে হয়েছে।

এ দুটি পন্থাই হচ্ছে রবীন্দ্রনাথের আবিষ্কৃত। এই দুটি উপায়েই তিনি ছন্দে অসংখ্য রকমের তরঙ্গভঙ্গি দেখিয়েছেন। তৃতীয় উপায়টি সত্যেন্দ্রনাথের অবলম্বিত। এ উপায়টি হচ্ছে লঘু এবং গুরু, যুগ্ম এবং অযুগ্মধ্বনিকে কোনো নির্দিষ্ট পর্যায়ক্রমে ছন্দের সর্বত্র বিগ্ৰস্ত করা। কোনো হ্রস্বনির্দিষ্ট প্রণালীতে ধ্বনিমাত্রার এরূপ পর্যায়বিভাগ করতে হলে বাংলা ছন্দের অন্তর-প্রকৃতির সঙ্গে ঘনিষ্ঠ পরিচয় থাকা চাই।

বাংলা ছন্দের অন্তরের গঠনপ্রণালী সম্বন্ধে এ স্থলে সংক্ষেপে কয়েকটি কথা বলা প্রয়োজন; নতুবা কি রূপে বাংলা ছন্দের ধ্বনিতে উত্থানপতনের তরঙ্গলীলা দেখা দেয় তা বোঝা যাবে না। এ তরঙ্গলীলা নির্ভর করে প্রধানত তিনটি তত্ত্বের উপর—(১) বাংলা ছন্দপর্বের দৈর্ঘ্য অর্থাৎ তার ধ্বনিসংখ্যা ও মাত্রাপরিমাণ; (২) বাংলা ছন্দের উচ্চারণপদ্ধতি, ধ্বনির গতিক্রম ও বিরতি, ছন্দের ঝাঁক বা অ্যাকসেন্ট এবং যতি; (৩) লঘু ও গুরুমাত্রিক ধ্বনির পর্যায়-সন্নিবেশ। এই তিনটি তত্ত্বের মধ্যে প্রথম দুটি পরস্পরের সঙ্গে খুব ঘনিষ্ঠভাবে সম্বন্ধ; প্রকৃতপক্ষে এরা দুটি পৃথক্ তত্ত্ব নয়, একই তত্ত্বের দুটি দিক মাত্র।

বাংলার উচ্চারণপদ্ধতির প্রতি লক্ষ করলে দেখা যায়, আমরা এক ঝাঁকেই অনেকগুলি কথা উচ্চারণ করে ফেলি; তারপর ওই ঝাঁকের মূখে ধ্বনির যে গতি শুরু হয় সে গতির অবসান হলেই আরেক ঝাঁকে আরেকটা গতি সৃষ্টি হয়। এভাবে একেকটি ঝাঁকের দ্বারাই আমাদের উচ্চারণপদ্ধতি অর্থাৎ উচ্চারিত ধ্বনির গতি ও বিরতি নিয়ন্ত্রিত হয়। গতির যেখানে আরম্ভ সেইখানে পড়ে ঝাঁক, আর যেখানে সেই গতির অবসান ঘটে সেখানটাকেই বলি যতি। আবার ধ্বনির এই গতি ও বিরতি অর্থাৎ ছন্দের এই ঝাঁক ও যতির দ্বারাই ছন্দপর্বের দৈর্ঘ্য নির্দিষ্ট হয়। প্রতিপর্বের স্বরসংখ্যা বা ধ্বনিমাত্রার ওজনের দ্বারাই ওই পর্বের দৈর্ঘ্য পরিমিত হয়। দৃষ্টান্ত দিচ্ছি—

সখি    প্রতিদিন হায় | 'এসে ফিরে যায় | 'কে !

ভারে    আমার মাথার | 'একটি কুসুম | 'দে ।

যদি শুধায় কে দিল | কোন ফুল-কান | -নে

তোর 'শপথ, আমার | 'নামটি বলিস | 'নে ।

—সকলগা, কল্পনা, রবীন্দ্রনাথ

এই পংক্তিগুলি পড়লেই বোঝা যাবে যে প্রতি পংক্তিতে তিনটি করে ঝাঁক আছে। ঝাঁকগুলিকে রেফ-চিহ্নের দ্বারা নির্দেশ করা হয়েছে। একেক ঝাঁকেই কয়েকটি কথা একসঙ্গে সমান গতিতে উচ্চারিত হয়ে যাচ্ছে। তারপর যেখানে ওই গতি শেষ হয়েছে সেখানেই যতি ; ছেদ-চিহ্ন দ্বারা যতি-নির্দেশ করা হল। ঝাঁক ও যতির মধ্যবর্তী যে অংশ তাকেই বলছি ছন্দ-পর্ব। উদ্ধৃত দৃষ্টান্তের প্রত্যেক পংক্তিতে তিনটি করে পর্ব আছে। তাই এ ছন্দকে বলব ত্রিপর্বিক। কিন্তু এ হল এ ছন্দের বাহ্য আকৃতির কথা। এর অন্তঃপ্রকৃতি নির্ভর করছে, একেকটি পর্বের গঠনপ্রণালীর উপর। দেখতে পাচ্ছি এই দৃষ্টান্তের পর্বগুলিতে ধ্বনিসংখ্যার স্থিরতা নেই ; কোথাও চার কোথাও পাঁচ। আসলে এ ছন্দ ধ্বনি বা স্বরের সংখ্যার ভিত্তির উপর রচিত নয় ; তাই এ ছন্দের তত্ত্ব হচ্ছে ধ্বনিমাত্রার সাম্য। এখানে প্রতিপর্বে ছ'টি করে ধ্বনিমাত্রা আছে ; তাই এ ছন্দকে বলব ষষ্ঠাত্মিক ছন্দ ; এইটেই হল এ ছন্দের অন্তর-প্রকৃতির পরিচয়। এখানে প্রথম দুপর্বে ছ'টি করেই মাত্রা আছে বটে, তৃতীয় পর্বে মাত্রা শুধু একটি। কিন্তু একটি মাত্রা হলেও কেহেতু এর উপর ঝাঁক রয়েছে সেজন্য একেও একটি স্বতন্ত্র পর্ব বলে গণ্য করব। অবশ্য এ পর্বে ছ'টির স্থানে একটি মাত্রা হওয়াতে একে অপূর্ণ পর্ব বলা প্রয়োজন। প্রয়োজনমতে এ পর্বেও মাত্রাসংখ্যা বাড়িয়ে একে পূর্ণপর্বে পরিণত করা যায়। যা হক, বর্তমান ছন্দটিকে ষষ্ঠাত্মিক অপূর্ণ ত্রিপর্বিক বললেই এর পূর্ণ পরিচয় দেওয়া হয়।

লক্ষ করার বিষয়, এখানে প্রত্যেক পংক্তিতেই প্রথম পর্বের পূর্বে দুটি করে মাত্রা স্থাপিত হয়েছে। এ দুটি মাত্রার উপর কোনো ঝাঁক বা অ্যাকসেন্ট নেই ; অতি মৃদু ভাবে এদের উচ্চারণ করতে হয়। যে মাত্রাসমষ্টি একটি ঝাঁকের দ্বারা নিয়ন্ত্রিত হয় তাকেই পর্ব বলেছি। অথচ এ দুটি মাত্রা কোনো ঝাঁকের এলাকায় আসছে না ; আর ও দুটি মাত্রাকে সম্পূর্ণ বাদ দিয়ে পড়লেও এ ছন্দের কোনো ব্যাঘাত ঘটে না। তাই এ দুটি মাত্রাকে বলব অতি-পর্বিক মাত্রা। কিন্তু এই অতি-পর্বিক মাত্রাকে মূল ছন্দের সম্পূর্ণ বহির্ভূত মনে করলে ভুল করা হবে ;



কারণ এ ছুটি সম্পূর্ণ বাদ দিয়ে ছন্দপাঠে কোনো বিঘ্ন না হলেও আসল কবিতার অর্থসংগতি রক্ষিত হবে না। আসলে অতি-পর্বিক মাত্রা মূল ছন্দের অঙ্গীভূত না হলেও তার অঙ্গশোভন অলংকার তো বটে। মাত্রাবৃত্তের গায় স্বরবৃত্ত ছন্দেও অতি-পর্বিক শব্দ যোজনায় ব্যবস্থা করা যায়। স্বরবৃত্ত ছন্দের অতি-পর্বিক শব্দকে মাত্রা না বলে অতি-পর্বিক স্বর বলাই সংগত; কেননা ওই ছন্দে স্বরসংখ্যাই বুচনার ভিত্তি, ধ্বনিমাত্রা নয়। অতি-পর্বিক মাত্রা কিংবা স্বর কোনো ছন্দেই ছুটির বেশি ব্যবহার না করাই রীতি। অক্ষরবৃত্ত ছন্দে অতি-পর্বিক শব্দ যোজনায় ব্যবস্থা নেই। রবীন্দ্রনাথই অতি-পর্বিক মাত্রা ও স্বর ব্যবহারের প্রবর্তন করেছেন। দৃষ্টান্ত দিচ্ছি।—

দূরে অশথ-তলায়  
পুঁতির কঙ্কিথানি গলায়  
বাউল দাঁড়িয়ে কেন আছে?  
সামনে আঙিনাতে  
তোমার একতারাটি হাতে  
তুমি স্বর লাগিয়ে নাচো।

—বাউল, শিশু স্কোলানাথ, রবীন্দ্রনাথ

এটি স্বরবৃত্ত ছন্দ। এর দ্বিতীয় ও তৃতীয় পদের পূর্বে ছুটি করে অতি-পর্বিক স্বর যোজনা করা হয়েছে। প্রথম পদের পূর্বেও ওরকম ছুটি স্বর অনায়াসেই বসানো যেতে পারত। এবার মাত্রাবৃত্ত ছন্দে অতি-পর্বিক মাত্রার দৃষ্টান্ত দিচ্ছি।—

অত চুঁপি চুপি কেন | কথা কও  
ওগো মরণ, হে মোর | মরণ!  
অতি ধীরে এসে কেন | চেয়ে রও,  
ওগো এ কি প্রণয়েরি | ধরণ?

—সরণ, উৎসর্গ, রবীন্দ্রনাথ

এটি ষষ্ঠ্যাত্মিক অপূর্ণ দ্বিপর্বিক ছন্দ। প্রথম ও দ্বিতীয় পংক্তির শেষ পর্বে চার মাত্রা; দ্বিতীয় ও চতুর্থ পংক্তির শেষ পর্বে তিন মাত্রা। প্রতি পংক্তির পূর্বেই ছুটি করে অতি-পর্বিক মাত্রা স্থাপিত হয়েছে।

### ঝোঁক ও যতি স্থাপনে বৈচিত্র্য

আমরা দেখেছি পর্বসংখ্যার দ্বারা ছন্দের বাইরের আকৃতি মাত্র নিয়মিত হয়। কিন্তু ছন্দের অন্তরের গঠন নির্ভর করে ওই পর্বের নির্মাণপ্রণালীর উপর।—  
(:) ঝোঁক এবং যতি,—এই দু'জিনিসের দ্বারা প্রত্যেক পর্বের অন্তর্গত ধ্বনির আয়তন নিয়ন্ত্রিত হয়। যদি ঝোঁক ও যতি ঘন ঘন স্থাপিত হয় তবে পর্বের আয়তন বৃদ্ধি ও ধ্বনির গতি দ্রুত হয়; আর ঝোঁক ও যতি যদি ঘন ঘন স্থাপিত না হয় তবে পর্বের আয়তন দীর্ঘ এবং ধ্বনির গতি বিলম্বিত হয়। এই ঝোঁক ও যতি স্থাপনকেই অণু কথায় তাল বলা হয় এবং ধ্বনির গতিক্রমকেই লয় বলা হয়। ঘন ঘন তালে লয় দ্রুত এবং বিরল তালে লয় বিলম্বিত হয়। (২) দ্বিতীয়তঃ, পর্বের নির্মাণপ্রণালী ধ্বনিবিভাগের প্রকারভেদের দ্বারাও নিয়ন্ত্রিত হয়। যদি শুধু ধ্বনি বা স্বরের সংখ্যার উপর নির্ভর করে ছন্দ রচিত হয় তবে সে ছন্দকে বলব স্বরবৃত্ত; যদি শুধু ধ্বনির মাত্রাপরিমাণের উপর ছন্দকে দাঁড় করানো যায় তবে সে ছন্দ মাত্রাবৃত্ত। যদি একাধারে ধ্বনিসংখ্যা ও ধ্বনিমাত্রা স্থির রাখা হয় তবে তার নাম দেওয়া যায় স্বর-মাত্রিক ছন্দ। আর যদি বিশেষ উপায়ে স্বরসংখ্যা ও ধ্বনি-মাত্রার মিশ্রণ করে তথাকথিত 'অক্ষর' সংখ্যা ঠিক রেখে ছন্দ রচিত হয় তবে তাকে অক্ষরবৃত্ত সংজ্ঞা দেওয়া যায়। এ স্থলে ঝোঁক ও যতি-স্থাপনের বৈচিত্র্যের দ্বারা ছন্দের আভ্যন্তরীণ প্রকৃতি কি ভাবে নিয়ন্ত্রিত হয় তাই দেখাব।

অত চুপি চুপি কেন | কথা কও

অতি ধীরে এসে কেন | চেয়ে রও

এখানে উভয় পংক্তিতেই দুটি অতি-পর্বিক মাত্রা আছে। তার পরেই উচ্চারণের ঝোঁক পড়েছে 'চুপি' এবং 'ধীরে', এ দুটি শব্দের উপর। এখানেই ধ্বনির যাত্রা শুরু হল এবং ছয়টি মাত্রা অতিক্রম করে উভয়টাই 'কেন' শব্দের পরে সে গতি থেমেছে; এইখানেই যতি। তার পরেই আবার ঝোঁক এবং গতি; চারমাত্রার পরই গতির অবসান অর্থাৎ ধ্বনি-বিরতি বা বিশ্রাম। স্তব্ধতা এটা ছয় এবং চার মাত্রার অপূর্ণ ত্রিপর্বিক ছন্দ। ঝোঁক এবং যতির পরিবর্তনের দ্বারা এ দুটি পংক্তিতে কত পরিবর্তন আনা যায় এবার তাই দেখা যাক।—

অত চুপি চুপি কেন | কথা কও  
এটা ষষ্ঠ্যাত্মিক অপূর্ণ ত্রিপরিক ছন্দ ।

অত চুপি চুপি | কেন কথা | কও  
এবার তিনটি ঝাঁক ও তিনটি যতি ; চার মাত্রার পরেই ধ্বনিতরঙ্গ অবসান ।  
এ ছন্দ আর ষষ্ঠ্যাত্মিক রইল না । এটা হল চতুর্মাট্মিক অপূর্ণ ত্রিপরিক ছন্দ ।

অত চুপি চুপি | কেন কথা কও  
আবার ছন্দ বদলে গেল । এটা ষষ্ঠ্যাত্মিক পূর্ণ ত্রিপরিক ছন্দ ।

ঐ আসে ঐ অতি ভৈরব হরষে  
এটা কি ছন্দ ? শুধু দেখে বলার জো নেই । যে ভাবে উচ্চারণ করা হবে  
অর্থাৎ যেভাবে ঝাঁক ও যতি স্থাপন করা হবে তার উপরই ছন্দ সম্পূর্ণ নির্ভর  
করছে ।

ঐ আসে ঐ | অতি ভৈরব | হরবে  
যদি এ ভাবে পড়া হয় তবে এ ছন্দ হবে ষষ্ঠ্যাত্মিক অপূর্ণ ত্রিপরিক । কিন্তু যদি  
ঝাঁক ও যতি আরও ঘন ঘন স্থাপন করা যায়—

ঐ আসে | ঐ অতি | ভৈরব | হরষে  
যদি এ ভাবে ঝাঁক ও যতি দিয়ে উচ্চারণ করা যায় তবে শুনতে যারেক রকম  
লাগে । ছন্দের প্রকৃতি বদলে গেল ; ষষ্ঠ্যাত্মিকের বদলে এ ছন্দ এখন হল  
চতুর্মাট্মিক অপূর্ণ চৌপরিক । একটা পর্বই বেড়ে গেছে এখানে ।

ভুবন মিলায় | মোর অঞ্চল | খানিতে,  
বিশ্ব নীরব | মোর কণ্ঠের | বাণীতে ।

—প্রথম-প্রথম, কল্পনা, রবীন্দ্রনাথ

এভাবে পড়লে একে ষষ্ঠ্যাত্মিক অপূর্ণ ত্রিপরিক ছন্দ বলব । কিন্তু একে  
চতুর্মাট্মিক ছন্দের ভঙ্গিতেও পড়া যায় । যথা—

ভুবন মি- | লায় মোর | অঞ্চল | খানিতে  
বিশ্ব নী- | রব মোর | কণ্ঠের | বাণীতে ।

এটা চতুর্মাত্রিক ছন্দ এবং এখানে তিন পর্বের স্থানে চার পর্ব রয়েছে।

অনেক সময় একেকটা সমগ্র কবিতাকেও দু'রকম ছন্দে পড়া যায়।  
রবীন্দ্রনাথের “নটরাজ্য”-এর “মনের মাহুঘ” কবিতাটি এর একটি সুন্দর নিদর্শন।  
একটু নমুনা দেখাচ্ছি।—

আজ এক | হয়ে তারা  
মোরে করে | মাতোয়ারা,  
এক বীণা- | রূপ ধরি’

এক গানে | ফেলে ছায়া।

এ ভঙ্গিতে পড়লে এ হল চতুর্মাত্রিক ছন্দ ; দ্বিপর্বিক পূর্ণ চৌপদী। প্রতি পদে দুটি করে পুরো পর্ব আছে। আবার একে ষষ্ঠ্যত্রিক ছন্দেও পড়া যায়।—

আজ এক হয়ে | তারা  
মোরে করে মাতো- | য়ারা,  
এক বীণা-রূপ | ধরি’

এক গানে ফেলে | ছায়া।

এভাবে পড়লে এর ধ্বনি সম্পূর্ণ বদলে যায়, এখানে প্রতি পদে দুটি করে পর্ব আছে ; কিন্তু একটি পর্ব পূর্ণ (ছ’ মাত্রা) আরেকটি অপূর্ণ (দু’মাত্রা)। সুতরাং একে ছ’মাত্রার অপূর্ণ দ্বি-পর্বিক চৌপদী ছন্দ বলা যায়।

গীতাঞ্জলির “জীবনে যা চিরদিন” প্রভৃতি রচনাটিও আগাগোড়া দুই ছন্দে পড়া যায়। একটু নমুনা দিচ্ছি।—

জীবনের শেষ | দানে  
জীবনের শেষ | গানে,  
হে দেবতা, তাই | আজি  
দিব তব সকা- | শে,

প্রভাতের আলো- | কে যা

ফোটে নাই প্রকা | শে।

এ হচ্ছে ছ’মাত্রার ভঙ্গি। চার মাত্রার ভঙ্গিতে পড়তে গেলেই এর ঝাঁক ও স্বতি স্থাপনের কায়দা বদলে যাবে। যথা—

জীবনের | শেষ দানে  
জীবনের | শেষ গানে

হে দেবতা, | তাই আজি  
 দিব তব | সকাশে,  
 প্রভাতের | আলোকে বা  
 ফোটে নাই | প্রকাশে ।

আশা করি এখন এ কথা স্পষ্ট হয়েছে যে ঝাঁক এবং যতির দ্বারা ছন্দের স্রুতি-প্রকৃতি অনেকখানি নিয়ন্ত্রিত হয়। এ স্থলে এটি লক্ষ করার বিষয় যে ঝাঁক এবং যতির দ্বারাও ছন্দে এক প্রকার তরঙ্গের সৃষ্টি হয়। এ তরঙ্গকে বলতে পারি পর্বিক তরঙ্গ, কারণ সমগ্র পর্বটিকে আশ্রয় করেই এ তরঙ্গের উদ্ভব হয়। ঝাঁক ও যতি যত ঘনসন্নিবিষ্ট হবে ছন্দের পর্ব তরঙ্গও ততই লীলায়িত হয়ে উঠবে; আর ঝাঁক ও যতির সন্নিবেশ যত দূরবর্তী হবে পর্বতরঙ্গ ততই দীর্ঘায়ত ও তার লীলা মৃদুতর হবে। দৃষ্টান্তের সাহায্যে একথাটা স্পষ্টতর হবে। যথা—

মৌন | নৃত্যে | মগ্ন | খঞ্জন,  
 মেঘ-স- | মুদ্রে | চলছে | মধুন !  
 দগ্ধ | দৃষ্টি | বিশ্ব- | সৃষ্টির  
 মুগ্ধ | নেত্রে | স্নিগ্ধ | অঙ্গন ।

—ছন্দ-হিলোল, বেলাশেষের গান, সত্যেন্দ্রনাথ

এখানে ঝাঁক ও যতি খুব অল্প-ব্যবহিত এবং পর্বগুলি খুব ছোট ছোট। কাজেই ছন্দের তরঙ্গলীলা খুব দ্রুত ও স্পষ্ট। এবার একটা দীর্ঘপর্বিক ছন্দতরঙ্গের দৃষ্টান্ত দিচ্ছি।—

দেখো নাকি, হায়, | বেলা চলে যায়, | সারা হয়ে এল | দিন ।  
 বাজে প্রবীর | ছন্দে রবির | শেষ রাগিণীর | বীণ ।

—গীলাসঙ্গিনী, পুরবী, রবীন্দ্রনাথ

এটা হল ষষ্ঠ্যাত্মিক পর্বের ছন্দ, অর্থাৎ সূদীর্ঘ ছয়মাত্রার পর একবার করে ঝাঁক আসছে। একেকটা পর্ব অত্যন্ত দীর্ঘ বলে তার তরঙ্গও খুব আয়ত। তাই তরঙ্গের লীলাও খুব মধুর, এমন কি সতর্ক না থাকলে এর অস্তিত্বই ধরা পড়ে না। কিন্তু স্বরসংখ্যা সংক্ষিপ্ত অর্থাৎ দ্বিমাত্রিক যুগ্মধ্বনির সংখ্যা বর্ধিত করে কেমন করে ষষ্ঠ্যাত্মিক পর্বেও ডেউ তোলা যায় তা আমরা পূর্বেই দেখেছি। উক্তত

দৃষ্টান্তটির সঙ্গে নিম্নলিখিত পংক্তিগুলির তুলনা করলেই এ কথার তাৎপর্য বোঝা যাবে।—

পৌষ প্রথর | শীতে জর্জর, | ঝিল্লী-গুথর | রাতি ;  
নিজিত পুরী, | নির্জন ঘর, | নির্বাণ দীপ- | বাতি ।

—সিন্ধুপারে, চিত্রা, রবীন্দ্রনাথ

চতুর্মাত্রিক ছন্দের পর্বগুলি ছোট ছোট বলে তার তরঙ্গলীলাও ঘনবিস্তৃত।  
যথা—

এস তৃষ্ণ- | গাঁর দেশে | এস কল | হান্তে—  
গিরি-দরী- | বিহারিণী | হরিণীর | লাঞ্চে,  
ধূসরের | উষরের | কর তুমি | অস্ত,  
শ্রামলিয়া | ও-পরশে | করগো শ্রী- | মস্ত ।

—ঋগ্‌, বিদায়-আরতি, সত্যেন্দ্রনাথ

চার তিন এবং দুই স্বরের স্বরবৃত্ত ছন্দের পর্বগুলিও ছোট বলে স্বরবৃত্ত  
ছন্দের পর্বতরঙ্গও খুব খরগতি। যথা—

(১) দুঃখ সহার | তপস্রাতেই | হোক বাঙালীর | জয়,  
ভয়কে যারা | মানে তারাই | জাগিয়ে রাখে | ভয় ।  
মৃত্যুকে যে | এড়িয়ে চলে | মৃত্যু তারেই | টানে,  
মৃত্যু যারা | বুক পেতে লয় | বাঁচতে তারাই | জানে !

—চিঠি, পূরবী, রবীন্দ্রনাথ

এটা চতুঃস্বরপর্বিক ছন্দ। এবার ত্রিস্বরপর্বিকের দৃষ্টান্ত দিচ্ছি।—

(২) ওর তরে | মন্বরে | নদ হেথা | চলছে,  
জলপিপি | গুর মূহু | বোল্‌ বুঝি | বোল্‌ছে ।  
দুই তীরে | গ্রামগুলি | গুর জয়ই | গাইছে,  
গঞ্জে যে | নোকো সে | গুর মুখই | চাইছে ।

—দূরের পান্না, বিদায়-আরতি, সত্যেন্দ্রনাথ

এখানে প্রতি পর্বে তিনটি করে স্বর। তাই এর পর্বতরঙ্গ চতুঃস্বরের  
পর্বতরঙ্গের চেয়ে বেশি লীলায়িত। দুই স্বরের পর্বতরঙ্গ আরও বেগবান।  
যথা—

- (৩) 'চূপ্ চূপ্ | —ওঁই ডুব | জায় পান্ | কোঁটি,  
জায় ডুব | টুপ্ টুপ্-| ঘোমটার বউটি ।  
ঝকঝক্ | কলসীর | বক্ বক্ | শোন্ গো,  
ঘোমটায় | ফাঁক বয় | মন উন্- | মন গো ।

—দুরের পান্না, বিদায়-আরতি, সত্যেন্দ্রনাথ

অক্ষরবৃত্ত ছন্দের পর্বতরঙ্গ অত্যন্ত টিমে তেতালা গোছের, প্রায় নেই বললেই হয়। কারণ এর পদগুলি অত্যন্ত আড়ষ্ট; পর্ববিভাগগুলি অস্পষ্ট; যতিও খুব নিয়মিত নয়; এর ঝোঁকগুলিও তীব্র নয়। বাস্তবিকপক্ষে এ ছন্দ প্রায়ই যুগ্মপর্বের তালে চলে। একটা দৃষ্টান্ত দিচ্ছি।—

দেবতার স্তবগীতে | দেবেরে মানব করি' আনে,

তুলিব দেবতা করি' | মানুষেরে মোর ছন্দে গানে ।

—ভাষা ও ছন্দ, কাহিনী, রবীন্দ্রনাথ

এটা আট ও দশ অক্ষরের দ্বিপদী ছন্দ। এখানে এক ঝোঁকে আট ও দশ অক্ষরের একেকটা বড় বড় পদ অতিক্রম করতে হয় বলে এ ছন্দের পর্বিক তরঙ্গ এমন নিস্তেজ।

আমরা দেখলুম যে অক্ষরবৃত্তে পর্বতরঙ্গ প্রায় নেই; কিন্তু মাত্রাবৃত্ত ও স্বরবৃত্ত ছন্দে পর্বতরঙ্গ আছে এবং তার বৈচিত্র্যও আছে। মাত্রাবৃত্তে পর্বতরঙ্গ হতে পারে তিন রকম—চতুর্মাত্রিক, পঞ্চমাত্রিক এবং ষষ্ঠমাত্রিক; স্বরবৃত্তের পর্বতরঙ্গও তিন রকম—দ্বিস্বরপর্বিক, ত্রিস্বরপর্বিক ও চতুঃস্বরপর্বিক। কিন্তু এক বিষয়ে এই সব রকম তরঙ্গই সমধর্মী; কারণ এই সব তরঙ্গেই উচ্চারণের ঝোঁকটা থাকে গোড়ার দিকে। এইটে বাংলা ভাষারই একটা বিশেষ লক্ষণ। বাংলায় যখন আমরা কথা বলি তখনও আমরা প্রথমেই একটা ঝোঁক বা অ্যাক্সেন্ট দিয়ে কথা আরম্ভ করি এবং এক ঝোঁকেই এক সঙ্গে কয়েকটা কথা বলে ফেলি; তারপর আরেক ঝোঁকে আরও কতকগুলি কথা বলি; এইটেই বাংলার উচ্চারণ-পদ্ধতি। আমাদের কথিত এবং পঠিত বাংলার উচ্চারণের প্রতি লক্ষ করলেই এ কথার সত্যতা উপলব্ধি হবে। কথা বলার সময় আমরা যে ঝোঁক দেই সেটা অবশ্য অনিয়মিত অর্থাৎ কয়টা শব্দের পর আবার ঝোঁক হবে তার কিছু নিয়ম নেই; ভাব-প্রকাশের প্রয়োজন অনুসারেই ঘন বা বিরল ভাবে

ঝাঁক পড়ে। কিন্তু আমাদের নিত্যকথিত বাংলার উচ্চারণের প্রতি লক্ষ্য করলে দেখা যাবে যে সচরাচর দুটি ঝাঁকের মধ্যে চার পাঁচটির বেশি স্বরধ্বনি অথবা ছ'-সাতটির বেশি ধ্বনিমাত্রা থাকে না। একটা দৃষ্টান্ত দেখাচ্ছি।—

“কৌলরিজ ব'লে গেচেন,—সমুদ্রে জল সর্বত্রই, কিন্তু এক ফোঁটা জল নেই  
যে পান করি। সময়ের সমুদ্রে আছি, কিন্তু এক মুহূর্ত সময় নেই।”

—যাত্রী (পৃ ৩১১), রবীন্দ্রনাথ

এখানে রেফ-চিহ্নিত শব্দগুলির আদিতে ঝাঁক পড়েছে। আমাদের লক্ষ্য করার বিষয় এই যে এক ঝাঁকে চার-পাঁচটাব বেশি স্বরধ্বনি উচ্চারিত হচ্ছে না, কোনো কোনো জায়গায় এক ঝাঁকে তিনটি এবং এক জায়গায় দুটি স্বরধ্বনি উচ্চারিত হচ্ছে। মাত্রা হিসেবে দুটি ঝাঁকের মধ্যে কোথাও চাবটি কোথাও পাঁচটি এবং কোথাও ছয়টি মাত্রা, কেবল এক জায়গায় আটটি মাত্রা আছে, তাও সন্দেহের বিষয়। যা হক, বাংলা গানের এই ঝাঁকের তত্ত্বই বাংলা পণ্ডের গোড়ার কথা। ঝাঁক যখন অর্থের বাহন হিসেবে অনিয়মিত ভাবে স্থাপিত হয় তখনই ভাষা হয় গম্ভীর, আর ঝাঁক যখন নিয়মিত ভাবে স্থাপিত হয় তখনই ভাষা পণ্ড হয়ে ওঠে। ঝাঁককে নিয়মিত করার মানে হচ্ছে দুটি ঝাঁকের মধ্যবর্তী ধ্বনিসংখ্যা বা মাত্রাপরিমাণ নির্দিষ্ট করে দেওয়া। ঝাঁক যদি চার স্বরের পর পর আসতে থাকে তবেই সে ছন্দ হয় চতুঃস্বরপর্বিক, আর যদি ছ'মাত্রার পর পর আসতে থাকে তবে সে ছন্দ হবে ষণ্মাত্রিক। বেছে বেছে শব্দ প্রয়োগ করে এ ভাবেই দ্বিস্বর, ত্রিস্বর এবং চতুর্মাত্রিক ও পঞ্চমাত্রিক ছন্দ রচিত হয়ে থাকে। অক্ষরবৃত্ত ছন্দের মূলেও এ কথাই রয়েছে তা যথাস্থানে দেখাতে চেষ্টা করব।

এ স্থলে বাংলা ছন্দের সঙ্গে ইংরেজি ছন্দের তুলনা করা প্রয়োজন; কারণ ইংরেজি ছন্দের মূলেও এই ঝাঁকের তত্ত্বই রয়েছে। ওই ঝাঁক এবং যতির যোগেই ইংরেজি ছন্দে তরঙ্গের সৃষ্টি হয়ে থাকে। কিন্তু ইংরেজি ছন্দের সঙ্গে বাংলা ছন্দের সাদৃশ্যের চেয়ে পার্থক্যই বেশি এবং ওই পার্থক্য কোথায় তা বুঝলেই বাংলা ছন্দের স্বরূপ পরিষ্কৃত হবে।

প্রথমেই দেখতে পাই যে অধিকাংশ ইংরেজি শব্দেরই একটা নিজস্ব ঝাঁক আছে, আর ওই ঝাঁক কোনো শব্দের আদিতে, কোনো শব্দের মধ্যে এবং কোনো শব্দের অন্তে থাকে। তা ছাড়া ইংরেজিতে অনেকগুলি একস্বর শব্দ আছে



বার কোনো নিজস্ব ঝাঁক নেই। একাধিক স্বর (অর্থাৎ সিলেবল্)-বিশিষ্ট সব শব্দেরই আদি, মধ্য, অন্ত কোথাও না কোথাও ঝাঁক থাকবেই। শব্দের এই স্বভাবগত ঝাঁককে পর্যায়ক্রমে সাজিয়েই ইংরেজি ছন্দের সৃষ্টি। ঝাঁকহীন একস্বর শব্দ এবং ঝাঁকওয়ালা বহুস্বর শব্দের সাহায্যে নির্দিষ্ট পর্যায় রচনা করা ইংরেজিতে খুবই সহজসাধ্য ব্যাপার। ইংরেজির আরেকটা বিশেষত্ব হচ্ছে এই যে, ও ভাষার স্বরাস্তবর্ণ খুবই কম, হসস্তবর্ণ খুব বেশি। ইংরেজিতে হসস্তবর্ণের সংখ্যা চল্লিখ বাংলা হসস্তবর্ণের দ্বিগুণ কিংবা আরও কিছু বেশি, এ বিষয়ে ইংরেজির সঙ্গে সাধু বাংলার তুলনাই করা যায় না। যা হক, শব্দের এই স্বাভাবিক ঝাঁক এবং হসস্তবর্ণের সাহায্যে ইংরেজিতে পাঁচ রকম ছন্দ রচিত হয়ে থাকে—দুইরকম দ্বিস্বরপর্বিক ছন্দ এবং তিন রকম ত্রিস্বরপর্বিক ছন্দ। দ্বিস্বরপর্বিক ছন্দে উচ্চারণের ঝাঁকটা প্রথম স্বরের উপরেও থাকতে পারে (trochee), দ্বিতীয় স্বরের উপরেও থাকতে পারে (iambus)। ত্রিস্বরপর্বিক ছন্দেও তেমনি ঝাঁকটা প্রতি পর্বের আদিতে (dactyl), মধ্যে (amphibrach) এবং অন্তে (anapaest) স্থাপিত হতে পারে।

বাংলায় কিন্তু কোনো শব্দেরই প্রকৃতিগত ঝাঁকপ্রবণতা নেই। সব শব্দই স্বভাবতঃ সমান নিস্তরঙ্গ। বাংলায় যে ঝাঁকের কথা পূর্বে বলেছি সে কোনো শব্দেরই প্রকৃতিগত নয়, সে ঝাঁক আমাদের উচ্চারণগত। ভাবপ্রকাশের সুবিধার জগুই আমরা আমাদের প্রয়োজন অনুসারে ঝাঁক দিয়ে কথা বলি; এক সময় যে কথার উপর ঝাঁক দিলুম আরেক সময় সে-কথা উপর ঝাঁক না-ও দিতে পারি। ইংরেজিতে কিন্তু এরূপ হবার জো নেই; সে ভাষায় যে শব্দের যে স্বরের উপর ঝাঁক নির্দিষ্ট আছে সব সময় ওই স্বরের উপরই ঝাঁক থাকবে, এর ব্যতিক্রম হবার উপায় নেই। এর ফলে ইংরেজি গদ্য এবং পদ্যে এমন একটা বন্ধুরতা ও তীক্ষ্ণতা আছে যা বক্তা ও শ্রোতার চিত্ত ও শ্রুতিকৈ কখনও অলস হবার প্রশ্রয় দেয় না। একঘেয়ে হওয়া ইংরেজি ভাষার প্রকৃতিবিরুদ্ধ। বাংলার উচ্চারণ-ঝাঁকের আর একটি বিশেষত্ব এই যে ওই ঝাঁক সর্বদাই শব্দের আদিতে স্থাপিত হয়, কখনও অন্ততঃ স্থাপিত হয় না। তার ফল এই হয় যে বাংলা পদ্যে ওই ঝাঁকটা একঘেয়ে হয়ে পড়ে; কারণ পদ্যছন্দে সেটা নিয়মিত ব্যবধানের পর সব সময়ই শব্দের আদিস্বরে স্থাপিত হয়। বাংলা গদ্যে কিন্তু ওই ঝাঁকের দ্বারা একঘেয়েমির সৃষ্টি হয় না; কারণ গদ্যে

বোঁকের ব্যবধান নিয়মিত নয় ; তা ছাড়া ওই বোঁক অর্ধেকই অনুসরণ করে ব'লে এবং শ্রোতার নিকট অর্থ-ই একমাত্র লক্ষ্য ব'লে অনেক সময় ওই বোঁকের অস্তিত্বই অস্বভূত হয় না। ইংরেজির ওই শাব্দিক বোঁক (অনেক সময় শব্দার্থের অনুসরণ করলেও) বাক্যের অর্থের উপর মোটেই নির্ভর করে না। বাক্যার্থের প্রতি শ্রোতার মনোযোগ আকর্ষণ করার জন্য সময় সময় যে বোঁকের ব্যবহার হয় তা এই শাব্দিক বোঁক বা অ্যাকসেন্ট থেকে সম্পূর্ণ স্বতন্ত্র জিনিস (emphasis) ; এর সঙ্গে ছন্দের কোনো সম্বন্ধ নেই।

স্বরসংখ্যা হিসেবে ইংরেজি ছন্দ দুইরকম—দ্বিস্বরের ছন্দ ও ত্রিস্বরের ছন্দ। তার মধ্যেও দ্বিস্বর ছন্দের ব্যবহারই বেশি ; ত্রিস্বর ছন্দের ব্যবহার অপেক্ষাকৃত কম। বাংলায় কিন্তু চতুঃস্বর ছন্দের প্রয়োগই সব চেয়ে বেশি ; তবে খুব নিপুণ ভাবে শব্দ প্রয়োগ করে দ্বিস্বর ও ত্রিস্বরের ছন্দও বাংলায় বেশ রচনা করা যায় এবং তার ছন্দ-সৌন্দর্যও কম হয় না। পূর্বেই বলেছি হসন্তবর্ণ এবং যুক্তস্বরের সংখ্যা ইংরেজিতে বাংলার দ্বিগুণ ; কাজেই ইংরেজির সর্বদা প্রচলিত ছন্দ দ্বিস্বরপর্বিক এবং বাংলার বহুপ্রযুক্ত ছন্দটি চতুঃস্বরপর্বিক, এ রূপ হওয়াই স্বাভাবিক। এ স্থলে এ কথা মনে রাখা দরকার যে, সমস্ত ইংরেজি ছন্দই আমাদের স্বরবৃত্ত ছন্দের স্বধর্মী। বাংলা মাত্রাবৃত্ত ও অক্ষরবৃত্তের অনুরূপ কোনো ছন্দ ইংরেজিতে নেই।

যা হক, ইংরেজিতে সর্চরাচর দ্বিস্বরপর্বিক ছন্দই ব্যবহৃত হয় আর বাংলায় নিত্যপ্রচলিত ছন্দ চতুঃস্বরপর্বিক, এইটাই ইংরেজি ছন্দের সঙ্গে বাংলা ছন্দের প্রধান পার্থক্য নয়। ইংরেজির সঙ্গে বাংলা ছন্দের প্রধান পার্থক্য এই যে, ইংরেজিতে শাব্দিক বোঁক বা অ্যাকসেন্ট পর্বের আদি, মধ্য বা অন্ত যে কোনো জায়গায় স্থাপিত হতে পারে এবং ওই বোঁকগুলি শব্দেরই প্রকৃতিগত। কিন্তু বাংলায় স্বরবৃত্ত, মাত্রাবৃত্ত বা অক্ষরবৃত্ত সমস্ত ছন্দেই উচ্চারণবোঁকটি প্রতি পর্বের আদি স্বরের উপর স্থাপিত এবং ওই বোঁক শব্দের প্রকৃতিগত নয়, বাংলার উচ্চারণপদ্ধতি-জাত। ইংরেজি ছন্দে পর্ববিভাগের পরিবর্তন করে ওই শাব্দিক বোঁককে পর্বের আদি, মধ্য ও অন্তে স্থানান্তরিত করা যায়। কিন্তু এ পরিবর্তনের দ্বারা শাব্দিক বোঁকের কিছুমাত্র পরিবর্তন হয় না ; সে বোঁক পূর্বে যেখানে ছিল ঠিক সেইখানেই থাকবে। একটা দৃষ্টান্ত দিচ্ছি।—

So faith'-ful | in love, and | so daunt'-less | in war,

There ne'-ver | was knight' like | the young' Lo | -chin-var'.

—Lochinvar, Marmion, W. Scott.

এটা হচ্ছে ত্রিষর অপূর্ণ চৌপবিক ছন্দ। শব্দের ঝাঁক সর্বত্রই পর্বের মধ্যে বুয়েছে। এর ইংরেজি নাম হচ্ছে Amphibrachic tetrametre catalectic অর্থাৎ মধ্যগুরু অপূর্ণ চৌপবিক। কিন্তু পংক্তিগুলির পর্ববিভাগ অন্য ভাবেও করা যেতে পারে। যথা—

So faith' | -ful in love, | and so daunt' | -less in war,

There ne' | -ver was knight' | like the young' | Lo-chin-var.

এবার কিন্তু শব্দের ঝাঁক প্রতি পর্বেরই অন্ত্যস্বরের উপর পড়ছে। প্রথম দুটি অন্ত্যগুরু ত্রিষর পর্ব অর্থাৎ Iambus; বাকি সবগুলিই অন্ত্যগুরু ত্রিষর পর্ব অর্থাৎ Anapaest। কিন্তু লক্ষ করার বিষয় হচ্ছে যে-ভাবেই পর্ববিভাগ করা হক না কেন, শব্দের উপরকার ঝাঁক পূর্বে যেখানে ছিল পরেও সেখানেই আছে।

বাংলায় কিন্তু পর্ববিভাগের পরিবর্তনের সঙ্গে সঙ্গে শব্দের উপরকার ঝাঁকও সরে যায়; কারণ ওই ঝাঁক উচ্চারণের উপরই নির্ভর করে, শব্দের উপরে নয়। যথা—

এত বলি | গৃহকোণে

বসিলাম | দৃঢ় মনে

লেখকের | যোগাসনে

পাশে লয়ে | মলীপাত্র।

—গীতে ও বসন্তে, চিত্রা, রবীন্দ্রনাথ

এটা হল চারমাত্রার ত্রিপাবিক চৌপদী ছন্দ; প্রতি পদে দুটি করে পর্ব এবং প্রতি পর্বের আদিস্বরের উপর ঝাঁক। পর্ববিভাগের পরিবর্তন করে দেখা যাক কি হয়।—

এত বলি গৃহ- | কোণে

বসিলাম দৃঢ় | মনে

লেখকের যোগা- | সনে,

পাশে লয়ে মসী | পাত্র ।

এটা ছ'মাত্রার ছন্দ ; প্রতি পদে একটি পূর্ণ পর্ব ( ছ'মাত্রা ) এবং একটি অপূর্ণ পর্ব ( দুমাত্রা ) রয়েছে । কাজেই এটা হল ছ'মাত্রার অপূর্ণ দ্বিপর্বিক চৌপদী ছন্দ । যা হক, এখানে দেখতে পাচ্ছি প্রত্যেক পদেই প্রথম পর্বের আদি স্বরের ঝাঁকটি ঠিক থাকলেও দ্বিতীয় পর্বের ঝাঁকগুলি দুমাত্রা সরে গেছে । আরেকটু দৃষ্টান্ত দিচ্ছি ।—

যবে ফিরে আসে গোষ্ঠে | গাভীদল

সারা দিনমান মাঠে | ভ্রমিয়া

—মরণ, উৎসর্গ, রবীন্দ্রনাথ

এটা ছ'মাত্রার অপূর্ণ দ্বিপর্বিক ছন্দ । প্রত্যেক পংক্তির আগে দুটি করে অতি-পর্বিক মাত্রা আছে । পর্ববিভাগ পরিবর্তন করা যাক ।—

যবে ফিরে আসে | গোষ্ঠে গাভীদল

সারা দিনমান | মাঠে ভ্রমিয়া—

এখানে অতি-পর্বিক মাত্রা দুটিকেও পর্বের অন্তর্ভুক্ত করে নেওয়া হয়েছে । কিন্তু সঙ্গে সঙ্গে প্রতি পর্বের ঝাঁকগুলি কিরূপে দুমাত্রা করে বাঁ দিকে সরে গেছে তা-ই লক্ষ করার বিষয় । কিন্তু পর্ববিভাগ যতই পরিবর্তন করা যাক না কেন, বাংলায় প্রতি পর্বের আদিস্বরের উপর ঝাঁক থাকবেই ; কিন্তু ইংরেজিতে তা হবার জো নেই ।\*

বিচ্ছিন্ন ১৩৩৮ পৌষ

## বাংলা ছন্দে রবীন্দ্রনাথের দান

রবীন্দ্রনাথ আজন্ম রূপকার। রূপদৃষ্টির যে প্রতিভা নিয়ে তিনি জন্মেছেন তার নবনবোন্মেষশালিতার পর্যাণ্ড পরিচয় বহু ক্ষেত্রে বহু রূপে সঞ্চিত হয়ে আছে। রবীন্দ্রনাথ সৌন্দর্যের পুরোহিত। তাঁর কবিপ্রাণে “স্বন্দরের জয়ধ্বনি-গানে” যে বাঁশি চিরকাল মঞ্জিত হয়েছে তাতে শুধু তাঁর জন্মভূমি নয়, সমস্ত পৃথিবীই মুখরিত হয়েছে। যে স্বন্দরের আরাধনায় তিনি তাঁর সমগ্র জীবন অতিবাহিত করেছেন, তার সন্ধানে তাঁকে নিত্যই কত নব নব ভাব ও রূপের ক্ষেত্রে বিচরণ করতে হয়েছে তা কারও অজানা নয়। রবীন্দ্রপ্রতিভার এই বিস্ময়কর বৈচিত্র্য ও নিত্যনবীনতার কারণ এই যে, তাঁর জীবনদেবতাই তাঁকে বহু বিচিত্র ও নিত্যনূতন রূপে দেখা দিয়েছেন। তাই কবি নিজেই বিস্ময়বিমুগ্ধচিত্তে তাঁকে সম্ভাষণ করেছেন—

“জগতের মাঝে কত বিচিত্র তুমি হে,  
তুমি বিচিত্ররূপিণী !”

“এ কি কৌতুক নিত্যনূতন,  
ওগো কৌতুকময়ী !”

রবীন্দ্রনাথের কবিস্বদয়ে প্রত্যহ যে অগণিত ভাব সেই বহুবিচিত্রের অহুভূতিকে জাগিয়ে তুলেছে, তাঁর শিল্পপ্রতিভাও তেমনি প্রতিদিনই তাকে অজস্ররূপে অভিব্যক্তি দান করেছে। তাঁর অলোকসামাগ্র প্রতিভার আলোতে ভাব ও রূপ যে কত ঘনিষ্ঠ হয়ে প্রকাশিত হয়েছে, কবির নিজের কথাতেই তার প্রমাণ পাই।—

ভাব পেতে চায় রূপের মাঝারে অঙ্গ,  
রূপ পেতে চায় ভাবের মাঝারে ছাড়া।

—১৭, উৎসর্গ

বর্তমান প্রসঙ্গে ভাবুক রবীন্দ্রনাথের কবিপ্রকৃতির বিষয় আমাদের আলোচ্য নয়। এ স্থলে আমরা শুধু তাঁর রূপদক্ষতার বিষয়ই আলোচনা করব। রবীন্দ্রনাথের চিন্তাপ্রকৃতি আপন সার্থকতা লাভের উপায়স্বরূপ প্রথম থেকেই সৌন্দর্যের

ধনিকরূপেই আশ্রয় করেছে। তাঁর সহজাত রূপনৈপুণ্যের স্পর্শ পেয়ে সৌন্দর্যের ধনিকরূপ যে বিচিত্র ও অজস্র ধারায় উৎসারিত হয়েছে তা সত্যই বিস্ময়কর। ধনিশিল্পীরূপে তিনি বাংলা ভাষায় যে মায়ার স্রষ্টি করেছেন তার তুলনা নেই। তিনি যে “সংগীতের ইন্দ্রজাল নিয়ে যুক্তিকার কোলে” নেমে এসেছেন তাতে কে মুগ্ধ হয় নি ?

রূপস্রষ্টা রবীন্দ্রনাথ ছন্দ ও সংগীত, ধনির এই উভয় প্রকাশকেই অবলীলাক্রমে যুগপৎ রূপস্রষ্টির কার্বে নিয়োগ করেছেন। ছন্দ ও সংগীত ধনিশিল্পের দুটি প্রধান অঙ্গ। ছন্দের ক্ষেত্রে তাঁর শিল্পপ্রতিভা যে কত অভিনবরূপে আত্মপ্রকাশ করেছে, এ স্থলে তাই আমাদের আলোচ্য বিষয়। কিন্তু একটিমাত্র প্রবন্ধে রবীন্দ্রনাথের ছন্দের স্বার্থাযোগ্য আলোচনা করা সম্ভবপর নয়। এ প্রবন্ধে রবীন্দ্রনাথের ছন্দের মূলতত্ত্ব ও বৈশিষ্ট্য সম্বন্ধে সংক্ষেপে কয়েকটিমাত্র কথার উত্থাপন করব।

তথু রূপদৃষ্টি নিয়েই কবি কাব্য রচনা করতে পারেন না ; রচনাকার্যে নিরত হয়ে তাঁকে প্রতি পদেই রূপতত্ত্বদৃষ্টির পরিচয়ও দিতে হয়। রূপতত্ত্বদ্রষ্টা-রূপে রবীন্দ্রনাথের প্রতিভা যে কত অসাধারণ, তাঁর ছন্দোবৈভবের আলোচনায় সে কথাটিই সকলের আগে মনকে আকৃষ্ট করে। কিশোরবয়স থেকেই তিনি বাংলা ভাষার ধনিকরূপের অসাধারণ তত্ত্বদৃষ্টি নিয়ে রচনাকার্যে অগ্রসর হয়েছিলেন। তারই বলে বাংলা কাব্যসাহিত্যের ছন্দভাণ্ডারে তাঁর দান এত অপরিমেয়। বাংলা কাব্যজগতে তিনি যে কত নূতন নূতন ছন্দ স্রষ্টি করেছেন তার ইয়ত্তা নেই। কিন্তু এই বৈচিত্র্যবহুলতাই তাঁর ছন্দের আসল কথা নয়। আসল কথা এই যে, তিনিই বাংলা ভাষার ধনিকরূপের সর্বপ্রথম ও স্বার্থ আবিষ্কারক। তিনিই সর্বপ্রথমে বাংলা ভাষার সর্মগত স্বাতন্ত্র্যকে অক্ষুণ্ণ রেখে বাংলা ছন্দের মূলস্রুজগুলি আবিষ্কার করেছেন। তাঁর এ আবিষ্কার পৃথিবীর ভাষাগত অস্ত্র কোনো আবিষ্কারের চেয়ে কম নয়। বাংলা ভাষার আপাতদৃষ্টমান স্থূল আবরণের অন্তরালে অবস্থিত যে ছন্দরাজ্য তিনি আবিষ্কার করেছেন, তা আটলাটিকের পরপারস্থ ভরতপ্রচ্ছন্ন নৃত্য মহাদেশ-আবিষ্কারের চেয়ে কিছুমাত্র কম বিস্ময়কর নয়। রবীন্দ্রনাথ বাংলা ছন্দজগতের সর্বব্যাপী মূল মাধ্যাকর্ষণনীতিটি আবিষ্কার করেই নিরন্তর হন নি পরন্তু এই দীর্ঘতিকে কাব্যসাহিত্যের বহু ক্ষেত্রে বহু বিচিত্র উপায়ে প্রয়োগ করে বাংলা ছন্দে যে হিল্লোল, যে ঝংকার, যে নৃত্যলীলা ও

স্বরমাহুর্ষ তিনি সঞ্চারিত করেছেন তা স্বার্থই অশরিয়ের। ছন্দের দিক্ থেকে একটু লক্ষ করলেই দেখা যাবে, রবীন্দ্রনাথের প্রায় সমস্ত কবিতাতেই একাধারে নৃত্য ও সংগীতের যুগপৎ অপূর্ব সমাবেশ হয়েছে। কোন জাহ্নবীর প্রভাবে বাংলা ছন্দকে এমন অভূতরূপে তরঙ্গিত ও মুগ্ধরিত করে তোলা সম্ভবপর হল তার আলোচনা করার সার্থকতা আছে।

মানবের জীর্ণ বাক্যে মোর ছন্দ দিবে নব স্বর,  
অর্থের বন্ধন হতে নিয়ে তাকে যাবে কিছু দূর  
ভাবের স্বাধীন লোকে।

—ভাবা ও ছন্দ, কাহিনী

এই উক্তি আদিকবি বাঙ্গালীকির কাব্য সম্বন্ধে যতখানি সত্য, রবীন্দ্রনাথের নিজের কাব্য সম্বন্ধেও তার চেয়ে কম সত্য নয়। কিন্তু বাংলা ভাষার জীর্ণ বাক্যে তাঁর ছন্দ যে নব স্বর দিয়েছে তার স্বার্থ মর্যাদা উপলব্ধি করতে হলে প্রথমেই দেখা দরকার, তিনি বাংলা ভাষার অন্তর্নিহিত যে ছন্দশক্তিকে আবিষ্কার করেছেন তার মৌলিক নীতিসূত্রগুলি কি। ছন্দের অন্তঃপ্রকৃতি ও বহির্গঠন, কোনো ক্ষেত্রেই তাঁর কৃতিত্ব কম নয়। বাংলা ভাষার ধ্বনিপ্রকৃতির আসল স্বরূপটি কি, সে তথ্যের উপরেই বাংলা ছন্দের শক্তি ও বৈশিষ্ট্য নির্ভর করে। তিনি যেদিন ওই তত্ত্বটি আবিষ্কৃত করলেন সেদিন থেকেই বাংলা ছন্দ সার্থকতা ও ঐশ্বর্য-লাভের পথের সন্ধান পেয়েছে। রবীন্দ্রনাথের পূর্ববর্তী বাঙালি কবিরা বহুশত বৎসর বাবৎ নানা প্রয়াস ও সাধনার ভিতর দিয়ে অতি দীর্ঘ গতিতে বাংলা ছন্দের স্বরূপ-সন্ধানের পথে অগ্রসর হচ্ছিলেন। কিন্তু সে তথ্যের আবরণ কেউ উন্মোচন করতে পারেন নি। রবীন্দ্রনাথের গভীর অন্তর্দৃষ্টির রশ্মিতে যেদিন সে তত্ত্ব উদ্ভাসিত হল সেদিন দেখা গেল বাংলা ছন্দের শক্তিও ক্ষীণ নয় এবং তার সম্ভাব্যতার ক্ষেত্রও স্বল্পপরিসর নয়। সেদিন থেকে বাংলা ছন্দ তাঁর শব্দধ্বনির অঙ্গস্বরূপ করে ত্রিপথগা ভাগীরথীর মতো তিনটি স্বভাব ও প্রবল ধারায় বয়ে চলেছে।

রবীন্দ্রনাথ যখন কাব্যসাহিত্যের আসরে প্রথম প্রবেশ করেন তখন বাংলায় যে কটি ছন্দ প্রচলিত ছিল সে সমস্তই অক্ষরবৃত্তের অন্তর্গত। কিন্তু অক্ষরবৃত্ত ছন্দগুলিও তখন পর্যন্ত সুগঠিত ও সুনিয়ন্ত্রিত হয় নি। ছন্দ নিয়ে তখন বহু পরীক্ষা চলেছে, অক্ষরবৃত্তের মূলতত্ত্বটি তখন পর্যন্ত অনাবিষ্কৃতই রয়ে গেল। পরবর্তী কালে

রবীন্দ্রনাথের হাতেই এ ছন্দগুলি সৃষ্টিত ও স্থানীয়ত্বিত হয়ে সৌষ্ঠব, সৌন্দর্য ও বৈচিত্র্য লাভ করেছে। সে কথা যথাস্থানে আলোচনা করব। কিন্তু এ স্থলে এটুকু বলা প্রয়োজন যে, অক্ষরবৃত্ত ছন্দের কৃত্রিমতা ও অপূর্ণতা প্রথম থেকেই তাঁর স্বাভাবিক প্রথর ছন্দবোধকে পীড়া দিচ্ছিল। তাই তাঁর বাল্যরচনাগুলিতে একটা অতৃপ্তি ও প্রচলিত ছন্দকে ভেঙে-চুরে নতুন ছন্দ-সৃষ্টির একটা অশ্রান্ত প্রয়াস দেখতে পাই। “শৈশবসংগীত” বা “কৈশোরক”—এর সময় থেকে “ছবি ও গান”—এর সময় পর্যন্ত এই অতৃপ্তি ও প্রয়াসের যুগ। “কড়ি ও কোমল”—এ ছন্দ অনেকখানি শাস্ত ও সংযত হয়েছে। কিন্তু তখনও ছন্দের আসল রূপটি আবিষ্কারের প্রয়াসে কিছুমাত্র বিরাম নেই। “মানসী”র যুগে যখন ছন্দের ধ্বনিপরিমাপের নতুন নীতি আবিষ্কৃত হল তখন থেকেই এই অবিশ্রান্ত সন্ধানের কতকটা তৃপ্তি ঘটল। তার পর হতেই রবীন্দ্রকব্যনিকুঞ্জ বহু বিচিত্র ছন্দের স্তবকে স্তবকে রঞ্জিত হয়ে উঠেছে।

রবীন্দ্রনাথের অল্পবয়সের রচনায় যুক্তবর্ণের বিরলতা একটি বিশেষ লক্ষ্য করার বিষয়। যুক্তবর্ণের এই বিরলতা আকস্মিক নয়। অযুক্ত ব্যঞ্জন ও স্বরধ্বনির মধ্যে যে একটি অবাধ প্রবাহ ও সংগীতমাধুর্য আছে, তা তাঁর সংগীতনিপুণ কিশোরহৃদয়ে সহজেই অনুভূত হয়েছিল। তিনি অনুভব করেছিলেন, যেখানেই যুক্তবর্ণের ব্যবহার হয় সেখানেই ছন্দের সহজ ধ্বনিপ্রবাহে বাধা ঘটে। এ-ই হচ্ছে তাঁর তরুণবয়সের রচনায় যুক্তবর্ণের বিরলতার প্রধান কারণ। কিন্তু যুক্তবর্ণকে যদি ছন্দ থেকে একেবারে বর্জন করা যায় তাহলে ছন্দের ধ্বনি বৈচিত্র্যহীন একঘেয়ে এবং অত্যন্ত তরল ও শক্তিহীন হয়ে পড়ে, এ কথাটিও তিনি তখন বুঝতে পেরেছিলেন। তাই যুক্তবর্ণের ব্যবহার সম্বন্ধে একটি প্রবল দৃঢ় কবির মনে দেখা দিয়েছিল। “কড়ি ও কোমল”—এর সময় পর্যন্ত বহু রচনাতেই এই দৃঢ়তার প্রচুর আভাস রয়েছে। কিন্তু “মানসী”—র যুগে তিনি যখন ছন্দের ধ্বনিপ্রবাহে ব্যাঘাত না ঘটিয়েও যুক্তবর্ণ-ব্যবহারের জাহ্নমটুকু আবিষ্কার করলেন, তখন থেকে আশ্রয় পর্বন্ত যুক্তবর্ণের পর্যাপ্ত ব্যবহারে তিনি যে ধ্বনির ইন্দ্রজাল সৃষ্টি করেছেন তার ভুলনা নেই।

তখনকার দিনের কবির। শুধু অক্ষর গুনেই ছন্দ রচনা করতেন। তাঁরা একথা বুঝতে পারেন নি যে, লিপিবদ্ধ বা পঠিত অক্ষরের সঙ্গে ছন্দের কোনো অচ্ছেদ্য সম্বন্ধ নেই। ছন্দ একটি ধ্বনিশিল্প, স্তবরাং ছন্দের গোড়ার কথাই হচ্ছে



ধ্বনির তত্ত্ব। লিখিত অক্ষরের সংখ্যার উপরে ছন্দ মোটেই নির্ভর করে না। রবীন্দ্রনাথই সর্বপ্রথম “মানসী” রচনার সময়ে এ কথাটি অস্বত্ব করেন, তিনি বুঝতে পারলেন যে, অক্ষরগোনার অক্ষপদ্ধতি বর্জন করে ধ্বনির মাত্রাপরিমাণ বা quantity-র উপরেই ছন্দকে গড়ে তুলতে হবে। তিনি আরও বুঝতে পারলেন যে, সংস্কৃত ছন্দের রীতিতে বাংলায় ধ্বনির মাত্রাপরিমাণ বা quantity নির্ণয় করা চলবে না। কারণ বাংলার উচ্চারণপদ্ধতি সংস্কৃতের পদ্ধতি থেকে অনেক পৃথক। স্বরবর্ণের দ্রুতদীর্ঘ উচ্চারণ সংস্কৃত ভাষা ও ছন্দের পক্ষে স্বাভাবিক, কিন্তু বাংলার পক্ষে নয়। বাংলায় কার্ণভঃ দীর্ঘস্বরের ব্যবহার নেই বললেই হয়। অথচ শুধু দ্রুতস্বরের ব্যবহারে ছন্দ বৈচিত্র্যহীন একঘেয়ে হয়ে পড়ে। কিন্তু রবীন্দ্রনাথ দেখতে পেলেন যে, বাংলায় দীর্ঘ ধ্বনি নেই বটে, কিন্তু যুগ্মধ্বনি আছে এবং এই যুগ্মধ্বনি স্বভাবতঃই গুরুমাত্রিক ও তরঙ্গায়িত। তা ছাড়া যুক্তবর্ণ আসলে যুগ্মধ্বনিকে লিখিত আকারে প্রকাশ করার একটি বিশেষ প্রণালী ভিন্ন আর কিছু নয়। হুতরাং যখন থেকে তিনি অযুগ্মধ্বনিকে এক মাত্রা (metrical moment বা instant) এবং যুগ্মধ্বনিকে দুমাত্রা ধরে ছন্দ রচনা করতে প্রবৃত্ত হলেন তখন থেকে যুক্তবর্ণ ব্যবহারের কল্পিত বাধাটি অস্তিত্ব হারা গেল। বরং যুক্তবর্ণ ছন্দের ধ্বনিকে বিচিত্র ও তরঙ্গিত করে তোলার পক্ষে বিশেষ অস্বকূলই হল। এভাবে “মানসী”র যুগ থেকেই তিনি বাংলা ছন্দে মাত্রিক পর্ব বা quantitative measures-এর প্রবর্তন করেন। এই মাত্রিক পর্বের বহু বিচিত্র সমাবেশের ফলে বাংলায় ছন্দের এক নূতন ধারার উৎপত্তি হয়েছে। ছন্দের এই ধারার সাধারণ নাম দিয়েছি মাত্রাবৃত্ত। ইংরেজিতে একে বলা চলে quantitative metre। ১২৯৪ সালের বৈশাখ মাসে রচিত “ভুলভাঙা” নামক কবিতাটিই প্রকৃতপক্ষে বাংলা সাহিত্যে মাত্রাবৃত্ত ছন্দে রচিত সর্বপ্রথম কবিতা। এই “ভুলভাঙা” কবিতাটিতেই সর্বপ্রথমে শুধু অক্ষর শুনে ছন্দ রচনার ভুল ভেঙেছে। অক্ষরবৃত্তের শিকলভাঙা সর্বপ্রথম বাংলা মাত্রাবৃত্ত ছন্দটির একটি নমুনা দিচ্ছি।—

চেয়ে আছে আঁখি, নাই ও আঁখিতে

প্রেমের ঘোর।

বাহুলতা শুধু বন্ধনপাশ

বাহুতে মোর।...

বসন্ত নাহি এ ধরায় আর  
 আগের মতো ;  
 জ্যোৎস্নাধামিনী যৌবনহার্য  
 জীবনহত ।

—ভুল-ভাঙা, মানসী

ওই “বন্ধন” কথাটিই সর্বপ্রথমে বাংলা ছন্দে অক্ষরগুণতিয় বন্ধনপাশ ছিন্ন করেছে ।

মাজারূপে ছন্দে রবীন্দ্রনাথ যে তত্ত্বের প্রয়োগ করেছেন সেটি হচ্ছে ধ্বনি-পরিমাণের তত্ত্ব । এ ছন্দের একটি বৈশিষ্ট্য হচ্ছে এর স্বরপ্রাধান্ত ; তাই এ ছন্দ বাংলা গীতিকবিতার সর্বশ্রেষ্ঠ বাহনরূপে ব্যবহৃত হচ্ছে । বাংলার শ্রেষ্ঠ গীতিকবিতা-সমূহের অধিকাংশই এ ছন্দে রচিত । এই স্বরপ্রবণতার একটা অস্ববিধা এই যে, এর ধ্বনি অনেক সময়ই নিস্তরঙ্গ একঘেয়ে হয়ে পড়ার সম্ভাবনা থাকে । তাই কবিকে খুব সতর্ক ভাবে স্থানে স্থানে যুগ্মধ্বনির প্রয়োগ করে ধ্বনিকে বিচিত্র ও তরঙ্গিত করে তুলতে হয় । সেজগ্রেই দেখতে পাই, যে রবীন্দ্রনাথ তরুণবয়সে যুক্তবর্ণের ব্যবহারে অত্যন্ত কুণ্ঠাবোধ করতেন সেই রবীন্দ্রনাথই তাঁর পরিণত-বয়সের রচনায় প্রয়োজনমতো যুক্তবর্ণের ( অর্থাৎ যুগ্মধ্বনির ) বজ্রকরতালি বাজিয়ে ছন্দকে উদ্বেল করে তুলেছেন । দৃষ্টান্ত দিচ্ছি ।—

নীল অঙ্কনঘন-পুঞ্জ ছায়ায় সম্বৃত অশ্বর,  
 হে গম্ভীর ।

বনলক্ষ্মীর কম্পিত কায় চঞ্চল অন্তর,

বাংকুত তার ঝিল্লীর মঞ্জীর ।

বর্ষণগীত হল মুখরিত মেঘমঞ্জিত ছন্দে,

কদম্ববন গম্ভীর মগন আনন্দঘন গঞ্জে,

নন্দিত তব উৎসব-মন্দির,

হে গম্ভীর ॥

—বর্ধামঙ্গল, বনবাণী

মাজারূপে ছন্দে গীতিকবিতার উপযোগী স্বরমাদুর্ষ আছে কিন্তু ওই স্বরপ্রবণতার মধ্যে বাংলা উচ্চারণরীতির আসল তথ্যটিই ধরা পড়ে না । উচ্চারিত ধ্বনির মাজাপরিমাণ নির্ণয়ের দ্বারা ও স্বরসঙ্কারের দ্বারা মাজারূপের মাদুর্ষ সৃষ্টি

হয়। কিন্তু আমাদের নিত্যউচ্চারিত ধ্বনির মধ্যে স্বর নেই, আছে accent বা ঝাঁক। আর মাত্রানির্ণয়ই ধ্বনির সবটুকু তত্ত্ব নয়। উচ্চারণের সময় শব্দের উপরে আমরা যে ঝাঁক দিয়ে কথা বলি, ওই ঝাঁকটির মধ্যেই ধ্বনির আসল শক্তিটি নিহিত থাকে। কিন্তু মাত্রাবৃত্ত ছন্দে ওই ঝাঁকটিই স্বরের আড়ালে গোঁণ হয়ে যায়। তাই রবীন্দ্রনাথ তাঁর কবিজীবনের প্রথম থেকেই বাংলা ছন্দে ওই ঝাঁকটুকু সহ আমাদের সমগ্র উচ্চারণপদ্ধতিটাকেই অথগু ও অক্ষুণ্ণরূপে সমাবিষ্ট করতে প্রয়াস পেয়েছেন। “ছবি ও গান”—এই তিনি সর্বপ্রথমে আমাদের এই উচ্চারণতত্ত্বটিকে প্রয়োগ করেছেন। দৃষ্টান্ত দিচ্ছি।—

ঘুমের মত মেয়েগুলি  
চোখের কাছে ছলি’ ছলি’  
বেড়ায় শুধু নুপুর রণরবি’।  
আধেক মুদি’ আখির পাতা  
কার সাথে যে কচ্ছে কথা,  
জনছে কাহার যুহু মধুর ধ্বনি ॥

—মাতাল, ছবি ও গান

“কড়ি ও কোমল”—এও এ রকম ছন্দের প্রয়োগ আছে। আরেকটি দৃষ্টান্ত দিচ্ছি।—

ফুলের গন্ধ ঘিরে আছে সাতটি ভায়ের তনু—  
কোমল শয্যা কে পেতেছে সাতটি ফুলের রেণু।  
ফুলের মধ্যে সাত ভায়েতে স্বপন দেখে মাকে,  
সকাল বেলা “জাগো জাগো” পারুল দিদি ডাকে ॥

—সাত ভাই চম্পা, কড়ি ও কোমল

কিন্তু এ দুই গ্রন্থে এ ছন্দ রচনার মধ্যে অনেক স্থানেই সন্দেহ ও শৈথিল্য রয়েছে। ছড়াজাতীয় কবিতা ছাড়া উচ্চ ভাবের রচনায় এ ছন্দ চলবে কি না এ বিষয়ে কবির মনে কতকটা সন্দেহ রয়ে গেছে বলে মনে হয়। কিন্তু “কণিকা”—র যুগ থেকে তিনি নিঃসন্দেহে ও দৃঢ়হস্তে এ ছন্দ রচনায় প্রবৃত্ত হয়েছেন।—

তোমার তরে সবাই মোবে  
করছে দোষী  
হে প্রেয়সী।

বলছে—কবি তোমার ছবি

আঁকছে গানে,

প্রণয়গীতি গাচ্ছে নিতি

তোমার কানে ;

নেশায় মেতে ছন্দে গোঁথে

তুচ্ছ কথা

ঢাকছে শেষে বাংলা দেশে

উচ্চ কথা ।

তোমার তরে সবাই মোরে

করছে দোষী,

হে প্রেয়সী ॥

—কতিপুরুষ, ক্ষণিকা

কিংবা

আমি যদি জন্ম নিতেম কালিদাসের কালে,

দৈবে হতেম দশম রত্ন নবরত্নের মালে ।

—সেকাল, ক্ষণিকা

এ সমস্ত কবিতা থেকে স্পষ্টই বোঝা যাচ্ছে, কবি কেমন নিঃসংশয়চিত্তে এ ছন্দ রচনায় অগ্রসর হয়েছেন। “ক্ষণিকা”-র পর “উৎসর্গে” তিনি এ ছন্দে খুব উচ্চ ভাবের কবিতা রচনা করেছেন এবং তার পর থেকে এ ছন্দে কত বিচিত্র ভঙ্গির অজস্র রচনা প্রকাশ করেছেন তার ইয়ত্তা করা যায় না। এভাবে রবীন্দ্রনাথের অক্লান্ত সাধনা ও অসংখ্য রচনার ফলে এ ছন্দটি বাংলা সাহিত্যে একটি স্থায়ী আসন লাভ করেছে।

দেখা যাক, এ ছন্দের ভিতরকার তত্ত্বটি কি। লিপিবদ্ধ অক্ষরসংখ্যার মধ্যে এর প্রাণতত্ত্বের সন্ধান মিলবে না। ধ্বনির মাত্রাপরিমাণ অর্থাৎ quantity-র মধ্যেও এ ছন্দকে ধরা যায় না। এ ছন্দের ভিতরকার তত্ত্ব হচ্ছে, প্রাকৃত বাংলার স্বাভাবিক উচ্চারণপদ্ধতি ও ঝাঁক (accent) স্থাপনের রীতি। বিশ্লেষণ করলে দেখা যাবে, এ ছন্দে প্রতি পর্বের অন্তরে রয়েছে আমাদের উচ্চারণরীতির অখণ্ড রূপটি। মাত্রাপরিমাণ নির্ণয়ের কোনো চেষ্টা এ ছন্দের মধ্যে নেই, আছে শুধু অখণ্ড ধ্বনি বা সিলেবল্-এর সংখ্যার হিসাব। প্রতি

পর্বের ধ্বনি বা সিলেব্‌ল্-এর সংখ্যার হিসাব স্থির থাকলেই এ ছন্দের গঠন অক্ষুণ্ণ থাকে। প্রত্যেকটি ধ্বনি বা সিলেব্‌ল্-এর ভিতরকার কথা হচ্ছে, একটি যুগ্ম বা অযুগ্ম স্বরের অস্তিত্ব। তাই এই ছন্দের এক-একটি পর্বের নাম দেওয়া যায় স্বরপর্ব বা syllabic measure। স্বরপর্বের বিভিন্ন সমাবেশের ফলে এ ছন্দ রচিত হয় বলেই এ ছন্দের নাম দিয়েছি স্বরবৃত্ত। ইংরেজিতে একে বলা যায় syllabic metre।

মাত্রাবৃত্তের ত্রায় স্বরবৃত্তও বাংলা সাহিত্যে রবীন্দ্রনাথেরই দান। রবীন্দ্রনাথের পূর্বে এ ছন্দ বাংলায় ছিল না, এ কথা সত্য নয়। এ ছন্দ আমাদের পল্লীসংগীতে, ছেলেভুলানো ছড়ায়, কবির গানে, বাউলের গানে, এক কথায় আমাদের লোকসাহিত্যে বহুকাল যাবৎই প্রচলিত ছিল। রামপ্রসাদের গানে এ ছন্দের সঙ্গে সকলেরই পরিচয় ঘটেছে। ঈশ্বর গুপ্তের কয়েকটি কবিতাতেও এ ছন্দের সংস্কার পাই। মধুসূদন ও হেমচন্দ্রের নিকটও এ ছন্দ অজ্ঞাত ছিল না। যথা—

বাহিরে ছিল সাধুর আকার,

মনটা কিন্তু ধর্ম-ধোয়া।

পুণ্যখাতায় জমা শূন্য,

ভগ্নামিতে চারটি পোয়া ॥

শিক্ষা দিলে কিলের চোটে,

হাড় গুঁড়িয়ে থোমের মোয়া।

যেমন কর্ম ফললো ধর্ম,

বুড় সালিকের ঘাড়ে রোঁয়া ॥

—বুড় সালিকের ঘাড়ে রোঁ। মধুসূদন

হায় কি হলো— বঙ্গদর্শন বন্ধিম দেছে ছেড়ে,

হায় কি হলো— দেশটা গেছে সাপ্তাহিকে জুড়ে।

—হায় কি হলো, কবিতাবলী, হেমচন্দ্র

লক্ষ করার বিষয়, প্রথম দৃষ্টান্তটিতে দুটি পর্বে (বাহিরে ছিল, বুড় সালিকের) ছন্দের ত্রুটি ঘটেছে এবং দুটি দৃষ্টান্তে লৌকিক কায়দায় সাধারণের চিন্তা আকর্ষণের উদ্দেশ্যে রচিত বলে উভয়ই স্বরবৃত্ত ছন্দের ব্যবহার হয়েছে। ভারতচন্দ্রের “অন্নদামঙ্গল”-এও এক স্থানে স্বরবৃত্ত ছন্দের দৃষ্টান্ত

আছে। এ স্থলেও লৌকিক বিষয়বস্তুই এ ছন্দে রচিত হয়েছে। দৃষ্টান্তটি হচ্ছে এই।—

উমার কেশ চামরছটা,  
তামার শলা বুড়ার জটা,  
তায় বেড়িয়া ফোপায় ফণী,  
দেখে আসে জ্বর লো।

উমার মুখ চাঁদের চূড়া,  
বুড়ার দাড়ি শণের লুড়া,  
ছারকপালে ছাইকপালে,  
দেখে পায় ডর লো ॥

উমার গলে মণির হার,  
বুড়ার গলে হাড়ের ভার,  
কেমন করে ও মা উমা  
করিবে বুড়ার ঘর লো।

আমার উমা মেয়ের চূড়া,  
ভাঙড় পাগল ওই লো বুড়া,  
ভারত কহে—পাগল নহে,  
ওই ভুবনেশ্বর লো ॥

—কন্দল ও শিবনিশা, অন্নদামঙ্গল, ভারতচন্দ্র

এখানেও কয়েকটি পর্বে ক্রটি ঘটেছে। ভারতচন্দ্রের পূর্বকালবর্তী গোবিন্দদাসের রচনাতেও স্বরবৃত্ত ছন্দের দৃষ্টান্ত রয়েছে। যথা—

চিকন কালা গলায় মালা বাজন নৃপূর পায়।

চুড়ার ফুলে ভ্রমর বলে তেরছ নয়ানে চায় ॥

রবীন্দ্রনাথ স্বরবৃত্ত ছন্দের সৃষ্টি করেন নি। তাঁর কৃতিত্ব এই যে, তিনিই সর্বপ্রথমে প্রাকৃত বাংলার এই খাঁটি ছন্দটিকে লোকসাহিত্যের আসন থেকে উন্নীত করে সর্বপ্রকার রসসাহিত্যের উপযুক্ত বাহনরূপে অসংকোচে নিষ্পত্ত করেছেন এবং এ ছন্দটিকে যথোচিতরূপে মার্জিত ও নিয়ন্ত্রিত করে বহু শাখাপ্রশাখায় লীলায়িত করে বাংলার ছন্দভাণ্ডারকে পরিপূর্ণ করে তুলেছেন। বাংলার এই খাঁটি ছন্দের শক্তি, সৌন্দর্য ও বৈচিত্র্যের আবিষ্কারের দ্বারা তিনি

আমাদের কাব্যসাহিত্যের যে সম্পদ বৃদ্ধি করেছেন তার পরিমাপ নেই।

অক্ষরবৃত্ত ছন্দের ভিতরকার গঠনকৌশলও তাঁরই হাতে পূর্ণতা লাভ করেছে। এটি বাংলা ভাষার আদিম ছন্দ না হলেও প্রাচীন বাংলা সাহিত্যের প্রধান বাহন। কৃত্তিবাস ও কাশীরাম দাস বাংলা রামায়ণ ও মহাভারত রচনার সময়ে এই অক্ষরবৃত্তকেই অবলম্বন করেছিলেন। কিন্তু অক্ষরবৃত্তকে তার বর্তমান সৌষ্ঠব ও হ্রস্বগতি দান করতে বাংলার প্রাচীন কবিদের বহু শতাব্দী সময় লেগেছে। বহুকাল ধাবৎ বহু কবির অক্লান্ত পরিশ্রম, পরীক্ষা ও প্রয়াসের ফলে অক্ষরবৃত্ত তার বর্তমান রূপে উপনীত হয়েছে। এ ছন্দটি মূলে মাত্রিক না ধ্বনিসংখ্যক, এর পর্বগঠন কিরূপ হবে, প্রতি পংক্তিতে কয়টি 'অক্ষর' থাকবে, যতিস্থাপনের বিধি কিরূপ, এর প্রকারভেদ কি উপায়ে উৎপন্ন করা যায়, ইত্যাদি সমস্ত বিষয়েই প্রাচীন কবিদের মনে সর্বদাই সংশয় থেকে যেত। তাই প্রাচীন কাব্যগুলিতে দেখতে পাই, এ ছন্দ কোথাও মাত্রিক, কোথাও স্বরসংখ্যক, এর পর্বগঠন ও যতিস্থাপন অনিয়মিত, প্রতি পংক্তির অক্ষরসংখ্যাও অনির্দিষ্ট। প্রকৃতপক্ষে একদিকে সংস্কৃত ছন্দের প্রভাব ও অক্ষরগোনার প্রয়াস, অন্যদিকে মাত্রা বা স্বরসংখ্যা নির্দিষ্ট করার স্বাভাবিক প্রবৃত্তি, তার উপরে সমস্ত ছন্দ স্থর করে গানের ভঙ্গিতে আবৃত্তি করার প্রথা, এই সমস্ত বিভিন্ন প্রভাবের ফলে এ ছন্দটি একটি হুনির্দিষ্ট আকার লাভ করতে পারে নি। শক্তিমান কবি মুকুন্দরামের চণ্ডীকাব্যেও এ ছন্দকে একটা অনিয়মিত অবস্থার মধ্যে দেখতে পাই। ভারতচন্দ্রের ছন্দবোধ অসাধারণ ছিল সন্দেহ নেই এবং তাঁর হাতেই এ ছন্দ সর্বপ্রথমে কতকটা নির্দিষ্ট আকার লাভ করে। কিন্তু ভারতচন্দ্রও এ ছন্দের প্রকৃত স্বরূপ উপলব্ধি করতে পারেন নি। তাই দেখতে পাই অন্নদামঙ্গল কাব্যে পয়ারের পংক্তিতে যদিও অক্ষরসংখ্যা সর্বত্রই চোদ্দ ঠিক আছে এবং মিলের রীতিও হুনির্দিষ্ট হয়ে এসেছে, তথাপি বহু স্থলেই যতিস্থাপন বিষয়ে শৈথিল্য দেখা যায়। অথচ যতিস্থাপনবিধি এবং পর্বগঠন প্রণালীই ছন্দের মূল কথা। ভারতচন্দ্রের কাব্যে পয়ারের যতিস্থাপনবিধির অনিশ্চয়তার একটা দৃষ্টান্ত দিচ্ছি।—

কান্দে রাণী মেনকা চক্ষুর জলে ভাসে।

নখে নখে বাজায়ে নারদ মূনি হাঙ্গে ॥

—কমল ও শিবলিঙ্গা, অন্নদামঙ্গল, ভারতচন্দ্র

এ দৃষ্টান্তটির উভয় পংক্তিতেই সাত অক্ষরের পরে যতি পড়েছে। কিন্তু

অক্ষরবৃত্তের একটি নিয়ম এই যে, এ ছন্দ প্রতি পংক্তির আদি, মধ্য, অন্ত কোথাও অসমসংখ্যক অক্ষরকে স্বীকার করে না। কাজেই সাত অক্ষরের পরে যতিস্থাপন এ ছন্দের স্বভাববিরুদ্ধ।

আধুনিক কালে মধুসূদন দত্ত অসাধারণ প্রতিভা নিয়ে বাংলা কাব্যের জগতে অবতীর্ণ হয়েছিলেন। তাঁর প্রতিভার স্পর্শে অক্ষরবৃত্ত ছন্দে নবশক্তির সঞ্চার হল। তিনি যেদিন থেকে পয়ারের সংকীর্ণতা ঘুচিয়ে দিলেন সেদিন থেকেই ওই ছন্দে যথার্থ মহাকাব্য রচনা করা সম্ভবপর হল। কিন্তু তাঁর অসামান্য শক্তির কাছেও এ ছন্দের প্রকৃত স্বরূপটি ধরা পড়ে নি। “মেঘনাদবধ কাব্যে” অক্ষরবৃত্ত ছন্দের সত্ত্বমুক্ত প্রবল শক্তির প্রচুর পরিচয় যেমন আছে তেমনি ও ছন্দ ব্যবহারের বহু ত্রুটিবিচ্ছৃতির নিদর্শনও রয়েছে। যথা—

সম্মুখ সমরে পড়ি, বীরচূড়ামণি  
বীরবাহ, চলি যবে গেলা যমপুরে  
অকালে।

“মেঘনাদবধ কাব্যে”র এই প্রথম পংক্তি-কয়টিতেই অক্ষরবৃত্ত ছন্দের শক্তি এবং যতিস্থাপনের ত্রুটির প্রমাণ রয়েছে। মধুসূদন পংক্তির যে-কোনো স্থানে যতিস্থাপন করতে দ্বিধা করতেন না। অথচ অসমসংখ্যক অক্ষরের পর যতিস্থাপন এ ছন্দের প্রকৃতিবিরুদ্ধ এ কথা পূর্বেই বলা হয়েছে। তাঁর “আত্মবিলাপ” থেকে আর-একটি দৃষ্টান্ত দিচ্ছি।—

নিশার স্বপন-সুখে স্থখী যে কি স্থখ তার ?

জাগে সে কাঁদিতে।

ক্ষণপ্রভা প্রভাদানে বাড়ায় মাত্র আঁধার,

পথিকে ধাঁধিতে!...

মাংসর্ষ-বিষদশন কামড়ে রে অশুক্ষণ,

এই কি লভিলি লাভ অনাহারে অনিদ্রায় ?

এই পংক্তি-কয়টিতে দুই জায়গায় অক্ষরবৃত্ত ছন্দের সংগতি নষ্ট হয়েছে। ‘বাড়ায় মাত্র আঁধার’ এবং ‘মাংসর্ষ-বিষদশন’, এ দুটি পদে এ ছন্দের একটি নিয়ম লঙ্ঘিত হয়েছে। এ ছন্দে কখনও তিন-দুই-তিন কিংবা দুই-তিন-তিন এই পর্যায়ে অক্ষর বিস্তার করা সংগত নয়, তাতে ঐতিকটুতা দোষ ঘটে। চার-চার কিংবা তিন-তিন-দুই, এই হচ্ছে এ ছন্দের অক্ষরসমাবেশের বিধি।



‘বাড়ায় শুধু আঁধার’ কিংবা ‘শুধু বাড়ায় আঁধার’, কোনোটাই ভালো শোনায় না। কিন্তু ‘বাড়ায় আঁধার শুধু’ কিংবা ‘আঁধার বাড়ায় শুধু’ বললে বেশ ভালো শোনায়। তেমনি ‘মাৎসর্য-বিষদশন’ না বলে ‘মাৎসর্যের বিষদন্ত’ বললেই ঠিক শোনাতে।

রবীন্দ্রনাথই সর্বপ্রথমে অক্ষরবৃত্ত ছন্দের স্বরূপ উপলব্ধি করেছেন, এ কথা নিঃসংশয়ে বলা যেতে পারে। তাঁর স্বাভাবিক ছন্দবোধশক্তিই তাঁকে এ ছন্দের ষথার্থ পথে চালিত করেছে। তাই তাঁর রচিত অক্ষরবৃত্ত ছন্দে পূর্বোক্ত দোষগুলো সমস্তে পরিত্যক্ত হয়েছে। আর, তাঁরই রচনা থেকে এ কথা সর্বপ্রথমে বোঝা গেল যে, অক্ষরবৃত্ত আসলে একটি মিশ্রপ্রকৃতির ছন্দ। গোড়ায়, লিখিত হরফ বা অক্ষরের সংখ্যা গুনে রচনা করার প্রথা থেকেই এ ছন্দের উৎপত্তি হয়েছে এবং বর্তমানেও প্রধানতঃ অক্ষরসংখ্যা গুনেই এ ছন্দ রচিত হয়। তাই এ ছন্দের নাম দেওয়া হয়েছে অক্ষরবৃত্ত।

কিন্তু আসলে অক্ষরসংখ্যা এ ছন্দের মূলগত তত্ত্ব নয়। ধ্বনিবিচারহীন অক্ষরসংখ্যা কোনো ছন্দেরই মৌলিক তত্ত্ব হতে পারে না। গোড়া থেকেই অক্ষরসংখ্যা দেখে রচনা করার অভ্যাস থাকার ফলে এ ছন্দের স্বরূপ আবিষ্কৃত হতে এত বিলম্ব ঘটেছে। এ ছন্দের স্বরূপ এই যে, এর প্রত্যেক শব্দের শেষ অংশের (সিলেব্-এর) প্রকৃতি মাত্রিক (quantitative) এবং বাকি অংশের প্রকৃতি স্বরসংখ্যক (syllabic)। একস্বর শব্দের ধ্বনিটিকে প্রান্তিক বলেই গ্রহণ করতে হয়; স্তত্রাং-এ-প্রকার শব্দের ধ্বনিটিও মাত্রিক প্রকৃতির। একটা দৃষ্টান্ত দিচ্ছি।—

। ॥ । ॥ । । । ।

প্রান্তর-সীমায়, ছায়াবটে

। । । । ॥ । । ॥

মৌনব্রত বউ-কথা-কণ্ঠ।

—হেমন্ত, নটরাজ

এখানে প্রত্যেক শব্দের অন্তস্থিত যুগ্মধ্বনি (যুগ্মদণ্ড চিহ্নযোগে নির্দিষ্ট) দ্বিমাত্রিক রূপে উচ্চারিত ও গৃহীত হয়েছে। কিন্তু আদি বা মধ্যস্থিত যুগ্মধ্বনি একমাত্রিক বলেই গণ্য হয়েছে। বিশেষ লক্ষ করার বিষয়—এখানে ‘বউ’ কথাটিতে দুই ধরা হয়েছে, ‘বউ’ না লিখে যদি ‘বৌ’ লেখা হত, তাহলে

অক্ষরসংখ্যা কমে গেলেও ছন্দ ঠিকই থাকত এবং 'বোঁ' কথাটিকেও দ্বিমাত্রিক বলেই গণ্য করতে হত। অউ-কার অর্থাৎ ঔ-কারের মতো যদি অও-কারের জন্ত একটি স্বতন্ত্র সংকেতলিপি থাকত, তাহলে 'কও' কথাটির দ্বিমাত্রিকতা অব্যাহতই থাকত। 'বউ-কথা-কও' কথাটিকে ছ'টি অক্ষরের সাহায্যেই লেখা হক, কিংবা চার অক্ষরের সাহায্যেই লেখা হক, এ কথাটি অক্ষরবৃত্ত ছন্দে সর্বদাই 'ছয়' বলেই গৃহীত হবে। কারণ এখানে অউ- এবং অও- শব্দের প্রাস্তে আছে। পক্ষান্তরে 'মোন' কথাটিকে যদি 'মউন্'-রূপে লেখা হয় তা হলেও এ শব্দটি দুই অক্ষরের শব্দ বলেই গণ্য হবে। কারণ এখানে অউ-কার শব্দের প্রাস্তে অবস্থিত নয়। এটিই হচ্ছে অক্ষরবৃত্ত ছন্দের মূল তত্ত্ব। এ তত্ত্বটি রবীন্দ্রনাথের রচনায় বেকাপ অব্যাহত আছে, তাঁর পূর্ববর্তী অল্প কোনো কবির রচনাতেই তেমন অব্যাহত নেই। রবীন্দ্রনাথের রচনাতেও এ নিয়মের দু-একটি ব্যতিক্রম দেখা যায়। কিন্তু তাঁর রচিত বিপুল কাব্যসাহিত্যে সে দু-একটি ব্যতিক্রম অতি নগণ্য। দৃষ্টান্ত দিচ্ছি।—

কুর্চি, তোমার লাগি' পদ্যেরে ভুলেছে অগ্নমনা

ষে-ভ্রমর, শুনি নাকি তারে কবি করেছে ভৎসনা।

—কুর্চি, বনবাণী

জ্যোৎস্না ডালের ফাঁকে

হেথা আল্পনা আঁকে,

এ নিকুঞ্জ জানো আপনার।

—চামেলি-বিতান, বনবাণী

অক্ষরবৃত্তের নিয়ম অনুসারে 'কুর্চি' ও 'জ্যোৎস্না' শব্দে দুই এবং 'আল্পনা' শব্দে তিন অক্ষর ধরা উচিত। এ স্থলে তা হয় নি বলে এ তিনটি শব্দকেই একটু টেনে বিলম্বিত উচ্চারণ করতে হচ্ছে। যদি লেখা হত—

শুভ্র জ্যোৎস্না শাখা-ফাঁকে

হেথায় আল্পনা আঁকে

তাহলে খারাপ শোনাত না এবং ধ্বনিটি একটু দৃঢ় হত। আরেকটি দৃষ্টান্ত দিচ্ছি।—

উদয়-দিক্‌প্রান্ত-তলে নেমে এসে

—পটিশে বৈশাখ, পূরবী

এখানে 'দিক্‌প্রাস্ত' শব্দে তিন 'অক্ষর' ধরা হয়েছে। কিন্তু 'দিক্' কথাটি অস্ত্র কথার সঙ্গে সমাসবদ্ধ হলেও একটি স্বতন্ত্র শব্দ এবং এর অন্তরে একটি যুগ্মধ্বনি রয়েছে। স্তরাং অক্ষরবৃত্তের নিয়ম অনুসারে এই একস্বর শব্দটিকে দ্বিমাত্রিক বলেও ধরা যায় এবং তাহলে 'দিক্‌প্রাস্ত' কথাটিতে তিন না ধরে চার ধরতে হবে। স্তরাং

• উদয়ের দিক্‌প্রাস্ত-তলে নেমে এসে  
এরূপ লিখলেও অক্ষরবৃত্তের নিয়ম অব্যাহত থাকত। রবীন্দ্রনাথ নিজেই অস্ত্র 'দিক্‌প্রাস্ত' কথাটিতে তিন না ধরে চার ধরেছেন। যথা—

চলেছে উজান গৈলি' তরণী তোমার,  
দিক্‌প্রাস্তে নামে অন্ধকার।

—নববধু, মহয়া

দিক্‌প্রাস্তে তারি ওই ক্ষীণ নম্র কলা  
নীরবে বলুক আজি আমাদের সব কথা বলা।

—প্রভাগত, মহয়া

অক্ষরবৃত্ত ছন্দেও যে মাত্রিক গণনারীতির স্থান আছে তার প্রমাণ এই যে উদ্ভূত দ্বিতীয় দৃষ্টান্তটিতে যদি 'ওই' না লিখে 'ঐ' লেখা হত তাহলে 'অক্ষর'-সংখ্যা কমে যেত বটে, কিন্তু অক্ষরবৃত্ত ছন্দ অব্যাহতই থাকত। আরও দৃষ্টান্ত দিচ্ছি।—

উদয়-দিগন্তে ঐ শুভ্র শস্য বাজে।

—পচিশে বৈশাখ, পুরবী

ঐ নামে একদিন ধরা হল দেশে দেশান্তরে  
তব জন্মভূমি।

—বুদ্ধদেবের প্রতি, প্রবাদী ১৩৩৮ অগ্রহায়ণ

উদ্ভূত পংক্তি-দুটিতে 'অক্ষর'-সংখ্যা কম আছে কিন্তু 'ঐ' শব্দে দুমাত্রা রয়েছে বলে ছন্দ অক্ষরই আছে।

অক্ষরবৃত্তের মাত্রিক প্রকৃতি সম্বন্ধে অস্ত্র বিস্তারিত আলোচনা করেছি (বিচিত্রা ১৩৩৮ অগ্রহায়ণ)। স্তরাং এ স্থলে এ বিষয়ের পুনরালোচনা নিম্নয়োজন।

মাজাবৃত্ত ও স্বরবৃত্ত, ছন্দের এ দুটি ধারাই বাংলা সাহিত্যে রবীন্দ্রনাথের দান

এবং অক্ষরবৃত্ত ছন্দও তাঁরই হাতে পূর্ণতা লাভ করেছে। বাংলা ভাষার ধ্বনি, উচ্চারণরীতি ও ছন্দের অন্তঃপ্রকৃতি সম্বন্ধে গভীর দৃষ্টি নিয়ে রচনাকার্যে প্রবৃত্ত হয়ে তিনি বাংলা ছন্দে মাত্রিক (quantitative), স্বরসংখ্যক (syllabic) ও মিশ্র (অক্ষরবৃত্ত) —এই তিনটি বিভিন্ন পদ্ধতি আবিষ্কার করতে সমর্থ হয়েছেন।

ধ্বনির একক বা unit নির্ণয়ের তিনটি স্বতন্ত্র প্রণালী থেকেই ছন্দের এই তিনটি ধারার উৎপত্তি হয়েছে। কিন্তু কয়েকটি unit-এর বিভিন্ন সমাবেশের ফলে যে ছন্দপর্ব গঠিত হয় তার উপরেই ছন্দের ভিতরকার গঠনকৌশল নির্ভর করে। ছন্দপর্ব নির্মাণব্যাপারেও রবীন্দ্রনাথের কৃতিত্ব ও কৌশল অপরিমীম। ছন্দের ধ্বনিপ্রবাহের দৃষ্টি যতির মধ্যবর্তী যে অংশ তারই নাম পর্ব (measure)। ছন্দে যতিস্থাপনের বিভিন্ন পদ্ধতি থেকে বিভিন্ন প্রকারের পর্বের উৎপত্তি হয়। রবীন্দ্রনাথ যে কত বিচিত্র উপায়ে ছন্দে যতিস্থাপন ও পর্বগঠন করেছেন তা সত্যই বিস্ময়কর। তিনি যে শুধু নব নব বিচিত্র পর্বগঠন-পদ্ধতির উদ্ভাবন করেছেন তা নয়। তিনি বহু প্রচলিত ছন্দপর্বকে পরিবর্তিত ও হ্রসংগত করেছেন, স্থলবিশেষে পরিত্যাগও করেছেন। এ বিষয়ে সংক্ষেপে দু-একটি কথা বলা প্রয়োজন।

প্রথমেই মাত্রাবৃত্তের কথা। প্রতি পর্বে চার, পাঁচ, ছয় কিংবা সাত মাত্রা করে থাকতে পারে। এই হিসাবে মাত্রাবৃত্ত ছন্দকে চার ভাগে বিভক্ত করা যায়।

চতুর্মাত্রিক ছন্দ সম্বন্ধে এ স্থানে আলোচনা করব না।

পঞ্চমাত্রিক ছন্দ গীতগোবিন্দে ব্যবহৃত হয়েছে। কিন্তু প্রাচীন বাংলা সাহিত্যে পঞ্চমাত্রিক ছন্দের দৃষ্টান্ত আছে বলে মনে হয় না। জয়দেবের “অহহ কলয়ামি বলয়াদি-মণিভূষণং” কিংবা “বদসি যদি কিঞ্চিদপি দন্তরুচি-কৌমুদী” ইত্যাদি ছন্দের অহসরণ করেই রবীন্দ্রনাথ বাংলায় পঞ্চমাত্রিক ছন্দের প্রবর্তন করেন। এখন পঞ্চমাত্রিক ছন্দ আমাদের কবিদের একটি অতি প্রিয় ছন্দ হয়ে দাঁড়িয়েছে। এটি বাংলা সাহিত্যে রবীন্দ্রনাথের একটি বিশেষ দান। দৃষ্টান্তস্বরূপ তাঁর ‘মদনভস্মের পূর্বে’, ‘মদনভস্মের পরে’ প্রভৃতি কবিতা উল্লেখযোগ্য।

কিন্তু মাত্রাবৃত্তের ক্ষেত্রে রবীন্দ্রনাথের সর্বশ্রেষ্ঠ দান হচ্ছে ষষ্ঠ্যত্রিক ছন্দ। সংস্কৃত সাহিত্যে এ ছন্দের অহরূপ কোনো ছন্দ আছে বলে মনে হয় না। প্রাচীন বাংলা সাহিত্যে ষষ্ঠ্যত্রিকের দৃষ্টান্ত আছে। যথা—

ঈষৎহাসিত বয়ান-চন্দ

তরুণী-নয়ন নয়ন-ফন্দ ।

বিশ্ব-অধরে মুরলী খুরলী,

জিহ্বনমনোমোহিনী ।

—গোবিন্দদাস

কিন্তু প্রাচীন কবির কেউ এ ছন্দের মথার্থ মর্গাদা উপলব্ধি করতে পারেন নি এবং এ ছন্দের প্রকৃত বাংলা আকৃতি কি হবে তা নিঃসংশয়ে স্থির করতে পারেন নি । অনেক স্থলেই তাঁরা যুক্তবর্ণের বাহুল্য এবং সংস্কৃত রীতিতে ব্রহ্মদীর্ঘ উচ্চারণপদ্ধতি অবলম্বন করেই এ ছন্দ ব্যবহার করেছেন । কিন্তু রবীন্দ্রনাথই সর্বপ্রথমে এ ছন্দের স্বরূপ ও মর্গাদা উপলব্ধি করে একে বাংলার উচ্চারণরীতিতে রূপান্তরিত করে বাংলা ছন্দভাণ্ডারের ঐশ্বর্য বৃদ্ধি করেছেন । যগাত্মিক ছন্দ যে বাংলা সাহিত্যের কত বড় সম্পদ তা সাহিত্যাত্মরাগীমাত্রই জানেন । রবীন্দ্রনাথ যদি এ ছন্দের প্রবর্তন না করতেন তবে বাংলা কাব্যজগতের একটি বৃহৎ মহাদেশই অনাবিষ্কৃত রয়ে যেত । বর্তমানে বাংলা গীতিকবিতা, গাথা প্রভৃতি বহু ধরনের অসংখ্য কবিতারই বাহন এই যগাত্মিক ছন্দ । দৃষ্টান্ত দেওয়া বাহুল্য । শুধু এটুকু বললেই যথেষ্ট হবে যে, পূর্বোক্ত “মানসী”র ‘ভুল-ভাঙা’ কবিতাটিই বাংলার প্রথম খাটি যগাত্মিক ছন্দের কবিতা ।

সপ্তযাত্মিক ছন্দ ও যগাত্মিকেরই মতো সংস্কৃত সাহিত্যে অজ্ঞাত এবং প্রাচীন বাংলা সাহিত্যে প্রথম প্রবর্তিত । দুটি দৃষ্টান্ত দিচ্ছি ।—

নন্দনন্দন-চন্দ চন্দন-গন্ধনিন্দিত-অঙ্গ ।

জলদম্বন্দর কঙ্ককঙ্কর নিন্দি সিদ্ধুর ভঙ্গ ॥...

কঞ্জলোচন কলুষমোচন শ্রবণরোচন-ভাষ ।

অমলকোমল-চরণকিশলয়-নিলয়-গোবিন্দদাস ॥

—গোবিন্দদাস

কমল-পরিমল                      লয়ে শীতল জল,

পবনে ঢল ঢল উছলে কূলে ।

বসন্ত রাজা আনি              ছয় রাগিণী রাগী

করিল রাজধানী অশোকমূলে ॥

—অন্নশূর্য্যর অধিষ্ঠান, অন্নদামঙ্গল, ভারতচন্দ্র

প্রথম দৃষ্টান্তটি সংস্কৃত পদ্ধতিতে রচিত। বাংলার উচ্চারণরীতি এখানে পীড়িত হয়েছে এবং এক স্থলে (‘গোবিন্দদাস’) ছন্দে ত্রুটি ঘটেছে। দ্বিতীয় দৃষ্টান্তটিতে বাংলার উচ্চারণরীতি বজায় আছে। কিন্তু ছন্দ নিখুঁত নয় এবং বিশেষভাবে একটি শব্দের (‘বসন্ত’) দ্বারাই প্রমাণিত হয় যে, এ ছন্দটি অক্ষর গুণেই রচিত হয়েছে, ধ্বনির মাত্রাবিচার স্বীকৃত হয় নি। রবীন্দ্রনাথই সর্বপ্রথমে এ ছন্দকে নিখুঁত এবং খাঁটি বাংলা পদ্ধতিতে সাহিত্যে প্রবর্তন করেছেন।—

হৃদয় আজি মোর কেমনে গেল খুলি’,

জগৎ আসি’ সেখা করিছে কোলাকুলি।

—প্রভাত-উৎসব, প্রভাত-সংগীত

“প্রভাত-সংগীত”—এর উদ্ভূত পংক্তি-দুটি এ ছন্দের একটি সুপরিচিত দৃষ্টান্ত। কিন্তু তখনও রবীন্দ্রনাথ মাত্রাবৃত্ত ছন্দের প্রবর্তন করেন নি। তাই তিনি ধ্বনিসংগতি রক্ষার জন্তে এই কবিতাটিতে সমস্ত যুক্তাক্ষরকে বর্জন করে চলেছেন। কিন্তু পরবর্তী কালে এ ছন্দে যুগ্মধ্বনি ব্যবহারের দ্বারা অতি চমৎকার কবিতা রচিত হয়েছে।

মাত্রাবৃত্ত ছন্দে বিভিন্ন প্রকারের পর্ব গঠন করেই রবীন্দ্রনাথ নিরন্তর হন নি। নানা প্রকারের পর্বের একত্র সমাবেশের দ্বারাও তিনি ছন্দে বহু বৈচিত্র্যের সৃষ্টি করেছেন। উদাহরণ দিচ্ছি।—

ছিলাম নিশিদিন আশাহীন প্রবাসী,

বিরহ-তপোবনে আনমনে উদাসী।

—বিরহানন্দ, মানসী

এ স্থলে এ কথা বলা প্রয়োজন যে, অগ্রজ কবি দ্বিজেন্দ্রনাথের “স্বপ্নপ্রয়াণ” কাব্যের প্রভাব রবীন্দ্রনাথের উপরে কতখানি পড়েছে তার পরিচয় তিনি “জীবনস্মৃতি”তেই বিশেষভাবে দিয়েছেন। রবীন্দ্রনাথের ছন্দের আলোচনায় “স্বপ্নপ্রয়াণ” কাব্যের ছন্দের আলোচনা করাও বিশেষ প্রয়োজন মনে করি। এ স্থলে সে কার্যে অগ্রসর হওয়া আমাদের পক্ষে সম্ভব নয়। তথাপি শুধু উদ্ভূত দৃষ্টান্তটির সঙ্গে নিম্নলিখিত পংক্তিগুলিকে মিলিয়ে দেখলেই এ কথার স্বাধার্য বোঝা যাবে।—

হু’-সখী, এইরূপে, চুপে চুপে কহিল কত।

শোভা, কবির সনে, আলাপনে, হইল রত ॥

কখনো চড়ে গিরি, ধীরি ধীরি ; কখনো সবে  
নদীর ধারে ধারে, পদ চারে, নবোৎসবে ॥

—স্বপ্নপ্রয়াণ, দ্বিতীয় সর্গ, ১১৬

রবীন্দ্রনাথের পর্বসমাবেশের আর-একটি দৃষ্টান্ত দিয়েই এ প্রসঙ্গ সমাপ্ত করব।—

গাহিছে কাশীনাথ নবীন যুবা ধ্বনিতে সভাগৃহ ঢাকি',  
কণ্ঠে খেলিতেছে সাতটি স্বর সাতটি যেন পোষা পাখী ।

—গানভঙ্গ, সোনার তরী

“কথা”র ‘মস্তকবিক্রয়’ কবিতাটিও এই ছন্দেই রচিত। শুধু একটি অতিরিক্ত মিলের জন্তই অধিকতর ঋতিমধুর হয়েছে।

স্বরবৃত্ত ছন্দে রবীন্দ্রনাথ প্রধানতঃ চতুঃস্বর পর্বকেই অবলম্বন করেছেন। দ্বিস্বর বা ত্রিস্বরের পর্ব তিনি রচনা করেন নি। কিন্তু ত্রিস্বর ও চতুঃস্বরের যোগে তিনি পর্বগঠনের বৈচিত্র্য সৃষ্টি করেছেন। যথা—

আঙনের পরশমণি ছোঁয়াও প্রাণে ।  
এ জীবন পুণ্য করো দহন-দানে ।

—১৮, গীতালি

অক্ষরবৃত্তের পর্বগঠন সম্বন্ধে এ তত্ত্বটি তাঁরই রচনায় প্রথমে প্রকাশিত হয়েছে যে, ও-ছন্দ কোথাও অসমসংখ্যক অক্ষরকে স্বীকার করে না। হুতরাং প্রাচীন কবিরা যে-সব ছন্দোবন্ধে তিন, পাঁচ, সাত প্রভৃতি অসমসংখ্যক অক্ষরের ব্যবস্থা করেছিলেন, তিনি সে-সব ছন্দোবন্ধকে অক্ষরবৃত্ত থেকে মাত্রাত্মক এবং স্থলবিশেষে স্বরবৃত্তের এলাকায় স্থানান্তরিত করেছেন। তাঁরই রচনা থেকে এ কথা স্পষ্টরূপে প্রতিপন্ন হয়েছে যে, অক্ষরবৃত্ত ছন্দগঠনের মূল উপাদান চার অক্ষরের পর্ব। অক্ষরবৃত্ত আসলে চতুরক্ষর পর্বেরই ছন্দ। কিন্তু বহু স্থলে দুটি পর্বের সংযোগে আট অক্ষরের এক-একটি যুক্তপর্ব এ ছন্দকে একটি বিশেষ গাভীর দান করে। আবার চার অক্ষরের একটি পূর্ণপর্ব এবং দুই অক্ষরের একটি অর্ধপর্বের সংযোগেও অনেক সময় এক-একটি যুক্তপর্বের উৎপত্তি হয়। কিন্তু এ ধরনের খণ্ডিত যুক্তপর্ব সচরাচর পংক্তির শেষ প্রাপ্ত ব্যতী, অগ্রত্ব স্থাপিত হয় না। চার অক্ষরের পূর্ণপর্ব, আট অক্ষরের যুক্তপর্ব এবং ছয় অক্ষরের সার্থপর্ব, এ তিনটি উপাদানেই সমস্ত অক্ষরবৃত্ত ছন্দ রচিত হয়েছে।

কতকটা অস্পষ্টভাবে হলেও মধুসূদনই এ তত্ত্বটি প্রথম অলুভব করেছিলেন। তাই তিনি পর্বগঠন ও যতিস্থাপনের বৈচিত্র্যের দ্বারা বাংলায় অমিত্রাক্ষর ছন্দের প্রবর্তন করতে সমর্থ হয়েছিলেন। কিন্তু এ তত্ত্বটি তিনি কখনও স্পষ্টরূপে প্রত্যক্ষ করেন নি। তাই “মেঘনাদবধ” কাব্যে ছন্দের এমন প্রবল গতিবেগ থাকা সত্ত্বেও বহু স্থানেই ছন্দপতন ঘটা সম্ভবপর হয়েছে এবং সেজন্যই তাঁর রচনায় “বন অতি রমিত হইল ফুল-ফুটনে” ইত্যাদি রকমের ছন্দবিকৃতির সাক্ষাৎ পাই। যা হক্, এ কথা মনে রাখা উচিত যে, অমিত্রাক্ষর ছন্দেও অমিত্রাক্ষরতাই আসল কথা নয়। বাংলা পয়ার ছন্দে মিলের অভাব ঘটানোই মধুসূদনের কৃতিত্ব নয়। পয়ারের সংকীর্ণতা অর্থাৎ ও-ছন্দে পর্বগঠন ও যতিস্থাপনে যে একটা একঘেয়ে ভাব ছিল, সেটাকে ঘুচিয়ে দিয়ে পর্বগঠন ও যতিস্থাপনে বৈচিত্র্য ঘটিয়ে কবির ভাবকে দুটি মাত্র পংক্তির গণ্ডি থেকে মুক্তি দিয়ে বহু পংক্তির মধ্যে স্বাধীনতা দেওয়াতেই মধুসূদনের কৃতিত্ব। পয়ার ছন্দের দুর্বলতাই এই যে, ও-ছন্দে প্রতি পংক্তির অন্তে পূর্ণযতি স্থাপন করতেই হবে এবং দুটি মাত্র পংক্তির মধ্যেই একটি ভাবকে সমাপ্ত করা চাই। তাই মধুসূদনের বিদ্রোহী মন পয়ারের এই সংকীর্ণ গণ্ডির বিরুদ্ধে উত্তত হয়ে কবির ভাবকে পংক্তির পর পংক্তিতে ছড়িয়ে দিল। তাঁর প্রবর্তিত ছন্দে পংক্তি যেখানে শেষ হয়, ভাব ও ছন্দের প্রবাহ সেখানেই বিরত হয় না। ভাব ও ছন্দের এই প্রবাহমানতা (enjambement)-ই মধুসূদনের বিশেষ দান। “মেঘনাদবধ”-এর বিশেষত্বই হচ্ছে ওই enjambement বা প্রবাহমানতা; অমিত্রাক্ষরতা ওই ছন্দের অচ্ছেদ্য অঙ্গ নয়। সুতরাং “মেঘনাদবধ”-এর ছন্দকে অমিত্রাক্ষর ছন্দ বললে সব কথা, এমন কি আসল কথাটিই বলা হয় না। Blank verse-এর বাংলা নাম ‘অমিত্রাক্ষর’ হতে পারে; কিন্তু অমিত্রাক্ষরতা blank verse-এরও মূল কথা নয়। সুতরাং মধুসূদনের প্রবর্তিত ছন্দের যদি কোনো বর্ধার্থ নাম দিতে হয় তবে তাকে বলা উচিত ‘প্রবাহমান পয়ার’ ছন্দ। এ ছন্দ অ-মিলও হতে পারে, স-মিলও হতে পারে। মিলের অভাবে কিংবা সদ্ভাবে এর আসল প্রকৃতিতে কোনো পার্থক্য ঘটে না।

মধুসূদনের প্রবর্তিত ছন্দ সম্বন্ধে এতটা বিস্তৃত আলোচনা করার উদ্দেশ্য আছে। সেটি হচ্ছে এই যে, ও-ছন্দও রবীন্দ্রনাথের হাতে এসেই পূর্ণতা লাভ করেছে। কি ভাবে করেছে সে কথা আলোচনা করার বিশেষ সার্থকতা আছে। মধুসূদনের ছন্দের পূর্ণ পরিচয়জ্ঞাপক নাম হচ্ছে—অমিল প্রবাহমান পয়ার। কিন্তু



রবীন্দ্রনাথ দেখলেন যে, মিলের অভাবটাই ছন্দের আসল তত্ত্ব নয়; বরং অগ্ৰাণ্ড সকল ছন্দেরই মতো ও-ছন্দেও মিল থাকার একটা সার্থকতা আছে। মিল ছন্দের অপরিহার্য অঙ্গ না হলেও ছন্দের একটি অতি প্রধান অঙ্গ, সে বিষয়ে কোনো সন্দেহ নেই। রবীন্দ্রনাথ “চিত্তাঙ্গদা”, “বিসর্জন”, “রাজা ও রানী” প্রভৃতি নাট্যকাব্যে অমিল প্রবহমান পয়ার ছন্দই ব্যবহার করেছেন, কারণ নাট্যকাব্যে মিল না থাকার সার্থকতা আছে। কিন্তু অগ্ৰ সর্বত্রই তিনি ওই ছন্দে সর্বদাই মিল রক্ষা করেন। তাঁর স-মিল প্রবহমান পয়ারের চমৎকার দৃষ্টান্তস্বরূপ তাঁর ‘মেঘদূত’, ‘যেতে নাহি দিব’, ‘মানসহৃন্দরী’, ‘বহুস্করা’ প্রভৃতি কবিতার উল্লেখ করা যেতে পারে।

প্রবহমান পয়ার সম্বন্ধে এ স্থলে আর-একটি কথা বলা প্রয়োজন। বাংলা সাহিত্যে বহুকাল যাবৎ চোন্দ্র অক্ষরের পয়ারই চলে আসছে। কিন্তু পয়ারকে শুধু চোন্দ্র অক্ষরের মধ্যেই সীমাবদ্ধ করে রাখতে হবে, এমন অপরিহার্য কোনো বিধান নেই। তাই ষোল অক্ষরের পয়ার রচনার প্রয়াস অনেকেই করেছেন। রবীন্দ্রনাথও এক সময়ে ষোল অক্ষরের পয়ার রচনা করেছেন। কিন্তু অক্ষরবৃত্ত ছন্দের আর-একটি স্বভাব হচ্ছে এই যে, এই ছন্দ সর্বদাই প্রতি পংক্তির শেষ প্রান্তে একটি করে ছয় অক্ষরের সার্বপর্বে অপেক্ষা রাখে, তাই চোন্দ্র স্থানে ষোল অক্ষরের পয়ার অক্ষরবৃত্ত ছন্দে সুবিধাজনক হ'ল না। রবীন্দ্রনাথ পরবর্তী কালে ষোল অক্ষরের পয়ার রচনা করেন নি এবং আজকালকার কবিরাও তা করেন না। কিন্তু পয়ার ছন্দে যদি দ্বিতীয় পর্বে পরেই চার অক্ষরের আর-একটি পর্ব যোগ করে দেওয়া যায় তবে আঠারো অক্ষরের একটি চমৎকাঃ নতুন ধরনের পয়ারের উৎপত্তি হয়। এ ছন্দের নাম দেওয়া যায় ‘বর্ধিত পয়ার’। দ্বিজেন্দ্রনাথের স্বপ্নপ্রয়াণ কাব্যে এই বর্ধিত পয়ার ছন্দের প্রথম দৃষ্টান্ত পাই। তার পরে রবীন্দ্রনাথের হাতে এসে এ ছন্দ যে কি শক্তি ও সৌষ্ঠব অর্জন করেছে তা অজানা নেই। এখন এ ছন্দটি বাংলা কাব্যলক্ষ্মীর অতি প্রিয় বাহন-রূপেই গৃহীত হয়েছে। তার কারণ রবীন্দ্রনাথ এ ছন্দটিকেও শুধু দুই পংক্তির মধ্যে আবদ্ধ করে রাখেন নি; বহু পংক্তির মধ্যে একে মুক্ত ও প্রবহমান করেছেন। এ ছন্দের পরিসর বেশি, তাই এ ছন্দের প্রবাহধারা মনোদানের পয়ারের চেয়ে বিপুলতর ও প্রবলতর আকার ধারণ করেছে। এ ছন্দের কোনো অ-মিল দৃষ্টান্ত আমার চোখে পড়ে নি। রবীন্দ্রনাথের স-মিল প্রবহমান বর্ধিত পয়ারের দৃষ্টান্তরূপে

তার 'সমুদ্রের প্রতি', 'এবার ফিরাও মোরে' প্রভৃতি কবিতার উল্লেখ করা যেতে পারে।

কিন্তু অক্ষরবৃত্ত ছন্দকে কৃত্রিম বন্ধন থেকে এতখানি মুক্তি দিয়েও রবীন্দ্রনাথ নিরস্ত হতে পারেন নি। সমস্ত ছন্দেই বন্ধনের একটা সার্থকতা আছে, কিন্তু মুক্তিরও একটা সার্থকতা আছে। তাই তিনি ছন্দকে অধিকতর মুক্তির পথে চালিয়ে নিতে প্রয়াসী হলেন। সাধারণ পয়ার বা বর্ধিত পয়ারের প্রতি পংক্তিতে অক্ষরসংখ্যার যে বন্ধনটি রয়েছে তার সার্থকতা কোথায়? ছন্দ যখন প্রতিপংক্তির অন্তর্স্থিত যতিটিকে স্বীকার করে চলে তখন ওই অক্ষরসংখ্যার সীমাবন্ধনটির প্রয়োজনীয়তা থাকে। কিন্তু ছন্দের ধারা যখন অক্ষরসংখ্যা ও পংক্তির অন্তর্স্থিত বিরামের তীরকে অতিক্রম করে পংক্তির পর পংক্তিকে প্রাবিত করে প্রবাহিত হতে থাকে, তখনও প্রতিছন্দকে একটি নির্দিষ্ট অক্ষরসংখ্যার গণ্ডিতে আবদ্ধ করে রাখার কোনো আবশ্যকতাই থাকে না। এ তত্ত্বটি অহুভব করেই রবীন্দ্রনাথ প্রবহমান ছন্দে পংক্তি-নির্দিষ্ট অক্ষরসংখ্যার গণ্ডি দৃঢ়হস্তে ভেঙে দিতে কিছুমাত্র দ্বিধা বোধ করেন নি। অক্ষরবৃত্ত ছন্দের এই চরম মুক্তি ঘটেছিল “সবুজপত্র” বা “বলাকা”র যুগে। বলাকায় যে মুক্ত ছন্দের সন্ধান পাই তাতে কৃত্রিম বন্ধনের সম্পূর্ণ অবসান ঘটেছে। স্তত্রাং এ ছন্দের নাম দেওয়া যেতে পারে মুক্তক ছন্দ। যে-ছন্দকে আমরা *vers libre* বা *free verse* নামে জানি তাকেই ‘মুক্তক’ নামে অভিহিত করলাম। কিন্তু মনে রাখতে হবে, কোনো ছন্দের পক্ষেই সমস্ত বন্ধন থেকে মুক্ত হওয়া সম্ভব নয়। কারণ বন্ধনই ছন্দের প্রাণ। সকল বন্ধনকে অতিক্রম করলে ছন্দ আর ছন্দই থাকবে না—সে হবে তার পক্ষে আত্মঘাত। কিন্তু ছন্দের পক্ষে সকল বন্ধনেরই মর্যাদা সমান নয়। যে বন্ধন ছন্দের পক্ষে অপরিহার্য সে বন্ধনই হচ্ছে ছন্দের প্রাণ বা মূল তত্ত্ব। পর্বগঠন-পদ্ধতি ও যতিস্থাপন-রীতি এ বন্ধনের অন্তর্গত। আর যে বন্ধন ছন্দের পক্ষে অপরিহার্য নয় সে বন্ধন স্থলবিশেষে ধ্বনিপ্রবাহের বাধা হলেও অধিকাংশ স্থলেই তা ছন্দের সৌষ্ঠব বৃদ্ধি করে। পংক্তি-ও শ্লোক-নির্মাণপদ্ধতি ও মিলস্থাপনের রীতি এ শ্রেণীর বন্ধনের অন্তর্গত। যা হক, আমাদের বক্তব্য হচ্ছে এই যে, মুক্তক ছন্দে দ্বিতীয় প্রকার বন্ধন থেকেই মুক্তিলাভ ঘটে, প্রথম প্রকারের বন্ধন থেকে নয়। মুক্তক ছন্দকেও পর্বগঠন ও যতিস্থাপন সম্বন্ধে নির্দিষ্ট নিয়ম মেনে চলতে হয়; কিন্তু পংক্তি-ও শ্লোক-নির্মাণ এবং মিলস্থাপন বিষয়ে এ ছন্দের প্রচুর স্বাধীনতা রয়েছে।

অক্ষরবৃত্ত ছন্দগঠনের মূল ভিত্তিকুলিকে এ ছন্দে রক্ষা করতে হয়, অন্য বিষয়ে এর গতিপ্রকৃতি বিধিবদ্ধ নয়। মুক্তক ছন্দ সম্বন্ধে আরও বিশদ আলোচনা হওয়ার প্রয়োজনীয়তা আছে। কিন্তু আমাদের পক্ষে এ স্থলে আর অগ্রসর হওয়া সম্ভবপর নয়।

গিরিশচন্দ্র তাঁর নাটকগুলিতে বহু স্থলে একপ্রকার মুক্ত ছন্দের ব্যবহার করেছেন। কিন্তু একটু বিশ্লেষণ করলেই দেখা যাবে যে, গিরিশচন্দ্রের ছন্দ রবীন্দ্রনাথের মুক্তক ছন্দের সঙ্গে সমজাতীয় নয়। গিরিশচন্দ্র অভিনয়সৌকর্যের জন্য সাধারণ অমিত্রাক্ষর ছন্দকেই ভেঙে অসমপংক্তিতে বিভক্ত করেছেন মাত্র। তাতে চোদর নিয়মকে অতিক্রম করা হয়েছে বটে, কিন্তু অক্ষরবৃত্ত ছন্দের যে মূলগত রীতি তাকেও অনেক সময় লঙ্ঘন করা হয়েছে। যা হক, এ উভয় ছন্দের মধ্যে তুলনা ঘটাবার উপযুক্ত স্থান এটা নয়।

অনেকে মনে করেন, রবীন্দ্রনাথ ‘মুক্তক’ ছন্দটি ইউরোপ থেকে এ দেশে আমদানি করেছেন। এ কথা সত্য হতে পারে। কিন্তু তাতে তাঁর ছন্দপ্রতিভার কিছুমাত্র লাঘব ঘটে না। কারণ বিদেশী free verse এবং আমাদের ‘মুক্তক’ ছন্দ বাইরের আকৃতিতে সদৃশ হলেও, ও-দুই ছন্দের মৌলিক প্রকৃতি কখনও এক নয়। বাংলা ভাষার ধ্বনি ও উচ্চারণপদ্ধতি অব্যাহত রেখে ছন্দকে মুক্তিদান করার যে কৃতিত্ব, ইউরোপের আদর্শে অনুপ্রাণিত হয়ে থাকলেও রবীন্দ্রনাথের সে কৃতিত্ব অক্ষুণ্ণই থাকবে। বিলিতি blank verse-এর অনুসরণ করে বাংলায় অমিত্রাক্ষর ছন্দ প্রবর্তন করায় মধুসূদনের কবিপ্রতিভা দান হয়েছে, না উজ্জলতর হয়েছে?

কিন্তু এ কথাও মনে রাখা দরকার যে, “বলাকা”র যুগের বহু পূর্ব থেকেই মুক্ত ছন্দ রচনার প্রেরণা রবীন্দ্রনাথের অন্তরে দেখা দিয়েছিল। তাঁর কবিজীবনের সূচনাতেই দেখতে পাই ছন্দের বাধাগুলোকে অতিক্রম করার একটা ছুঁবার আকাঙ্ক্ষা। “সন্ধ্যাসংগীত” “প্রভাতসংগীত” এবং “ছবি ও গান”—এ তার প্রচুর নিদর্শন রয়েছে। বস্তুতঃ নব নব ছন্দ রচনা করা ও যুগপৎ ছন্দের বাধাকে লঙ্ঘন করে যাবার স্বাভাবিক প্রবৃত্তি আজও রবীন্দ্রনাথের কবিচিন্তে সমানভাবে জাগরুক ও সক্রিয় আছে। যা হক, এ কথা স্মরণীয় প্রয়োজন যে, অমিত্রাক্ষর ছন্দের দ্বারা মুক্তক ছন্দও প্রবহমান, মুক্তক ছন্দেও ধ্বনির প্রবাহ পংক্তির পর পংক্তিতে বয়ে চলে। প্রবহমান পয়ারে যেমন মিল না-দেওয়াটাই

অপরিস্ফুট নয়, প্রবহমান মুক্তকেও তেমনি মিল দেওয়াটাই অত্যাশ্চর্য নয়। অ-মিল মুক্তক রচনা করাও সম্ভব, যদিও তাতে মিলের মাধুর্যের অভাবটা ঐকান্তিক কতকটা পীড়া দেয়। Collins-এর Ode to Evening' নামক কবিতাটি অ-মিল মুক্তক ছন্দে রচিত। আর "মানসী"র যুগে রচিত রবীন্দ্রনাথের 'নিফল কামনা' নামক চমৎকার কবিতাটিও বাংলায় অ-মিল মুক্তক ছন্দের একটি স্বন্দর নিদর্শন। এ কবিতাটিকে "বলাকা"র যুগের স-মিল মুক্তক ছন্দের অগ্রদূত মনে করা যেতে পারে।

অক্ষরবৃত্তে যত রকম ছন্দোবদ্ধ রচনা করা যায়, স্বরবৃত্তেও সে-সমস্তকেই স্বচ্ছন্দেই চালানো যায়—এ সত্যটিও রবীন্দ্রনাথের রচনা থেকেই প্রতিপন্ন হয়েছে। অক্ষরবৃত্তের সাধারণ পয়ার, বর্ধিত পয়ার, ত্রিপদী, চৌপদী প্রভৃতি বহু ছন্দোবদ্ধকেই তিনি চমৎকাররূপে স্বরবৃত্তে রূপান্তরিত করেছেন। স্মরণ্য আশা করা যায়, 'বহুধারা', 'এবার ফিরাও মোরে'. প্রভৃতির ত্রায় উচ্চ অঙ্গের প্রবহমান কবিতাও স্বরবৃত্ত ছন্দে রচনা করা সম্ভব। কিন্তু স্বরবৃত্ত ছন্দে প্রবহমান কবিতা বাংলা সাহিত্যে খুব কমই রচিত হয়েছে। Paradise Lost প্রভৃতির স্তায় মহাকাব্য যখন ইংরেজি ছন্দে রচনা করা সম্ভব হয়েছে তখন বাংলা স্বরবৃত্ত ছন্দকেও ও-রকম মহাকাব্যজাতীয় কবিতার বাহন করা অসম্ভব নয়। কারণ ইংরেজি ছন্দ ও বাংলা স্বরবৃত্ত ছন্দের মধ্যে খুব ঘনিষ্ঠ সাদৃশ্য আছে, এ তথ্যটি রবীন্দ্রনাথ নিজেই আমাদের জানিয়েছেন। স্বরবৃত্ত ছন্দে ওই ধরনের কাব্য রচনার বাধা কবে দূর হবে অর্থাৎ স্বরবৃত্তকে কবে "মেঘনাদবধ"-এর মতো কাব্যের বাহন করা সম্ভব হবে জানিনে। কিন্তু তার সূত্রপাতও রবীন্দ্রনাথই করেছেন। তাঁর রচনায় স্বরবৃত্ত প্রবহমান পয়ারের একটিমাত্র দৃষ্টান্ত পেয়েছি। "পূরবী" গ্রন্থের 'পূরবী'-নামক প্রথম কবিতাটি ও-রকম প্রবহমান স্বরবৃত্ত ছন্দে রচিত। কিন্তু তার পরে তিনি প্রবহমান স্বরবৃত্তে আর কোনো কবিতা রচনা করেছেন বলে মনে হয় না।

কিন্তু বাংলা সাহিত্যে স্বরবৃত্ত ছন্দে প্রবহমান কবিতার দৃষ্টান্ত খুব বিরল হলেও, ও-ছন্দে যে খুব চমৎকার মুক্তক ছন্দ রচনা করা যায় তাও রবীন্দ্রনাথই

১ এই কবিতাটির ছন্দ অ-মিল, কিন্তু তাকে মুক্তক বলা যায় না। পঞ্চান্তরে Wordsworth-এর Ode on Immortality-র ছন্দ মুক্তক, কিন্তু স-মিল।

দেখিয়েছেন। “সবুজপত্রের” যুগেই তিনি এ তত্ত্বটিকে উদ্ঘাটিত করেন। “পলাতকা”র কবিতাগুলিতেই এ ছন্দের অন্তর্নিহিত শক্তির চরম প্রকাশ হয়েছে। এ ছন্দের গঠনপ্রণালী মুক্তক অক্ষরবৃত্তের মতোই; শুধু স্বরবৃত্তের বিশেষ রীতিগুলিকে মেনে চলতে হয়। স্তবরাং এ বিষয়ে অধিকতর আলোচনা নিম্নয়োজন।

মাত্রাবৃত্তকেও অক্ষরবৃত্ত এবং স্বরবৃত্তের মতো মুক্তকে পরিণত করা যায় কি না, এ বিষয়ে সংশয় রয়েছে। কারণ মাত্রাবৃত্তের স্বরপ্রবণতাই ও-ছন্দের দৃঢ় গতিভঙ্গির একটি প্রবল অন্তরায়। কিন্তু পঞ্চমাত্রিক ছন্দে স্রবের প্রাধাণ্য অপেক্ষাকৃত কম এবং এ ছন্দটিই চতুঃস্বরপবিক ছন্দের নিকটতম মাত্রিক প্রতিরূপ। তাই পঞ্চমাত্রিক ছন্দে মুক্তক রচনা করা একেবারে অসম্ভব নয়। রবীন্দ্রনাথের ‘সাগরিকা’ কবিতাটি ( “মহুয়া” ) কতকটা মুক্তক ছন্দেই রচিত হয়েছে। এ কবিতাটিতে পংক্তির দৈর্ঘ্য বিষয়ে কোনো স্থিরতা নেই, এ বিষয়ে যথেষ্ট স্বাধীনতাই রয়েছে। কিন্তু লক্ষ করার বিষয়—এই কবিতাটির ভাব অধিকাংশ স্থলেই দুটি পংক্তির মধ্যেই আবদ্ধ আছে, বহু পংক্তিতে প্রবাহিত হয়ে যায় নি। স্তবরাং এ ছন্দটিকেও পূর্ণ বা প্রবহমান মুক্তক বলা যায় না।

রবীন্দ্রনাথের ছন্দের মৌলিক বৈশিষ্ট্য সম্বন্ধে কয়েকটিমাত্র তত্ত্বের সংক্ষিপ্ত আলোচনা করা গেল। এ কথা বলা নিম্নয়োজন যে, তাঁর ছন্দোবন্ধের অল্পস্র বৈচিত্র্য সম্বন্ধে আরও বহু বক্তব্য রয়ে গেছে। বাংলা ছন্দে তিনি যে কত অসংখ্য ভঙ্গিতে পর্ববন্ধ ( বা পংক্তিগঠন ) ও শ্লোকবন্ধ ( বা *stanza* ) রচনার রীতি প্রবর্তন করেছেন, বাংলা ভাষার নিস্তরঙ্গ ছন্দে অদ্ভুত ধ্বনিতরঙ্গ ( *rhythm* ) ও স্রবমার্ধ্য ( *melody* ) জাগিয়ে তুলেছেন, সে-সমস্ত কথার বিশদ আলোচনা না করলে বাংলা ছন্দে তাঁর দানের পরিমাণ যে কত বিচিত্র ও অফুরন্ত তার ধারণা করা যাবে না। এমন কি, ছন্দপংক্তির অন্তিম প্রান্তে মিল দেবার মামুলি একঘেয়ে পদ্ধতিতেও তিনি যে আশ্চর্য পরিবর্তন আনিতেছেন এবং তার স্থলে বাংলা ছন্দে যে মুহূর্ত বা *cadence* উৎপাদনের ও মিল ( *rhyme* ) ঘটাবার দ্বিদল ( *disyllabic* ), ত্রিদল ( *trisyllabic* ) প্রভৃতি পদ্ধতি দেখিয়েছেন তার মূল্যও কিছুমাত্র কম নয়। তা ছাড়া রবীন্দ্রনাথের ছন্দ প্রসঙ্গে সংস্কৃত ও ইংরেজি ছন্দ এবং উচ্চারণপদ্ধতি সম্বন্ধে আপেক্ষিক আলোচনা, বিশেষতঃ তাঁর ছন্দের সঙ্গে সংগীত ও স্রবতালের ঘনিষ্ঠতার বিষয়ে আলোচনা

করার বিশেষ সার্থকতা আছে। কিন্তু এ প্রবন্ধে সে সমস্ত প্রসঙ্গের উত্থাপন করাও সম্ভব নয়।

রবীন্দ্রনাথের সমস্ত রচনার প্রতি যুগপৎ দৃষ্টি স্থাপন করলে এ কথা ভেবে বিস্মিত হতে হয়, কত বিচিত্র ও অবিশ্রাস্ত তাঁর ভাব ও রূপসৃষ্টির প্রবাহ এবং কবিজীবনের সেই প্রথম অভ্যুদয় থেকে আজ পর্যন্ত সমগ্র জীবনব্যাপী নব নব ছন্দ, সংগীত, ভাব ও রূপ রচনার সাধনা তাঁর কত বিপুল, কত অজস্র ও অবিরাম! তাঁর এই সমগ্র জীবনব্যাপী অফুরন্ত রূপসৃষ্টির মহোৎসবের আনন্দে ষোণ দেবার জন্তে আজ আমরা তাঁরই ছন্দে ও ভাষায় (নটরাজ-ঋতুরঙ্গশালা ১৩৩৮ আশ্বিন) সকলকে সাদর আমন্ত্রণ করছি।—

উদয়রবি যে রাঙা রঙে রাঙায়

পূর্বাচলে দিয়েছে ঘুম ভাঙায়ে—

অস্তরবি সে রাঙা রসে রসিল,

চির-প্রাণের বিজয়বাণী ঘোষিল,

অরুণবাণী যে হ্রদ দিল রণিয়া

সন্ধ্যাকালে সে হ্রদ উঠে ঘনিয়া,

নীরব নিশীথিনীর বুকে নিখিল ধ্বনি ধ্বনিয়া।

আয় রে তোরা, আয় রে তোরা, আয় রে,

বাধন-হারা রঙের ধারা ঐ-যে ব'হে যায় রে ॥\*

## বাংলা অক্ষরবৃত্ত ছন্দের স্বরূপ

বাংলা ছন্দকে প্রধানতঃ তিনটি শ্রেণীতে বিভক্ত করা যায়। আমি ঐ তিনটি ধারার যথাক্রমে নাম দিয়েছি—মাত্রাবৃত্ত, স্বরবৃত্ত ও অক্ষরবৃত্ত।\* বাংলা ছন্দে তিনটি বিভিন্ন উপায়ে ধ্বনির মূল্য নির্ধারিত হয়ে থাকে এবং ধ্বনির পরিমাণ-নির্ণয়ের এই তিনটি বিভিন্ন পদ্ধতি থেকেই বাংলা ছন্দের তিনটি মূল প্রবাহের উৎপত্তি হয়েছে। মাত্রাবৃত্ত, স্বরবৃত্ত ও অক্ষরবৃত্ত, ছন্দের এই তিন ধারাতেই অযুগ্মধ্বনির ( অ আ ই ঐ ক কা কি ইত্যাদি ) একই মর্যাদা, সংস্কৃত ভাবার স্বভাবদীর্ঘ স্বরগুলিও ব্রহ্ম স্বরের সমান মর্যাদাই পেয়ে থাকে অর্থাৎ একমাত্রিক বলে গণ্য হয়ে থাকে। কিন্তু এ তিন ছন্দে যুগ্মধ্বনির পরিমাণ-নির্ণয় হয় তিনটি স্বতন্ত্র পদ্ধতিতে। মাত্রাবৃত্তে যুগ্মধ্বনি, তা সে স্বরাস্তিকই হক আর ব্যঞ্জনাস্তিকই হক, সর্বত্রই দ্বিমাত্রিক বলে গণ্য হয় ; অন্য কথায় এই বলা যায় যে মাত্রাবৃত্তে সর্বদাই যুগ্ম ধ্বনির শেষাংশটিকে অর্থাৎ আশ্রিত বর্ণটিকে গণনার মধ্যে ধরা হয়।

$\begin{array}{c} | \qquad \qquad \qquad + \qquad \qquad \qquad | \\ \text{যে বাণী আমার} \mid \text{কখনো কারেও} \mid \text{হয় নি বলা} \\ \\ + \qquad \qquad \qquad | \qquad \qquad \qquad | \\ \text{তাই দিয়ে গানে} \mid \text{রচিব নৃতন} \mid \text{নৃত্যকলা।} \end{array}$

—নিবেদন, মহরা, রবীন্দ্রনাথ

এখানে দৃষ্টচিহ্নিত তিনটি ব্যঞ্জনাস্তিক যুগ্মধ্বনিকে দ্বিমাত্রিক বলে গণনা করা হয়েছে ; যোগচিহ্নিত দুটি স্বরাস্তিক যুগ্মধ্বনিকেও দ্বিমাত্রিক বলেই ধরা হয়েছে। অর্থাৎ বু য়্ ত্ এই তিন আশ্রিত ব্যঞ্জন এবং ও্ আর ই্ এই দুটি আশ্রিত স্বরণ, এরা সকলেই গণনার আমলে এসেছে। সুতরাং ছন্দ মাত্রাবৃত্ত।

স্বরবৃত্তের ব্যবস্থা তার ঠিক উল্টো অর্থাৎ এ ছন্দে যুগ্মধ্বনিকে দ্বিমাত্রিক

\* প্রবাসী ১৩২৯ পৌষ—চৈত্র, ১৩৩০ বৈশাখ, মাঘ—চৈত্র।

† আশ্রিত স্বরবর্ণকেও আশ্রিত ব্যঞ্জনবর্ণের দ্বায় হসন্তচ্ছিবোগে নির্দেশ করা গেল।  
ছন্দগ্রন্থে হসন্তচ্ছিকে আশ্রয়চ্ছি নামে অভিহিত করাই সংগত মনে করি।

বলে গণ্য করা হয় না, আশ্রিত বর্ণগুলি হিসাবের আমলে আসে না। মোট ধ্বনিসংখ্যা গুনে গেলেই এ ছন্দের প্রকৃতি ধরা পড়ে। দৃষ্টান্ত—

সে দিন যেন | রূপা আমায় | করেন ভগ- | বান্,  
মৌন-গান-এব | সম্মুখে গাই | জুই ফুলের এই | গান।

—চিঠি, পূরবা, রবীন্দ্রনাথ •

এখানে প্রতি পংক্তিতে চারটি করে স্বর বা ধ্বনি আছে, কেবল শেষ ছেদে একটি করে; দণ্ডচিহ্নিত ব্যঞ্জনাস্তিক যুগ্মধ্বনি এবং যোগচিহ্নিত স্বরাস্তিক যুগ্মধ্বনি, কাউকেই হিসাবে ডবল বলে ধরা হয় নি অর্থাৎ দশটি আশ্রিত ব্যঞ্জন এবং তিনটি আশ্রিত স্বর কেউ গণনার আমলে আসে নি। স্তবরাং ছন্দ স্বরবৃত্ত।

অক্ষরবৃত্তের ব্যবস্থা এ দুয়ের মাঝামাঝি অর্থাৎ এ ছন্দে যুগ্মধ্বনিকে কোথাও ডবল বলে গণনা করা হয়, কোথাও হয় না। অবশ্য এ গণনার একটি নির্দিষ্ট নিয়ম আছে, সেটি হচ্ছে এই—শব্দের মধ্যবর্তী\* যুগ্মধ্বনিকে ধরা হয় এক, কিন্তু শব্দের অন্তস্থিত\* যুগ্মধ্বনিকে ধরা হয় দুই। দৃষ্টান্ত—

+ | + | + |  
উদয়-দিগন্তে ঐ শুভ্র শঙ্ক বাজে।

+ |  
মোর চিত্ত মাঝে

+  
চির-নৃতনেরে দিল ডাক

+  
পচিশে বৈশাখ।

—পচিশে বৈশাখ, পূরবা, রবীন্দ্রনাথ

এখানে দণ্ডচিহ্নিত যুগ্মধ্বনিগুলিকে এক বলে গণ্য করা হয়েছে, কারণ এগুলি শব্দের মধ্যে অবস্থিত; আর যোগচিহ্নিত যুগ্মধ্বনিগুলিকে দুই বলে ধরা হয়েছে, যেহেতু এগুলি শব্দের অন্তে অবস্থিত। শব্দের অন্তস্থিত যুগ্মধ্বনিগুলি যে আসলে দ্বিমাত্রিক তার প্রমাণ হচ্ছে এই যে এই ধ্বনিগুলিকে শব্দমধ্যবর্তী ধ্বনিগুলির চেয়ে দীর্ঘতর করে অর্থাৎ টেনে উচ্চারণ করতে হচ্ছে;

\* এ প্রবন্ধে শব্দের অ-প্রান্তবর্তী স্বরমাত্রাকেই মধ্যবর্তী বলে ধরা হয়েছে এবং এক্ষর শব্দের স্বরধ্বনিটিকে প্রান্তবর্তী বলে গণ্য করা হয়েছে।



তার আরেক প্রমাণ এই যে 'বৈশাখের' ঐ-কারকে এক বলে ধরা হলেও প্রথম পংক্তিস্থিত 'ঐ'কে প্রত্যক্ষতঃই দুই বলে গণনা করা হয়েছে।

কবিরা কিন্তু অক্ষরবৃত্ত ছন্দ রচনার সময় শব্দের এই অস্তিম ত্রিমাত্রিক প্রকৃতির প্রতি লক্ষ রাখেন না; তাঁরা শুধু ধ্বনির চাক্ষুষ প্রতিরূপ অর্থাৎ লিপিবদ্ধ অক্ষরসংখ্যা গুণেই এ ছন্দ রচনা করেন। বলা বাহুল্য এই কৃত্রিম ও স্থূল বিচারের ফলে এ ছন্দে সময় সময় ক্রটি ঘটে থাকে; কি করে তা হয় তাই দেখাচ্ছি। ভাষার ধ্বনিপ্রকৃতির প্রতি যথেষ্ট লক্ষ না রেখে রচনা করা সত্ত্বেও অক্ষরবৃত্ত ছন্দে যে এত কম ক্রটি ঘটে সেইটেই আশ্চর্যের বিষয়; কিন্তু তার কারণ আছে। দৈবক্রমে ভারতবর্ষে বাঙ্গলসংহতিক যুক্তাক্ষরের সাহায্যে প্রকাশ করার পদ্ধতি হয়েছিল; বাংলা ভাষায়ও (বিশেষতঃ সংস্কৃত শব্দের বেলায়) এই রীতি অনেকটা প্রচলিত আছে; তাই বাংলায় অক্ষরবৃত্ত ছন্দের সৃষ্টি হতে পেরেছে; নতুন অর্থাৎ বাংলায় যদি ইংরেজি ও অগ্ৰাভ্য ভাষার মতো হ্রস্ব বর্ণকে স্বতন্ত্ররূপে লেখার রীতি থাকত, তবে অক্ষরবৃত্ত ছন্দের উদ্ভব হতে পারত না। এই উক্তিটি আপাততঃ বিশ্বাস্যকর মনে হলেও একটু তলিয়ে দেখলেই এ কথাটির যথার্থ্য উপলব্ধি হবে। একটা দৃষ্টান্ত ধরা যাক—

বাণবান্ মঞ্জীর বাধি উন্মাদিনী কালবইশাখীর্  
নৃত্য হোক তবে।

—বর্ধশেখ, কলনা, রবীন্দ্রনাথ

এখানে শুধু যুগ্মধ্বনিগুলিকে আলাদা করে দেখিয়েছি; স্ববর্ণগুলিকে প্রচলিত আ-কার ই-কার রূপেই রেখেছি। ইংরেজির মতো স্বতন্ত্ররূপে দেখালে এই কথাগুলি আরও দীর্ঘ হয়ে যেত। কিন্তু এখানে উদ্দেশ্য কথাগুলিকে ইংরেজির তুলনায় সংক্ষিপ্ত আকারে লেখা গেল; এ রকম লিপিপদ্ধতিও যদি প্রচলিত থাকত তবু কি শুধু অক্ষর গুণে ছন্দরচনার অন্ধ অভ্যাস এ দেশে হতে পারত? এর একমাত্র উত্তর, পারত না। আর ইংরেজির মতো স্ববর্ণগুলিও যদি স্বতন্ত্ররূপে লেখা হত তবে তা আর কথাই ছিল না। কিন্তু বাংলায় যুগ্ম-ধ্বনিকে যুক্তাক্ষরের সাহায্যে লেখা হয় বলেই যুক্তাক্ষরকে এক গণনা করে এই অক্ষরবৃত্ত ছন্দ রচনা করা হচ্ছে। তবে মনে রাখ। উচিত যে বাংলায়ও এই যুক্তাক্ষরের লিপিপদ্ধতি বিশেষভাবে শুধু সংস্কৃত শব্দের পক্ষেই খাটে। অনেক অ-সংস্কৃত খাটি বাংলা বা বাংলায় প্রচলিত বৈদেশিক শব্দে যুক্তাক্ষর ব্যবহারের

প্রচলন নেই; যথা—বোলতা, বাদলা, পশলা, বাদশা, বুলবুলি, মসজিদ ইত্যাদি; এই সমস্ত হসন্ত-মধ্য অ-সংস্কৃত শব্দগুলিকে অক্ষরবৃত্ত ছন্দে যথাসম্ভব পরিহার করে চলারই চেষ্টা দেখা যায়, কারণ হসন্তবর্ণগুলিকে গ্রাহ্য করা হবে কি না এ সম্বন্ধে সব সময়ই একটু দ্বিধা থেকে যায়। কিন্তু ‘উৎসব’ ‘বৎসর’ প্রভৃতি সংস্কৃত শব্দ যুক্তাক্ষরের সাহায্যে লেখা না হলেও খণ্ড ৭-কে পরবর্তী বর্ণের সঙ্গে যুক্ত বলেই ধরে নেওয়া হয়। যথা—

আম্বিনে উৎসব-সাজে শরৎ হৃন্দর শুভ্র করে

শেফালির সাজি নিয়ে দেখা দিবে তোমার অঙ্গনে।

—সত্যেন্দ্রনাথ দত্ত, পুরবী, রবীন্দ্রনাথ

কিন্তু ‘দিক্চক্ররেখা’, ‘দিক্ভ্রাস্ত’ প্রভৃতি শব্দে হসন্ত ক্-কে স্বতন্ত্র বলে গণ্য করা হবে কি না, এ বিষয়ে সংশয় দেখা যায়। যথা—

কেন আসিতেছ মুখ মোর পানে চেয়ে

ওগো দিক্ভ্রাস্ত পান্থ, ত্বার্ত নয়ানে

লুক্ক বেগে!

—মরীচিকা, চিত্রা, রবীন্দ্রনাথ

এখানে ‘দিক্ভ্রাস্ত’ শব্দে চারটি অক্ষর গোনা হয়েছে। কিন্তু,

উদয়-দিক্-প্রাস্ত-তলে নেমে এসে

—পঁচিলে বৈশাখ, পুরবী, রবীন্দ্রনাথ

এখানে ‘দিক্প্রাস্ত’ শব্দে তিন অক্ষর ধরা হয়েছে। যদি লেখা হত—

উদয়ের দিক্প্রাস্ততলে নেমে এসে

তা হলেও খারাপ শোনাও না; কারণ ‘দিক্ভ্রাস্ত’ শব্দের মতো এখানেও ‘দিক্’ কথাটিকে একটু টেনে পড়তে হত। রবীন্দ্রনাথ নিজেই অগ্রজ ‘দিক্প্রাস্ত’ শব্দটিতে তিন অক্ষর না ধরে চার অক্ষর ধরেছেন। যথা—

চলেছে উজান ঠেলি’ তরঙ্গী তোমার,

দিক্প্রাস্তে নামে অন্ধকার।

—নববধূ, মহয়া, রবীন্দ্রনাথ

দিক্প্রাস্তে তারি ওই ক্ষীণ নম্র কলা

নীরবে বলুক আজি আমাদের সব কথা বলা।

—প্রত্যাগত, মহয়া, রবীন্দ্রনাথ

যা হক আমরা বক্তব্য হচ্ছে এই যে অক্ষরবৃত্ত ছন্দরচনায় সংযুক্তবর্ণকে এক অক্ষর বলে ধরে নেওয়ার অভ্যাসের ফলে এই ছন্দে শব্দের মধ্যবর্তী অসংযুক্ত অথচ হসন্ত বর্ণগুলিকে ( বিশেষতঃ অ-সংযুক্ত শব্দে ) কি হিসাবে গণনা করা হবে, এ বিষয়ে খুবই একটা সংশয় রয়েছে। তাই এ ছন্দে সংযুক্তাক্ষরবহুল সংযুক্ত শব্দ ব্যবহারের এত প্রসার দেখা যায়। তা ছাড়া 'ধরব, করব, ধরিত, করিত' প্রভৃতি হসন্ত-মধ্য প্রাকৃত ক্রিয়াশব্দগুলি অনেকটা ওই কারণেই এ ছন্দের ধাতুতে সহ হয় না; গর্ব, সর্ব, মর্তা, গর্ত প্রভৃতি সংযুক্ত শব্দগুলি কিন্তু এ ছন্দে অনায়াসেই চলে; শুধু উক্ত প্রাকৃত ক্রিয়াপদগুলি 'ধরিব, করিব, ধরিত, করিত' প্রভৃতি সাধুবেশধারী না হলে এ ছন্দের আসরে স্থান পায় না। তাই অক্ষরবৃত্ত ছন্দটা শুধু সাধুভাষার ছন্দ হয়েই রইল; কোনো বিদ্রোহী কবিই আজ পর্যন্ত চলতি বাংলায় অক্ষরবৃত্ত ছন্দ রচনা করতে সাহস পান নি।

আমরা দেখলাম যে শব্দের মধ্যবর্তী হসন্ত বর্ণগুলিকে ( বিশেষতঃ সংযুক্ত শব্দে ) পরবর্তী বর্ণে যুক্ত করে দেওয়ার প্রথা থাকতেই অক্ষরবৃত্ত ছন্দের উৎপত্তি হতে পেরেছে এবং যেখানেই শব্দের মধ্যে হসন্ত বর্ণ অসংযুক্ত থেকে যায় সেখানেই এ ছন্দকে ইতস্ততঃ করতে এবং বহু স্থানেই পশ্চাৎপদ হতে হয়। কিন্তু যুগ্মস্বর ব্যবহারের ক্ষেত্রেই এ ছন্দের দুর্বলতা বেশি ধরা পড়ে। আমরা দেখেছি যে সংযুক্ত ভাষায় অই, আর অউ, ছাড়া যুগ্মস্বর নেই, অথচ বাংলায় আই, ইউ, অও, আও, ইত্যাদি বহু যুগ্মস্বর রয়েছে। লক্ষ করার বিষয় এই যে সংযুক্ত যুগ্মস্বরদুটির জন্তে দুটি স্বতন্ত্র অক্ষর রয়েছে, যথা ঐ ( অই ) এবং ঔ ( অউ ); বাংলায় যে সব অতিরিক্ত যুগ্মস্বর আছে তাদের জন্তে কিন্তু কোনো স্বতন্ত্র অক্ষর নেই, দুটি স্বতন্ত্র স্বরবর্ণের যোগে তাদের প্রকাশ করতে হয়। এই পার্থক্যের জন্য অক্ষরবৃত্ত ছন্দকে কতকটা মুশকিলে পড়তে হয়েছে। সংযুক্ত শব্দের মধ্যবর্তী অই, এবং অউ, এ দুটি যুগ্মস্বর ঐকার ঔকারের যোগে লিখিত হয় বলে এরা প্রত্যেকেই এক স্বর বলে গৃহীত হয়। কিন্তু আই, ইউ, প্রভৃতি যুগ্মস্বরের জন্য স্বতন্ত্র অক্ষর না থাকতে এরা দ্বিস্বর বলে গণ্য হয়। এই দ্বৈধ ব্যবহারের ফলে অক্ষরবৃত্ত ছন্দে যে স্থানে স্থানে অসামঞ্জস্য দেখা যায় তা বলা বাহুল্য। একটি দৃষ্টান্ত নেওয়া যাক—

বর্ষার নবীন মেঘ এল ধরণীর পূর্ব প্রান্তে,

+

বাজাইল বজ্রভেরী। \* \* \*

\* \* তাহাদের লাগি'

+

অঙ্ককার নিশীথিনী তুমি, কবি, কাটাইলে আগি'

জয়মাল্য বিরচিয়া । \* \* \*

আছে তাহে ভৈরবীতে বিদায়ের বিষম মুছ'না,

আছে ভৈরবের স্বরে মিলনের আসন্ন অর্চনা ।

\* \* \*

+

না জানি সে কোন্ শাস্ত শিউলি-ঝরার শুক্লরাতে ;

দক্ষিণের দোলা-লাগা পাখী-জাগা বসন্ত প্রভাতে ।

—সত্যেন্দ্রনাথ দত্ত, পূর্ববী, রবীন্দ্রনাথ

এই পংক্তিগুলিতে দুটি ঐকার ছাড়া আরও তিনটি যুগ্মস্বর ( যোগ-চিহ্নিত ) আছে এবং তিনটিই শব্দের মধ্যবর্তী, অন্তর্স্থিত নয় । কিন্তু ঐকার দুটিকে একস্বর বলে ধরা হয়েছে, কেননা একটিমাত্র বর্ণলিপি ( ঐ ) বা বর্ণসংকেত ( ঐ ) যোগেই তাকে প্রকাশ করা যায় ; আর আই, (বাজাইল, কাটাইলে) কিংবা ইউ (শিউলি) এ দুটিকে প্রকাশ করার মতো একমাত্র বর্ণলিপি বা বর্ণসংকেত নেই বলেই এদের দ্বিস্বর বলে গণনা করা হয়েছে । অথচ ধ্বনিমর্যাদা হিসাবে আই, ইউ এবং অই, বা ঐ এর মধ্যে কিছুমাত্র পার্থক্য নেই । এখানেই অক্ষরবৃত্ত ছন্দের দুর্বলতা ধরা পড়ে । এ দুর্বলতা ঢাকা দেবার জন্যই অক্ষরবৃত্ত ছন্দের শব্দমধ্যবর্তী আই, ইউ প্রভৃতি যুগ্মস্বর পৃথকভাবে আ-ই, ই-উ ( যথা বাজা-ই-ল, শি-উ-লি ) ইত্যাদি রূপে টেনে উচ্চারণ করতে হয় । কিন্তু শিউলি কথাটার মধ্যে যে আসলে দুটিমাত্র ধ্বনি আছে তা ঐ শব্দটিকে স্বরবৃত্ত ছন্দে বসালেই ধরা পড়বে ; যথা—

আশ্বিনে ঐ | শিউলি সাথে |

মোমাছিরে | যেমন ডাকে |

—কতুক্ত ( ৪৭ ), প্রবাহিনী, রবীন্দ্রনাথ

এখানে সর্বস্ব যুগ্মধ্বনিকে একক বলে গ্রহণ করা হয়েছে এবং তাতেই অই, ( ঐ ) অউ, ( ঔ ) এবং ইউ, যে একই মর্যাদার ধ্বনি তা স্পষ্ট হয়ে উঠেছে । কিন্তু অক্ষরবৃত্ত ছন্দে ঐ আর ঔ-কে অন্য যুগ্মস্বরগুলি থেকে পৃথক মর্যাদা দেওয়া হয় । তার ফল এই হয় যে আই, ইউ প্রভৃতিকে টেনে পড়ে আ-ই, ই-উ ইত্যাদি রূপে

পৃথক্ উচ্চারণ করতে হয় ; আর যে ধ্বনিটা মূলে এক তাকে যদি অকারণে দুয়ের মতো করে উচ্চারণ করা যায় তবে ছন্দের মধ্যে শৈথিল্য দেখা দেয় । অক্ষরবৃত্ত ছন্দরচয়িতা কবিরা এ ছন্দের এ দুর্বলতাটা প্রতি পদেই টের পেয়ে থাকেন ; তাই তাঁরা শব্দের মধ্যবর্তী ঐ এবং ও ছাড়া আর সমস্ত যুগ্মস্বরকেই বর্জন করতে যথাসাধ্য চেষ্টা করেন । এজন্যই দেখা যায় আজকাল কবিরা ‘হইতে, লইয়া, যাইবে’ প্রভৃতি সাধু শব্দের যুগ্মধ্বনিটাকে বর্জন করার অভিপ্রায়ে ‘হতে, লয়ে, যাবে’ প্রভৃতি সংক্ষিপ্ত চলতি রূপের প্রতিই পক্ষপাতিত্ব করে থাকেন ; অথচ আমরা আগে দেখেছি যে ঐ শব্দের মধ্যবর্তী অসংযুক্ত হসন্ত বর্ণকে পরিহার করার চেষ্টায় তাঁরা ‘কব্ব, কব্বত’ প্রভৃতি চলতি রূপের পরিবর্তে ‘করিব, ধরিব’ ইত্যাদি সাধু রূপেরই ব্যবহার করেন । তার ফলে অক্ষরবৃত্ত ছন্দের ভাষাটা সাধু ও চলতি ভাষার একটা অদ্ভুত মিশ্রণে পরিণত হয়েছে । শিউলি প্রভৃতি শব্দের যুগ্ম ধ্বনিটাকে দ্বিধাবিভক্ত করে টেনে পড়ার অভ্যাসের ফলে এক সময় কবিরা প্রয়োজনের খাতিরে ঐ এবং ও-কে ও ভেঙে ব্যবহার করতে ইতস্ততঃ করতেন না ; তাই বাংলা অক্ষরবৃত্তের রাজ্যে ‘গউড়, পউষ’ প্রভৃতি ঐ-কে ওকারের দ্বিধাকৃত শিথিল রূপের অভাব নেই । তবে গুণের বিষয় আজকাল আর কবিরা এ দুর্বলতাটুকুকে প্রশ্রয় দেন না । আধুনিক কালের রচনা থেকেও ওকারের সম্প্রসারণের ছুটি দৃষ্টান্ত দিচ্ছি । যথা—

পউষের পাতা-ঝরা তপোবনে

আজি কি কারণে

টলিয়া পড়িল আসি’ বসন্তের মাতাল বাতাস ।

—১৩, বলাকা, রবীন্দ্রনাথ

বিগাঢ়যৌবনা তদ্বী, আকারে বালিকা,

পরিণত দেহখানি আট সাঁট ক্ষুদ্র ।

শিশির-ঋতুর স্নিগ্ধ মন্থন রউদ্র

ঘনীভূত ক’রে গড়া স্বর্ণ পাঞ্চালিকা ।

—সনেটহুম্মরী, পদ-চারণ, প্রমথ চৌধুরী

এখানে ‘পউষের’ এবং ‘রউদ্র’ কথা দুটিতে ওকার ঋ ভেঙে অ-উ করা হয়েছে এবং ওকারের স্বতন্ত্র উচ্চারণ করা প্রয়োজন । পৌষের বা পউষের এবং রৌদ্র বা রউদ্র এ বকম উচ্চারণ করলে ছন্দ অক্ষুর থাকবে না ; আর দ্বিতীয় দৃষ্টান্তটিতে

ব-উ-ঙ্ৰ না পড়ে রউ-ঙ্ৰ অর্থাৎ রৌ-ঙ্ৰ পড়লে পূর্ববর্তী 'কু-ঙ্ৰ' শব্দের সঙ্গে তার মিলও অব্যাহত থাকবে না।

অ-সংস্কৃত বাংলা বা বাংলায় প্রচলিত বিদেশী শব্দে যেমন অনেক সময় হসন্তবর্ণকে পরবর্তী ব্যঞ্জননের সঙ্গে যুক্ত না করারই প্রচলন দেখা যায় (যথা—মাত্লামি, হাল্কা, পাল্টা, পশ্লা) তেমনি অ-সংস্কৃত শব্দে ঐ এবং ঔ-কেও অযুক্ত রাখাই রীতি, যথা—লইতে, লউক প্রভৃতি শব্দকে লৈতে, লৌক এরূপ লেখা বিধি নয়। তার ফল এই হয়েছে যে অক্ষরবৃত্ত ছন্দে শৈল, দৈব প্রভৃতি শব্দে দুই অক্ষর ধরা হয়; কিন্তু হইল, লইব প্রভৃতিতে তিন অক্ষর ধরা হয়। মোন, ধোত ইত্যাদিতে দুই অক্ষর, আর হউন, লউক ইত্যাদিতে তিন অক্ষর। শুধু অক্ষরগুণতির দিক্ থেকে না দেখে ধ্বনির দিক্ থেকে বিচার করলে অক্ষরবৃত্তের এ ক্রটিগুলোকে গুরুতর বলেই স্বীকার করতে হবে। প্রাচীন কবিরা কিন্তু অনেক সময় হৈতে, লৈয়া ইত্যাদি রূপ ব্যবহার করতে ইতস্ততঃ করতেন না। এক হিসাবে একপ ব্যবহারকে সংগত বলে স্বীকার করতেই হবে। কিন্তু তাঁরা সব সময় এ রীতি রক্ষা করতেন না বলে ছন্দেও ক্রটি থেকে যেত। কৃত্তিবাসের আত্মবিবরণ থেকে দৃষ্টান্ত দিচ্ছি—

বঙ্গদেশে প্রমাদ হৈল সকল অস্থির।

বঙ্গদেশ ছাড়ি ওঝা আইলা গঙ্গাতীর ॥

\* \* \*

গঙ্গাতীরে দাঁড়াইয়া চতুর্দিকে চায়।

রাত্রিকাল হৈল ওঝা শুভিল তথায় ॥

\* \* \*

জ্যোষ্ঠ পুত্র হৈল তার নাম যে ভৈরব।

রাজার সভায় তার অধিক গৌরব ॥

এখানে সবগুলি যুক্তস্বরই একাক্ষর বলে গণ্য হয়েছে, কেবল 'দাঁড়াইয়া' কথায় এ নিয়মের ব্যতিক্রম হয়েছে। বিশেষ লক্ষ করার বিষয়, 'আইলা' শব্দে 'আই'-যুক্তধ্বনিটি এক বলেই গৃহীত হয়েছে, যদিও এর জন্য কোনো একটিমাত্র নির্দিষ্ট বর্ণলিপি নেই। 'হৈল' শব্দের 'আই' এবং ভৈরবের 'ঐ' প্রাচীন কবিরা কাছে সমান মর্যাদা পেয়েছে। কিন্তু আধুনিক কবিরা প্রাচীন বানান-রীতি গ্রহণ করতেও প্রস্তুত নন, অথচ প্রচলিত বানান-পদ্ধতি রেখে আই, আই, ঐ, ঔ-কে

সমান মর্যাদা দিতেও রাজি নন, কারণ তাতে চান্দ্র গুনতির হিসাব ঠিক থাকে না। এভাবে কানকে চোখের অধীন করে রাখার ফলে আর যাই হক না কেন, অক্ষরবৃত্ত ছন্দের কিছুমাত্র উপকার সাধিত হবে না।

ঐ এবং ঔকারের বানানের এই বৈরাচারের ফলে বাংলা অক্ষরবৃত্ত ছন্দের কবিদের আরেক রকম সমস্যা আছে, তাই এখন দেখাচ্ছি। বাংলায় কতগুলি শব্দ আছে যার উচ্চারণ স্থির আছে, কিন্তু ঐ এবং ঔকারের যুক্ত ও বিভক্ত দুই রূপের ফলে তাদের বানান স্থির নেই। যথা—বৈঠা, পৈঠা, পৈতা, বোমা প্রভৃতি শব্দের যুক্তধ্বনিকে বিযুক্ত করে বইঠা, পইঠা, পইতা, বউমা ইত্যাদি রূপেও লেখা যায়। যে ভাবেই লেখা হক না কেন, এদের ধ্বনি যখন স্থির আছে তখন মাত্রাবৃত্ত ও স্বরবৃত্ত ছন্দে এ শব্দগুলিকে ব্যবহার করতে কবিদের কিছুমাত্র ভাবনায় পড়তে হয় না। যথা—

শৈলের পৈঠায় এস তনু-গাজী

পাহাড়ের বুকচেরা এস প্রেমদাজী।

—বর্ণা, বিদায়-আরতি, সত্যেন্দ্রনাথ

এখানে যদি ‘পইঠায়’ লেখা হত তা হলেও ছন্দ ঠিকই থাকত; কারণ চোখের হিসাবে এদের মধ্যে অক্ষরসংখ্যার পার্থক্য থাকলেও কালের হিসাবে এ দুটি শব্দের মধ্যে ধ্বনিপরিমাণের কিছুমাত্র পার্থক্য নেই। কিন্তু অক্ষরবৃত্ত ছন্দ রচনার সময় কবির কানকে অস্বীকার করে চোখের দ্বারা চালিত হয়ে থাকেন বলে এই সমস্ত দ্বিৰূপ শব্দ ব্যবহারের সময় তাঁদের প্রভাবিত হবার সম্ভাবনা আছে। সংখ্যাপূরণের দিকে দৃষ্টি রেখে তাঁরা হয়তো কখনও পৈঠা লিখে দুঃখ ভর্তি করতে পারেন, আবার কখনও বা প্রয়োজনের খাতিরে ‘পইঠা’ লিখে তিন বলে গণ্য করতে পারেন। এ রকম করা রচনাকার্যের পক্ষে স্ববিধাজনক হতে পারে; কিন্তু ছন্দ-সৌষ্ঠবের পক্ষে মারাত্মক নয় কি ?

শব্দের অন্তর্স্থিত ঐকার ও ঔকার নিয়েও কবিদের মধ্যে সংশয় আছে। পূর্বেই বলেছি যে অক্ষরবৃত্ত ছন্দে শব্দের প্রাস্তবতী যুগ্মধ্বনি আসলেই বিমাত্রিক এবং সেজন্যই বাঞ্ছনাস্তিক বা স্বরাস্তিক উভয় প্রকার যুগ্মধ্বনিকেই শব্দের অন্তে একটু টেনে দীর্ঘ উচ্চারণ করে পড়তে হয়। পূর্বে একটি দৃষ্টান্ত দিয়েছি; এ স্থলে আরেকটি দৃষ্টান্ত দিচ্ছি—

+        +    ×    +    ×                ×  
দাও, খুলে দাও, দ্বার, | ওই, তার বেলা হল শেষ, |

+  
বুকে লও, তারে ।

|                ×    ×                ×    ×    ×  
শাস্তি-অভিষেক্ হোক, | ধৌত হোক সকল্ আবেশ্, |

|    |  
অগ্নি-উৎস-ধারে ।

—সাবিত্রী, পূরবী, রবীন্দ্রনাথ

এখানে শব্দের মধ্যবর্তী তিনটি যুগ্মধ্বনি ( দণ্ড-চিহ্নিত ) একাক্ষর বা একমাত্রিক হিসাবেই উচ্চারিত হচ্ছে ; কিন্তু শব্দের প্রান্তবর্তী যুগ্মধ্বনিগুলি ( স্বরাস্তিক ধ্বনি যোগ-চিহ্নিত, ব্যঞ্জনাস্তিক ধ্বনি গুণ-চিহ্নিত ) দ্বিমাত্রিক এবং সেজন্তু এগুলির দীর্ঘ বা বিলম্বিত উচ্চারণ হচ্ছে । বাংলা ছন্দরচয়িতারা কিন্তু এ ছন্দের বিচার এভাবে করেন না ; তাঁরা শুধু লিপিবদ্ধ অক্ষরসংখ্যা শুনেই এ ছন্দ রচনা করেন ; এই গুনতির হিসাবে তাঁরা যুক্তবর্ণ, অযুক্তবর্ণ, হসন্তবর্ণ, স্বরবর্ণ সকলকেই আদমহুমারির মতো সমান মর্যাদা দিয়ে থাকেন । উদ্ধৃত পংক্তিগুলিতে স্বরাস্ত ব্যঞ্জন ( যুক্ত ও অযুক্ত ), হসন্ত ব্যঞ্জন ও স্বরবর্ণ সবাইকে প্রচলিত হিসাবে সমান দর দেওয়া হয়েছে । কিন্তু প্রকৃতপক্ষে এখানে আশ্রিত ব্যঞ্জন ( অর্থাৎ হসন্ত ব্যঞ্জন )-গুলির কোনো স্বাতন্ত্র্য নেই, আশ্রয়দাতা স্বরের সঙ্গে যুক্ত হয়ে এরা যে যুগ্মধ্বনির সৃষ্টি করেছে তারই বিচার করতে হবে ; এ বিচারে শব্দের অ-প্রান্তবর্তী আশ্রয়দাতা স্বরগুলি ( দণ্ড-চিহ্নিত ) লঘু স্বরের মতো একমাত্রিক বলেই গণ্য হয়েছে ( যেমন স্বরবৃত্ত ছন্দে হয় ), আর শব্দের প্রান্তবর্তী আশ্রয়দাতা স্বরগুলি ( গুণ চিহ্নিত ) দ্বিমাত্রিক বলে গ্রাহ্য হয়েছে ( যেমন মাত্রাবৃত্ত ছন্দে হয় ) । ঠিক তেমনি আশ্রিত স্বরবর্ণগুলির কোনো স্বতন্ত্র অস্তিত্ব নেই, পূর্ববর্তী আশ্রয়দাতা স্বরের ( যোগ-চিহ্নিত ) সঙ্গে যুক্ত হয়ে যে যুগ্ম স্বরের সৃষ্টি করেছে তারই ধ্বনিপরিমাণ বিচার করতে হবে এবং সে বিচারে এখানে সমস্ত যুগ্মস্বরগুলিই প্রান্তবর্তী বলে দ্বিমাত্রিক রূপে গণ্য হবে । প্রচলিত হিসাবে এ ছন্দটি আট, দশ ও ছয় অক্ষরের জিপদী ছন্দ । ধ্বনিপরিমাণের হিসাবেও এ ছন্দের তিন পাদে ষড়াক্ষরে আট, দশ ও ছয়টি ধ্বনিমাত্রা রয়েছে । দুই হিসাবেই মোটের উপর গণনার কল সমান হয়েছে, অতএব ছন্দ ঠিক আছে । কিন্তু সর্বত্রই যে একরূপ



দুই হিসাবের মধ্যে সাম্য থাকবেই এমন কোনো নিশ্চয়তা নেই। কারণ শুধু সংখ্যাগুনতির হিসাবের মধ্যে ধ্বনিপরিমাণনির্ণয়ের কিছুমাত্র চেষ্টা থাকে না। কাজেই এই সংখ্যা গোনার ফলে অনেক রকম বিপদ ঘটতে পারে তা আগে দেখিয়েছি। এখানে আরেকটি বিপদের কথা উল্লেখ করছি।

উপরের দৃষ্টান্তটির প্রথম পংক্তিতে একটি শব্দ হচ্ছে ‘ওই’, এ যুগ্মস্বরটির আসল রূপ ‘ঐ’। বাঙালীর উচ্চারণে অই, ওই এবং ঐ একই রকম। উক্ত দৃষ্টান্তটিতে যদি ‘ওই’-এর জায়গায় ‘ঐ’ লেখা হত, তবু ছন্দ-পতন হত না; কারণ ধ্বনিপরিমাণে ‘ওই’ আর ‘ঐ’ সমতুল্য অর্থাৎ ঐক্যমাত্রিক। কিন্তু ‘ওই’ না লিখে ‘ঐ’ লিখলে অক্ষরগুনতির হিসাবে এক অক্ষর কম পড়ে যায়; তাই কবি অতি সতর্কভাবে ঐ-কে পরিহার করে ‘ওই’ বসিয়েছেন। এটা লক্ষ করার বিষয় যে স্বরবৃত্ত ছন্দে কিংবা মাত্রাবৃত্ত ছন্দে রবীন্দ্রনাথ ‘ঐ’ ব্যবহার করতে কখনও ইতস্ততঃ করেন না; যথা—

ঐ বাজে রে | ঘণ্টা বাজে।

চমকে উঠেই | হঠাৎ দেখে | অন্ধ ছিল | তন্দ্রা মাঝে।

( স্বরবৃত্ত ছন্দ )

—বিজয়া, পূরবী, রবীন্দ্রনাথ

ঐ আনে ঐ | অতি ভৈরব | হরষে

জনসিক্ত | ক্ষতিমোরত | রভসে

( মাত্রাবৃত্ত ছন্দ )

—বর্ষাঙ্কুর - কল্পনা, রবীন্দ্রনাথ

কিন্তু অক্ষরবৃত্ত ছন্দে রবীন্দ্রনাথ সর্বত্রই ‘ঐ’ বর্জন করে ‘ওই’ ব্যবহার করেন। এখানে একটিমাত্র দৃষ্টান্ত দিচ্ছি—

এই কৃণ, এই ধূলি—ওই তারা, ওই শশী-রবি

সবার আড়ালে

তুমি ছবি, তুমি শুধু ছবি।

—ছবি, বলাকা, রবীন্দ্রনাথ

রবীন্দ্রনাথের সমস্ত কাব্যগ্রন্থের মধ্যে অক্ষরবৃত্তে ব্যবহৃত একটিমাত্র ‘ঐ’ আমার চোখে পড়েছে; সেটি আছে ‘পূরবী’র ‘পাঁচশে বৈশাখ’ কবিতাটিতে। যথা—

উদয়-দিগন্তে ঐ । শুভ্র শব্দ বাজে ।

অক্ষরসংখ্যা ঠিক রাখার জগুই যে রবীন্দ্রনাথ ‘ঐ’ ছেড়ে ‘ওই’ ব্যবহার করেন তাতে সন্দেহ নেই। কিন্তু অক্ষরবৃত্ত ছন্দে শব্দের প্রাস্তস্থিত যুগ্মধ্বনি সর্বদাই দ্বিমাত্রিক বলে ‘ঐ’ ছেড়ে ‘ওই’ ব্যবহারের আবশ্যকতা নেই। (‘ঐ’ একশ্বর শব্দ বলে এর ধ্বনিটাকে প্রাস্তিক বলেই ধরতে হবে।) উপরের দৃষ্টান্তটিতেই এ কথাটির সত্যতা প্রমাণিত হয়। আরও দু-একটি দৃষ্টান্ত দিলে এ বিষয়ে সন্দেহের আর অবকাশ থাকবে না।—

পিতৃহীন, নিরুপায়, | দরিদ্র সে—ঐ তার ঘর ;

দাসী ভেবেছিল যারে | —মা তাহার, নহেক অপর !

—সত্যদাস, জাগরণী, যতীন্দ্রমোহন

ঐটুকু ছোট পায়ে | কতদূর গেল সে যে চলি !

সেখানে যায় না যাওয়া ? | সে পথ কি দিতে পার বলি’ ?

—যুগ্ম অক্ষ, নীহারিকা, যতীন্দ্রমোহন

ঐটুকু কচি বুক | কোন্ ভয়ে করে ছুঁ ছুঁ

কি বেদনা ঐ মর্ম্মলে !

—দেয়ালা, নীহারিকা, যতীন্দ্রমোহন

বলা বাহুল্য এ তিনটি দৃষ্টান্তই অক্ষরবৃত্ত ছন্দে রচিত। ওই তিনটি দৃষ্টান্তের মধ্যে চার জায়গায় ‘ঐ’ কথাটি দ্বিমাত্রিক রূপেই ব্যবহৃত হয়েছে অথচ ছন্দপতন হয় নি, এ কথা নিশ্চয়। সুতরাং অক্ষরবৃত্তেও দ্বিমাত্রিক ধ্বনির স্থান আছে, এ বিষয়ে সন্দেহ থাকতে পারে না।

ওই বা ঐ সম্বন্ধে যা বলা হল, দই বা দৈ, বউ বা বৌ প্রভৃতি সম্বন্ধেও তাই সত্য। অর্থাৎ কেউ যদি অক্ষরবৃত্ত ছন্দে দই বা বউ না লিখে দৈ বা বৌ লেখেন তথাপি গুনতির হিসাবে অক্ষরসংখ্যা কম হলেও ছন্দপতন হবে না। কারণ যে রূপেই লেখা হক না কেন ওই, ঐ, দই, দৈ, বউ, বৌ প্রভৃতি শব্দ অক্ষরবৃত্ত ছন্দেও সর্বদাই দ্বিমাত্রিক রূপেই ব্যবহৃত হয়। একটু ভেবে দেখলেই বোঝা যাবে যে অই, ( বা ওই, ) এবং অউ-এর স্থায় আই, আও, অও প্রভৃতি শব্দের প্রাস্তবর্তী যুগ্মধ্বন্যও অক্ষরবৃত্ত ছন্দে দ্বিমাত্রিকই বটে। সুতরাং এ ছন্দে যাই, যাও, লও প্রভৃতি শব্দকে দুটি অক্ষর বলে না ধরে ঐ, দৈ, বৌ প্রভৃতি শব্দের স্থায় দুটি মাত্রা বলে ধরাই সংগত। আর অই, কিংবা অউ, যেমন শব্দের

মধ্যে (শেষ প্রান্তে না হলেই তাকে মধ্যে বলছি) একমাত্রিক বলে গণ্য হয় (যথা শৈব, মৌন) তেমনি আই, ইউ, প্রভৃতি যুগ্মস্বরকেও শব্দের মধ্যে একমাত্রা হিসাবেই গণ্য করা উচিত। প্রকৃতপক্ষে অক্ষরবৃত্তে দৈ এবং দৈব, বৌ এবং মৌন কার্যতঃ সমান; কারণ এ ছন্দে উভয়কেই দুই বলে ধরা হবে। একই কারণে 'শিউলি'কেও তিন না ধরে দুই ধরা উচিত। আর এ ছন্দে যুগ্ম-স্বরের ত্রায় ব্যঞ্জনান্তিক যুগ্মধ্বনিও শব্দের অন্তে দ্বিমাত্রিক বলেই গণ্য হয়; অর্থাৎ অই (ঐ), অউ (ঔ), আই, আউ, ইত্যাদির ন্যায় অরু, ইন, আপ্ প্রভৃতিকেও দুটি অক্ষর না বলে দুটি মাত্রা বলাই উচিত, যদি এরা শব্দের শেষে থাকে। কিন্তু মধ্যে থাকলে অই, অউ প্রভৃতির ন্যায় এরা একমাত্রিক বলেই গ্রাহ্য হবে। সুতরাং অক্ষরবৃত্ত ছন্দের ধ্বনিপরিমাণ নির্ণয়প্রণালী হচ্ছে এ রকম—

॥ । । ॥ ॥ ॥ ॥ । । । ॥  
দাও, খুলে দাও দ্বার, | ওই-তার বেলা হল শেষ, |

। । ॥ । ।  
বুকে লও তারে ।

। । । । ॥ ॥ । । ॥ । ॥ । ॥  
শাস্তি অভিষেক হোক, | ধৌত হোক সকল আবেশ, |

। । । । ।  
অগ্নি-উৎস-ধারে ।

আশ্রিত ব্যঞ্জন (অর্থাৎ হসন্ত বর্ণ) এবং আশ্রিত স্বর উভয়কেই হসন্ত চিহ্নের দ্বারা চিহ্নিত করা হল এবং শব্দাস্তস্থিত দ্বিমাত্রিক বা যুগ্মধ্বনিগুলি যুগ্মদণ্ড চিহ্নের দ্বারা নির্দিষ্ট করা হল। আর অযুগ্মধ্বনি এবং শব্দমধ্যবর্তী যুগ্মধ্বনিগুলিকে একটিমাত্র দণ্ড-চিহ্নের দ্বারা নির্দেশ করা হয়েছে। প্রচলিত প্রণালীতে অক্ষর না গুনে এই দণ্ডসংখ্যাগুলি গুনলেও দেখা যাবে যে এটি যথাক্রমে আট, দশ এবং ছয় ধ্বনির (অক্ষরের নয়) ত্রিগুণী ছন্দ।

প্রচলিত প্রণালীতে এ ছন্দের হিসাব রাখা হয় চাক্ষুষ ভাবে অক্ষরসংখ্যা গুনে, ধ্বনিপরিমাণ নির্ণয়ের দ্বারা নয়,—এ কথা বলা হয়েছে। কিন্তু ধ্বনির প্রতি কিছুমাত্র লক্ষ না রেখে সব সময়ই শুধু অক্ষর গোনা হয়, এ কথা বলা অন্যায় হবে। আগেই দেখেছি 'উৎসব, বৎসর, ভৎসনা' প্রভৃতি শব্দে খণ্ড-৭কে স্বতন্ত্র দেখা গেলেও তাকে স্বতন্ত্রভাবে গোনা হয় না; একে পরবর্তী ব্যঞ্জনের

সঙ্গে বৃদ্ধ বলেই ধরা হয়। কাজেই এখানেও ধ্বনির চেয়ে অক্ষরগুণতির প্রতিই লক্ষ্য বেশি। কিন্তু ‘চাওয়া, পাওয়া, হাওয়া’ প্রভৃতি শব্দকে দেখতে তিন দেখলেও এগুলিকে দুই বলেই ধরা হয়; কারণ এসব স্থলে ‘ওয়া’র উচ্চারণ পৃথক হয় না, অন্তঃস্থ ‘ব’-য়ের মতো এক সঙ্গেই উচ্চারণ হয়। সুতরাং এখানে ধ্বনির প্রতি লক্ষ্য থাকার পরিচয় পাওয়া গেল। আবার ‘আমারই, তোমারও, যখনই’ প্রভৃতি শব্দকেও দেখতে চার দেখলেও এরা আসলে ‘আমারি, তোমারো, যখনি’ প্রভৃতির মতো উচ্চারিত হয়, তাই এগুলিকে তিন বলেই ধরা হয়; এখানেও অক্ষরসংখ্যার চেয়ে ধ্বনিরই প্রাধান্য। দৃষ্টান্ত—

॥ । । । । ॥

মোর্ সন্ধ্যাদীপালোক্,

॥ । । । । ॥

পথ্-চাওয়া ছুটি চোখ্,

। । । । । ।

যত্নে গীথা মালা

—অশেষ, কল্পনা, রবীন্দ্রনাথ

হে ধরণী, কেন প্রতিদিন

তৃপ্তিহীন

।

একই লিপি পড়ো ফিরে ফিরে ?

—লিপি, পূরবী, রবীন্দ্রনাথ

এখানে ‘চাওয়া’ এবং ‘এক-ই’ কোথাও তিন ধরা হয় নি; ধ্বনির প্রতি লক্ষ্য রেখে দুই ধরা হয়েছে।

কিন্তু ধ্বনির প্রতি বিশেষ লক্ষ্য না রেখে লিপিবদ্ধ অক্ষরসংখ্যার প্রতি নজর রাখাই এ ছন্দের সাধারণ রীতি। সুতরাং এ ছন্দের গোড়ার কর্তাই হচ্ছে বাংলা লিপিপদ্ধতি। আগেই দেখানো হয়েছে যে যদি বাংলার যুক্তবর্ণগুলিকে বিযুক্ত করে লেখার প্রথাই এ দেশে প্রচলিত থাকত তবে অক্ষর গোনার অল্প অভ্যাস হতে পারত না, সুতরাং অক্ষরবৃত্ত ছন্দেরই উৎপত্তি হত না। বাংলা স্বরবর্ণের লিপিপদ্ধতির ফলে অক্ষরবৃত্ত ছন্দের উপর কি প্রভাব হয়েছে, এখন তাই দেখা যাক। অনুপ্রস্থের লিপিপদ্ধতিতে (অন্ততঃ ছন্দের তরফ থেকে)

কোনো গোলযোগ নেই। কিন্তু যুগ্মস্বরের লিপিপদ্ধতি নিয়েই বত মুশকিল। আমাদের বর্ণমালায় দুটিমাত্র যুগ্মস্বর (অই্ এবং অউ্)-এর স্থান আছে; কারণ এরা সংস্কৃত ভাষা থেকে আমাদের ভাষায় স্থানলাভ করেছে। এ দুটি যুগ্মস্বরের যুক্তরূপ হচ্ছে ঐ এবং ঔ; আর ব্যঞ্জননের সঙ্গে মিলিত হলে এদের প্রকাশের জন্য স্বতন্ত্র সংকেতলিপিও আছে, যথা—ঐ এবং ঐ। কিন্তু অসংস্কৃত যুগ্মস্বর (আই, আউ্ ইত্যাদি)-গুলির কোনো স্বতন্ত্র যুক্তরূপ নেই এবং তাদের জন্য কোনো সংকেতলিপিও নেই। এর ফলে অক্ষরবৃত্ত ছন্দের স্বরূপ সম্বন্ধে যথার্থ জ্ঞানলাভের পথে অনেক বাধা হয়েছে।

যদি অই্ এবং অউ্-এর কোনো যুক্তরূপ ও বিশেষ সংকেতলিপি না থাকত, অর্থাৎ যদি শৈল, মৌন প্রভৃতি শব্দকে শইল, মউন ইত্যাদি রূপে লেখার রীতি থাকত, তবে অক্ষর-গোনা ছন্দের যে কি রূপ হত তা সহজেই অহুমের। পক্ষান্তরে যদি আই্, আউ্ ইত্যাদি সমস্ত যুগ্মস্বরেরই স্বতন্ত্র যুক্তরূপ থাকত, তবে বাংলা অক্ষরবৃত্ত ছন্দের বর্তমান রূপ হতে পারত কি না সন্দেহ। দুটি দৃষ্টান্ত দিলেই আমার বক্তব্য বিষয় স্পষ্ট হবে আশা করি।

হে অঙ্গরি,

তোমার নয়নজ্যোতি প্রেমবেদনায়

কভু না হোক ম্লান—লৈহু বিদায়।

—স্বর্ণ হইতে বিদায়, চিত্রা, রবীন্দ্রনাথ

যদি ‘হউক’ এবং ‘লইহু’ কথা দুটিকে উদ্ধৃত রূপে লেখা আবশ্যিক হত, তবে এই পংক্তিগুলিতে ছন্দ ঠিক থাকত কি না তা অহুমান করা শক্ত নয়। আবার যদি ‘আই্’কে ‘ঐ’ এই সংকেতচিহ্ন দ্বারা প্রকাশ করাই রীতি হত তবে নিম্নোক্ত পংক্তিগুলির কি আকার হত দেখা যাক—

অন্ন চাঁ, প্রাণ চাঁ, আলো চাঁ, চাঁ মুক্ত বায়ু,

চাঁ বল, চাঁ স্বাস্থ্য, আনন্দ-উজ্জ্বল পরমায়ু।

—এবার কিরাও মোরে, চিত্রা, রবীন্দ্রনাথ

এ রকম লিখলেও কিন্তু ছন্দপতন হবে না; কারণ চাক্ষুষ গুণতির হিসাবে পার্থক্য থাকলেও ধ্বনিপরিমাণের হিসাবে ‘চাই’ এবং ‘চাঁ’-এর মধ্যে কোনো পার্থক্য নেই; অক্ষরবৃত্ত ছন্দে যেমন ‘ওই’-এর বদলে ‘ঐ’ লিখলে, কিংবা ‘বউ’ না লিখে ‘বৌ’ লিখলে ছন্দগত কোনো পরিবর্তন ঘটে না, তেমনি ‘চাই’ না লিখে ‘চাঁ’



হয় নি ; হতরাং ধ্বনির মাত্রাপরিমাণ স্থির নেই। অতএব এ ছন্দকে স্বরবৃত্ত ছন্দ বলব। পক্ষান্তরে—

। । । ।    ॥ ॥    । । ॥    ॥ ।  
চিরযুবা | শুবীব | বিজয়ীব | কুঞ্জে  
। । ॥    ॥ ॥    । । । ।    ॥ ।  
আমাদেব | মঞ্জীব | মদালসে | গুঞ্জে ;

\*                      \*                      \*

। । । ।    । । । ।    ॥ ॥    । । ।  
ফুটে উঠি | হাসি সম | খড়্গের | বলকে,  
। । । ।    । । । ।    ॥ । ।    । । ।  
মোর। করি | মনোরম | মৃত্যুরে | পলকে ।

—বিদ্বাংপর্ণা, তুলির লিখন, সত্যেন্দ্রনাথ

এখানে প্রতি পংক্তিচ্ছেদে চারটি করে ধ্বনিমাত্রা আছে, শেষ ছেদে তিনটি করে ; যুগ্ম বা গুরু ধ্বনিগুলি দ্বিমাত্রিক, কাজেই দুগুদণ্ড-চিহ্নিত হয়েছে, আর অযুগ্ম বা লঘু ধ্বনিগুলি একমাত্রিক বলে একটি করে দণ্ডচিহ্নে চিহ্নিত হয়েছে। এই হিসাবে প্রতি পংক্তিচ্ছেদে ধ্বনির মাত্রাপরিমাণ স্থির রয়েছে বলে এ ছন্দকে মাত্রাবৃত্ত বলব। বলা বাহুল্য এখানে স্বরবৃত্তের মতো ধ্বনির বা স্বরের সংখ্যা স্থির নেই।

এখন একটি অক্ষরবৃত্তের দৃষ্টান্ত ধরা যাক—

। । ॥    । । । ।    । । । ।    ॥  
বিপরীত | মুখে তারে | পড়েছিল | তাই  
। । । ।    । । ॥    । । । ।    ॥  
বিখজোড়া | সে লিপির | অর্থ বুঝি | নাই ।

—৪০, নৈবেদ্য, রবীন্দ্রনাথ

স্বরবৃত্ত ও মাত্রাবৃত্তের একটি বিশেষ মিশ্রণের ফলে উদ্ধৃত পংক্তিছটি রচিত হয়েছে ; প্রত্যেকটি শব্দের পূর্বাংশে রয়েছে স্বরবৃত্তের তত্ত্ব, সেখানে রয়েছে ধ্বনিসংখ্যারই প্রাধান্য ( বিখ ও অর্থ শব্দের পূর্বাংশে, দুই না ধরে একই ধরা হয়েছে ) ; আর তার শেষাংশে আছে মাত্রাবৃত্তের তত্ত্ব, ধ্বনিমাত্রাই এখানকার গোড়ার কথা ( লিপির শব্দের শেষ ধ্বনিটিকে মাত্রাহিসাবে দুই ধরা হয়েছে,

সংখ্যা হিসাবে এক ধরা হয় নি)। স্বরবৃত্ত ও মাত্রাবৃত্তের এই বৌগিক রীতিতে উদ্ধৃত পংক্তিতে প্রতি পর্বে চারটি করে unit বা একক রয়েছে, শেষ পর্বে আছে দুটি করে। কিন্তু প্রশ্ন হচ্ছে এই এককগুলি কোন্ তত্ত্বের একক? ধনিমাত্রার নয়, কারণ মাত্রাহিসাবে প্রথম পংক্তিতে চোদ্দ মাত্রা থাকলেও দ্বিতীয় পংক্তিতে আছে ষোল (বিশ্ব ও অর্থ শব্দে একমাত্রা করে বেশি আছে); ধনিসংখ্যারও নয়, কারণ এর পর্বগুলিতে সংখ্যার সাম্য নেই। অর্থাৎ এতে ধনিমাত্রা ও ধনিসংখ্যা কারও স্থিরতা নেই, স্ততরাং এ ছন্দ মাত্রাবৃত্তও নয়, স্বরবৃত্তও নয়।

পূর্বেই বলেছি এ ছন্দ আসলে মাত্রাবৃত্ত ও স্বরবৃত্তের মিশ্রণ-জাত একটি মিশ্র ছন্দ; কাজেই এর গোড়ায় যে তত্ত্ব আছে তার একক বা unitকে একটা বিশেষ নাম দেওয়া সম্ভব নয়। তাই অগত্যা এই unitকে ‘অক্ষর’ নাম দিয়ে এ ছন্দকে অক্ষরবৃত্ত বলে অভিহিত করেছি। এ নামকরণের অবশ্য আর-একটি কারণ আছে; সেটি হচ্ছে গোড়ায় আপাতদৃষ্টমান অক্ষরসংখ্যা শুনে ‘ছন্দ’ রচনার অভ্যাস থেকেই এ ছন্দের উৎপত্তি হয়েছে এবং আজকালও প্রধানতঃ অক্ষর-সংখ্যার প্রতি লক্ষ রেখেই এ ছন্দ রচনা করা হয়ে থাকে। স্ততরাং এদিক থেকে দেখতে গেলে একে ‘অক্ষরবৃত্ত’ নাম দেওয়া অসংগত মনে হবে না।\*

\* বিচিত্রা ১৩৩৮ অগ্রহায়ণ



## ছন্দ-জিজ্ঞাসা ( ১ )

“অক্ষরবৃত্ত ছন্দের স্বরূপ” প্রবন্ধটি যখন লিখেছিলুম তখনই ভেবেছিলুম এ বিষয় নিয়ে তর্ক উঠবে। শুধু তাই নয়, তর্ক উঠুক এমন ইচ্ছেও আমি করেছিলুম। কারণ, পারস্পরিক আলোচনার দ্বারাই ক্রমশঃ সত্য নির্ণীত ও স্বীকৃত হয়। সত্যের উপর কারও একচেটে অধিকার নেই। স্বতরাং আমি যা বলব তা-ই একমাত্র সত্য, এমন মিথ্যে অভিমান আমার ছিল না ; এখনও নেই।

আরও একটি কথা আমাকে স্বীকার করতেই হবে। প্রবন্ধটি যখন লিখি তখন মনে মনে খুবই ভরসা করেছিলুম যে, ওই প্রবন্ধে আমার যা প্রতিপাত্ত বিষয় সে সম্বন্ধে অনেকে যত তর্কই তুলুক না কেন ছন্দ-প্রণীত রবীন্দ্রনাথের কাছে তার যথাযোগ্য মর্যাদা পেতে ক্রটি ঘটবে না ; যদি কোথাও আমি ভুল করে থাকি তবে তিনিই তা স্বতঃপ্রবৃত্ত হয়ে দেখিয়ে দেবেন। তাই পৌষের ‘বিচিত্রা’তেই বাংলা ছন্দ সম্বন্ধে তাঁর একটি প্রবন্ধের প্রতীক্ষা আমার মনে ছিল। কিন্তু পৌষের ‘বিচিত্রা’য় তাঁর যে প্রবন্ধটি বেরোল সেটি পড়ে আমি শুধু দুঃখিত নয়, লজ্জিতও হয়েছি। দুঃখিত হয়েছি, কারণ ওই স্বদীর্ঘ প্রবন্ধটিতে আমি যা বলতে চেয়েছি তার কিছুই বোঝাতে পারি নি। রবীন্দ্রনাথ নিজেই বলেছেন, আমার নালিশের বিষয়টি কি তা তিনি ঠিক স্পষ্ট বুঝতে পারেন নি। ভাষাতত্ত্বের সূক্ষ্ম বিচার স্বভাবতঃই জটিল, বিষয়টি বোঝাও একটু প্রয়াসসাধ্য। তাই এ বিষয়ে কোনো প্রতিপাত্ত তত্ত্ব স্পষ্ট করে বোঝাতে ক্ষমতার প্রয়োজন। আমার বক্তব্য বিষয় আমি যদি স্পষ্ট করে বোঝাতে না পেরে থাকি, তবে সে-অক্ষমতার জন্য আমিই দায়ী। কিন্তু দুঃখের চেয়েও লজ্জা পেয়েছি বেশি। কারণ আমার প্রবন্ধটি পড়ে রবীন্দ্রনাথের ধারণা হয়েছে যে, আমি আধুনিক বাঙালি কবিদের কিছু ভৎসনা করেছি এবং তাঁদের জবাবদিহি তলব করেছি। আমি গোড়াতেই বলে রাখছি, ওরকম অভিপ্রায় আমার লেশমাত্রও ছিল না। তথাপি আমার লেখায় যদি কৈফিয়ৎ-তলব বা ভৎসনার স্বর শুনিয়ে থাকে তবে আমি শুধু রবীন্দ্রনাথ নয়, সমগ্র আধুনিক বাঙালি কবিসমাজের কাছেই মার্জনা প্রার্থনা করছি।

বিশেষভাবে রবীন্দ্রনাথের কাছেই আমার একটি নিবেদন আছে। আমি একজন অতি আধুনিক লেখক, সন্দেহ নেই। কিন্তু এই আধুনিকতাই আমার একটি বিশেষ সম্পদ; এই আধুনিক যুগে জন্মেছি বলে আমি সত্যিই বিশেষ গৌরব বোধ করে থাকি। কারণ, বাংলার সাহিত্যিক ইতিহাসে রবীন্দ্রনাথের যুগে জন্মাবার মতো পরম মৌভাগ্য আর কিছু হতে পারে বলে মনে করিনে। অন্য কথা ছেড়ে দিয়ে শুধু কবিতা ও ছন্দের কথাই বলছি। বাল্যকালে যখন প্রথম কাব্য পড়তে শুরু করি তখন রবীন্দ্রকাব্যের সঙ্গে পরিচয় ঘটে নি। প্রথমেই পড়েছিলুম মধুসূদনের কাব্যগ্রন্থাবলী, তারপর হেমচন্দ্র, তারপর নবীনচন্দ্র। তার পরেই যখন রবীন্দ্রকাব্যের সঙ্গে পরিচয় ঘটল তখন সহসা অপ্রত্যাশিত রূপে অপূর্ব স্বর ও ধ্বনির যে বিচিত্র লোকেব সন্ধান পেলুম, আনন্দ ও বিস্ময়ের যে পুলক তখন অন্তরকে উৎফুল্ল করে তুলেছিল তার তুলনা নেই। সে পুলকের স্মৃতি এখনও প্রাণে জাগরুক আছে। তখনকার দিনে তাঁর কবিত্বের চেয়ে তাঁর রচিত ছন্দের বৈচিত্র্য, নৃত্যলীলা ও স্বরঝংকারই আমার তরুণ মনকে নাড়া দিয়েছিল বেশি। তখন থেকে এখন পর্যন্ত আমি রবীন্দ্রকাব্যের একজন একনিষ্ঠ পাঠক এবং তখন থেকেই আমি তাঁর অফুৎস্ত ভাণ্ডারে বহু বিচিত্র ছন্দের অন্তর্নিহিত তত্ত্বটিকে আবিষ্কারের চেষ্টায় আত্মনিয়োগ করেছি। এই ষোলো-সতেরো বছর যাবৎ রবীন্দ্রনাথের ছন্দের চর্চা করে আমার এই ধারণা হয়েছে যে শুধু বাংলা দেশে নয়, কোনো দেশে কোনো কালে তার চেয়ে বেশি সহজ ছন্দ-বোধসম্পন্ন কবি জন্মেছেন কি না সন্দেহ। আর বাংলা দেশে শুধু আমি নয়, সমগ্র বাঙালি কবিসমাজই তাঁকে একমাত্র ছন্দের গুরু বলে স্বীকার করেছে এবং তাঁর কাছেই ছন্দের দীক্ষা নিয়েছে। আজ বাংলা দেশের কাব্যসাহিত্যে যে অজস্র ছন্দের ব্যবহার চলছে তার সমস্তগুলিই রবীন্দ্রনাথের রচিত, না হয় তাঁর দ্বারা পরিমার্জিত। বাংলা কাব্যে প্রচলিত অসংখ্য ছন্দের মধ্যে এমন একটি ছন্দও আছে কি না সন্দেহ যা রবীন্দ্রনাথের প্রতিভার স্পর্শে উজ্জ্বল না হয়েছে। প্রাক্রবীন্দ্র যুগের এমন একটি ছন্দও নেই যা তাঁর স্বাভাবিক ছন্দ-প্রতিভার সোনার কাঠির স্পর্শে নবতর ও বিচিত্র রূপ ধারণ না করেছে। অন্য বয়স থেকে বাংলা কাব্যের যে ছন্দশাস্ত্র গড়ে তোলার বাসনা পোষণ করছি, সে তো এই রবীন্দ্রনাথের ছন্দ অবলম্বন করেই। নয় বছর আগে ‘প্রবাসী’তে ( ১৩২৯, পৌষ —চৈত্র; ১৩৩০, বৈশাখ ) বাংলা ছন্দ সম্বন্ধে ধারাবাহিক প্রবন্ধ লিখেছিলুম ;

তার জগ্গে রবীন্দ্রনাথের কাছে পরোক্ষে ও সাক্ষাতে যে স্নেহ প্রশংসা ও উৎসাহ লাভ করেছিলুম তাকেই আমার সাধনার শ্রেষ্ঠতম পুরস্কার বলে গ্রহণ করেছি। আজ সেই রবীন্দ্রনাথেরই ছন্দ রচনার ‘ফাঁকি’ ও ‘চাতুরী’ আবিষ্কার করেছি— তাঁরই মনে এই ভ্রান্ত ধারণার উপলব্ধি হয়েছে, এই অনিচ্ছাকৃত ত্রুটিই আমাকে এমন নিরতিশয় ভাবে লজ্জিত করেছে।

• আমার কথা আমি বুঝিয়ে বলতে পারি নি, এই অক্ষমতার জগ্গে আজ তাঁর কাছে যে তিরস্কার লাভ করলুম তা সম্বোধে তাঁর ছন্দ-প্রতিভার প্রতি আমার বিশ্বয়মুগ্ধ শ্রদ্ধা অক্ষুণ্ণই রয়েছে। যে কারণে একান্তভাবে তিরস্কৃত হয়েও একলব্যের ঐকান্তিক নিষ্ঠা ব্যাহত হয় নি, সেই কারণেই তাঁর প্রতি আমার নিষ্ঠা রেখামাত্রও বিচলিত হয় নি।

এত জোরের সঙ্গে কথা বলছি এই জগ্গে যে, আমার দৃঢ় বিশ্বাস আছে— আমি রবীন্দ্রনাথের ছন্দের (তথা বাংলা ছন্দের) তত্ত্বটি ভুল বুঝি নি। বাজারে রবীন্দ্রনাথের যে কয়খানি কাব্য প্রচলিত আছে, অন্ততঃ ছন্দের তরফ থেকে সে কয়খানি আমি অধিগত করেছি তো বটেই; রবীন্দ্রনাথের উদীয়মান ছন্দ-প্রতিভার অভিব্যক্তির ধারাটি আবিষ্কারের উদ্দেশ্যে কবির বাল্যরচনা ‘বনফুল’, ‘কবি-কাহিনী’ প্রভৃতি দুস্তাপ্য গ্রন্থগুলির ছন্দবিচারও আমাকে করতে হয়েছে। নদীর উৎপত্তিস্থানের ন্যায় রবীন্দ্রনাথের ছন্দপ্রবাহিণীর আদি ধারাগুলিও আধুনিকদের পক্ষে দুরধিগম্য। কিন্তু তাঁর ছন্দের ক্রমবিকাশের ইতিহাসটি আবিষ্কারের চেষ্টায় ওই দুর্গম স্থানেও বিচরণ করতে হয়েছে। কাদম্ব অদূর ভবিষ্যতে রবীন্দ্রনাথের ছন্দের ইতিহাস ও তত্ত্ব সম্বন্ধে একখানি বই প্রকাশ করবার অভিপ্রায় পোষণ করছি। এই উপলক্ষেই ধনিতত্ত্ব ও ছন্দের উপর তাঁর যা-কিছু রচনা আছে সে-সমস্তও অত্যন্ত যত্নের সঙ্গে আমাকে বুঝতে হয়েছে। তাই বলছি তাঁর ছন্দের তত্ত্ব বুঝতে পারি নি। এ কথা আমার মোটেই মনে হয় না। আমার এ ধারণা ভ্রান্ত কি না, তার বিচার আমার পূর্বপ্রকাশিত ছন্দের প্রবন্ধগুলি, সত্ত্বপ্রকাশিত দুটি রচনা (বিচিহ্না—পৌষ; ‘বাংলা ছন্দে রবীন্দ্রনাথের দান’—জয়ন্তী-উৎসর্গ) এবং অচির-প্রকাশিতব্য কয়েকটি রচনা থেকে রবীন্দ্রনাথ নিজেই করবেন।

রবীন্দ্রনাথের বর্তমান আলোচ্য প্রবন্ধটিও আমার কাছে একটুও দুর্বোধ্য হয় নি। বার বার পড়ে মনে হল তিনি যা বলতে চান তার সমস্তই আমি স্পষ্ট

বুঝতে পেরেছি। কারণ তাঁর পূর্বপ্রকাশিত ছন্দ ও শব্দতত্ত্বের প্রবন্ধ থেকে এবং তাঁর সঙ্গে সাক্ষাৎ আলোচনায় বাংলা ছন্দ সম্বন্ধে তাঁর যে মতবাদ আমার জানা আছে, তার সঙ্গে উক্ত প্রবন্ধের মতামতের কিছুমাত্র বিরোধ নেই।

কিন্তু তথাপি, তাঁর এই প্রবন্ধের মন্তব্যগুলি পুনঃ পুনঃ আলোচনা করা সম্বন্ধেও আমাকে এ কথা স্বীকার করতেই হবে যে অগ্রহায়ণ মাসের ‘বিচিত্রা’য় আমি যে-সমস্ত কথা বলতে চেয়েছি অথচ সম্ভবতঃ বোঝাতে পারি নি সে সম্বন্ধে আমার মতামত বিন্দুমাত্রও পরিবর্তন করার আবশ্যকতা এখনও বোধ করি নি। কিন্তু আমার কথা আমি তাঁকে বোঝাতে পারি নি সেই অক্ষমতার জন্তই পরম দুঃখের সঙ্গে আমাকে এই দ্বিতীয় প্রবন্ধের অবতারণা করতে হল। কারণ, আমার কথা যদি আমি বুঝিয়ে বলতে পারি তবে তিনি বিনা আপত্তিতে সানন্দে আমার কথা স্বীকার করবেন, এ বিশ্বাস আমার আছে। আমার কথা তাঁকে বোঝানো চাই-ই। কেননা, অন্তান্ত বিদ্বজ্জনের কথা ছেড়ে দিয়ে যতক্ষণ পর্যন্ত রবীন্দ্রনাথ পরিতোষ লাভ না করবেন ততক্ষণ পর্যন্ত আমার এই প্রয়োগ-বিজ্ঞানকে সাধু বলে মনে করব না। আমি জানি, আমার বক্তব্য বিষয়টিকে যদি তিনি সত্য বলে গ্রহণ করেন তাহলে সে সত্য সম্বন্ধে কারও মনে সন্দেহের অবকাশও থাকবে না। তা ছাড়া এতদিন তাঁর কাছ থেকে ছন্দের যে অজ্ঞপ্ত দান গ্রহণ করেছি, যদি আমি তাঁর সে-সব ছন্দের ভিতরকার আসল তত্ত্বগুলিকে আবিষ্কার করতে পেরে থাকি তবে তাই হবে তাঁর প্রতি আমার শ্রদ্ধাঞ্জলির প্রতিদান। আশা করি, তিনি প্রসন্নচিত্তে আমার সেই শ্রদ্ধাঞ্জলি গ্রহণ করবেন।

অগ্রহায়ণ মাসের প্রবন্ধটিতে সমস্ত বাংলা ছন্দ সম্বন্ধে নয়, কেবলমাত্র অক্ষরবৃত্ত ছন্দের স্বার্থ প্রকৃতি সম্বন্ধে কয়েকটি মাত্র কথার আলোচনা করেছিলুম। আমার বক্তব্য বিষয়ের সত্যতা সম্বন্ধে আমার বিশ্বাস খুব দৃঢ় বলেই কয়েকটি বিষয়ের উপর ইচ্ছে করেই খুব জোর দিয়েছিলুম। মনে ধারণা ছিল তাহলেই ও-বিষয়ে কবিদের বিশেষতঃ রবীন্দ্রনাথের দৃষ্টি আকৃষ্ট হবে। আর তার ফলেই আলোচনার সূত্রপাত হবে ও সে কথাগুলির স্বার্থ মূল্য নিরূপিত হবে; আর আমি যদি সত্যই কোথাও ভুল করে থাকি তা সংশোধন করে নেবার সুযোগও আমি পাব। কিন্তু দুঃখের বিষয়, ফল হয়েছে তার ঠিক উলটো। কারণ, আমার সেই জোর-দিয়ে-বলা কথাগুলোকে রবীন্দ্রনাথ খোঁচা বা ভুৎসনা বলে ধরে নিয়েছেন; অথচ আমার আসল বক্তব্যটিই রয়ে গেল অনালোচিত।

ওই প্রবন্ধটিতে বিশেষ করে রবীন্দ্রনাথের কাছেই আমার একটি নালিশ ছিল, সে কথা সত্য। কিন্তু সে নালিশ তাঁর বিরুদ্ধে কিংবা আধুনিক বাঙালি কবিদের বিরুদ্ধে নয়; সে নালিশটি অক্ষরবৃত্ত ছন্দের কয়েকটি বিশেষ ব্যবহারের বিরুদ্ধে। কিন্তু দেখা যাচ্ছে, নালিশের বিষয়টি আমি ভাল করে বোঝাতে পারি নি। ভাল বোঝা যে যায় নি, এখন মনে হচ্ছে তার কিছু কারণও আছে। প্রথমতঃ নূর বছর আগে ‘প্রবাসী’তে ছন্দ সম্বন্ধে যে-সমস্ত বিষয়ের আলোচনা করেছিলুম সেগুলি পাঠকের জানা আছে ধরে নিয়েই নতুন আলোচনাটির উত্থাপন করেছিলুম। নতুবা পুরাতন কথার পুনরুত্থাপন করতে গেলে প্রবন্ধ অত্যন্ত বড় হয়ে পড়ার ভয় ছিল। দ্বিতীয় কারণটি হচ্ছে এই। বাংলা ছন্দ সম্বন্ধে একখানি বই লেখায় হাত দিয়েছি। ওই প্রবন্ধটি তারই একটি অধ্যায়, কিন্তু প্রথম অধ্যায় নয়। সবগুলি প্রবন্ধ মাসিক পত্রিকায় প্রকাশ করার ইচ্ছে ছিল না। তাই বেছে এমন একটি অধ্যায় চাপতে দিয়েছিলুম যাতে তর্ক বা আলোচনা ওঠার সম্ভাবনা ছিল। উদ্দেশ্য ছিল, আলোচনায় যদি আরও কোনো তত্ত্বের সম্ভাবনা পাওয়া যায় তবে তা আমার পুস্তকের অন্তর্ভুক্ত করে নিতে পারব। কিন্তু মাঝখান থেকে একটি অধ্যায় প্রকাশের ফল এই হয়েছে, আমি যে নির্দিষ্ট অর্থে সংজ্ঞা বা পরিভাষার ব্যবহার করেছি পাঠকের নিকট সেই নির্দিষ্ট অর্থটি অজ্ঞাত থাকায় মূল বিষয় নিয়েই বিভ্রাট ঘটেছে।

কিন্তু পরিভাষার কথা বলার পূর্বে আর-একটি মৌলিক বিষয়ে কিছু বলা প্রয়োজন। প্রথমে হয় সৃষ্টি, বিজ্ঞান আসে তার পরে; ঠিক তেমনি প্রথমে ভাষা, পরে ব্যাকরণ; আগে কাব্য, পরে ছন্দ-শাস্ত্র। এমনটি হওয়াই স্বাভাবিক, এ কথা রবীন্দ্রনাথ নিজেই বলেছেন। রবীন্দ্রনাথ বাংলা সাহিত্যকে এত বিচিত্র ও অজস্র ছন্দ দান করেছেন যে তার ফলেই এখন একটা ছন্দ-শাস্ত্র গড়ে তোলার প্রয়োজন বোধ করছি, এটাও তাঁর পক্ষে গৌরবেরই কথা। যা হক, বিজ্ঞানের কাজ হচ্ছে সৃষ্টির নিয়ম আবিষ্কার করা, যে নিয়ম মেনে চলে নিত্যনূতন সৃষ্টির কার্যে অগ্রসর হওয়া যায় সে নিয়ম কখনও সৃষ্টির পথ-রোধ করে দাঁড়ায় না। ভাষাসৃষ্টি হয় স্বভাবের প্রবর্তনায়, ব্যাকরণের কাজ হচ্ছে তার অন্তরে যে-সমস্ত রীতি সক্রিয় আছে তাকে প্রকাশিত করা, পীড়িত করা নয়। কবি আপনার সহজ আনন্দবোধের দ্বারা চালিত হয়েই ছন্দ রচনা করেন; ছন্দ-শাস্ত্রের কাজ হচ্ছে কবি স্বভাবতঃই যে-সব নিয়ম মেনে চলেন সেগুলিকে আবিষ্কৃত

করে হৃৎকল রূপে তাদের সাজিয়ে দেওয়া। কবির ঐতিহ্যসবোধের প্রেরণাকে নিরন্তর অবদমন করাই কখনও ছন্দ-শাস্ত্রের অভিপ্রায় নয়। কবি আনন্দ-পিপাসু অন্তরের চিয়াভ্যন্ত প্রেরণাতেই ছন্দ রচনা করেন, এ কথায় কেউ কখনও সন্দেহ করে নি। কিন্তু কবিদের সেই স্বচ্ছন্দ-রচিত ছন্দের মধ্যে কোনো নিয়ম নেই, এ কথাও কেউ বিশ্বাস করবে না। যা ইচ্ছে তাই লিখলেই ছন্দ হয় না; ঐতিহ্যসবোধের ষে-সমস্ত নিয়ম আছে ছন্দ রচনা করতে গেলে, জ্ঞাতসারেই হক অজ্ঞাতসারেই হক, স্বাভাবিক আনন্দের প্রেরণাতেই সেগুলিকে মেনে চলতে হয়। কোনো একটি বিশেষ নিয়মের সার্থকতা সম্বন্ধে অনেক তর্ক চলতে পারে; কিন্তু সমস্ত ছন্দের অন্তরেই একটা-না-একটা নিয়ম যে থাকবেই, এ বিষয়ে একেবারেই তর্ক চলতে পারে না। এ কথা রবীন্দ্রনাথই সবচেয়ে বেশি করে জানেন। অথচ তিনি নিয়মমাত্রেরই বিরুদ্ধে এতটা বিমুখ কেন হলেন তা বুঝতে পারলুম না। এক জায়গায় তিনি বলেছেন, ‘যদি লেখা যেত—

সখাসনে মহোৎসবে বৎসর যায়

তাহলে নিয়ম বাঁচত—’; কিন্তু ছন্দ বাঁচত না। কোনো রচনায় ছন্দের নিয়ম ঠিক আছে, অথচ ছন্দ ঠিক নেই—এরকম উক্তির অর্থ বুঝতে গেলে সত্যই ধাঁধা লাগে। উদ্ভূত লাইনটিতে যদি ছন্দের নিয়ম বেঁচে থাকে তবে ছন্দও ঠিক আছে আর যদি ছন্দ ঠিক না থাকে তবে নিয়মও বাঁচে নি। এখানে যে ছন্দ ঠিক নেই এ বিষয়ে আমি কবির সঙ্গে একমত; কিন্তু নিয়ম বেঁচেছে, এ কথা যে তিনি কেন বললেন তা আমি বুঝতে পারি নি। অন্ততঃ এমন কোনো নিয়মের কথা আমি জানিনি, এ কথা আমি অসংকোচে বলতে পারি।

আরও আশ্চর্যের বিষয় এই যে, যে প্রবন্ধে তিনি নিয়মের বিরুদ্ধে এত বড় অভিযোগ এনেছেন, সে প্রবন্ধেই তিনি বাংলা ধ্বনিতত্ত্ব তথা ছন্দের দু-একটি অতি প্রয়োজনীয় নিয়মের কথাই বিশদভাবে আলোচনা করেছেন। প্রথমতঃ এক স্থানে তিনি বলেছেন, ‘বাংলায় স্বরবর্ণ যদিও সংস্কৃত বানানের হ্রস্বদীর্ঘতা মানে না তবু এ সম্বন্ধে তার নিজের একটি স্বকীয় নিয়ম আছে। সে হচ্ছে বাংলা হ্রস্ব শব্দের পূর্ববর্তী স্বর দীর্ঘ হয়।’ দ্বিতীয়তঃ অগ্রতঃ আছে, ‘বাংলা উচ্চারণে স্বরের ধ্বনিকে টান দিয়ে অতি সহজেই বাড়ানো কমানো যায়’; অর্থাৎ ‘বাংলা ভাষার স্বতাবের মধ্যেই বর্ণে প্রস্রয় আছে’। কবির এই উক্তিটি কি বাংলা ধ্বনি তথা ছন্দ-তত্ত্বের একটি নিয়ম নয়? যথাস্থানে দেখাব যে, প্রধানতঃ এ দুটি নিয়মের

উপরই আমি আমার সমস্ত আলোচনাটিকে দাঁড় করিয়েছিলুম। তৃতীয়তঃ অন্তত আছে, 'চলতি ভাষার কবিতা চলতি ভাষার নিয়মে এখন খুবই চলেছে'। তাহলে দেখা গেল, ছন্দের নিয়ম থাকবেই এ কথা তিনিও স্বীকার করেন।

তাঁর অভিযোগের আসল কথা বোধ করি এই যে, কবিরা নিজেদের প্রকৃতিগত আনন্দের প্রেরণায়ই ছন্দ রচনা করে থাকেন, প্রতিপদেই নিয়মকে সারথি করে অক্ষর বা মাত্রা গুনে গুনে রচনা করেন না। এ কথা আমিও কখনও অস্বীকার করি নি। তবে এ কথাও মনে রাখা উচিত যে, আর্ট যদিও অন্তরের স্বতঃস্ফূর্ত আনন্দ-প্রেরণার সৃষ্টি তথাপি অন্ততঃ আধুনিক কালের আর্টিস্টরা আর্টের ভিতরকার বিজ্ঞান সম্বন্ধেও সচেতন থাকেন তা নির্ভয়ে বলা যায়। ওস্তাদ গায়ক যে শুধু ভাল গাইতে পারেন তা নয়; সংগীতের বৈজ্ঞানিক তত্ত্বগুলিও তিনি জানেন। তেমনি কবিরাও যখন ছন্দ রচনা করেন তখন কি ছন্দ রচনা করছেন সে বিষয়েও তাঁরা সচেতন থাকেন, এ কথা অস্বীকার করা যায় না। বিশেষতঃ রবীন্দ্রনাথ যে ছন্দ রচনার সময় এ বিষয়ে খুবই সচেতন থাকেন সে বিষয়ে তো কোনো সন্দেহই নেই। স্ব-রচিত ছন্দ সম্বন্ধে যদি সচেতন না থাকতেন তবে তিনি এমন নিখুঁতভাবে নিতানূতন ছন্দ রচনা করতে পারতেন না। এ বিষয়ে এমন সচেতন বলেই তো তিনি আজ সমগ্র দেশে ছন্দ-দ্রষ্টা ঋষিরূপে পূজিত ও অভিনন্দিত হচ্ছেন। আমার অগ্রহায়ণের প্রবন্ধে আমি স্থানবিশেষে কবিদের এই সচেতনতার কথাই বলেছি। কবিরা আয়াস স্বীকার করে বা ষড়্‌ষষ্ঠ করে কিংবা প্রতিপদেই সচেতনভাবে অক্ষর গুনে গুনে রচনায় অগ্রসর হন, এমন হান্তকর অবিদ্বান কথা বলা কখনও আমার অভিপ্রায় ছিল না, এ কথা বলাই বাহুল্য।

সবচেয়ে বিশ্বস্তের বিষয় এই যে, আমার প্রবন্ধের প্রতিবাদ করতে গিয়ে রবীন্দ্রনাথ বাংলা ছন্দ সম্বন্ধে যে-কয়েকটি কথা বলেছেন তার প্রায় সমস্ত কথাই আমার অন্তর্কূল; তাঁর অধিকাংশ কথার মধ্যেই আমি আমার মতেরই ভাল রকম সমর্থন পেয়েছি। আর বাকি কথাগুলিও আমার বক্তব্যের বিরুদ্ধ নয়। এমনটি হতে পেরেছে, তার কারণ আমার নালিশের বিষয়বস্তুটিই তাঁর কাছে স্পষ্ট ছিল না। কাজেই যে-সব বিষয়ে আমার কোনো নালিশই নেই এবং যে-সব কথা আমি প্রতিবাদের আশঙ্কামাত্র না করে বলে গেছি, তাঁর এই প্রতিবাদের মধ্যে সে-সব কথার চমৎকার সমর্থন পেয়ে আমি স্তব্ধ হয়েছি। তাঁর এই

প্রতিবাদটি আমার পক্ষে শাপে বর হয়েছে। অধিকন্তু আমারই কথা সমর্থিত হয় এমন কয়েকটি নব-রচিত দৃষ্টান্ত পেয়ে আমার হৃবিধাই হয়ে গেল। যথাস্থানে সে কথা বলব। কিন্তু দুঃখের বিষয়, আমার নালিশের উপর কোনো রায় পাওয়া গেল না।

উপমা বা তুলনা কখনও অকাট্য যুক্তি বলে গ্রাহ্য হয় নি। উপমা বা তুলনার দ্বারা কোনো সিদ্ধান্তের চমৎকার ব্যাখ্যা হতে পারে, কিন্তু কোনো কিছুই প্রমাণিত হয় না। যদি তা-ই হত, তবে উল্টো উপমা দেখিয়ে সব কথাকেই অপ্রমাণিত করা যেত। কিন্তু তা সত্ত্বেও রবীন্দ্রনাথের উপমার দ্বারা আমার বক্তব্য খণ্ডিত না হয়ে অতি আশ্চর্য রকমে সমর্থিত হয়েছে। ‘বাংলা উচ্চারণে স্বরের প্লনিকে টান দিয়ে বাড়ানো কমানো যায়’ অর্থাৎ ‘বাংলা ভাষার স্বভাবের মধ্যেই যথেষ্ট প্রস্রয় আছে’—এ নিয়মটির সমর্থক উপমা হচ্ছে গেঞ্জিআমা; কেননা এ জিনিসটা মধুপুরের স্বাস্থ্যকর হাওয়ায় দেহের সঙ্গে সঙ্গে একটু বাড়তেও পারে আবার শহরে এলে একটু কমতেও পারে। কার্যতঃ এ কথারই দ্বিতীয় উপমা হচ্ছে, চিতল মাছ ধরার বেলায় ডাঙায় বসে ছিপ কেলা আর চিড়ি মাছ ধরার বেলায় কাদায় নামা। একই জিনিসের দুইরকম বিপরীত ব্যবহারের তৃতীয় উপমা হচ্ছে বধূর চুল; কারণ ওই একই চুল পিঠে ছড়িয়ে রোদ পোহানো যায় আর খোঁপা করে বেঁধে নিমন্ত্রণেও যাওয়া যায়। আশ্চর্য এই যে, ‘আমি ঠিক এই কথাই আমার প্রবন্ধে একাধিকবার বলেছি, অবশ্য অল্প ভাষায়। যথাস্থানে তা দেখাব।

বস্তুতঃ কয়েকটি পারিভাষিক শব্দের অর্থ ছাড়া আমার মূল বক্তব্যের সঙ্গে রবীন্দ্রনাথের মতের কিছুমাত্র বিরোধ আছে বলে মনে হয় না। কিন্তু পারিভাষিক শব্দের অর্থ দুজনের মনে দ্রুতকম থাকায় আপাততঃ তিনি আমার উক্তিগুলিকে তাঁর মতের বিরোধী বলেই মনে করেছেন। অনেক সময়ই দেখা যায়, দুই পক্ষের মনে একই পারিভাষিক শব্দের দ্রুতকম মানে থাকায় উভয় পক্ষের মধ্যে তুমুল তর্ক বেধে যায়। কিন্তু যখন পরিভাষার মধ্যে অর্থসংগতি ঘটিয়ে দেওয়া যায় তখন দেখা যায় উভয়েরই বক্তব্য বিষয় ঠিক একই। অথচ পরিভাষার অর্থ-বৈষম্যের জন্তই বিরোধ ঘটেছিল। এ ক্ষেত্রেও তা-ই হয়েছে এবং তাই ফলে আমার মূল অভিযোগটিই চাঁপা পড়ে গেছে।

পূর্বেই বলেছি, আমার নালিশ রবীন্দ্রনাথ বা অল্প কোনো কবির বিরুদ্ধে



নয় ; একটিমাত্র বিশেষ ছন্দের বিরুদ্ধে । সে ছন্দটি হচ্ছে অক্ষরবৃত্ত ; মাত্রাবৃত্ত বা স্বরবৃত্ত ছন্দের বিরুদ্ধে আমার লেশমাত্রও অভিযোগ নেই । অথচ আমার কথার নিরসন করতে গিয়ে রবীন্দ্রনাথ শুধু মাত্রাবৃত্ত ও স্বরবৃত্তের দৃষ্টান্তই রচনা করেছেন । অক্ষরবৃত্তের যে দুটি দৃষ্টান্ত রচনা করেছেন তাও অল্প প্রসঙ্গে । কাজেই আমার কথার উত্তর আমি পাই নি । মাত্রাবৃত্ত ও স্বরবৃত্ত ছন্দে রবীন্দ্রনাথ যত কবিতা রচনা করেছেন তার মধ্যে আজ পর্যন্ত আমি কোথাও এতটুকু ত্রুটি পাই নি । তাঁর রচিত অক্ষরবৃত্ত ছন্দে কোথাও ত্রুটি পেয়েছি, এ কথাও আমি বলতে চাইনে । আমার বক্তব্য হচ্ছে এই যে, অক্ষরবৃত্ত ছন্দ যে উপাদানে রচিত হয় সে উপাদানের মধ্যেই অসম্পূর্ণতা রয়েছে এবং সে অসম্পূর্ণতা আজকালকার নয় ; বাংলা কাব্যসাহিত্যে যত প্রাচীন এই অসম্পূর্ণতাও বোধ হয় তত প্রাচীন । সুতরাং এর জন্ত আমি আধুনিক বা প্রাচীন কোনো কবিকেই দায়ী করছি না । যে উপাদান নিয়ে আর্টিস্ট আর্ট রচনা করেন সে উপাদানেই যদি ত্রুটি থাকে তবে তার জন্ত আর্টিস্টকে দায়ী করা যায় না । আধুনিক মাত্রাবৃত্ত ও স্বরবৃত্ত ছন্দ সম্পূর্ণরূপে রবীন্দ্রনাথেরই দান এবং এ ছন্দ-দুটিকে সম্পূর্ণ নিখুঁত রূপেই তিনি দান করেছেন । কিন্তু অক্ষরবৃত্ত ছন্দ তিনি পূর্ববর্তীদের কাছেই পেয়েছেন । সুতরাং এ ছন্দের মৌলিক ত্রুটির জন্তে তিনি নিশ্চয়ই অপরাধী নন । সে অভিযোগও আমি করছিনে । কিন্তু আমি একমাত্র অক্ষরবৃত্ত ছন্দের মধ্যে যাকে ত্রুটি বা অসম্পূর্ণতা বলেছি, রবীন্দ্রনাথ তাকেই সাধারণ ভাবে সমস্ত বাংলা ছন্দ ও বাঙালি কবিদের বিরুদ্ধে আমার অভিযোগ বলে ধরে নিয়েছেন, পারিভাষিক শব্দের অবিকল্পিত অর্থসংগতির অভাব । আর তাতেই এ গোলযোগের সৃষ্টি হয়েছে । অক্ষরবৃত্ত ছন্দ কাক বলছি এবং তার বিরুদ্ধে আমার নালিশ কি সে দিকে লক্ষ থাকলে এত কথা উঠতে পারত না ।

কিন্তু তর্ক হতে পারত আমি যাকে অক্ষরবৃত্তের ত্রুটি বা অসম্পূর্ণতা বলেছি সেটা আসলেই ত্রুটি বা অসম্পূর্ণতা কি না । এমন তর্ক হওয়া অসম্ভব তো নয়ই, বরং খুবই সমীচীন । আর আমিও ও-রকম তর্ক বাতে হয় তারই ইচ্ছে করেছিলুম । কিন্তু সে তর্ক উঠল না, উঠল যত তর্ক । তাই তর্কটাকে পুনরাবস্থাপিত করতে চাই । কিন্তু এখানেই বলে রাখা দরকার যে, আমার সমস্ত কথাকে বিশদভর করে সেই প্রসঙ্গেরই বিচার করতে গেলে একটিমাত্র প্রবেশ

স্থানাভাব ঘটবে। আমি এ স্থলে মাত্র আমার মূল প্রতিপাদ্য বিষয়টির উত্থাপন করব এবং তৎপরে পারিভাষিক শব্দগুলিকে বিশদভর্য করিতে চেষ্টা করব। এ স্থলে অনেক কথাই পুনরুক্তি করতে হবে। কিন্তু সব কথার পুনরুক্তি করা সম্ভব নয়। সুতরাং পাঠক যদি অনুগ্রহ করে এ প্রবন্ধটির সঙ্গে অগ্রহায়ণের প্রবন্ধটি মিলিয়ে পড়েন তবে আশা করি আমার বক্তব্য আর অস্পষ্ট থাকবে না।

আমি বাংলা ছন্দকে মাত্রাবৃত্ত, স্বরবৃত্ত ও অক্ষরবৃত্ত এই তিনটি প্রধান শ্রেণীতে বিভক্ত করেছি। কেন করেছি এবং কোন্ তত্ত্বের সাহায্যে করেছি, এ কথাটি যদি স্পষ্টরূপে বোঝাতে পারি তাহলেই আমার বিশ্বাস এই মতবিরোধের মূলটি নষ্ট হয়ে যাবে। কিন্তু বাংলা ছন্দের এই ত্রিধারার পরিচয় দেবার পূর্বে আমার বিরুদ্ধে রবীন্দ্রনাথ যে-সব অভিযোগ এনেছেন সেগুলো ভাল করে বোঝাবার চেষ্টা করছি।

১

রবীন্দ্রনাথ বলেছেন, ‘বাংলার স্বরবর্ণ, যদিও সংস্কৃত বানানের ভ্রম-দীর্ঘতা মানে না তবু এ সম্বন্ধে তার নিজের একটি স্বকীয় নিয়ম আছে। সে হচ্ছে বাংলায় হসন্ত শব্দের পূর্ববর্তী স্বর দীর্ঘ হয়।...বাংলায় ধ্বনির এই নিয়ম স্বাভাবিক বলেই...বাংলা ছন্দে প্রাক-হসন্ত স্বরকে দুই মাত্রার পদবি দেওয়া হয়েছে। আজ পর্যন্ত কোনো বাঙালির কানে ঠেকে নি—এই প্রথম দেখা গেল নিয়মের ধাঁধায় পড়ে বাঙালি পাঠক কানকে অবিশ্বাস করলেন।’ হসন্ত বর্ণের পূর্ববর্তী স্বর গুরু বা দ্বিমাত্রিক হয়, এ কথা আমিও স্বীকার করেছি; কাজেই এ বিষয়ে কোনো ধ্বনিতত্ত্ববিদের বিধান নেবার প্রয়োজন নেই। শুধু যে অগ্রহায়ণের প্রবন্ধেই আমি এ নিয়মের উল্লেখ করেছি তা নয়; কয়েক বছর পূর্বেই বাংলা ছন্দের এ নিয়মটির প্রতি আমার মন আকৃষ্ট হয়েছিল (প্রবাসী ১৩২৯ পৌষ, ৩০৪-৫ পৃষ্ঠা দ্রষ্টব্য)। আমার জন্মবার বহু পূর্বেই যে প্রাক-হসন্ত স্বরকে দুমাত্রা বলে ধরা হয়েছে, আমি তা অবগত আছি। কিন্তু তারও বহু পূর্বে প্রাচীন ছন্দোবিৎরা এ তত্ত্বটি অবগত ছিলেন (পিকল ছন্দঃসূত্রম্ ১৭৭ দ্রষ্টব্য), কেননা এ নিয়মটি শুধু বাংলার স্বকীয় নয়, সংস্কৃত উচ্চারণের পক্ষেও এ নিয়ম সত্য।

কিন্তু রবীন্দ্রনাথের কথিত এ নিয়মটিকে আমি একটু স্বতন্ত্রভাবে প্রকাশ করতে চাই। যেমন জল, চাঁদ। রবীন্দ্রনাথ বলেন, এ দুটি শব্দের অ এবং

আ-কে ‘আমরা দীর্ঘ করে টেনে পরবর্তী হসন্তের ক্ষতি পূরণ করে থাকি’। তাই ছন্দে জল এবং চাঁদ কথা দুটি দ্বিমাত্রিক বলেই গণ্য হয়। আমি এ কথাটাকেই অগ্রভাবে বলতে চাই। আমার পরিভাষায় জল এবং চাঁদ শব্দের হসন্ত ল্ এবং হসন্ত দ্ এক-একটি আশ্রিত ধ্বনি এবং জ এবং চাঁ এক-একটি আশ্রিতা ধ্বনি। আশ্রিত-এবং আশ্রিতা ধ্বনির যোগে যে ধ্বনি উৎপন্ন হয় তাকে আমি যুগ্মধ্বনি বলেছি; যেমন জল এবং চাঁদ দুটি যুগ্মধ্বনি। আর যুগ্মধ্বনিকে আমি সর্বদাই দ্বিমাত্রিক বলে ধরেছি। সুতরাং আমার মতেও জল এবং চাঁদ শব্দে দুমাত্রাই আছে। কেন একই বিষয়কে স্বতন্ত্রভাবে প্রকাশ করতে চাই, সে সম্বন্ধে অগ্রজ আলোচনা করেছি। সুতরাং এখানে পুনরুক্তি নিশ্চয়োজন। ‘জল’ শব্দ ‘পাতা’ শব্দের চেয়ে মাত্রাকৌলীণ্যে কোনো অংশে কম, এমন সংশয় আমি কখনও করি নি, এখনও করিনে। কেননা, পাতা শব্দে দুটি অযুগ্মধ্বনি আছে; অতএব এ শব্দটি দ্বিমাত্রিক। আর জল শব্দে একটি যুগ্মধ্বনি, অতএব এ শব্দটিও দ্বিমাত্রিক। সুতরাং উভয় শব্দেরই মাত্রাকৌলীণ্য সমান। ‘জল পড়ে, পাতা নড়ে’ এ পংক্তিটির ধ্বনিনির্ণয় করব এ ভাবে।—

॥ । । । । । ॥

জল পড়ে, পাতা নড়ে

এ প্রসঙ্গেই রবীন্দ্রনাথ আরও বলেছেন, ‘উদয়-দিগন্তে ঐ শুভ্র শব্দ বাজে—এই লাইনটা নিয়ে আজ পর্যন্ত প্রবোধচক্র ছাড়া আর কোনো পাঠকের কিছুমাত্র খটকা লেগেছে বলে আমি জানিনে, কেননা তারা সবাই কান পেতে পড়েছে, নিয়ম পেতে নয়’। আমি অবশ্য এ লাইনটিকে কান পেতেও পড়েছি, নিয়ম পেতেও পড়েছি। আমি গোড়ায়ই বলে রাখছি কান পেতে ও-লাইনটিতে কিছুমাত্র ত্রুটি পাই নি এবং নিয়ম পেতেও আমার কিছুমাত্র খটকা লাগে নি। আর এইটেই স্বাভাবিক, কেননা ছন্দের আলোচনায় কানের ভাল-লাগার স্বীতি বার বার আবিস্কৃত ও নিয়ন্ত্রিত হয় তাকেই ছন্দের নিয়ম বলা হয়। কানের ভাল-লাগার সঙ্গে বার সামঞ্জস্য নেই, তাকে কখনই ছন্দের নিয়ম বলব না। কাজেই ছন্দের নিয়ম বজায় থাকলে কানেও ভাল লাগবে এবং নিয়ম বজায় না থাকলে কানেও ভাল লাগবে না। যাহোক, উক্ত লাইনটি সম্বন্ধে আমি আমার প্রবন্ধে যে আলোচনা করেছি সেটুকু বারবার পড়ে দেখলুম; কিন্তু ওই লাইনটি নিয়ে কোথাও আমার খটকা লেগেছে এমন কথা তো আমি

যুগ্মাকরেও কোথাও প্রকাশ করি নি। বরং অক্ষরবৃত্ত ছন্দের একটি নিখুঁত ও স্বন্দর নিদর্শন হিসেবেই আমি অগ্রহায়ণের প্রবন্ধে ওই লাইনটি উদ্ধৃত করেছি। কিন্তু রবীন্দ্রনাথের মনে এ বিষয়ে সম্পূর্ণ বিপরীত ধারণা কেন হল আমি এখনও তা বুঝতে পারি নি। এ লাইনটি সম্বন্ধে আমি যা বলেছি এখানে সে কথাই আবার সংক্ষেপে বলছি।

+     |     + |     |

উদয়-দিগন্তে ঐ শুভ্র শঙ্খ বাজে

এ লাইনটিতে যুগ্মধ্বনি আছে পাঁচটি যথা—দয়্ গন্, ঐ ( = অই্ ), শুভ্, শঙ্। তার মধ্যে যোগ-চিহ্নিত দুটি যুগ্মধ্বনি ( দয়্ এবং ঐ বা অই্ ) এখানে দুই unit-এর মর্বাদা পেয়েছে। কেননা ‘দয়্’ ধ্বনিটি শব্দের অন্তে অবস্থিত আর ‘ঐ’ কথাটি একটি একস্বর ( monosyllabic ) যুগ্মধ্বনি। কিন্তু দণ্ড-চিহ্নিত বাকি তিনটি যুগ্মধ্বনি এক unit-এর বেশি মর্বাদা পায় নি; কেননা এগুলি শব্দের অন্তে অবস্থিত নয়। এইটেই হচ্ছে অক্ষরবৃত্ত ছন্দের আসল নিয়ম, এ কথা বলাই হচ্ছে আমার উদ্দেশ্য। আর উদ্ধৃত লাইনটিতে এ নিয়মটি সম্পূর্ণ অব্যাহত আছে এবং কাজেই এ লাইনটিকে আমি অক্ষরবৃত্ত ছন্দের নিখুঁত আদর্শ হিসেবেই ব্যবহার করেছি। সুতরাং এ লাইনটির ছন্দ-গত নির্দোষতা সম্বন্ধে আমার লেশমাত্রও সংশয় নেই।

২

রবীন্দ্রনাথ ‘ইচ্ছামতো’ কোথাও ‘ঐ’ লিখে আবার কোথাও ‘ওই’ লিখে একই উচ্চারণকে জায়গা বুঝে দুই বকরের মূল্য দিয়েছেন, এ কথা আমি কোথাও বলি নি। তিনি যথেষ্টভাবে কোথাও ‘ঐ’ আর কোথাও ‘ওই’ লেখেন, এ কথা বলা যোটেই আমার অভিপ্রায় নয়। আমার অভিপ্রায় ঠিক তার উলটো। আমি বলতে চাই, তাঁর ‘ঐ’ এবং ‘ওই’ শব্দ ব্যবহারের মধ্যে একটি সুনির্দিষ্ট রীতি আছে। সেটি হচ্ছে এই যে, মাত্রাবৃত্ত ও স্বরবৃত্ত ছন্দে তিনি ‘ঐ’ ব্যবহার করেন বটে, কিন্তু অক্ষরবৃত্ত ছন্দে তিনি সাধারণতঃ ‘ওই’ ব্যবহার করেন। তাঁর সমস্ত কবিতা আলোচনা করে তাঁর এই বিশেষ রীতিটি আমার মনকে বিশেষভাবে আকৃষ্ট করেছে। তাঁর রীতিটির একটিমাত্র ব্যতিক্রম আমার চোখে পড়েছিল। সেটি হচ্ছে এই—

উদয়-দিগন্তে ঐ শুভ্র শঙ্খ বাজে

এখানে চোদ্দ অক্ষর না থাকলেও 'ঐ' দ্বিমাত্রিক বলে ছন্দ ঠিকই আছে।  
এ রীতিটির আর-একটি ব্যতিক্রম ইতিমধ্যে দেখতে পেয়েছি। সেটি হচ্ছে এই—

ঐ নামে একদিন ধন্য হল দেশে দেশান্তরে

তব জন্মভূমি।

—বুদ্ধদেবের প্রতি, প্রবাসী, ১৩৩৮ অগ্রহায়ণ

এখানেও ছন্দ ঠিকই আছে; কারণ 'ঐ' শব্দ দ্বিমাত্রিক। কিন্তু এ দুটি ব্যতিক্রম মাত্র। তাঁর সাধারণ রীতি হচ্ছে অক্ষরবৃত্ত ছন্দে 'ওই' লেখা।  
যথা—

এই তৃণ, এই ধূলি—ওই তারা, ওই শশী-রবি

আমার বিবেচনায় অক্ষরবৃত্ত কিংবা অন্ত ষে-কোনো ছন্দে সর্বত্রই ঐ এবং ওই শব্দ যথেষ্টভাবেই ব্যবহার করা চলে, তাতে ছন্দের কোনো ক্ষতি হয় না। যেমন, 'উদ্‌য় দ্বিগন্তে ঐ' 'ঐ নামে একদিন' প্রভৃতি শব্দ স্থলে 'ঐ' না লিখে 'ওই' লিখলেও ক্ষতি হত না। আবার

এই তৃণ, এই ধূলি—ওই তারা ওই শশী-রবি

এখানে 'ওই' না লিখে 'ঐ' লিখলেও ছন্দ অব্যাহতই থাকত। আশা করি এ বিষয়ে মতবৈধ হবার কোনো সম্ভাবনা নেই। কেননা বাংলা ছন্দে ঐ এবং ওই সর্বত্রই সমান মর্যাদার ধ্বনি। 'ঐ' এক মাত্রা এবং 'ওই' দুই মাত্রা এ কথা কখনও সত্য নয়। যে ভাবেই লিখি না কেন, এ শব্দটি সর্বদাই দ্বিমাত্রিক; কারণ এটি একটি যুগ্মধ্বনি। কাজেই স্বরবৃত্ত ছন্দে ঐ বা ওই সর্বত্রই এক সিলেব্‌ল (মাত্রা নয়); অন্য সব ছন্দেই এটি দ্বিমাত্রিক।

৩

আকাশের ওই | আলোর কাঁপন

নয়নেতে এই | লাগে

'আজকের দিনে এমন কথা অতি অর্বাচীনকেও বলা অনাবশ্যক যে ঐ ত্রৈমাত্রিক ভূমিকার ছন্দকে'

ঐ যে তপনের | রশ্মির কম্পন

এই মস্তিষ্কেতে | লাগে

এ ভাবে 'রূপান্তরিত করা অপরাধ'।—এ কথা আমি কখনও অস্বীকার করিনে। আর হেমচন্দ্র যদিও 'স্বভঃই কানের ওজন রেখে'ই

হেথা ইন্ড্রালয়ে | নন্দন ভিতর  
 পতিসহ প্রীতি | হৃথে নিরস্তর  
 দানব-রমণী | করিছে ক্রীড়া ।  
 রতি ফুলমালা | হাতে দেয় তুলি,  
 পরিছে হরিষে | স্বযমাত্তে তুলি,  
 বদনমণ্ডলে | ভাসিছে ব্রীড়া ।

প্রভৃতি 'ত্ৰৈমাজিক ভূমিকা'র ছন্দ রচনা করেছিলেন, তথাপি এরূপ রচনায় তাঁর ছন্দ-গত 'অপরাধ' হয়েছিল, এ কথাও আমি বলেছি। আমি যাকে যগ্নাজিক বা যগ্নাত্তপর্বিক ছন্দ বলি রবীন্দ্রনাথ তাকেই 'ত্ৰৈমাজিক ভূমিকার ছন্দ' বলেছেন; অন্ততঃ তিনি এ ছন্দকেই 'অসম মাত্রার ছন্দ' নামে অভিহিত করেছেন। যগ্নাত্তপর্বিক ছন্দে (অর্থাৎ ত্ৰৈমাজিক ভূমিকার বা অসম মাত্রার ছন্দে) যুক্তবর্ণের দ্বারা নির্দিষ্ট যুক্তধ্বনিকে এক unit বলে গণ্য করলে অপরাধ হয়, এ কথা আমি বহু পূর্বেই বলেছি। আমার কয়েক বছর আগেকার একটা রচনা থেকে কয়েকটি কথা উদ্ধৃত করছি।—

“হিমাত্রি-পাষাণ কেঁদে গলে যাক্,

মুখ তুলে আজি চাহরে ।

—রবীন্দ্রনাথ

এ ছন্দে হেমচন্দ্র ও নবীনচন্দ্র অনেক বিখ্যাত কবিতা লিখে গেছেন। রবীন্দ্রনাথও প্রথমতঃ অক্ষরবৃন্তে এই অসমপদী তালের অনেক কবিতা রচনা করেছেন। কিন্তু অক্ষরবৃন্তে এ তাল ভাল শোনায় না, যেখানে যুক্তবর্ণ উপস্থিত হয় সেখানেই পদে পদে তালভঙ্গ হয়, ঐতিকটুতা দোষ হয়। এই তথ্যটি লক্ষ্য করেই রবীন্দ্রনাথ বাংলায় মাত্রাবৃন্তের প্রবর্তন করেছেন; 'মানসী'তে তিনি সর্বপ্রথম যুক্তবর্ণের পূর্বস্বরকে ষিমাত্রিক বলে ধরে এ নতুন ছন্দ ব্যবহার করতে শুরু করেন। এখন অসম তালের ছন্দ সর্বদাই মাত্রাবৃন্তে রচিত হয়ে থাকে; অক্ষরবৃন্তে অসমতাল সম্পূর্ণ অপ্রচলিত হয়ে গেছে। আর-একটা উদাহরণ দিচ্ছি, 'প্রভাতসংগীত' থেকে। পাঠক পড়লেই বুঝতে পারবেন এ রচনাটা মার্জিত ঐতি-কটির উপর কতখানি অত্যাচার করে।

বায়ুর হিল্লোলে ধরিবে পল্লব

বর ময় যুগ্ম তান,

চারিদিক হতে কিসের উল্লাসে

পাখিতে গাহিবে গান।

এখানে যুক্তবর্ণগুলো যেন গুরুভার প্রস্তুতখণ্ডের মতো স্বর-প্রবাহের গতি রোধ করে দাঁড়িয়ে আছে, আমাদের ছন্দচেতনাও যেন সে গুরুভারে নিশীড়িত হচ্ছে। স্বতরাং এ ভারটাকে যদি একটু লঘু করে দেওয়া যায় তবেই ছন্দের শ্রোত

•আবার অবাধ গতিতে বয়ে চলবে,—

বায়ুহিল্লোলে ধরে পল্লব

মর মর যুতু তান,

চারিদিক হতে কি যে উল্লাসে

পাখিরা গাহিছে গান।”

—প্রবাসী, ১৩৩০, চৈত্র, পৃ ৭৮৭

আট বছর পূর্বে আমি ওই কথাগুলি লিখেছিলুম। এখনও আমি ওই মত পরিবর্তন করি নি। যা হক আর-একটি দৃষ্টান্ত দিয়েই এ প্রসঙ্গ সমাপ্ত করব।—

‘প্রভু বুদ্ধ লাগি | আমি ভিক্ষা মাগি

ওগো পুরবাসী | কে রয়েছ জাগি,’—

অনাথ-পিণ্ডদ | কহিলা অম্বুদ

নিনাদে।

—শ্রেষ্ঠ ভিক্ষা, কথা, রবীন্দ্রনাথ

এ কবিতাটি রবীন্দ্রনাথ ‘মানসী’তে মাত্রাবৃত্ত ছন্দ প্রবর্তনের পরেই রচনা করেছিলেন। আমার বিশ্বাস এ দৃষ্টান্তটিও ‘ত্রেমাত্তিক ভূমিকা’ বা ‘অসমমাত্রার’ ছন্দেই রচিত, কিন্তু তথাপি হেমচন্দ্রের ‘হেথা ইন্দ্রালয়ে নন্দন ভিতর’ প্রভৃতি রচনার মতো এ স্থলেও যুগ্মধ্বনিকে এক unit বলেই গণ্য করা হয়েছে। তাতে কোনো ‘অপরাধ’ হয়েছে কি না সে বিচার কবিরাই করুন।

‘বৎসর, উৎসব প্রভৃতি খণ্ড ৭-ওয়াল। কথাগুলোকে আমরা ছন্দের মাপে বাড়াই কমাই,—এ রকম চাতুরী সম্ভব হয় যেহেতু খণ্ড ৭-কে কখনো আমরা চোখে দেখার সাক্ষ্যে এক অক্ষর ধরি আবার কখনো কানে শোনার দোহাই দিয়ে তাকে আধ অক্ষর বলে চালাই, প্রবন্ধলেখক এই অপবাদ দিয়েছেন।’ রবীন্দ্রনাথের এই উক্তি সম্বন্ধে আমার একমাত্র বক্তব্য এই যে আমি কোথাও এ

কথা বলি নি, আমার প্রবন্ধটিতে তন্ন তন্ন করে খুঁজেও এমন কথার আভাস-মাত্রও পেলুম না। সুতরাং এ উপলক্ষে রবীন্দ্রনাথ ‘বিচিত্রা’র প্রায় দেড় পৃষ্ঠা জুড়ে যে-সব কথা বলেছেন তা আমার প্রতি প্রযোজ্য নয়। আমি বরং তার উলটো কথাই বলেছি। যেমন, ‘ধ্বনির প্রতি কিছুমাত্র লক্ষ না রেখে সব সময়ই শুধু অক্ষর গোনা হয়, এ কথা বলা অগ্রায়্য হবে’ (বিচিত্রা, অগ্রহায়ণ, পৃ ৫৭২)। আর এ কথার দৃষ্টান্তস্বরূপ বৎসর, উৎসব প্রভৃতি শব্দের উল্লেখ করেছি; কেননা বৎসর প্রভৃতি শব্দে দেখতে চার অক্ষর হলেও অক্ষরবৃত্ত ছন্দের নিয়মে তিন ‘অক্ষর’ই ধরা হয়। মাত্রাবৃত্ত ছন্দে মাত্রাবৃত্তের নিয়মে বৎসর, উৎসব প্রভৃতিকে চার ‘মাত্রা’ ধরা হয় এবং স্বরবৃত্ত ছন্দে স্বরবৃত্তের নিয়মে এ শব্দগুলিকে দুই ‘স্বর’ ধরা হয়। আর এইটেই বাংলার তিন রকমের ছন্দের পক্ষে তিনটি স্বাভাবিক নিয়ম; সুতরাং বৎসর প্রভৃতি শব্দকে তিন প্রকার বিভিন্ন ছন্দের তিন রকম মাপকাঠিতে পরিমাপ করা অগ্রায়্য নয়, এ কথাই আমি বলেছি।

৫

রবীন্দ্রনাথ এক স্থলে ‘উদয়-দিক্‌প্রাস্ত তলে’ (পঁচিশে বৈশাখ, পূর্ববী) লিখে ‘দিক্‌প্রাস্ত’ কথাটিতে তিন অক্ষর ধরেছেন। আমি বলেছি ‘উদয়ের দিক্‌প্রাস্ততলে’ লিখে ‘দিক্‌প্রাস্ত’ কথাটিতে চার অক্ষর ধরলেও খারাপ শোনাতে না; কেননা রবীন্দ্রনাথ নিজেই অগ্রত্ব দিক্‌প্রাস্ত কথাটিতে চার অক্ষর ধরেছেন, যথা—‘দিক্‌প্রাস্তে নামে অন্ধকার’ (নববধু, মহুয়া) এবং ‘দিক্‌প্রাস্তে তারি ওই ক্ষীণ নম্রকলা’ (প্রত্যাগত, মহুয়া)। রবীন্দ্রনাথ এ বিষয়ে ‘শালিসির জন্তে কবিদের উপর বরাং’ দিয়েছেন। আমিও তাঁদের শালিসি মেনে নিতে প্রস্তুত আছি।

৬

‘তোমারি, যখনি শব্দগুলির ই-কারকে বাংলা বানানে অনেক সময় বিচ্ছিন্ন করে লেখা হয়, সেই সুযোগ অবলম্বন করে কোনো অলস কবি ওগুলোকে চার মাত্রার কোঠায় বসিয়ে ছন্দ ভরাট করেছেন কিনা জানিনি, যদি করে থাকেন বাঙালি পাঠক তাঁকে শিরোপা দেবে না।’ রবীন্দ্রনাথের এ কথার প্রসঙ্গে আমি বলতে পারি যে এমন ‘অলস-কবি’র কথা আমার জানা আছে এবং আমিও তাঁদের শিরোপা দিতে চাইনে। দৃষ্টান্ত দিচ্ছি—

(১) বীরের স্বর্গই বশ, বশই জীবন

—কৃতসংহার, ষষ্ঠ সর্গ, হেমচন্দ্র



(২) বীরের একই মাত্র সহায় রমণী

—ঐ, ষাদশ সর্গ

(৩) হা দেব, এ ভাগ্য মন স্বপ্নের(ও) অতীত।

—ঐ, ত্রয়োদশ সর্গ

খুঁজলে এরকম বহু দৃষ্টান্ত দেওয়া যায়। এখানে ‘যশই, একই’ শব্দে ই-কে স্বতন্ত্র অক্ষর গণনা করে প্রতি পংক্তিতে চোদ্দ অক্ষর বজায় রাখা হয়েছে (হেমচন্দ্র যশ শব্দের শ-কে অকারান্ত উচ্চারণ করতেন কি না জানিনে)। আবার ‘স্বপ্নেরও’ শব্দের ও-কে তিনি নিশ্চয়ই স্বতন্ত্র বলে মনে করতেন; তাই ওই পংক্তিতে পনেরো অক্ষর হয়ে যাবার ভয়ে ও-কে ব্র্যাকেটস্থ করেছেন।

সেই আর্ষাবর্ত এখন(ও) বিস্তৃত,

সেই বিদ্যাগিরি এখন(ও) উন্নত,

সেই ভাগীরথী এখন(ও) ধাবিত,

পুরাকালে তারা যেরূপ ছিল।

—ভারতসংগীত, কবিতাবলী, হেমচন্দ্র

এখানেও ওই একই কারণে ‘এখনও’ শব্দের ও-কে ব্র্যাকেটে রাখা হয়েছে। কিন্তু আধুনিক কবিরা এভাবে ব্র্যাকেট ব্যবহার করেন না। কেননা তাঁরা জানেন যে অক্ষরের চাক্ষুষ সংখ্যা ছন্দের পক্ষে অবাস্তব, ধ্বনিসাম্যই ছন্দের মূল কথা। আর ‘এখনও’ শব্দে চার অক্ষর দেখালেও তার ধ্বনিগত unit তিন, তার আসল রূপ হচ্ছে ‘এখনো’। সুতরাং ও-কে ব্র্যাকেটস্থ করার প্রয়োজন নেই। বোধ করি রবীন্দ্রনাথই সর্বপ্রথমে কবিদের এ বিষয়ে নিঃশঙ্ক করেছেন। তাই তিনি—

হে ধরণী, কেন প্রতিদিন

ভূপ্তিহীন

একই লিপি পড়ো ফিরে ফিরে ?

লিখতে অক্ষরসংখ্যার ভয়ে সংকুচিত হন নি; কেননা ‘একই’ শব্দে অক্ষর তিনটে হলেও তার ধ্বনির unit দুটির বেশি নেই। সেই জন্তে আমি রবীন্দ্রনাথকেই শিরোপা দেবার প্রস্তাব করেছি।

আমি লিখেছি “আজকাল কবিরা ‘হইতে, লইয়া, বাইবে’ প্রভৃতি সাধু শব্দের যুগ্মধ্বনিটাকে বর্জন করার অভিপ্রায়ে হতে, লয়ে, যাবে প্রভৃতি সংক্ষিপ্ত চলতি রূপের প্রতি পক্ষপাতিত্ব করে থাকেন”। আমার এ কথায় কবিদের ক্ষুব্ধ হবার কোনো কারণই নেই। কারণ আমি আজকালকার কবিদের ‘ভংসনা’ করার উদ্দেশ্যে ও-কথা তো লিখিই নি, বরং তাদের ধ্বনিবোধের তীক্ষ্ণতার প্রশংসা করার উদ্দেশ্যেই ও-কথা বলেছি। বোধ করি রবীন্দ্রনাথ আমার ব্যবহৃত ‘অভিপ্রায়’ কথাটিতেই অপ্রশংসার ধারণা করেছেন। আমি বিনীতভাবে এ স্থানে জানিয়ে রাখছি যে ‘অভিপ্রায়’ শব্দটিকে আমি সজ্ঞান সচেতন অভিপ্রায়, ‘ষড়্‌ষষ্ঠ’, ‘ফাঁকি চালাবার বা সংকট এড়াবার মতলব’ অর্থে ব্যবহার করি নি। তীক্ষ্ণ ছন্দবোধ-চালিত স্বতঃ-উদ্ভূত অভিপ্রায় অর্থেই আমি ও-শব্দটি ব্যবহার করেছি। প্রাচীন কবিদের রচনায়ও হব রব, যাব, নিতে, জুড়াব প্রভৃতি সংক্ষিপ্ত ক্রিয়াপদের দৃষ্টান্ত আছে, এদিকে রবীন্দ্রনাথ আমার দৃষ্টি আকৃষ্ট করেছেন; তাতে আমি বিশেষভাবে উপকৃত হয়েছি। কেননা তার মধ্যে আমি আমার মতের খুব সুন্দর সমর্থন পেলুম। রবীন্দ্রনাথ বলছেন যে আধুনিক এবং প্রাচীন সকল কবিরাই যে হইতে, লইয়া, বাইবে প্রভৃতি শব্দের সংক্ষিপ্ত রূপের ব্যবহার করেন তার মধ্যে নিশ্চয়ই ‘কানের কোনো জরুরি হুকুম অথবা ভাবার কোনো স্বতঃপরিণত ইঙ্গিত’ রয়েছে। অবিকল এই কথাটি বলাই আমার অভিপ্রায়। তার উপর আমি আর একটু বলতে চাই যে, প্রাচীন কবিদের চেয়ে আধুনিক কবিরা এ-সমস্ত সংক্ষিপ্ত রূপের ব্যবহার করেন অপেক্ষাকৃত বেশি এবং তাতে আমি আধুনিক কবিদের তীক্ষ্ণতর ছন্দবোধেরই পরিচয় পাই। তা ছাড়া ওই প্রবন্ধের মধ্যে আমি কবিদের কানের এই ‘জরুরি হুকুমের’ কাৰণটিও আবিষ্কার করতে চেষ্টা করেছি।

বাংলা ছন্দের ভাষা সম্বন্ধে যখন কথা উঠল তখন এ বিষয়ে আমার মতটাকে আর-একটু স্পষ্ট করেই বলছি। ইদানীং বাংলা রচনার রীতিবিচারের উপলক্ষে শ্রীযুক্ত প্রমথ চৌধুরীর ঘোষিত ‘সাধু বনাম চলতি ভাষার’ যুদ্ধের কথা উত্থাপন করে শ্রীযুক্ত অতুলচন্দ্র গুপ্ত বলেছেন, ‘সকলেই জানেন বাংলার ক্রিয়াপদ নিয়ে লড়াইটাই ছিল ও-যুদ্ধের একটা প্রধান পর্ব। এর কারণ খুব স্পষ্ট। বিদ্যাসাগর মহাশয়ের সময় থেকে বাংলার সমাপিকা ও অসমাপিকা ক্রিয়াগুলির যে রূপ চলে

আসছিল তা যেমন লতানো, তেমনি শিথিল। ‘হইয়া, করিয়া, বাইয়া, হইতেছিল, করিতেছিলাম, থাইতেছিলেন’—এসব ক্রিয়াপদ বাক্যের মধ্যে আনলে তাকে গাঢ়বদ্ধ করা হয় এক রকম অসম্ভব কাজ। হুতরাং বাংলা গদ্য হয়ে পড়ে নিতান্ত শিথিল। এই শিথিলতা থেকে মুক্তির জন্ত লেখকেরা অনেক সময় ক্রিয়াপদ প্রায় বর্জন করে বাক্যের পর বাক্য লিখে চলতেন কিন্তু তাতে প্রায়ই আনতে হত দীর্ঘ সমাস। অর্থাৎ ক্রিয়াপদগুলির ঠিক ও-রূপ বজায় রেখে বাংলা গদ্যে শ্লেষ আনা যায় না, এবং শ্লেষ ছিল প্রমথবাবুর লক্ষ। হুতরাং তিনি কলকাতার ভদ্রসমাজের মুখের কথাই অহরূপে ক্রিয়াপদগুলিকে কেটে ছোট করলেন। বাংলার ক্রিয়াপদগুলি ওর দুর্বলতার জায়গা, এই উপায়ে সে দুর্বলতা প্রমথবাবু অনেকটা দূর করেছেন’ (পরিচয় ১৩৩৮ কার্তিক, পৃ ১৭৫)। আমি এ বিষয়ে অভূতবাবুর সঙ্গে সম্পূর্ণ একমত। শুধু তাই নয়, আমি বলতে চাই তাঁর উক্তিগুলি বাংলা গদ্য সম্বন্ধে যতখানি সত্য, বাংলা ছন্দ, বিশেষতঃ অক্ষরবৃত্ত ছন্দ, সম্বন্ধে তার চেয়ে বেশি সত্য। কারণ গদ্যে ধ্বনির শিথিলতা শ্রুতিরূচিকে যতটা পীড়া দেয়, পদ্যে ধ্বনির শিথিলতা তার চেয়ে বেশি পীড়া দেয়। কেননা গদ্যে বক্তব্য বিষয়টাই থাকে মুখ্য, ধ্বনিমাধুর্যটা গৌণ; আর ধ্বনিমাধুর্যটাই হল পদ্যের অত্যন্ত মুখ্য লক্ষ। কাজেই পদ্যের রচনা বৈদর্ভ্য রীতিতে শ্লিষ্ট ও গাঢ়বদ্ধ হওয়া গদ্যের চেয়ে বেশি প্রয়োজনীয়। এই জন্তই আমি বাংলা অক্ষরবৃত্ত ছন্দেও শব্দের সংক্ষিপ্ত চলতি রূপের পক্ষে এতটা ওকালতি করতে চাই। আমার বিশ্বাস অক্ষরবৃত্ত অর্থাৎ রবীন্দ্রনাথের কথিত সাধু ছন্দের ধ্বনিটাকে সম্পূর্ণ অব্যাহত রেখেও ও-ছন্দে শব্দের সংক্ষিপ্ত চলতি রূপ চালানো অসম্ভব নয়। আর এ কাজ করতে পারেন একমাত্র রবীন্দ্রনাথই; তিনি যদি না পারেন তবে আর কেউ পারবে না।

রবীন্দ্রনাথ লিখেছেন—

‘সম্মুখ লড়াইয়ে পড়ে বীরের সেরা বীর

বীরবাহু চলে যখন গেলেন যমের বাড়ি

এ রকম ভাষার কোনো দোষ নেই, কিন্তু যথাস্থানে। সাধু ভাষার ঠাঁটের মধ্যে এটা চালানো যায় না।’ এ দৃষ্টান্তটির দ্বারা “আর উক্তিটি উপহসিত হয়েছে বটে, কিন্তু অপ্রমাণিত হয় নি। কেননা আমি যে-ছন্দের কথা বলেছি এ দৃষ্টান্তটি মোটেই তার অহরূপ নয়। আমি বলতে চাই, অক্ষরবৃত্ত বা সাধু ছন্দে

প্রতি পংক্তির অক্ষরসংখ্যা ( চোদ্ধ বা আঠারো বা আর যাই হক ) ঠিক রেখে এবং ও-ছন্দের স্থপরিচিত ধ্বনিকেও ঠিক রেখে তাতে শব্দের সংক্ষিপ্ত বা চলতি রূপ চালানো অসম্ভব নয়। উক্ত দৃষ্টান্তটিতে প্রতি পংক্তির চোদ্ধ অক্ষরের নিয়মই পালিত হয় নি। স্তত্রাং এ দৃষ্টান্তটির দ্বারা আমার বক্তব্য বিষয় স্পষ্ট হয় নি। রবীন্দ্রনাথ যদি ইচ্ছে করেন তবে 'বহুধারা' 'মানস-স্বন্দরী' 'এবার ফিরাও মোরে' প্রভৃতির স্বজাতীয় কবিতায় চোদ্ধ বা আঠারোর নিয়ম এবং ও-সব ছন্দের ধ্বনি অব্যাহত রেখেও শব্দের, বিশেষতঃ ক্রিয়াপদের সংক্ষিপ্ত চলতি রূপের ব্যবহার প্রবর্তন করতে পারেন, আমার তাই বিশ্বাস। আমি কবি নই, ছন্দ-রচনা করা আমার অভ্যাস নয়। স্তত্রাং আমার এ বিশ্বাসের মূল্য কতখানি তা আমি জানিনে।

এ বিষয়ে যথাসময়ে আরও আলোচনা করব। কিন্তু এ স্থলেই আরও দু-একটি কথা বলা প্রয়োজন। অক্ষরবৃত্ত ছন্দে অর্থাৎ রবীন্দ্রনাথের কথিত সাধু ছন্দে সর্বত্রই এবং সর্বদাই সংক্ষিপ্ত ক্রিয়াপদ ব্যবহার করতে হবে, এমন জেদ আমি করি নি। ধরিব, ধরিত, ধরিয়া প্রভৃতি রূপের বিরুদ্ধে আমার অভিযোগ বেশি নয়, কেননা সাধুবেশধারী এবং কতকটা শিথিল প্রকৃতির হলেও এগুলি শ্রুতিক্রমিক পীড়িত করে না। কিন্তু হইতে, লইয়া, যাইবে, জানাইতে, বাজাইল প্রভৃতি যে-সব শব্দের মধ্যে একটি করে যুগ্মস্বর বা diphthong আছে, অক্ষরবৃত্ত অর্থাৎ সাধু ছন্দে সে-সব শব্দের ব্যবহারের বিরুদ্ধেই আমার অভিযোগ সবচেয়ে বেশি। কেননা ও-সব শব্দের মধ্যবর্তী ই-কারগুলি স্বতন্ত্র নয়, এগুলি পূর্ববর্তী স্বরের আশ্রিত। অর্থাৎ লইয়া, যাইবে প্রভৃতি শব্দের প্রকৃত রূপ হচ্ছে লইয়া বা লৈয়া, যাইবে বা যাবে। স্তত্রাং লইয়া, যাইবে প্রভৃতি শব্দ দ্বিস্বর অর্থাৎ dissyllabic। অতএব অক্ষরবৃত্ত ছন্দের নিয়মে এ সব শব্দে দুই unit ধরা উচিত। অথচ ও-ছন্দে এসব শব্দের মধ্যবর্তী ই-কে স্বতন্ত্র বলে গণ্য করে এসব শব্দকে তিন unit-এর মর্যাদা দেওয়া হয়। তাতে ছন্দের গাঢ়বদ্ধতা নষ্ট হয় এবং ধ্বনিতে শিথিলতা আসে। দৈব বা দইব কথাটিকে যদি দ-ই-ব রূপে উচ্চারণ করা যায় তবে ধ্বনিতে শৈথিল্য দেখা দেয়। লওয়া, হাওয়া প্রভৃতি শব্দকে যদি ল-ও-য়া, হা-ও-য়া প্রভৃতি রূপে উচ্চারণ করা যায় অর্থাৎ এসব শব্দের ও-কে যদি স্বতন্ত্র বলে স্বীকার করা হয় তবে ধ্বনির গাঢ়তা নষ্ট হয়। তেমনি লইয়া, যাইবে অর্থাৎ লৈয়া, যাবে শব্দকে যদি ল-ই-য়া, যা-ই-বে রূপে

উচ্চারণ করে এদের তিন unit-এর মর্যাদা দেওয়া যায় তবে ছন্দে ধ্বনির গাঢ়তা নষ্ট হয়ে শৈথিল্য দেখা দেয়। সুতরাং লইয়া, যাইবে প্রভৃতি শব্দকে হয় দৈব, হাওয়া প্রভৃতি শব্দের জায় ছুই unit-এর মর্যাদা দিতে হবে; নতুবা লয়ে, যাবে প্রভৃতি সংক্ষিপ্ত রূপেরই ব্যবহার করতে হবে। হইতে, লইয়া, খাইয়া প্রভৃতি শব্দে তিন unit গণনা করা অক্ষরবৃত্ত ছন্দের প্রকৃতি-বিরোধী এবং কাজেই তাতে তীক্ষ্ণ প্রতিবোধও পীড়িত হয়।

এ সম্বন্ধে স্বর্গীয় কবি সত্যেন্দ্রনাথের সঙ্গে আমার মতের সম্পূর্ণ ঐক্য আছে। তিনি বলেছেন, ‘ওজন বজায় রাখার চেয়ে সংখ্যা ভর্তি করবার দিকে যাদের বেশি যৌক তাঁরাই একদিন একে পয়ারের কাঠগোড়ায় পুরে এর চেহারা বিগড়ে দিতে গিয়েছিলেন। মধ্যযুগের ফার্সী-বীশ লিখিয়েরা ফার্সীর দেখাদেখি বাংলার ‘যাইবে, পাইবে’ প্রভৃতি শব্দের অনির্দিষ্ট বা ভাঙটা ই-কারগুলিকে গোটা বা পুরো করে বাংলা ছন্দের পায়ে অক্ষরবৃত্তের তুড়ুং ঠুকে দিয়েছিলেন। চীনে শূন্দরীদের পায়ের মতন কেতাবী ভাষার ছন্দের গতি, পয়ারের লোহার জুতোর মধ্যে অল্প বয়সে বাঁধা পড়ে একেবারে বেঁকেচুরে আড়ষ্ট হয়ে এসেছিল। বাংলা ছন্দের এই আড়ষ্ট গতিকে কেউ কেউ শালীনতা বা আভিজাত্যের লক্ষণ বলতেও কুণ্ঠিত হন নি, কিন্তু এ যে অস্বাভাবিক তা অস্বীকার করতে পারেন না’ (ভারতী ১৩২৫ বৈশাখ, পৃ ১২)। এ সম্বন্ধে আর কিছু বলা নিশ্চয়োজন। শুধু এটুকু বললেই যথেষ্ট হবে যে, আমি যাকে বলেছি অক্ষরবৃত্ত ছন্দ এবং রবীন্দ্রনাথ যাকে বলেছেন সাধু বা সংস্কৃত বাংলার ছন্দ, সত্যেন্দ্র ঐ তাকেই বলেছেন ‘কেতাবী ভাষার ছন্দ’।

৮

আমি অগ্রহায়ণ মাসের প্রবন্ধে দেখাতে চেষ্টা করেছিলুম যে ভারতবর্ষীয় লিপিপদ্ধতি, বিশেষতঃ ব্যঞ্জন-সংহতিকে যুক্তাক্ষরের দ্বারা প্রকাশ করার পদ্ধতি, বাংলায় অক্ষরবৃত্ত ছন্দের উৎপত্তির জগ্রে অনেক পরিমাণে দায়ী। এইটেই ছিল আমার ওই প্রবন্ধের একটি বড় প্রতিপাক্ত বিষয়। সে উপলক্ষেই আমি আরও বলেছি যে, কোনো কোনো বিষয়ে যদি আমাদের লিপিপদ্ধতিতে পরিবর্তন বা সংস্কারসাধন করা যায় তবে আমাদের অক্ষরবৃত্ত ছন্দের রূপ অনেকটা বদলে যাবে, কিন্তু মাত্রাবৃত্ত ও স্বরবৃত্ত ছন্দ অব্যাহতই থাকবে। যেমন, আমাদের লিপিপদ্ধতিতে যদি শৈল, মোন না লিখে শইল, মউন লেখার রীতি থাকত,

কিংবা হইল, লউন না লিখে হৈল, লৌন লেখার রীতি থাকত, তবে আমাদের ‘অক্ষরগোনা’ ছন্দে অনেকখানি পরিবর্তন ঘটত। আমার মনে হয় আমার এ কথা বুঝতে বিশেষ চেষ্টা করতে হয় না। কিন্তু রবীন্দ্রনাথ বিশেষ জোরের সঙ্গেই আমার এ কথার প্রতিবাদ করেছেন; অথচ আমার এ উক্তিকে খণ্ডন করার জন্যে কোনো যুক্তি উপস্থিত করেন নি। তিনি শুধু বলেছেন, ‘যতক্ষণ বাংলা ভাষার ধ্বনিপ্রকৃতি...সম্পূর্ণ বদল হয়ে না যাবে ততক্ষণ যে, অক্ষর যেমন ভাবেই সাজাই না কেন বাংলা ছন্দের ধারা আজও যেমন ভাবে চলছে কালও তেমনি ভাবে চলবে।’ তাঁর এই উক্তি মাত্রাবৃত্ত ও স্বরবৃত্ত ছন্দ সম্বন্ধে সম্পূর্ণ সত্য, কিন্তু অক্ষরবৃত্ত ছন্দ সম্বন্ধে সম্পূর্ণ সত্য নয়। আমাদের অক্ষরবৃত্ত অর্থাৎ অক্ষরগোনা ছন্দের উপর বাংলা লিপিপদ্ধতির প্রভাব কতখানি এ বিষয়ে আরও আলোচনা হওয়া বাঞ্ছনীয়।\*

২

অতএব দেখা যাচ্ছে রবীন্দ্রনাথের প্রতিবাদের একটি কথাও আমি সত্য বলে স্বীকার করতে পারলুম না। তার কারণ আছে; সেটি হচ্ছে এই। আমি অগ্রহায়ণের প্রবন্ধে বাংলা ছন্দের শুধু অক্ষরবৃত্ত-শাখার বিরুদ্ধেই কয়েকটা অভিযোগ করেছিলুম। ‘কিন্তু রবীন্দ্রনাথ সে অভিযোগগুলো সাধারণভাবে সমস্ত ‘বাংলা কবিতার ছন্দ’র বিরুদ্ধেই প্রযোজ্য, এই কথা ধরে নিয়েই প্রতিবাদের ভূমিকা করেছেন। আর এই জগুই তিনি আমার ‘নালিশ ঠিক স্পষ্ট বুঝতে পারেন নি।’ সুতরাং তাঁর প্রতিবাদের কোনো কথাই যে আমার প্রবন্ধের বিরোধী না হয়ে অনেক স্থলেই আমার অল্পকূল হয়েছে, তাতে বিস্মিত হবার কিছু নেই।

যদি তাঁর প্রতিবাদের মূলেই ওই ভুলটুকু না থাকত তবে তিনি যে আমার সমস্ত কথা না হলেও অধিকাংশ কথাই সানন্দে মেনে নিতেন, এ বিষয়ে আমার সন্দেহ নেই। কেননা আমি আধুনিক বাঙালি কবিদের ‘ভংসনা’ তো করিই নি, বরং অনেক স্থলেই তাঁদের, বিশেষতঃ রবীন্দ্রনাথের, ছন্দবোধের প্রশংসাই করেছি। আর স্থানে স্থানে যে-সব অভিযোগ এনেছি তা কোনো কবির বিরুদ্ধেই নয়, তা শুধু অক্ষরবৃত্ত ছন্দের বিরুদ্ধে। অক্ষরবৃত্ত ছন্দের বিরুদ্ধে আমিই প্রথম

\* বাংলা লিপিপদ্ধতি ও অক্ষরবৃত্তের সম্বন্ধের উপর অবিলম্বেই আর-একটি প্রবন্ধ প্রকাশ করব।

নালিশ করলুম তা নয়। আমার বিশ্বাস রবীন্দ্রনাথই সে কাজ করেছেন সকলের আগে। এ সম্বন্ধে তিনি নিজে কি বলেছেন দেখা যাক। প্রথমেই বলে রাখা দরকার, তাঁর কথিত সাধু ছন্দ এবং আমার কথিত অক্ষরবৃত্ত ছন্দ একই জিনিস। তিনি বলেছেন—

‘আমাদের সাধু ছন্দে বর্ণগুলির মধ্যে যে সাম্য ও সৌভ্রাত্য দেখা যায় তাহা গানের স্বরে সঁাচ্চা হইতে পারে, কিন্তু আবৃত্তি করিয়া পড়িবার প্রয়োজনে তাহা বুটা। এই কথাটা অনেক দিন আমার মনে বাজিয়াছে।……সাধু ভাষার কাব্যসভায় যুক্তবর্ণের যুদ্ধকটা আমরা ফুটা করিয়া দিয়াছি এবং হসন্তর বাঁশির ফাঁকগুলি শিলা দিয়া ভর্তি করিয়াছি। ভাষার নিজের অন্তরের স্বাভাবিক স্বরটাকে ধ্বংস করিয়া দিয়া বাহির হইতে স্বর যোজনা করিতে হইয়াছে। সংস্কৃত ভাষার জরি-জহরতের ঝালরওয়ালা দেড় হাত দুই হাত ঘোমটার আড়ালে আমাদের ভাষা বুটের চোথের জল মুখের হাসি সমস্ত ঢাকা পড়িয়া গেছে, তাহার কালো চোথের কটাক্ষে যে কত তীক্ষ্ণতা তাহা আমার ভুলিয়া গেছি। আমি তাহার সেই সংস্কৃত ঘোমটা খুলিয়া দিবার কিছু সাধনা করিয়াছি, তাহাতে সাধু লোকেরা ছিঁ ছিঁ করিয়াছে’ (সবুজপত্র ১৩২১ জ্যৈষ্ঠ)।

এই কথাগুলিকেই সত্যোক্তনাথ তাঁর স্বাভাবিক ভেজের সঙ্গে অন্য ভাষায় প্রকাশ করে গেছেন। অক্ষরবৃত্ত ছন্দ সম্বন্ধে তাঁর অভিমত কি ছিল তা এ স্থলে সংগ্রহ করে দিলুম।—

‘এখন আর বাংলা ভাষা ব্রহ্মার কমণ্ডলুর ভিতর, যুক্ত-অক্ষর হতু-কী-বয়ড়া আর হসন্তের জুঁইফুল পরিচয়ে মহাঙ্গুক্ষি ত্রিফলার জল তৈরি করছে না। …যুক্তাক্ষরের চড়ায় ঘেঁষড়াতে ঘেঁষড়াতে, হসন্ত-তকারের কলমীদাম দাঁড়ের আগায় ছেঁচতে ছেঁচতে, অগ্ন্যাগ্ন হসন্ত-অক্ষরের শুকক-পৃষ্ঠে লগি লাগাবার দুশ্চেষ্টা করতে করতে প্রাণ ওষ্ঠাগত হয়ে উঠেছিল। …মাত্রাশিচারশূন্য অক্ষরগোনা ছন্দ এখন উড়ে কবির। সমস্তে রক্ষা করুন, বাঙালি কবির দ্বারা আর ও-কাজ চলবে না। কারণ উচ্চারণের ধারা তফাৎ হয়ে গেছে। উচ্চারণের নিরিখ ক্রমাগতই বলছে যে, পুরোনো ছন্দ পুরোনো কাপড়ের মতো ভগ্ন হয়েছে; ওতে আর লজ্জানিবারণ হবে না। …পয়ার ত্রিপদীর কাজ ফুরিয়েছে। ছন্দবিভাগ বাঙালি আর পাঠশালার পোড়ো নয়, উঁচু ক্লাশে প্রোমোশন হয়েছে। …ছন্দব্যবসায়ীরা এখন থেকে আর হসন্তের বাট তোলা, স্বরান্তের আশি

এবং সংযুক্তাকরের একশো তোলা—ছন্দেখরীর টাটে বসে—তিন রকম বাটখারায়  
মিশিয়ে ইচ্ছামতো ওজন দিয়ে—চুক্তি-ভুলন করতে পারবেন না।...ওজন বজায়  
রাখার চেয়ে সংখ্যা ভুলি করবার দিকে যাদের বেশি ঝোঁক তাঁরা একে একদিন  
পয়ারের কাঠগড়ায় পূরে এর চেহারা বিগড়ে দিতে গিয়েছিলেন।...এ যে  
অস্বাভাবিক তা অস্বীকার করতে পারেন না’ (ভারতী ১৩২৫ বৈশাখ)।

রবীন্দ্রনাথ বলেছেন সাধু ছন্দের মধ্যে খাটি বাংলার ‘বাশির ফাঁকগুলি শিশা,  
দিয়া ভঁর্তি’ করা হয়েছে। সত্যেন্দ্রনাথ বলেছেন ‘পুরোনো ছন্দ’র মধ্যে ‘বঙ্গবাণীর  
স্বরূপ-মূর্তি’টিই ‘মক্তবের মুসীদের দুশ্ম-দলনে বা টোলের পণ্ডিতদের গোময়-  
লেপনে’ প্রায় লুপ্ত হয়ে গেছে। অক্ষরবৃত্ত ছন্দের বিরুদ্ধে আমার নালিশ কিন্তু  
এত গুরুতর নয়।

১০

অক্ষরবৃত্ত ছন্দের আকৃতি ও প্রকৃতি সম্বন্ধে আমার বক্তব্য কি, তা এ স্থলে  
সংক্ষেপে অথচ বিশদ করে বলা প্রয়োজন। তা করতে হলে নতুন দৃষ্টান্ত  
রচনা করতে হয়। কিন্তু আমার গল্পরচনার হাত, পথরচনা করতে স্বভাবতঃই  
কুণ্ঠা ও সংকোচ বোধ করি। তথাপি আমার কথাগুলির যৌক্তিকতা দেখাবার  
জন্তে একটি দৃষ্টান্ত রচনা করতে হল।

ফাক্তনের গুরুরাতে মিত্রদের বিস্তৃত প্রাঙ্গণে  
বসেছে বিবাহ-সভা হুমঙ্গল গোধূলি-লগনে।  
শিউলি, কুন্দ, জুঁই কিংবা স্নিগ্ধ শাস্ত শারদা জ্যোৎসনা—  
বৌ যেন ঐ রূপে সবারেই করিছে ভৎসনা।  
এ হেন কনের সাথে পুত্রের বিবাহ, আজি তাই  
সলজ্জ বোমাকে দেখে বসুজার হৃথ-সোমা নাই।  
সানন্দ চিন্তেই তিনি জামাতাকে দেছেন যৌতুক,  
সহাস্ত বদন তাই, নয়নেতে অসীম কোঁতুক।  
এমন দুর্লভ বৌ পেয়ে তিনি মুক্ত-হস্ত আজি—  
মিষ্টান্নমিতজ্ঞ জনাঃ পাচ্ছে তাই, যাতে যেবা রাজি।  
ঐ হোথা কৈ ভাজা পায় নাই নন্দী মহাশয়—  
কেউ বলে,—আরও দাও, ছাড়িবার পাত্র সে যে নয়।  
‘দৈ-ওয়ালো কৈ গেল, শুধু থৈ খাওয়া কতু যায়?’



এই বলি' ক্রুদ্ধ হয়ে পাত্র ছাড়ে বুদ্ধদেব রায় ।—  
 আহত মোঁচাক সম সকলেই তোলে কলরব,  
 তার পরে হৈ চৈ,—ভোজ, বিয়ে ভাঙে বুঝি সব ।  
 হেনকালে লাঠি হাতে মুখে করি' ভৈরব গর্জন,  
 রায়েদের লাঠিয়াল মিত্রদেরে করিল তর্জন ।  
 পাত্র ছেড়ে উঠি' পড়ি' সকলেই পলায় চৌদিকে ;  
 বহুর কনিষ্ঠ পুত্র ছুটে গিয়ে ধরিল বৌদিকে ।  
 সন্ত-বিবাহিতা বৌ সৈ সাথে চলে গেল ঘরে ;  
 বহুপুত্র বই-পড়া বাবু নয় বিধাতার বরে ;—  
 সহসা ছিনায়ে লাঠি শাস্ত মুখে বলিল, 'মাঠেঃ,  
 একটু নড়ো না কেউ, রায়েদের লাঠিয়াল কই ?'  
 ভাঁহার মাঠেঃ রবে শাস্ত চিত্তে ফিরিল সবাই ;  
 মোঁচাত সময় হল,—তাই শুধু বুদ্ধদেব নাই ।  
 লাঠি ফেলি' বহুপুত্র বলিলেন আনন্দ-নয়ন,—  
 'রহিল বোভাত-কালে সকলেরে মোর নিমন্ত্রণ ।'

বলা বাহুল্য এটি অক্ষরবৃত্ত ছন্দে রচিত । এ ছন্দটি সাধারণতঃ আঠারো 'অক্ষর'-এর ছন্দ নামেই পরিচিত ; এক হিসেবে একে 'বর্ধিত পয়ার'ও বলা যায় । যা হক, এ দৃষ্টান্তটিতে কোথাও ছন্দপতন ঘটেছে কি না সে কথা কবিরাই বলতে পারেন । আপাততঃ, ছন্দ ঠিক আছে ধরে নিয়েই আমি অক্ষরবৃত্ত ছন্দের স্বরূপ সম্বন্ধে আমার উক্তিগুলিকে বিশদ করতে চেষ্টা করছি ।

প্রথমেই দেখতে পাই, যদিও এটা আঠারো 'অক্ষর'-এর ছন্দ তথাপি এর প্রতি পংক্তিতে আঠারো 'অক্ষর' নেই । দু-এক পংক্তিতে আঠারো অক্ষরের বেশি আছে ; অন্যত্র আঠারো অক্ষরের কমও আছে । কিন্তু তা সত্ত্বেও ছন্দের ধ্বনি অর্থাৎ কানের ওজন ঠিক আছে । কি করে তা হল তাই বলছি । অক্ষরবৃত্ত ছন্দের যে নিয়মটির কথা আমি বলেছি সেটি হচ্ছে এই—এ ছন্দে প্রত্যেক শব্দের ( word-এর ) শেষ প্রান্তবর্তী যুগ্মধ্বনিকে দুই unit বলে গণ্য করা হয়, কিন্তু শব্দের অ-প্রান্তবর্তী যুগ্মধ্বনি এক unit বলেই গণ্য হয় ; আর শব্দটি যদি একস্বর ( monosyllabic ) হয় তবে তার যুগ্মধ্বনিটাও প্রান্তবর্তী অভাব দুই unit বলেই গণ্য হয় । এ নিয়মটি যদি ঠিকমতো পালিত হয় তবে পংক্তির অক্ষরসংখ্যা বেশি হলেও ক্ষতি

হয় না, কম হলেও ছন্দ ঠিকই থাকে। উপরের দৃষ্টান্তগুলিতেও এ নিয়ম বজায় আছে, তাই অক্ষরসংখ্যা কোথাও বেশি কোথাও কম হওয়া সত্ত্বেও ছন্দের প্রকৃতি ঠিক আছে; কিন্তু আকৃতি সর্বত্র সমান নেই।

বিষয়টাকে আরও খুলে বলছি। ‘ফাল্গুনের’ শব্দটিতে যুগ্মধ্বনি আছে দুটি, ফাল্ এবং নের্; তার মধ্যে ফাল্ ধ্বনিটি এক unit-এর বেশি মর্যাদা পায় নি, কারণ এটি শব্দের শেষ প্রান্তবর্তী নয় বলে একে একটু ঠেঁসে উচ্চারণ করতে হয়। কিন্তু নের্ ধ্বনিটি দুই unit বলেই গণ্য হয়েছে, কেননা এটি শব্দের প্রান্তবর্তী বলে একে একটু টেনে উচ্চারণ করতে হয়। এরূপ সর্বত্রই। জ্যোৎস্না এবং ভৎসনা শব্দের জ্যোৎ ও ভৎ এ দুটি যুগ্মধ্বনিকে এক-এক unit বলেই ধরা হয়েছে, এরা শব্দের অন্তে অবস্থিত নয় ব’লে; থও বা হসন্ত ত কে স্বতন্ত্র ‘অক্ষর’ বলে ধরা হয় নি। ‘আরও’ শব্দেও তিন ‘অক্ষর’ ধরা হয় নি, কেননা উচ্চারণে এখানে দুটি মাত্র unit আছে, এ শব্দটির আসল রূপ হচ্ছে ‘আরো’। তেমনি ‘খাওয়া’ শব্দেও দুই unit, যেহেতু ‘ওয়া’ দুটি স্বতন্ত্র অক্ষরের সাহায্যে লেখা হলেও উচ্চারণে এক unit; ‘ওয়া’র আসল রূপ হচ্ছে অন্তঃস্থ ব-এ আকার বা *wa*, অর্থাৎ ‘খাওয়া’ কথার প্রকৃত উচ্চারণরূপ হচ্ছে *khawā*।

উক্ত দৃষ্টান্তটিতে যুগ্মস্বরগুলির আকৃতি ও প্রকৃতিই বেশি লক্ষ্য করার বিষয়। ঐ এবং ও, এ দুটি যুগ্মধ্বনির কথাই আগে বলছি। এ দুটি যুগ্মধ্বনি যখনই শব্দের অন্তে স্থাপিত হয়েছে তখনই দুই মাত্রার মর্যাদা পেয়েছে। যেমন—বো, দৈ, থৈ, হৈ, চৈ, মাঠৈ, ঐ। কিন্তু যখনই এরা শব্দের শেষ প্রান্তে নয়, তখনই এরা এক unit বলে গণ্য হয়েছে। যথা—ভৈরব, কোতুক, বোতুক, চোদিকে, বোভাত, মোভাত, মোচাক ইত্যাদি। ‘ঐ’ কথাটিও ত্রিমাত্রিক। কিন্তু যদি লেখা হত ‘ঐরূপে সবारे যেন বো আজি করিল ভৎসনা’ কিংবা ‘ঐরূপে বোমাটি যেন সকলেরে করিল ভৎসনা’ তাহলে ‘ঐ’ এক unit-এর বেশি মর্যাদা পেত না, কেননা তখন ‘ঐরূপ’ এক শব্দ বলে গণ্য হত, তার অর্থ পরিবর্তন ঘটত এবং ‘ঐ’ শব্দের অন্তিম ধ্বনি বলে গণ্য হত না। বো, সৈ এরা দুই মাত্রা পেয়েছে। কিন্তু কনের নাম যদি হত শৈলবালা তাহলে শৈ এক মাত্রার বেশি মূল্য পেত না। ‘ভৈরব’এর ভৈ এক unit; কিন্তু ‘মাঠৈ: রব’-এর ভৈ: দুই unit; যেহেতু একটি শব্দের অন্তে অবস্থিত, আর-একটি নয়। ‘শিউলি’ শব্দেও দুই unitই রয়েছে; কেননা ইউ যুগ্মস্বরটি শব্দের অন্তে নয়।

যদি থৈ, দৈ, সৈ প্রভৃতি শব্দকে থই, দই, সই ইত্যাদি রূপে লেখা হত তবে কোনো কোনো পংক্তির আঠারো সংখ্যা পূর্ণ হত। পক্ষান্তরে যদি বউভাত, মউচাক, মউভাত ইত্যাদি রূপে লেখা যায় তবে অগ্ন্যন্ত পংক্তির অক্ষরসংখ্যা আঠারোকে অতিক্রম করে যাবে। আরও, খাওয়া ইত্যাদিকে যদি আরো, খাবা ইত্যাদি রূপে লেখা যায় তবে অক্ষরসংখ্যার আরও পরিবর্তন ঘটবে। আই-কার ( ভৈরব, থৈ ) এবং অউ-কার ( কোতুক, বোভাত ), এ দুটি সংকেতচিহ্নের মতো যদি আই-কার ( তাই, নাই ), ইউ-কার ( শিউলি ), উই-কার ( জুই ), এই-কার ( সকলৈ ), এউ-কার ( কেউ ), আও-কার ( দাও ) ইত্যাদির জন্তও স্বতন্ত্র সংকেতচিহ্ন থাকত, তবে উক্ত দৃষ্টান্তটির আকৃতিতে অর্থাৎ অক্ষরসংখ্যায় আরও বিপর্যয় ঘটত ; কিন্তু ছন্দের প্রকৃতি ঠিকই থাকত। সেজন্যই আমি বলেছি যে অক্ষরবৃত্ত ছন্দও আসলে অক্ষরসংখ্যার উপর মোটেই নির্ভর করে না। অতএব এ ছন্দে প্রতি পংক্তিতে, অক্ষরসংখ্যা ঠিক রাখার জন্তে কোনো চেষ্টার প্রয়োজন নেই ; থৈ, দৈ না লিখে থই, দই লেখার আবশ্যিকতা নেই। ‘মাঠে’কে তো ‘মাভেঃ’ লেখার উপায়ও নেই।

এ ছন্দ যখন অক্ষরসংখ্যার উপর নির্ভর করে না তখন এ ছন্দের ‘অক্ষরবৃত্ত’ নামটিও স্বসংগত নয়, এ কথা আমি স্বীকার করি। আসলে এটি একটি যৌগিক বা মিশ্র ছন্দ। কিন্তু এ ছন্দের নামকরণে একটা মুশকিল আছে। আমি বার বার unit শব্দটি ব্যবহার করেছি। Unit শব্দের দ্বারা আমি ধ্বনি-পরিমাণ বা উচ্চারণকালের unitকেই বুঝেছি, এ কথা বলাই বাচ্য। কিন্তু এই unit-কে কি একটা বিশেষ নাম দেওয়া যায় তা আমি ভেবে পাইনে। উক্ত দৃষ্টান্তটির প্রতি পংক্তিতে সর্বত্রই আঠারোটি করে unit আছে, যদিও প্রতি পংক্তিতে ঠিক আঠারো অক্ষর নেই। কিন্তু তথাপি এ জাতীয় ছন্দ কবিনমাজে অক্ষরসংখ্যার দ্বারাই পরিচিত ; উক্ত দৃষ্টান্তটিকে আঠারো অক্ষরের ছন্দই বলা হয়ে থাকে। তাই অগত্যা আমিও একে অক্ষরবৃত্ত নাম দিতে বাধ্য হয়েছি।

এ দৃষ্টান্তটিতে করিল, করিছে প্রভৃতি সাধু শব্দ বর্জন করে প্রাকৃত শব্দ ব্যবহার করতে সাহস পাই নি। তেমনি পাইল, যাইয়া প্রভৃতি শব্দের ব্যবহারও বর্জন করেছি। ও-সব শব্দ ব্যবহার করলে এদের মধ্যবর্তী যুগ্মধ্বনিটাকে এক unit গণ্য করে এসব শব্দে দুই unitই ধরা উচিত, নতুবা এদের সংক্ষিপ্ত রূপের ব্যবহার করা সংগত। তাই শিউলি শব্দের শিউ-কে আমি এক unit

ধরেছি। আর এক জায়গায় ‘পাচ্ছে’ এই নিষিদ্ধ প্রাকৃত শব্দটি ব্যবহার করেছি। তাতে ছন্দের ক্ষতি হয়েছে কি না তার বিচার বিশেষজ্ঞরাই করবেন।

১১

বাংলা ছন্দ সম্বন্ধে আরও আলোচনা হওয়া বাঞ্ছনীয়। কেননা পারম্পরিক আলোচনার দ্বারাই আমাদের ছন্দগুলির যথার্থ প্রকৃতিটি প্রকাশিত হবে। কিন্তু দুঃখের বিষয় আমাদের সাহিত্যে বাংলা ছন্দ সম্বন্ধে এখনও যথোচিতরূপে আলোচনা হয় নি। তার কারণ হচ্ছে এই যে, ছন্দ জিনিসটাই একটা উত্তর পদার্থ; এটা যুগপৎ কাব্যসাহিত্যের বাহন এবং ধ্বনিতত্ত্ববিজ্ঞার উপাদান। অতএব আমাদের দেশের কবিরা ধ্বনিতত্ত্বের পারদর্শী নন এবং ধ্বনিতত্ত্ববিদরাও কাব্যসাহিত্যের প্রতি বিশেষ অগ্ররক্ত নন। তাই ছন্দের আলোচনাটা কারও হাতেই যথোচিত মর্যাদা পায় নি। আমি কবিও নই, ধ্বনিতত্ত্ববিদও নই। তাতে একটা মন্ত হুবিধে এই যে, আমি নিঃসংকোচে উভয়ের এলাকায়ই বিচরণ করতে পারি। কিন্তু তার একটা মন্ত অহুবিধেও এই যে, তাতে উভয়ের হাতেই আমার মার খাবার সম্ভাবনা আছে। সে কথাটিও আমি ভুলি নি।\*

\* বিচিত্র। ১৩৩৮ মাঘ

## ছন্দ-জিজ্ঞাসা (২)

১

● বাংলা ছন্দের পরিভাষা

পারিভাষিক শব্দের অর্থ এবং ব্যবহার নিয়ে বিভিন্ন পণ্ডিতের মধ্যে মতভেদ থাকতে পারে এবং এরকম মতভেদ থাকা অন্তায়ও নয়। কিন্তু কোনো একটি বিশেষ আলোচনায় যিনি সংজ্ঞা-শব্দগুলিকে যে অর্থে প্রয়োগ করেন তাঁকে আলোচনার আগাগোড়া সেই অর্থকে অপরিবর্তিত রাখতে হবে এবং সে আলোচনার স্বার্থ বিচার করতে হলে পাঠককে আপাততঃ সে অর্থগুলি স্বীকার করে নিতেই হবে। ছন্দের আলোচনায় আমি পারিভাষিক শব্দগুলিকে যে অর্থে ব্যবহার করেছি সে সম্বন্ধে কারও মতান্তর থাকতেও পারে এবং তিনি তা বলতেও অধিকারী। কিন্তু আমার আলোচ্য বিষয়ে আমার বক্তব্যকে যদি বুঝতে হয় তবে আপাততঃ তৎকালের জন্য আমার প্রযুক্ত অর্থকে স্বীকার করে নিতেই হবে নতুবা আমার কথা অপরের পক্ষে বোঝাই অসম্ভব হবে এবং ফলে অনেক স্থলে আমার বক্তব্য সম্বন্ধে ভ্রান্ত ধারণার উৎপত্তি হবে। আমার অক্ষরবৃত্ত ছন্দের আলোচনাটি সম্বন্ধেও এই বিভ্রাটই ঘটেছে। ওই প্রবন্ধে যদিও পারিভাষিক শব্দগুলির স্বতন্ত্র আলোচনা করি নি তথাপি সর্বত্রই এগুলিকে স্পষ্টার্থ করতে চেষ্টা করেছিলুম। তবু নিকৃতি পাই নি। তাই এখানে স্বতন্ত্রভাবে কয়েকটি পারিভাষিক শব্দের আমার প্রযুক্ত বিশিষ্ট ও নির্দিষ্ট অর্থের আলোচনা করতে হল। আশা করি আমার ব্যবহৃত পারিভাষিক শব্দগুলি সম্বন্ধে স্পষ্ট ধারণা হলে আমার বক্তব্য বিষয়টি আর অস্পষ্ট থাকবে না।

১। সিলেবল্, ধ্বনি বা স্বর—সিলেবল্ কথাটি আমি অবিকল ইংরেজি অর্থেই ব্যবহার করেছি। অর্থাৎ বাগ্‌যন্ত্রের একটিমাত্র প্রয়াসের দ্বারা একসঙ্গে যে ধ্বনিটুক উচ্চারিত হয় তাকেই আমি সিলেবল্ বলেছি। আর ইংরেজিতে ‘সিলেবল্’ যে অর্থে ব্যবহৃত হয় আমি বাংলায় ধ্বনি কথাটিকেই ঠিক সেই অর্থে ব্যবহার করেছি। অর্থাৎ অ, আ, অই, আউ, অন্, আন্ প্রভৃতিকে এক-একটি সিলেবল্ বা ধ্বনি বলেছি। আবার প্রত্যেকটি সিলেবল্ বা ধ্বনির অন্তরের তত্ত্ব

হচ্ছে একটি করে স্বর ; প্রত্যেক সিলেব্‌ল্‌-এর অন্তরে অনধিক একটি স্বরধ্বনি থাকবেই। তাই স্থলবিশেষে স্বর কথ্যটিকে সিলেব্‌ল্‌-এর প্রতিশব্দরূপে ব্যবহার করেছি। যথা—যখন ধ্বনিসংখ্যা বা স্বরসংখ্যার উল্লেখ করেছি তখন সর্বত্রই সিলেব্‌ল্‌-এর সংখ্যাই বুঝিয়েছে। আর সিলেব্‌ল্‌-বৃত্ত যে ছন্দ, তাকেই বলেছি স্বরবৃত্ত ছন্দ; যথাস্থানে তা বিশদ করা যাবে।

ছন্দের বিচারে ধ্বনি বা স্বরের অর্থাৎ সিলেব্‌ল্‌-এরও বিশ্লেষণ করার প্রয়োজন আছে। বিশ্লেষণ করলে দেখা যায় সব ধ্বনি বা সিলেব্‌ল্‌ এক রকম নয়, তারও প্রকারভেদ আছে। এক দিক্‌ থেকে বিচার করলে সব ধ্বনি বা সিলেব্‌ল্‌কেই অমিশ্র ও মিশ্র এই দুই শ্রেণীতে ভাগ করা যায়। অ, আ প্রভৃতি ব্যাকরণের বর্ণমালার সমস্ত স্বরবর্ণই অমিশ্র ধ্বনি ; কারণ স্বরবর্ণই ধ্বনির বিশুদ্ধ রূপ। আর স্বরাস্ত ব্যঞ্জন বর্ণমাত্রকেই মিশ্র ধ্বনি বলতে পারি, কারণ তাতে বিশুদ্ধ ধ্বনি অর্থাৎ স্বরবর্ণের সঙ্গে ব্যঞ্জনের মিশ্রাল থাকে। স্ততরাং ক, কা, চি, চৌ প্রভৃতিকে মিশ্র ধ্বনি বলব। স্বরাস্ত ব্যঞ্জনটি সংযুক্ত বা অসংযুক্ত দুই-ই হতে পারে। অর্থাৎ ক, জ, শী, শ্রী ইত্যাদি সমস্তই মিশ্র ধ্বনি।

আর-এক দিক্‌ থেকে বিচার করলে ধ্বনিকে অযুগ্ম ও যুগ্ম এই দুই ভাগে বিভক্ত করা যায়। অযুগ্ম ও যুগ্ম ধ্বনি, এই সংজ্ঞা দুটি পূর্বে কেউ ব্যবহার করেছেন কি না জানিনে। আমি কি অর্থে এ শব্দ দুটির প্রয়োগ করেছি তাই বুঝিয়ে বলছি। রবীন্দ্রনাথ বলেছেন, ‘যুগ্মধ্বনি শব্দটার পরিবর্তে ইংরেজি সিলেব্‌ল্‌ শব্দ ব্যবহার করলে অনেকের পক্ষে সহজ হবে। আমি তাই করব।’ আমি গোড়ায়ই বলে রাখছি আমার প্রযুক্ত যুগ্মধ্বনি কথ্যটার পরিবর্তে সিলেব্‌ল্‌ শব্দ ব্যবহার করলে আমার সমস্ত আলোচনাটাই দুর্বোধ্য হয়ে উঠবে। কারণ আমি যুগ্মধ্বনি বলতে শুধু সিলেব্‌ল্‌ বুঝিনে, বোঝা উচিতও নয়। যুগ্মধ্বনি বলতে আমি বিশেষ এক প্রকার সিলেব্‌ল্‌ বুঝি ; অযুগ্মধ্বনি বলতে বিশেষ আর-এক প্রকার সিলেব্‌ল্‌ বুঝি। পার্থক্যটা কি দেখানো দরকার। ইংরেজিতে সিলেব্‌ল্‌ কথ্যটি যে অর্থে ব্যবহৃত হয় আমি ধ্বনি শব্দটিকে ঠিক সেই অর্থে ব্যবহার করেছি। অনেক সময় দেখা যায় দুটি স্বতন্ত্র সিলেব্‌ল্‌-এর যোগে একটি নতুন সিলেব্‌ল্‌-এর উৎপত্তি হয়। এ রকম যুক্ত সিলেব্‌ল্‌কেই আমি যুগ্মধ্বনি নাম দিয়েছি। যেমন, ‘জ’ একটি সিলেব্‌ল্‌, আর ‘ল’ একটি সিলেব্‌ল্‌ ; এ দুটো মিলে যখন ‘জল’ হয় তখন ‘ল’ এর অ-কার লুপ্ত হয়ে একটি

নতুন যুক্ত সিলেবল্-এর সৃষ্টি হয়। অতএব ‘জল’ কথাটিকে ছন্দের তরফ থেকে একটি যুগ্মধ্বনি বলব। আর যে সিলেবল্‌টি দুটি স্বতন্ত্র সিলেবল্-এর যোগে উৎপন্ন নয় অর্থাৎ যে সিলেবল্‌টি স্বভাবতঃই অযুক্ত তাকেই আমি অযুগ্মধ্বনি বলেছি। ‘পা’ কথাটিকে বলব একটি অযুগ্মধ্বনি; কিন্তু ‘পান’ কথাটিকে বলব একটি যুগ্মধ্বনি; কেননা ‘পা’ এবং ‘ন’—এ দুটি অযুগ্মধ্বনি যুক্ত হয়ে ‘পান’ কথাটির উৎপত্তি হয়েছে। দুটি স্বতন্ত্র স্বরবর্ণের যোগেও একটি যুগ্মধ্বনি উৎপত্তি হতে পারে। যেমন, ‘উ’ একটি স্বর, আর ‘ই’ একটি স্বর; কিন্তু এ দুটিতে মিলে গিয়ে ‘উই’ এই নতুন স্বরটির উৎপত্তি হয়েছে। এ রকম দুটি স্বতন্ত্র অর্থাৎ অযুক্তস্বরের যোগে যে নতুন যুক্তস্বরের উৎপত্তি হয় তাকে যুগ্মস্বর বলা যায়, যথা—অই, আই, অউ, আউ, অও, আও, ইউ ইত্যাদি। কিন্তু মনে রাখা দরকার যে যুগ্মস্বর যুগ্মধ্বনিরই প্রকারভেদ মাত্র, স্বতন্ত্র কিছু নয়।

লক্ষ করার বিষয়, ‘জ’ এবং ‘ল’ এ দুটি স্বতন্ত্র অযুগ্মধ্বনির মধ্যে পরবর্তী ‘ল’ ধ্বনিটি আপন অ-কার লুপ্ত করে দিয়ে অর্থাৎ নিজের স্বাতন্ত্র্য হারিয়ে পূর্ববর্তী ‘জ’ ধ্বনিটির আশ্রয় নিয়েছে বলেই ‘জল’ এই যুগ্মধ্বনিটির উৎপত্তি হতে পেরেছে। ‘পান’ কথাটির মধ্যেও ‘ন’-এর অ-কার লুপ্ত হওয়ায় ‘ন’ আপন স্বাতন্ত্র্য হারিয়ে ‘পা’-এর আশ্রয় নিয়েছে। তেমনি ‘উই’ কথাটির মধ্যেও ‘ই’ নিজের স্বাতন্ত্র্য বিসর্জন দিয়ে ‘উ’-এর আশ্রয় নিয়েছে বলেই এই যুগ্মস্বরটির উৎপত্তি হয়েছে। এরকম সর্বত্রই। স্মরণ্য দেখা গেল প্রত্যেক যুগ্মধ্বনির মধ্যেই দুটি করে অংশ আছে; প্রথম অংশটি স্বতন্ত্র, দ্বিতীয় অংশটি স্বাতন্ত্র্যহীন। জল, পান, উই প্রভৃতি যুগ্মধ্বনিগুলির মধ্যে জ, পা এবং উ স্বতন্ত্র; এরা নিজের শক্তিতে বর্তমান। শুধু তাই নয়, ল, ন এবং ই এই তিনটি স্বাতন্ত্র্যহীন ধ্বনিকে এরা আশ্রয় দিয়ে রক্ষাও করেছে। স্মরণ্য প্রত্যেক যুগ্মধ্বনির পূর্ববর্তী স্বতন্ত্র অংশটিকে আশ্রিতা ধ্বনি এবং পরবর্তী স্বাতন্ত্র্যহীন অংশটিকে আশ্রিত ধ্বনি বলতে পারি। জল, পান এবং উই, এই তিনটি যুগ্মধ্বনির মধ্যে জ, পা এবং উ আশ্রিতা; আর ল, ন এবং ই আশ্রিত। যুগ্মধ্বনির আশ্রিত অংশটি ব্যঞ্জনবর্ণও হতে পারে, স্বরবর্ণও হতে পারে। স্মরণ্য যুগ্মধ্বনিকে ব্যঞ্জনাস্তিক ও স্বরাস্তিক, এই দুই শ্রেণীতে বিভক্ত করা যায়। যেমন, জল, পান, গাছ, সাত প্রভৃতি ব্যঞ্জনাস্তিক যুগ্মধ্বনি। আর দুই, তুই, লাউ, বাউ প্রভৃতি স্বরাস্তিক যুগ্মধ্বনি। আশ্রিত ব্যঞ্জনকে হসন্ত চিহ্নের দ্বারা নির্দেশ করার প্রথা

আছে। কিন্তু আশ্রিত স্বরকে নির্দেশ করার কোনো চিহ্ন প্রচলিত নেই। আমার আলোচনায় আমি আশ্রিত স্বরকেও হসন্ত চিহ্নের দ্বারাই নির্দেশ করেছি। স্বর্গীয় কবি সত্যেন্দ্রনাথও তাই করেছিলেন। কিন্তু হসন্ত স্বর, কথাটাতে স্বভাবতঃই আপত্তি হতে পারে। তাই আমার আলোচনায় আমি হসন্ত চিহ্নকেই আশ্রয় চিহ্ন নামে অভিহিত করেছি। এ নামটিতেই আমার উদ্দেশ্য স্পষ্ট বোঝা যায়; স্বতরাং এ নামে আপত্তি হবার আশঙ্কা নেই। ছন্দের বিচারে যুগ্মধ্বনির আশ্রিত অংশটিকে নির্দেশ করার অভিপ্রায়ে পূর্বোক্ত যুগ্মধ্বনিগুলিকে জল, পান, গাছ, সাত, দুই, তুই, লাউ, ঝাউ, ইত্যাদি রূপে প্রকাশ করেছি।

পূর্বেই বলেছি প্রত্যেক দিলেব্ বা ধ্বনির অন্তরে একটি করে স্বর থাকবেই। কিন্তু স্বর বলতে স্বরধ্বনি বোঝাচ্ছে, স্বরবর্ণ নয়। এ কথা বলার সার্থকতা এই যে সব সময় একটিমাত্র স্বরবর্ণের দ্বারা একটি স্বরধ্বনিকে প্রকাশ করা যায় না, একাধিক বর্ণের প্রয়োজন হয়। যথা দুই, তুই, লাউ, ঝাউ প্রভৃতি শব্দে দুটি করে স্বরবর্ণের যোগে একটিমাত্র স্বরধ্বনিকে প্রকাশ করা হয়েছে। ইংরেজিতেও এরকম হয়, যথা—you, thou। কেউ বলতে পারেন, দুই, তুই প্রভৃতি শব্দে দুটি স্বরবর্ণের যোগে যুগ্মস্বরকে প্রকাশ করাই তো সংগত। আমিও তাতে আপত্তি করিনে যদি সর্বত্রই এ নিয়মটি বহাল থাকত। কিন্তু দেখা যায় বউ, মউ, দই, সই, হইল প্রভৃতি শব্দের যুগ্মস্বরটিকে দুটি বর্ণের পরিবর্তে একটি বর্ণের সাহায্যেও লেখা হয়; যথা—বৌ, মৌ, দৈ, সৈ, হৈল। তাতে ছন্দ-রচনায় কখনও কখনও দ্বৈরাচার হতে পারে। যেমন—

হবে বা দয়াদ্রিচিহ্ন দেব আন্ততঃ

ক্লৃদ্ধ হৈলা ইন্দ্রজায়া শচী কারাবাসে ?

\* \* \*

সে প্রতিজ্ঞা নহে সিদ্ধ হাশে দেবগণ,

আপনি হইলা বন্দী আপন সংশয়ে।

—বৃহৎসংহার, ষোড়শ সর্গ

এখানে দ্বিতীয় পংক্তিতে আছে ‘হৈলা’ এবং চতুর্থ পংক্তিতে আছে ‘হইলা’। একই শব্দের ওজন দুই জায়গায় দুই বকমের হয়েছে। তাতে ছন্দের কোনো ক্ষতি হয়েছে, এ কথা বলা আমার উদ্দেশ্য নয়। কিন্তু হেমচন্দ্রের পরবর্তী কবিরা কখনও ‘হৈল’ লেখেন বলে মনে হয় না। আমার মনে হয় রবীন্দ্রনাথ এবং



তার অমূল্য কবিতা স্বতঃই কানের ওজনের উপর নির্ভর করে উদ্ভূত দৃষ্টান্তের দ্বিতীয় পংক্তিতে ‘হল’ এবং চতুর্থ পংক্তিতে ‘হলেন’ লিখবেন এবং তাতে ছন্দের ঐতিম্যার্থ না কমে বরং বাড়বে বলেই আমার বিশ্বাস। প্রাকৃত বাংলার প্রতি অতিরিক্ত অমূল্যবশতঃই এ কথা বলছি; ছন্দ যদি মধুর হয় তবে প্রাকৃত বা সংস্কৃত কোনো বাংলাতেই আমার আপত্তি নেই। আমি আমার কানের মাদুর্য-বুদ্ধি থেকেই এ প্রশ্ন তুলছি।

‘আপনি হইলা বন্দী আপন সংশয়ে’ এবং

‘আপনি হলেন বন্দী আপন সংশয়ে’—

এ দুটি লাইনের মধ্যে দ্বিতীয়টিই আমার কানে ভাল শোনায়। কিন্তু কেন বেশি ভাল শোনায়, এই হচ্ছে আমার জিজ্ঞাসা। এ বিষয়ে রবীন্দ্রনাথ ও অন্যান্য কবিদের কাছে আমার এই জিজ্ঞাসারই উত্তর প্রত্যাশা করছি। অগ্রহায়ণের প্রবন্ধে আমি এ-ই জিজ্ঞাসার পথেই অগ্রসর হয়েছিলুম এবং নিজেই তার একটি সমাধান করে সে বিষয়ে কবি ও ধ্বনিতাত্ত্বিকদের মতামতের প্রতীক্ষা করেছিলুম।

যুগ্মধ্বনির আলোচনায় ফিরে আসা যাক। আমরা দেখেছি ঐ আর ঔ, এ দুটি যুগ্মধ্বনিকে কোনো কোনো স্থলে দুইকমে লেখা যায়—কখনও একটি বর্ণের সাহায্যে আর কখনও দুইটি বর্ণের সাহায্যে। অর্থাৎ ঔ = অউ, যথা—বৌ, বউ; ঐ = অই বা ওই, যথা—থৈ, থই। এই দুটি ব্যতিক্রম ছাড়া আর সর্বত্রই যুগ্মধ্বনি দুটি স্বরবর্ণের সাহায্যেই লিপিবদ্ধ হয়। যথা—লাউ, ঝাউ, দাও, দুই, ইত্যাদি। কিন্তু দুটি স্বরবর্ণ একত্র লিপিবদ্ধ হলেই যুগ্মধ্বনি হয় না। ‘নাও’ যুগ্ম বটে; কিন্তু দিও, করিও ইত্যাদি যুগ্ম নয়, বিযুক্ত। কারণ দাও = দাও; আর দিও, করিও = দিয়ো, করিয়ো।

ঐ এবং ঔ ছাড়া আর সমস্ত যুগ্মধ্বনি প্রকাশ করতেই দুটি অক্ষরের প্রয়োজন হয়। আর অযুগ্মধ্বনিকে লিপিবদ্ধ করতে স্বভাবতঃই একটি অক্ষরের প্রয়োজন হয়। কিন্তু এ নিয়মটিরও ব্যতিক্রম বাংলায় আছে। অর্থাৎ দুটি অক্ষরের সাহায্যে একটি অযুগ্মধ্বনিকে প্রকাশ করতে হয় এমন দৃষ্টান্তও বাংলায় পাওয়া যায়। যথা—

শালবনের ঐ আঁচল ব্যোপে

যেদিন হাওয়া উঠত কৈপে। (স্বরবৃত্ত)

—মাটির ডাক, পূর্ববী, রবীন্দ্রনাথ

চৈত্র-হাওয়ায় উতলা কুণ্ড মাঝে

চারু চরণের ছায়া-মঞ্জীর বাজে । ( মাত্রাবৃত্ত )

—লীলাঙ্গিনী, ঐ

নীড়ে-ধাওয়া পাখির ডানায়—

সায়ান্দ-গগন যেথা দিবসেরে বিদায় জানায় । ( অক্ষরবৃত্ত )

—স্বক্তি, ২

দৃষ্টান্ত-তিনটি তিনটি স্বতন্ত্র ছন্দ থেকে আহরণ করেছি। হাওয়া, ধাওয়া প্রভৃতি শব্দের 'ওয়া' অংশটিতে প্রত্যক্ষতঃ দুটি করে স্বতন্ত্র ধ্বনি রয়েছে। কিন্তু লক্ষ করার বিষয় উদ্ধৃত দৃষ্টান্তের তিনটি ছন্দেই হাওয়া প্রভৃতি শব্দের ওয়া-কে এক বলে ধরা হয়েছে, দুই বলে ধরা হয় নি। অথচ ছন্দ যে সর্বত্রই নিখুঁত আছে সে কথা বলাই বাহুল্য। সুতরাং প্রশ্ন হতে পারে প্রত্যক্ষতঃ যা দুই, ছন্দে তা এক হল কিরূপে? এর উত্তর হচ্ছে যে চোখের কাছে যা প্রত্যক্ষ তা নিয়ে ছন্দ কারবার করে না, কানের কাছে যা প্রত্যক্ষ তা নিয়েই ছন্দের কারবার। আর ওয়া কথাটা চোখের কাছে দুই হলেও কানের কাছে একই। কারণ উক্ত শব্দগুলিতে ওয়া কথাটার আসল রূপ হচ্ছে ওঁআ অর্থাৎ ও। অন্য কথায়, অন্তঃস্থ ব-য়ে আকার দিলে যে ধ্বনি হয়, হাওয়া প্রভৃতি শব্দের ওয়া কথার ধ্বনি অবিকল তাই। ইংরেজি wa এবং বাংলা ওয়া কথার ধ্বনি অভিন্ন। সুতরাং দুটি অক্ষরের যোগে লেখা হলেও ওয়া কথাটিতে ধ্বনি আছে একটিই এবং সে জগ্রেই ছন্দে ওয়া-কে এক বলেই গণ্য করা হয়। আর ওয়া বা wa ধ্বনিটি যে অযুগ্ম তা বলাই নিশ্চয়োজন, কারণ এই ধ্বনিটির পরে কোনো আশ্রিত ধ্বনির অস্তিত্ব নেই। সুতরাং দেখা যাচ্ছে এ স্থলে বাংলায় একটি অযুগ্মধ্বনি প্রকাশের জন্য দুটি স্বরবর্ণের ব্যবহার হয়েছে। এরকম অভূত কাণ্ড হতে পেরেছে, কারণ বাংলা বর্ণমালা থেকে অন্তঃস্থ ব-য়ের উচ্চারণ বিলুপ্ত হয়ে গেছে অথচ বাংলা ভাষা থেকে তা লুপ্ত হয় নি। এটাকে বাংলা বর্ণমালা ও লিপিপদ্ধতির একটা অসম্পূর্ণতা বা ত্রুটি বলে মনে করি। যা হক, আর একটু লক্ষ করা দরকার যে হাওয়া প্রভৃতি শব্দের শ্বেবাংশস্থিত ওয়া-ই একটি অযুগ্মধ্বনির সমান। কিন্তু ওয়াক্ষর, ওয়ারিশ প্রভৃতি শব্দের পূর্বাংশস্থিত ওয়া-কে দুটি অযুগ্মধ্বনি বলে গণ্য করাই বাংলা ধ্বনিবিচারের রীতি।

একটি অযুগ্মধ্বনিকে দুটি স্বতন্ত্র বর্ণের দ্বারা প্রকাশ করার আর-এক প্রকার দৃষ্টান্ত দেখাচ্ছি। যথা—

কেউ যে কারে | চিনি নাক | সেটা মন্ত | বাচন্ ।

তা না হলে | নাচিয়ে দিত | বিষম তুর্কি- | নাচন্ ।

—অচেনা, কণিকা, রবীন্দ্রনাথ

এটা স্বরবৃত্ত ছন্দের দৃষ্টান্ত। এর প্রতি পর্বে চারটি করে সিলেব্‌ বা স্বরধ্বনি আছে, অস্তিম পর্বে দুটি করে। সুতরাং এটিকে চতুঃস্বর-পর্বিক ছন্দ বলতে পারি। লক্ষ করার বিষয়, এর সব পর্বেই চারটি স্বরধ্বনি স্পষ্ট বুঝতে পারা যাচ্ছে; কেবল দ্বিতীয় পংক্তির দ্বিতীয় পর্বে আপাতত দেখতে পাঁচটি সিলেব্‌ দেখা গেলেও শুনতে কিন্তু চার সিলেব্‌-এর মতোই শোনাচ্ছে। অর্থাৎ এই পর্বটিকে পাঁচটি স্বতন্ত্র স্বরবর্ণের যোগে লেখা হলেও আসলে এতে চারটির বেশি স্বরধ্বনি নেই। তার কারণ 'নাচিয়ে' কথাটির 'ইয়ে' অংশটি প্রকৃতপক্ষে দুটি স্বতন্ত্র বর্ণের দ্বারা প্রকাশিত একটি স্বরধ্বনি বা সিলেব্‌ মাত্র। কেননা, এখানে 'ইয়ে' কথাটার আসল রূপ হচ্ছে ই.এ অর্থাৎ সংস্কৃত বর্ণমালার অন্তঃস্থ য-য়ে এ-কার দিলে যে ধ্বনি হয় এখানে 'ইয়ে' কথাটার ধ্বনি অবিকল তাই। ইংরেজি ye এবং নাচিয়ে-র 'ইয়ে' অংশটি উচ্চারণ হিসেবে একই। সুতরাং এ-স্থলে নাচিয়ে শব্দটির উচ্চারণগত প্রকৃত রূপ হচ্ছে নাচ.য়ে অথবা নাচ.ye। সুতরাং দুটি অক্ষরের যোগে লেখা হলেও এখানে 'ইয়ে' কথাটিতে ধ্বনি আছে একটিমাত্র এবং স্বেচ্ছাই ছন্দে এটি এক বলেই গণ্য হয়েছে। আর যে বা ye ধ্বনিটি যে অযুগ্ম তা বলাই বাহুল্য, কেননা এই ধ্বনিটির পরে কোনো আশ্রিত ধ্বনি বর্তমান নেই। সুতরাং দেখা গেল এখানেও একটি অযুগ্মধ্বনি প্রকাশের জন্য দুটি স্বতন্ত্র বর্ণের প্রয়োগ হয়েছে।

এ স্থলে বলে রাখা দরকার যে বাংলা ছন্দে সর্বত্রই 'ইয়ে' একটিমাত্র অযুগ্মধ্বনি রূপে গৃহীত হয় না। অক্ষরবৃত্ত এবং মাত্রাবৃত্ত ছন্দে 'ইয়ে' কথাটি সর্বদাই দুটি অযুগ্মধ্বনি (ই আর য়ে) বলে গণ্য হয়, এবং ওই দুই ছন্দে ওরকম হওয়াই সংগত। শুধু স্বরবৃত্ত ছন্দেই স্থলবিশেষে 'ইয়ে' এক ধ্বনি হিসেবে গৃহীত হয়; আবার স্বরবৃত্ত ছন্দেও অন্ত্র স্থলে 'ইয়ে' দুটি পৃথক ধ্বনি বলে ব্যবহৃত হতে পারে। কিন্তু 'ইয়ে'-র এই ছয়কম বিপরীত ব্যবহার একটি নিয়ম-বহির্ভূত ব্যাপার নয়, এরকম ব্যবহারেরও একটি নিয়ম আছে। সে নিয়মটি হচ্ছে এই যে, যেখানে দ্রুত

উচ্চারণের প্রয়োজন হয় সেখানে ই এবং ঐ ধ্বনিদ্বিটি সংহত বা সংলিষ্ট হয়ে একটি ধ্বনিতে পরিণত হয়। আবার যেখানে দ্রুত উচ্চারণের প্রয়োজন নেই সেখানে এরা দুটি স্বতন্ত্র ও বিলিষ্ট ধ্বনি বলেই শ্রোয় হয়। সংস্কৃত ভাষায়ও এর অসংখ্য দৃষ্টান্ত আছে। যথা—‘বরেণ্যম্’ কথাটি স্থানবিশেষে ‘বরেণ্‌ইয়ম্’ রূপেও উচ্চারিত হয়। যদি তা না হত তবে গায়ত্রী ছন্দও ঠিক থাকত না। যা হক ইয়ে-র উচ্চারণ কোথায় দ্রুত হবে, কোথায় হবে না তারও একটা নির্দিষ্ট নিয়ম আছে। তাও দেখানো দরকার। প্রথমতঃ প্রতি ছন্দ-পর্বের পরেই একটুখানি ষতি বা বিরাম থাকে বলে ছন্দ-পর্বের শেষ প্রান্তস্থিত ইয়ে কথাটি দ্রুত উচ্চারিত হয় না, স্বতরাং একটি ধ্বনি বলে গণ্য হবার প্রয়োজনও হয় না। যথা—

ত্রিভুবনের | গোপন কথা- | থানি

কে জাগিয়ে | তুলবে তাহার | মনে

আমি যদি | আমার মুক্তি | নিয়ে

যুক্তি করি | আপন গৃহ- | কোণে ?

—কবির বয়স, শগুনিকা, রবীন্দ্রনাথ

মাধার দিব্য | উঠো না কেউ | আগ্‌ বাড়িয়ে | দিতে আমায়,

চল্‌চে যেমন | চলুক তেমন | হঠাৎ যেন | গান না থামায়।

—বিদায়, ঐ

এখানে জাগিয়ে এবং বাড়িয়ে কথা দুটি ছন্দ-পর্বের শেষ দিকে আছে এবং তার পরেই ষতি ; স্বতরাং দ্রুত উচ্চারণের প্রয়োজন নেই। তাই ও-দুটি কথায় ইয়ে দুটি স্বতন্ত্র অক্ষরধ্বনি বলেই গৃহীত হয়েছে। যদি ছন্দ-পর্বের শেষ প্রান্তস্থিত ইয়ে-কে দ্রুত উচ্চারণ করে একটি সিলেবল্‌ ধরা যায় তবে স্বভাবতঃই উচ্চারণটা অস্বাভাবিক আর ছন্দটাও বিকৃত হয়ে যায়। ‘তা না হলে নাচিয়ে দিত বিষম তুর্কি-নাচন’, এ পংক্তিটির দ্বিতীয় পর্বটিকে যদি ‘দিত নাচিয়ে’ করা যায় তা হলেই আমার এ কথার সার্থকতা বোঝা যাবে। ইয়ে-র বিযুক্ত ব্যবহারের দ্বিতীয় নিয়মটি হচ্ছে এই ;—দিয়ে, নিয়ে প্রভৃতি যে-সব শব্দ দুটিমাঝ অক্ষরের যোগে লেখা হয়, সে-সব শব্দের ইয়ে সব সময়ই বিযুক্ত থাকে, কারণ এসব স্থলে ইয়ে-র দ্রুত উচ্চারণের প্রয়োজন হয় না। উক্ত প্রথম দৃষ্টান্তের ‘নিয়ে’ কথাটিই তার প্রমাণ। আরও দৃষ্টান্ত দিচ্ছি—

যাহার লাগি | চক্ষু বুজে | বহিয়ে দিলাম | অশ্রুসাগর  
তাহারে বাদ | দিয়েও দেখি | বিশ্বভূবন | মস্ত ডাগর।

—বোকাপড়া, ঐ

মন নিয়ে কেউ | বাঁচে নাক, | মন বলে যা | পায় রে  
কোনো জন্মে | মন সেটা নয় | জানে না কেউ | হায় রে !

—অচেনা, ঐ

এখানে দিয়ে এবং নিয়ে শব্দেও দুটি করে সিলেবল, আর বহিয়ে শব্দটিতেও দুটি সিলেবল। কিন্তু লক্ষ করার বিষয় বহিয়ে শব্দে ইয়ে এক সিলেবল হওয়াতে পূর্ববর্তী ব-টি প্রত্যক্ষতঃ অযুগ্ম হলেও এ স্থলে আশ্রিত হ্ বর্ণটির ষোগে যুগ্মতা লাভ করল। কারণ এখানে বহিয়ে কথাটির আসল রূপ হচ্ছে বহ্যে, তাই বহিয়ে শব্দের ইয়ে-কে অযুগ্ম এবং বহ্-কে যুগ্ম বলে গণনা করতে হবে। কিন্তু ‘দেয় বহিয়ে’ লেখা হলে বহিয়ে কথাটিকে তিনটি স্বতন্ত্র অযুগ্মধ্বনি বলে গ্রহণ করতে হবে।

অযুগ্ম ও যুগ্ম ধ্বনির বিস্তৃত আলোচনা করতে হল ; কারণ আমি সমস্ত বাংলা ছন্দকেই এ দুটি পারিভাষিক শব্দের সাহায্যেই আলোচনা করেছি। সুতরাং এ দুটি সংজ্ঞা-শব্দ সম্বন্ধে স্পষ্ট ধারণা না হলে আমার সমস্ত আলোচনাই অস্পষ্ট বোধ হবে।

২। মাত্রা—সংস্কৃত ছন্দশাস্ত্রে মাত্রা কথাটি যে অর্থে ব্যবহৃত হয় আমি এ শব্দটিকে ঠিক সেই অর্থেই ব্যবহার করেছি। একটি হ্রস্বস্বরের উচ্চারণে যে সময় লাগে ও-শাস্ত্রে তাকেই এক মাত্রা বলে—একমাত্রো ভবেৎ হ্রস্বঃ (অন্তবোধ)। এ কথা সকলেরই জানা আছে যে দীর্ঘস্বরের উচ্চারণে হ্রস্বস্বরের দ্বিগুণ সময় লাগে। তাই দীর্ঘস্বরকে স্বভাবতঃই দ্বিমাত্রিক বলা হয়—দ্বিমাত্রো দীর্ঘ উচ্যতে (ঐ)। সংস্কৃত ছন্দশাস্ত্রে মাত্রা শব্দের প্রতিশব্দ হিসাবে ‘কলা’ কথাটিও ব্যবহৃত হয়। ‘মাত্রা’কে ইংরেজিতে বলা যায় metrical moment আর ‘কলা’কে বলতে পারি metrical digit।

সংস্কৃত ছন্দশাস্ত্রে সমস্ত ধ্বনিকেই লঘু এবং গুরু, এই দুই শ্রেণীতে বিভক্ত করা হয়েছে। হ্রস্বস্বর এবং হ্রস্বস্বরাস্ত সমস্ত (অযুক্ত বা যুক্ত) ব্যঞ্জন ধ্বনিকেই লঘু বলে গণ্য করা হয়। আর দীর্ঘস্বর এবং দীর্ঘস্বরাস্ত ব্যঞ্জন ধ্বনিকে গুরু বলে গ্রহণ করা হয় ; তা ছাড়া, সংযুক্তাক্ষর, অল্পস্বর এবং বিসর্গের

পূর্ববর্তী ব্রহ্ম ধনিকেও গুরু বলা হয়। এ বিষয়ে অগ্রজ্ঞে বিস্তৃত আলোচনা করেছি; হস্তরাং এ স্থলে পুনরুক্তি অনাবশ্যক। সংস্কৃত ছন্দের আলোচনায় লঘু ধনিকে এক মাত্রা এবং গুরু ধনিকে দুই মাত্রা ধরা হয়। যথা—ছন্দ শব্দের দ-য়ের অ-কারকে লঘু অর্থাৎ একমাত্রিক অথচ ছ-য়ের অ-কারকে গুরু এবং কাজেই ষিমাত্রিক ধরা হয়; কেননা ছ-য়ের পরেই ন্দ এই যুক্তবর্ণটি আছে। অতএব ছন্দ শব্দে সবস্থল তিন মাত্রা।

পূর্বেই বলেছি বাংলা ছন্দের আলোচনায় আমি সমস্ত ধনিকেই অযুগ্ম ও যুগ্ম, এই দুই শ্রেণীতে বিভক্ত করেছি। সংস্কৃত ব্যাকরণে যে-সব ধনিকে দীর্ঘ বলা হয়েছে বাংলায় সে-সব ধনি দীর্ঘতা হারিয়ে ব্রহ্ম লাভ করেছে। বাংলা ‘ধনী’ শব্দের ঙ্গে-কারের দীর্ঘ উচ্চারণ হয় না। অথচ বাংলায়ও এক স্বতন্ত্র রকমের দীর্ঘস্বরের ব্যবহার চলে; কিন্তু বাংলা ছন্দের ক্ষেত্রে সে দীর্ঘতার মূল্য প্রায় নেই বললেই হয়; কারণ বাংলা ছন্দ ধনির ব্রহ্ম-দীর্ঘতার উপর নির্ভর করে না। তথাপি কদাচিৎ দুই-এক জায়গায় বাংলায়ও দীর্ঘতার খুব হ্রস্ব প্রয়োগ হতে পারে। একটা দৃষ্টান্ত দিচ্ছি।—

‘চলি চলি | পা পা’ | টলি টলি | যায়,

গরবিনী | হেসে হেসে | আড়ে আড়ে | চায়।

—হাসিরাশি, কড়ি ও কোমল, রবীন্দ্রনাথ

পা কথাটি যদিও বাংলায় প্রায় সর্বত্রই লঘু, তথাপি এ স্থলে দুটি পা শব্দেরই দীর্ঘ অর্থাৎ ষিমাত্রিক উচ্চারণ হয়েছে। কিন্তু এ রকম প্রয়োগ বাংলা ছন্দে খুব কমই পাওয়া যায়। এ বিষয়ে ভবিষ্যতে আরও আলোচনা করা যাবে।

একটু পূর্বেই আমি বলেছি, বাংলা ছন্দ ধনির ব্রহ্মদীর্ঘতার উপর নির্ভর করে না। সাধারণভাবে দেখতে গেলে এ উক্তিটি অত্যন্ত ভ্রান্ত বলেই মনে হবে এবং মনে হওয়া অসংগতও নয়। কিন্তু আমি ব্রহ্ম দীর্ঘ কথাটুকু অত্যন্ত সংকীর্ণ বৈজ্ঞানিক অর্থে ব্যবহার করেছি, সাধারণ অর্থে ব্যবহার করি নি। নতুবা দীর্ঘ ও গুরু, এ দুটি পারিভাষিক সংজ্ঞার মধ্যে বিরোধ ঘটবার সম্ভাবনা আছে। ছন্দ শব্দের ছ-য়ের অ সংস্কৃত ছন্দশাস্ত্র অনুসারে গুরু, দীর্ঘ নয়। সংস্কৃত ছন্দের পরিভাষায় লঘু-গুরু এ সংজ্ঞা দুটিরই প্রয়োগ আছে, ব্রহ্ম-দীর্ঘ শব্দের ব্যবহার নেই। আমিও সর্বত্রই ব্রহ্ম-দীর্ঘ শব্দটুকু ব্যাকরণের প্রচলিত অর্থেই ব্যবহার করেছি, ছন্দ-পরিভাষায় লঘু-গুরু অর্থে ব্যবহার করি নি। যেমন, জল শব্দের অ

এবং চাঁদ শব্দের আ-কে আমি গুরু বলব, দীর্ঘ বলব না। সংস্কৃত ছন্দশাস্ত্রকাররাও তা-ই করতেন।

সংস্কৃত শাস্ত্রের লঘু-গুরুতার বিধানও বাংলা ছন্দের আলোচনায় পুরোপুরি খাটে না। কারণ সংস্কৃত ভাষায় ঐ (অই্) এবং ঔ (অউ্) ছাড়া যুগ্মস্বরের অস্তিত্ব নেই; অথচ বাংলায় অও, আও, ইউ, উই, এই, এউ, এও, ওই প্রভৃতি বহু যুগ্মস্বরের প্রয়োগ আছে। আবার সংস্কৃত ভাষায় দীর্ঘস্বরের বহুল প্রয়োগ আছে; অথচ বাংলায় অন্ততঃ ছন্দের তরফ থেকে দীর্ঘস্বরের (ব্যাকরণের অর্থে) ব্যবহার প্রায় নেই বললেই হয়। যা হক, এ কথা বললেই যথেষ্ট হবে যে, আমি অযুগ্মধ্বনিকেই লঘু অর্থাৎ একমাত্রিক আর যুগ্মধ্বনিকেই গুরু এবং কাজেই দ্বিমাত্রিক বলে গ্রহণ করেছি। যথা জল শব্দটার আ-কে দীর্ঘ বলব না, গুরুও বলব না; আমি সমস্ত ‘জল’ শব্দটাকেই একটি যুগ্ম অতএব গুরুধ্বনি বলব। কাজেই জল শব্দে দুই মাত্রাই ধরব। তেমনি, রাম শব্দটিও যুগ্ম অতএব দ্বিমাত্রিক। আবার পাতা এবং কানী, এ দুটি শব্দে দুটি করে অযুগ্ম বা লঘু ধ্বনি আছে; হুতরাং এ দুটি শব্দও দ্বিমাত্রিক। ছন্দ বা ছন্দ শব্দে একটি যুগ্ম (ছন্) এবং একটি অযুগ্ম ধ্বনি আছে; হুতরাং এ শব্দে মাত্রা আছে তিনটি।

৩। অক্ষর—সিলেব্ল কথাটি ব্যবহার করেছি ঠিক ইংরেজি অর্থে; মাত্রা শব্দটি ব্যবহার করেছি সংস্কৃত ছন্দশাস্ত্রের প্রচলিত অর্থে। তেমনি অক্ষর শব্দটিকে আমি বাংলা ভাষার প্রচলিত অর্থে ব্যবহার করেছি। অর্থাৎ লিপি-বদ্ধ ভাষার প্রত্যেকটি হরফকেই আমি এক-একটি অক্ষর নামে অভিহিত করেছি।

অক্ষর শব্দটি ব্যবহার করতে খুব সতর্ক হওয়া প্রয়োজন। কারণ স্থলবিশেষে এ শব্দটির তিনটি স্বতন্ত্র অর্থ আছে। প্রথমতঃ ব্যাকরণের অর্থ। যেমন অন্ত্যন্তরস্তাম্। ব্যাকরণের বর্ণ-বিশ্লেষণের নিয়ম অনুসারে এ কথাটিতে চোদ্দটি বর্ণ বা অক্ষর (অর্থাৎ letter) আছে, এ কথা যে-কোনো পাঠশালার ছাত্রও জানে। দ্বিতীয়তঃ সংস্কৃত ছন্দশাস্ত্রের প্রযুক্ত অর্থ। ব্যাকরণের অক্ষর এবং ছন্দশাস্ত্রের অক্ষর এক জিনিস নয়। ছন্দশাস্ত্রের ২ নং যে বর্ণ বা বর্ণসমষ্টি একসঙ্গে উচ্চারিত হয় তাকেই অক্ষর বলা হয়। অর্থাৎ ইংরেজিতে যাকে বলে সিলেব্ল সংস্কৃত ছন্দশাস্ত্রে তাই নাম অক্ষর। যেমন পূর্বোক্ত অন্ত্যন্তরস্তাম্ কথাটিতে ব্যাকরণের মতে চোদ্দটি অক্ষর হলেও সংস্কৃত ছন্দশাস্ত্রমতে এখানে পাঁচটিমাত্র

অক্ষর আছে, কেননা অ-স্ত্য-স্ত-র-স্বাম্ বাগ্মন্ত্রের এই পাঁচটি স্বতন্ত্র প্রয়াস থেকে এই সমগ্র কথাটা উচ্চারিত হচ্ছে। অক্ষর শব্দের তৃতীয় অর্থ বাংলা ভাষার প্রচলিত অর্থ। বাংলায় সাধারণতঃ অক্ষর বলতে এক-একটি লিখিত হরফকেই বোঝায়। দৃষ্টান্ত দিলেই কথাটা স্পষ্ট হবে। যেমন, পুণ্যবান্। এ কথাটিতে ব্যাকরণের মতে অক্ষর বা letter আছে আটটি; সংস্কৃত ছন্দশাস্ত্রের মতে অক্ষর বা syllable আছে তিনটি। কিন্তু বাংলায় প্রচলিত অর্থে এখানে অক্ষর বা হরফ আছে চারটি, কেননা হসন্ত ন্-কেও একটি অক্ষর বলে ধরাই বাংলা রীতি। আর বাংলা ছন্দের অক্ষরও এই তৃতীয় অর্থেই গণনা করা হয়। নতুবা—

কাশীরাম দাস ভণে শুনে পুণ্যবান্

এই পংক্তিটিতে চোদ্দ অক্ষর গণনা করা সম্ভব হত না। আমিও সংস্কৃত ছন্দশাস্ত্রে প্রযুক্ত অর্থ বর্জন করে বাংলায় প্রচলিত অর্থই গ্রহণ করেছি। কেননা রাম, দাস, জল শব্দের ম, স এবং ল-এর হসন্ত উচ্চারণের কথা স্মরণ রেখে যদি সংস্কৃত প্রথা অনুসারে রাম, দাস, জল প্রভৃতি শব্দকে এক-একটি ‘অক্ষর’ ( অর্থাৎ সিলেব্ ) ধরি তবে কাশীরাম বা তাঁর স্বজাতীয় কেউ আমার উপর প্রশংসা হবেন না। হুতরাং রাম কথাটিতে সংস্কৃত প্রথায় একটি অক্ষর না ধরে বাংলা প্রথায় দুটি অক্ষর ধরাই সমীচীন মনে করেছি। আর এইজন্যই উদ্ধৃত পংক্তিটিতে চোদ্দটি ‘অক্ষর’ ধরতে আমার কিছুমাত্র আপত্তি নেই। এভাবে বাংলা প্রথায় হরফকে অক্ষর ধরে ছন্দ রচনা করলেও ছন্দ প্রায়ই অক্ষুণ্ণ থাকে। কিন্তু তাতে ছন্দশাস্ত্রকারের মুশকিল হয়; একটু পরেই তা দেখাতে চেষ্টা করব।

২

বাংলা ছন্দের ত্রিধারা

ধ্বনি ( বা স্বর ), মাত্রা ও অক্ষর, আমার ব্যবহৃত এই তিনটি সংজ্ঞা-শব্দের পারিভাষিক পরিচয় দেওয়া গেল। এখন একটি দৃষ্টান্তের দ্বারা এদের প্রয়োগ-প্রণালীটা দেখা যাক। বাংলা ‘চন্দন’ শব্দটা নিয়ে বিচার করা যাক। বলা বাহুল্য এ শব্দটির অন্তিম ন্-টি বাংলায় হসন্ত ন্-এর মতো উচ্চারিত হয়। ধ্বনি বা স্বর হিসেবে এখানে দুটিমাত্র ধ্বনি আছে—বধা চন্ এবং দন্; দুটিই যুক্তধ্বনি। মাত্রা হিসেবে এ শব্দটিতে মাত্রা আছে চারটি, কেননা প্রত্যেকটি



সুখধ্বনিতেই ছুটি করে মাত্রা রয়েছে। আর অক্ষর হিসেবে ‘চন্দন’ শব্দটিতে অক্ষর রয়েছে তিনটি; হসস্তোচারিত ন-টিও একটি অক্ষর বলে গণ্য হবে। তেমনি পুণ্যবান্ শব্দে ধ্বনি বা স্বর আছে তিনটি, মাত্রা পাঁচটি এবং অক্ষর চারটি।

ধ্বনির এই তিনটি প্রয়োগ-প্রণালীর উপরেই আমি বাংলা ছন্দের তিনটি শ্রেণীকে প্রতিষ্ঠিত করেছি। রবীন্দ্রনাথ উপমাযোগে একই জিনিসের অবস্থাবিশেষে ‘দ্রুতকম বিপরীত ব্যবহারে’র কথা বলেছেন। আমি এ কথায় সমর্থন করেই বলি যে একই ধ্বনি অবস্থাবিশেষে তিন রকম ভাবে ব্যবহৃত হয়। কবি যখন যে রকম ইচ্ছে সে রকম ব্যবহারই করতে পারেন; কিন্তু কবিদের এ ইচ্ছা কখনও একেবারে স্বৈচ্ছাচার নয়। তাঁদের ইচ্ছাও ঋতি-মাধুর্যের কতগুলি নিয়ম মেনে চলে। সে নিয়ম নির্গম্য করাই আমার উদ্দেশ্য। যা হক, ধ্বনির এই বিভিন্ন ব্যবহারের উপর নির্ভর করেই আমি ছন্দকে তিন শ্রেণীতে বিভক্ত করেছি। ছন্দের এই তিন ধারার খণ্ডবিটাকেই অস্বীকার করলে আমার কোনো বক্তব্যই বোধগম্য হবে না। তাই স্বরবৃত্ত, মাত্রাবৃত্ত ও অক্ষরবৃত্ত এই তিনটি নামেরও পারিভাষিক পরিচয় দেওয়া দরকার।

১। **স্বরবৃত্ত**—স্বর বা ধ্বনির সংখ্যায় উপর ভিত্তি করে যে ছন্দ রচিত হয় তাকেই আমি স্বরবৃত্ত ছন্দ বলেছি। এ ছন্দে মাত্রাপরিমাণ বা অক্ষরসংখ্যা স্থির থাকা আবশ্যিক নয়। পৌষের ‘বিচিত্রা’য় রবীন্দ্রনাথের নবরচিত দৃষ্টান্ত থেকেই দেখাচ্ছি।—

- (১)      |    |    |    |    |    |    |    |    |    |  
 এই, যে এল | সেই, আমারি | স্বপ্নে দেখা | রূপ,  
 কই, দেউলে | দেউটি দিলি, | কই, জালালি | ধূপ্ ।  
 যায়, যদি রে | যাক্ না ফিরে | চাইনে তারে | রাখি  
 সব্, গেলেও | হায় রে তবু | স্বপ্ন রবে | বাকি ।
- (২)      |    |    |    |    |    |    |    |    |    |  
 দুই, জনে জুঁই, | তুলতে যখন | গেলেম্ বনের | ধারে,  
 সন্ধ্যা আলো | মেঘের বালব | ঢাকল অন্ধ- | কারে ।  
 কুঞ্জে গোপন | গন্ধ বাজায় | নিরুদ্দেশে | বাণি,  
 দৌহার নয়ন | খুঁজে বেড়ায় | দৌহার মুখের | হাসি ।

এই ছুটি দৃষ্টান্তই স্বরবৃত্ত ছন্দে রচিত। ছুটি দৃষ্টান্তেই প্রতি পর্বে সিলেবল্, ধ্বনি বা স্বর আছে চারটি করে। স্তত্রাং এটি চতুঃস্বরপর্বক স্বরবৃত্ত ছন্দ।

এখানে এই, সেই, তুই, জুই, যায়, যাক, খন, লেম, নের প্রভৃতি সমস্ত যুগ্মধ্বনিই এক unit বলে গৃহীত হয়েছে। ধ্বনিপরিমাণের বিচারে যুগ্মধ্বনিগুলিকে দুমাত্রা হিসেবে ধরা হয় নি। স্বরবৃত্ত ছন্দের নিয়মই এই। দৃষ্টান্তভূতিতেই আশ্রয়চিহ্নের যোগে যুগ্মধ্বনিগুলিকে নির্দেশ করা হয়েছে। এ ছন্দের পর্বগুলিতে মাত্রাসংখ্যা স্থির থাকে না।

২। **মাত্রাবৃত্ত**—ধ্বনির পরিমাণ বা quantity-র উপর ভিত্তি করে যে ছন্দ রচিত হয় তারই নাম মাত্রাবৃত্ত; কারণ মাত্রাসংখ্যা স্থির রাখাই হচ্ছে ধ্বনিপরিমাণ স্থির রাখার উপায়। রবীন্দ্রনাথের পূর্বোক্ত প্রবন্ধ থেকেই দৃষ্টান্ত দিচ্ছি।—

- | | | |   ||   | |   ||   | |   ||   |
- (১) মনে পড়ে | তুই, জনে | জুই, তুলে | বাল্যে।  
 নিরালায় | বনছায় | গৈঁথেছিহু | মাল্যে।  
 দৌহার ত- | রূপ্ প্রাণ্ | বেঁধে দিল | গন্ধে  
 আলোয়্ আ- | ধারে মেশা | নিভৃত আ- | নন্দে।
- (২) কাঁধে মই, | বলে, “কই, | ভুঁই, চাপা | গাছ।”  
 দই-ভাঁড়ে | ছিপ্ ছাড়ে, | খোঁজে কই | মাছ।  
 ঘুঁটে ছাই | মেখে লাউ- | রাঁধে ঝাউ- | পাতা,  
 কী খেতাব্ | দেব তারে | ঘুরে যায় | মাথা।
- (৩) সখাসনে | উৎসবে | বৎসর | যায়  
 শেষে মরি | বিরহের | ক্ষুৎপিপা- | সায়।  
 কাগুনের | দিন্ শেষে | মউ, মাছি | ও যে  
 মধুহীন | বনে বৃথা | মাধবীরে | খোঁজে।

এ তিনটি দৃষ্টান্তই মাত্রাবৃত্ত ছন্দে রচিত। আর তিনটি দৃষ্টান্তেরই প্রতিপর্বে চার মাত্রা করে আছে। স্বতরাং এগুলিকে চতুর্মাত্রিক মাত্রাবৃত্ত ছন্দের দৃষ্টান্ত বলব। এখানে তুই, জুই, বৎ, উৎ, প্রাণ্, দিন্ প্রভৃতি যুগ্মধ্বনিগুলি দ্বিমাত্রিক বলেই গণ্য হয়েছে; এক-একটি syllabic unit বলে গণ্য হয় নি। এইটেই মাত্রাবৃত্ত ছন্দের নিয়ম।

৩। **অক্ষরবৃত্ত**—যে ছন্দে সাধারণতঃ প্রতিপর্বের (বাংলায় প্রচলিত অর্থে) ‘অক্ষর’ের সংখ্যা স্থির রেখে রচিত হয় তাকেই অক্ষরবৃত্ত বলেছি। এ

ছন্দে ধ্বনির অর্থাৎ সিলেব্‌ল্-এর সংখ্যাও স্থির থাকে না, ধ্বনির মাত্রাপরিমাণ বা quantityও স্থির থাকে না। স্থির থাকে অক্ষরের সংখ্যা। যথা—

সাত্‌ কোটি | সন্তানেরে, | হে মুগ্ধ জন- | ননী,

রেখেছ বা- | ডালি ক'রে | মাহুষ্-ক- | রনি।

—বঙ্গমাতা, চৈতালি, রবীন্দ্রনাথ

এখানে পর্বগুলিতে ধ্বনি বা সিলেব্‌ল্-এর সংখ্যা স্থির নেই; কেননা প্রথম পংক্তির প্রথম পর্ব এবং দ্বিতীয় পংক্তির তৃতীয় পর্বে তিনটি করে সিলেব্‌ল্ আছে কিন্তু অন্ত্র আছে চারটি করে। প্রতিপর্বের মাত্রাসংখ্যাও স্থির নেই; কেননা প্রথম পংক্তির দ্বিতীয় এবং তৃতীয় পর্বে মাত্রা আছে পাঁচটি করে, কিন্তু অন্ত্র আছে চারটি করে। সুতরাং এ ছন্দকে স্বরবৃত্তও বলা যায় না, মাত্রাবৃত্তও বলা যায় না। কিন্তু প্রতিপর্বের ‘অক্ষর’সংখ্যা স্থির আছে; কেননা সবগুলি পর্বে চারটি করে অক্ষর আছে। সুতরাং এ ছন্দকে চতুরক্ষরপবিক অক্ষরবৃত্ত বলাব।

কিন্তু বাংলায় প্রচলিত অর্থের অক্ষর বা হরফ ঠিক থাকলেই ধ্বনিও স্থির থাকবে এমন নিশ্চয়তা নেই। সুতরাং শুধু অক্ষর সাজিয়ে ছন্দ রচনা করা অর্থাৎ ধ্বনিসাম্য বজায় রাখা সম্ভব নয়। রবীন্দ্রনাথ বলেছেন, ‘কেবল অক্ষর সাজিয়ে অচল রীতিকে ছন্দে চালানো যদি সম্ভব হত তা হলে থোকাবাবুকে কেবল লম্বা টুপি পরিয়ে দাদামশায় বলে চালানো অসাধ্য হত না’; কেননা, ‘অক্ষরের আড়ালে ধ্বনি চুরি করা’ কখনও সম্ভব নয়। তাঁর এই উক্তির সঙ্গে আমি সম্পূর্ণ একমত এবং এই কথাটাই ছিল আমার অগ্রহায়ণের প্রবন্ধের প্রধানতম বক্তব্য।

সুতরাং ‘সাত কোটি সন্তানেরে হে মুগ্ধ জননী,’ প্রভৃতি অক্ষরবৃত্ত ছন্দে অক্ষরসংখ্যার সমতা আছে, শুধু এ কথা বললেই শেষ কথা বলা হল না। অক্ষরবৃত্ত ছন্দের ধ্বনিসাম্য রক্ষার নিয়মটি কি, সেটুকু না জানা পর্যন্ত এ ছন্দের মূল তত্ত্ব জানা হবে না। আমার মতে সে নিয়মটি হচ্ছে এই—অক্ষরবৃত্ত ছন্দে একব্র (monosyllabic) শব্দের যুগ্মধ্বনি এবং বহুব্র শব্দের শেষ প্রান্তস্থিত যুগ্মধ্বনি দ্বিমাত্রিক বা দুই unit, আর শব্দের প্রান্তবর্তী যুগ্মধ্বনি এক unit বলে গণ্য হয়; অযুগ্মধ্বনি সর্বত্রই এক unit। যথা—

| + |                      | + |

‘চম্পক-অঙ্গুলি-ঘাতে সংগীত্‌ ঝংকারে’

প্রথমেই বলে রাখছি, আমি এ দৃষ্টান্তটিকে অক্ষরবৃত্ত ছন্দের অতি সুন্দর ও নিখুঁত নিদর্শন বলে মনে করি। এ পংক্তিটির দোষ দেখানো কখনও আমার উদ্দেশ্য নয়; আমার উদ্দেশ্য এ পংক্তিটিতে ধ্বনিসংগতি কি ভাবে রক্ষিত হয়েছে তাই দেখানো। এখানে চোদ্দটি অক্ষর আছে এবং আটের পর ষতি রয়েছে, আমার মতে শুধু এ কথা বলাই যথেষ্ট নয়। কেননা, শুধু হরফের সংখ্যা ঠিক থাকলেই ধ্বনিসংগতিও থাকবে এমন কোনো নিশ্চয়তা নেই। কিন্তু তবু উদ্ভূত পংক্তিটিতে ধ্বনিসমতাও রক্ষিত হয়েছে সে বিষয়ে কোনো সন্দেহ নেই। কি ভাবে সে সমতা রক্ষিত হয়েছে তাই দেখানো আমার উদ্দেশ্য। এখন তাই দেখাচ্ছি।—

উপরের পংক্তিটিতে যুগ্মধ্বনি আছে ছয়টি। তার মধ্যে যোগ-চিহ্নিত দুটি (প্‌ক্‌ এবং গীত্‌) আছে শব্দের শেষ প্রান্তে; এ যুগ্মধ্বনিদ্বটিকে কিছু টেনে পড়তে হয়, কাজেই এ দুটি যুগ্মধ্বনি দ্বিমাত্রিক অর্থাৎ এদের প্রত্যেকের মধ্যেই দুটি করে unit। আর দণ্ড-চিহ্নিত চারটি যুগ্মধ্বনি (চন্‌, অঙ্‌, সঙ্‌, ঝঙ্‌) আছে শব্দের মধ্যে; এ চারটিকে টেনে পড়তে হয় না; স্ততরাং এগুলিকে একটিমাত্র unit বলেই ধরতে হবে। অযুগ্মধ্বনিগুলি সর্বত্রই এক-এক unit।

+ | + | |

উদয়-দিগন্তে ঐ শুভ্র শব্দ বাজে

এ পংক্তিতে যোগ-চিহ্নিত যুগ্মধ্বনিদ্বটি দ্বিমাত্রিক, কেননা অয় শব্দের প্রান্তে অবস্থিত এবং ‘ঐ’ monosyllabic বা একস্বর; এগুলিকে টেনে উচ্চারণ করতে হয়। আবার দণ্ড-চিহ্নিত যুগ্মধ্বনিগুলি (গন্‌, শুভ্‌, শঙ্‌) শব্দের মধ্যে অবস্থিত, আর এদের উচ্চারণও টেনে করতে হয় না, স্ততরাং এরা এক-এক unit বলেই গণ্য হয়েছে। আমার বিবেচনায় এই হচ্ছে অক্ষরবৃত্ত ছন্দের ধ্বনিরূপ নির্ণয়ের নিয়ম এবং এ নিয়ম সকল প্রকার অক্ষরবৃত্ত ছন্দের পক্ষেই সত্য বলে আমি মনে করি। অক্ষরবৃত্ত ছন্দে যেখানে যেখানে এ নিয়মের ব্যতিক্রম হয় সেখানেই ধ্বনিসংগতিতে ত্রুটি ঘটে বলে আমার বিশ্বাস। যা হক, আমার কবিতা নিয়ম অনুসারে অক্ষরবৃত্ত ছন্দের ধ্বনি-নির্ণয় করার প্রণালী হচ্ছে এইরূপ।—

| || | | | | | || | | |

চম্পক-অম্বুজি-বাত্তে || সংগীত্‌ ঝংকারে

| || | | | || | | | | |

উদয়-দিগন্তে ঐ || শুভ্র শব্দ বাজে

যেখানে ধ্বনির unit এক সেখানে একটা দণ্ড-চিহ্ন এবং যেখানে ধ্বনির unit দুই সেখানে যুগ্মদণ্ড-চিহ্ন দেওয়া হয়েছে। লক্ষ করার বিষয়, শব্দের প্রান্তবর্তী যুগ্মধ্বনির উপর যুগ্মদণ্ড স্থাপিত হয়েছে কিন্তু শব্দের মধ্যবর্তী যুগ্মধ্বনির উপর যুগ্মদণ্ড স্থাপিত হয় নি, একটি দণ্ড স্থাপিত হয়েছে। আমার মতে এইটাই হচ্ছে অক্ষরবৃত্ত ছন্দের আসল প্রকৃতি এবং কবির অক্ষর গুনেই লিখুন কিংবা কানের ওজন রেখেই লিখুন তাঁরাও সহজ ছন্দ-বোধের দ্বারা চালিত হয়ে স্বতঃই এই নিয়মটি মেনেই এ ছন্দ রচনা করেন। অগ্রহায়ণের প্রবন্ধে এই ছিল আমার মূল বক্তব্য এবং এ সম্বন্ধে রবীন্দ্রনাথ ও অন্যান্য কবিদের অভিমত কি তা জানাই ছিল আমার অভিপ্রায়।

৩

রবীন্দ্রনাথের ছন্দ-পরিভাষা

আমার ব্যবহৃত পারিভাষিক শব্দগুলিকে স্পষ্টার্থ করতে চেষ্টা করলুম। এখন রবীন্দ্রনাথের পারিভাষিক শব্দগুলিরও একটু আলোচনা করা দরকার, কেননা তা হলে বোঝা যাবে আমার বক্তব্য বিষয় তিনি কেন স্পষ্ট বুঝতে পারেন নি।

বেশ মনে আছে দশ বৎসর পূর্বে যখন বাংলা ছন্দের উপর কিছু লিখতে প্রবৃত্ত হই তখন রবীন্দ্রনাথের ব্যবহৃত পারিভাষিক শব্দগুলি গ্রহণ করব কিনা, এ বিষয়ে আমাকে ভাবতে হয়েছিল। পরিশেষে তাঁর পরিভাষা গ্রহণ না করাই স্থির করেছিলুম। তার কারণ, তখনই আমার মনে হয়েছিল তাঁর পারিভাষিক শব্দগুলির অর্থের স্থিরতা নেই। অর্থাৎ এ শব্দগুলি তিনি সর্বত্র একই অর্থে ব্যবহার করেন না, একই শব্দ দুই জায়গায় দুই রকম অর্থে ব্যবহার করেছেন; কিন্তু এটি বৈজ্ঞানিক প্রথা নয়, কেননা পারিভাষিক শব্দের অর্থ সর্বত্র স্থির না থাকলে বৈজ্ঞানিক প্রণালীতে আলোচনা চালানো সম্ভব নয়। ‘সবুজপত্র’ প্রকাশিত তিনটি ( ১৩২১ জ্যৈষ্ঠ, প্রাবণ; ১৩২৪ চৈত্র ) এবং ‘বিচিঞ্জা’য় প্রকাশিত একটি ( ১৩৩৮ পৌষ ), বাংলা ছন্দ সম্বন্ধে তাঁর এই চারটি প্রবন্ধ থেকেই মনে হয় যে রবীন্দ্রনাথ পারিভাষিক শব্দগুলিকে সর্বত্র একই অর্থে ব্যবহার করেন না।

প্রথমই ধরা যাক ‘মাত্রা’ কথাটি। তিনি এক জায়গায় লিখেছেন, ‘যখন

আমাদের সাধু সাহিত্য-প্রচলিত ছন্দগুলি পড়িয়া দেখি, তখন দেখিতে পাই... তাহাতে প্রত্যেক অক্ষরটি একমাত্রা বলিয়া গণ্য হইয়াছে। যেমন—

মহাভারতের কথা অমৃত সমান

ইহাতে চৌদ্দটি অক্ষরে চৌদ্দ মাত্রা' (সবুজপত্র ১৩২১ জ্যৈষ্ঠ)। প্রসঙ্গক্রমে আমি এ স্থলে বলে রাখছি যে উক্ত কারণেই আমি এ ছন্দকে অক্ষরবৃত্ত নাম দিয়াছি। লক্ষ করার বিষয় রবীন্দ্রনাথও এ স্থলে প্রচলিত বাংলা অর্থেই অক্ষর শব্দ ব্যবহার করেছেন, কেননা এখানে হসন্ত বৃ এবং হসন্ত ন্-কেও অক্ষর বলা হয়েছে। কিন্তু আমার মতে এখানে চৌদ্দ অক্ষরে চৌদ্দ মাত্রা নয়। এখানে দশটি অক্ষরধ্বনিতে দশ unit এবং দুটি যুগ্মধ্বনিতে চার unit; সবস্বন্ধ এই চৌদ্দ unit আছে। সুতরাং এ পংক্তিটির প্রকৃত রূপ হচ্ছে এ রকম।—

। । । । । ॥ । । । । । । ॥

মহাভারতের কথা অমৃত সমান

এখানে তেরু এবং মান্ এই দুটি যুগ্মধ্বনিকে টেনে পড়তে হচ্ছে বলে এরা ঝিমাজিক। প্রাচীনকালে তের, মান এরূপ অ-কারাস্ত করে পড়ার পদ্ধতি থাকলেও আজকাল সে প্রণালী আর চলে না। কিন্তু আজকালকার প্রণালীতে উচ্চারণ করলেও এ ছন্দ নির্দোষ বলতে হবে।

তিনি অন্তর্জ বলেছেন, 'কিন্তু আমাদের প্রত্যেক অক্ষরটিই যে বস্তুতঃ এক মাত্রার এ কথা সত্য নহে। যুক্তবর্ণ এবং অযুক্তবর্ণ কখনই এক মাত্রার হইতে পারে না।

কাশীরাম দাস কহে শুনে পুণ্যবান্

পুণ্যবান্ শব্দটি কাশীরাম শব্দের সমান ওজনের নহে। কিন্তু আমরা প্রত্যেক বর্ণটিকে স্বর করিয়া টানিয়া টানিয়া পড়ি বলিয়া আমাদের শব্দগুলির মধ্যে এতটা ফাঁক থাকে যে, হালকা ও ভারী দুই রকম শব্দই সমমাত্রা অধিকার করিতে পারে' (সবুজপত্র ১৩২১ জ্যৈষ্ঠ)। প্রত্যেক অক্ষরই যে একমাত্রার নয়, এ কথা আমিও বলি; কেননা কাশীরামদাস শব্দের ম এবং স এক-একটি অক্ষর বটে, কিন্তু আজকাল 'আর কেউ রাম কিংবা দাস শব্দকে উড়ে পদ্ধতিতে অ-কারাস্ত করে পড়ে না; সুতরাং এ স্থলে ম এবং স একমাত্রা তো নয়ই, আধ মাত্রাও নয়। যুক্তবর্ণ এবং অযুক্তবর্ণ কখনও একই মাত্রার হতে পারে না, এ কথা আমি স্বীকার করি না। কেননা, পতি কথার প-ও একমাত্রা, প্রতি কথার প্র-ও একমাত্রা; পাবন কথার পা একমাত্রা, প্রাবন কথার প্রা-ও একমাত্রা।

রবীন্দ্রনাথও তাই বলবেন আমি জানি, কেননা তিনি এ স্থলে যুক্তবর্ণ এবং অযুক্তবর্ণ কথাটুকু দ্বারা যুক্তধ্বনি এবং অযুক্তধ্বনির কথাই বুঝেছেন। যুক্তধ্বনি এবং অযুক্তধ্বনি কখনই সমযাত্ৰিক হতে পারে না, এ কথা বলাই তাঁর উদ্দেশ্য। বস্তুতঃ যুক্তবর্ণ এবং অযুক্তবর্ণ ব্যাকরণেরই কথা; ছন্দশাস্ত্রে এ দুটি শব্দ ব্যবহার করা অবৈজ্ঞানিক এবং অসংগত। তাই আমি ছন্দের আলোচনায় এ দুটি শব্দকে সম্পূর্ণ বর্জন করেই চলতে চাই। তৃতীয়তঃ, উক্ত পংক্তির প্রত্যেকটি বর্ণকেই আমরা টেনে টেনে পড়ি, এ কথাও আমার কাছে সত্য মনে হয় না। কেননা, আধুনিক পদ্ধতিতে আমরা ম, স এবং ন-কে হ্রস্ব উচ্চারণই করি (‘বিচিত্রা’র প্রবন্ধ থেকে মনে হয় রবীন্দ্রনাথও তাই করেন), সুতরাং এ তিনটি বর্ণ বা ‘অক্ষর’কে টেনে পড়া সম্ভব নয়। তবে আমরা রাম, দাস এবং বান্ এই যুক্তধ্বনিগুলিকে টেনে পড়ি, পক্ষান্তরে পুণ্য শব্দের যুক্তধ্বনিটাকে (পুণ্) একটু সোঁসে উচ্চারণ করি। এই হচ্ছে এ ছন্দের (অক্ষরবৃত্তের) কায়দা এবং এজন্যই কানের ওজন ঠিক থাকে। সুতরাং এ পংক্তিটার প্রকৃত ধ্বনিরূপ হচ্ছে এরকম।—

। । ॥ ॥ । । । । । ॥

কাশীরাম দাস্ কহে শুনে পুণ্যবান্

উক্ত প্রবন্ধেই অগ্ৰত্বে রবীন্দ্রনাথ লিখেছেন, ‘ফল শব্দ বস্তুতঃ এক মাত্রার কথা। অথচ সাধু বাংলা ভাষার ছন্দে ইহাকে দুই মাত্রা ধরা হয়। অর্থাৎ ফলা এবং ফল বাংলা ছন্দে একই ওজনের।’ ফল শব্দ কখনও এক মাত্রার কথা নয়, এ শব্দটি সর্বত্রই দ্বিমাত্রিক। শ্রদ্ধেয় পণ্ডিত শ্রীযুক্ত বিধুশেখর শাস্ত্রী মহাশয় নিশ্চয়ই আমার কথা সমর্থন করবেন। এ শব্দটি দ্বিমাত্রিক বলেই মাত্রানিয়ন্ত্রিত ছন্দে এ শব্দটি দুই unit বলে গণ্য হয়। রবীন্দ্রনাথ এ স্থলে মাত্রা শব্দটিকে সিলেবল্ কথার প্রতিশব্দ রূপে ব্যবহার করেছেন। কেননা, ফল শব্দে একটি সিলেবল্ আছে, এ কথা বলাই তাঁর উদ্দেশ্য। কিন্তু আবার যখন বলছেন, সাধু বাংলার ছন্দে ফল শব্দকে দুমাত্রা ধরা হয় তখন মাত্রা শব্দ quantitative unit-এর প্রতিশব্দ রূপেই ব্যবহৃত হচ্ছে। আসল কথা হচ্ছে এই যে, সিলেবল্-নিয়ন্ত্রিত ছন্দে ফল শব্দকে ধরা হয় এক unit, আর মাত্রা-নিয়ন্ত্রিত ছন্দে এ শব্দটিকে ধরা হয় দুই unit। ‘বৎসরে বৎসরে হাঁকে কালের গোমায়ু’—রবীন্দ্রনাথ এখানে ‘বৎসরে’ কথাটিতে তিন ‘মাত্রা’ ধরেছেন। কিন্তু শাস্ত্রী মহাশয় নিশ্চয় আমাকে সমর্থন করে বলবেন, ‘বৎসরে’ কথাটিতে ‘মাত্রা’ আছে চার, তিন নয়; কিন্তু ‘অক্ষর’

আছে তিনটি, কেননা খণ্ড-৭ এবং ৮ মিলে এক অক্ষর। রবীন্দ্রনাথ এখানে মাত্রা কথাটিকে অক্ষরের প্রতিশব্দ রূপে ব্যবহার করেছেন। হুতরাং দেখা গেল তিনি মাত্রা শব্দটি কখনও সিলেব্ল অর্থে, কখনও অক্ষর অর্থে, কখনও তার আসল (অর্থাৎ ধনি-quantity-র unit) অর্থে ব্যবহার করেন।

তিনি সিলেব্ল কথাটিকেও তেমনি ভিন্ন ভিন্ন স্থলে ভিন্ন ভিন্ন অর্থে ব্যবহার করেন। তিনি লিখেছেন, “ইংরেজি মতে ‘জল’ সর্বত্রই এক সিলেব্ল, ‘পাতা’ তার ডবল ভারী। কিন্তু জল শব্দটা ইংরেজি নয়।” তার ভাবখানা এই যে, যেহেতু জল শব্দটা বাংলা সেজগত জল শব্দ বাংলায় কখনও কখনও দুই সিলেব্ল হতে পারে। তাই ‘মনে পড়ে দুইজনে জুঁই তুলে বালো’ এ পংক্তিটিতে দুই এবং জুঁই কথা দুটি ‘দুই সিলেব্ল-এর টিকিট পেয়েছে’, এ কথা বলেছেন। এখানে তিনি সিলেব্ল কথাটি মাত্রা অর্থাৎ ধনি-quantity-র unit অর্থে প্রয়োগ করেছেন। জল, দুই, জুঁই শব্দগুলি ইংরেজি বা বাংলা কোনো মতেই কখনও দুই সিলেব্ল হতে পারে না, এ বিষয়ে ধনিতত্ত্ববিৎ শ্রীযুক্ত হুনীতিবাবু আমাদের সমর্থন করবেন সে বিষয়ে আমি নিঃসংশয়। আসল কথা হচ্ছে, জল, দুই, জুঁই প্রভৃতি syllabic measure-এ অর্থাৎ ধনিসংখ্যার মাপে এক unit আর quantitative measure-এ অর্থাৎ ধনির মাত্রাপরিমাণের মাপে দুই unit। কাজেই সিলেব্ল বা ধনিসংখ্যাত ছন্দে অর্থাৎ স্বরবৃত্ত ছন্দে এগুলি এক-এক unit বলেই গণ্য হয়। আর-মাত্রাসংখ্যাত ছন্দে অর্থাৎ মাত্রাবৃত্ত ছন্দে এগুলি দুই unit বলেই গণ্য হয়।

ছন্দের শ্রেণীবিভাগের ক্ষেত্রেও আমি রবীন্দ্রনাথের সঙ্গে একমত হতে পারি নি। তার কারণটা বলছি। তিনি বাংলা ছন্দকে দুই তরফ থেকে দুইরকম করে ভাগ করেছেন। কিন্তু ওই দুইরকম বিভাগের মধ্যে পারস্পরিক সামঞ্জস্য নেই। এক দিক থেকে তিনি বাংলা ছন্দকে চলতি বা প্রাকৃত বাংলায় ছন্দ এবং সাধু বা সংস্কৃত বাংলার ছন্দ এই দুভাগে বিভক্ত করেছেন; সাধু বাংলার ছন্দকে তিনি কখনও কখনও সাধু ছন্দ নামেও অভিহিত করেছেন। এক স্থানে (বিচিত্রা, পৌষ) তিনি বলেছেন, ‘তখনকার দিনে বাংলা কবিতায় এক-একটি অক্ষর এক সিলেব্ল বলেই চলত।’ বলা বাহুল্য তিনি এ স্থলে অক্ষরগোনা সাধু বাংলার ছন্দের কথাই বলেছেন এবং সিলেব্ল মানে এ স্থলে উক্ত ছন্দের unit। এ রীতির ছন্দ যে শুধু তখনকার দিনেই চলত তা নয়, এ ধরনের ছন্দ আজকালও



চলে। তার পরেই তিনি বলছেন, ‘অথচ সেদিন কোনো ছন্দে যুগ্মধ্বনিকে বৈমাত্রিক বলে গণ্য করার দরকার আছে বলে অনুভব করেছিলুম।’ আজকের দিনে একথা কারও অজানা নেই যে তাঁর ওই দরকার অনুভব করার ফলে বাংলা কাব্যসাহিত্যে এক নতুন শ্রেণীর ছন্দের প্রবর্তন হয়েছে, ধ্বনিবাংকারে এবং স্বরমাধুর্যে এ শ্রেণীর ছন্দগুলি বাংলা সাহিত্যে অপূর্ব; এ শ্রেণীর ছন্দের প্রবর্তন রবীন্দ্রনাথের একটি বিশেষ অবদান। যা হক, এই যে নতুন স্বর ও নতুন রীতির ছন্দ তিনি প্রবর্তন করলেন, তিনি নিজে সে ছন্দের কি নাম দিয়েছেন এ স্থলে তাই আমাদের আলোচ্য বিষয়। কিন্তু তিনি এ ছন্দের কোনো বিশেষ নাম দিয়েছেন বলে আমার জ্ঞান নেই। তবে তাঁর ছন্দের আলোচনাগুলি থেকে মনে হয় যে তিনি এ ছন্দকেও সাধু-ছন্দেরই প্রকারভেদ বলে মনে করেন। এ স্থলে তাঁর যে দুটি বাক্য উদ্ধৃত করলুম তার থেকেও আমার এ ধারণা সমর্থিত হয়। সুতরাং দেখতে পাচ্ছি রবীন্দ্রনাথও বাংলা ছন্দকে এক হিসেবে তিন শ্রেণীতেই বিভক্ত করেন; যথা—প্রাকৃত বাংলা ছন্দের এক ধারা এবং সাধু বাংলা ছন্দের দুই ধারা।

তাঁর এই শ্রেণীবিভাগটি আমি সমর্থন করেছি, কিন্তু এই বিভাগগুলির পরিচয়সূচক নাম কয়টি আমি গ্রহণ করতে পারি নি। কারণ প্রাকৃত বাংলা ও সংস্কৃত বাংলার মধ্যে যে পার্থক্য তা অতি সামান্য, ওই পার্থক্যটি বিশেষভাবে কয়েকটি ক্রিয়াপদ ও সর্বনামের মধ্যেই নিবদ্ধ। এই সামান্য পার্থক্যটির ধ্বনিগত মর্যাদা এত বেশি নয় যে তার উপর নির্ভর করে ছন্দ-বিভাগের নামকরণ করা যায়। তা ছাড়া যাকে তিনি সাধু বাংলার ছন্দ বলছেন তাতেও বহু প্রাকৃত শব্দের ব্যবহার চলে এবং ইচ্ছে করলে সাধু ছন্দের ধ্বনিটি অব্যাহত রেখেও এ ছন্দে বহুল পরিমাণে প্রাকৃত শব্দ চালানো সম্ভব। একটা দৃষ্টান্ত দিচ্ছি।—

খোলো, খেলো, হে আকাশ, স্তব্ধ তব নীল ধ্বনিকা,—

খুঁজে নিতে দাও সেই আনন্দের হারানো কণিকা।

কবে সে যে এসেছিল আমার হৃদয়ে যুগান্তরে,

গোধূলি-বেলার পাশ জনশূন্য এ মোর প্রান্তরে,

লয়ে তার ভীকু দীপশিখা।

দিগন্তের কোন্ পারে চলে গেল আমার কণিকা।

—কণিকা, পূরবী, রবীন্দ্রনাথ

রবীন্দ্রনাথের পরিভাষায় এটি সাধু বা সংস্কৃত বাংলার ছন্দ। কিন্তু লক্ষ করার বিষয় এখানে বিশেষভাবে সাধু বাংলার কোনো লক্ষণই নেই; যে কয়টি ক্রিয়াপদ ব্যবহৃত হয়েছে, সব কটিরই প্রাকৃত রূপ। অথচ এ ছন্দের ধ্বনি সাধু ছন্দেরই ধ্বনি, তাঁর পরিভাষায় যাকে প্রাকৃত বাংলার ছন্দ বলা হয় তার ধ্বনি এখানে নেই। যা হক, এ ছন্দটির যে একটি ধ্বনিবৈশিষ্ট্য আছে তাতে কোনো সন্দেহ নেই। তাই এই ধ্বনির ছন্দকে আমিও একটি স্বতন্ত্র শ্রেণী বলে গণ্য করেছি। কিন্তু ‘সাধু বা সংস্কৃত বাংলার ছন্দ’ এই নামটি আমি গ্রহণ করি নি। কেননা, এ ছন্দের ধ্বনিবৈশিষ্ট্য রক্ষা করবার জন্য সাধু বাংলার ব্যবহার করতেই হবে, এমন আবশ্যিকতা নেই। আমার বিশ্বাস কোনো কবি ইচ্ছে করলে এ ছন্দের ধ্বনিবৈশিষ্ট্য রক্ষা করেও আগাগোড়া শুধু প্রাকৃত বাংলাই চালিয়ে যেতে পারেন। এরকম কবিতা আমি এখনও দেখি নি। কিন্তু এরকম লেখাও যে সম্ভব তার প্রমাণ উদ্ভূত দৃষ্টান্তটি। যা হক, আমি ‘সাধু বা সংস্কৃত বাংলার ছন্দ’ এই পরিচয়সূচক নামটি বর্জন করে এই ছন্দকে অক্ষরবৃত্ত নাম দিয়েছি, কেননা, অক্ষরসংখ্যার সংগতি রক্ষা করাই এ ছন্দের সাধারণ রীতি। এ সম্বন্ধে বিস্তৃত আলোচনা পূর্বেই করেছি।

সাধু বাংলারই ‘কোনো কোনো ছন্দে যুগ্মধ্বনিকে বৈমাত্রিক বলে গণ্য করার’ রীতি রবীন্দ্রনাথ প্রবর্তন করেছেন, এ কথা পূর্বেই বলেছি। দৃষ্টান্ত দিচ্ছি।—

(১) ঢাকো ঢাকো মুখ টানিয়া বসন,

আমি কবি সুরদাস।

দেবী, আসিয়াছি আমি ভিক্ষা মাগিতে

পুরাতে হইবে আশ।

—সুরদাসের প্রার্থনা, মানসী, রবীন্দ্রনাথ

(২) “এখনো উঠাতে পারি” কর-ঘোড়ে বাচে

“যদি দেখাইয়া দাও কোনখানে আছে।”

ষিঠীয় বলয়খানি ছুঁড়ি দিয়া জলে,

জ্বল কহিলেন “আছে ওই নদীতলে”।

—নিখল উপহার, ঐ

এই দুটিই রবীন্দ্রনাথের কথিত সাধু বাংলা ছন্দের দৃষ্টান্ত। উভয়ইই যুগ্মধ্বনির বৈমাত্রিকতা বজায় আছে এবং উভয়ইই সাধু বাংলা ব্যবহৃত হয়েছে।

কিন্তু এই বৈমাত্রিক যুগধ্বনি-ওয়াল সাধু ছন্দেও সাধু ভাষার ব্যবহার অত্যঙ্গ্য নয়। এ ছন্দেও প্রাকৃত বাংলার প্রচুর ব্যবহার হয় এবং ইচ্ছে করলে এ ছন্দেও সর্বত্রই নিরবচ্ছিন্নভাবে প্রাকৃত বাংলার ব্যবহার চালানো যায়। যথা—

(৩) স্পষ্ট বোলতে কষ্ট কি বল? লজ্জারো কিছু নয়!

সন্ধ্যা না হোতে সন্ধি কোরতে আসবে সে নিশ্চয়।

জিত্তে হবেই আজ!

নইলে এ নামে লাজ!

বিজ্রোহী সাথে সন্ধি নেহাৎ সহজ ব্যাপার নাকি?

এ সব নিগূঢ় রণ-নীতি তোর শিখতে এখনো বাকী!

—সন্ধিহত্র, বুকের বীণা, অপরাঞ্জিতা দেবী

(৪) পথ চেয়ে ব'সে আছি সেই থেকে এই,—

ছ'টা বাজে গ্যাস্ জ্বলে; তবু দেখা নেই!

সবাই তো এ পাড়ার ফিরে এলো ঘরে,

আজ কেন আসতে সে এত দেরী করে?

কাল থেকে বোলে বোলে মান্‌লুম হার।—

কিছুতে কি ফুরহুং মিল্‌লো না তার?

—ঈশ্বরে আলো, বুকের বীণা, অপরাঞ্জিতা দেবী

এ দুটি ছন্দই প্রাকৃত বাংলায় রচিত। অথচ রবীন্দ্রনাথ বাকে 'প্রাকৃত বাংলার ছন্দ' বলেন, এ দুটির ধ্বনি-প্রকৃতি সে রকম নয়, স্তত্রাং এ দুটি যে তাঁর প্রাকৃত বাংলা ছন্দের দৃষ্টান্ত নয়, এ কথা নিশ্চিত। এখানে প্রথম ও তৃতীয় দৃষ্টান্তের ধ্বনি-প্রকৃতি এক রকম; আর দ্বিতীয় ও চতুর্থ দৃষ্টান্তের ধ্বনি-প্রকৃতি এক রকম। কাজেই প্রথম দুটি সাধু বাংলায় রচিত এবং দ্বিতীয় দুটি প্রাকৃত বাংলায় রচিত বলে, এদের যথাক্রমে সাধু বাংলার ছন্দ ও প্রাকৃত বাংলার ছন্দ নাম দিলেই যথেষ্ট হবে না। আমার পরিভাষায় এ চারটি দৃষ্টান্তই মাত্রাবৃত্ত ছন্দে রচিত, কেননা এ চারটি দৃষ্টান্তই ধ্বনিমাত্রার পরিমাপে রচিত। তার মধ্যে প্রথম ও তৃতীয়টি ষষ্ঠাত্মিক; কেননা এদের প্রতিপর্বেই ছয় মাত্রা করে আছে। আর দ্বিতীয় ও চতুর্থটি চতুর্মাাত্রিক ছন্দের দৃষ্টান্ত; এখানে প্রতিপর্বে চার মাত্রা আছে।

উপরের চতুর্থ দৃষ্টান্তটি প্রাকৃত বাংলায় রচিত, অথচ রবীন্দ্রনাথের পারিভাষিক

অর্থে এ ছন্দকে প্রাকৃত বাংলার ছন্দ বলা যায় না। তা ছাড়া তিনি যাকে প্রাকৃত বাংলার ছন্দ বলেন তাতেও সর্বত্রই প্রাকৃত বাংলা কথার ব্যবহার আবশ্যিক নয়। প্রাকৃত বাংলার ছন্দেও সাধু বাংলা শব্দের প্রয়োগ দেখা যায়। যথা—

- (১) বালিশতলে বইটি চাপা টানিয়া লয় তারে,—  
পাতাগুলিন ছেঁড়া-খোঁড়া শিশুর অত্যাচারে।

যথাস্থানে, কণিকা, রবীন্দ্রনাথ

- (২) আমার যদি মনটি দেবে—রাখিয়া যাও তবে ;  
দিয়েছ যে সেটা কিন্তু ভুলে থাকতে হবে।

—অসাবধান, ঐ

এ দুটি রবীন্দ্রনাথের কথিত প্রাকৃত বাংলার ছন্দ। অথচ এখানে দুটি সাধু শব্দ (টানিয়া এবং রাখিয়া) আছে। আর পূর্বোক্ত চতুর্থ দৃষ্টান্তটি প্রাকৃত বাংলার ছন্দ নয়; অথচ তাতে সর্বত্রই প্রাকৃত বাংলা ব্যবহৃত হয়েছে। এ জগুই সাধু বাংলার ছন্দ প্রাকৃত বাংলার ছন্দ, ইত্যাদি নাম গ্রহণ করি নি। কারণ সাধু বাংলা বা প্রাকৃত বাংলা বললে ভাষার ব্যাকরণগত রূপের কথাই বলা হয়, ধ্বনিগত রূপের কথা বলা হয় না। অথচ ধ্বনির বিশেষ বিশেষ প্রকৃতির প্রতি লক্ষ রেখেই ছন্দের নামকরণ করতে হবে। তাই আমি এ দৃষ্টান্তদুটির নাম দিয়েছি স্বরবৃত্ত ছন্দ; কেননা এ দৃষ্টান্তদুটিতে সর্বত্রই সিলেবল বা স্বরের সংখ্যাগত সংগতি আছে।

যা হক, দেখা গেল রবীন্দ্রনাথের সাধু বাংলার দুই ধারা এবং প্রাকৃত বাংলার এক ধারা, ছন্দের এই তিন ধারা মেনে নিতে আমার আপত্তি নেই; কিন্তু ওই নামগুলি মেনে নিতে আপত্তি আছে। তাই আমি ছন্দের এই তিন ধারার নাম দিয়েছি যথাক্রমে অক্ষরবৃত্ত, মাত্রাবৃত্ত ও স্বরবৃত্ত। অক্ষরবৃত্ত ছন্দে সচরাচর সাধু বাংলাই ব্যবহৃত হয়; তবে স্থানবিশেষে প্রাকৃত বাংলা শব্দের ব্যবহারও চলে এবং আমার বিবেচনায় নিরবচ্ছিন্ন প্রাকৃত বাংলায়ও অক্ষরবৃত্ত ছন্দ রচনা করা সম্ভব,—অবশ্য আজ পর্যন্ত তেমন দৃষ্টান্ত চোখে পড়ে নি। মাত্রাবৃত্তেও অক্ষরবৃত্তের মতোই সাধু ও প্রাকৃত বাংলার মিশ্রণ চলে; কিন্তু এ ছন্দে নিরবচ্ছিন্নভাবে প্রাকৃত বাংলার ব্যবহারও চালানো যায়,—শ্রীমতী অপরাজিতা দেবীর ‘বুকের বীণা’র তার বেণু জ্বল্লর নিদর্শন আছে। আর স্বরবৃত্ত ছন্দে

প্রাকৃত বাংলা ব্যবহার করাই সাধারণ নিয়ম; তবে প্রয়োজন অনুসারে ছ-এক জায়গায় সাধু বাংলা শব্দও চলে—দৃষ্টান্ত পূর্বেই দেওয়া হয়েছে।

ছন্দের যে তিন ধারার কথা উল্লেখ করলুম রবীন্দ্রনাথ স্পষ্টতঃ এই তিন ধারার কথা না বললেও প্রকারান্তরে তিনি বাংলা ছন্দের এই তিন ধারা স্বীকার করেন, তাঁর ছন্দ-বিষয়ক সমস্ত আলোচনা থেকে আমার এ কথাই মনে হয়েছে। আমি কিন্তু ছন্দের এই তিন বিভাগের উপরই আমার সমস্ত আলোচনাকে প্রতিষ্ঠিত করেছি। স্বর্গীয় কবি সত্যেন্দ্রনাথ ছন্দকে স্পষ্টতঃ তিন ভাগে বিভক্ত না করলেও তিনি যে ছন্দের এই তিন ধারার কথা স্বীকার করতেন এ বিষয়ে কোনো সন্দেহ নেই; কারণ এক জায়গায় তিনি বলেছেন, ‘বাংলা দেশের মুক্তবেণী গঙ্গাতীরে, একজন মাত্র কবির প্রতিভাবলে, আজ ছন্দের তিন ধারা বঙ্গের কাব্যসাহিত্যে যুক্তবেণীর সৃষ্টি করেছে’ (ভারতী ১৩২৫ বৈশাখ)।

যা হউ, আ-এক হিসেবে রবীন্দ্রনাথ বাংলা ছন্দকে সমমাত্রিক, অসমমাত্রিক ও বিষমমাত্রিক এই তিনটি শ্রেণীতে ভাগ করেছেন। এই বিভাগটি আমি গ্রহণ করতে পারি নি। তার দুটি কারণ আছে। প্রথমতঃ এই নাম তিনটিতেও মাত্রা কথাটি এ শব্দের স্বাভাবিক অর্থে অর্থাৎ সংস্কৃত ছন্দশাস্ত্রের প্রযুক্ত অর্থে ব্যবহৃত হয় নি। তিনি এই শ্রেণীবিভাগের যে-সব দৃষ্টান্ত দিয়েছেন তাতেই বোঝা যায় তাঁর ব্যবহৃত ‘মাত্রা’র মূল্য সব জায়গায় সমান নয়; স্থলবিশেষে মাত্রা কথাটির মর্যাদা ভিন্ন ভিন্ন রকম। যথা—

শারদচন্দ | পবন মন্দ | বিপিন ভরল | কুহুমগন্ধ

রবীন্দ্রনাথের মতে এটি অসমমাত্রার ছন্দ; কেননা এর প্রতিপর্বে তিনের দ্বিগুণ অর্থাৎ ছয় মাত্রা রয়েছে আর তিন হচ্ছে অসম সংখ্যা। এখানে তিনি ‘শারদ’ শব্দেও তিন মাত্রা ধরেছেন, চন্দ কথায়ও তিন মাত্রা ধরেছেন। কেননা এ উভয় শব্দেই ক্ষণিপরিমাণের তিন unit আছে। এইটাই মাত্রা কথার আসল অর্থ। তাই আমি এ ছন্দকে বলব মাত্রাবৃত্ত ছন্দ; এটি হচ্ছে তার যথাক্রম উপশাখা।

সংগীত ত- | রঙ্গ রঙ্গ | অঙ্গের উ- | ক্ষুদ্র

এটাকে তিনি বলেন সমমাত্রার ছন্দ; কেননা এর প্রতিপর্বে আছে দুয়ের দ্বিগুণ অর্থাৎ চার ‘মাত্রা’। কিন্তু এখানে মাত্রা শব্দটির অর্থ পরিবর্তন হল। পূর্বের দৃষ্টান্ত মন্দ, গন্ধ প্রভৃতি শব্দে ধরা হয়েছিল তিন মাত্রা, কিন্তু এখানে রঙ্গ, অঙ্গ

প্রভৃতি শব্দে ছুই মাত্রার বেশি ধরা হয় নি। এটি মাত্রা শব্দের প্রকৃত অর্থ নয়। এখানে আসলে মাত্রা বলতে তিনি 'অক্ষর' ধরে নিয়েছেন। প্রকৃতপক্ষে তথাকথিত 'অক্ষর'ই হচ্ছে এ ছন্দের unit। তাই আমি এ ছন্দকে বলব 'অক্ষরবৃত্ত' এবং এর প্রতিপর্বে চারটি করে অক্ষর থাকতে একে 'চতুরক্ষর-পর্বিক' এই উপনামে অভিহিত করব।

বৃষ্টি পড়ে | টাপুর টুপুর | নদেয় এল | বান

রবীন্দ্রনাথ এখানে এক-একটি স্বর বা সিলেব্‌কেই এক-একটি 'মাত্রা' ধরেন। এটিও মাত্রা কথার আসল অর্থ নয়। এখানে সিলেব্‌ বা স্বরই হচ্ছে এ ছন্দের unit। তাই আমার মতে এর নাম স্বরবৃত্ত, এ দৃষ্টান্তটি স্বরবৃত্তের 'চতুঃস্বর-পর্বিক' শাখার অন্তর্গত।

আসল কথা হচ্ছে এই যে, ছন্দের unit মাত্রকেই রবীন্দ্রনাথ মাত্রা নাম দিয়েছেন। কিন্তু বাংলা ছন্দে তিন রকমের unit ব্যবহৃত হয় এবং এই unit-গুলিই ছন্দের প্রকৃতি নিয়ন্ত্রিত করে। এক শ্রেণীর বাংলা ছন্দের unit হচ্ছে সিলেব্‌ বা স্বর; আর-এক শ্রেণীর unit হচ্ছে মাত্রা; তৃতীয় শ্রেণীর unit হচ্ছে অক্ষর। সুতরাং বাংলা ছন্দকে স্বরবৃত্ত, মাত্রাবৃত্ত এবং অক্ষরবৃত্ত এই তিন ধারায় বিভক্ত করাই সংগত।

সমমাত্রা, অসমমাত্রা এবং বিষমমাত্রা, এই তিন ভাগে ভাগ করার দ্বিতীয় দোষ হচ্ছে এই যে, এই নামকরণে ছন্দের unit-এর প্রকৃতির পরিচয় পাওয়া যায় না, পাওয়া যায় ছন্দ-পর্বের পরিমাপের পরিচয়। অথচ ছন্দের unit-ই তার আসল প্রকৃতিকে নিয়ন্ত্রিত করে; সুতরাং unit-এর পরিচয়ই তার আসল পরিচয়। ছন্দ-পর্বের গঠনপ্রণালী তার বাহ্য রূপকে মাত্র নির্দেশ করে সুতরাং পর্বের পরিচয় ছন্দের আসল পরিচয় নয়, তার গোণ পরিচয় মাত্র। কাজেই সমমাত্রা, অসমমাত্রা এবং বিষমমাত্রার বিভাগে ছন্দের বাহ্য রূপেরই পরিচয় পাওয়া যায়, ছন্দের অন্তরের রূপ তাতে প্রকাশিত হয় না। দৃষ্টান্ত দিলেই বিষয়টা আরও স্পষ্ট হবে। যেমন—

(১) বরষার | নির্ঝরে | অঙ্কিত | কায়

ছুই তীরে গিরিমালা কতদূর যায় !

—নিম্নলি উপহার, মানসী, রবীন্দ্রনাথ

(২) এলায়ে জটিল-বন্ধ | নিব্বারের বেণী

নীলাভ দিগন্তে ধায় নীল গিরিশ্রেণী ।

—নিফল উপহার, কথা ও কাহিনী, রবীন্দ্রনাথ

(৩) কিসের তরে | অশ্রু বরে, | কিসের লাগি | দীর্ঘশ্বাস ।

হাস্তমুখে অদৃষ্টের করব মোরা পরিহাস ।

—হৃদভাগোর গান, কল্পনা, রবীন্দ্রনাথ

রবীন্দ্রনাথের পরিভাষায় এ তিনটি দৃষ্টান্তই সমমাত্রার ছন্দ ; কেননা তাঁর মতে তিনটি দৃষ্টান্তেই প্রতিপর্বে চারটি করে ‘মাত্রা’ অর্থাৎ unit আছে । কিন্তু প্রতিপর্বে চারটি করে unit থাকাই বড় কথা নয়, এটা বাছ সাদৃশ্যের পরিচয় মাত্র । এ দৃষ্টান্ত তিনটি পড়লেই বোঝা যাবে যে তিনটি দৃষ্টান্তে তিন রকম unit ব্যবহৃত হয়েছে ; তার ফলে তিনটি দৃষ্টান্তে ধ্রুনিবু বৈশিষ্ট্য তিন রকম হয়েছে । সুতরাং এই unit-গুলির পরিচয় না পাওয়া পর্যন্ত এ তিনটি ছন্দের প্রকৃত পরিচয় পাওয়া যাবে না । সে পরিচয় হচ্ছে এই । প্রথম দৃষ্টান্তের unit হচ্ছে মাত্রা, দ্বিতীয়টির অক্ষর এবং তৃতীয়টির স্বর । সুতরাং এখানে যথাক্রমে মাত্রাবৃত্ত, অক্ষরবৃত্ত ও স্বরবৃত্তের দৃষ্টান্ত পেলুম । আর এইটাই হচ্ছে এ ছন্দের আসল রূপ ।

কাজেই দেখতে পেলুম রবীন্দ্রনাথের সমমাত্রার ছন্দ ও স্বর, মাত্রা ও অক্ষর এই তিন unit অবলম্বন করে তিন রকম হতে পারে । অসমমাত্রার ছন্দেরও এরকম দৃষ্টান্ত দেওয়া যায় । বিষমমাত্রার ছন্দের মাত্রাবৃত্ত ও স্বরবৃত্ত রূপের দৃষ্টান্ত দিতে পারি, অক্ষরবৃত্ত-রূপের দৃষ্টান্ত আমার জানা নেই । কাজেই দেখা গেল মাত্রাবৃত্ত, স্বরবৃত্ত ও অক্ষরবৃত্ত এ তিনটিই হচ্ছে ছন্দের প্রকৃতিগত শ্রেণীবিভাগ । আর সম, অসম ও বিষম এ তিনটি হচ্ছে ছন্দের আকৃতিগত শ্রেণীবিভাগ ।

রবীন্দ্রনাথের পরিভাষার বিস্তৃত আলোচনা করতে হল এই জন্তে যে, আমার ব্যবহৃত পরিভাষার সঙ্গে তাঁর পরিভাষার অর্থের ও ব্যবহারের পার্থক্য খুবই বেশি এবং তার ফলে আমার আলোচনাটি তাঁর কাছে অনেক সময় অস্পষ্ট বোধ হয়ে থাকতে পারে । আমাদের পরিভাষায় এই পার্থক্যটুকুর প্রতি যদি তিনি লক্ষ রাখেন তবে আশা করি তিনি দেখতে পাবেন যে তাঁর বক্তব্যের সঙ্গে আমি সম্পূর্ণ একমত । তা ছাড়া আমি আমার আলোচনায় যে-সমস্ত

নতুন কথাৰ অবতারণা কৰেছি সে-সব বিষয়েও আমি তাঁৰ সমর্থনই পাব এই আমাৰ বিশ্বাস।

রবীন্দ্রনাথের ছন্দ-পরিভাষাৰ অৰ্থ ও ব্যবহার সম্বন্ধে আমি তাঁৰ সঙ্গ একমত হতে পারি নি বলে কেউ যেন এ কথা মনে না করেন যে আমি তাঁৰ রচিত ছন্দের নির্দোষতা সম্বন্ধেই সন্দেহান। কারণ ছন্দকার কবিকে যে ছন্দ-শাস্ত্রকারও হতে হবে এমন অবশ্যস্বাবী বাধ্যবাধকতা কোনো দেশে কোনো কালে ছিল না, এখনও নেই। ছন্দশাস্ত্রকার ছন্দকারের ছন্দপ্রতিভাৰ প্রতি অসীম শ্রদ্ধা নিয়েও ছন্দের আলোচনায় তাঁৰ সঙ্গ একমত না-ও হতে পারেন, এরকম বহু দৃষ্টান্ত দেওয়া যায়। বস্তুতঃ রবীন্দ্রনাথের ছন্দপ্রতিভাৰ প্রতি অপরিমেয় শ্রদ্ধা আছে বলেই আমি তাঁৰ ছন্দের আলোচনায় প্রবৃত্ত হয়েছিলুম এবং ছন্দশাস্ত্রের আলোচনায় তাঁৰ মত সমর্থন করতে না পারলেও তাঁৰ প্রতিভাৰ প্রতি আমাৰ শ্রদ্ধা ও তাঁৰ ছন্দের প্রতি আমাৰ অনুরাগ অক্ষুণ্ণই আছে। \*



## ছন্দ-জিজ্ঞাসা (৩)

যোগিক ছন্দে যুগ্মধ্বনি

‘অক্ষরবৃত্ত’ ছন্দে সন্থকে আমার প্রবন্ধের সমালোচনা করে রবীন্দ্রনাথ পোঁষের ‘বিচিঞ্জায়’ যে প্রবন্ধটি লিখেছেন তাতে আমি সন্তুষ্ট হতে পারি নি ; কারণ ‘অক্ষরবৃত্ত’ ছন্দে যুগ্মধ্বনির ব্যবহার সন্থকে আমি যে প্রশ্ন তুলেছি, ওই প্রবন্ধে সে প্রশ্নের যথোচিত উত্তর পাই নি। কিন্তু মাঘের ‘পরিচয়ে’ তাঁর ‘ছন্দের হসন্ত হলন্ত’ পড়ে খুশি হয়েছি, কারণ তাতে আমার প্রশ্নের আংশিক উত্তর পেয়েছি। তা ছাড়া, জয়ন্তী উপলক্ষে ‘বাংলা ছন্দে রবীন্দ্রনাথের দান’ নামক প্রবন্ধে কাব্য-রচনার প্রথম সূচনা থেকে ‘মানসী’র যুগ পর্যন্ত তাঁর ছন্দের অভিব্যক্তি সন্থকে আমি যে-সব কথা বলেছি, ‘ছন্দের হসন্ত হলন্ত’ প্রবন্ধে তার সম্পূর্ণ সমর্থন পেলুম। এত শীঘ্র এত অপ্রত্যাশিত ভাবে আমার কথার এমন চমৎকার সমর্থন পেয়ে আমি স্বভাবতঃই বিশেষ সন্তোষ লাভ করেছি। আমি বলেছি, ‘রবীন্দ্রনাথের অল্প বয়সের রচনায় যুক্তবর্ণের বিরলতা একটি বিশেষ লক্ষ্য করার বিষয়’। তিনি লিখেছেন, তখনকার দিনে ‘যুক্ত অক্ষর অর্থাৎ যুগ্মধ্বনি বর্জন করবার একটি দুর্বল অভ্যাস আমাকে ক্রমেই পেয়ে বসছিল’। কেন সে অভ্যাস হয়েছিল এবং কি ভাবে তার অবসান ঘটল, এ বিষয়ে আমি যা বলেছি তিনি তাঁর সব কথাই সমর্থন করেছেন। (জয়ন্তী-উৎসর্গ, ৬৬-৬৯ পৃষ্ঠা এবং পরিচয়, মাঘ, ৩৮২-৩৮৩ পৃষ্ঠা দ্রষ্টব্য)। তা ছাড়াও, ‘ছন্দের হসন্ত হলন্ত’ প্রবন্ধটিতে তিনি বাংলা ছন্দের প্রকৃতি সন্থকে এমন কতকগুলি বিষয়ের উত্থাপন করেছেন, ছন্দের আলোচনায় যার মূল্য খুবই বেশি। তাঁর এ প্রবন্ধটির দ্বারা বাংলা ছন্দের আসল প্রকৃতিটি বোঝবার বিশেষ সহায়তা হয়েছে। যা হক যে প্রশ্ন উপলক্ষ করে তিনি এই প্রবন্ধটি লিখেছেন সে প্রশ্ন সন্থকে আমার আরও কয়েকটি জিজ্ঞাস্তা বিষয় আছে। আমি এ প্রবন্ধে ওই জিজ্ঞাস্তা বিষয়কটির আলোচনা করব এবং প্রসঙ্গক্রমে বাংলা ছন্দের মৌলিক প্রকৃতি সন্থকে আরও কয়েকটি প্রয়োজনীয় বিষয়ের উত্থাপন করব।

যে-কোনো বৈজ্ঞানিক বিষয়েরই আলোচনায় উপমা, রূপক প্রভৃতি অলংকার

যথাসম্ভব বর্জন করে চলাই রীতি। কারণ বৈজ্ঞানিক আলোচনার রীতি আর সাহিত্যিক রচনার রীতি এক নয়। ব্যাকরণ এবং শব্দভণ্ডের আলোচনার স্থায় ছন্দের আলোচনাও যত নিরলংকার হয়, আলোচ্য বিষয়কে নিঃসংশয়রূপে স্পষ্ট করার পক্ষে ততই ভাল। তুলনা-উপমা প্রভৃতির দ্বারা মন স্বভাবতঃই আকৃষ্ট হয় বটে, কিন্তু অনেক সময়ই অলংকার বৈজ্ঞানিক আলোচনার স্বাভাবিক পথটিকে লঙ্ঘন করে যাবারও সম্ভাবনা থাকে। ছন্দ সম্বন্ধে রবীন্দ্রনাথের রচনাগুলিতে লক্ষ করেছি বক্তব্য বিষয়টিকে প্রত্যক্ষ করে তোলবার উদ্দেশ্যে তিনি সর্বত্রই নানা ভঙ্গিতে নানা রকমের স্বন্দর স্বন্দর তুলনার আশ্রয় নিয়েছেন; আলোচ্য প্রবন্ধটিতেও তার প্রচুর নিদর্শন রয়েছে। তুলনাগুলির অধিকাংশই এমন চমৎকার যে তাতে মন আকৃষ্ট ও মুগ্ধ না হয়ে পারে না। কিন্তু তথাপি আমার বিশ্বাস, ও-সব তুলনা যথাসম্ভব পরিহার করে আলোচনা করাই উচিত। একটি দৃষ্টান্ত দিলেই বিষয়টা পরিষ্কার হবে আশা করি। রবীন্দ্রনাথ নানা প্রসঙ্গে নানা স্থানে ‘বৈজ্ঞানিক’ ছন্দের গতিকে পায়ে চলার ভঙ্গির সঙ্গে এবং ‘ত্রেমাজিক’ ছন্দের গতিকে ঢাকার চলার ভঙ্গির সঙ্গে তুলনা করেছেন। এই তুলনার দ্বারা ও-দুই ছন্দের সম্বন্ধে এক রকম করে একটা বিশেষ ধারণা হয় বটে। কিন্তু তার দ্বারা ও-দুই ছন্দের আসল প্রকৃতি ও পার্থক্য সম্বন্ধে বাস্তবিক উপলব্ধি হয় না। আমার বিশ্বাস রবীন্দ্রনাথ যদি যথাসম্ভব তুলনার ভাষা বর্জন করে ছন্দের আলোচনা করেন তা হলে বাংলা ছন্দের স্বরূপ উপলব্ধি করা পাঠকদের পক্ষে অনেক বেশি সহজ ও সরল হবে।

যে ছন্দকে আমি বলেছি স্বরবৃত্ত রবীন্দ্রনাথ তাকেই বলেন ‘প্রাকৃতছন্দ’; আর যে ছন্দকে আমি বলেছি ষোঁগিক বা অক্ষরবৃত্ত তিনি তাকেই বলেন ‘সাধু ছন্দ’। তাঁর দেওয়া এ নাম দুটি ছন্দগত নয়, ভাষাগত। তা ছাড়া ষোঁগিক ছন্দে যে সব সময়ই সাধু ভাষার ব্যবহার করতে হবে এমন কোনো আবশ্যিকতা নেই; আর স্বরবৃত্ত ছন্দেও প্রয়োজনমতো সাধু শব্দের (অর্থাৎ সাধু ভাষার ক্রিয়াপদের) ব্যবহার চলে থাকে। তাই তাঁর দেওয়া এ নামদুটি আমি গ্রহণ করতে পারি নি। এ বিষয়ে ফাস্কনের ‘বিচিত্রা’য় বিস্তৃত আলোচনা করেছি। ষোঁগিক ছন্দকে রবীন্দ্রনাথ কখনও কখনও ‘পয়ার-সম্প্রদায়’, ‘পয়ার জাতীয় বৈজ্ঞানিক ছন্দ’ ‘দুই-মূলক সমমাত্রার ছন্দ’ ইত্যাদি নামও দিয়েছেন।

ওই সব নামের যৌক্তিকতা নিয়ে এ স্থলে আলোচনা করা নিম্প্রয়োজন। এ সব ছন্দকে আমি কেন 'যৌগিক ছন্দ' নাম দিয়েছি সে বিষয়ে যথাস্থানে আলোচনা করব। কোন্ ছন্দকে আমি 'যৌগিক' আখ্যা দিয়েছি আশা করি সে সম্বন্ধে কোনো সংশয় নেই।

অগ্রহায়ণের 'বিচিত্রা'য় আমি এই যৌগিক ছন্দেরই অন্তর্নিহিত নিয়মটি, অর্থাৎ কবির স্বভাবতঃই যে নিয়মটি স্বীকার করে ও-ছন্দ রচনা করে থাকেন সেই নিয়মটি, আবিষ্কার করতে চেষ্টা করেছিলুম। মাঘের 'পরিচয়ে' রবীন্দ্রনাথ লিখেছেন 'খামকা একটা জ্বরদস্তির আইন জারি করে তার পরে পাহারাওয়ালা লাগিয়ে দেওয়া' সংগত নয়। এ বিষয়ে আমার বিনীত নিবেদন এই যে, আমি কবিদের স্বীকৃত নিয়মটি আবিষ্কার করতেই চেষ্টা করেছিলুম; কোনো নিয়ম 'জারি' করে কবিদের উপর 'জ্বরদস্তি' করা কখনই আমার অভিপ্রায় ছিল না। যদি আমাকে নৃত্যায় দেওয়া হয় যে, আমি যাকে যৌগিক ছন্দের নিয়ম বলে মনে করি সেটা ওই ছন্দের আসল নিয়ম নয়, তা হলে আমি অসংকোচে আমার ভ্রম স্বীকার করব। কোনো বিশেষ একটি নিয়মকে জ্বরদস্তির দ্বারা চালিয়ে দেবার মতো অন্যায় জেদ আমার নেই।

এখন দেখা যাক পূর্বোক্ত যৌগিক বা সাধু ছন্দের নিয়ম সম্বন্ধে রবীন্দ্রনাথ নিজেকে কি বলেন। তিনি লিখেছেন, 'আক্ষরিক ছন্দ বলে কোনো অদ্ভুত পদার্থ বাংলায় কিংবা অন্য কোনো ভাষাতেই নেই। অক্ষর ধ্বনির চিহ্ন মাত্র।... অক্ষরকে ধ্বনির প্রতিপক্ষ দাঁড় করানো বিড়ম্বনা।.....অক্ষরের সংখ্যা গণনা করে ছন্দের ধ্বনিমাত্রা গণনা বাংলায় চলে না।' এ সম্বন্ধে আমি প্রথমেই এ কথা বলতে চাই যে, রবীন্দ্রনাথ এখানে 'অক্ষর' শব্দটি বাংলায় প্রচলিত অর্থে অর্থাৎ হরফ অর্থেই ব্যবহার করেছেন; ('অক্ষর' শব্দের অর্থ সম্বন্ধে অত্র অলোচনা করেছি)। তাই তিনি স্বভাবতঃই আক্ষরিক ছন্দ সম্বন্ধে উক্ত মন্তব্য করেছেন; আর তাঁর এই মন্তব্য খুবই সংগত। কিন্তু সংস্কৃত ছন্দশাস্ত্রে 'অক্ষর' বলতে সিলেবল্ বোঝায় এবং সমস্ত সংস্কৃত ছন্দোবিদ্রূপেই 'আক্ষরিক' বা 'অক্ষরবৃত্ত' (syllabic) ছন্দের অস্তিত্ব সম্বন্ধে একমত। কিন্তু বাংলায় 'অক্ষর' বলতে যা বোঝায় সে অর্থে আক্ষরিক ছন্দ নামে অদ্ভুত পদার্থ কোনো ভাষাতেই হতে পারে না, এ বিষয়ে আমি রবীন্দ্রনাথের সঙ্গে সম্পূর্ণরূপে একমত। ছন্দ সম্বন্ধে বাদ্যের কিছুমাত্র জ্ঞান আছে তারা এ বিষয়ে দ্বিতীয় মত পোষণ করতে পারে না।

ছন্দোনিপুণ কবি সত্যেন্দ্রনাথও ঠিক এই কথাই বলেছেন ; “কেবল—‘বিজোড়ে বিজোড় গৈঁথে জোড়ে গৈঁথে জোড়’—হরকের পর হরক সাজিয়ে কম্পোজিটার-এর নকল করলে ঠিক চলবে না। বাংলা উচ্চারণের বিশেষত্ব বজায় রেখে” ছন্দ রচনা করতে হবে (ছন্দ-সরস্বতী, ভারতী ১৩২৫ বৈশাখ)। আর ঠিক এই কথাটি প্রতিপন্ন করাই ছিল আমার অগ্রহায়ণের প্রবন্ধের প্রধানতম উদ্দেশ্য। মাত্বে ‘বিচিত্রা’রও আমি দেখাতে চেষ্টি করেছি যে, কেবলমাত্র অক্ষরসংখ্যার সাম্য রক্ষা করে কোনো যথার্থ ছন্দ রচনা করা যায় না। কাজেই ‘ধারা অক্ষর গণনা করে নিয়ম বাঁধেন’ আমি তাঁদের দলে নই, এ কথা আমি জোরের সঙ্গেই বলতে পারি।

বরঞ্চ ‘অক্ষরের দাসত্বে বন্দী’ বলে বাঙালি কবিদের আমি দোষ দিয়েছি, রবীন্দ্রনাথের এই উক্তি আমি স্বীকার করতে পারি। কারণ ভারতচন্দ্রের সময় থেকে হেমচন্দ্র-নবীনচন্দ্রের সময় পর্যন্ত অক্ষরসংখ্যার সাম্য ছাড়া অন্য কোনো তত্ত্ব বিদ্যমান ছিল বলে আমার জানা নেই। মেঘনাদবধ কাব্যখানি আগাগোড়া শুধু চোক্ষ অক্ষরের পংক্তিতেই রচিত হয়েছে। আমার এ অভিযোগ সম্বন্ধে রবীন্দ্রনাথ নিজেই বলেছেন যে, ‘সেটা এই সময়কার পক্ষে কিছু অংশে খাটে। অর্থাৎ অক্ষরের মাপ সমান রেখে ধ্বনির মাপে ইতরবিশেষ করা তখনকার শৈথিল্যের দিনে চলত’। অবশেষে রবীন্দ্রনাথই বাংলা কবিতার ছন্দকে অক্ষরসংখ্যার ‘লৌহশৃঙ্খলের ডোর’ থেকে মুক্ত করেছেন। (বাংলা ছন্দে রবীন্দ্রনাথের দান—জয়ন্তী-উৎসর্গ, ৭৫-৭৭ পৃষ্ঠা দ্রষ্টব্য।)

রবীন্দ্রনাথ বলেছেন, ‘আক্ষরিক ছন্দ বলে কোনো অদ্ভুত পদার্থ বাংলা কিংবা কোনো ভাষাতেই নেই’। আর আমি বলেছি, ‘ধ্বনিবিচারহীন অক্ষরসংখ্যা কোনো ছন্দেরই মৌলিক তত্ত্ব হতে পারে না’ (জয়ন্তী-উৎসর্গ, পৃ ৭৬)। কিন্তু এ কথা ভুললে চলবে না যে, সমগ্র ঊনবিংশ শতাব্দী ব্যাপে বাংলায় বহু কাব্য রচিত হয়েছে তার প্রায় বোলো আনাই ওই অক্ষরগোনা ছন্দে রচিত। কলে ওই সময়কার কাব্যে বহু স্থানেই ছন্দের ধ্বনিগত ত্রুটিবিচ্যুতি ঘটেছে, সেটা কিছু বিচিত্র নয়। বরঞ্চ ওই সময়কার অক্ষরগোনা ছন্দে প্রতিপদেই যে খলন ঘটে নি সেটাই বিচিত্র। শুধু ‘অক্ষরের মাপ সমান রেখে’ ছন্দ রচনা করা সঙ্গেও ধ্বনির মাপে যে খুব বেশি দোষ ঘটে নি, তার প্রধান কারণ আমাদের লিপিপদ্ধতিতে ব্যঞ্জনসহভিক্তে যুক্তাক্ষরের দ্বারা লেখার প্রথা। আমাদের

লিপিপদ্ধতির দ্বারা বাংলা যৌগিক ছন্দটি কিভাবে নিয়ন্ত্রিত হয়েছে তার আলোচনা করার বিশেষ সার্থকতা আছে। কিন্তু এখানে সে প্রশঙ্গ উত্থাপন করার স্থান আমাদের নেই।

রবীন্দ্রনাথ বলেছেন ‘আক্ষরিক ছন্দ নামে কোনো অদ্ব্যুত পদার্থ কোনো ভাষাতেই নেই’। অথচ রবীন্দ্রনাথ নিজেই পয়ারজাতীয় (অর্থাৎ যৌগিক) ছন্দগুলির বিশ্লেষণ উপলক্ষে প্রায় সর্বদাই ‘অক্ষরে’রই হিসাব করে থাকেন; ‘ছন্দের হসন্ত হলন্ত’ প্রবন্ধটিতেও তার দৃষ্টান্তের অভাব নেই। একটিমাত্র দৃষ্টান্ত এখানে উদ্ধৃত করছি—‘আধুনিক বাংলা ছন্দে সব চেয়ে দীর্ঘ পয়ার আঠারো ‘অক্ষরে’ গাঁথা। তার প্রথম ষতি পদের মাঝখানে আট ‘অক্ষরের’ পরে, শেষ ষতি দশ ‘অক্ষরে’র পরে পদের শেষে।’ যদি আট ‘অক্ষর’ এবং দশ ‘অক্ষর’ গুনেই—এই দীর্ঘ পয়ারের বিশ্লেষণ করতে হয়, তা হলে বলতে হবে যে এই দীর্ঘ পয়ার একটি ‘আক্ষরিক’ ছন্দ। আসল কথা এই যে, প্রচলিত লৌকিক কায়দায় দীর্ঘ পয়ার এবং তজ্জাতীয় সমস্ত ছন্দকেই ‘অক্ষরে’র হিসাবে বিশ্লেষণ করা হয় এবং কাজেই লৌকিক পদ্ধতিতে এসমস্ত ছন্দকে ‘আক্ষরিক’ ছন্দ বলা চলে। কিন্তু ষথার্থ বৈজ্ঞানিক রীতিতে বিচার করলে ‘অক্ষরকে’ এসব ছন্দের unit বা ব্যাষ্টি বলা চলে না। বৈজ্ঞানিক রীতিতে বিশ্লেষণ করতে হলে বলতে হয় যে, দীর্ঘ পয়ারের প্রতিপংক্তি আঠারো ধনিব্যষ্টির যোগে রচিত; আর আট ব্যষ্টির পরে প্রথম ষতি, শেষ ষতি দশ ব্যষ্টির পরে।

লৌকিক কায়দায় ‘পয়ার জাতীয়’ সমস্ত ছন্দেরই—হিসাব রাখা হয় ‘অক্ষরের’ মাপে। তাই লৌকিক পদ্ধতিটাকে অগ্রাহ্য না করে আমি এজাতীয় ছন্দের সাধারণ নাম দিয়েছিলুম ‘অক্ষর’-বৃত্ত। কিন্তু সঙ্গে সঙ্গেই আবার আমাকে বলতে হয়েছিল, ‘অক্ষরবৃত্ত ছন্দও আসলে অক্ষরসংখ্যার উপর মোটেই নির্ভর করে না’ (বিচিত্রা, অগ্রহায়ণ, পৃ ৫৮০); ‘কিন্তু আসলে অক্ষর-সংখ্যা এ ছন্দের মূলগত তত্ত্ব নয়; ধনিবিচারহীন অক্ষরসংখ্যা কোনো ছন্দেরই মৌলিক তত্ত্ব হতে পারে না’ (জয়ন্তী-উৎসর্গ, পৃ: ৭৬)। কিন্তু এখন দেখতে পাচ্ছি এই শ্রেণীর ছন্দকে ‘অক্ষর’-বৃত্ত নাম দিয়ে আবার এগুলিকে ‘অক্ষর’-নিরপেক্ষ বলায় বিভ্রাট উপস্থিত হয়েছে। আমার এই উক্তির মধ্যে বিরোধ কল্পনা করার ফলে আমি ‘অক্ষর গণনা করে নিয়ম বাধি’ বলেও অভিযুক্ত

হয়েছি আবার ‘অক্ষরের দাসত্বে বন্দী বলে বাঙালি কবিদেরকে দোষ দিই’ বলেও অভিযুক্ত হয়েছি। এই দুটি পরস্পরবিরোধী অভিযোগই যুগপৎ সত্য হতে পারে না, এ কথা বলাই বাহুল্য। যা হক, এই উভয়সংকট থেকে জ্ঞান পাবার উদ্দেশ্যে আমি ‘অক্ষরবৃত্ত’ নামটার পরিবর্তে ‘পয়ারজাতীয় সাধু’ ছন্দগুলিকে ‘যোগিক ছন্দ’ নামে অভিহিত করেছি। অক্ষর শুনে ছন্দের বিশ্লেষণ করার লৌকিক রীতির সঙ্গে কোনোরকম রফা না করেই এই নতুন নামকরণ করেছি। অক্ষরসংখ্যার মাপে লৌকিক কায়দায় যাঁরা ছন্দের হিসাব রাখেন এই নতুন নামে তাঁদের অহবিধে হতে পারে। কিন্তু ছন্দের বৈজ্ঞানিক বিশ্লেষণের তরফ থেকে আমাকে ভুল বোঝার সম্ভাবনা থাকবে না, এই আশা করছি।

## ৩

বাংলা ছন্দের বিশ্লেষণপ্রসঙ্গে রবীন্দ্রনাথ বাংলা ভাষার একটি ধ্বনিগত নিয়মের উপর বিশেষ জোর দিয়েছেন। সে নিয়মটি হচ্ছে এই। ‘বাংলা ভাষায় স্বরবর্ণের ধ্বনিমাত্রা বিকল্পে দীর্ঘ ও হ্রস্ব হয়ে থাকে, ধ্রুকের ছিলের মতো টানলে বাড়ে, টান ছেড়ে দিলে কমে।’ এই নিয়মটিকে আমি কখনও অস্বীকার করি নি; বস্তুতঃ এই নিয়মটিকে ভিত্তি করেই আমি বাংলা ছন্দের শ্রেণীবিভাগ ও নামকরণ করেছি। এ স্থলে প্রসঙ্গক্রমে এ কথাও বলে রাখা ভাল যে, এ নিয়মটি কেবলমাত্র বাংলা ভাষারই স্বকীয় নয়; ইংরেজি ভাষা এবং ছন্দের পক্ষেও এ নিয়মটি বহু অংশে খাটে। ইংরেজিতে অনেক সিলেবল্ আছে যা ধ্বনির হ্রস্বদীর্ঘতার তরফ থেকে উভধর্মী বা common; অর্থাৎ অবস্থাবিশেষে ওই সিলেবল্গুলি হ্রস্ব হয় আবার অবস্থাবিশেষে অন্ততঃ দীর্ঘও হতে পারে। এই উভধর্মী সিলেবল্গুলি ইংরেজি ছন্দকে বিশেষভাবে নিয়ন্ত্রিত করে (George Saintsbury’s *Manual of English Prosody*, ২১-২২ পৃষ্ঠা দ্রষ্টব্য)। যা হক, রবীন্দ্রনাথের কথিত বাংলার উক্ত ধ্বনিগত নিয়মটিকে একটু ভাল করে অধ্ধাবন করলেই দেখা যাবে যে, এ নিয়মটিকে তিনি অত্যন্ত বেশি ব্যাপকভাবে উপস্থাপিত করেছেন। নিয়মটিকে যদি ব্যবহারে লাগাতে হয় তা হলে এটিকে আরও বিশ্লেষণ করা দরকার। বাংলা ভাষার ধ্বনি ‘স্থিতিস্থাপক’; প্রয়োজনমতো তাকে টান দিয়ে বাড়ানো যায়, আবার প্রয়োজনমতো টান ছেড়ে দিয়ে তাকে কমানোও

যায়;—তুখু এটুকু বলাই যথেষ্ট নয়। কখন ওই ধ্বনিকে টেনে বাড়াবার প্রয়োজন হয়, আর কখন টান ছেড়ে দিয়ে তাকে কমানো দরকার হয়, সে কথাটিও বলা চাই। কারণ ওই কথাটি না বললে এ নিয়মটিকে কাজে লাগানো যাবে না।

বাংলার ধ্বনিগত এই স্থিতিস্থাপকতা গুণটিকে কি ভাবে ছন্দরচনার কাজে ব্যবহার করা হয়ে থাকে আমি তাই দেখাতে চেষ্টা করেছি। ধ্বনির স্থিতিস্থাপকতাগুণের ব্যবহারিক প্রকৃতির প্রতি লক্ষ রেখেই আমি বাংলা ছন্দের শ্রেণীবিভাগ ও নামকরণ করেছি। ধ্বনির যে ব্যবহারিক তত্ত্বের উপরে আমি ছন্দের শ্রেণীবিভাগকে প্রতিষ্ঠিত করেছি এ স্থলে সংক্ষেপে তার পুনরুল্লেখ করছি। বাংলা ছন্দে, অযুগ্মধ্বনিকে সাধারণতঃ টেনে বাড়ানো হয় না; অযুগ্মধ্বনি প্রায় সর্বত্রই এক unit বলেই গণ্য হয়ে থাকে। কিন্তু বাংলার সমস্ত যুগ্মধ্বনিই উভয়মুখী বা common; কখনও একে টেনে দীর্ঘায়ত করে উচ্চারণ করা যায়, আবার কখনও একে ঠেসে হ্রস্ব আকারেও উচ্চারণ করা যায়। আমরা সর্বদা যে ভাষায় কথা বলি তাতেও ভাবপ্রকাশের সুবিধা অনুসারে আমরা যুগ্মধ্বনিকে কখনও দীর্ঘ কখনও হ্রস্ব রূপে উচ্চারণ করে থাকি। যুগ্মধ্বনিকে টেনে দীর্ঘায়ত করে আমরা যে উচ্চারণ করি আমি তাকে বলব যুগ্মধ্বনির ‘বিল্লিষ্ট’ উচ্চারণ, আর তাকে ঠেসে হ্রস্ব করে যে উচ্চারণ করি তাকে বলব ‘সংল্লিষ্ট’ উচ্চারণ। যে ছন্দে যুগ্মধ্বনি সর্বত্রই ‘সংল্লিষ্ট’ অর্থাৎ হ্রস্ব রূপে উচ্চারিত হয় তাকেই আমি বলি স্বরবৃত্ত ছন্দ। কেননা এ ছন্দের unit হচ্ছে স্বর বা সিলেবল; আর এ ছন্দে যুগ্মধ্বনির উচ্চারণ সংল্লিষ্ট বা হ্রস্ব বলেই এ ছন্দে যুগ্মধ্বনিকেও অযুগ্মধ্বনিরই মতো এক unit বলে গণনা করা যায়। যে ছন্দে যুগ্মধ্বনি সর্বত্রই ‘বিল্লিষ্ট’ অর্থাৎ দীর্ঘায়ত রূপে উচ্চারিত হয় তাকেই বলেছি মাত্রাবৃত্ত ছন্দ। কেননা এ ছন্দের unit হচ্ছে মাত্রা বা mora; আর এ ছন্দে যুগ্মধ্বনির উচ্চারণ বিল্লিষ্ট বা দীর্ঘ বলেই যুগ্মধ্বনিকে দুই মাত্রার মর্যাদা দেওয়া হয়ে থাকে, অযুগ্মধ্বনি এক মাত্রা বলেই গণ্য হয়। যে ছন্দকে আমি স্বরমাত্রিক নাম দিয়েছি সে ছন্দে যুগ্মধ্বনিকে বিকল্পে দীর্ঘ-হ্রস্ব দুয়কমেই উচ্চারণ করা যায়; অর্থাৎ এ ছন্দে সমস্ত যুগ্মধ্বনিকেই ইচ্ছে হলে বিল্লিষ্ট রূপে উচ্চারণ করা যায়, আবার ইচ্ছে হলে সংল্লিষ্ট রূপেও উচ্চারণ করা যায়। দৃষ্টান্ত দিলেই বিষয়টা স্পষ্ট হবে।—

|| || || || || || || ||

নিত্য নূতন | ছন্দ রচি' | তোমায় আমি | করিব দান

এটি চতুঃস্বর-পর্বিক স্বরবৃত্ত ছন্দে রচিত। বলা বাহুল্য, আমরা এ ছন্দটি পড়ার সময় যুগ্মধ্বনিগুলিকে স্বভাবতঃই সংশ্লিষ্ট ভাবে উচ্চারণ করে থাকি। এ পংক্তিটিকেই মাত্রাবৃত্ত ছন্দে রূপান্তরিত করা যাক।—

|| || || || || || || ||

নিত্য নূতন | ছন্দ রচিয়া | তোমায় আমরা | করিব দান

এটি হচ্ছে ষগ্গাত্র-পর্বিক মাত্রাবৃত্ত ছন্দের দৃষ্টান্ত। এই পংক্তিটিকে আবৃত্তি করলেই দেখা যাবে যে আমরা স্বভাবতঃই এ ছন্দের যুগ্মধ্বনিগুলিকে টেনে দীর্ঘ করে অর্থাৎ বিশ্লিষ্ট ভাবে উচ্চারণ করে থাকি; তাই এ ছন্দে অর্থাৎ মাত্রাবৃত্ত ছন্দে যুগ্মধ্বনি অনায়াসে দুই মাত্রার (mora-র) মর্যাদা পেয়ে থাকে। এবার একটা স্বরমাত্রিক ছন্দের পংক্তি উদ্ধৃত করছি।—

বিহঙ্গ-গান | শাস্ত এখন | স্তব্ধ রাতের | পক্ষ-ছায়ে

—বিজয়ী, পূর্ববী, রবীন্দ্রনাথ

এটা কি ছন্দ? যুগ্মধ্বনিগুলিকে সংশ্লিষ্ট ভাবে উচ্চারণ করে এ পংক্তিটিকে আমরা স্বরবৃত্তের ভঙ্গিতে আবৃত্তি করতে পারি। তা হলে এটি হবে চতুঃস্বর-পর্বিক স্বরবৃত্ত ছন্দ। আবার যুগ্মধ্বনিগুলিকে টেনে দীর্ঘ বা বিশ্লিষ্ট (অর্থাৎ দ্বিমাত্রিক) করে মাত্রাবৃত্তের ভঙ্গিতেও এ পংক্তিটিকে আবৃত্তি করা যায়। যেমন—

|| || || || || || || ||

বিহঙ্গ-গান | শাস্ত তখন | স্তব্ধ রাতের | পক্ষ-ছায়ে

এ ভাবে আবৃত্তি করলে এটিকে বলব ষগ্গাত্র-পর্বিক মাত্রাবৃত্ত ছন্দ। যে-সব ছন্দকে এ ভাবে স্বরবৃত্ত ও মাত্রাবৃত্ত (অর্থাৎ সংশ্লিষ্ট ও বিশ্লিষ্ট) দুই ভঙ্গিতেই আবৃত্তি করা যায় সে-সব ছন্দকেই আমি স্বর-মাত্রিক ছন্দ নাম দিয়েছি। এই পংক্তিটি হচ্ছে চতুঃস্বর-ষগ্গাত্র-পর্বিক স্বর-মাত্রিক ছন্দের দৃষ্টান্ত।

এবার একটি ষৌণ্ডিক ছন্দের বিশ্লেষণ করা যাক।—

|| || || || || || || ||

মানবের | জীর্ণ বাক্যে || যোর ছন্দ | দিবে নব | স্বর

—ভাষা ও ছন্দ, কাহিনী, রবীন্দ্রনাথ



এই পংক্তিটি বাঙালি পাঠক স্বভাবতঃই যে ভঙ্গিতে আবৃত্তি করে তার প্রতি লক্ষ করলেই দেখতে পাব যে, এ ছন্দে শব্দের মধ্যবর্তী যুগ্মধ্বনির উচ্চারণ সংশ্লিষ্ট আর শব্দের প্রান্তবর্তী যুগ্মধ্বনির উচ্চারণ বিস্লিষ্ট; কাজেই শব্দমধ্যবর্তী যুগ্মধ্বনি এক unit বলে গণ্য হয়েছে আর শব্দপ্রান্তবর্তী যুগ্মধ্বনি দুই unit-এর মর্যাদা পেয়েছে। এইটেই হচ্ছে এ ছন্দের সাধারণ রীতি; আর এজন্যেই এ ছন্দকে নাম দিয়েছি যৌগিক ছন্দ। বাংলায় ব্যঞ্জনসংহতিকে সাধারণতঃ যুক্তবর্ণের সাহায্যেই লেখা হয়ে থাকে। ওই যুক্তবর্ণকে যদি বিযুক্ত করে লেখা যায় তা হলেই যৌগিক ছন্দের এই সাধারণ রীতিটি আরও স্পষ্ট হবে। দৃষ্টান্ত দিচ্ছি।—

।। ।। ।। ।। ।। ।। ।। ।।  
হরাঙ্ গণা নন্দনের্ ॥ নিকুঞ্জ প্রাঙ্ গণে

।। । । । । । । । । । ।  
মন্দার মঞ্জরী তোলে ॥ চণ্ড চন্ কঙ্ কণে।

- 'পরিচয়' ১৩৩৮ মাস, রবীন্দ্রনাথ

এখানে যুক্তবর্ণগুলিকে বিযুক্ত করে লেখা হয়েছে অর্থাৎ যুগ্মধ্বনিগুলিকে স্পষ্ট করা হয়েছে। আমরা এ পংক্তিটিকে স্বভাবতঃই যে ভাবে আবৃত্তি করি তার প্রতি লক্ষ রাখলেই দেখা যাবে যে এখানে শব্দপ্রান্তবর্তী যুগ্মধ্বনিগুলির (যথা—নের, দার, চন্) উচ্চারণ বিস্লিষ্ট ও কাজেই বিব্যাপ্তিক; আর শব্দমধ্যবর্তী যুগ্মধ্বনিগুলির (যথা—রাঙ্, নন্, কুঞ্, প্রাঙ্ ইত্যাদি, উচ্চারণ সংশ্লিষ্ট ও একব্যাপ্তিক।

৪

যৌগিক ছন্দের এই নিয়মটি রবীন্দ্রনাথ নিজেও বিশেষভাবে অনুভব করেছেন সে বিষয়ে সন্দেহ নেই। তার প্রমাণ তাঁর লেখার মধ্যেই আছে। তিনি লিখেছেন 'বাংলায় হসন্ত বর্ণের পূর্ববর্তী স্বর দীর্ঘ হয়। যেমন জল, চাঁদ। এ ছুটি শব্দের উচ্চারণ জ-এর অ এবং চাঁ-এর আ আমরা দীর্ঘ করে টেনে পরবর্তী হসন্তের ক্ষতিপূরণ করে থাকি।... বাংলা ছন্দে প্রাক-হসন্ত স্বরকে দুই মাত্রার পদবি দেওয়া হয়েছে' (বিচিত্রা, পৌষ)। এ নিয়মটির কথাই তো আমি বলছি। আমি শুধু এটুকু যোগ করতে চাই যে, এ নিয়মটি মাত্রাবৃত্ত ছন্দে সর্বত্রই খাটে বটে কিন্তু যৌগিক ছন্দে এ নিয়মটি শুধু শব্দ-



যৌগিক ছন্দে শব্দাস্থিত যুগ্মধ্বনির উচ্চারণ বিল্লিষ্ট হবার কারণ এই যে, ওই ছন্দটাই আসলে গদ্যধর্মী। গদ্যের মতো প্রত্যেকটি শব্দকেই স্বতন্ত্রভাবে উচ্চারণ করার প্রয়োজন ওই ছন্দের আছে। তাই ও ছন্দে ধ্বনির প্রবাহ একেবারে বিচ্ছিন্ন গতিতে প্রবাহিত হয় না; এ ছন্দে ধ্বনিপ্রবাহ প্রত্যেকটি শব্দের স্বাভাব্য স্বীকার করে চলে। রবীন্দ্রনাথের কথাতেও আমার এই উক্তি সমর্থন পাই। তাঁর উদ্ধৃত দৃষ্টান্তের সাহায্যেই বিষয়টা বোঝাতে চেষ্টা করছি—

॥ ॥  
মহাভারতের কথ। অমৃত সমান

॥ ॥ + ॥  
কাশীরাম দাস্ কহে ॥ শুনে পুণ্যবান্ ।

এখানে তের, মান্, রাম্, দাস্ এবং বান্ এই পাঁচটি যুগ্মধ্বনিরই বিল্লিষ্ট অর্থাৎ দ্বিমাত্রিক উচ্চারণ, কেননা এরা শব্দের অন্তে অবস্থিত আছে। এ ছন্দে শব্দাস্থিত যুগ্মধ্বনিকে বিল্লিষ্টভাবে উচ্চারণ করার প্রয়োজন এই যে, এ ছন্দে প্রত্যেক শব্দকে বিচ্ছিন্ন ও স্বতন্ত্ররূপে উচ্চারণ করতে হয়। এক শব্দকে অগ্র শব্দের সঙ্গে জুড়ে দেওয়া চলে না। তাই কেউ ‘মহাভারতেরকথা’ কিংবা ‘দাস্‌কহে’ এভাবে আবৃত্তি

॥ ॥  
করে না। বাঙালি বরাবর সহজেই ‘মহাভারতের কথ’ এবং ‘দাস্ কহে’ পড়ে এসেছে—অর্থাৎ ‘তে’-র এ-কারকে এবং ‘দা’-এর আ-কারকে টেনে দীর্ঘ করে, বিল্লিষ্ট বা দ্বিমাত্রিক উচ্চারণ করে, শব্দগুলির পারস্পরিক বিচ্ছিন্নতা স্বাভাব্য রক্ষা করে এসেছে। এই হল এ ছন্দের অর্থাৎ যৌগিক ছন্দের একটি নিয়ম। তার দ্বিতীয় নিয়ম হচ্ছে যে স্থলে এক শব্দকে অগ্র শব্দ থেকে বিচ্ছিন্ন ও স্বতন্ত্র করার প্রয়োজন থাকে না, সে স্থলে (অর্থাৎ শব্দের মধ্যে) যুগ্মধ্বনির সংলিষ্ট হ্রস্ব উচ্চারণই হয়ে থাকে। যেমন, পুণ্যবান্। এখানে ‘বান্’ এই যুগ্মধ্বনিটা শব্দের

॥  
অন্তে আছে বলে এর বিল্লিষ্ট ও দ্বিমাত্রিক—বান্—উচ্চারণ হচ্ছে। কিন্তু পুণ্য যুগ্মধ্বনিটা শব্দের অন্তে নয়, তাই তার সংলিষ্ট বা সংক্ষিপ্ত উচ্চারণ এবং তার মূল্যও এক unit। রবীন্দ্রনাথ বলেছেন, বাঙালি পাঠক ‘পুণ্যবান্’ কথাটার ‘পুণ্যের’ মাত্রা কমিয়ে দিতে সংকোচ বোধ করে নি (উক্তরা ১৩৩৮ আশ্বিন পৃ ৩১৫ দ্রষ্টব্য)। যৌগিক ছন্দে ‘পুণ্যবান্’ কথাটার প্রথম যুগ্মধ্বনিটাকে (‘পুণ্’

-কে) আমরা ঠেসে সংশ্লিষ্ট বা সংক্ষিপ্ত করে উচ্চারণ করি, তাই তার ধ্বনিমূল্য এক unit; আর দ্বিতীয় যুগ্মধ্বনিটাকে ('বান্'-কে) আমরা টেনে দীর্ঘ বা বিস্ত্রিষ্ট করে উচ্চারণ করি, তাই তার ধ্বনিমূল্য দুই unit। এইটাই এ ছন্দের রীতি; আর এজগ্রেই এ ছন্দকে যোগিক ছন্দ নাম দিতে চাই। এ বিষয়ে রবীন্দ্রনাথের সঙ্গে আমার কিছুমাত্র মতভেদ আছে বলে আমি মনে করি নে।

স্বরবৃত্ত (syllabic) ছন্দে যুগ্মধ্বনির উচ্চারণ সর্বত্রই সংক্ষিপ্ত বা সংশ্লিষ্ট আর মাত্রাবৃত্ত (quantitative) ছন্দে যুগ্মধ্বনির উচ্চারণ বিস্ত্রিষ্ট। যেমন—

|                      |                      |                      |  
পুণ্যথাভায় | জমা শৃগ, | ভণ্ডামিতে | চারটি পোয়া

— বুড়শালিকের ঘাড়ের রোঁ, মধুসূদন

এটি স্বরবৃত্ত ছন্দ। এখানে 'পুণ্য' এবং 'শৃগ' উভয় শব্দেরই যুগ্মধ্বনির (পুণ্ এবং শূন্) সংশ্লিষ্ট উচ্চারণ। কিন্তু—

||                      ||                      ||                      ||                      ||                      ||  
পুণ্যলোভীর। নাই হলো ভীড়। শৃগ তোমার। অন্ধনে  
এটি মাত্রাবৃত্ত ছন্দ। এখানে ওই দুটি যুগ্মধ্বনিরই বিস্ত্রিষ্ট বা দুই মাত্রার উচ্চারণ।

||                      ||                      |                      ||  
কাশীরাম দাস কহে || শুনে পুণ্যবান্  
এখানে পুণ্-এর উচ্চারণ এক unit-এর অর্গাৎ সংক্ষিপ্ত কিন্তু বান্-এর উচ্চারণ বিস্ত্রিষ্ট। অতএব এটি যোগিক ছন্দ।

৫

যোগিক ছন্দের এই রীতিটির কথা রবীন্দ্রনাথ স্পষ্টভাবে খুলে না বললেও এ বিষয়ে তাঁর মত ও আমার মতের মধ্যে কোনোই পার্থক্য নেই, এ বিষয়ে আমি নিঃসন্দেহ। তাঁর রচিত দৃষ্টান্তগুলিই উদ্ধৃত করছি—

- (১) টোটকা এই। মুষ্টিযোগ || লটকানের। ছাল,  
সিটকে মুখ। খাবি, জর || আটকে যাবে। কাল।
- (২) একটি কথা। শুনিবারে || তিনটে রাত্রি। মাটি।  
এর পরে। ঝগড়া হবে। || শেষে দাঁত ক-। পাটি।
- (৩) একটি কথা। শোনো, মনে || থটকা নাহি। রেখে,  
টাটকা মাছ। নাই জোটে || স্টটকি দেখো। চেখে।

তিনি লিখেছেন এই ‘তিনটি ছড়ায় অক্ষর গুনতি করতে গেলে দৃশ্যতঃ পয়ারের সীমা ছাড়িয়ে যায় কিন্তু তাই বলেই যে পয়ার ছন্দের নির্দিষ্ট ধ্বনি বেড়ে গেল তা নয়। আপাততঃ মনে হয় এটা যথেষ্টাচার কিন্তু হিসাব করে দেখলেই দেখা যাবে ছন্দের নীতি নষ্ট করা হয় নি।’ আমিও অবিকল এই কথা বলেছি। ‘অক্ষর’ গুনে কোনো ছন্দেরই পরিমাপ করা যায় না, কারণ ‘ধ্বনিবিচারহীন ‘অক্ষর’সংখ্যা কোনো ছন্দেরই মৌলিক তত্ত্ব হতে পারে না।’ তাই উদ্ধৃত দৃষ্টান্ত তিনটিতে কোনো প্রকার ‘যথেষ্টাচার’ হয়েছে বলে আমি মনে করিনে। রবীন্দ্রনাথ বলেছেন ‘হিসাব’ করলেই দেখা যাবে এই ছড়া তিনটিতে পয়ার ছন্দের ‘নীতি’ নষ্ট করা হয় নি, তার ‘নির্দিষ্ট ধ্বনি’ বেড়ে যায় নি। কিন্তু পয়ার ছন্দের নির্দিষ্ট ধ্বনি এবং নীতি কি, আর কি ভাবে তার ‘হিসাব’ করতে হবে সে বিষয়ে তিনি কিছুই বলেন নি।

এ ছন্দের নীতি, নির্দিষ্ট ধ্বনি এবং তার হিসাবপ্রণালী সম্বন্ধে আমি যে নিয়মের উল্লেখ করেছি, সে নিয়মটিকে এই দৃষ্টান্ত তিনটিতে প্রয়োগ করলেই দেখা যাবে যে এগুলিতে যৌগিক ছন্দের নিয়ম সর্বদাই অক্ষুণ্ণ আছে।—

। । ॥ । । ॥ । । ॥ ॥  
(১) টোটকা এই। মুষ্টিযোগ্ ॥ লট্‌কানের। ছাল্

। । ॥ । । ॥ । । । । ॥  
সিট্‌কে মুখ। খাবি জ্বর ॥ আট্‌কে যাবে। কাল।

। । । । । । । । । । । । । । । ।  
(২) একটি কথা। শুনিবারে ॥ তিনটে রাত্রি। মাটি :

॥ । । । । । । । । । । । । । । । ।  
এর পরে-। ঝগড়া হবে,। শেষে দাত্‌ক-। পাটি।

। । । । । । । । । । । । । । । ।  
(৩) একটি কথা। শোনো, মনে ॥ খট্‌কা নাহি। রেখে,

। । ॥ ॥ । । । । । । । । । ।  
টাট্‌কা মাছ। নাই, জোটে ॥ স্থিতি দেখো। চেখে।

লক্ষ করার বিষয় শব্দমধ্যবর্তী যুগ্মধ্বনি সর্বত্রই এক unit এবং শব্দান্তস্থিত যুগ্মধ্বনি সর্বত্রই দুই unit। এইটাই আমার কথিত যৌগিক ছন্দের নিয়ম। ‘লট্‌কানের ছাল’—এখানে লট্‌ যুগ্মধ্বনিটা শব্দমধ্যবর্তী বলে তার উচ্চারণ সংক্ষিপ্ত



‘হিসাব’ ছাড়া অন্য কোনো হিসাবেই এ ছন্দের ধ্বনির পরিমাপ করা যাবে না বলেই আমি মনে করি। এই হিসাব ছাড়া আর কোন হিসাবে আইডিয়াল, প্র্যাকটিক্যাল, অক্সিজেন, ব্লুম্কা ফুল প্রভৃতি শব্দে চার unit গণনা করা যাবে ?

৬

এবার ষোড়শিক ছন্দের ওই নিয়মটির ব্যতিক্রমগুলির বিচার করা যাক। উদ্ধৃত দ্বিতীয় দৃষ্টান্তে ‘তিনটে রাত্রি। মাটি’ না লিখে যদি লেখা হত ‘তিনটে রাত। মাটি’ তাহলেও ওই নিয়ম অনুসারেই ছন্দ ঠিক থাকত, কেননা তখন ‘রাত’ এই যুগ্মধ্বনির বিশ্লিষ্ট অর্থ্যাৎ দুই মাত্রার উচ্চারণ হত। কিন্তু চতুর্থ দৃষ্টান্তের ‘মাছটি’ শব্দের ধ্বনিবিচার কি ভাবে করা যাবে? রবীন্দ্রনাথ লিখেছেন—

পাংলা করি। কাটো প্রিয়ে ॥ কাংলা মাছ-। টিরে

এখানে ষোড়শিক ছন্দের নিয়ম অব্যাহতই আছে, কেননা ‘মাছ’ এই যুগ্মধ্বনিটাতে দুই মাত্রা রয়েছে। আমি যদি এই পংক্তিটাকে একটু পরিবর্তিত করে লিখি—

পাংলা করি। কাংলা মাছটি ॥ কাটো দেখি। প্রিয়ে

তাহলেও ষোড়শিক ছন্দের নীতি নষ্ট হবে না। তখন ‘মাছ’ এই যুগ্মধ্বনিটা উচ্চারণে সংশ্লিষ্ট ও ধ্বনিমর্যাদায় একব্যাপ্তিক বলে গণ্য হবে। মাঘের ‘বিচিত্রা’র আমি লিখেছিলুম

॥

‘একটু ন’ড়োনা কেউ ॥ রায়েদের লাঠিয়াল কই’

এটাও ষোড়শিক ছন্দ। এখানে ‘এক’ ধ্বনিটাতে দুই মাত্রা! যদি একটু পরিবর্তিত করে লেখা যায়—

।

একটুও ন’ড়োনা কেউ

তাহলে ‘এক’ শব্দটার ধ্বনিমর্যাদা কমে যাবে। অথচ ছন্দের নীতি ঠিকই থাকবে। এটা কি করে হতে পারে শ্রীযুক্ত দিলীপকুমার আশ্বিনের ‘উত্তরা’র সে প্রশ্ন তুলেছেন। মাঘের ‘পরিচয়ে’ রবীন্দ্রনাথ সে প্রশ্নের উত্তর দিয়েছেন। তাঁর উত্তর হচ্ছে এই যে, ‘বাংলা ভাষায় স্বরবর্ণের ধ্বনিমাত্রা বিকল্পে দীর্ঘ ও হ্রস্ব হয়ে থাকে, যজ্ঞকের ছিলের মতো টানলে বাড়ে, টান ছেড়ে দিলে কমে’। এই নিয়ম

অনুসারে 'কাংলা মাছটি'র এখানে 'মাছ' ধ্বনিটাকে 'টেনে' বাড়ানো অর্থাৎ দ্বিবাঞ্ছিক করা হয়েছে। আবার 'কাংলা মাছটি' এখানে 'মাছ' ধ্বনিটাকে 'ঠেসে' দিয়ে তার মাত্রা কমিয়ে দেওয়া হয়েছে। তেমনি 'একটু নড়োনা কেউ' এখানে 'এক্' ধ্বনিটাকে টেনে ( অর্থাৎ বিস্ত্রিষ্ট উচ্চারণ করে ) বাড়ানো হয়েছে, তাই এখানে দুমাত্রা। আবার 'একটুও নড়োনা কেউ' এখানে 'এক' ধ্বনিটাকে ঠেসে ( অর্থাৎ সংক্লিষ্ট উচ্চারণ করে ) কমানো হয়েছে। রবীন্দ্রনাথের কথিত এই নিয়মটির সত্যতা সম্বন্ধে কারও সংশয় থাকতে পারে না। বাংলা যুগ্মধ্বনির এই স্থিতিস্থাপকতার কথা আমি বহুবার বলেছি।

কিন্তু তথাপি একটা প্রশ্ন থেকে যায় যে বৌগিক ছন্দে কি সর্বত্রই সমস্ত যুগ্মধ্বনিকেই নির্বিচারে টেনে বাড়ানো এবং ঠেসে কমানো যায়? আমাদের বিশ্বাস তা যায় না। এ ছন্দে যুগ্মধ্বনিকে টেনে বাড়ানো এবং ঠেসে কমানোর একটি বিশেষ নিয়ম আছে। সেটি হচ্ছে এই। শব্দাস্তস্থিত যুগ্মধ্বনিকে সর্বদাই টেনে বাড়ানো হয়, কখনোই ঠেসে কমানো যায় না। আবার শব্দমধ্যস্থিত যুগ্মধ্বনিকে অধিকাংশ স্থলেই ঠেসে কমানো হয়ে থাকে; তবে কচিং কখনও কখনও টেনে বাড়ানোও যায়। যেমন 'কাশীরাম দাস কহে শুনে পুণ্যবান' এখানে শব্দাস্তস্থিত যুগ্মধ্বনিগুলিকে ( রাম্, দাস্ এবং বান্ ) টেনে বাড়ানোই হয়েছে আর শব্দমধ্যস্থিত যুগ্মধ্বনি 'পুণ্'কে ঠেসে কমানোই হয়েছে। এইটেই এ ছন্দের সাধারণ রীতি।

শব্দমধ্যস্থিত যুগ্মধ্বনিকে কোথায় কোথায় টেনে বাড়ানো যায়, সেইটেই আসল প্রশ্ন। এ প্রশ্নের উত্তর এই। (১) সংস্কৃত শব্দের মধ্যবর্তী যুগ্মধ্বনিকে কখনও টেনে বাড়ানো হয় না। (২) সমাসবদ্ধ সংস্কৃত শব্দের প্রথম পদের অন্তস্থিত যুগ্মধ্বনিকে বিকল্পে বাড়ানো কমানো যায়। (৩) অ-সংস্কৃত শব্দের মধ্যবর্তী যুগ্মধ্বনিকে বিকল্পে টেনে বাড়ানো কিংবা ঠেসে কমানো যায়। (৪) অ-সংস্কৃত প্রত্যয় পরে থাকলে শব্দাস্তস্থিত যুগ্মধ্বনিকে সাধারণতঃ টেনে বাড়ানোই হয় এবং ইচ্ছা করলে ঠেসে কমানোও যায়।

দৃষ্টান্ত দিলেই এই নিয়ম চারটির সার্থকতা বোঝা যাবে। প্রথমেই চতুর্থ নিয়মটির আলোচনা করা যাক। এক, তিন, মাছ, এগুলি এক-একটি যুগ্মধ্বনিমূলক শব্দ। বৌগিক ছন্দে এগুলি সর্বদাই দুই মাত্রা বলেই গণ্য হয়।



কিন্তু এসব শব্দের পরে যদি টি, টে, টুহু, লা ইত্যাদি প্রত্যয় থাকে তবে এই যুগ্মধ্বনিগুলিকে বিকল্পে ঠেসে কমিয়ে দেওয়া যায়। তাই 'একটু' 'মাছটি' 'দিনটা' প্রভৃতি শব্দকে বৈগিক ছন্দে তিন unit বলেও গণ্য করা যায়, আবার ইচ্ছে করলে দুই unit বলেও চালানো যায়। অর্থাৎ ছন্দরচয়িতা ইচ্ছে করলে 'এক-টু' কথাটির 'এক' শব্দ এবং 'টু' প্রত্যয়কে বিচ্ছিন্ন বা স্বতন্ত্র রেখে সমগ্র কথাটিকে তিন unit বলে গণ্য করতে পারেন। আবার ইচ্ছে করলে তিনি 'একটু' কথাটিকে একটি অখণ্ড শব্দরূপে গণ্য করে তাকে দুই unit-এর মূল্য দিতে পারেন। এই অ-সংস্কৃত প্রত্যয়টি যদি একাধিক স্বর অর্থাৎ দিলেব্-ল-বিশিষ্ট হয় তবে ওই প্রত্যয়ের পূর্ববর্তী যুগ্মধ্বনিটিকে সাধারণতঃ ঠেসে কমানো হয় না। যথা—দিনগুলি। এখানে 'দিন্' এই যুগ্মধ্বনিটাকে টেনে বাড়িয়ে দুই unit-এর মর্যাদা দেওয়াই সাধারণ রীতি এবং 'দিনগুলি' শব্দটাতে সবহুঙ্ক চার unit ধরা হয়। কিন্তু যদি 'দিন' ধ্বনিটাকে ঠেসে কমিয়ে দেওয়াই অভিপ্রায় হয় তবে তাও করা যায় বলে আমার বিশ্বাস। দৃষ্টান্ত দিচ্ছি—

॥

বোঁবন-বেদনা-রসে ॥ উচ্ছল আমার দিনগুলি

—তপোভঙ্গ, পুরবী, রবীন্দ্রনাথ

এখানে 'দিন' ধ্বনিটাকে টেনে অর্থাৎ বিস্তৃতি করে উচ্চারণ করা দরকার; তাই ওই ধ্বনিটার মূল্য দুই unit বা ব্যাপ্তি। কিন্তু যদি আমি লিখি,—

দুঃখের দিনগুলি মোর ॥ গিয়াছে ক'টিয়া

তাহলেও ছন্দের নীতি নষ্ট হবে বলে মনে করিনে। কিন্তু এখানে 'দিন' ধ্বনিটাকে ঠেসে ছোট করে উচ্চারণ করতে হবে।

এবার পূর্বোক্ত তৃতীয় নিয়মটির আলোচনা করা যাক। রবীন্দ্রনাথের রচিত দুটি দৃষ্টান্ত উদ্ধৃত করলেই বোঝাবার পক্ষে হুবিধে হবে—

(১) চিম্নি ভেঙে গেছে দেখে গিন্নি রেগে খুন,

ঝি বলে আমার দোষ নেই ঠাকরুণ।

(২) চিম্নি ফেটেচে দেখে গৃহিণী সরোষ,

ঝি বলে ঠাকরুণ মোর নাই কোনো দোষ।

প্রথম দৃষ্টান্তটিতে 'চিম্নি' শব্দের 'চিম্' যুগ্মধ্বনিতে এক unit এবং 'ঠাকরুণ' শব্দের 'ঠাক' যুগ্মধ্বনিতে দুই unit। দ্বিতীয়টিতে 'চিম্'কে বাড়িয়ে দুই unit

এবং 'ঠাক্'কে খর্ব করে এক unit করা হয়েছে। বাংলা যৌগিক ছন্দে অ-সংস্কৃত শব্দের মধ্যবর্তী যুগ্মধ্বনিকে এভাবে বাড়ানো কমানো যায়, এ কথা পূর্বেই বলেছি। কিন্তু প্রশ্ন হতে পারে 'চিম্‌নি' শব্দে দুই unit এবং তিন unit ধরা, কোন্টা এ ছন্দের সাধারণ নিয়ম (rule) এবং কোন্টা ব্যতিক্রম (exception)? • আমি বলি 'চিম্‌নি' শব্দে দুই unit এবং 'ঠাক্‌রূপ' শব্দে তিন unit ধরাই এ ছন্দের 'সাধারণ' বিধি এবং ওই শব্দ দুটিতে যথাক্রমে তিন unit এবং চার unit ধরা এ ছন্দের পক্ষে 'বিশেষ' বিধি। অর্থাৎ যৌগিক ছন্দে শব্দমধ্যবর্তী যুগ্মধ্বনিকে ঠেসে সংক্ষিপ্ত করে এক unit ধরাই সাধারণ রীতি এবং তাকে টেনে দীর্ঘ করে দুই unit ধরা বিশেষ রীতি। শুধু তাই নয়। পূর্বেই বলেছি যে, শব্দমধ্যবর্তী যুগ্মধ্বনিকে টেনে দীর্ঘ বা আয়ত করা মাত্রাবৃত্ত ছন্দেরই বিশিষ্ট লক্ষণ। সুতরাং যৌগিক ছন্দের কোনো পর্বে যদি শব্দমধ্যবর্তী যুগ্মধ্বনির আয়ত রূপ দেখতে পাই তবে বলব যে ওই পর্বটি মাত্রিক (quantitative) পদ্ধতিতে রচিত। ইংরেজি ছন্দে এরূপ ব্যতিক্রম প্রায়ই দেখা যায়। যেমন trochaic ছন্দে মাঝে মাঝে dactylic foot বা পর্ব দেখা যায়; iambic ছন্দে কখনও কখনও দুয়েকটা anapaestic foot-ও চালিয়ে দেওয়া যায়। তেমনি বাংলা যৌগিক ছন্দেও মধ্য মধ্য মাত্রিক পর্বের অনুলবদল (equivalent substitute) চলে। পূর্বোক্ত প্রথম দৃষ্টান্তের 'নেই ঠাক্‌রূপ' পদটিকে বলব যৌগিক ছন্দে মাত্রিক substitute। তেমনি দ্বিতীয় দৃষ্টান্তের 'চিম্‌নি ফেটেচে দেখে' পদটি মাত্রিক। যদি লেখা হয়—

চিম্‌নি ফেটেছে দেখে গিন্নি সরোষ

তাহলে বলব সমস্ত পংক্তিটাই মাত্রিক বা মাত্রাবৃত্ত অর্থাৎ quantitative ছন্দে রচিত হয়েছে।

কুস্তির আখড়ায় ভিত্তিকে ধরে

জল ছিটাইয়া দাও ধূলা থাক মরে।

এই পংক্তি দুটি আগাগোড়া মাত্রাবৃত্ত ছন্দে রচিত। এটা পয়ার বটে; কিন্তু মাত্রাবৃত্ত পয়ার, যৌগিক পয়ার নয়। এর প্রতি পর্বে চার মাত্রা বা mora আছে।

হাস্তা দিয়ে | কুস্তিগির ॥ চলে ঘোঁষা | ঘোঁষি

একটা নয় | দুটো নয় ॥ এক-শোয় | বেশি।

এটি যৌগিক পয়ার। কিন্তু—

খুব তার বোলচাল সাজ ফিট্‌ফাট,  
ভক্ত্যর হ'লে আর নাই মিট্‌মাট্‌।  
চমমায় চমকায় আড়ে চায় চোখ,  
কোনো ঠাই ঠেকে নাই কোনো বড়ো লোক।

এটিকে কখনোই সাধারণ ( অর্থাৎ যৌগিক ) পয়ার বলা যায় না। একে পয়ারের 'ছিব্‌লেমি' বললেও চলবে না। এর আসল রূপ হচ্ছে মাত্রিক ; অর্থাৎ quantitative পয়ার বললে এর আসল পরিচয় দেওয়া হয়। ধ্বনির পরিমাণ বা quantity-র মাপ রক্ষা করে এখানে সর্বত্রই যুগ্মধ্বনিকে দুই মাত্রার (morar) মর্যাদা দেওয়া হয়েছে এবং এর প্রতি পর্বেই চার মাত্রা রয়েছে।

একটি কথার লাগি            তিনটি রজনী জাগি  
একটুও নাহি মেলে সাড়া।  
সখীরা যখন ছোটে,  
কথা যেন বগ্না ছোটে  
গোলমালে তোলপাড় পাড়া ॥

এখানে 'কথা যেন বগ্না ছোটে' শুধু এই পদটিতে যৌগিক ছন্দের নীতি আছে ; অন্য সর্বত্রই মাত্রিক প্রকৃতি অব্যাহত আছে। যদি লেখা হত 'কথার বগ্না ছোটে' তাহলে বলতুম এই পংক্তিকটি আগাগোড়া মাত্রাবৃত্ত (quantitative) ছন্দেই রচিত।

নবাক্ষণ চন্দনের তিলকে  
দিক্‌ ললাট এঁকে আজি দিল কে।  
বরণের পাত্র হাতে  
উষা এলো স্বপ্রভাতে  
জয়শঙ্খ বেজে ওঠে ত্রিলোকে।

এটি হল খণ্ডিত যৌগিক পয়ার। রবীন্দ্রনাথও তাই বলেছেন। একে যদি নিয়লিখিত রূপে রূপান্তরিত করি—

নবাক্ষণ-চন্দন-তিলকে  
দিক্‌-ভাল এঁকে আজি দিল কে।

বরণ-পাত্র হাতে

এলো কে স্তম্ভভাতে,

জয়শীথ বেজে ওঠে ত্রিলোকে ।

তাহলে একে বলব খণ্ডিত মাত্রিক পয়ার ; এর বৈজ্ঞানিক রূপ পরিবর্তিত হয়ে গেল । এ দৃষ্টান্তটিতে যুগ্মধ্বনি সর্বত্রই দ্বিমাত্রিক বলে গৃহীত হয়েছে । যদি যুগ্মধ্বনি একেবারে বর্জন করা যায় তাহলে এ ছন্দের রূপ হবে এরকম—

অধীর বাতাস এলো সকালে,

বনেরে বৃথাই শুধু বকালে ।

দিনশেষে দেখি চেয়ে

ঝরা ফুল মাটি ছেয়ে

লতাকে কাঙাল করে ঠকালে ।

এটিকেও খণ্ডিত মাত্রিক পয়ার বলাই সংগত ।

আমাদের আলোচ্য বিষয়ে ফিরে আসা যাক । পূর্বোক্ত চারটি নিয়মের দ্বিতীয় নিয়মটি হচ্ছে এই—সমাসবদ্ধ সংস্কৃত শব্দের প্রথম পদের অন্তস্থিত যুগ্মধ্বনিকে বিকল্পে বাড়ানো কমানো যায় । দৃষ্টান্ত দিলেই এ বিষয়ে সংশয় থাকবে না । যথা—

(১) সেই নিঝরিণী ধারা রবিকরস্পর্শে উচ্ছ্বসিতা

‘দিগ্-দিগন্তে’ প্রচারিছে অন্তহীন আনন্দের গীতা ।

—পরিচয়, মাঘ, রবীন্দ্রনাথ

(২) নবাক্ষণ চন্দনের তিলকে

‘দিক্-ললাটে’ এঁকে আজি দিল কে ।

—ঐ

(৩) উদয় ‘দিক্-প্রান্ত’-তলে নেমে এসে,

—পাঁচশ বৈশাখ, পূর্ববী, রবীন্দ্রনাথ

এই তিনটি দৃষ্টান্তেই ‘দিক্’ এই যুগ্মধ্বনিটার উচ্চারণ সংক্ষিপ্ত, তাই তার মূল্য এক unit মাত্র । কিন্তু নিম্নলিখিত দৃষ্টান্তগুলিতে ‘দিক্’ ধ্বনিটার উচ্চারণরূপ বিস্ত্রিষ্ট ও আয়ত এবং তার মূল্যও দুই unit—

(১) কোথা হতে আচম্বিতে মুহূর্তেকে ‘দিক্-দিগন্তর’

করি অন্তরাল

—বর্ষশেষ, কল্পনা, রবীন্দ্রনাথ

- (২) কেন আসিতেছ যুদ্ধ মোর পানে ধৈর্যে  
ওগো 'দিক্‌প্রাস্ত' পান্থ ত্বার্থ নয়ানে  
লুক্‌ বেগে !

—দরীচিকা, চিত্রা, রবীন্দ্রনাথ

- (৩) ইংলণ্ডের 'দিক্‌প্রাস্ত' পেয়েছিল সেদিন তোমারে  
আপন বন্ধের কাছে ।

—৩২, বলাকা, রবীন্দ্রনাথ

- (৪) চলেছে উজান ঠেলি তরঙ্গী তোমার,  
'দিক্‌প্রাস্তে' নামে অন্ধকার ।

—নববধূ, মহুয়া, রবীন্দ্রনাথ

- (৫) 'দিক্‌প্রাস্তে' তারি ওই ক্ষীণ নম্র কলা  
নীরবে বলুক আজি আমাদের সব কথা বলা ।

—প্রত্যংগ, ই

'দিক্‌চক্র' 'দিগ্‌গজ' প্রভৃতি অগাঢ় শব্দ সঙ্গ্বে ও এই নিয়ম খাটে । কিন্তু দিগ্‌বধু, দিগ্‌বলয়, প্রাক্তন প্রভৃতি যে সব সমাসবদ্ধ শব্দে প্রথম পদটি দ্বিতীয় পদের সঙ্গ্বে অবিচ্ছেদ্য ভাবে যুক্ত হয়ে যায় সে সব শব্দের প্রথম পদের অন্তর্স্থিত যুগ্মধ্বনিটিকে যৌগিক ছন্দে কখনও টেনে বাড়িয়ে দুই মাত্রার মূল্য দেওয়া হয় না । যথা—

- (১) জন্ম-মরণের

'দিগ্‌বলয়'-চক্রযেথা জীবনের দিয়েছিল ঘের ।

—পঁচিশে বৈশাখ, রবী, রবীন্দ্রনাথ

- (২) পশ্চিম 'দিগ্‌বধু' দেখে সোনার স্বপন

—পরশপাখর, সোনার তরী, রবীন্দ্রনাথ

সমাসবদ্ধ শব্দের সংযোগস্থলস্থ যুগ্মধ্বনির বৈকল্পিক দীর্ঘত্বস্বতার আরও কয়েকটি দৃষ্টান্ত দেওয়া প্রয়োজন—

- (১) জীবন-উৎসব-শেষে দুই পায়ে ঠেলে

মৃৎপাত্রের মতো যাও ফেলে ।

—শাজাহান, বলাকা, রবীন্দ্রনাথ

- (২) হরিণের ধর ধর হৃৎপিণ্ড যেমন

—পদ্মধ্বনি, পূরবি, রবীন্দ্রনাথ

(৩) ধনিয়া উঠুক তব হৃৎকম্পনে তার দীপ্ত বাণী

—নববর্ষ, বলাকা, রবীন্দ্রনাথ

(৪) আনন্দের হৃৎকম্পনে আন্দোলিছে কণে কণে

বেদনার রক্ত দেবতা যে।

—উৎসবের দিন, পূরবী, রবীন্দ্রনাথ

এই চারটি দৃষ্টান্তেই ‘হৃৎ’ এবং ‘হৃৎ’ উচ্চারণের আকারে সংক্ষিপ্ত এবং ধনিমর্ষাদায় এক unit। কিন্তু—

(১) হৃৎপাত্রে রক্ত দিয়া লিখিতেছি অস্তহীন প্রেম-পত্র তার

—কালশ্রোত, বন্দীর বন্দনা, বুদ্ধদেব

(২) আমাদেরি হৃৎপিণ্ডে বিদ্ধ হবে জলন্ত শলাকা

—কোনো বন্ধুর প্রতি, ঐ

(৩) প্রণয়ের প্রতিশ্রুতি, হৃৎ-পত্রে প্রেমের স্বাক্ষর

—মোহমুক্ত, ঐ

এই তিনটি দৃষ্টান্তেই ‘হৃৎ’ উচ্চারণে বিল্লিষ্ট এবং ধনিমর্ষাদায় দুই unit। তেমনি জগৎ-বিখ্যাত, তড়িৎ-চকিত, বিদ্যুৎ-দীপ্ত প্রভৃতি বহু শব্দেরই সংযোগস্থলস্থিত যুগ্মধ্বনিকে বিকল্পে দীর্ঘ-ব্রহ্ম করা যায়। শুধু যে ব্যঞ্জনসন্ধির ফলেই এমন হয় তা নয়, উদ্ধৃত দৃষ্টান্তগুলিই তার প্রমাণ। আরও দৃষ্টান্ত দেওয়া যাক—

এমনি অশ্রান্ত বৃষ্টি,

তড়িৎ-চকিত দৃষ্টি,

এমনি কাতর হায় রমণীর হিয়া।

—একাল ও সেকাল, মানসী, রবীন্দ্রনাথ

এখানে ‘তড়িৎ’ কথাটিতে তিন unit। কিন্তু—

তব ভাল উদ্ভাসিয়া এ ভাবনা তড়িৎপ্রভাবৎ

এসেছিল নাহি,

—শিবাজীউৎসব, পূরবী, রবীন্দ্রনাথ

এখানে ‘তড়িৎপ্রভা’ শব্দের ‘তড়িৎ’ দুই unit-এর বেশি মূল্য পায় নি। যদি লেখা হত ‘তড়িৎপ্রভায়’ তাহলেও অর্থাৎ ‘তড়িৎ’কে তিন unit-এর মর্ষাদা দিলেও খারাপ শোনাত না। আরও দৃষ্টান্ত দেওয়া যাক—

আঁকি দিল দিগ্-দিগন্তে যুগান্তের বিদ্যাবহিতে  
মহামন্ত্রশিখা ।

—শিবাজীউৎসব, পুরবী, রবীন্দ্রনাথ

এখানে ‘দিগ্-দিগন্তে’ শব্দের প্রথম পদাস্থিত যুগ্মধ্বনিটির মূল্য এক unit বটে ; কিন্তু ‘বিদ্যাবহি’ শব্দের প্রথম পদাস্থিত যুগ্মধ্বনিকে দুই unit-এর মূল্য দেওয়া হয়েছে ।

বিদ্যাবহির সর্প হানে ফণা যুগান্তের মেঘে

—তপোভঙ্গ, পুরবী, রবীন্দ্রনাথ

এখানেও ‘বিদ্যাব’ শব্দে তিন unit । যদি লেখা যায়—

বিদ্যাবহি সর্পসম হানে ফণা যুগান্তের মেঘে

অর্থাৎ যদি ‘বিদ্যাব’ শব্দের শেষ যুগ্মধ্বনিকে সংশ্লিষ্ট করে তার ধ্বনিমর্যাদা এক unit কমিলে দেওয়া যায় তাহলেও ছন্দের নীতি নষ্ট হবে না ।

বিদ্যাব-বিদীর্ণ শূণ্ডে ঝাঁকে ঝাঁকে উড়ে চলে যায়

উৎকর্ষিত সাধী ।

—বর্ষশেষ, কল্লনা, রবীন্দ্রনাথ

যদি ‘বিদ্যাব’ শব্দের অন্তিম যুগ্মধ্বনিটির মাত্রাসংকোচ করে লেখা যায় ‘বিদ্যাবদীর্ণ মহাশূণ্ডে ঝাঁকে ঝাঁকে উড়ে চলে যায়’ তাহলেও যৌগিক ছন্দের রীতি লঙ্ঘিত হত না । আর দৃষ্টান্ত দেওয়া নিশ্চয়োজন । আশা করি সমাসবন্ধ শব্দের প্রথমপদাস্থিত যুগ্মধ্বনির বৈকল্পিকতা সম্বন্ধে আর কোনো সন্দেহ নেই । অতএব বাগ্‌দত্তা, বাগ্‌দেবতা, বাগ্‌বিতণ্ডা, হুংপন্ন, হুংবৃন্ত, হুংপিপাসা, প্রাণ্‌মুখী, পরাণ্‌মুখ প্রভৃতি সমাসবন্ধ শব্দের সংযোগস্থলের যুগ্মধ্বনিকে যে বিকল্পে প্রসারিত ও সংকুচিত করা যাবে, তা বলাই বাহুল্য । কিন্তু একথা বলা প্রয়োজন যে ও-সব শব্দের যুগ্মধ্বনিকে সংকুচিত করাই যৌগিক ছন্দের সাধারণ বিধি, বিশেষতঃ সমাসবন্ধ শব্দের প্রথম পদটি যদি একস্বরাত্মক ( monosyllabic ) হয় ; আর ও-রকম যুগ্মধ্বনিকে প্রসারিত করা হচ্ছে যৌগিক ছন্দের বিশেষ বিধি । তবে সমাসের প্রথম পদটি যদি একাধিক স্বর বা দ্বিলব্ধ-বিশিষ্ট হয় ( যথা—বিদ্যাব, তড়িৎ, শরৎ ইত্যাদি ) তাহলে বিশেষ বিধি অনুসারে ওই ধ্বনিটিকে প্রসারিত করলেই অপেক্ষাকৃত ঐতিমধ্য হয় ।

রবীন্দ্রনাথ লিখেছেন, ‘এই কথাটা লক্ষ্য করবার বিষয় যে হসন্তবর্ণের (পূর্ববর্তী স্বরের) হ্রস্ব বা দীর্ঘ যে মাত্রাই থাক পাঠ করতে বাঙালি পাঠকের একটুও বাধে না, ছন্দের ঝোঁক আপনাই অবিলম্বে তাকে ঠিকমতো চালনা করে।

পাংলা করিয়া কাটো কাংলা মাছেরে,

উৎস্ক নাংনি যে চাহিয়া আছে রে।

এ ছড়াটা পড়তে গেলে বাঙালি নিঃসংশয়ে স্বতঃই থও ত-এর পূর্ববর্তী স্বরবর্ণকে দীর্ঘ করে পড়বে।’ আবার যেমনি

পাংলা করি কাংলা মাছটি কাটো দেখি শ্রিয়ে

এই পংক্তিটি সামনে ধরা, ‘অমনি প্রাক-হসন্ত স্বরগুলিকে ঠেসে দিতে এক মুহূর্তও দেরি হবে না।’ তাঁর এ কথা খুবই সত্য; কারণ ছন্দের ঝোঁকই পাঠককে ঠিক পথে চালনা করে। এ বিষয়ে মন্তব্য করার পূর্বে আরও দৃষ্টান্ত দেওয়া যাক।

টুনটুনি কহিলেন—রে ময়ূর তোকে

দেখে করুণায় মোর জল আসে চোখে।

—ভার, কর্ণিকা, রবীন্দ্রনাথ

এখানে ‘টুন’-এর উ-কারকে টেনে প্রসারিত করা হয়েছে। যদি লেখা হয়—

টুনটুনি কহেন ডাকি,—রে ময়ূর তোকে

তাহলে ‘টুন’-এর উ-কারকে ঠেসে সংকুচিত করতেও কোনো বাধা নেই। দ্বিতীয় দৃষ্টান্ত—

মাঝে মাঝে দীর্ঘশ্বাস ছাড়িয়া উৎকট

হঠাৎ ফুকারি উঠে—‘হিং টিং ছট!’

—হিং টিং ছট, সোনার তরী, রবীন্দ্রনাথ

এখানে ‘উৎ’-এর উ-কে ঠেসে সংকুচিত করা হয়েছে। তাকে টেনে দীর্ঘ করতেও বাধা নেই। যথা—

মাঝে মাঝে দীর্ঘশ্বাস ছেড়ে উৎকট

আরও দৃষ্টান্ত দিচ্ছি—

কেমনা ছুটাব তেজে সন্ধানের রথ

দুর্ধর্ষ অশ্বেরে বাঁধি দৃঢ় বলগা পাশে?

—সবলা, মহারা, রবীন্দ্রনাথ



কুব্চি, তোমার লাগি পদ্যেরে ভুলেছে অন্তমনা

যে ভ্রমর, শুনি নাকি তারে কবি করেছে ভৎসনা।

—কুব্চি, বনবাণী, রবীন্দ্রনাথ

যে আলোক আলগোছে ঘুমের ঘোমটাটুকু

তুলি নিয়ে যায়

—অমিতার প্রেম, বন্দীর বন্দনা, বুদ্ধদেব

এখানে ‘বলগা’ শব্দের যুগ্মধ্বনিটা সংশ্লিষ্ট, কিন্তু ‘কুব্চি’ ‘আলগোছে’ এবং ‘ঘোমটা’ শব্দের যুগ্মধ্বনিগুলি বিস্লিষ্ট; পাঠকরা তাই স্বতঃই ছন্দের কোঁকে প্রাক্-হসন্ত স্বরগুলিকে টেনে দীর্ঘ করে পড়বে।

রবীন্দ্রনাথ লিখেছেন, ‘পয়ারে (অর্থাৎ যৌগিক পয়ারে) ‘একটি’ শব্দকে তিন মাত্রার মর্যাদা যদি দাও তবে ওর হসন্ত হরণ করে অত্যাচারের দ্বারাই সেটা সম্ভব হয়।’ অর্থাৎ যৌগিক বা সাধারণ পয়ারে ‘একটি’ শব্দকে ‘ঐমাত্রিক বলে ধরতেই হবে’ (উত্তরা, আশ্বিন, পৃ ৩১৭)। কিন্তু মাঘের ‘পরিচয়ে’ তিনি নিজেই দেখিয়েছেন যে ‘একটি’ শব্দের হসন্ত হরণ না করেও বিনা অত্যাচারেই কেবলমাত্র ক-এর পূর্ববর্তী এ-কারকে টেনে দীর্ঘ উচ্চারণ করেই ‘একটি’ শব্দকে তিন মাত্রার মর্যাদা দেওয়া সম্ভব। রবীন্দ্রনাথের এই দুই উক্তি থেকে একথাই প্রমাণিত হয় যে, যৌগিক ছন্দে অর্থাৎ সাধারণ পয়ারজাতীয় ছন্দে শব্দমধ্যবর্তী যুগ্মধ্বনিকে সংশ্লিষ্ট উচ্চারণ করে এক unit ধরাই এ ছন্দের ‘সাধারণ’ রীতি; তবে অবস্থাবিশেষে তাকে বিস্লিষ্ট করে দুই unit-এর মর্যাদা দেওয়াও চলে। আর এজ্ঞেই ‘একটি কথা এতবার হয় কলুষিত’, ‘একটি কথা শুনিবার তিনটে রাত্রি মাটি’ প্রভৃতি পদে ‘একটি’ শব্দে দুই unit ধরা হয়, অথচ ‘একটি কথার লাগি তিনটি রজনী জাগি’ কিংবা

কেবল একটি দীর্ঘশ্বাস

নিত্য উচ্ছ্বসিত হয়ে সস্রুণ করুক আকাশ

—শাজাহান, বলাকা, রবীন্দ্রনাথ

প্রভৃতি পদে ‘একটি’ শব্দে তিন unit ধরতেও আপত্তি নেই।

ইচ্ছা করে অবিরত

আপনার মনোমতো

গল্প লিখি একেকটি করে।

—বর্ধাষাপন, সোনার তরী, রবীন্দ্রনাথ

এখানে ‘একেকটি’ শব্দে চার ব্যাপ্তি ধরা হয়েছে। যৌগিক ছন্দের সাধারণ বিধি অনুসারে এ শব্দটিতে তিন ব্যাপ্তিও ধরা যেত। এ শব্দটি এখানে ‘কেবলমাত্র অক্ষরগণনার দোহাই দিয়ে মান বাঁচিয়েচে’ আমি এ কথা বলতে চাইনে। কিন্তু এ শব্দটিকে ‘যদি যুক্ত অক্ষরের ছাঁদে লেখা যেত তাহলেই এ ছন্দের সাধারণ বিধি অনুসারে ধ্বনির কমতি ধরা পড়ত’ এ কথা বলতে আমার আপত্তি নেই। কিন্তু সঙ্গে সঙ্গেই আমি আরও বলব যে এখানে পাঠক স্বভাবতঃই দ্বিতীয় এ-কারটিকে দীর্ঘ উচ্চারণ করে ওই ‘ধ্বনির কমতি’টা পূরণ করে দেবে। অর্থাৎ ওই পদটা এই ছন্দের নিজের জোরে যতটা মর্যাদা দাবি করতে পারে তা তিন unit-এর বেশি নয়; পাঠক আর এক unit যোগ করে দিলে তবে সে চার unit এর মর্যাদা পাবে। এখানেই বলা যায়, ‘ভাষার নিজের অন্তরের স্বাভাবিক স্রটাকে রুদ্ধ করিয়া দিয়া বাহির হইতে স্র যোজনা করিতে হইয়াছে’ (বাংলা ছন্দ; সবুজপত্র ১৩২১ জ্যৈষ্ঠ, পৃ ২৫)। অবশ্য এ কথাও বলা দরকার যে, ওই বাইরের স্রটাকে আত্মসাৎ করার একটা ক্ষমতা আমাদের ভাষার আছে। যদি তার সে ক্ষমতা না থাকত তবে বাইরে থেকে স্র যোজনা করলেও ছন্দ ঠিক থাকত না, কারণ তা অস্বাভাবিক হত। যা হক, এ বিষয়ে কোনো সন্দেহ নেই যে ‘একেকটি’ শব্দটাকে যৌগিক ছন্দে তিন unit বলেও গণ্য করা যায়, চার unit বলেও গণ্য করা যায়।

দিতেছি ভাসায়ে চির-প্রবাহিণী তটিনীর নীরে

এক-একটি ক’রে মোর দিনরাত্রিগুলি

সুগন্ধ, সুন্দরতম্বু এক-একটি সম্পূর্ণ পুষ্পসম।

--কালশ্রোত, বল্লীর বলনা, বুড়ুদেব

এখানে প্রথম ‘এক-একটি’তে চার unit। এ শব্দটির ধ্বনিরূপ হচ্ছে ‘একেকটি’ অর্থাৎ দ্বিতীয় এ-কারটির উচ্চারণ দীর্ঘ বা বিলম্বিত। দ্বিতীয় ‘এক-একটি’তে তিন unit (এটিকে টেনে দীর্ঘ করে পাঁচ unit-এ পরিণত করা সংগত হবে না); এটির প্রকৃত ধ্বনিরূপ হচ্ছে ‘একেকটি’ অর্থাৎ এর দ্বিতীয় এ-কারটি দীর্ঘ নয়। এ দৃষ্টান্তটিতে একই শব্দকে দুই জায়গায় দুই রকম মর্যাদা দেওয়া ঠিক হয়েছে কি না সে বিচার আমি করতে চাইনে।

১০

যৌগিক অর্থাৎ সাধারণ পয়ারজাতীয় ছন্দের প্রকৃতি সম্বন্ধে আমার সমস্ত আলোচনার সারমর্ম এই। (১) এ-ছন্দে শব্দাস্থিত যুগ্মধ্বনি ‘সর্বদাই’ বিস্ত্রিষ্ট ও দ্বৈব্যাষ্টিক ; (২) শব্দমধ্যবর্তী যুগ্মধ্বনি ‘সাধারণতঃ’ সংশ্লিষ্ট ও একব্যাষ্টিক ; (৩) সমাসবদ্ধ সংস্কৃত শব্দের এবং সমস্ত অ-সংস্কৃত শব্দের মধ্যবর্তী যুগ্মধ্বনিটি বিকল্পে দীর্ঘ বা দ্বৈব্যাষ্টিক হয় ; (৪) সংস্কৃত শব্দের মধ্যবর্তী যুগ্মধ্বনিটিকে টেনে দীর্ঘ না করাই এ-ছন্দের রীতি এবং (৫) ‘অক্ষর’সংখ্যার দ্বারা এ-ছন্দের পরিমাপ করা অবৈজ্ঞানিক হুতরাং অবিধেয়।—

অপ্রগল্ভা ধরিত্রী-সে প্রণামে লুপ্তিত

—লগ্ন, মহয়া, রবীন্দ্রনাথ

এখানে দৃষ্টতঃ ‘অক্ষর’সংখ্যা বেড়ে গেছে, অথচ ছন্দ ঠিকই আছে। আবার আমি যদি কালিদাসের প্রতিধ্বনি করে বলি—

বিষবৃক্ষ নিজে রোপি ‘স্বয়ং’ ছেদন করা

নহে সমীচীন

তাহলে আমার উক্ত মত নিয়ে তর্ক চলতে পারে, কিন্তু ‘অক্ষর’সংখ্যা কম হয়েছে বলে ছন্দ ঠিক নেই এ কথা বলা চলতে পারে না। আমার নজির দেখাচ্ছি—

(১) দিনেরে ‘মাঠেঃ’ বলে যেমন সে ডেকে নিয়ে যায়

অন্ধকার অজানায়।

—সমাপন, পুনঃ, রবীন্দ্রনাথ

(২) গোপাঙ্গনা ভুলিলা দখল দিতে ‘দইয়ে’!

অম্বলের গন্ধে ‘দৈ’ জমিল আপনি।

—অম্বল-সম্বরী কাব্য, হাস্যনৃত্যকা। সত্যেন্দ্রনাথ

(৩) ‘বরং’ প্রেমের ভাণ করিয়ে না—সেই হবে ভালো।

—প্রেমিক, বন্দীর বন্দনা, বুদ্ধদেব

যৌগিক ছন্দে শব্দাস্থিত যুগ্মধ্বনি সর্বদাই বিস্ত্রিষ্ট ও দ্বিমাষ্টিক এবং শব্দমধ্যবর্তী যুগ্মধ্বনি ‘সাধারণতঃ’ সংশ্লিষ্ট ও একব্যাষ্টিক। তাই উক্ত দৃষ্টান্তগুলিতে অপ্রগল্ভ —চার ; দইয়ে—দুই ; আর স্বয়ং, বরং, মাঠেঃ—১৩ন ; দৈ—দুই। ( দ্বিতীয় দৃষ্টান্তটির মূলে আছে দৈএ এবং দই )।

এই সুযোগে রবীন্দ্রনাথের ব্যবহৃত ‘ঐ’ এবং ‘ওই’ সম্বন্ধে আমার পূর্বোক্ত

সিদ্ধান্তটিকে পরিবর্তিত করে জানাচ্ছি যে, রবীন্দ্রনাথ বৌগিক অর্থাৎ সাধারণ  
পয়ারজাতীয় ছন্দেও ঐ এবং ওই-কে সমান মর্যাদাই দিয়ে থাকেন। দৃষ্টান্ত  
দিলেই কথাটা স্পষ্ট হবে। যথা—

- (১) আমি কি চেয়েছি পায়ে ধ'রে  
ওই তব আঁখি-তুলে-চাওয়া,  
ওই কথা, ওই হাসি,      ওই কাছে আসা-আসি  
অলক দুলায়ে দিয়ে হেসে চ'লে যাওয়া ?

—নারীর উক্তি, মানসী

- (২) নিমেষে হয়েছে ধনু শক্তির মহিমা  
পেয়ে আপনার সীমা  
ওই মুখে, ওই চক্ষে, ওই হাসিটিতে।

—হৃষ্টির রহস্য, মহুয়া

- (৩) ঐ পক্ষধ্বনি,  
শব্দময়ী অম্বর-রমণী,  
গেল চলি' স্তব্ধতার তপোভঙ্গ করি।

—বলাকা, বলাকা

- (৪) উদয়-দিগন্তে ঐ শুভ্র শব্দ বাজে।

—পাঁচিশে বৈশাখ, পুরবী

- (৫) নদীপ্রান্তে তরুগুলি ঐ দেখে আছে কান পেতে,  
ঐ সূর্য চাহে শেষ চাওয়া।

—মিলন, মহুয়া

- (৬) ঐ নামে একদিন ধনু হলো দেশে দেশান্তরে  
ভব অন্নভূমি।

—বুদ্ধদেবের প্রতি, প্রবাসী, অগ্রহায়ণ

প্রথম দুটি দৃষ্টান্তে যদি 'ওই' না লিখে 'ঐ' লেখা হত কিংবা শেষ চারটি দৃষ্টান্তে  
'ঐ' না লিখে 'ওই' লেখা হত তাহলেও ছন্দ ঠিকই থাকত ; কারণ 'অক্ষয়ের'  
মাপে ছন্দ রচিত হয় ঐ এবং ধ্বনিমর্যাদায় 'ওই' এবং 'ঐ' সম্পূর্ণ সমান।

পূর্বে বলেছি বৌগিক অর্থাৎ 'পয়ার-সম্প্রদায়ের' ছন্দে শব্দমধ্যবর্তী যুগ্মধ্বনিকে  
সংগঠিত করে এক unit ধরাই ওই ছন্দের সাধারণ নিয়ম। রবীন্দ্রনাথ বলেছেন,

‘নিয়মের বিকল্প চলে; কেননা বাঙালির কান (এবং উচ্চারণরীতি) সাধারণ ব্যবহারে সেই বিকল্প মঞ্জুর করেছে।’ অর্থাৎ শব্দমধ্যবর্তী হসন্ত বর্ণের পূর্ববর্তী ‘স্বরবর্ণের ধ্বনিমাত্রা বিকল্পে দীর্ঘ ও হ্রস্ব হয়ে থাকে, ধ্বকের ছিলের মতো, টানলে বাড়ে, টান ছেড়ে দিলে কমে।’ আমার প্রশ্ন হচ্ছে যৌগিক ছন্দে শব্দমধ্যবর্তী যুগ্মধ্বনির এই সংকোচন-প্রসারণ-ক্ষমতার অর্থাৎ তার স্থিতিস্থাপকতার ক্ষেত্র কতখানি অর্থাৎ সমস্ত শব্দেরই মধ্যবর্তী যুগ্মধ্বনিকে বাড়ানো-কমানো যায় কি না। যেমন—

দেশময় রটিয়া গেছে তব নামে কলঙ্ক-কাহিনী

কিংবা  
ঘরছাড়া করিয়া দাও লক্ষ্মীছাড়াদেয়ে  
ইত্যাদি রকমের পংক্তি আমি রচনা করতে পারি কি না। অর্থাৎ ‘দেশময়’ ‘ঘরছাড়া’ প্রভৃতি শব্দের মধ্যবর্তী যুগ্মধ্বনির এতখানি সংকোচন বাঙালির কান মঞ্জুর করবে কি না; তাই হচ্ছে আমার প্রশ্ন। পক্ষান্তরে—

মদির যৌবন-রস করিয়া নিঃশেষ

এখানে যৌগিক ছন্দের সাধারণ রীতি অনুসারেই ‘যৌবন’-এর ঔ-কে সংকুচিত এবং ‘মদির’-এর ই-কে প্রসারিত করা হয়েছে, কারণ ‘ঔ’ শব্দমধ্যবর্তী এবং ‘ই’ শব্দান্তবর্তী। কিন্তু আমি যদি লিখি—

স্নিগ্ধ যৌবন-স্বধা করিয়া নিঃশেষ

তাহলে ‘স্নিগ্ধ’ শব্দের ই-কারের সম্প্রসারণ বাঙালির কান মঞ্জুর করবে কি? না, ‘স্নিগ্ধ’কে ‘স্নস্নিগ্ধ’ করতে বাধ্য করা হবে?

চিম্‌নি ফেটেচে দেখে গৃহিণী সরোব,

ঝি বলে ঠাকুরুণ মোর নাই কোনো দোষ।

এখানে ‘চিম্’-কে দীর্ঘ এবং ‘ঠাক’-কে খর্ব করা হয়েছে। এই ছড়াটিতেই ‘গৃহিণী’-কে ‘গিস্নি’ করা যায় কি? তা ছাড়া আমি যদি লিখি—

নিম্নে যমুনা বহে স্বচ্ছ স্নশীতল

তাহলে ছন্দগত অপরাধ হবে কি? না, ‘স্নশীতল’কে ‘শীতল’ করে কিংবা ‘নিম্নে’কে ‘স্ননিম্নে’ করে সংশোধন করতে হবে?

আমার বিশ্বাস যৌগিক ছন্দে অ-সংস্কৃত শব্দের মধ্যবর্তী যুগ্মধ্বনির প্রসারণ করা গেলেও খাঁটি সংস্কৃত (অ-সমাসবদ্ধ) শব্দের মধ্যবর্তী যুগ্মধ্বনিকে টেনে দীর্ঘ না করাই সংগত। দৃষ্টান্ত দিচ্ছি—

- (১) “আহা আহা” ‘চীৎকার’ করি’ রঘুনাথ  
ঝাঁপায়ে পড়িল জলে বাড়ায়ে ছ’হাত ;  
আগ্রহে সমস্ত তার প্রাণমন কায়  
একখানি বাহু হ’য়ে ধরিবারে ধায় !

—নিফল উপহার, কথা ও কাহিনী, রবীন্দ্রনাথ

- (২) কবিদল ‘চীৎকারিছে’ জাগাইয়া ভীতি  
অশান-কুক্কুরদের কাড়াকাড়ি-গীতি ।

—যুগান্তর, নৈবেদ্য, রবীন্দ্রনাথ

- (৩) সংসারের দশদিশি ঝরিতেছে অহনিশি  
ঝর ঝর ‘বর্ষার’ মতো—  
ক্ষণ-অক্ষণ-হাসি পড়িতেছে রাশি রাশি  
শব্দ তার শুনি অবিরত ।

—বর্ষাযাপন, সোনার তরী, রবীন্দ্রনাথ

- (৪) ‘বর্ষা’ এলায়েছে তার মেঘময় বেগী

—একাল ও সেকাল, মানসী, রবীন্দ্রনাথ

- (৫) ‘জ্যোৎস্না’ ডালের ফাঁকে

হেথা ‘আল্পনা’ ঝাঁকে,

এ নিকুঞ্জ জানো আপনার ।

—চামেলিবিভান, বনবাণী, রবীন্দ্রনাথ

- (৬) ‘জ্যোৎস্না’-রাতে নিভৃত মন্দিরে

প্রেরসীরে

বে-নামে ডাকিতে ধীরে ধীরে

—শাজাহান, বলাকা, রবীন্দ্রনাথ

- (৭) এবার ফিরাও মোরে, ল’য়ে যাও সংসারের তীরে

হে ‘কল্পনে’ রক্তময়ি ।

—এবার ফিরাও মোরে, চিত্রা, রবীন্দ্রনাথ

এই দৃষ্টান্তগুলিতে ‘চীৎকার’, ‘বর্ষা’ ‘জ্যোৎস্না’ শব্দের দু-রকম মূল্য দেওয়া হয়েছে ; তা ছাড়া ‘কল্পনা’ শব্দে তিন এবং ‘আল্পনা’ শব্দে চার ব্যাঙ্গি ধরা হয়েছে । ( জয়ন্তী-উৎসর্গ, পৃ ৭৭ দ্রষ্টব্য । ) যৌগিক ছন্দে বর্ষা, জ্যোৎস্না, কল্পনা প্রভৃতি সংস্কৃত শব্দের মধ্যবর্তী যুগ্মধ্বনিকে দুই unit ধরা যায় কিনা,

এইটেই আমার জিজ্ঞাস্তা। যদি কোনো কবিশৈলিপু কল্পনা-প্রবণ উৎসাহী  
বালক রচনা করে—

নিবিড় বর্ষা-রাতে স্থখ-স্বপ্ন-পথে

চলিত্ত প্রফুল্ল মনে কল্পনা-রথে

তাহলে গুরু মহাশয় তাকে পাস্-মার্ক দেবেন কি? আমি যদি লিখি—

যৌগিক ছন্দ রচি' পড়েছি সংকটে

তাহলে বোধ করি 'যউ'গিক ছন্দ রচি' কিংবা 'যৌগিক ছন্দ রচি' এভাবে  
পড়েও, অর্থাৎ বাংলা ভাষার স্বরবর্ণের ধ্বনিমাত্রার বৈকল্পিক দীর্ঘতার দোহাই  
দিয়েও, সংকট থেকে ত্রাণ পাব না। আমাকে বাধ্য হয়ে তাড়াতাড়ি সংশোধন  
করে বলতেই হবে—

রচিয়া যৌগিক ছন্দ এড়াই সংকট।

৩ কান্তন, ১৩৩৮

## ছন্দ-বিচার

যে মূলতত্ত্বকে আশ্রয় করে আমি বাংলা ছন্দকে তিনটি প্রধান শ্রেণীতে বিভক্ত করে থাকি সে তত্ত্বটিকে সংক্ষেপে ব্যাখ্যা করে আমি কবিগুরু রবীন্দ্রনাথকে একখানি পত্র লিখি এবং সে বিষয়ে তাঁর মত কি তা জ্ঞানতে চাই। নানা কাজে ব্যস্ত ও ক্লান্ত থাকাতে দীর্ঘ পত্রে এ বিষয়ের আলোচনা করা তাঁর পক্ষে বর্তমানে কষ্টকর হবে বলে তিনি আমাকে শান্তিনিকেতনে গিয়ে তাঁর সঙ্গে দেখা করতে লেখেন। দেখা যখন হল তখন প্রথমেই ব্যবস্থা হল কিঞ্চিৎ জলযোগের। কিন্তু জলযোগের সঙ্গে সঙ্গেই তিনি যে-সমস্ত কৌতুককর বিষয়ে কথোপকথনের সূত্রপাত করলেন তার তুলনায় রসনার তৃপ্তিটা হয়ে গেল গৌণ। যা হক, রসনার কার্য সমাপ্ত হবার পর ছন্দ আলোচনার ভূমিকা করে তিনি বললেন, 'কিছু খেয়ে তো একটু হুস্থ হয়েছ, এখন শুর্ক করতে পারবে।' এই বলে তিনি নিজেই ছন্দের কথা উত্থাপন করে বললেন, 'পাঁচটা unit-কে দু-গুণ করে দশ unit হয় বটে; কিন্তু এক-একটা unit তো দিম্বর মতো মোটাও হতে পারে আবার একজন রোগা মাহুঘের মতো সরুও হতে পারে। তেমনি সব ছন্দের unit-গুলো আকারে সমান নয়।' আমি বললুম, 'ধরনির unit-এর আকৃতি ও প্রকৃতির এই পার্থক্য অহুসারেই তো আমি বাংলা ছন্দকে তিনটি প্রধান শ্রেণীতে ভাগ করতে চাই।'

কবি বললেন, 'কিন্তু এক সময়ে সব unit-কেই সমান মূল্য দেওয়া হত, যুগ্ম অযুগ্ম ধরনির পার্থক্য স্বীকার করা হত না। কিন্তু তিন unit-এর ছন্দে, যাকে আমি বলেছি অসম ছন্দ, তাতে যুগ্মধরনিকে এক unit ধরলে ভারি খারাপ শোনায়। এইটে অহুভব করেই তখনকার দিনে কবিরা এ-জাতীয় ছন্দে যুক্ত অক্ষর বশাস্তব বর্জন করে চলতেন। যুক্ত অক্ষর সম্পূর্ণ বর্জন করে একটি

প্রবোধবাবুর এই প্রবন্ধটি আমরা রবীন্দ্রনাথের নিকট পাঠাইয়া দিয়াছিলাম। তিনি আনুপূর্বিক সমস্ত দেখিয়া প্রবন্ধটি অনুমোদিত করিয়াছেন। এবং পরিশেষে তাঁহার একটি নূতন মন্তব্য যোগ করিয়াছেন। এই সম্পর্কে গত বৈশাখের 'বিচিত্রা'র ৫৬ পৃষ্ঠায় প্রকাশিত 'ছন্দের বন্দ' দ্রষ্টব্য।

—'বিচিত্রা' সম্পাদক।



কবিতা রচনা করতে পারলে আত্মপ্রসাদ লাভ করতেন ; মনে করতেন কবিতাটি খুব প্রাঞ্জল, সরল ও শ্রুতিমধুর হল। কবি বিহারীলালের কাছে আমার প্রথম শিক্ষা। তাঁর রচনাতেও যুক্তাক্ষর বড় কম। আমারও বাল্যকালের রচনায় যুক্তাক্ষর খুবই কম ; তবু মাঝে মাঝে যুক্তাক্ষর ব্যবহৃত হয়ে ছন্দকে বন্ধুর করে তুলেছে। ‘বাহুর প্রেম’ কবিতাটিতেই তার নিদর্শন পাবে। তখনও আমি যুগ্মধ্বনিকে দুমাত্রা বলে ধরতে আরম্ভ করি নি ; কারণ খারাপ শোনালেও তখনকার দিনে জবাবদিহি ছিল না। কিন্তু ‘মানসী’র সময় থেকে আমি যুগ্মধ্বনিকে দুমাত্রা বলে ধরতে শুরু করেছি।’

আমি বললুম, ‘তখন থেকেই তো বাংলায় এক নতুন ধরনের ছন্দের সূচনা হল।’

কবি—এ জাতীয় ছন্দ আমিই যে প্রথম করলুম তা নয়।

আমি—বৈৎন পদাবলীতেও অবশ্য ছয়মাত্রার মাত্রাবৃত ছন্দের নিদর্শন আছে। কিন্তু তার উচ্চারণ-ভঙ্গি তো ঠিক বাংলা নয়, সংস্কৃতপন্থী।

কবি—কেন, চণ্ডীদাসের ছ’ মাত্রার ছন্দ তো বাংলা-উচ্চারণ অনুযায়ী।  
যথা—

চলে নীল সাড়ি নিঙাড়ি নিঙাড়ি

পরায় সহিতে মোর।

যা হক, ‘মানসী’র সময় থেকে আমি অসম মাত্রার ছন্দে যুগ্মধ্বনিকে দুমাত্রার value দিয়ে আসছি এবং এখন বাংলা সাহিত্যে এই রীতিটাই লে গেছে। আজকাল আর কোনো কবি অসম মাত্রার ছন্দে যুগ্মধ্বনিকে এক unit বলে চালাতে সাহস করেন না, আর করলেও তাঁকে কেউ ক্ষমা করবে না। কিন্তু আমি নিজেও একটিমাত্র রচনায় এ রকম করেছি, যথা—

প্রভু বুদ্ধ লাগি’ আশি ভিক্ষা মাগি

ওগো পুরবাসী কে রয়েছে জাগি।

আমি বললুম—আবুস্তির ভঙ্গির প্রতি লক্ষ রাখলে এ ছন্দটাকে সমর্থন করাও যেতে পারে।

কবি—তা যেতে পারে। কিন্তু তবু ওটা ঠিক হয় নি। ও-রকম না করলেই ভাল হত। বাস্তবিক ও-কবিতাটির জন্তে আমি একটু কুণ্ঠিত আছি। ও-রকম করার একটু কারণও আছে। যুগ্মধ্বনিকে দুমাত্রা হিসেব করে ছন্দ

রচনা করলে ও-ছন্দে ‘অনাধিপিত্ব’ কথাটা ব্যবহার করা মুশকিল। তাই সমস্ত কবিতাটিতেই যুগ্মধ্বনিকে এক unit বলেই চালিয়ে দিয়েছিলুম। কিন্তু অসম মাত্রার আর কোনো ছন্দেই আমি যুগ্মধ্বনিকে এক unit বলে গণ্য করি নি।

তার পরে কবি সম মাত্রার ও অসম মাত্রার ছন্দের প্রসঙ্গ তুলে বললেন, ‘সম মাত্রার ছন্দের অর্থাৎ পয়ারজাতীয় ছন্দের বিশেষত্বই হচ্ছে এই যে এ-ছন্দে দুই চার ছয় আট দশ প্রভৃতি দুয়ের multiple-এর পর ইচ্ছামতো যতি স্থাপন করা যায়। এখানেই এ-ছন্দের শক্তি। আর এজন্তেই এ-জাতীয় ছন্দে আঁজাঁবর্মী (enjambement) চালানো সম্ভব হয়েছে। আঁজাঁবর্মী শব্দের তুমি কি বাংলা করেছ ?

আমি বললুম—প্রবহমানতা।

কবি—যেখানেই দুয়ের multiple পাওয়া যায় সেখানেই থামতে পারা যায় বলেই প্রবহমান পয়ার রচনা করা সম্ভব হয়েছে। এ-ছন্দে অযুগ্মসংখ্যার পর যতি দেওয়া চলে না। মধুসূদন অবশ্য ‘অকালে’র পর যতি দিয়েছেন। এটাকে অবশ্য এক রকম করে সমর্থনও করা যায়। কিন্তু তথাপি বলতে হয় যে এ-ছন্দে অযুগ্ম unit-এর পর যতি না দেওয়াই রীতি। আর এজন্তেই অসম মাত্রার ছন্দে আঁজাঁবর্মী বা প্রবহমানতা আনা যায় না। যে ছন্দে তিনের পরে ভাগ থাকে আমি বলেছি অসম মাত্রার ছন্দ তাতে যেখানে সেখানে থামা যায় না, লাইনের মধ্যেও থামা যায় না, একেবারে লাইনের শেষে গিয়ে থামতে হয়।  
যেমন—

একদিন দেব তরুণ তপন

হেরিলেন সুরনদীর জলে

অপরূপ এক কুমারী রতন

খেলা করে নীল নলিনী দলে।

আমি বললুম—এ-জাতীয় ছন্দকেও তো সব সময় তিন তিন মাত্রায় ভাগ করা যায় না।

কবি—হ্যাঁ, তা ঠিক, দুয়ের multiple না হলে থামবার জায়গা পাওয়া যায় না। এজন্তেই এসব ছন্দেও ছয় মাত্রার পরেই থামতে হয়।

আমি—ছয় মাত্রার পরেই যতি থাকে বলে আমি এ-ছন্দকে বয়াজপর্বিক ছন্দ বলি।

কবি—লক্ষ করলেই দেখতে পাবে অসম সংখ্যার পর ধ্বনি ধামতে পারে না। সেখানে একটা ভাগ থাকলেও ধ্বনিটা পরবর্তী বিভাগের গায়ে গড়িয়ে পড়ে। যেমন—

পঞ্চশরে দৃঢ় করে করেছ এ কি সন্ন্যাসী—

এখানে ‘পঞ্চশরে’ কথাটার পরে ষড়িটা স্থায়ী হয় না।

তার পর প্রসঙ্গক্রমে তিনি accent-এর বিষয় উত্থাপন করে বললেন, ‘ইংরেজি ভাষার একটা মস্ত গুণ এই যে ও-ভাষায় প্রত্যেকটি শব্দেরই একটা বিশেষ জোর আছে; সেটা ও-ভাষার accent-এর জন্তেই হয়। প্রত্যেকটি শব্দই নিজের স্বাতন্ত্র্য রক্ষা করে চলে, অগ্ন কথার মধ্যে নিজেকে হারিয়ে ফেলে না। শব্দগুলিকে এভাবে জোর দিয়ে দিয়ে উচ্চারণ করতে হয় বলেই ইংরেজি ছন্দ এরূপ তরঙ্গিত হয়ে ওঠে। কিন্তু বাংলা শব্দগুলি বড় শান্তশিষ্ট, তারা ধ্বনিকে আঘাত করে তরঙ্গিত করে তোলে না। এজন্য বাংলায় আমরা এক বোঁকে অনেকগুলো শব্দ উচ্চারণ করে আবৃত্তি করে যাই, কিন্তু সঙ্গে সঙ্গেই অর্থবোধ হয় না। অর্থবোধের জন্তে বিষয়টাকে আবার ফিরে পড়তে হয়। এ অভাবটা মধুসূদন খুব অনুভব করেছিলেন। তাই তিনি বেছে বেছে যুক্তাক্ষরবহুল সংস্কৃত শব্দের ব্যবহারের দ্বারা বাংলার এই দুর্বলতাটা দূর করতে চেয়েছিলেন—এজন্যেই তাঁর কাব্যে ‘ইরশাদ’ প্রভৃতি শব্দের ব্যবহার হয়েছে। আর তাতে ছন্দের মধ্যেও অনেকখানি তরঙ্গায়িত ভঙ্গি দেখা দিয়েছে। ‘যাদঃপতিরোধঃ বধা চলোর্মি আঘাতে’ প্রভৃতি পংক্তিতে ধ্বনিটা আঘাতে আঘাতে কেঁা তরঙ্গিত হয়ে উঠেছে তা দেখতে পাচ্ছ। অল্প বয়সে আমি মধুসূদনের যে কঠোর সমালোচনা করেছিলুম পরবর্তী কালে আমাকে তার প্রায়শ্চিত্ত করতে হয়েছে। বাংলা ভাষার এই সমতলতা, এই দুর্বলতাটা দূর করবার জন্তে গন্তে ও পন্তে আমিও বহু সংস্কৃত শব্দের ব্যবহার করেছি।

তার পর কবিকে একটু ক্লান্ত দেখে বিদায় নিয়ে যাবার সময় তিনি রহস্ত করে বললেন ‘অগ্ন সময় আবার এসো। তখন তোমার সঙ্গে বন্দযুদ্ধ করা যাবে।’ সন্ধ্যার পর আবার যখন তাঁর কাছে গিয়ে বসলুম তখন তিনি স্নেহে বললেন ‘তোমার কি কি জিজ্ঞাস্য আছে বুঝিয়ে বল দেখি। তারপরে তোমার কথার উত্তরে যা বলবার আছে তা বল।’ তখন আমি আমার বক্তব্য বিষয়গুলি ক্রমে ক্রমে বুঝিয়ে বলতে লাগলুম। তিনি প্রসন্ন ধৈর্যের সঙ্গে মন দিয়ে আমার

সব কথা শুনলেন এবং মাঝে মাঝে তাঁর বা বক্তব্য তা খুব স্পষ্ট করে বোঝাতে লাগলেন। আমি বললুম ‘কয়েকটি মূল তত্ত্বকে অবলম্বন করে বাংলা ছন্দের শ্রেণী বিভাগ ও নামকরণ করাই আমার প্রধান উদ্দেশ্য। বর্তমানে আমি আপনার কাব্যের ছন্দোনির্ণয়ের কাজেই প্রবৃত্ত হয়েছি। এ-কাজে আমি দুটি প্রণালী অবলম্বন করতে চাই। প্রথমতঃ, ‘মানসী’ থেকে ‘বনবী’ পর্যন্ত সমস্ত কাব্যগুলিকে একে একে ধরে তার প্রত্যেকটি কবিতার ছন্দের analytic বিচার করব এবং তার পর সব কবিতার ছন্দের analysis-এর উপর নির্ভর করে একটা synthetic আলোচনা করা আমার উদ্দেশ্য। এই উপলক্ষে আপনার সব কবিতাকে আমি তিনটি প্রধান শ্রেণীতে ভাগ করব। এই শ্রেণীবিভাগ সম্বন্ধে আপনার মতামত জানা আমার পক্ষে বিশেষ প্রয়োজন।’

কবি বললেন—তুমি কি কি শ্রেণীতে ভাগ করতে চাও ?

আমি—আপনি যাকে বলেছেন সাধারণ ‘পয়ারজাতীয়’ ছন্দ, সেগুলির কথাই আমি বলছি। এ-ছন্দগুলির সাধারণতঃ অক্ষরসংখ্যার সাহায্যেই পরিচয় দেওয়া হয়—যেমন চোদ্দ অক্ষরের পয়ার, আঠারো অক্ষরের পয়ার। তাই প্রচলিত প্রথাকে একেবারে অগ্রাহ্য না করে আমি প্রথমে গুলিকে বলেছিলুম ‘অক্ষরবৃত্ত’ ছন্দ। কিন্তু আপনি বলেছেন যে আক্ষরিক ছন্দ বলে কোনো ছন্দ হতে পারে না। কারণ ছন্দ তো ধ্বনি নিয়ে কারবার করে, আর অক্ষর তো ধ্বনির চিহ্নমাত্র। আমিও বারবার ওই কথাই বলেছি। কাজেই ‘চোদ্দ অক্ষরের পয়ার,’ ‘আঠারো অক্ষরের পয়ার’ এ-রকম পরিচয়টা ঠিক নয়। এ-সব ছন্দে ধ্বনির পরিবেষণটা কি ভাবে ঘটে তাই দেখা দরকার। আমি এ-ছন্দের ধ্বনি-সম্বন্ধে-প্রণালীটাই দেখাতে চেষ্টা করেছি।

কবি—যদি ‘চোদ্দ অক্ষরের পয়ার’ না বল তবে কি বলবে ?

আমি—আমি বলি চোদ্দ unit বা ব্যঞ্জির পয়ার। এই unit-গুলির হিসাব কি ভাবে করতে হবে আমি সেটাই দেখাতে চাই। অধ্বনির উচ্চারণ সর্বত্রই সমান, তাকে এক unit ধরা যায়। আর যুগ্মধ্বনির উচ্চারণ সর্বদা সমান নয়। আপনিই দেখিয়েছেন যে, আমাদের সাধারণ কথাবার্তাতেও আমরা যুগ্মধ্বনিকে কখনও ঠেসে সংক্ষিপ্ত করে উচ্চারণ করি আবার কখনও টেনে বাড়িয়ে উচ্চারণ করি। যুগ্মধ্বনির সংক্ষিপ্ত উচ্চারণকে আমি বলি সংক্ষিপ্ত উচ্চারণ আর প্রসারিত উচ্চারণকে বলি বিস্তৃত উচ্চারণ। যদি সংক্ষিপ্ত যুগ্ম-

ধ্বনিকে এক unit এবং বিস্মিষ্ট যুগ্মধ্বনিকে দুই unit ধরা যায় তাহলে আমরা সাধারণ পয়ারেও ধ্বনি-সঙ্গিবেশের একটা নির্দিষ্ট প্রণালী পাই।

এ বিষয়ে কবির সমর্থন পেয়ে আমি একটু উৎসাহিত হয়ে বললুম, 'ওই নির্দিষ্ট প্রণালীটা হচ্ছে এই যে, সাধারণ পয়ারজাতীয় ছন্দে প্রত্যেকটি শব্দকে গানের মতো স্বতন্ত্র ভাবে উচ্চারণ করতে হয়, তাই প্রত্যেক শব্দকে পরবর্তী শব্দ থেকে বিচ্ছিন্ন রাখা প্রয়োজন। আর এজ্ঞেই আমরা এ-ছন্দে শব্দের প্রান্তবর্তী যুগ্মধ্বনির বিস্মিষ্ট উচ্চারণ করি এবং কাজেই তার মূল্য দুই unit। কিন্তু শব্দমধ্যবর্তী যুগ্মধ্বনিকে সাধারণত বিস্মিষ্ট ভাবে উচ্চারণ করি না। কাজেই তার মূল্যও এক unit-এর বেশি নয়। আপনি বলেছেন যেখানে সেখানে যুগ্ম ধ্বনি থাকা সত্ত্বেও পয়ারের ভারসাম্য নষ্ট হয় না, এটা এ-ছন্দের একটা অসাধারণ গুণ। আপনার এ-কথা খুবই সত্য। আমার মনে হয় যুগ্মধ্বনিকে আমরা প্রয়োজনমতো সংশ্লিষ্ট বা বিস্মিষ্ট ভাবে উচ্চারণ করি বলেই যেখানে সেখানে যুগ্মধ্বনি থাকা সত্ত্বেও এ-ছন্দের ভারসাম্য রক্ষিত হয়ে থাকে। কবি দৃষ্টান্তের কথা বলতেই আমি বললুম—

মহাভারতের কথা অমৃত সমান।

কাশীরাম দাস কহে শুনে পুণ্যবান ॥

এখানে তেবু, রাম, দাস প্রভৃতি যুগ্মধ্বনিকে আমরা টেনে পড়ে দুমাত্রার মর্ধাদা দিয়ে থাকি, হসন্ত র, ম, স্কে তো এক-একটি অক্ষর বলে গোনা যায় না। পঙ্কাস্তরে 'পুণ্যের' পুণ্-কে আমরা ঠেসে উচ্চারণ করি। তাই ছন্দ ঠিক থাকে। মাঘের 'পরিচয়ে' আপনি পয়ারের দৃষ্টান্তস্বরূপ বলেছেন—

টোট্কা একটি মুষ্টিযোগ লট্‌কানের ছাল

এখানে অক্ষরসংখ্যা বেশি হয়েছে বটে, কিন্তু শব্দমধ্যবর্তী যুগ্মধ্বনির উচ্চারণ সংশ্লিষ্ট এবং শব্দান্তবর্তী যুগ্মধ্বনির উচ্চারণ বিস্মিষ্ট বলে এই লাইনটাতে চোদ্দ unit ঠিক আছে।

তার পর আমি আর-একটি দৃষ্টান্ত দিলুম—

দিনেরে মাঠে: ব'লে যেমন সে ডেকে নিয়ে যায়

অঙ্ককার অজানায়।

কবি নিজেই বললেন, এখানে 'ঠে:' ধ্বনিতে দুই unit এবং 'অঙ্ককারের' অন্-এ এক unit হয়েছে।

আমি বললুম, এইটেই এ-ছন্দের নিয়ম। যদি এ-ছন্দে 'ভৈরব' শব্দটা ব্যবহার করা যায় তবে 'ভৈ'-কে এক unit বলেই ধরা হবে।

কবি একটু ভেবে বললেন—

ভৈরব হবে যবে শৃঙ্গ ফুকারে

এখানে তো ভৈ-তে দুই unitই ধরা হয়েছে।

আমি বললুম—এটাও পয়ারেরই লাইন বটে; কিন্তু সম্পূর্ণ অশ্রুতির পয়ার। একে আমি বলি মাত্রাবৃত্ত পয়ার। কারণ এ-ছন্দে অবস্থান নির্বিশেষে যুগ্মধ্বনির উচ্চারণ সর্বত্রই বিল্লিষ্ট।

এ কথার উত্তরে কবি শুধু বললেন—সে কথা ঠিক।

তারপর আমি বললুম,—‘পরিচয়ে’ আপনি দুটি দৃষ্টান্ত দিয়েছেন—চিম্নি ভেঙে গেছে দেখে ইত্যাদি। যাতে ‘চিম্নি’ শব্দে একবার দুই unit এবং আর-একবার তিন unit ধরা হয়েছে। পয়ারজাতীয় ছন্দে ‘চিম্নি’ শব্দে কত unit ধরা সাধারণ নিয়ম?

কবি বললেন—ও তর্কটা কি ভাবে উঠেছিল তা তো তুমি জানো। নীরেন রায় লিখেছিল ‘একটি কথা এতবার হয় কলুষিত।’ মণ্টু প্রমথ তুলেছিল ‘একটি’কে দুই ধরতে হবে না তিন ধরতে হবে? আমি এই উপলক্ষেই ‘চিম্নি’ শব্দটাকেও এনেছিলুম। পয়ারে ‘চিম্নি’ শব্দে দুই unit ধরাই সাধারণ নিয়ম; তবে তিন unitও ধরা যায় এ কথাটাই আমি বলতে চাই।

আমি বললুম—এ-জাতীয় ছন্দে যুগ্মধ্বনি কোথাও বিল্লিষ্ট ও বৈমাত্রিক এবং কোথাও সংল্লিষ্ট ও একমাত্রিক হয় বলেই আমি এ-ছন্দকে ‘ষৌগিক ছন্দ’ নাম দিতে চাই। এ বিষয়ে আপনার মত কি?

কবি বললেন—তুমি এসব ছন্দকে ‘ষৌগিক’ নাম দিতে পার। আমার আপত্তি নেই। নামে কিছু আসে যায় না। ছন্দের প্রকৃতি অল্পসারে ভাগ করলেই হল।

আমি—যেসব ছন্দে যুগ্মধ্বনি সর্বদাই বৈমাত্রিক তাকে আমি বলি মাত্রাবৃত্ত।

কবি—এসব ছন্দকেই আমি বলেছি অসম বা তিন মাত্রার ছন্দ।

আমি—শুধু যে বৈমাত্রিক ছন্দেই যুগ্মধ্বনির ডবল মূল্য হয় তা নয়; বৈমাত্রিক ছন্দেও তা হতে পারে। দৃষ্টান্তস্বরূপ ‘বরষার নিঝরে অঙ্কিত কার’, ‘বৈশাখ মাসে তার হাঁটুজল থাকে’, ‘এনেছি বসন্তের অঞ্জলি

গন্ধের', 'বুঝিয়াছি এ-জীবন একেবারে মরু না' প্রভৃতি কবিতার উল্লেখ করা যায়।

কবি—এগুলি একটি স্বতন্ত্র শ্রেণীর ছন্দ বটে, চার মাত্রায় এক-একটি ভাগ হচ্ছে। তুমি তো জানই, 'মানসী'তে আমি প্রথম এ-রকম ছন্দ রচনার চেষ্টা করেছিলুম।

আমি—'মানসী'তে 'নিষ্ফল উপহার' ও 'কবির প্রতি নিবেদন', এই দুটি কবিতায় তা দেখা যায়। কিন্তু সাধারণ পয়ারজাতীয় ছন্দে বৈমাত্রিক যুগ্মধ্বনি ব্যবহার করায় তা ভাল হল না। কিন্তু পরে চার চার মাত্রায় ভাগ করাতে খুব স্নন্দর মাত্রিক পয়ার রচিত হয়েছে।

এ স্থলে আমি প্রসঙ্গক্রমে বললুম যে পয়ার, ত্রিপদী শব্দ দ্বারা ঠিক ছন্দ বোঝায় না, বোঝায় ছন্দোবদ্ধ। কারণ পয়ার, ত্রিপদী প্রভৃতি তিন রকমের হতে পারে। যৌগিক পয়ার (সাত কোটি সম্ভাব্য ইত্যাদি), মাত্রিক পয়ার (বরষার নিব্বরে ইত্যাদি) আর স্বরবৃত্ত পয়ার। আপনি যাকে বলেন প্রাকৃত ছন্দ তাকেই আমি বলছি স্বরবৃত্ত। এ-ছন্দটা আসলে syllabic, প্রত্যেক syllable-এর একটি করে স্বর অর্থাৎ vowel থাকা চাই বলে নাম দিয়াছি স্বরবৃত্ত।

কবি বললেন—তুমি যে প্রাকৃত ছন্দকে চার-চার সিলেব্লে-এ ভাগ কর সেটা ঠিক বলে আমার মনে হয় না। আমি বলি এ ছন্দে তিন মাত্রার ভাগটাই মূল কথা। এ ছন্দে আমি ষত গান রচনা করেছি তার সবগুলিতেই দাদ্রা তাল—সব সময়েই তিন মাত্রার ভাগ হয়।

আমি—সে কথা ঠিক বটে। আপনি 'পরিচয়ে' সে দিকটা দেখিয়েছেন। গানের পক্ষে ধ্বনির মাত্রিক দিকটাই মুখ্য; কিন্তু ছন্দের পক্ষে এর syllabic দিকটাই মুখ্য। গানে এ-ছন্দে প্রতি পর্বে ছয় মাত্রা পাওয়া যায়, প্রকাশভঃ না থাকলেও সেটা পূরণ করে নিতে হয়। কিন্তু কবিতা পাঠ বা রচনার পক্ষে এ-ছন্দের প্রতি পর্বে ছয় মাত্রার দিকটা গোণ, চার সিলেব্লে-এর দিকটাই মুখ্য। প্রতি পর্ব সিলেব্লে সংখ্যাকে তো ইচ্ছামতো পাঁচ বা ছয় করা চলে না।

কবি—এ-ছন্দে কি সর্বত্রই চার সিলেব্লে-এর ভাগ হয়?

আমি—সর্বত্রই হয়, তবে স্থলে স্থলে তিনটি যুগ্ম বা বিমাত্রিক সিলেব্লেও চলে; তাতে ছয় মাত্রা ঠিক থাকে। কিন্তু এটা সাধারণ নিয়ম নয়; exception মাত্র। এ-ছন্দের পর্বগুলিতে কখনও পাঁচ বা ছয় সিলেব্লে চালানো যায় না।

কবি—তাহলে তো অন্য রকমের ছন্দ হয়ে যাবে।

আমি—কিন্তু এ-ছন্দটা মূল্যবান চার মিলেবল্-এর হলেও গোঁগতঃ ছয় মাত্রারই বটে। ছয় মাত্রা প্রকাশ্যতঃ না থাকলেও ছয় মাত্রার স্থান ঐ ছন্দে আছে। প্রয়োজনমতো আবৃত্তির সময় তা পূরণ করা যায়। আপনি ‘পরিচয়ে’ দেখিয়েছেন—বৃষ্টি পড়ে টাপুর টুপুর ইত্যাদি ছড়াটাকে তিন মাত্রায় ভাগ করা চলে। কিন্তু স্বর করে ছড়া আবৃত্তির সময় এ রীতিটা যেমন খাটে, কবিতা পাঠের সময় তা ঠিক খাটে না। যেমন ‘কণিকা’র ‘সেকাল’ কবিতাটা।

কবি—‘সেকাল’ কবিতাতেও খাটে। এর লয় চারমাত্রার নয়। সেই জন্তে তিনের ভাগে যেখানে কম পড়েছে সেখানে টেনে পুরিয়ে দিতে হয়। যেমন—

আমি— | যদি— | জন্ম | নিতেম |

কালি— | দাসের | কালে— ।

এ-রকম ছন্দে আমরা যে প্রত্যেক পর্বে ফাঁক ভরিয়ে নিই তা নয়, গানের তালের মতোই যেখানে সুবিধে পাই সেখানেই কর্তব্য সেরে নিয়ে থাকি। তাতে ছন্দোন্নতির বৈচিত্র্য ঘটে। ভাল করে বিচার করে দেখলে বুঝতে পারবে, ঐ লাইনটাতে ‘আমি যদি’ দুই দুই মাত্রায় দ্রুত পাঠ করে ‘জন্ম’ এবং ‘নিতেম’ শব্দের কাছ থেকে উভয়ের জরিমানা ডিক্রি করে নিয়েছি। নইলে ছন্দের তাল কাটতই কেননা এটা নিঃসন্দেহ তিন মাত্রার তাল। ‘কালিদাসের’ শব্দটাতেও ঐ রকম রক্ষা নিশ্চিন্ত করিতে হয়েছে। অর্থাৎ কালিতে যেটুকু কম পড়েছে দাসের মধ্যে সেটা আদায় করে নিতে হল। সব ফাঁকগুলি সমান ভরিয়ে দিয়েও আমি কবিতা লিখেছি।

আমি—সেই রকম ছন্দকেই আমি বলেছি স্বর-মাত্রিক। এ-ছন্দে স্বরসংখ্যা ও মাত্রা-পরিমাণ দুটোই যুগপৎ ঠিক থাকে বলে এ-ছন্দকে স্বর-মাত্রিক নাম দিয়েছি।











কবি—স্বরমাত্রিক ছন্দের একটি দৃষ্টান্ত দাও দেখি।






আমি—বিহঙ্গ গান শাস্ত তখন অন্ধরাতের পক্ষছায়ে, —এখানে প্রতি পর্বে চার স্বর ও ছয় মাত্রা ঠিক আছে।

কবি—‘পূরবী’র ‘বিজয়ী’ কবিতাটিতে আমি মাত্রার ফাঁক পূরণ করে দিতে চেষ্টা করেছিলুম। কিন্তু সর্বত্র তা আমি পারি নি। কারণ ছন্দের নৃতন স্বরবজায় রাখতে চেষ্টা করে কবিতাকে তো খর্ব করিতে পারিনে। কাজেই এ



। প্রিয়মুখ্য তত্ত্বক মায়াং ভাষ্যে নমস্কে

স্বাভাৱ-প্রতিফলক পদ  বসন্তমধাৱ মধাৱ প্রিয়মুখ্যং বসন্তমধাৱ ইত্যভিধাৱ  
 অসংকেপাং কো-প্রতিফলক "প্রিয়মধাৱ"। বসন্তমধাৱ-ভাষ্যে প্রিয়মুখ্য মায়াং অসংকেপং প্রিয়মুখ্যমায়াং  
 "বসন্তমধাৱমায়াং"। মায়াং বসন্তমধাৱমায়াং অসংকেপং ইত্যভিধাৱ মায়াং ইত্যভিধাৱ  
 বসন্তমধাৱমায়াং।         

বসন্তমধাৱমায়াং ইত্যভিধাৱ বসন্তমধাৱমায়াং     

বসন্তমধাৱমায়াং ইত্যভিধাৱ "প্রিয়মধাৱ"। বসন্তমধাৱমায়াং ইত্যভিধাৱ "প্রিয়মধাৱ"।  
 বসন্তমধাৱমায়াং ইত্যভিধাৱ "প্রিয়মধাৱ"। বসন্তমধাৱমায়াং ইত্যভিধাৱ "প্রিয়মধাৱ"।

বসন্তমধাৱমায়াং ইত্যভিধাৱ "প্রিয়মধাৱ"। বসন্তমধাৱমায়াং ইত্যভিধাৱ "প্রিয়মধাৱ"।  
 বসন্তমধাৱমায়াং ইত্যভিধাৱ "প্রিয়মধাৱ"। বসন্তমধাৱমায়াং ইত্যভিধাৱ "প্রিয়মধাৱ"।

বসন্তমধাৱমায়াং ইত্যভিধাৱ "প্রিয়মধাৱ"। বসন্তমধাৱমায়াং ইত্যভিধাৱ "প্রিয়মধাৱ"।  
 বসন্তমধাৱমায়াং ইত্যভিধাৱ "প্রিয়মধাৱ"। বসন্তমধাৱমায়াং ইত্যভিধাৱ "প্রিয়মধাৱ"।

।-প্রিয়মধাৱ। বসন্তমধাৱ।-প্রিয়মধাৱ। বসন্তমধাৱ।-প্রিয়মধাৱ।  
 ।-প্রিয়মধাৱ। বসন্তমধাৱ।-প্রিয়মধাৱ। বসন্তমধাৱ।-প্রিয়মধাৱ।

।-প্রিয়মধাৱ। বসন্তমধাৱ।-প্রিয়মধাৱ। বসন্তমধাৱ।-প্রিয়মধাৱ।  
 ।-প্রিয়মধাৱ। বসন্তমধাৱ।-প্রিয়মধাৱ। বসন্তমধাৱ।-প্রিয়মধাৱ।

।-প্রিয়মধাৱ। বসন্তমধাৱ।-প্রিয়মধাৱ। বসন্তমধাৱ।-প্রিয়মধাৱ।  
 ।-প্রিয়মধাৱ। বসন্তমধাৱ।-প্রিয়মধাৱ। বসন্তমধাৱ।-প্রিয়মধাৱ।



কবিতাটিতে কোনো কোনো জায়গায় মাত্রার ফাঁক আর পূরণ করা হয় নি। যারা কবিতা পড়বে তারাই ফাঁক পূরণ করে নেবে। ছন্দের ঝোঁক আপনিই পাঠককে ঠিক পথে চালায়।

তার পর কবি প্রসঙ্গক্রমে জিজ্ঞাসা করলেন—আমি ‘বলাকা’র যে নতুন বকরের ছন্দ রচনা করেছি তাকে তুমি কি নাম দিয়েছ? তাকেও কি তুমি প্রবহমান ছন্দ বল?

আমি বললুম—‘বলাকা’র নতুন ছন্দও প্রবহমান বটে, কিন্তু শুধু প্রবহমান বললে এ ছন্দের পুরো পরিচয় দেওয়া হয় না। কারণ এ-ছন্দে তো পংক্তির একটা নির্দিষ্ট দৈর্ঘ্য নেই, এ বিষয়েও এ-ছন্দে সম্পূর্ণ স্বাধীনতা রয়েছে। তাই এ-ছন্দকে আমি বলেছি মুক্তক।

কবি—মুক্তক? এ নাম চলতে পারে।

আমি—অবশ্য শুধু বাইরের বাধন থেকেই মুক্তি ঘটেছে, ভিতরের বাধন থেকে নয়।

কবি—তা তো হবেই।

আমি—কিন্তু ‘বলাকা’র ছন্দকে আমি শুধু মুক্তক বলিনে, বলি বৌগিক মুক্তক। কারণ ‘পলাতকা’র ছন্দও তো মুক্তক, সে-ছন্দকে বলেছি স্বরবৃত্ত মুক্তক।

কবি—মাত্রাবৃত্ত ছন্দেও মুক্তক রচনা করা যায় কি না আমি তাই ভাবছি। কিন্তু তাতে মুশকিল আছে। এ-ছন্দ গড়িয়ে চলে কি না, বেশ : সেখানে থামানো যায় না।

আমি—কিন্তু পাঁচ মাত্রার ছন্দে তো কতকটা মুক্তক আপনি রচনা করেছেন। ‘মহুয়া’র ‘সাগরিকা’ কবিতাটি কতকটা মুক্তক ছন্দে রচিত।

কবি—আজকাল ‘ছ’ মাত্রার মুক্তক রচনার চেষ্টা আমি করছি।

তার পর তিনি তাঁর কবিতার খাতা থেকে কয়েকটি নব-রচিত কবিতা আবৃত্তি করে শোনালেন। ছ’মাত্রার ছন্দ, পংক্তিতে পংক্তিতে মিল আছে, কিন্তু পংক্তিদৈর্ঘ্যের কিছু স্থিরতা নেই, অথচ কবিতার ভাব বহু পংক্তিতে প্রবাহিত হয়ে গেছে। তাঁর এই ছ’মাত্রার মুক্তক ছন্দের সন্ধান পেয়ে বিস্মিত হলুম। আজও তাঁর নব-নবোন্মেষশালিনী প্রতিভার অসাধারণ সৃষ্টিকার্যে কিছুমাত্র বিরাম ঘটে নি। আজও তিনি নতুন ছন্দ রচনায় সমানভাবে নিরত রয়েছেন।

পরের দিন আবার যখন তাঁর কাছে গেলুম তখন তিনিই ছন্দের প্রসঙ্গ উত্থাপন করে বললেন,—ছন্দ এমন একটা বিষয় যাতে সকলে একমত হতে পারে না। তোমার সঙ্গে একমত হতে পারব এমন আশা করা যায় না। ছন্দ হচ্ছে কানের জিনিস; এক-এক জনের কান এক-এক রকম ধ্বনি পছন্দ করে। তাই আবৃত্তির ভঙ্গির মধ্যে এতটা পার্থক্য ঘটে। আমি দেখেছি কেউ কেউ খুব বেশি টেনে টেনে আবৃত্তি করে, আবার কেউ আবৃত্তি করে খুব তাড়াতাড়ি। কানেরও একটা শিক্ষার প্রয়োজন আছে আর আবৃত্তি করারও অভ্যাস থাকা চাই। আমি কিন্তু কবিতা রচনার সময় আবৃত্তি করতে করতেই লিখি; এমন কি কোনো গল্প রচনাও যখন ভাল করে লিখব মনে করি তখন গল্প লিখতে লিখতেও আবৃত্তি করি। কারণ, রচনার ধ্বনি-সংগতি ঠিক হল কি না তার একমাত্র প্রমাণ হচ্ছে কান।

আমি—গল্প রচনার মধ্যেও যে rhythm থাকা প্রয়োজন, একমাত্র কানের সাহায্য ছাড়া তো সে rhythmকে আয়ত্ত করার কোনো উপায় নেই।

কবি—বাংলায় rhythmic prose রচনা নেই। এক সময়ে আমি rhythmic prose রচনার চেষ্টা করেছি। লিপিকাতে সে rhythm ধরতে পারবে। লিপিকার রচনাগুলিকে আমি প্রথমে rhythm রক্ষার জন্তে পড়তামতো ভাঙা ভাঙা লাইনেই লিখেছিলুম। পরে গল্পের মতো করেই ছাপানো হয়েছে।

আমি—Rhythmic proseকে rhythm অনুযায়ী ভেঙে ভেঙে রচনা করার সার্থকতা আছে। তাতে rhythmটা সহজে ধরা পড়ে।

কবি—তা আছে। আমি এক সময় সত্যেনকে বলেছিলুম বাংলায় rhythmic prose রচনা করতে। কিন্তু সে তো তা করলে না। সে কবিতার ছন্দের ঝংকারে এমন আকৃষ্ট হল যে সে শেষের দিকে একরকম ছন্দে পাওয়া হয়েছে গিয়েছিল। অবন (অবনীন্দ্রনাথ ঠাকুর) এক সময় rhythmic prose লিখতে চেষ্টা করেছিল। তার লেখা আমার ভাল লেগেছিল। কিন্তু বেশি প্রলম্বিত এবং অসংলিষ্ট হওয়াতে চলল না।

আমি—আপনি rhythmic prose এর আদর্শ কেমন হবে তা দেখিয়ে দিল না।

কবি—‘গীতাঞ্জলি’র ইংরেজি অনুবাদের proseএ যে rhythm রয়েছে তাতে

সে দেশের লোকেরা আকৃষ্ট হয়েছে। মনে করেছি বাংলা গণ্ডে ও-রকম rhythm রেখে কিছু রচনা করব। কিন্তু আমাকেই সেটা করতে হবে কেন? আধুনিক কালের কবিরাই এ কাজটা করে না কেন? আধুনিক কবিরা যে মিল বর্জন করে লাইন ভেঙে ভেঙে কবিতা রচনা করছে তাতে কিছু দোষ নেই। মিল না দেওয়াটা মোটেই অগাধ নয়। কিন্তু অমিল কবিতা রচনা করা খুবই শক্ত, তাতে বিশেষ শক্তির প্রয়োজন।

আমি—অমিল অসমপংক্তিক কবিতা তো আপনিই সর্বপ্রথমে রচনা করেছেন। কিন্তু ও-রকম কবিতা তো একটির বেশি পাই নে। ‘মানসী’র ‘নিফল কামনা’-ই তো তার একমাত্র নিদর্শন।

কবি—ও-ছন্দের কবিতা আরও রচনা করেছিলুম। কিন্তু সেগুলি আর প্রকাশ করা হয় নি।

কবি বললেন—মিল জিনিসটার প্রতি কিছুকাল পূর্বকার কবিদের যথেষ্ট আস্থা ও সতর্কতা ছিল না। তাঁদের অনেকে পংক্তির শেষে কোনো রকমে একটুখানি মিল ঘটিয়েই তৃপ্ত হতেন; অনেক সময় তো শুধু ‘রে’ ‘হে’ ইত্যাদি দিয়েই মিলের কাজ শেষ করতেন।

আমি—আপনিই প্রথমে বাংলায় dissyllabic (দ্বিদল) trisyllabic (ত্রিদল) মিলের আদর্শ দেখিয়েছেন। শুধু তাই নয়, পংক্তির শেষ পর্বে মিলের সঙ্গে সঙ্গে ধ্বনির উত্থানপতনের দ্বারা যে cadence-এর সৃষ্টি হয় তা-ও আপনার কবিতায় প্রথম পাওয়া গেল।

তারপর আবার ছন্দের কথা উঠল। কবি বললেন—ছন্দ সম্বন্ধে আলোচনা কর। কিন্তু ছন্দ এমন হওয়া উচিত, এমন হওয়া উচিত নয়, এ কথা বলে না। ছন্দ কেমন হবে তা কবিরাই ঠিক করবেন, তাঁরা নিজের কান আর ছন্দবোধের উপর নির্ভর করে নতুন নতুন ছন্দ রচনা করবেন। ইংরেজি সাহিত্যে এক সময়ে ছন্দের ভাগ অত্যন্ত নির্দিষ্ট ছিল, কোথাও ব্যতিক্রম হত না। তারপর কোলরিজ প্রভৃতি কবিরা এসে নতুন ছন্দের প্রবর্তন করলেন, তাঁরা কাটা কাটা ছন্দের ভাগ মানলেন না, কোথাও বেশি, কোথাও কম চালাতে ল'গলেন। প্রথম প্রথম তাতে আপত্তি হয়েছিল। পরে কিন্তু তাঁদের প্রথাটাই চলে গেল। হুতরাং ছন্দের কোনো অকাট্য নিয়ম নেই, এ কথাটা মনে রাখা দরকার।

আমি—আমার আদর্শটাও তাই। কবিদের কি করা উচিত, কি করা

অহুচিত তা বলা আমার উদ্দেশ্য নয়। কবির বর্তমানে কোন্‌ নিয়মে ছন্দ রচনা করছেন আমি তাই আবিষ্কার করে দেখাতে চাই। আমার কাজ হচ্ছে শুধু Induction। State-এর law-এর মতো কোনো law চালিয়ে দিতে চাইনে। Nature-এর law-এর মতো ছন্দের law; সেটি শুধু আবিষ্কার করে দেখিয়ে দিলেই আমার কাজ শেষ হয়। কেউ যদি কোনো নতুন নিয়মের ছন্দ চালায় তবে তাও চলবে। তার জন্তে শাস্তির ব্যবস্থা করা তো বৈয়াকরণিকের কাজ নয়।

কবি—শাস্তির ব্যবস্থা আছে বৈ কি। কঠোর শাস্তির ব্যবস্থা আছে। যে-ছন্দ কানকে খুশি করতে পারবে না, সে-ছন্দ কেউ পড়বে না। এর চেয়ে বড় শাস্তি আর কি আছে? কাজেই যেখানটাতে কান খুশি হয় না সেখানটাতে ছন্দপতন হয়েছে এ কথাও বলা চলে।

আমি—তা তো চলে। কেন ছন্দপতন হয়েছে তাও তো দেখা দরকার। তারপরে অন্য প্রশ্নে আমি বললুম—ইংরেজ কবির পংক্তির এবং পর্বের দৈর্ঘ্যে অনেক বৈচিত্র্য সৃষ্টি করেছেন। ও-রকম বৈচিত্র্য আপনার কবিতাতেও প্রচুর আছে এবং তাতে যে কত ছন্দোবন্ধের সৃষ্টি হয়েছে তার সীমা নেই। আমি এই বৈচিত্র্যকে বোঝাবার জন্তে ‘বর্ধিত’ এবং ‘খণ্ডিত’ এই দুটি শব্দ ব্যবহার করেছি। যেমন একটি পংক্তিতে আছে চোদ্দ unit, তার পরের পংক্তিতে যদি থাকে দশ unit তবে বলি দ্বিতীয় পংক্তিতে চার unit-এর একটি পর্ব খণ্ডিত হয়েছে; তার পরের পংক্তিতে আবার চার unit-এর দুটি পর্ব যোগ করে আঠারো unit-এর একটি বর্ধিত পংক্তি রচিত হতে পারে। এভাবে যোগ-বিয়োগের দ্বারা যে বহু বৈচিত্র্যের সৃষ্টি হয় তার অসংখ্য দৃষ্টান্ত আপনার রচনায় পাই।

আমাদের আলোচনা চলছে এমন সময় একজন ফরাসী অধ্যাপক কবির সঙ্গে দেখা করতে আসেন। অগত্যা কথার পর কবি তাঁকে জিজ্ঞাসা করলেন, ফরাসী কাব্যে quantitative ছন্দ আছে কি?

অধ্যাপক—না, ফরাসী কাব্যে quantitative ছন্দ চলে না। শুধু syllabic ছন্দই চলে। তারপর তিনি কবিকে প্রশ্ন করলেন আপনি কোন্‌ ছন্দ ব্যবহার করেন?

কবি—আমি quantitative ও syllabic দুয়কম ছন্দই ব্যবহার করে থাকি।

অধ্যাপক—আপনি বাংলায় free verse রচনা করেছেন কি ?

কবি—আমি অনেক free verse রচনা করেছি ।

তারপর অধ্যাপক মহাশয় কথাপ্রসঙ্গে বললেন—বর্তমানে ফরাসীতে free verse যেমন চলে rhythmic proseও তেমনি চলে । Rhythmic prose রচনার ভঙ্গি এমন যে তাতে কবিতার ধ্বনিস্পন্দ ধরা পড়ে কিন্তু তা কোনো ছন্দের নিয়মের আয়ত্তে আসে না ।

তারপরে কবিকে প্রণাম করে বিদায় নিয়ে এলুম । কি প্রশান্ত ধৈর্য ও স্নেহের সঙ্গে তিনি আমার সমস্ত কথা শুনলেন এবং নিজের বক্তব্য আমাকে বুঝিয়ে বললেন, সে কথা স্মরণ করে এই কথাই বিশেষভাবে অনুভব করলুম যে তিনি শুধু অদ্বিতীয় প্রতিভাশালী কবিই নন, ব্যক্তিগত সহৃদয়তাতেও তিনি অনন্যসাধারণ ; তাঁর প্রতিভার গ্রায় তাঁর মহৎও সর্বতোমুখী ।

পরিশেষে

### কবির পুনশ্চ বক্তব্য

সেদিনকার আলোচনায় প্রসঙ্গক্রমে এই প্রশ্ন উঠেছিল যে, ছন্দে সিলেব্‌ল প্রধান, অথবা মাত্রা প্রধান । এ সম্বন্ধে আমার মত এই যে মাত্রা নিয়েই ছন্দের স্বরূপ । কিস্কিণীতে ঘৃষ্টি কিভাবে ও কত সংখ্যায় সংজ্ঞানো, সে কথাটা গোণ, তার ঝংকারের লয়টাই আসল কথা । বাস্তবিক ছন্দে প্রত্যেক পর্বে উর্ধ্বসংখ্যা কয় সিলেব্‌লের স্থান আছে তা আমি পূর্বে বিচার করে দেখি নি । ‘বিচিত্রা’ সম্পাদক বলেন ছয় বা পাঁচ বা চার সবই চলে । আমি তাঁকে দৃষ্টান্ত দ্বারা প্রমাণ করতে অনুরোধ করেছিলুম । তিনি সেই অনুরোধ রক্ষা করে দৃষ্টান্ত স্বয়ং রচনা করেছেন, পাঠকদের গোচর করা গেল—

আজিকে তোমায়ে ডাক দিয়ে বলি, শুন গো সখী,

তোমার বীণায় বাজে অপরূপ ছন্দ ও কি ?

কোনো পদ তার চার সিলেবিলে কোনোটা পাঁচে,

এ যেন মিতালি ঝাঁপতালে আর ক. বালী নাচে !

এ যেন আঠারো বরষের পাশে ষোড়শী নারী,

যে বলে ইহায়ে অমিল, ভাহার সঙ্গ ছাড়ি ।

চারে পাঁচে মিল হয় না, এ কোন্ দেশের কথা ?  
 চারে পাঁচে নয়, তার অভিনয় যথা ও তথা ।  
 চারের সহিত পাঁচের প্রণয় রসিকে জানে,  
 অরসিক জনে শাস্ত্রই মানে, মানে না কানে ।  
 কানের মাঝারে ছন্দের বাসা, নিয়মে নহে ।  
 কানে মানে না যে সুধীজন তারে বে-কানা কহে ।  
 অসমে অসমে কত অপকৃপ সাম্য আছে !  
 কত মধুভরা ফুল ফোটে, জানো, কাঁটার গাছে ?

রিম্ কিম্ কিম্ বরষা বারে, বরষা বারে তরুর দেহে  
 লতা ছলে ছলে পরশে তারে, পরশে তারে সজল স্নেহে  
 ঘন তমসার সজল মায়া বিছালো ছায়া নেত্রে তব,  
 স্নিগ্ধ তোমার ওষ্ঠাধরে হাস্ত বারে কি অভিনব !

না জানি আজি গাহ চূপি চূপি কি গান সখী,  
 এ কি এ আলো নয়নে তোমার আজি নিরখি !  
 বুঝি না কি যে আছে তব মনে সজ্ঞাপনে,  
 প্রণয়ী জনে কেন অকরুণ বিদায় থনে !

আর কত বল মিলাইব মিল চারে ও পাঁচে ।  
 এখনো কাহারো মনে সন্দেহ কিছু কি আছে ?  
 সেদিন সন্ধ্যা, গুরুদেব-গৃহে উঠিল কথা,  
 চার পাঁচ দিয়ে ছন্দ করার নাহিক প্রথা ।  
 গুরুর আদেশে ত্রিবিধ প্রমাণ দিলাম এনে,  
 দেখিব এখন কি বিধি করেন প্রবোধ সেনে ।

দেখা যাচ্ছে, ‘আজিকে তোমারে’ ছয় সিলেব্‌ল, তার পরেই ‘ডাক দিয়ে  
 বলি’ পাঁচ সিলেব্‌ল । পরবর্তী ছন্দে ‘তোমার বীণায়’ চার সিলেব্‌ল, আবার  
 ‘বাজে অপকৃপ’ পাঁচ । প্রাকৃত বাংলা ছন্দেও এ-রকম দৃষ্টান্ত আছে, যথা—



৫                      ৪                      ৩                      ১

শিবুঠাকুরের । বিয়ে হবে । তিন কণ্ঠে । দান ।

এই একটা লাইনেই দেখা যাচ্ছে চার অসমান সংখ্যক সিলেব্‌ল-পিণ্ড নিয়ে  
একই বাগ্মাত্মিক ছন্দ রচিত ।\*

\* বিচিত্রা ১৩১৯ জ্যৈষ্ঠ

## বাংলা স্বরবৃত্ত ছন্দের স্বরূপ

জ্যোষ্ঠের 'বিচিত্রা'র 'ছন্দ-বিচার' নামক প্রবন্ধে রবীন্দ্রনাথের সঙ্গে আমার ছন্দ-বিষয়ক যে আলোচনা প্রকাশিত হয়েছে, নানা দিক থেকে তার বিশেষ মূল্য আছে বলে মনে করি। ওই প্রবন্ধটি রবীন্দ্রনাথের কাছে পাঠানো হয়েছিল এবং তিনি সেটিকে আত্মপূর্বিক দেখে অস্বমোদন করেছেন। শুধু 'স্বরবৃত্ত' ছন্দের প্রকৃতি সম্বন্ধে একটি নতুন মন্তব্য যোগ করে দিয়েছেন। কাজেই মনে হচ্ছে, বাংলা ছন্দের পরিভাষা, বিশ্লেষণ, শ্রেণীবিভাগ ও নামকরণ প্রভৃতি বিষয়ে তিনি আমার মত সমর্থন করেছেন। একমাত্র 'স্বরবৃত্ত' ছন্দের প্রকৃতি সম্বন্ধে তাঁর মত ও আমার মতে খুবই পার্থক্য রয়েছে। স্তবরাং এ বিষয়ে আরও আলোচনা হওয়া বাঞ্ছনীয়।

কিন্তু স্বরবৃত্ত ছন্দের স্বরূপ আলোচনায় প্রবৃত্ত হবার পূর্বে দেখা যাক কোন্ কোন্ বিষয়ে তাঁর সঙ্গে আমার মতসাম্য আছে। প্রথমতঃ যুগ্ম ও অযুগ্ম ধ্বনি, প্রবহমানতা (enjambement), মুক্তক প্রভৃতি পারিভাষিক শব্দকে আমি যে-সব নির্দিষ্ট অর্থে ব্যবহার করি তাতে তাঁর আপত্তি নেই। ছন্দের শ্রেণীবিভাগ এবং নামকরণ-বিষয়েও বিশেষ মতভেদ আছে বলে মনে হয় না। 'প্রভু বৃদ্ধ লাগি আমি ভিক্ষা মাগি' প্রভৃতি ষড়্‌ব্যাষ্টিপর্বিক ছন্দের কবিতাতে তিনি কেন যুগ্মধ্বনিকেও এক ব্যষ্টি বা unit রূপে ব্যবহার করেছিলেন তাও এই উপলক্ষেই জানা গেল। 'স্বরমাত্রিক' ছন্দ সম্বন্ধেও মনে হচ্ছে তাঁর সঙ্গে আমার মতবিরোধ হবার কারণ নেই। 'পূরবী'র 'বিজয়ী' কবিতাটির ছন্দ কিরূপে প্রধানতঃ স্বরমাত্রিক হয়েছে এ সম্বন্ধে তিনি যা বলেছেন তা থেকেই আমি এ অনুমান করছি। কিন্তু রবীন্দ্রনাথের সঙ্গে আলোচনার ফলে যে-বিষয়টা সব চেয়ে বেশি করে অস্বভব করেছি সেটি এই যে, বাংলা যৌগিক ছন্দের প্রকৃতি সম্বন্ধে তিনি আমার সঙ্গে সম্পূর্ণ একমত। আমি এ-ছন্দকে যেভাবে বিশ্লেষণ করি তিনিও ঠিক তাই করেন। মাঘের (১৩৩৮) 'পরিচয়ে' যৌগিক অর্থাৎ তাঁর কথিত সাধু বা সংস্কৃত বাংলার ছন্দের প্রকৃতি সম্বন্ধে এক স্থানে তিনি যে মন্তব্য করেছেন তার থেকেও এ কথা নিঃসংশয়ে প্রমাণিত হয়। ওই মন্তব্যটুকু এ স্থলে উদ্ধৃত করলেই আমার কথা প্রমাণিত হবে। যথা—

—রূপ সাগরের তলে ডুব দিহু আমি—

এটা সংস্কৃত বাংলার ছাঁদে লেখা। এখানে শব্দগুলো পরস্পর গা-ঘেঁষা নয়। বাংলা প্রাকৃতের অনিবার্য নিয়মে এই পদের যে শব্দগুলি হসন্ত, তারা আপনারই স্বরধ্বনিকে প্রসারিত করে ফাঁক ভর্তি করে নিয়েছে। ‘রূপ’ এবং ‘ডুব’ আপন উ-কার ধ্বনিকে টেনে বাড়িয়ে দিলে। ‘সাগরের’ শব্দ আপন এ-কারকে পরবর্তী হসন্ত র-য়ের পঙ্খতা চাপা দিতে লাগিয়েছে। এই উপায়ে ঐ পদটার প্রত্যেক শব্দ নিজের মধ্যেই নিজের মর্যাদা বাঁচিয়ে চলেছে। অর্থাৎ এ-ছন্দে ডিমক্রেসির প্রভাব নেই। এই রকমের ছন্দে দুই মাত্রার ধ্বনি আপন পদক্ষেপের প্রত্যেক পর্ধ্যায়ে যে অবকাশ পায় তা নিয়ে তার গৌরব। বস্তুতঃ এই অবকাশের সুযোগ গ্রহণ করে তার ধ্বনি-সমারোহ বাড়িয়ে তুললে এ-ছন্দের সার্থকতা। যথা—

চৈতন্য নিমগ্ন হোলো রূপসিকুতলে।

—পৃ ৩৮৮

অর্থাৎ ‘রূপ সাগরের তলে ডুব দিহু আমি’ এই পয়ারের পংক্তিটার ধ্বনিবিন্যাস হচ্ছে এ-রকম—

॥ ॥ ॥ ॥ ॥ ॥ ॥  
রূপ সাগরের তলে ॥ ডুব দিহু আমি

এখানে স্পষ্টই দেখা যাচ্ছে যুগ্মধ্বনিগুলির বিস্ত্রিষ্ট উচ্চারণ এবং তাদের ধ্বনিমূল্য দুই মাত্রা; তাই রবীন্দ্রনাথ এগুলিকে বলেছেন ‘দুই মাত্রার ধ্বনি’। অগ্রহায়ণের ‘বিচিত্রা’য় এবং অগ্ন্যাণ্ড কয়েকটি প্রবন্ধে আমিও যৌগিক ছন্দের ধ্বনিবিশ্লেষণ ঠিক এভাবেই করেছিলুম। লক্ষ করার বিষয়, এই পংক্তিটিতে যুগ্মধ্বনিগুলি সর্বত্রই শব্দের অন্তে অবস্থিত। আর, যৌগিক ছন্দে শব্দান্তস্থিত যুগ্মধ্বনির উচ্চারণ যে সর্বত্রই বিস্ত্রিষ্ট ও দ্বৈমাত্রিক, এ কথা আমি বহুবার বলেছি। এই পংক্তিটিতে শব্দমধ্যবর্তী যুগ্মধ্বনি একটিও নেই; কাজেই যৌগিক ছন্দের পয়াবে শব্দমধ্যবর্তী যুগ্মধ্বনির প্রকৃতি কিরূপ, তা এই দৃষ্টান্তটি দ্বারা বোঝা যায় না। সুতরাং আর-একটি দৃষ্টান্ত দিচ্ছি।—

॥  
আজ শতবর্ষপরে পরে

। ॥ । ॥ । ॥  
এ সুন্দর অরণ্যের পল্লবের স্তরে

॥ ॥

কাঁপবে না আমার পরাণ ?

—বহুস্করা, সোনার তরী, রবীন্দ্রনাথ

এখানে শব্দান্তবর্তী যুগ্মধ্বনিগুলি (আজ্, দব্, ণেব্, বেব্, সার্, রাণ্) সমস্তই বিল্লিষ্ট ও দ্বৈব্যষ্টিক এবং শব্দমধ্যস্থিত যুগ্মধ্বনিগুলি (বব্, স্থন্, রণ্, পল্) সমস্তই সংল্লিষ্ট ও একব্যষ্টিক। স্মৃতরাং দেখা গেল এই সাধারণ পয়ারজাতীয় ছন্দে যুগ্মধ্বনির উচ্চারণ কোথাও সংল্লিষ্ট ও একব্যষ্টিক এবং কোথাও বিল্লিষ্ট ও দ্বৈব্যষ্টিক। এইরূপে যুগ্মধ্বনির বিল্লিষ্ট ও সংল্লিষ্ট এই দুই প্রকৃতির যোগে উৎপন্ন বলেই সাধারণ পয়ারজাতীয় ছন্দকে ‘যৌগিক’ ছন্দ নামে অভিহিত করেছি। মাঘের ‘পরিচয়’ থেকে উদ্ধৃত রবীন্দ্রনাথের উক্তি থেকে স্পষ্টই বোঝা যায় যে তিনিও এ ছন্দের উক্ত একম ধ্বনিবিশ্লেষণেরই পক্ষপাতী। বৈশাখের ‘বিচিত্রা’তেও দেখিয়েছি যে যৌগিক (অর্থাৎ সাধারণ পয়ারজাতীয় সাধু) ছন্দের ধ্বনিবিশ্লেষণ বিষয়ে রবীন্দ্রনাথের অবলম্বিত পদ্ধতি ও আমার পদ্ধতির মধ্যে কিছুমাত্র পার্থক্য নেই। সর্বশেষে ‘ছন্দ-বিচার’ প্রবন্ধটি থেকে নিঃসংশয়ে দেখা গেল যে যৌগিক ছন্দের ধ্বনিসম্মিলন-প্রণালী সম্বন্ধে কবিগুরু সঙ্গে আমার লেশমাত্র মতভেদ নেই। এই উপলক্ষে মাঘের ‘পরিচয়’ থেকে উদ্ধৃত তাঁর উক্তিটির সঙ্গে জ্যৈষ্ঠের বিচিত্রায় যৌগিক ছন্দ সম্বন্ধে আমার মন্তব্যটি (‘ছন্দ-বিচার’, পৃ ৫৭৬-৭৮) তুলনা করলেই আমার এ কথার যাথার্থ্য বোঝা যাবে।

এ স্থলে প্রসঙ্গক্রমে চাতুর্মাত্রিক মাত্রাবৃত্ত ছন্দ সম্বন্ধে একটি কথা বলা অগ্রায় হবে না। উপরে উদ্ধৃত—‘রূপ সাগরের তলে ডুব দিহু আমি’ এই পংক্তিটিকে যৌগিক পয়ার এবং মাত্রিক পয়ার, এই দুইটি স্বতন্ত্র ভঙ্গিতে বিশ্লেষণ করা যায়। আর এই দুই ভঙ্গিতে একই পংক্তির ধ্বনি-প্রকৃতি দুইটি সম্পূর্ণ স্বতন্ত্র উপায়ে দেখা দেয়। যৌগিক ছন্দে এই পংক্তিটির ধ্বনিরূপ হচ্ছে এই—

॥ ॥ ॥

রূপ্ সাগরের তলে ॥ ডুব্ দিহু আমি

এখানে প্রত্যেকটি শব্দ পরবর্তী শব্দ থেকে সম্পূর্ণ স্বতন্ত্র ও বিচ্ছিন্ন; রবীন্দ্রনাথের ভাষায় ‘শব্দগুলা পরস্পর গা-ঘেঁষা নয়’। এইটে গণ্ডের মতো যৌগিক ছন্দের একটি বিশিষ্ট প্রকৃতি ও লক্ষণ। দ্বিতীয়তঃ যৌগিক ছন্দের স্বত্বস্থাপন রীতি। এই পংক্তিটিতে আট unit বা ব্যষ্টির পর অর্ধ স্বত্ব এবং

পংক্তির শেষে পূর্ণ যতি। অর্ধ যতিটির দ্বারা সমগ্র পংক্তিটা দুইটি পদে বিভক্ত হয়েছে। কিন্তু এই পদদ্বয়টি এক-একটি ঐষদ-যতির দ্বারা দুটি করে পর্বে বিভক্ত হয় নি। অর্থাৎ ঐষদ-যতি লুপ্ত হওয়াতে দুটি করে পর্ব যুক্ত হয়ে দুটি যুক্ত-পর্বিক পদ উৎপন্ন হয়েছে। (ছন্দোবিশ্লেষ—প্রবাসী ১৩৩৮ ফাল্গুন-চৈত্র ত্রৈত্ব্য)। এই যুক্ত-পর্বিক পদের চালটা যৌগিক ছন্দের একটি বিশেষত্ব। রবীন্দ্রনাথের ভাষায় ‘লম্বা নিশ্বাসের মন্দগতি চালেই পয়ারের পদমর্যাদা’ (সবুজপত্র ১৩২১ শ্রাবণ, পৃ ২২৮)। যা হক, শব্দের পারস্পরিক বিচ্ছিন্নতা এবং যুক্তপর্বের চাল যৌগিক ছন্দের দুটি বিশেষত্ব। মাত্রিক ছন্দে এ দুটি লক্ষণের কোনোটিই সাধারণতঃ দেখা যায় না। অর্থাৎ মাত্রিক ছন্দে শব্দগুলি সুস্পষ্টভাবে পরস্পর থেকে বিচ্ছিন্ন থাকে না এবং যুক্তপর্বের চালও এ-ছন্দে খুব বিরল। উপরের পংক্তিটিকে যদি চতুর্মাত্রিক ভঙ্গিতে রূপান্তরিত করা যায় তবে তার ধনিকরূপ হবে এ-রকম—

রূপ্ সাগ। রেব্ তলে ॥ ডুব্ দিহু। আমি

এখানেও যৌগিক ছন্দের মতো যুগ্মধ্বনির মূল্য দ্বৈমাত্রিক। কিন্তু এ-ছন্দের মাত্রা যৌগিক ছন্দের মাত্রার চেয়ে লঘুতর; তাই এ-ছন্দের গতি চপল এবং তার তাল নৃত্য-পরায়ণ। যৌগিক ছন্দের গতি মন্থর এবং তার তাল ধীর। যা হক, এই মাত্রিক বিশ্লেষণটির প্রতি লক্ষ করলে দেখা যাবে যে, এখানে যুক্তপর্বের চাল নেই; অর্ধ ও পূর্ণ যতির দ্বারা ঐষদ-যতিও এখানে সম্পৃষ্ট। সে জগ্গেই এ-ছন্দে লম্বা নিশ্বাসের মন্দগতি চালও নেই। আর এইটে এ-ছন্দের গতির চপলতার হেতু। দ্বিতীয়তঃ, এ-ছন্দে শব্দের পারস্পরিক বিচ্ছিন্নতা আবশ্যক নয়; এ-ছন্দে শব্দগুলিকে পরস্পর সংলগ্ন বলে গণ্য করলেও ছন্দের প্রকৃতিতে ত্রুটি ঘটে না। উপরের দৃষ্টান্তটিকে যথাযথভাবে আবৃত্তি করলেই এ কথার সত্যতা বোঝা যাবে। অর্থাৎ উপরের দৃষ্টান্তটিকে যদি

রূপ্ সাগ। রেব্ তল ॥ ডুন্দিহু। আমি

এ ভাবে লেখা যায় তাহলে এর চাতুর্মাত্রিক প্রকৃতিটি ধরা পড়বে। ‘বরষার নিঝরে অঙ্কিত কায়’ (নিফল উপহার, মানসী) ‘গঙ্গনা নদীতীরে খঞ্জনী গায়ে’ (সহজ পাঠ, দ্বিতীয় ভাগ) প্রভৃতি পংক্তির সঙ্গে এটির তুলনা করলেই আমার এ কথার সার্থকতা উপলব্ধি হবে। কিন্তু যৌগিক ছন্দে এভাবে এক শব্দকে অগ্র শব্দের সঙ্গে জড়িয়ে ফেলার ঘো নেই, কেননা তাহলে ও-ছন্দের মূল প্রকৃতিরই

বিকার ঘটবে। এ বিষয়ে ষৌগিক ছন্দ হচ্ছে পুরোপুরি গন্তধর্মী এবং এখানেই তার গৌরব শুও এরিস্টোটেলিস।

### স্বরবৃত্ত ছন্দ

১

এবার বাংলা স্বরবৃত্ত ছন্দের স্বরূপ সম্বন্ধে আলোচনায় প্রবৃত্ত হওয়া যাক। রবীন্দ্রনাথ যাকে বলেন প্রাকৃত ছন্দ বা প্রাকৃত বাংলার ছন্দ আমি তাকেই বলেছি স্বরবৃত্ত ছন্দ অর্থাৎ syllabic ছন্দ, কেননা আমার বিবেচনায় এ-ছন্দ সিলেব্‌ল-এর বিভাগের দ্বারাই নিয়ন্ত্রিত হয়। আমার বিশ্বাস বাংলা দেশের কবি এবং পাঠকরা সকলেই এ-ছন্দকে সিলেব্‌ল-নিয়ন্ত্রিত বলেই মনে করেন। এ-রকম বিশ্বাস পোষণ করার পক্ষে আমার অসুস্থ নজিরও আছে। শুধু তাই নয়, রবীন্দ্রনাথ নিজেও এ-ছন্দকে সিলেব্‌ল-বিভাগের উপর প্রতিষ্ঠিত করেন বলেই আমার ধারণা ছিল এবং তাঁর রচনার বিশ্লেষণ করেই আমার এ ধারণা হয়েছিল। কিন্তু মাঘের ‘পরিচয়ে’ যখন প্রথম দেখলুম তিনি এ-ছন্দকে স্বরবৃত্ত বা ‘সিলেব্‌ল’-বৃত্ত বলে গণ্য না করে ‘মাত্রা’বৃত্ত বলে গণ্য করেছেন তখন আমার বিশ্বাসের অবধি ছিল না। পরে আশ্বিনের ‘উত্তরা’য়ও দেখা গেল ‘বৃষ্টি পড়ে টাপুর টুপুর’ প্রভৃতি প্রাকৃত ছন্দের ছড়াটাকে তিনি চার-চার সিলেব্‌ল-এ ভাগ না করে ছয়-ছয় মাত্রায় ভাগ করেছেন। কিন্তু এটা কিছুতেই আমার কাছে যুক্তিসহ বলে বোধ হল না। তাই স্বরবৃত্ত ছন্দের স্বরূপ নিয়ে আলোচনা করার বিশেষ আবশ্যকতা বোধ করি। কিন্তু তৎপূর্বে এ বিষয়ে কবিগুরুর অভিমতটা আরো বিশদরূপে জানার প্রয়োজনীয়তা ছিল। তাই তাঁর সঙ্গে যখন সাক্ষাৎ আলোচনা হয় তখন বিশেষভাবে এ প্রশ্নটি উত্থাপন করি। কিন্তু ‘ছন্দ-বিচার’ এবং ‘কবির পুনশ্চ বক্তব্যো’ (বিচিত্রা, জ্যৈষ্ঠ) দেখা গেল প্রাকৃত বাংলার ছন্দকে চার সিলেব্‌ল-এর ছন্দ বলে গণ্য করতে কবিগুরুর খুবই আপত্তি আছে, তিনি এটাকে ছয় মাত্রার ছন্দ এবং সাধু বাংলার বাগ্মাত্রিক ছন্দের সংগোত্র বলেই মনে করেন।

২

একটা কথা গোড়াতেই বলে রাখা প্রয়োজন যে, যেহেতু ছন্দও সংগীতের মতোই একটি ধ্বনিসিদ্ধি, সেহেতু ছন্দ মাত্রেরই প্রত্যক্ষতঃ হক বা গম্যকতঃই

হক ধ্বনিপরিমাণ বা quantityর একটা স্থান থাকবেই ; কেননা সম্পূর্ণরূপে ধ্বনি-পরিমাণ-নিরপেক্ষ ধ্বনিশিল্প রচনা করা স্বভাবতঃই অসম্ভব । কারণ ধ্বনির উচ্চারণে যে কাল ব্যয়িত হয় সেই কালের পরিমাণটাই মোটামুটিভাবে ঐ ধ্বনির পরিমাণ এবং কালনিরপেক্ষ ধ্বনি হতে পারে না ; তার কল্পনাটাও অবিরোধী । ধ্বনিপরিমাণেরই পারিভাষিক নাম ‘মাত্রা’ । অতএব বোঝা গেল সম্পূর্ণরূপে ‘মাত্রা’-নিরপেক্ষ ছন্দ হতেই পারে না ; কোনো ভাষাতেই পারে না । মুখ্যতঃ হক গোণতঃ হক, কোনো ছন্দই একেবারে মাত্রানিরপেক্ষ নয় । তাই যখন বলা হয় অমুক ছন্দটা মাত্রিক বা quantitative নয়, তখনই মনে রাখতে হবে যে সেটা মুখ্যতঃ মাত্রিক নয় ; সেটা গোণতঃও মাত্রিক নয় এ কথা বলা বক্তার উদ্দেশ্য নয় । কেননা সমস্ত ভাষার সমস্ত ছন্দই মুখ্যতঃ বা গোণতঃ মাত্রিক ( quantitative ) হতে বাধ্য । ছন্দোবিৎরা যখন বলেন সংস্কৃত অমৃষ্টপ্, কিংবা বৈদিক ত্রিষ্টপ্, জগতী প্রভৃতি ছন্দ quantitative নয় পরন্তু syllabic, তখন বুঝতে হবে ওসব ছন্দ প্রত্যক্ষতঃ এবং প্রধানতঃ quantitative নয় বটে কিন্তু পরোক্ষতঃ এবং গোণতঃ এগুলি quantitative বটেই । পার্সী ধর্মগ্রন্থ অবন্তার ছন্দও মাত্রাবৃত্ত নয়, স্বরবৃত্ত বা syllabic, ছন্দোবিৎদের এই অভিমত । কিন্তু ওসব ছন্দও যে গোণতঃ মাত্রাবৃত্ত এ কথা বলাই বাহুল্য । ইংরেজি ছন্দ স্বরবৃত্ত ( syllabic ) না মাত্রাবৃত্ত ( quantitative ) এ বিষয়ে ছান্দসিকদের মধ্যে মতভেদ আছে । কারও মতে ও-ছন্দ প্রধানতঃ স্বরবৃত্ত, কারও মতে প্রধানতঃ মাত্রাবৃত্ত । কিন্তু ফরাসী ছন্দ যে syllabic এ বিষয়ে দ্বিমত রাই ; যারা ইংরেজি ছন্দকে মাত্রাপরিমাণের ভিত্তির উপর প্রতিষ্ঠিত করেন তাঁরাও স্বীকার করেন যে ফরাসী ছন্দ সিলেব্‌ল-নিয়ন্ত্রিত । ‘French prosody, except in eccentric instances, has been from the first and is to the present day, strictly syllabic’ ( G. Saintsbury’s Manual of English Prosody, p. 14 ). রবীন্দ্রনাথের সঙ্গে যে ফরাসী অধ্যাপকের আলোচনা হয়েছিল, তিনিও এ কথার সমর্থন করে বলেছেন যে ফরাসী ছন্দ syllabic ( বিচিত্রা—জ্যৈষ্ঠ, পৃ ৫৮১ ) । কিন্তু তথাপি এ কথা নিঃসন্দেহে বলা চলে যে ফরাসী ছন্দও মাত্রিক, কেননা ছন্দমাত্রাই ধ্বনিপরিমাণকে মেনে চলতে বাধ্য । সুতরাং ফরাসী ছন্দের আসল পরিচয় দিতে হলে বলতে হয় যে, ও-ছন্দ মুখ্যতঃ স্বরবৃত্ত এবং গোণতঃ মাত্রিক ।

বাংলা ছন্দের যে শ্রেণীটা মুখ্যতঃ quantitative তাকেই আমি বলেছি মাত্রাবৃত্ত। কিন্তু বাংলা ছন্দের আরও দুটি শ্রেণী আছে যা গৌণতঃ মাত্রিক বটে, কিন্তু মুখ্যতঃ নয়। সে দুটি হচ্ছে স্বরবৃত্ত এবং যৌগিক। বাংলা ছন্দের এ দুটি শ্রেণীও যে গৌণতঃ মাত্রিক এ কথা বলা বাহুল্য বলেই নিশ্চয়োজন। কিন্তু রবীন্দ্রনাথ বলেন যে প্রাকৃত বাংলায় ছন্দ মুখ্যতঃ স্বরবৃত্তক syllabic নয়, ও-ছন্দ মুখ্যতঃই মাত্রিক। এ বিষয়ে কবিগুরু সঙ্গে আমি একমত হতে পারিনে।

৩

বাংলায় স্বরবৃত্ত বা syllabic ছন্দ বলে কোনো ছন্দ আছে কি না সেটাই আগে দেখা প্রয়োজন। ১৩১৪ সালে ‘আলেখ্য’ গ্রন্থের ভূমিকায় ষিজেন্দ্রলাল লিখেছেন, “এ কবিতাগুলির ছন্দ মাত্রিক (syllabic); ‘অক্ষর হিসাবে’ ছন্দ নয়। দাশরথি রায়ের সময় কি তাহার পূর্ব হতে এ-ছন্দ বঙ্গদেশে প্রচলিত আছে। ভারতচন্দ্র ও তাঁর পরবর্তী কবিগণ প্রায়ই এ-ছন্দ বর্জন করে ‘অক্ষর হিসাবে’ ছন্দ প্রবর্তিত করেন। আমি সেই পুরানো মাত্রিক ছন্দেই এ কবিতাগুলি রচনা করেছি।” অর্থাৎ ষিজেন্দ্রলাল প্রাকৃত বাংলায় ছন্দকে syllabic ছন্দ বলেই মনে করতেন। তিনি syllabic কথাটির প্রতিশব্দ হিসেবে ‘মাত্রিক’ কথাটি ব্যবহার করেছেন; আমার মনে হয় ‘মাত্রিক’ শব্দটিকে ‘syllabic’ অর্থে প্রয়োগ করা সংগত নয়। যা হক, আমি এই syllabic ছন্দকেই বলছি ‘স্বরবৃত্ত’ ছন্দ (বিচিত্রা—জ্যৈষ্ঠ, পৃ ৫৭৮ দ্রষ্টব্য)।

সত্যেন্দ্রনাথও তাঁর ‘ছন্দ-সরস্বতী’ প্রবন্ধে প্রাকৃত বাংলায় ছন্দকে syllabic বা ‘শব্দ-পাপড়ি’র সংখ্যা গুণেই বিশ্লেষণ করেছেন (ভারতী ১৩২৫ বৈশাখ, পৃ ১০-১৫)। প্রাকৃত বাংলায় ছন্দে প্রতি পর্বে সাধারণতঃ চারটি করে সিলেব্‌ল বা ‘শব্দ-পাপড়ি’ থাকে বলে তিনি এ-ছন্দকে ‘চারের ঘরানা ছন্দ’ বলে অভিহিত করেছেন (ঐ, পৃ ২৩)। এই ‘চারের ঘরানা’ ছন্দকেই আমি বলেছি চতুঃস্বর (tetrasyllabic) স্বরবৃত্ত ছন্দ। ইদানীং দিলীপকুমার (পরিচয়—বৈশাখ, পৃ ৭১৮-৭২০) এবং শৈলেন্দ্রকুমারও (বিচিত্রা—আষাঢ়, পৃ ৭৪২-৪৪) প্রাকৃত বাংলায় ছন্দকে সিলেব্‌ল-সংখ্যাত ছন্দ বলেই গণ্য করেছেন।

পূর্বোক্ত করাসী অধ্যাপকের সঙ্গে কথাপ্রসঙ্গে রবীন্দ্রনাথ নিজেও বলেছেন যে তিনি quantitative এবং syllabic দুয়কম ছন্দই ব্যবহার করে থাকেন (বিচিত্রা—জ্যৈষ্ঠ, পৃ ৫৮১)। কিন্তু বাংলার যে-ছন্দটি সাধারণতঃ syllabic ছন্দ বলে



গণ্য হয়ে থাকে সে-ছন্দটি যখন তিনি ষাণ্মাত্রিক হিসাবে বিশ্লেষণ করেন, তখন তাঁর এই উক্তির সার্থকতা কি? রবীন্দ্রনাথ কোন্ বাংলা ছন্দকে syllabic বলে গণনা করেন তা বোঝা গেল না। আমার বিবেচনায় প্রাকৃত ছন্দকেই syllabic ছন্দ বলে মনে করতে হবে, নতুবা syllabic ছন্দ সম্বন্ধে তাঁর এই উক্তিটিকেই নিরর্থক বলে গণ্য করতে হবে।

৯

এখন দেখা যাক রবীন্দ্রনাথ প্রাকৃত ছন্দের বিশ্লেষণ করতে চান কিরূপে? তাঁর মতে এ ছন্দের প্রতি পর্বার্ধে তিন মাত্রা ধরতে হবে; প্রকাশ্যতঃ তিন মাত্রা না থাকলেও প্রতি পর্বার্ধে তিন মাত্রার অবকাশ আছে, আবৃত্তির ঝোঁকে ওই ফাঁক পূরণ করে নিতে হয় (পরিচয় ১৩৩৮ মাঘ, পৃ ৩৭২-৮০ এবং ৩৮৮-৮৯)। অর্থাৎ তাঁর মতে প্রাকৃত বাংলার ছন্দ আসলে ষাণ্মাত্রিক ছন্দ এবং এইটাই এ-ছন্দের স্বার্থ পরিচয় (বিচিত্রা—জ্যৈষ্ঠ, পৃ ৫০২)। বাংলা প্রাকৃত ছন্দের এই মাত্রাগত প্রকৃতিটিকে অর্থাৎ এর ষাণ্মাত্রিক প্রকৃতিটিকে আমিও কখনও অস্বীকার করি নে। আমি শুধু বলতে চাই এইটুকু যে, এ-ছন্দের syllabic দিকটাই এর আসল কথা, এর মাত্রিক দিকটা এ-ছন্দের পরিচয় প্রসঙ্গে গৌণ। আমার এ কথা বলার উদ্দেশ্য কি তাই এখন দেখানো দরকার।

ছন্দবিচার প্রসঙ্গে রবীন্দ্রনাথ ‘পুনশ্চ বক্তব্যো’ মন্তব্য করেছেন, ‘এই প্রশ্ন উঠেছিল যে, ছন্দে সিলেবল্ প্রধান, অথবা মাত্রা প্রধান। এ সম্বন্ধে আমার মত এই যে মাত্রা নিয়েই ছন্দের স্বরূপ। কিঙ্কনীতে ঘৃণি কিংবদন্তে ও কত সংখ্যায় সাজানো, সে কথাটা গৌণ, তার স্বংকারের লয়টাই আসল কথা।’ তাঁর এই উক্তিটি বড়ই গুরুতর। প্রশ্ন উঠেছিল বাংলা প্রাকৃত ছন্দের স্বরূপ নিয়ে, সকল ছন্দ সম্বন্ধে নয়। কিন্তু তিনি ওই প্রশ্নটিকে প্রয়োগ করেছেন সমস্ত ছন্দের সম্বন্ধেই। তাঁর এই উক্তি থেকে একমাত্র এই সিদ্ধান্তই হয় যে, সিলেবল্-প্রধান অর্থাৎ syllabic ছন্দ বলে কোনো ছন্দই হতে পারে না। যদি এ কথা বলাই তাঁর অভিপ্রায় হয় তবে আমি মনে করি যে তাঁর এই উক্তি কখনও সমর্থনযোগ্য নয়। কেননা, ছন্দ-বৈয়াকরণিকরা syllabic ছন্দের অস্তিত্ব-বিষয়ে নিঃসন্দেহ। বৈদিক অষ্টরূপ ত্রিষ্টপ প্রভৃতি স্বরবৃত্ত ছন্দ যে syllabic এ বিষয়ে পণ্ডিতেরা একমত (পরিচয় ১৩৩২ বৈশাখ, পৃ ৫৬৬-৬৭ ত্রষ্টব্য)। আর, বাংলা প্রাকৃত ছন্দও আসলে syllabic। এ বিষয়েও বাংলাদেশের

অধিকাংশ ছন্দোবাসিক কবি ও পাঠক যে নিঃসন্দেহ, এ-রকম মনে করার হেতু আছে। এ বিষয়ে কিছু নজির পূর্বেই দেওয়া হয়েছে এবং এই মতের পক্ষে যে-সব যুক্তি আছে তা যথাস্থানে উপস্থাপিত করব।

কিঞ্চিৎ ঝংকার যদি ঘৃষ্টির সংখ্যা ও সন্নিবেশপ্রণালীর দ্বারা নিয়ন্ত্রিত হয় তবে ওই ঘৃষ্টির সংখ্যা ও সাজানোর ভঙ্গি বৈজ্ঞানিকের চোখে কখনও গোঁণ নয়, এ কথা অবশ্যই বলব। বীণাযন্ত্রের ধ্বনিমাধুর্যই সংগীতরসিকের কাম্য বটে; কিন্তু যেহেতু ওই যন্ত্রের তারের সংখ্যা ও সন্নিবেশপ্রণালীর উপর সে মাধুর্য একান্তভাবেই নির্ভর করে সে-জন্তে ওই তারগুলি কিভাবে ও কত সংখ্যায় সাজানো সে কথা সংগীত-বৈজ্ঞানিকের নিকট কখনোই গোঁণ নয়। যদি তাই হত তাহলে বীণাযন্ত্রই কখনও উৎপন্ন হত না। বাক্যের অর্থই সাহিত্যিকের নিকট মুখ্য; কিন্তু বৈয়াকরণিকের নিকট বাক্যের ক্রিয়া, কর্তা, কর্ম, করণ, অধিকরণ প্রভৃতি এবং তাদের সন্নিবেশপ্রণালীটাই হচ্ছে মুখ্য বিষয়। ছন্দো-ব্যাকরণের ক্ষেত্রেও ঠিক এই কথাটিই প্রযোজ্য। বাংলা প্রাকৃত ছন্দের প্রতি পর্বের ধ্বনিটা ষাণ্মাত্রিক বটে; কিন্তু কোন্ বিশেষ-সংখ্যক সিলেবল্ এবং তাদের কোন্ বিশেষ সাজানোর ভঙ্গি থেকে ওই ষাণ্মাত্রিক ধ্বনিটা উৎপন্ন ও নিয়ন্ত্রিত হচ্ছে ছন্দো-বৈয়াকরণিকের নিকট সেটা কখনোই গোঁণ হতে পারে না। কবির ‘পুনশ্চ বক্তব্য’ থেকে এ কথা স্পষ্টই বোঝা যায় যে, তিনি বাংলায় হ্রস্ব ষাণ্মাত্রিক ছন্দ স্বীকার করেন, যথা—সাধু ষাণ্মাত্রিক এবং প্রাকৃত ষাণ্মাত্রিক। এই হ্রস্ব ষাণ্মাত্রিক ছন্দের পার্থক্য কোথায় তা দেখা প্রয়োজন। দৃষ্টান্ত—

(১) দুটি বোন্ তারা | হেসে যায় কেন | যায় যবে জল | আনতে ?

দেখেছে কি তারা | পথিক কোথায় | দাঁড়িয়ে পথের | প্রান্তে ?

—দুই বোন, ক্ষণিকা, রবীন্দ্রনাথ

(২) কামিনী, মালতী, | আমি তিন জন | দেখে'লোক জন | অন্ন,

জল তোলবার | মিছে ছল করে | জুড়তুম সেথা | গল্প।

—মুখের সাহারা, নতুন খাতা, কিরণধন

(৩) চলেন তুনি- | গোপন চালে- | স্বাধীন তাঁহার | ইচ্ছে।

কেই বা তাঁরে- | দিচ্ছে, এবং | কেই বা তাঁরে- | নিচ্ছে।

—অচেনা, ক্ষণিকা, রবীন্দ্রনাথ

রবীন্দ্রনাথের পরিভাষায় প্রথম দুটি দৃষ্টান্তের ছন্দ ‘সাধু’ ষাণ্মাত্রিক এবং

তৃতীয়টির ছন্দ প্রাকৃত বাগ্ম্যজিক। কিন্তু লক্ষ করার বিষয়, প্রথম দুটি দৃষ্টান্তের ভাষাও তৃতীয়টিরই মতো 'প্রাকৃত' বাংলা। সুতরাং এ দুটির ছন্দকে সাধু বাগ্ম্যজিক বলার কোনো পার্থক্যতাই নেই। অতএব আমরা দেখতে পাচ্ছি যে, ওই দুইরকম বাগ্ম্যজিক ছন্দের পার্থক্যটা ভাষাগত নয় এবং এই বাগ্ম্যজিক ছন্দ-দুটিকে 'সাধু' এবং 'প্রাকৃত' এই দুটি বিশেষণে বিশেষিত করলেই এদের আসল পার্থক্যটাকে নির্দেশ করা হয় না।

রবীন্দ্রনাথ এই দুইরকম বাগ্ম্যজিক ছন্দের আর-একটি পার্থক্যের নির্দেশ করেছেন। সেটি হচ্ছে এই যে, প্রাকৃত বাগ্ম্যজিক ছন্দের প্রতি পর্বে 'কবিতা বিনা দ্বিধায় (দুয়েক মাত্রার) ফাঁক রেখে দেন, সেই ফাঁকগুলো ছন্দেরই অঙ্গ—সে-সব জায়গায় ধ্বনির বেশ কিছু কাজ করবার অবকাশ পায়' (পরিচয় ১৩৩৮ মাঘ, পৃ ৩৮০)। প্রাকৃত বাংলার প্রকৃতি সম্বন্ধে রবীন্দ্রনাথের এই উক্তিটি বিশেষ মূল্যবান বলেই আমি মনে করি। প্রাকৃত বাংলা ছন্দের আসল প্রকৃতির একটা দিক তাঁর এই উক্তিতে অতি সুন্দররূপে ব্যক্ত হয়ে উঠেছে। তাঁর এই মন্তব্যটির স্বার্থ মর্যাদা কতখানি, ছন্দরসিকমাত্রই তা অনুভব করবেন। এ বিষয়ে স্বার্থস্থানে আরও আলোচনা করা যাবে এবং আমরা দেখব যে শুধু এই কথাতেই প্রাকৃত ছন্দের পূর্ণ পরিচয় দেওয়া হয় না, তার syllabic প্রকৃতির নির্দেশ করা একান্ত আবশ্যক। যা হক, দেখা গেল প্রাকৃত বাংলার বাগ্ম্যজিক ছন্দে প্রতি পর্বে দুই-এক মাত্রার ফাঁক রাখা সম্ভব এবং অধিকাংশ স্থলেই সে ফাঁক রাখাও হয়। কিন্তু সাধু বাংলার বাগ্ম্যজিক ছন্দে সে-রকম ফাঁক রাখা সম্ভব নয়। সুতরাং এই দুইরকম বাগ্ম্যজিক ছন্দের পার্থক্য নির্দেশ করার জন্য এলা যেতে পারে যে, একটি হচ্ছে বে-ফাঁক বাগ্ম্যজিক ছন্দ এবং আর-একটি হচ্ছে স-ফাঁক বাগ্ম্যজিক ছন্দ। কিন্তু এই পার্থক্যটিও গোপন এবং উভয় ছন্দের প্রকৃতিগত পার্থক্য নয়। কেননা, প্রাকৃত বাংলার ছন্দও অনেক সময় বে-ফাঁক হয়ে থাকে এবং এভাবে ছন্দ রচনা করা খুবই সহজসাধ্য। তাহলেই এই ফাঁকের অস্তিত্ব ও অনস্তিত্ব এই উভয় ছন্দের প্রকৃতিগত পার্থক্যকে নির্দেশ করে না, এ কথা নিঃসন্দেহে বলতে পারি। একটি দৃষ্টান্ত দিলেই বিষয়টা স্পষ্ট হবে। স্বার্থ—

(১) ফাগুন বামিনী, | প্রদীপ জ্বলিছে | ঘরে

দখিন বাতাস | মরিছে বৃকের | পরে।

(২) আজকে কেবল | বউ কথা কও | ডাকে  
কুঞ্চুড়ার | পুষ্প-পাগল | সাথে ।

—সংবরণ, ক্ষণিকা, রবীন্দ্রনাথ

সাধু এবং প্রাকৃত বাংলার পার্থক্য কিংবা ফাঁকের অস্তিত্ব ও অনস্তিত্বকে আশ্রয় করে উদ্ধৃত দৃষ্টান্তদ্বটির ছন্দোগত পার্থক্য নির্দেশ করা সম্ভব নয়। অর্থাৎ একটিকে সাধু বাগ্ম্যাত্মিক এবং আর-একটিকে প্রাকৃত বাগ্ম্যাত্মিক ছন্দ বললেই এদের ছন্দের পার্থক্য কোথায় তা ধরা পড়বে না। আবার একটিকে বে-ফাঁক এবং আর-একটিকে স-ফাঁক বলারও উপায় নেই; কেননা এ দুটির কোনোটিতেই মাত্রার ফাঁক নেই। অথচ দৃষ্টান্তদ্বটিতে যে ছন্দোগত পার্থক্য রয়েছে সে বিষয়ে সংশয় করা চলে না; ওই পার্থক্যটি সম্বন্ধে কানই নিঃসন্দেহরূপে সাক্ষ্য দিচ্ছে আর এ ক্ষেত্রে কানের সাক্ষ্য উপেক্ষণীয় নয় এ বিষয়ে বোধ করি কোনো দ্বিমত নেই। সুতরাং প্রশ্ন হচ্ছে উদ্ধৃত দৃষ্টান্তদ্বটির ছন্দোগত পার্থক্য কোথায়? আমার মতে সে পার্থক্যটি হচ্ছে সিলেবল্-সংখ্যা নিয়ে। একটি হচ্ছে সিলেবল্-নিরপেক্ষ বাগ্ম্যাত্মিক ছন্দ, আর দ্বিতীয়টি হচ্ছে সিলেবল্-সাপেক্ষ বাগ্ম্যাত্মিক ছন্দ। অর্থাৎ প্রথমটি হচ্ছে মুখ্যতঃ মাত্রাবৃত্ত (ছয় মাত্রার) ছন্দ আর দ্বিতীয়টি হচ্ছে গৌণতঃ বাগ্ম্যাত্মিক এবং মুখ্যতঃ syllabic অর্থাৎ স্বরবৃত্ত ছন্দ। প্রাকৃত বাংলার ছন্দকে আমি কেন syllabic বা স্বরবৃত্ত বলি যথাস্থানে তা বোঝাতে চেষ্টা করব।

৫

প্রাকৃত বাংলা ছন্দের পর্বগুলোতে যে কবির বিদ্যায় মাঝে মাঝে দুই-এক মাত্রার ফাঁক রেখে দিতে পারেন তার দ্বারাই প্রমাণিত হয় যে, ও-ছন্দটা মাত্র গৌণতঃ বাগ্ম্যাত্মিক, মুখ্যতঃ নয়। যদি এ-ছন্দটা মুখ্যতঃই বাগ্ম্যাত্মিক হত তাহলে ওভাবে মাঝে মাঝে মাত্রার ফাঁক রাখাই সম্ভব হত না। রবীন্দ্রনাথের কথিত সাধু বাংলার বাগ্ম্যাত্মিক ছন্দটা মুখ্যতঃই বাগ্ম্যাত্মিক বলে ও-ছন্দে মাঝে মাঝে মাত্রার ফাঁক রেখে দেওয়া সম্ভব হয় না। তাছাড়া, এ-ছন্দটি যদি মুখ্যতঃই বাগ্ম্যাত্মিক হত তাহলে এ-ছন্দের কোনো পর্বে কখনও ছয় মাত্রার বেশি থাকতে পারত না। কিন্তু লক্ষ করলেই দেখা যাবে যে, এ-ছন্দের পর্বে কখনও কখনও ছয় মাত্রার বেশি অর্থাৎ সাত মাত্রা এবং এমন কি আট মাত্রাও থাকে। দৃষ্টান্ত দিচ্ছি।

×

- (১) শেষ বসন্তের | সন্ধ্যা-হাওয়া | শান্তশ্রুতি | মাঠে  
উঠল হাহা | করি ।

—পরামর্শ, কণিকা, রবীন্দ্রনাথ

×

- (২) ভোমরা যদি | পুনর্জন্মে | হও পুনর্বার | সমালোচক

—কর্মফল, ঐ, ঐ

×

- (৩) নবরত্নের | সভার মাঝে | রইতাম একটি | টেরে

—দেকাল, ঐ, ঐ

×

- (৪) রোগের ঋণের | শেষ রাখ না, | কলঙ্কের শেষ | রাখবে কি ?

—দুহু-স্বয়ংবর, অভ-আবীর, সত্যেন্দ্রনাথ

×

- (৫) এমনি কশাই | মাষ্টার মশাই | শুনবে নাকো | সে ওজর ।

—নাম-কাটা দেপাই, নতুন-খাতা, কিরণধন

×

- (৬) মন-চুরির সেই | মঞ্চথানা—

আমার যেটা | ছিল জানা,

বিলিয়ে সেটা | দিলেম পথে | ঘাটে ।

—পয়লা তারিখ বোলেশ মাসে, ঐ, ঐ

×

- (৭) সে যদি তোর | থাকতো, খানিক | আবদার কর্তিস্ | শোবার আগে,  
দাঁবি কর্তিস্ | চুমা ।

—মাতৃহারা, আলোখা, যিজেন্দ্রলাল

- (৮) অনেক বাক্য | হানাহানি ;

×

গর্জন-বর্ষণ | অনেকখানি ।

—বিবাহ-যাত্রী, ঐ, ঐ

লক্ষ করার বিষয়, ঢেরা-চিহ্নিত পর্বগুলিতে ছয় মাত্রার বেশি আছে ;  
প্রথম ছটি দৃষ্টান্তে আছে সাত মাত্রা করে এবং শেষ ছটি দৃষ্টান্তে আছে আট

মাত্রা করে। এখানে অনেকগুলি দৃষ্টান্ত উদ্ধৃত করা হয়েছে; প্রয়োজন হলে আমাদের কাব্যসাহিত্য থেকে এরূপ আরও বহু দৃষ্টান্ত দেওয়া যেতে পারে। স্বতরাং দেখতে পাচ্ছি আমাদের কবিতা এবং রবীন্দ্রনাথ নিজেও বহু স্থলেই তাঁর কথিত প্রাকৃত বাংলা ছন্দের ষাণ্মাত্রিকতার বিধি লঙ্ঘন করে থাকেন। এর থেকে একমাত্র এই সিদ্ধান্তই করা চলে যে, হয় রবীন্দ্রনাথের কথিত ষাণ্মাত্রিকতার বিধি প্রাকৃত বাংলার ছন্দের পক্ষে গোঁণ, না হয় উপরের দৃষ্টান্তগুলিতে (এবং রবীন্দ্রনাথের রচনাতেও) ছন্দ-পতন ঘটেছে। রবীন্দ্রনাথ এই সমস্যার কি মীমাংসা করেন তা জানতে উৎসুক আছি।

৬

পূর্ব পরিচ্ছেদে উদ্ধৃত দৃষ্টান্তগুলিতে আট পর্বেই ষাণ্মাত্রিকতার বিধি লঙ্ঘিত হয়েছে। কিন্তু লক্ষ করার বিষয় ওই আটটি পর্বেই চার সিলেব্‌ল্-এর বিধি রক্ষিত হয়েছে। তার থেকে শুধু এই অনুমানই করা যায় যে, প্রাকৃত বাংলার ছন্দ রচনার সময় কবিতা (এবং রবীন্দ্রনাথ নিজেও) স্বতঃই প্রতি পর্বে চার সিলেব্‌ল্ রক্ষা করে থাকেন; প্রতি পর্বে ছয় মাত্রার বেশি হচ্ছে কি কম হচ্ছে সেটা তাঁদের নিকট গোঁণ বলেই গণ্য হয়।

প্রাকৃত ছন্দের ষাণ্মাত্রিক প্রকৃতিটা গোঁণ বলেই কবিতা বিনা বিধায় এ ছন্দের পর্বে দু-এক মাত্রার ফাঁকও রাখেন এবং দু-এক মাত্রা বেশিও রাখেন। কিন্তু তা সত্ত্বেও আমি স্বীকার করি যে, এ ছন্দটা মূলতঃ ষাণ্মাত্রিকই বটে। কিন্তু ওই ষাণ্মাত্রিকতাই এ ছন্দের আসল কথা নয়, ওর ভিতরকার চার সিলেব্‌ল্-এর সমাবেশটাই এ ছন্দের আসল কথা। আমার বক্তব্য এই যে, চার সিলেব্‌ল্-এর ভোগে ছয় মাত্রা রক্ষা করাই প্রাকৃত ছন্দের সাধারণ বিধি। কিন্তু অধিকাংশ স্থলেই এ ছন্দের পর্বে প্রকাশ্যতঃ ছয় মাত্রা থাকে না। প্রায়শঃই দু-এক মাত্রা উহা থাকে; আবৃত্তির যৌকো সুরকে টেনে সে অতীত পূরণ করে নিতে হয়। আবার কখনও কখনও দু-এক মাত্রা বেশিও থাকে; তখন সেই সাত বা আট মাত্রার ধনিকে ঠেসে কমিয়ে ছয় মাত্রায় পরিণত করতে হয়। যথা—

এই কি তবে- | অন্তিম বিকাশ ?

এই কি জীবের | চরম গতি- ?

নাই কি কিছু- | পরে- ?

এখানে তিনটি পর্বে প্রকাশিত: পাঁচ মাত্রা করে আছে। কিন্তু প্রত্যেকটিতেই এক মাত্রার ফাঁক আছে, আবৃত্তির বোঁকে আপনি তা পূরণ হয়ে যায়। আবার, একটি পর্বে (‘অন্তিম বিকাশ’) আছে প্রকাশিত: সাত মাত্রা; কিন্তু এখানেও আবৃত্তির বোঁকে ধনিকের ঠেসে এক মাত্রা কমিয়ে নিতে হচ্ছে। অতএব দেখতে পাচ্ছি, এ ছন্দ আসলে ষাণ্মাত্রিকই বটে। কিন্তু এ ছন্দের গোড়াকার কথা হচ্ছে এই যে, ওই ছয় মাত্রা চারটি সিলেবল্-এর যোগে উৎপন্ন হওয়া চাই। প্রকাশিত: এর পর্বের মাত্রার হ্রাসবৃদ্ধি দেখা যায়; কিন্তু সিলেবল্-এর পক্ষে সে কথা খাটে না। অর্থাৎ এ ছন্দের পর্বে সিলেবল্-সংখ্যাকে যথেষ্ট ভাবে বাড়ানো কমানো যায় না। (এ বিষয়ে দু-একটি ব্যতিক্রম আছে; যথাসময়ে তার আলোচনা করা যাবে)। সাধারণ ষাণ্মাত্রিক ছন্দে পর্বগত সিলেবল্-সংখ্যার কোনো স্থিরতা নেই; এ ছন্দের পর্বে তিন, চার, পাঁচ বা ছয় সিলেবল্ পাবতে পারে। কিন্তু প্রাকৃত ষাণ্মাত্রিক ছন্দের প্রতি পর্বে অনধিক চার সিলেবল্ থাকবেই। এইটেই এ ছন্দের প্রধান কথা; তাই আমি এ ছন্দকে চতুঃস্বর (tetra-syllabic) স্বরবৃত্ত ছন্দ বলে অভিহিত করেছি। এ ছন্দের পর্বে যদি চারের অধিক সিলেবল্ থাকে তবে অমনি পাঠকের ঞ্জিতকৃতি পীড়িত হয় অর্থাৎ ছন্দ-পতন ঘটে। ‘পুনঃ বক্তব্য’ রবীন্দ্রনাথ দেখাতে চেষ্টা করেছেন যে, প্রাকৃত বাংলা ছন্দ প্রতি পর্বে চারটি করে সিলেবল্ থাকা আবশ্যিক নয়; পাঁচ সিলেবল্ও চলতে পারে। তাঁর দেওয়া দৃষ্টান্তটি হচ্ছে এই—

৫

৪

৩

১

শিবু ঠাকুরের | বিয়ে হবে | তিন কন্ডে | দান

এখানে শেষ পর্বে আছে এক সিলেবল্। এ ছন্দে শেষ পর্বে এক থেকে চার পর্যন্ত সিলেবল্ অনায়াসেই থাকতে পারে। সুতরাং এক সিলেবল্ আছে বলে কোনো বিশেষত্ব হয় নি। দ্বিতীয় পর্বে আছে চার সিলেবল্, আর এইটেই এ ছন্দের সাধারণ নিয়ম। তৃতীয় পর্বে আছে তিন সিলেবল্, এইটে একটি ব্যতিক্রম এবং এরকম ব্যতিক্রম এ ছন্দে চলে থাকে। কিন্তু প্রথম পর্বে আছে পাঁচ সিলেবল্। আমি বলি এটা এ ছন্দের পক্ষে স্বাভাবিক নয়। আমাদের দেশে প্রচলিত যেসব ছড়া আছে সেগুলিকে সর্বদা চোনে স্থর করে পড়তে হয় এবং ওই স্থরের দ্বারাই ছন্দের অনেক ক্রটি ঢাকা পড়ে যায়। কিন্তু সাহিত্যিক কবিতায় ওসব ক্রটি কখনো মার্জনীয় নয়। ঠিক এই কারণেই এই ছড়ার

লাইনটিতে 'শিবু ঠাকুরের' পর্বটি মার্জনীয় হতে পারে। কিন্তু কবিতার ছন্দে এরকম পাঁচ সিলেব্‌ল্-এর পর্ব কানের সমর্থন পাবে মনে করি নে। আঘাটের 'বিচিত্রা'য় শৈলেন্দ্রবাবুও এই কথাই বলেছেন। তা ছাড়া, এই ছড়াটিও আমরা বাল্যকালে যেভাবে শুনেছি ও শিখেছি তাতে আমরা 'শিব ঠাকুরের'ই পেয়েছি, 'শিবু ঠাকুরের' নয়। আমার বিশ্বাস ছড়ার পক্ষেও 'শিবু ঠাকুরের' কথার চেয়ে 'শিব ঠাকুরের'ই অধিকতর সংগত।

প্রাকৃত বাংলায় ছন্দে যে কোনো পর্বে পাঁচ বা ছয় সিলেব্‌ল্‌ কখনোই হয় না তার প্রমাণস্বরূপ বলতে পারি যে, বাংলা সাহিত্যে এ ছন্দের প্রবর্তক স্বয়ং রবীন্দ্রনাথের বিপুল কাব্যসাহিত্যে এ ছন্দে পাঁচ সিলেব্‌ল্‌-এর একটিমাত্র পর্বও আমি খুঁজে পাই নি। যদি এরকম একটিমাত্র পর্বও পাওয়া যায় তা হলে প্রাকৃত বাংলা ছন্দের চতুঃস্বর প্রকৃতি সম্বন্ধে মত পরিবর্তন করা আবশ্যক হতে পারে। রবীন্দ্রনাথ তো তর্কের খাতিরে উপরের ছড়ার পংক্তিটিতে একটি পর্বে পাঁচ সিলেব্‌ল্‌-এর অস্তিত্ব সমর্থন করেছেন। কিন্তু তিনি নিজে ঠিক অমুরূপ রচনায় কি করেছেন দেখা যাক।—

কবে বিষ্টি | পড়েছিল, | বান এল সে | কোথা ?

শিব ঠাকুরের | বিয়ে হল, | কবেকার সে | কথা ?

—বৃষ্টি পড়ে টাপুর টুপুর, কড়ি ও কোমল

এখানে তো তিনি 'শিবু ঠাকুরের' লেখেন নি। কেন ? কারণ 'শিবু' লিখলেই কবির স্বাভাবিক ধ্বনিসম্বোধ পীড়িত হবে। আর-একটি দৃষ্টান্ত দিচ্ছি—

বাহিরে ছিল | সাধুর আকার | মনটা কিন্তু | ধর্ম-ধোয়া ।

... ...

যেমন কর্ম | ফল ধর্ম | বুড় শালিকের | ঘাড়ে রোঁয়া ।

—মধুসূদন

এখানে দুটি পর্বে ( 'বাহিরে ছিল,' 'বুড় শালিকের' ) পাঁচ সিলেব্‌ল্‌ আছে এবং তাতে ছন্দে ত্রুটি ঘটেছে বলে আমি মনে করি। কেননা ওই দুই পর্বের ধ্বনি আমার কানের সমর্থন পাচ্ছে না। রবীন্দ্রনাথ এই দুই পংক্তির ছন্দকে নিখুঁত মনে করেন কি না জানবার ঐংহুকা হয়। কিন্তু তাঁর কোনো রচনাতেই ওরকম একটিমাত্র পর্বও আজ পর্যন্ত পাই নি বলে মনে হয়,—তিনিও ও-দুটি পর্বকে নিখুঁত মনে করবেন না। আর-একটি দৃষ্টান্ত—



ছেলে যুগ্মলো | পাড়া জুড়ুলো | বর্গী এলো | দেশে—

বুলবুলিতে | ধান খেয়েছে | খাজনা দেব | কিসে ?

এ ছড়াটার ছন্দ সম্বন্ধে কি বলা যায় ? এটাকে কি পাঁচ মাত্রার মাত্রাবৃত্ত বলব ? না, রবীন্দ্রনাথের কথিত প্রাকৃত বাংলার ষাণ্মাত্রিক ছন্দ বলব ? যদি এটাকে বলা হয় পাঁচ মাত্রার মাত্রাবৃত্ত ছন্দ, তা হলে তো এর পর্বের সিলেব্-সংখ্যার অসমতা নিয়ে কোনো তর্কই হতে পারবে না। কিন্তু যদি বলা যায়, এটা প্রাকৃত বাংলার ষাণ্মাত্রিক ছন্দ, তা হলে এর প্রথম দুটি পর্বকে ‘শিবু ঠাকুরের’ পর্বটির স্বজাতীয় বলে গণ্য করতে হবে ; অর্থাৎ বলতে হবে ছড়াতে এরকম চললেও কবিতায় এরকম চলে না, অন্ততঃ আজ পর্যন্ত কেউ এরকম চালান নি। আমার বিবেচনায় এটিকে পাঁচ মাত্রার মাত্রাবৃত্ত বলে গণ্য করাই সংগত ; কারণ এই দুই পংক্তির সব পর্বেই ( অবশ্য শেষ দুটি পর্ব ছাড়া ) পাঁচ মাত্রা করে আছে ।

৭

প্রাকৃত বাংলার ছন্দ যে সিলেব্-সংখ্যা-নিরপেক্ষ ষাণ্মাত্রিক ছন্দ নয় এবং এটি যে আসলে একটি চতুঃস্বর-ষাণ্মাত্রিক ছন্দ, এ কথাই সপক্ষে আরও দু-একটি কথা বলা প্রয়োজন। রবীন্দ্রনাথের রচিত এ ছন্দের যে-কোনো একটি পংক্তি নিয়ে সিলেব্-সংখ্যার ভ্রাসবুদ্ধি ঘটিয়ে পরীক্ষা করলেই এ ছন্দের ষথার্থ স্বরূপটি ধরা পড়বে। মাঘের ‘পরিচয়ে’ রবীন্দ্রনাথ ‘রূপ সাগরে ডুব দিয়েছি অরূপ রতন আশা করে’ এই পংক্তির ছন্দ বিশ্লেষণ করেছেন এভাবে—

রূপ সাগরে- | ডুব দিয়েছি- | অরূপ রতন | ইত্যাদি।

অর্থাৎ এ ছন্দটা যে আসলে ষাণ্মাত্রিক তিনি তাই দেখাতে চেষ্টা করেছেন। আমি বলি এটা ষাণ্মাত্রিক বটে ; কিন্তু এর প্রতি পর্বেই ছয় মাত্রা সিলেব্-সংখ্যা-নিরপেক্ষ নয়, পরন্তু প্রতি পর্বেই চারটি সিলেব্-এর যোগে ওই ছয় মাত্রাকে ফুটিয়ে তুলতে হয়েছে। প্রতি পর্বের মাত্রাপরিমাণ স্থির রেখে যদি এর সিলেব্-সংখ্যার ভ্রাসবুদ্ধি ঘটানো যায় তা হলেই দেখা যাবে যে, মাত্রাপরিমাণ ঠিক থাকে সব্বেও ছন্দ ঠিক থাকে না। যেমন—

(১) রূপের সাগরে | ডুব দিয়েছি | রূপ রতন | আশা করি

কিংবা

(২) রূপসাগরে | ডুব দিলাম | অরূপ রতন | আশা করি

এখানে প্রথমটিতে ‘শিবুঠাকুরের’ এই নজিরে এক সিলেব্ল বাড়িয়েছি। কিন্তু ছয় মাত্রা ঠিক রেখেছি। অথচ এই পংক্তিটিতে যে ছন্দপতন ঘটেছে এ বিষয়ে সন্দেহমাত্রও নেই। রবীন্দ্রনাথের কথিত ষাণ্মাত্রিকতাই যদি এ ছন্দের আসল কথা হত তা হলে সিলেব্ল-সংখ্যার এই পরিবর্তনে ছন্দ অব্যাহতই থাকত। কিন্তু তা যখন থাকে নি তখন বলতে হবে যে, ষাণ্মাত্রিকতাই এর আসল কথা নয়, চতুঃস্বরতাই এর মূল কথা; কেননা চারটি সিলেব্ল ঠিক রেখে মাত্রাসংখ্যার হ্রাসবৃদ্ধিতে এ ছন্দের প্রকৃতি অক্ষুণ্ণই থাকে।

উপরে দ্বিতীয় পংক্তিটির দ্বিতীয় পর্বে এক সিলেব্ল কমিয়েছি, ‘তিন কণ্ঠে’র নজিরে; কিন্তু মাত্রাপরিমাণে কোনো পরিবর্তন ঘটে নি। তথাপি এই পংক্তিটিতেও যে ছন্দ-পতন ঘটেছে তা সকলেই স্বীকার করবে। বিশেষ লক্ষ করার বিষয় এখানে চতুর্থ পর্বটি দু মাত্রার ফাঁক থাকা সত্ত্বেও নিখুঁত আছে, কারণ ওখানে চার সিলেব্ল আছে। অথচ দ্বিতীয় পর্বটিতে মাত্র এক মাত্রার ফাঁক আছে, তথাপি এ পর্বটির পদ্যুতা ঘোচে নি; কারণ এখানে চার সিলেব্ল নেই।

আশা করি এখন আর সন্দেহ নেই যে, প্রাকৃত বাংলা ছন্দের ষাণ্মাত্রিকতাই প্রধান কথা নয়, এর চতুঃস্বরতাই প্রধান কথা। অর্থাৎ চার সিলেব্ল-এর যোগে স-ফাঁক বা বে-ফাঁক ছয় মাত্রা রক্ষা করাই এ ছন্দের রীতি।

রবীন্দ্রনাথ প্রাকৃত ষাণ্মাত্রিক ছন্দের যে বে-ফাঁক দৃষ্টান্তটি রচনা করেছেন সেটি এখানে উদ্ধৃত করছি —

স্বপ্ন আমার | বন্ধনহীন | সন্ধ্যাতারার | সঙ্গী

মরণযাত্রী | দলে,

স্বর্ণবরণ | কুজাটিকায় | অন্তশিখর | লজ্জি’

লুকাই মোন | তলে।

—পরিচয় ১৩৮ মাস, পৃ ৩৮০

এ ছন্দটাকে ‘প্রাকৃত’ বলার কোনো কারণ নেই; কেননা এখানে প্রাকৃত বাংলার বিশেষ কোনো লক্ষণই নেই। তথাপি এটিকে তিনি প্রাকৃত ছন্দের দৃষ্টান্ত বলেই গ্রহণ করেছেন; তার কারণ এই যে, এটিতে প্রাকৃত বাংলা ছন্দের ধ্বনি অর্থাৎ স্বরবৃত্ত ধ্বনি রয়েছে। লক্ষ করার বিষয় এর প্রতি পর্বেই চারটি করে সিলেব্ল রয়েছে। কিন্তু যদি তৃতীয় লাইনের দ্বিতীয় পর্বটিতে এক সিলেব্ল বাড়িয়ে লেখা যায় ‘কুজাটিকাতে’, তা হলে অমনি

প্রাকৃত ছন্দের ধ্বনিটিতে পঙ্গুতা ঘটেবে। চতুঃস্বর ছন্দের কোনো পর্বে পাঁচ সিলেবল্ বসালেই ছন্দে স্থলন ঘটে তা আমরা পূর্বেই দেখেছি। কিন্তু আরও লক্ষ করা প্রয়োজন যে, 'কুছাটিকাতে' লিখলেও ওই লাইনটাকে সিলেবল্-নিরপেক্ষ বাগ্মাত্মিক ছন্দ হিসাবে অতি অনায়াসেই গ্রহণ করা যায়। কিন্তু সঙ্গে সঙ্গেই ছন্দের ধ্বনি অর্থাৎ আবৃত্তির ভঙ্গি পরিবর্তিত হয়ে যাবে। চতুঃস্বর স্বরবৃত্ত হিসাবে ওই লাইনটাকে যে লয়ে আবৃত্তি করা হয়, নিছক বাগ্মাত্মিক হিসাবে আবৃত্তির লয় তার চেয়ে বিলম্বিত হবে। কেননা, স্বরবৃত্ত ছন্দে যুগ্মধ্বনির উচ্চারণ সংশ্লিষ্ট এবং মাত্রাবৃত্ত ছন্দে যুগ্মধ্বনির উচ্চারণ বিস্মিষ্ট। যুগ্মধ্বনির এই উচ্চারণ-পার্থক্যের জগুই স্বরবৃত্ত ও মাত্রাবৃত্ত ছন্দের আবৃত্তির লয়ে এমন পার্থক্য ঘটে। যথাসময়ে এ বিষয়ে আরও বলা যাবে।

'বৃষ্টি পড়ে টাপুর টুপুর নদেয় এল বান' এই স-ফাঁক বাগ্মাত্মিক ( অর্থাৎ চতুঃস্বর বাগ্মাত্মিক ) পংক্তির ফাঁক ভরিয়ে রবীন্দ্রনাথ নিম্নলিখিতরূপে রূপান্তরিত করেছেন—

বৃষ্টি পড়ে টাপুর টুপুর নদেয় আসচে বগা

—পরিচয় ১১৩৮ মং. পৃ ৩৭৯

এটা হল বে-ফাঁক বাগ্মাত্মিক ছন্দ। রবীন্দ্রনাথ বলেন এভাবে ফাঁক ভর্তি করা সহযোগে ছন্দের মূল প্রকৃতি অক্ষুণ্ণই রইল অর্থাৎ স-ফাঁক ও বে-ফাঁক বাগ্মাত্মিক ছন্দ মূলতঃ একই। আমি পূর্বেই বলেছি ফাঁক রাখা ও ফাঁক পূরণ নিয়েই এ দুই ছন্দের আসল পার্থক্য নয়; আসল পার্থক্য প্রাকৃত বাগ্মাত্মিক সিলেবল্-সংখ্যা ও স্থিরতা এবং তথাকথিত সাধু বাগ্মাত্মিক সিলেবল্-সংখ্যার অ-স্থিরতা। লক্ষ করার বিষয়, 'বৃষ্টি পড়ে' প্রভৃতি লাইনটার স-ফাঁক ও বে-ফাঁক উভয় রূপেই প্রতি পর্বে চার সিলেবল্ আছে এবং জগুই এই উভয় রূপের মধ্যে ধ্বনিগত বিশেষ পার্থক্য নেই। অর্থাৎ সেজগুই এই উভয় রূপের ছন্দ মূলতঃ একই। কিন্তু যদি সিলেবল্-সংখ্যার মধ্যে পরিবর্তন ঘটানো যায় তবে ছন্দ অপরিবর্তিত থাকবে না। যদি এই ছন্দের ধ্বনিকে অপরিবর্তিত রাখতে হয় তবে এর প্রতি পর্বের সিলেবল্-সংখ্যাকেও অপরিবর্তিত রাখতে হবে। আর যদি সিলেবল্-সংখ্যায় পরিবর্তন ঘটানো যায় তা হলে প্রতি পর্বে ছয় মাত্রা পূরণ করে দিতে হবে, নতুবা ছন্দ-পতন ঘটবে। কেননা, যখন সিলেবল্-সংখ্যা ঠিক থাকে তখন মাত্রার ইতরবিশেষে ক্ষতি হয় না; আবার মাত্রাসংখ্যা যখন ঠিক থাকে তখন সিলেবল্-সংখ্যা ঠিক

রাখা আবশ্যিক নয়। সিলেব্‌ল-সংখ্যা স্থির না থাকলেও শুধু মাত্রাসংখ্যা স্থিরতার দ্বারাই ছন্দ-রক্ষা হয়। উপরের লাইনটিতে যদি সিলেব্‌ল-সংখ্যা ঠিক না রেখে লেখা যায়—

বৃষ্টি পড়িছে | টাপুর টুপুর | নদেয় এল | বান

কিংবা বৃষ্টি পড়ে | টাপুর টুপুর | নদীতে এল | বান

তা হলে ছন্দ নিখুঁত থাকবে না। এমন কি, ‘বৃষ্টি পড়িছে টাপুর টুপুর নদীতে এল বান’ এরূপ লিখে তৃতীয় পর্বে এক মাত্রার ফাঁকের দোহাই দিলেও ছন্দের পঙ্ক্ততা ঘুচবে না। সিলেব্‌ল-সংখ্যা ঠিক না রেখে ছন্দ ঠিক রাখতে হলে প্রতি পর্বে ছয় মাত্রা পূরণ করে দিয়ে লিখতে হবে—

বৃষ্টি পড়িছে | টাপুর টুপুর | নদীতে আসিল | বান।

নতুবা ছন্দ ঠিক থাকবে না। সুতরাং আমরা দেখলুম যে, এক রকম ছন্দের প্রতি পর্বে চার সিলেব্‌ল ঠিক রেখে ছয় মাত্রার স্থলে দু-এক মাত্রার ফাঁক রাখা চলে; এই ছন্দকেই আমি বলি স্বরবৃত্ত চতুঃস্বর ছন্দ। এর বাগ্মাত্রিকতাটা যে গোণ সে-সম্বন্ধে বোধ করি আর সন্দেহ নেই। আর-এক রকমের ছন্দের প্রতি পর্বে ছয় মাত্রা থাকা চাই-ই, সিলেব্‌ল সংখ্যার স্থিরতা রক্ষা করা আবশ্যিক নয়। এই ছন্দটাকেই মুখ্যতঃ বাগ্মাত্রিক মাত্রাবৃত্ত বলা যায়, অপরটাকে নয়। এই ভেঙে—

বৃষ্টি পড়িছে টাপুর টুপুর নদেয় আসছে বন্যা,

শিব ঠাকুরের হয় পরিণয় দান হবে তিন কন্যা।

এটাকে বলব স্বরবৃত্ত ছন্দ, যদিও এর প্রতি পর্বেই ছয় মাত্রা ঠিক আছে। কেননা, এ ছন্দটা স্বরসংখ্যা-নিরপেক্ষ নয়। এর চতুঃস্বরতাই মুখ্য কথা; বাগ্মাত্রিকতাটা গোণ। আবার—

বৃষ্টি পড়িছে টাপুর টুপুর নদীতে আসিল বন্যা,

শিব ঠাকুরের বিবাহবাসরে দান হবে তিন কন্যা।

এটাকে বলব বাগ্মাত্রিক মাত্রাবৃত্ত ছন্দ। কেননা, এটা সম্পূর্ণরূপেই স্বরসংখ্যা-নিরপেক্ষ। এটায় বাগ্মাত্রিকতাই মুখ্য কথা এবং এর পর্বের সিলেব্‌ল-সংখ্যার প্রত্যেকটাই একেবারেই আবাস্তর।

এবার উপেনবাবুর ঘোষিত ‘ছন্দের বন্দ’ সম্বন্ধে দু-একটি কথা বলা

প্রয়োজন। উপেনবাবু স্বন্দে অবতীর্ণ হয়েছেন বটে এবং অস্বাভাবিকতার দ্বারা উন্মোচন না করে স্ব-নির্মিত দারুণ অস্বই প্রাণপণে নিক্ষেপ করেছেন। কিন্তু স্বন্দে বিষয়বস্তু কি এবং তাঁর নিক্ষিপ্ত ব্রহ্মাস্ত্রের লক্ষ্য কি, সে বিষয়ে তাঁর লক্ষ্যমাত্রাও নেই। সুতরাং তাঁর শাবিত শর যে লক্ষ্যবেধ করতে সমর্থ হয় নি, তাতে বিস্মিত হবার কারণ নেই। শুধু হংকারে এবং টংকারেই লড়াই ফতে হয় না; স্থির লক্ষ্য থাকা চাই। ‘বাংলা ছন্দে চার সিলেবলের সঙ্গে পাঁচ সিলেবলের মিল হয় না’ (ছন্দে স্বন্দ, বিচিত্রা—বৈশাখ, পৃ ৫৬৮), এমন কথা আমি কখনও বলি নি। কিংবা ‘ছন্দে সিলেবল প্রধান অথবা মাত্রা প্রধান’ (কবির পুনশ্চ বক্তব্য, বিচিত্রা—জ্যৈষ্ঠ, পৃ ৫৮২), প্রমাণটা তাও ছিল না। আমার বক্তব্য ছিল প্রাকৃত বা স্বরবৃত্ত ‘ছন্দে পূর্বগুলিতে কখনও পাঁচ বা ছয় সিলেবল চালানো যায় না’ (ঐ, পৃ ৫৭৮ দ্রষ্টব্য)। আমার এই উক্তিটিকে অপ্রমাণ স্ববাক্য উদ্দেশ্যে তিনি ‘গুরুর আদেশে’ যে ‘ত্রিবিধ প্রমাণ’ হাজির করেছেন তার প্রত্যেকটিই মাত্রাবৃত্ত ছন্দে রচিত, একটিও প্রাকৃত বা স্বরবৃত্ত ছন্দে রচিত নয়। আর তাঁর রচিত মাত্রাবৃত্তের দৃষ্টান্তের মধ্যে অভিনবতাও আছে। যথা—

(১) ঘন তমসার সঞ্জল মায়া বিছালো ছায়া নেত্রে তব,

স্নিগ্ধ তোমার গুণধরে হস্ত করে কি অভিনব!

(২) বুঝি না কি যে আছে তব মনে সঞ্চারনে,

প্রণয়ী জনে কেন অকারণ বিদায়-ক্ষণে!

এ কথা অস্বীকার করা যায় না যে, এই দৃষ্টান্ত-দুটিতে রচনানৈপুণ্য এবং ছন্দে নূতনত্ব আছে; এই নূতনত্ব চার সিলেবল-এর সঙ্গে পাঁচ সিলেবল-এর যোগে নয়, ছয় মাত্রার সঙ্গে পাঁচ মাত্রার যোগে।

কিন্তু মাত্রাবৃত্তের দৃষ্টান্ত দ্বারা যে স্বরবৃত্তের স্বরূপ নির্ণীত হতে পারে না, একথা বোধ করি উপেনবাবুকে বলে দেওয়া নিশ্চয়প্রয়োজন। মাত্রাবৃত্ত ছন্দে যে তিন, চার, পাঁচ, ছয় সং সিলেবলই চলে সে কথা সকলেই জানে। সুতরাং এই সর্বজনবিদিত তথ্যটি প্রমাণিত করার জন্তে তিনি এতটা কষ্ট স্বীকার না করলেও পারতেন। আশাভেদে ‘বিচিত্রা’র অমূল্যাবু এবং শৈলেন্দ্রাবু উভয়েই এ কথা বলেছেন। সুতরাং আমার আর কিছু না বললেও চলত। কিন্তু উপেনবাবুর মনে প্রতীক্ষা আছে; কেননা তিনি বলেছেন ‘দেখিব এখন কি বিধি করেন

প্রবোধ সেনে।’ তাই দু-একটি কথা বলতে হল। কিন্তু তাঁর রচিত দৃষ্টান্ত-তিনটি দেখেও কোনো নতুন বিধি করার আবশ্যিকতা বোধ করি নি। কেননা একটি পুরানো ‘বিধি’তেই আমি ওই সিলেব্-সংখ্যার বৈষম্যের কথা উল্লেখ করেছি। আমি সেটির প্রতিই উপেনবাবুর দৃষ্টি আকর্ষণ করছি। ১৩৩০ সালের বৈশাখের ‘প্রবাসী’ (পৃ ৮৫) থেকে সেটি উদ্ধৃত করছি।—‘কবির অনেক সময় কেবল স্বরসংখ্যা ঠিক রেখেই ছন্দ রচনা করেন। এইটেই খাঁটি স্বরবৃত্ত ছন্দ ; এ ছন্দে মাত্রাপরিমাণ স্থির থাকে না। আবার অনেক সময় তাঁরা কেবল মাত্রাসংখ্যা ঠিক রেখেই কবিতা রচনা করেন। এইটেই মাত্রাবৃত্ত ছন্দ ; এ ছন্দে স্বরসংখ্যা স্থির থাকে না’। এখানে শুধু এটুকু বললেই যথেষ্ট হবে যে, ‘স্বর’ কথাটি আমি সিলেব্ অর্থেই ব্যবহার করেছি।

আশা করি উপেনবাবু এখন তাঁর ত্রি-শূল অস্ত্রের ব্যর্থতা উপলব্ধি করতে পেরেছেন। কিন্তু নিরস্ত্র হয়েছেন বলেই যে তিনি নিরস্ত্র হবেন এমন আশা আমি করি নে। কেননা, নিরস্ত্র হলেও যে অনেকে নিরস্ত্র হন না, সে কথা কে না জানে? তিনি নিরস্ত্র হন বা না হন আমার পক্ষে আশঙ্ক্য হবার একটু কারণ আছে। কোনো ছন্দেই চার সিলেব্-এর সঙ্গে পাঁচ সিলেব্-এর মিল হয় না, আমি এ কথা বলেছি এরূপ অকারণ আশঙ্কা করে তিনি আমার সঙ্গ ছাড়বেন এরূপ ভয় দেখিয়েছিলেন। আমার উক্তরূপ কৈফিয়তের পরে আশা করি তিনি আমাকে সঙ্গপরিভ্যাগের শাস্তি থেকে রেহাই দেবেন। পরিশেষে তাঁকে একটি প্রশ্ন করতে চাই। ছন্দের বিচারে তিনি কানকে মানেন ; আমি কানকে মানি নে কল্পনা করে তিনি আমার বিরুদ্ধে কানখাড়া করেছেন। আমার জবাব এই যে, আমি কানকে তো মানি বটেই ; উপরন্তু আমি ছন্দের যে শাস্ত্র ও নিয়ম রচনা করতে প্রয়াসী সেটা তো ওই কানেরই নিয়ম। কানকে যে মানেন না তাকে স্বধীজন ‘বে-কানা কহে’, এ বিষয়ে আমি উপেনবাবুর সঙ্গে একমত। কিন্তু গুরুত্ব নিকট এক ছন্দের দৃষ্টান্ত রচনার আদেশ পেয়ে যিনি অল্প ছন্দের দৃষ্টান্ত রচনা করে হাজির করেন, স্বধীজনেরা তাঁকে কি কহেন ?

পরিশেষে অমূল্যবাবুর ছন্দোবিশ্লেষণ-প্রণালী সম্বন্ধে দু-একটি কথা বলেই বর্তমান প্রসঙ্গ সমাপ্ত করব। তিনি বলেন, ‘বাংলা ছন্দ মাত্রেরই মাত্রা-ছন্দ’ ; বাংলার সিলেব্-এর ছন্দ নেই। অর্থাৎ তাঁর মতে সমস্ত বাংলা ছন্দই

quantitative এবং বাংলায় syllabic ছন্দের অস্তিত্ব নেই। তাঁর এই মতটা আপাততঃ রবীন্দ্রনাথের মতের সহিত অভিন্ন বলেই মনে হয়। কিন্তু একটু লক্ষ করলেই দেখা যাবে যে, কবির মতের সঙ্গে অমূল্যাবাবুর মতের পার্থক্য খুবই গুরুতর। অমূল্যাবাবু দু-একটি দৃষ্টান্ত উদ্ধৃত করে যে-ভাবে ছন্দোবিশ্লেষণ করেছেন তার থেকেই এই পার্থক্যটা স্পষ্টরূপে প্রতীয়মান হয়েছে। যথা—

বাপ বললেন | কঠিন হেসে | তোমরা মায়ে | বিয়ে  
এক লয়েই | বিয়ে করো | আমার মরার | পরে।

—নিষ্কৃতি, পলাতকা, রবীন্দ্রনাথ

রবীন্দ্রনাথের মতে এইটে হচ্ছে ‘ষাণ্মাত্রিক’ ছন্দ। অমূল্যাবাবু বলেন এটি হচ্ছে ‘চাতুর্মাত্রিক’ ছন্দ। তবেই দেখা যাচ্ছে উভয়ের মতের মধ্যে একমাত্র ‘মাত্রা’র কণা ছাড়া আর কিছুমাত্র সামঞ্জস্য নেই। আমি বলি এইটে হচ্ছে ‘চতুঃস্বর’ (tetrasyllabic) ছন্দ। অমূল্যাবাবু যদি এখানে ‘মাত্রা’ শব্দটিকে ব্যাপ্তি বা unit (এ ক্ষেত্রে ছন্দের সিলেব্ল্) অর্থেই ব্যবহার করে থাকেন, তা হলে তাঁর মতে ও আমার মতে অমিল নেই। কেননা, আমিও আলোচ্য ছন্দের unit অর্থেই ‘স্বর’ কথাটি ব্যবহার করেছি এবং সিলেব্ল্কেই এ ছন্দের unit বলে গণ্য করেছি। কিন্তু সম্ভবতঃ অমূল্যাবাবুর অভিপ্রায় অন্য রকম; তিনি ধ্বনির মাত্রাপরিমাণের (quantity-র) unit অর্থেই ‘মাত্রা’ শব্দটি ব্যবহার করেছেন বলে মনে হচ্ছে। কারণ, ‘বাপ বললেন’ এবং ‘এক লয়েই’ এই তিন-সিলেব্ল্-আত্মক পর্ব-দুটিতেও তিনি চার মাত্রাই গণনা করেছেন বলে বোধ হল। যদি তাই হয়, তা হলে তাঁর কথিত ‘মাত্রা’ আর সিলেব্ল্ যে আলোচ্য ছন্দেও দুটি ভিন্ন বস্তু তা স্পষ্ট। কিন্তু কোন গণনাপদ্ধতি অনুসারে তিনি উক্ত দুটি পর্বেও চার মাত্রার হিসাব করেন তা তিনি বুঝিয়ে বলেন নি। আর, কেনই বা তিনি সমস্ত বাংলা ছন্দকেই মাত্রা-ছন্দ বলে মনে করেন তাও ঠিক জানি নে। যত দিন পর্যন্ত তাঁর সমস্ত মত বিগদ রূপে প্রকাশিত না হবে তত দিন তাঁর মতের আলোচনা করা সম্ভব হবে না। যা হক, চতুঃস্বর স্বরবৃত্ত ছন্দে কিরূপে মধ্যে মধ্যে ত্রিস্বর (trisyllabic) পর্বের সমাবেশ ঘটে, এ বিষয়ে আলোচনার প্রয়োজন আছে। কিন্তু বর্তমান প্রবন্ধে স্থানান্তর। সুতরাং এ প্রসঙ্গটি ভবিষ্যতের জগ্ন স্বর্গিত রইল। (এই প্রসঙ্গে প্রবাসী ১৩২৯ মার্চ, পৃ ৫০০-৫০১; বিচিত্রা ১৩৩৯ বৈশাখ, পৃ ৫১০ এবং জ্যৈষ্ঠ, পৃ ৫৭৮ দ্রষ্টব্য।)

প্রাকৃত বাংলা ছন্দের স্বরূপটি দেখছি ক্রমেই নানা তর্কের জালে আচ্ছন্ন হয়ে আসছে। রবীন্দ্রনাথের মতে এটি হচ্ছে মূলতঃ ষাণ্মাত্রিক; অমূল্যাবুর মতে এটি চাতুর্মাত্রিক। আবার সত্যেন্দ্রনাথের মতে এটি মুখ্যতঃ ‘চারের ঘরানা’ অর্থাৎ tetrasyllabic হলেও গোণতঃ পাক্ষমাত্রিক। সত্যেন্দ্রনাথ বলেছেন—  
 “তুমি যাকে চারের ঘরানা—চারালী বা লাচারী—বলছ, তাকে পাঁচের ঘরানা বা পাঁচালীও বলতে পার। ... ( কারণ ) লঘুর্ভবেদ্ একমাত্রো...ব্যঞ্জনকার্ধ-মাত্রকম্।”—ভারতী ১৩২৫ বৈশাখ, পৃ ২৩। এই প্রসঙ্গে বিচিত্রা ১৩৩৮ চৈত্র, পৃ ৪০১ দ্রষ্টব্য। সুতরাং দেখতে পাচ্ছি এ ছন্দটা কারও মতে চাতুর্মাত্রিক, কারও মতে পাক্ষমাত্রিক এবং কারও মতে ষাণ্মাত্রিক; আবার এক মতে ছন্দটা মূলতঃ syllabic এবং আর-এক মতে সিলেব্-এর কথা এ ছন্দের পক্ষে একান্তই গোণ। এই নানা তর্কের জাল বিদীর্ণ করে এ ছন্দের স্বরূপ নির্ণয় করা সহজসাধ্য হবে না।

পরবর্তী প্রবন্ধে এ ছন্দের প্রকৃতিগত আরও কতকগুলি বৈশিষ্ট্যের আলোচনা করব। আশা করি তাতে এর গঠনপ্রণালীগত জটিলতার কতকটা অবসান ঘটবে।

### অনুলেখ

প্রাচ্যের ‘পরিচয়ে’ দেখলুম রবীন্দ্রনাথ লিখেছেন—“সংস্কৃত বাংলায় অনেক স্থলেই যে শব্দের পরিমাপ দুইয়ের, তার ওজনও দুইয়ের, যেমন—তো-মা স-নে; কিন্তু প্রাকৃত বাংলায় প্রায়ই সে স্থলে মাপ দুইয়ের হলেও ওজন তিনের, যেমন—তো-মার সঙ-গে।” আমিও বস্তুতঃ ওই কথাই বলেছি। আমার ভাবায় প্রাকৃত অর্থাৎ স্বরবৃত্ত ছন্দের প্রতি পূর্বার্ধে সিলেব্-সংখ্যা দুই এবং মাত্রা-পরিমাণ তিন। অর্থাৎ এ ছন্দের প্রতি পূর্বে চারটি করে সিলেব্-কে আশ্রয় করে ছয়টি করে মাত্রা থাকে; আর এইটেই এ ছন্দের আসল রীতি। সুতরাং ‘পরিচয়ে’র ‘ছন্দ-বিতর্ক’ প্রবন্ধটি থেকে এ কথা নিসংগে প্রমাণিত হল যে, আমি স্বরবৃত্ত বা প্রাকৃত ছন্দের ধ্রুনিবিশ্লেষণ যে-ভাবে করি তার সঙ্গে রবীন্দ্রনাথের বিশ্লেষণপ্রণালীর ষথার্থ পার্থক্য কিছুই নেই।\*



## ছন্দ-সংকট

বাংলা ছন্দ সম্বন্ধে শ্রীযুক্ত অনিলবরণ রায় শ্রীযুক্ত দিলীপকুমার রায়কে যে খোলা চিঠি লিখেছেন, প্রেসে পাঠাবার পূর্বেই লেখক সেটিকে আমার কাছে পাঠিয়েছেন। তাঁর উদ্দেশ্য এ বিষয়ে যদি আমার কিছু বক্তব্য থাকে তবে মূল রচনার সঙ্গেই আমাকে তা প্রকাশ করবার সুযোগ দেওয়া। তাঁর এই সাধু অভিপ্রায়ের জন্তে তাঁকে ধন্যবাদ জানিয়ে তাঁর রচনাটি সম্বন্ধে আমার কয়েকটি বক্তব্য সংক্ষেপে জ্ঞাপন করছি। অনিলবরণ আমার বাংলা ছন্দের আলোচনা-গুলিকে যে খুব সূক্ষ্মভাবেই প্রত্যা্যালোচনা করেছেন এবং প্রায় সর্বত্রই যে আমার যুক্তি ও সিদ্ধান্তগুলিকে ষথাযথ ভাবে অন্তর্গত করেছেন তার বিশেষ পরিচয় পেয়ে আমি আনন্দিত হয়েছি। তা ছাড়া, তিনি আমার কথিত যৌগিক ছন্দের নিয়ম সম্বন্ধে যে কয়েকটি ব্যতিক্রমের উল্লেখ করেছেন তাতেও তাঁর এই সূক্ষ্ম বিচারেরই পরিচয় পাওয়া যাচ্ছে। যা হক, আমার কথিত নিয়ম সম্বন্ধে তাঁর মনে যেসব সংশয় দেখা দিয়েছে সে বিষয়ে আমার যা যা মনে হয়েছে তাই সংক্ষেপে বোঝাতে চেষ্টা করছি।

অনিলবরণ কবিগুরু রবীন্দ্রনাথকেই ছন্দের তত্ত্ববিচারেও বাংলার গুরুস্থানীয় বলে মনে করেন। কিন্তু দিলীপকুমার স্বরবৃত্ত (syllabic) ছন্দের প্রকৃতি-বিচারে রবীন্দ্রনাথের থেকে সম্পূর্ণ ভিন্ন মত পোষণ করেন এবং এ বিষয়ে অনিলবরণ দিলীপকুমারেরই মতাবলম্বী, কেননা স্বরবৃত্ত ছন্দের প্রকৃতি-নির্ণয়ের আলোচনায় তিনি তাঁর ‘সূক্ষ্ম কবিশ্রুতিরই’ পরিচয় পেয়েছেন। এ বিষয়ে আমিও অনিলবরণের ন্যায় দিলীপকুমারেরই সমর্থক। স্বরবৃত্ত ছন্দের স্বরূপ সম্বন্ধে ষথাসময়ে ও ষথাস্থানে আমি বিস্তৃত আলোচনা করব। বর্তমান প্রসঙ্গে শুধু যৌগিক ছন্দের নিয়ম ও তার ব্যতিক্রমগুলি সম্বন্ধেই কয়েকটি মাত্র কথা বলতে চাই।

অনিলবরণ সত্যই বলেছেন যে, আমি বাংলা ছন্দের যেসমস্ত নিয়ম বার করছি সেগুলি first formulations মাত্র। আমার দাবিও তার চেয়ে বেশি নয়। একটি কথা মনে রাখা দরকার যে, আমার ছন্দের আলোচনা এখনও শেষ হয় নি; আমার নিজেরই বা বক্তব্য আছে তার সমস্ত কথা এখনও

আমার বলা হয় নি। সুতরাং আমার সমস্ত কথা বলা না হওয়া পর্যন্ত আমার আলোচনার মধ্যে যে অপূর্ণতা থাকবেই তা বলাই নিম্নয়োজন। আর আমার সব কথা বলা হবার পরেও যে বাংলা ছন্দের সম্বন্ধে সব কথা বলা শেষ হবে না সে বিষয়েও আমি সচেতন আছি। কারণ জাতীয় সাহিত্যের কোনো একটা দিকের আলোচনাও এক জীবনে নিঃশেষ করা সম্ভব নয়। ইংরেজি ছন্দশাস্ত্রের আলোচনা শুরু হবার পর সাড়ে তিন শো বছরেরও বেশি কেটে গেল; কিন্তু এখনও কি ও বিষয়ে সমস্ত সমস্তার নিঃসংশয় সিদ্ধান্ত হয়েছে? আজ যদি বাংলা ছন্দের first formulations হয়ে থাকে তবে তাতে যে অনেক অসম্পূর্ণতা মিলবে তাতে বিচিত্র কিছুই নেই।

বাংলা ভাষায় প্রাক-হসন্ত স্বরবর্ণের ( অর্থাৎ আমার পরিভাষায় যুগ্মধ্বনির ) বৈকল্পিক ব্রহ্মদীর্ঘতা সম্বন্ধে রবীন্দ্রনাথ যে মূলসূত্র বা dictum-এর উল্লেখ করেছেন সে বিষয়ে অনিলবরণ বলেছেন—“কিন্তু এই সূত্রের প্রয়োগ কি হইবে, স্বরবর্ণ কোথায় কতটা টানা চলিবে বা চলিবে না, সে সম্বন্ধে তিনি কোনো বাঁধা-ধরা নিয়মের মধ্যে ঘান নাই।” আমি ঠিক এই কথাই বলেছি বৈশাখের ‘বিচিত্রা’য়। আর অনিলবরণ এ কথাও ঠিকই বলেছেন যে, আমি ওই dictum-এর প্রয়োগবিধির প্রতি লক্ষ রেখেই বাংলা ছন্দকে মাত্রাবৃত্ত (quantitative), স্বরবৃত্ত (syllabic) ও যৌগিক (‘অক্ষরবৃত্ত’ের চেয়ে ‘যৌগিক’ নামটাই আমি পছন্দ করি), এই তিনটি প্রধান শ্রেণীতে বিভক্ত করেছি। কিন্তু রবীন্দ্রনাথ ওই dictum-এর প্রয়োগবিধি সম্বন্ধে কোনো কথাই বলেন নি; তাই ছন্দের এই শ্রেণীবিভাগ সম্বন্ধে তাঁর কোনো স্পষ্ট মতামত জানা যায় নি। কিন্তু শুধু dictum দিয়ে তার প্রয়োগবিধি সম্বন্ধে কিছু না বললে কিরূপ মুশকিল হয় তা একটু দেখানো দরকার।

রবীন্দ্রনাথের dictum-টির অর্থ হচ্ছে এই যে, বাংলা যুগ্মধ্বনিকে আমরা প্রয়োজনমতো টেনে বাড়িয়ে তাকে দুই unit-এর মর্যাদাও দিতে পারি, আবার প্রয়োজনমতো তাকে ঠেসে কমিয়ে এক unit বলেও গণ্য করতে পারি। এই কথাকেই আমি অগ্রভাবে বলেছি। আমি বলি, যুগ্মধ্বনিকে আমরা কখনও উচ্চারণ করি বিস্ত্রিষ্টভাবে, কখনও করি সংক্ষিপ্তভাবে; আর যুগ্মধ্বনির উচ্চারণ যখন বিস্ত্রিষ্ট তখন তার মূল্য দুই unit এবং তার উচ্চারণ যখন সংক্ষিপ্ত তখন তার মূল্য এক unit। এই মূলসূত্রটিকে অবলম্বন করে

আমি বাংলা ছন্দকে কি ভাবে তিনটি প্রধান শ্রেণীতে বিভক্ত করি তাও এখানে বলা দরকার। (১) যে ছন্দে যুগ্মধ্বনির উচ্চারণ অবস্থান-নির্বিশেষে সর্বত্রই বিস্মিষ্ট (অর্থাৎ দ্বি-ব্যাপ্তিক) তাকেই আমি বলি 'মাত্রাবৃত্ত' (quantitative) ছন্দ। (২) যে ছন্দে যুগ্মধ্বনির উচ্চারণ অবস্থান-বিশেষে সর্বত্রই সংস্মিষ্ট (অর্থাৎ এক-ব্যাপ্তিক) তাকে আমি নাম দিয়েছি 'স্বরবৃত্ত' (syllabic)। (৩) আর যে ছন্দে যুগ্মধ্বনির উচ্চারণ অবস্থান-বিশেষে কোথাও বিস্মিষ্ট কোথাও সংস্মিষ্ট সে ছন্দকে আমি বলছি 'যৌগিক' ছন্দ, কেননা যুগ্মধ্বনির দু-রকম উচ্চারণের যোগে এ ছন্দ গঠিত। এই যৌগিক ছন্দের যুগ্মধ্বনির উচ্চারণ কোথায় বিস্মিষ্ট এবং কোথায় সংস্মিষ্ট, এই বিষয় নিয়েই আসল প্রশ্ন। আমি বলেছি—এ ছন্দে শব্দের মধ্যবর্তী যুগ্মধ্বনি সংস্মিষ্ট এবং শব্দান্তবর্তী যুগ্মধ্বনি বিস্মিষ্ট, এইটাই এ ছন্দের সাধারণ নিয়ম। অনিলবরণও এই সাধারণ নিয়মটির সত্যতা অস্বীকার করেন না। তিনি প্রায় তুলেছেন এই সাধারণ নিয়মের ব্যতিক্রম (exceptions) সম্বন্ধে। এ বিষয়ে একটু পরেই আলোচনা করা যাবে। কিন্তু এই ব্যতিক্রমগুলিকে উপলক্ষ করে বাংলা ছন্দের শ্রেণী-বিভাগ সম্বন্ধেই তিনি একটু সন্দেহ প্রকাশ করেছেন। তিনি লিখেছেন, 'কার্যতঃ এইরূপ বিভাগে (কিছু) মুশকিল হয়।' তাঁর কি মুশকিল হয়েছে তা আমি ঠিক বুঝতে পারি নি। মাত্রাবৃত্ত সম্বন্ধে তাঁর বোধ করি কোনো সংশয় নেই। 'যৌগিক' নামে একটি স্বতন্ত্র শ্রেণী করা যায় কি না, তাঁর সংশয় বোধ হয় সে বিষয়ে। সাধারণ (অর্থাৎ বাংলার প্রাচীন : পয়ারজাতীয় ছন্দের সাধারণ নিয়ম ও তার ব্যতিক্রম যা-ই হক না কেন, এ ছন্দে যুগ্মধ্বনির উচ্চারণ যে কোথাও বিস্মিষ্ট, কোথাও সংস্মিষ্ট এ বিষয়ে বোধ করি তাঁর কোনো সন্দেহ নেই। কারণ রবীন্দ্রনাথও দেখিয়েছেন যে, কালীরাম দাসের মহাভারতের ভণিতায় 'পুণ্যবান্' শব্দের 'বান্'-কে আমরা টেনে অর্থাৎ বিস্মিষ্টভাবে উচ্চারণ করি বটে, কিন্তু 'পুণ্'-কে আমার টেনে অর্থাৎ সংস্মিষ্ট বা সংকুচিত করে উচ্চারণ করি। সুতরাং এই সাধারণ বা প্রাচীন পয়ারজাতীয় ছন্দ যে একটি স্বতন্ত্র শ্রেণীর ছন্দ এবং এর প্রকৃতি যে 'যৌগিক', এ বিষয়ে সন্দেহ থাকতে পারে বলে মনে হয় না।

এবার যৌগিক ছন্দের সাধারণ নিয়মটির ব্যতিক্রমগুলি সম্বন্ধে দু-একটি কথা বলছি। সাধারণ নিয়ম অনুসারে যৌগিক ছন্দে শব্দান্তবর্তী যুগ্মধ্বনির

উচ্চারণ সর্বদাই এবং সর্বত্রই বিশ্লিষ্ট অর্থাৎ দ্বি-ব্যাপ্তিক ; এ নিয়মের কোথাও এবং কোনো সময়েই ব্যতিক্রম হয় না । আর পূর্বোক্ত সাধারণ নিয়ম অনুসারেই এ ছন্দে শব্দ মধ্যবর্তী যুগ্মধ্বনি ‘প্রায়’ সর্বত্রই সংশ্লিষ্ট বা এক-ব্যাপ্তিক ; এ নিয়মের ব্যতিক্রম যৌগিক ছন্দে আছে । কিন্তু এই ব্যতিক্রমগুলিও যথেষ্টাচার নয় ; এর মধ্যেও একটি গূঢ়তর কারণ সক্রিয় আছে বলেই আমি মনে করি । স্তত্রাং এগুলিকেও ঠিক নিয়মভঙ্গ বলতে পারি নে । এই ব্যতিক্রমের দৃষ্টান্তস্বরূপ রবীন্দ্রনাথ লিখেছেন ( পরিচয় ১৩৩৮ মাঘ )—

চিম্নি ভেঙে গেছে দেখে গিন্নি রেগে খুন,

ঝি বলে আমার দোষ নেই ঠাকুরণ ।

এটা যৌগিক অর্থাৎ সাধারণ পয়ার— শুধু ‘ঠাকুরণ’ শব্দে মাত্রাবৃত্তের কায়দায় চার unit ধরা হয়েছে । কিন্তু ‘চিম্নি’ শব্দে যৌগিক ছন্দের রীতিতে দুই unit-ই ধরা হয়েছে । অর্থাৎ প্রচলিত লিপিপদ্ধতি অনুসারে এ শব্দটার রূপ হচ্ছে ‘চিন্নি’ ।

চিম্নি ফেটেছে দেখে গৃহিণী সরোষ,

ঝি বলে ঠাকুরণ মোর নাই কোনো দোষ ।

এটাও যৌগিক পয়ার অর্থাৎ সাধারণ পয়ার— শুধু ‘চিম্নি’ শব্দে মাত্রাবৃত্তের কায়দায় তিন unit ধরা হয়েছে । পক্ষান্তরে এখানে ‘ঠাকুরণ’ শব্দে যৌগিক ছন্দের রীতিতে তিন unit-ই ধরা হয়েছে । প্রচলিত লিপিপদ্ধতি অনুসারে এখানে এ শব্দটার রূপ হচ্ছে ‘ঠাকুণ’ । লক্ষ করার বিষয় এখানে ‘ঠাকুরণ’ শব্দের ‘ঠাক্’ সংশ্লিষ্ট ও একব্যাপ্তিক ; কিন্তু ‘রুণ্’ বিশ্লিষ্ট ও দ্বি-ব্যাপ্তিক । কেননা ‘রুণ্’ শব্দান্তবর্তী এবং ‘ঠাক্’ তা নয় । যদি লেখা হয়—

চিম্নি ফেটেছে দেখে গিন্নি সরোষ,

ঝি বলে ঠাকুরণ মোর নাই কোনো দোষ ।

তা হলে আমি বলব এখানে প্রথম পংক্তিটা মাত্রিক পয়ারের পংক্তি ; কিন্তু দ্বিতীয় পংক্তিটা যৌগিক পয়ারের পংক্তি । কেননা প্রথম পংক্তিতে যুগ্মধ্বনি অবস্থান-নিবিশেষে সর্বত্রই বিশ্লিষ্ট ; কিন্তু দ্বিতীয় পংক্তিতে যুগ্মধ্বনি অবস্থান-বিশেষে কোথাও বিশ্লিষ্ট, কোথাও সংশ্লিষ্ট । যা হক, এভাবে পয়ারে একটি পংক্তিকে মাত্রিক আর-একটি পংক্তিকে যৌগিক প্রকৃতি দেওয়া যায় কিনা তা আমি বলতে পারি নে । কেননা এরকম দৃষ্টান্ত আমি কোনো কবির

রচনাতেই পাই নি। কিন্তু রবীন্দ্রনাথের dictum অল্পসারে এ দৃষ্টান্তটিও নির্দোষ।

ফাল্গুনের সমাগমে দক্ষিণের বায়

নির্মল নদীজলে উর্মি জাগায়।

এ-রকম পয়ার রচনা করা ছন্দ হিসেবে নির্দোষ কি? কিন্তু উক্ত dictum অল্পসারে এটিও নির্দোষ। আমার নিজের বিশ্বাস এ-রকম রচনা করা চলে না; অন্ততঃ আজ পর্যন্ত কোনো কবি এ-রকম রচনা করেন নি। আমি মনে করি এই পংক্তি-দুটিকে নিম্নলিখিত দুই রূপের এক রূপে পরিবর্তিত করা আবশ্যিক।—

ফাল্গুনের সমাগমে দক্ষিণের বায়

স্ননির্মল নদীজলে তরঙ্গ জাগায়।— যৌগিক পয়ার

অথবা

ফাল্গুন-সমাগমে দক্ষিণ বায়

নির্মল নদীজলে উর্মি জাগায়।— মাত্রিক পয়ার

গত পৌষের ‘বিচিত্রা’ থেকে রবীন্দ্রনাথের রচিত দুটি দৃষ্টান্ত উদ্ধৃত করলেই এ কথার যথার্থ্য বোঝা যাবে।—

উৎসবের রাত্রিশেষে যুৎপ্রদীপ, হায়,

তারকার মৈত্রী ছেড়ে মৃত্তিকারে চায়।

এটি যৌগিক পয়ার; কেননা এখানে যুগ্মধ্বনি অবস্থান-বিশেষে কোথাও বিল্লিষ্ট, কোথাও সংলিষ্ট। কিন্তু—

সখাসনে উৎসবে বৎসর যায়,

শেষে মরি বিরহের ক্ষুৎপিপাসায়।

এটি হচ্ছে মাত্রিক পয়ার; কেননা এখানে যুগ্মধ্বনি অবস্থান-নির্বিশেষে সর্বত্রই বিল্লিষ্ট।

সখাসনে মহোৎসবে বৎসর যায়

এই পংক্তিটি সম্বন্ধে কি বলা যাবে? এখানে ‘মহোৎসবে’ কথাটিতে চার ব্যঞ্জন ধরা হয়েছে যৌগিক ছন্দের রীতিতে; অর্থাৎ এখানে যুগ্মধ্বনিকে (হোৎ) ঠেসে কমান হয়েছে। আবার ‘বৎসর’ কথাটিতেও চার ব্যঞ্জন ধরা হয়েছে মাত্রাবৃত্তের রীতিতে; অর্থাৎ এখানে যুগ্মধ্বনিকে (বৎ, সর্) ‘ন’ বাড়ানো হয়েছে। কিন্তু বাংলা ছন্দে এ-রকম চলে কি? রবীন্দ্রনাথের মতে চলে না, কেন না তাঁর মতে এই পংক্তিটাতে ছন্দপতন ঘটেছে, অথচ তিনি বলেছেন এই পংক্তিটাতে

নিয়ম বেঁচেছে। কিন্তু কোন্ নিয়ম বেঁচেছে? আমার কথিত কোনো নিয়মই এই পংক্তিটাতে বাঁচে নি, সে কথা আমি পূর্বেই বলেছি। বস্তুতঃ রবীন্দ্রনাথের নিজের কথিত মূলসূত্র বা dictumই এখানে বেঁচেছে; কিন্তু তথাপি এখানে ছন্দরক্ষা হয় নি। dictumটি হচ্ছে এই—“একটু কমিবেশিতে মামলা চলে না, বাংলা ভাষার স্বভাবের মধ্যেই যথেষ্ট প্রশ্রয় আছে”, কিংবা “বাংলা ভাষার স্বরবর্ণের ধ্বনিমাত্রা বিকল্পে দীর্ঘ ও হ্রস্ব হয়ে থাকে, ধ্রুকের ছিলের মতো টানলে বাড়ে, টান ছেড়ে দিলে কমে।” অথচ রবীন্দ্রনাথ নিজেই ওই পংক্তিটির বিরুদ্ধে মামলা এনেছেন, বাংলা ভাষার ওইটুকু প্রশ্রয়কে তিনি স্বীকার করেন নি। তাঁর কথিত বাংলা যুগ্মধ্বনির ‘স্থিতিস্থাপকতা’ শক্তিও ওই পংক্তিটিকে ছন্দপতন দোষ থেকে রক্ষা করতে পারে নি। রবীন্দ্রনাথ নিজেই দেখিয়েছেন যে, যৌগিক অর্থাৎ সাধারণ পয়্যারে ‘ঠাকুরণ’ শব্দকে প্রয়োজন মত তিন unitও ধরা যায়, চার unitও ধরা যায়। তাই যদি হয় তবে উদ্ভূত যৌগিক বা সাধারণ পয়্যারের পংক্তিটিতে ‘বৎসর’ শব্দে চার unit ধরা যাবে না কেন? এখানেই তাঁর dictum-এর অপূর্ণতা; অর্থাৎ প্রয়োগবিধির উল্লেখ না করে শুধু dictum-এর জোরে ছন্দের বিচার করা চলে না।

আর-একটি শব্দের প্রয়োগের প্রতি লক্ষ করে রবীন্দ্রনাথের dictum-এর বিচার করা যাক। রবীন্দ্রনাথ দৃষ্টান্ত দিয়ে দেখিয়েছেন যে, যৌগিক পয়্যারে ‘চিন্নি’ কথাটিকে প্রয়োজনমতো দুই unitও ধরা যায়, তিন unitও ধরা যায়। কিন্তু যৌগিক অর্থাৎ সাধারণ পয়্যারে ‘নিম্ন’ কথাটিকে ‘চিন্নি’ শব্দের মতো বিকল্পে দুই বা তিন unit বলে গণ্য করা যায় কি? অর্থাৎ—

চিন্নি ফেটেছে দেখে গৃহিণী সরোষ

এই পংক্তিটির নজিরে—

নিম্নে পড়েছে ব্যরে শুধু ফলদল

এই পংক্তিটিকে নির্দোষ বলতে পারি কি? কিংবা—

ঝি বলে আমার দোষ নেই ঠাকুরণ

এই পংক্তিটির নজিরে—

সখামনে মহোৎসবে বৎসর যায়

এই পংক্তিটিকে নির্দোষ বলব না কেন? কবির dictum তো সর্বত্রই বহাল আছে। বা হক, প্রয়োগের বিধি নির্দিষ্ট না হলে শুধু dictumএ

ছন্দের বিচার করা চলে না, এ কথা অনিলবরণ নিজেই স্বীকার করেছেন। উপরের দৃষ্টান্তগুলি সন্দেহে আমার বক্তব্য এই যে, নিম্ন, বৎসর প্রভৃতি সংস্কৃত শব্দের মধ্যবর্তী যুগ্মধ্বনিকে যৌগিক ছন্দে সম্প্রসারিত করে ছু মাত্রা বলে গণ্য করা হয় না; পক্ষান্তরে চিম্‌নি, ঠাকুরাণ প্রভৃতি অ-সংস্কৃত শব্দের মধ্যবর্তী যুগ্মধ্বনিকে যৌগিক ছন্দে সম্প্রসারিত করা হয়ে থাকে। অগ্রহায়ণের বিচিত্রায় আমি প্রথম ও কথা বলেছি; তার পরে বৈশাখের বিচিত্রায় তার বিস্তৃত ব্যাখ্যা করেছি। এ স্থলে পুনরুক্তি নিম্নয়োজন।

অনিলবরণ প্রশ্ন তুলেছেন, আমার কথিত সাধারণ নিয়ম অনুসারে একধারে, রাজদণ্ড, মানদণ্ড, বনিকুলস্রী প্রভৃতি সমাসবদ্ধ শব্দকে এক শব্দ বলে গণ্য করে এক, রাজ, মান, গিক্ প্রভৃতি যুগ্মধ্বনিকে এক unit বলে গণ্য করা হয় না কেন? এ বিষয়েও বৈশাখের বিচিত্রায় বিস্তৃত আলোচনা করেছি। তথাপি এ ক্ষেত্রে একটি কথা বলা প্রয়োজন। আমি বলেছি যৌগিক ছন্দে সংস্কৃত শব্দের মধ্যবর্তী যুগ্মধ্বনিকে এক unit ধরা হয়ে থাকে। কিন্তু সমাসবদ্ধ শব্দকে একটি অথও শব্দ বলে গণ্য করতেই হবে এমন কথা আমি বলি নি। ব্যাকরণের দিক্ থেকে সমাসবদ্ধ শব্দ অথও বটে; কিন্তু ছন্দের দিক্ থেকে সমাসবদ্ধ শব্দকে অথও বলে গণ্য করা আবশ্যিক নয়। কবি ইচ্ছা করলে সমাসবদ্ধ (বা বাংলা প্রত্যয়ান্ত) শব্দকে বিচ্ছিন্ন বা দ্বিধাবিতক্ক বলেও গণ্য করতে পারেন। এ কথার প্রথম আভাস দিয়েছি 'বাংলা ছন্দে রবীন্দ্রনাথের দান' নামে আমার পুস্তিকায় (পৃ ১৫-১৬) এবং বিস্তৃত আলোচনা করেছি বৈশাখের বিচিত্রায়। আমি 'দিক্‌প্রাস্ত' কথাটির দিক্-কে বিকল্পে এক বা দুই unit ধরা যায় এ কথা বলেছি এবং স্বয়ং রবীন্দ্রনাথও দু-রকম প্রয়োগই করেছেন। কিন্তু আমার এই উক্তিতে অনিলবরণ মহাসংকটে পড়ে একেবারে 'বল্ মা, তারা, দাঁড়াই 'কোথা?' বলে উৎকণ্ঠা প্রকাশ করেছেন। কিন্তু তাঁর এরূপ উৎকণ্ঠিত হবার বিশেষ কারণ নেই। কেননা, কোন্ স্থলে সমাসবদ্ধ শব্দকে বিকল্পে অথও বা বিচ্ছিন্ন বলে গ্রহণ করতে হবে তা এমন নয় যে তাকে কোনো নিয়মের অন্তর্গত করা যায় না এবং এমন বৈকল্পিক শব্দও বাংলায় অসংখ্য নয়। দিক্‌প্রাস্ত, দিক্‌চক্র প্রভৃতি শব্দে যেমন দিক্-কে বিকল্পে এক বা দুই ব্যাটী বলে গণ্য করা যায়, তেমনি যুংপিণ্ড, হুংপাত্র প্রভৃতি শব্দের যুং, হুং-কেও যৌগিক ছন্দে বিকল্পে দুই unit বলে গণ্য করা যায় বলে আমার বিশ্বাস।

শব্দ-দুটিতে চার ‘অক্ষর’ (সিলেব্‌ল্‌) -ই ছিল। কিন্তু ক্রমে যখন ওই অকারটি লুপ্ত হয়ে জ্ এবং ন্-এর হসন্ত উচ্চারণ হতে লাগল তখনও পূর্ব সংস্কৃতির ফলে হসন্ত জ্ এবং ন্-কে পরবর্তী বর্ণের সঙ্গে জুড়ে দেওয়া হল না এবং হসন্ত বর্ণের পূর্ববর্তী স্বরকে টেনে দীর্ঘ করে লুপ্ত অকারের ক্ষতিপূরণ করা হল। তাই ওসব শব্দে চার সিলেব্‌ল্‌ না থাকলেও এরা চার ‘অক্ষর’-এর শব্দ বলেই গণ্য হতে লাগল। এ-রকম সর্বত্রই। অর্থাৎ যেখানেই অকার লুপ্ত হয়ে কোনো বর্ণের হসন্ত উচ্চারণ হয়েছে সেখানেই ওই হসন্ত বর্ণের পূর্ববর্তী স্বরবর্ণকে টেনে দীর্ঘ করে লুপ্ত অকারের ক্ষতিপূরণ করা হয়ে থাকে। এই কথাটি মনে রাখলেই আর অর্ডিন্যান্স জারি করে কোথাও হাইফেন বসাবার প্রয়োজন হবে না।

অকার লুপ্ত হওয়া সত্ত্বেও হসন্তোচ্চারিত বর্ণকে একটি স্বতন্ত্র ‘অক্ষর’ বলে গণ্য করার এবং তৎপূর্ববর্তী স্বরবর্ণকে টেনে দীর্ঘ করে অকারলোপের ক্ষতিপূরণ করার এই যে অভ্যাস হল, তার সংস্কৃতি বা association-এর প্রভাব অগ্নত্রয় দেখা দিল। অর্থাৎ যেসব অ-সংস্কৃত শব্দে (যথা—টুনটুনি, বুলবুলি, বাব্‌লা, চবুকা, বল্‌গা ইত্যাদি) স্বাভাবিক হসন্ত বর্ণ পরবর্তী বর্ণে যুক্ত হয় না সেই হসন্তবর্ণগুলিও (অকারলোপের ইতিহাস না থাকা সত্ত্বেও) এক-একটি স্বতন্ত্র ‘অক্ষর’ বলে গণ্য হল এবং তৎপূর্ববর্তী স্বর দীর্ঘত্ব লাভ করে তার ক্ষতিপূরণ করল। এইটেই হচ্ছে টুনটুনি, বাব্‌লা প্রভৃতি শব্দের হসন্ত ন্ এবং ব্-কে এক-একটি স্বতন্ত্র ‘অক্ষর’ বলে গণ্য করার হেতু। এই association-এরই প্রতিক্রিয়া ক্রমে সংস্কৃত শব্দেও দেখা দিয়েছে এবং সেজন্যেই হৃৎপাত্ৰ, মৃৎপিণ্ড, দিক্‌প্রাস্ত প্রভৃতি যেসব সংস্কৃত শব্দে হসন্তবর্ণ পরবর্তী বর্ণে যুক্ত হয় না সেসব শব্দেও হসন্তবর্ণের পূর্ববর্তী স্বর দীর্ঘত্ব অর্জন করে হসন্তের ক্ষতিপূরণ করে। ‘হৃৎপাত্ৰ’ প্রভৃতি শব্দে চার unit ধরার মূলে অন্ততঃ কিছু পরিমাণে এই association-এর প্রভাব আছে বলে আমি মনে করি। রাজদণ্ড, মানদণ্ড টুনটুনি, বুলবুলি হৃৎপাত্ৰ, মৃৎপিণ্ড প্রভৃতি শব্দে এই association-এর ক্রিয়া ও প্রতিক্রিয়া কিরূপ প্রভাব বিস্তার করেছে তার আলোচনা খুবই ঔৎসুক্যকর।

অনিলবরণ লিখেছেন—“বাহারা, একধার, রাজদণ্ড, মানদণ্ড প্রভৃতিতে এ, রা, মা-কে টানিয়া পড়িতে চিরঅভ্যস্ত, তাহারা অনায়াসে মৃৎপাত্ৰ, হৃৎপাত্ৰ প্রভৃতিতেও ব, ধ-কে টানিয়া পড়িবে; অতএব এখানে ছন্দ-ভঙ্গ হইবার আশঙ্কা নাই।” অনিলবরণের এই কথার মধ্যে খানিকটা সত্য আছে সন্দেহ নেই;



কারণ এখানেও যৌগিক ছন্দের উপর পূর্বাভাস ও association-এর প্রভাবের নিদর্শনই পাচ্ছি। কিন্তু এই unconscious অভ্যাস ও association তো আমাদের কানকে ঠিক তার উলটো দিকেও নিয়ে যেতে পারে, এ কথাটিও মনে রাখা দরকার। আর-একটু বুঝিয়ে বলছি। 'রাজদণ্ডে'র রাজ্-কে বিশ্লিষ্টভাবে উচ্চারণ করার অভ্যাসের ফলে আমরা 'মৃৎপাত্রে'র মৃৎ-কেও যেমন বিশ্লিষ্ট করে উচ্চারণ করতে অভ্যস্ত হচ্ছি, তেমনি 'মৃৎপিণ্ড' প্রভৃতি শব্দের মৃৎ-কে সংক্ষিপ্ত করার অভ্যাসের ফলে (মৃৎপিণ্ড-কে তিন unit ধরলেই, যেমন রবীন্দ্রনাথ করেন, 'মৃৎ'-এর উচ্চারণ সংক্ষিপ্ত হবে) প্রাণদণ্ড, মানদণ্ড প্রভৃতি শব্দের 'প্রাণ' 'মান'-কেও সংক্ষিপ্ত করার অভ্যাস অতি অনায়াসেই হতে পারে। মৃৎপিণ্ড, মার্তণ্ড প্রভৃতি শব্দে যদি তিন unit ধরা যায় তা হলেই এদের analogyতে প্রাণদণ্ড, মানদণ্ড প্রভৃতি শব্দেও তিন unit ধরা শক্ত হবে না, অর্থাৎ কানকে ওভাবে অভ্যস্ত করা কঠিন হবে না।

প্রথম মার্তণ্ড-তাপে বিদগ্ধ ধরণী

এই লাইনটার ধনি যাদের কানে অভ্যস্ত তাদের কানে

কঠোর প্রাণদণ্ড-বিধি করিল প্রচার

এই লাইনটিও খারাপ শোনাবে না। এ-রকম metrical liaison বা 'ছন্দসন্ধি' সম্পূর্ণ অভাবনীয় বলে এবং চোখের চিরন্তন অভ্যাসের ফলে তাতে প্রথম প্রথম আপত্তি হবেই। কিন্তু শুধু ধনি এবং কানের উপর নির্ভর করলে আমাদের কান অতি অনায়াসেই এবং অচিরেই প্রাণদণ্ড-কে স্বংগি বা মার্তণ্ড থেকে পৃথক বলে অস্বীকার করতে ইতস্ততঃ করবে না। প্রাণদণ্ড, মানদণ্ড প্রভৃতি শব্দের হ্রস্ব বর্ণকে যদি পরবর্তী বর্ণের সঙ্গে যুক্ত করে লিপিবদ্ধ করার প্রথা থাকত তা হলে ওসব শব্দকে চার unit-এর মর্যাদা দেওয়া হত না বলেই আমি মনে করি। যুক্ত করা যে হয় নি তার মূলে ধনিগত কোনো হেতু ছিল না; কারণটি হচ্ছে সংস্কৃত ব্যাকরণগত association এবং সেই association আজ পর্যন্ত আমাদের যৌগিক ছন্দটিকে নিয়ন্ত্রিত করছে।

আমার মনে হয় অনিলবরণ রবীন্দ্রনাথকে একটু ভুল বুঝেছেন। 'বৎসর' কথাটিকে টেনে বড়ো করা চলে, কিন্তু 'হৃৎপাত্রে'কে টেনে বড়ো করা ভুল, এ কথা বলা রবীন্দ্রনাথের অভিপ্রায় নয়। তাঁর মতে যৌগিক ছন্দে 'বৎসর' এবং 'হৃৎপাত্র' উভয় শব্দকেই তিন unit বলে গণ্য করতে হবে; যৌগিক ছন্দেই

‘হংপাত্ৰ’কে চার unit গণনা করা তিনি ভুল মনে করেন। তেমনি ‘বৎসর’ শব্দকেও তিনি বৌগিক ছন্দে চার unit বলে গণনা করা ভুলই মনে করেন। অন্য ছন্দে ( অর্থাৎ মাত্রাবৃত্ত ছন্দে ) তিনি ‘বৎসর’-কে চার বলেই গণনা করেন ; সে ক্ষেত্রে ‘হংপাত্ৰ’-কেও টেনে বড়ো করে পাঁচ মাত্রা বলে গণনা করা হবে। অর্থাৎ রবীন্দ্রনাথের মতে বৌগিক ছন্দে বৎসর ও হংপাত্ৰ উভয়ই তিন ব্যুটি আর মাত্রাবৃত্ত ছন্দে এ শব্দ-দুটি যথাক্রমে চার ও পাঁচ মাত্রা। তাঁর মতে কোনো ছন্দেই ‘হংপাত্ৰ’ শব্দে চার unit নয়। কিন্তু আমি মনে করি বৌগিক ছন্দে দিক্, দিন, রাজ, মান প্রভৃতির জায় হং-কেও দুই unit বলে গণ্য করা চলে ; কিন্তু সমাসবন্ধ শব্দে হং-কে এক বলে গণ্য করলেই ভালো শোনায়। ‘বাংলা ভাষার স্বভাবের মধ্যেই যথেষ্ট প্রভ্রয় আছে’, রবীন্দ্রনাথের এই dictumটি সম্বন্ধেও অনিলবরণ একটু ভুল বুঝেছেন। কারণ এটি যে শুধু চলতি ভাষার প্রতিই প্রযোজ্য তা নয় ; রবীন্দ্রনাথ এটিকে চলতি এবং সাধু উভয় ভাষারীতির প্রতিই প্রযোজ্য মনে করেন। বস্তুতঃ এই dictumটির ব্যাখ্যা করা উপলক্ষ্যে তিনি যে দৃষ্টান্ত রচনা করেছেন সেগুলি সাধু ভাষা এবং সাধু অর্থাৎ সংস্কৃত শব্দেরই ( বৎসর, মৃৎপ্রদীপ ইত্যাদি ) দৃষ্টান্ত। দ্রষ্টব্য বিচিত্রা ১৩৩৮ পৌষ, পৃ ৭১৩। ওই dictumটি সম্বন্ধে বিস্তৃত আলোচনা করা এ স্থলে অনাবশ্যক।

বা হক, বৌগিক ছন্দে যুগ্মধ্বনি প্রয়োগের মূলনীতি হচ্ছে এই—

- (১) শব্দাস্তবর্তী যুগ্মধ্বনির উচ্চারণ সর্বত্রই বিস্মিষ্ট ও তার মূল্য দুই unit,
- (২) শব্দমধ্যবর্তী যুগ্মধ্বনির উচ্চারণ ‘সাধারণতঃ’ সংস্মিষ্ট ও তার মূল্য এক unit,
- (৩) সমাসবন্ধ শব্দকে কবি বিকল্পে অথও বা বিচ্ছিন্ন বলে গ্রহণ করতে পারেন; বিশেষতঃ যেখানে সমাসাস্তর্গত শব্দ-দুটি স্বর বা ব্যঞ্জন সন্ধি এবং যুক্তবর্ণের দ্বারা অবিচ্ছেদ্য ভাবে গ্রথিত নয়। এই নিয়ম-তিনটির সঙ্গে আর-একটি সাধারণ সূত্র মনে রাখা দরকার যে, সংস্কৃত শব্দে কোনো বর্ণের অকার লুপ্ত হয়ে হ্রস্ব উচ্চারণ হলে ওই বর্ণের আশ্রিতা স্বরের দীর্ঘ উচ্চারণ করে লুপ্ত অকারের ক্ষতি পূরণ করা হয় ; অর্থাৎ অকার লুপ্ত হবার ফলে যে যুগ্মধ্বনির উৎপত্তি হয় তার উচ্চারণ বিস্মিষ্ট বা বিমাত্রিক হয়ে থাকে, সংস্মিষ্ট বা একমাত্রিক হয় না। যথা, রাজহও, মানদও ইত্যাদি। কিন্তু আমরা দেখেছি যে, এই সাধারণ সূত্রটি সচরাচর পালিত হলেও এটি বৌগিক ছন্দের পক্ষে অলঙ্ঘনীয় রূপে অব্যাবশ্যক নয় ; এই সূত্রটি পালন না করলেও বৌগিক ছন্দের প্রকৃতি অক্ষুণ্ণ থাকতে পারে।

অর্থাৎ মানদণ্ড, রাজদণ্ড প্রভৃতি শব্দে তিন unit ধরলেও যৌগিক ছন্দের নীতি নষ্ট হবে বলে মনে করি নে। রবীন্দ্রনাথ একটি দৃষ্টান্ত রচনা করেছেন ( পরিচয় ১৩৩৮ মাঘ ) —

একটা নয় দুটো নয় এক শোর বেশি।

এখানে ‘একটা’ শব্দে দুই unit, কিন্তু ‘একশো’-তে তিন unit। আমি যদি লিখি—

একশো নয় দুশো নয় তেরো শোর বেশি

তা হলেও যৌগিক ছন্দের নীতি অব্যাহতই থাকবে, কেননা এখানে ‘একশো’-কে একটি অর্থও শব্দরূপে গণনা করা হয়েছে। যা হক, উপরে যৌগিক ছন্দের যে তিনটি ( সাধারণ সূত্রটি নিয়ে চারটি ) নিয়মের কথা বললুম তার মধ্যে দ্বিতীয় নিয়মটির কিছু ব্যতিক্রম দেখা যায়। অনিলবরণ এইসব ব্যতিক্রমের আলোচনা করার উপর অত্যন্ত বেশি জোর দিয়েছেন, কারণ তিনি মনে করেন অঙ্গসন্ধান করলে এ-রকম ব্যতিক্রম অনেকই মিলতে পারে। আমার কিন্তু মনে হয় ষথার্থ ব্যতিক্রম বিপুল রবীন্দ্রসাহিত্যেও বেশি মিলবে না। আর যেগুলিকে আপাততঃ ব্যতিক্রম বলে মনে হয় সেগুলিও ব্যাকরণের নিপাতনের মতো নিছক ব্যতিক্রম নয়; সেগুলিও কোনো না কোনো সাধারণ সূত্রের এলাকার মধ্যে পড়ে। এইসব ব্যতিক্রম সম্বন্ধে অন্ত্র ( বৈশাখের বিচিত্রা ) বিস্তৃত আলোচনা করেছি। এখানে শুধু এটুকু বললেই যথেষ্ট হবে যে, ওসমস্ত ব্যতিক্রমের অধিকাংশই অ-সংস্কৃত বাংলা শব্দের মধ্যবর্তী হ্রস্ব ব্যঞ্জন পরবর্তী বর্ণে যুক্ত না করার অভ্যাস থেকেই উৎপন্ন। যেমন, বাব্‌লা, টুন্‌টুনি, মস্‌জিদ, বাদ্‌শা, দব্‌কার, কার্‌বার, গোল্‌মাল, তোল্‌পাড় ইত্যাদি শব্দের মধ্যবর্তী হ্রস্ব বর্ণটিই এসব শব্দের unit-সংখ্যা সম্বন্ধে সন্দেহ জন্মায় যৌগিক ছন্দে। অত্যাগ ছন্দে অবশ্য এদের ষথার্থ মণাদা সম্বন্ধে কোনো সন্দেহই নেই। ‘গোলমাল’ শব্দটিকেই ধরা যাক। এ শব্দটিকে যে যৌগিক ছন্দে চার unit-এর মূল্য দেওয়া হয়ে থাকে তা সকলেই জানে। যথা—

ভিক্ককের গোলমালে তোলপাড় পাড়া।

কিন্তু যদি এ শব্দটিকে তিন unit বলে গণ্য করে লেখা যায়—

ভীষণ গোলমাল করি ছুটিল জনতা

তা হলেও যৌগিক ছন্দের নীতি নষ্ট হবে বলে মনে করি নে।

রবীন্দ্রনাথের ‘ছন্দের হসন্ত হলন্ত’ এবং অনিলবরণের ‘ছন্দের হসন্ত’ পড়ে মনে হয়, যৌগিক ছন্দের স্বরূপ নির্ণয় উপলক্ষ্যে যে স্বদের উৎপত্তি হয়েছে তাঁদের মতে শব্দমধ্যবর্তী হসন্ত ব্যঞ্জনই যেন তার মূলে। কিন্তু তা নয়; যৌগিক ছন্দে শব্দমধ্যবর্তী হসন্ত (অর্থাৎ আশ্রিত) স্বরবর্ণও আশ্রিত ব্যঞ্জনের চেয়ে কম সমস্তার সৃষ্টি করে নি। অর্থাৎ এ ছন্দে ব্যঞ্জনাস্তিক যুগ্মধ্বনির চেয়ে স্বরাস্তিক যুগ্মধ্বনির সমস্তাও কম নয়, বরং বেশি। অগ্রহায়ণের বিচিত্রায় আমি উভয় সমস্তার কথাই উত্থাপন করেছিলুম। এ স্থলে সে সমস্তার পুনরুত্থাপন করতে চাই নে। শুধু দু-একটি দৃষ্টান্ত দিয়েই এ প্রসঙ্গ সমাপ্ত করব। রবীন্দ্রনাথ দেখিয়েছেন যে, যৌগিক ছন্দে ‘চিম্‌নি’ শব্দে ‘চিম্‌’ এই ব্যঞ্জনাস্তিক যুগ্মধ্বনিটা বিকল্পে এক এবং দুই unit বলে গণ্য হতে পারে। আমাদের প্রশ্ন হচ্ছে তা হলে ‘হইল্‌’ ‘চাইতে’ ‘শিউলি’ ‘কেউটে’ প্রভৃতি শব্দের হই, চাই, শিউ, কেউ এই স্বরাস্তিক যুগ্মধ্বনিগুলিকে কেন বিকল্পে এক এবং দুই unit ধরা হবে না। আধুনিক বাংলা সাহিত্যে এই স্বরাস্তিক যুগ্মধ্বনিগুলি সর্বদাই দুই unit বলে গণ্য হয়; অথচ আমাদেরই প্রাচীন সাহিত্যে এগুলি এক unit এর মর্গাদাও পেয়েছে। স্বা—

বঙ্গদেশে প্রমাদ হইল সকলে অস্থির।

বঙ্গদেশ ছাড়ি ওরা আইলা গঙ্গাতীরে ॥

—কৃত্তিবাসের আশ্ববিবরণ

এখানে হই, এবং আই, এ দুটি স্বরাস্তিক যুগ্মধ্বনি এক unit বলেই গণ্য হয়েছে। আর-একটি দৃষ্টান্ত দিচ্ছি—

কুব্‌ হইলা ইন্দ্রজায়া শচী কারাবাসে।

... ..

আপনি হইলা বন্দী আপন সংশয়ে।

—কৃত্তসংহার, ষাটশ সর্গ, হেমচন্দ্র

এখানে প্রথম ‘হই’ এক unit এবং দ্বিতীয় ‘হই’ দুই unit। কিন্তু আজকাল হইল, চাইতে, শিউলি, কেউটে প্রভৃতি প্রায় সমস্ত যুগ্মধ্বনিই দুই unit বলে গণ্য হয়। যে জিনিসটা মূলে এক তাকে এভাবে সর্বত্র টেনে দীর্ঘ করে দুই করলে কি ক্ষতিতে শৈথিল্য দেখা দেয় না? অথচ মজা এই যে, ‘হইল’ শব্দে তিন unit, অথচ ‘শৈল’ শব্দে দুই unit। ‘পইতা’ শব্দে তিন unit,

কিন্তু 'পৈতা'-তে দুই ; অর্থাৎ এ শব্দটিতে বিকল্প চলে। কিন্তু আজকাল আর 'হৈল' লেখা হয় না বলে এ শব্দটিতে বিকল্পও চলে না। চাইতে, কেউটে প্রভৃতি শব্দে কখনও বিকল্প চলে না, কেননা বাংলায় আই্কার, এউ্কার নেই। সংস্কৃত শব্দের মধ্যবর্তী ঐকার এবং ঔকার যৌগিক ছন্দে সর্বত্রই এক unit। কেননা ওসব শব্দে ঐ এবং ঔ-কে অই এবং অউ লেখার প্রথা নেই ; আমরা শইল এবং গউরব লিখি নে। কিন্তু অ-সংস্কৃত শব্দে বিকল্প চলে, কেননা এ ক্ষেত্রে উভয় রকম বানানই চলে। কিন্তু আমার বিশ্বাস যৌগিক ছন্দে শব্দমধ্যবর্তী ঐ কিংবা ঔ-কে বিলিষ্ট করে দুই unit বলে গণ্য করলে ছন্দের ধ্বনিতে শৈথিল্য দেখা দেয়। যথা—

বোলতা কহিল, এ যে ক্ষুদ্র মউচাক,  
এরি তরে মধুকর এত করে জাঁক !  
মধুকর কহে তারে— তুমি এস ভাই,  
আরো ক্ষুদ্র মউচাক রচ, দেখে যাই।

—হাতে-কলমে, কণিকা, রবীন্দ্রনাথ

এখানে ব্যঞ্জনাস্তিক যুগ্মধ্বনি 'বোল্' এবং স্বরাস্তিক যুগ্মধ্বনি 'মউ' এ দুটিই শব্দমধ্যবর্তী অথচ দুটিই এখানে বিলিষ্ট ও বৈমাত্রিক হয়েছে। এরূপ যে করা যায় না তা নয় ; কিন্তু আমার মনে হয় যৌগিক ছন্দে শব্দমধ্যবর্তী যুগ্মধ্বনিকে এভাবে বিলিষ্ট করলে ছন্দের ধ্বনিটা কিছু শিথিল হয়।

মহাগর্বে বোলতা কহে মোমাছরে ডেকে

এই লাইনটির সঙ্গে উদ্ধৃত লাইন-কটি মিলিয়ে দেখলেই এ কথার তাৎপর্য বোঝা যাবে। কিন্তু ছন্দের ধ্বনিকে কোথায় শিথিল করা প্রয়োজন এবং কোথায় দৃঢ় করা প্রয়োজন তা সুস্পূর্ণরূপেই কবির উপর নির্ভর করে। এ বিষয়ের বিস্তৃত আলোচনার জন্য বিচিত্রা ১৩৩৮ অগ্রহায়ণ ও মাঘ দ্রষ্টব্য।

বা হক, সংস্কৃত অ-সমাসবদ্ধ শব্দের মধ্যবর্তী যুগ্মধ্বনি যৌগিক ছন্দে সর্বত্রই এক unit বলে গণ্য হয়ে থাকে, এই আমার প্রধান বক্তব্য এবং এ নিয়মের ব্যতিক্রমকেই আমি যথার্থ ব্যতিক্রম বলে মান করি। আর এই যথার্থ ব্যতিক্রমের দৃষ্টান্ত রবীন্দ্রনাথের বিপুল কাব্যসাহিত্যে খুব কমই পাওয়া যায় এবং এই ব্যতিক্রমগুলির সংখ্যা এত কম যে, আমি এখনও এগুলির অন্তরে কোনো বিশেষ তত্ত্বের (principle-এর) সন্ধান খুঁজে পাই নি। এ বিষয়ে

আমি প্রথম আভাস দিয়েছি ‘বাংলা ছন্দে রবীন্দ্রনাথের দান’ পুস্তিকায় (পৃ ১৫)। বৈশাখের বিচিত্রায় (পৃ ৫১৫-১৬) এ বিষয়ের বিস্তৃততর আলোচনা করেছি। এখানে একটি মাত্র দৃষ্টান্ত দিয়েই ক্ষান্ত হব।—

যুগান্তরের ব্যাথা প্রত্যাহের ব্যাথার মাঝারে

মিলায় অশ্রুর বাষ্পজাল।

—অতীতকাল, পূর্ববী, রবীন্দ্রনাথ

এখানে ‘যুগান্তরের’ কথাটিতে মাত্রাবৃত্তের কায়দায় ছয় unit ধরা হয়েছে; অর্থাৎ এখানে ওই কথাটি যৌগিক ছন্দে মাত্রিক substitute। আমি এ পর্যন্তই বলতে পারি; কিন্তু কোন্ কোন্ স্থলে এ-রকম substitution চলে আমি সে কথা বলতে পারি নে। আর যত দিন পর্যন্ত রবীন্দ্রনাথের কিংবা অন্য কোনো প্রতিভাশালী কবির রচনায় এ-রকম substitution এর যথেষ্ট দৃষ্টান্ত না মিলবে তত দিন পর্যন্ত এরূপ substitution এর অন্তর্নিহিত তথ্যটিকে নিঃসন্দেহে আয়ত্ত করা সম্ভব নয় বলেই মনে করি। ‘If Tagore favours it, that ends the matter’, শ্রীঅরবিন্দের এই উক্তি অহুসারে আমি পূর্বোক্ত ব্যতিক্রমগুলিকে আর্থ বা আশ্রয় প্রয়োগ বলে গ্রহণ করতে রাজি আছি। শুধু তাই নয়; এই ব্যতিক্রমগুলিতে যে ভাব্যর প্রচ্ছন্ন শক্তির সন্ধান এবং ভবিষ্যতের নতুন বিকাশের ইঙ্গিত পাওয়া যেতে পারে, অনিলবরণের এ কথা যেনে নিতেও আপত্তি নেই। আমার বক্তব্য এই যে, যত দিন পর্যন্ত এইসব ব্যতিক্রমের দৃষ্টান্ত যথেষ্ট সংখ্যক না হবে এবং যতদিন পর্যন্ত এদের ভিতরকার principle টিকে formulate না করা যাবে তত দিন পর্যন্তই এগুলি ব্যতিক্রম বা আর্থপ্রয়োগ বলে গণ্য হবে, অর্থাৎ তত দিন পর্যন্ত সাধারণ লেখকের রচনায় এগুলিকে সাধু বলে গণ্য করা হবে না। কিন্তু যখন এই ব্যতিক্রমগুলিকে কোনো তত্ত্বের অন্তর্ভুক্ত বলে ধরা যাবে তখনই আর এগুলিকে যথার্থ ব্যতিক্রম বলে গণ্য করা হবে না। যা হক, আমি যদি উদ্ভূত দৃষ্টান্তটির অহুসরণ করে লিখি—

যে শব্দরব আজি মুহূর্ত্ত ধ্বনিছে চৌদিকে

অর্থ তার পার কি বুঝিতে ?

তা হলে ‘যে শব্দরব’ অংশটিকে যৌগিক ছন্দে মাত্রিক substitute বলে স্বীকার করে এই লাইনটিকে নির্দোষ বলা হবে কি না, রবীন্দ্রনাথ এটিকে নিখুঁত বলে স্বীকার করবেন কি না, তাই আমার জিজ্ঞাসা। যদি তিনি এটিকে নিখুঁত

বলে স্বীকার করেন তা হলে এই ব্যতিক্রমগুলিকেও কোনো একটি সাধারণ তত্ত্বের অন্তর্গত করে formulate করা শক্ত হবে না।

অনিলবরণ অনেক বিচারের পর এই সিদ্ধান্তে উপস্থিত হয়েছেন যে—  
“ছন্দ সম্বন্ধে নিয়ম বাধিয়া দেওয়া সহজ নহে” এবং “কৃত্রিম নিয়ম বাধিয়া কবিদের এই স্বাধীনতাকে হরণ করিবার চেষ্টা কেন?” ছন্দের নিয়ম বা formula তৈরি করা যে সহজসাধ্য নয়, এটি একটি truism ; ভুক্তভোগী মাত্রই এ কথা স্বীকার করবেন। কিন্তু কাজটি সহজসাধ্য নয় বলেই এ কাজে আনন্দ আছে ; আর সেজগুই এ কাজের প্রয়োজনীয়তাও এত বেশি। কঠিন কাজের জগুই বিশেষ সাধনার প্রয়োজন হয়। যে কাজ বিনা আয়াসেই সম্পন্ন হয় তার মূল্য কি ? অনিলবরণ ‘কৃত্রিম’ নিয়ম বলতে কি বুঝেছেন তা জানি নে। আমি শুধু এটুকু বলতে পারি যে, আমি ছন্দের যেসব নিয়ম formulate করতে চাই তা ‘কৃত্রিম’ নয়, কেননা কোনো মনগড়া নিয়ম জারি করা আমার অভিপ্রায় নয়। কবিদের অবলম্বিত ছন্দগুলির বিশ্লেষণ করে ওসব ছন্দের অন্তর্হিত নিয়মকে আমি induction এর সাহায্যে ধরতে চেষ্টা করেছি এবং করছি। আর induction এর সাহায্যে প্রাপ্ত নিয়মকে আর যা-ই বলা যাক না কেন, কখনও ‘কৃত্রিম’ বলা যায় না ; কেননা এ নিয়ম তো অর্ডিগ্যান্স নয় যে এগুলি পালন না করলেই কঠোর শাস্তির ব্যবস্থা হবে। আমার inductions অসম্পূর্ণ হতে পারে কিংবা একেবারেই ভ্রান্ত হতে পারে, কিন্তু ‘কৃত্রিম’ নয়। অগ্র কেউ যদি সম্পূর্ণ স্বতন্ত্র রকমের induction করেন এবং তা যদি তদ্বিক্তর সংগত হ’ত তবে তাঁর induction মেনে নিতে আমি বিন্দুমাত্রও দ্বিধা করব না। কিন্তু induction করার প্রয়োজনীয়তা নেই এ কথা মানতে পারি নে ; কারণ তা হলে কোনো দেশে কোনো ভাষারই ব্যাকরণ, ছন্দ এবং অলংকার নিয়ে কখনও আলোচনাই হত না।

আর অনিলবরণের সব চেয়ে বড়ো ভুল হচ্ছে এই মনে করা যে, এইসব ছন্দের নিয়ম বার করার মধ্যে ‘কবিদের স্বাধীনতা হরণ করার চেষ্টা’ রয়েছে ; তাঁর এ কথা মনে করা একেবারেই ভুল। কারণ আমি তো নিয়ম ‘বার’ করতেই চাই, নিয়ম ‘জারি’ করতে নয়। তা ছাড়া, আমার ছন্দের আলোচনা বা ছন্দের নিয়ম কবিদের জগু মোটেই নয় ; ওঁরা তাঁরা ছন্দোবিৎ-এর নিয়ম মেনে ছন্দ রচনা করবেন এটা কখনও কোনো ছন্দোবিৎ-এর অভিপ্রায় হতে পারে না। কবিরা আপন মনে ছন্দ রচনা করবেন ; ছন্দোবিৎ এসে তার খেঁচে

নিয়ম বায় করবেন নিজের জিজ্ঞাসা তৃপ্তির জন্তে, ভাবাতাত্ত্বিকের আলোচনার জন্তে, প্রথম শিক্ষার্থীর শিক্ষার জন্তে, কিন্তু কবিদের guidance-এর জন্তে নয়। এ কথাটুকু স্বীকার না করলে ছন্দোবিৎ-এর প্রতি অবিচার করা হবে। কবিরা যে ছন্দের আলোচনার প্রতি দৃষ্টিপাত করবেন না, কিংবা সে আলোচনায় ষোণ দেবেন না, তাও নয়। কেননা কোনো বিশেষ ধরনের নিয়ম বা induction ঠিক হল কি না তা বলতে তাঁরা সম্পূর্ণ অধিকারী; বরং অগ্ৰ দশ জনের চেয়ে তাঁরা বেশি অধিকারী, কেননা ছন্দ নিয়েই তাঁদের কারবার। বা হক, এই সমস্ত ছন্দের নিয়ম বায় করবার মধ্যে যে কবিদের স্বাধীনতা হরণের চেষ্টা বিন্দুমাত্রও নেই, এ কথা আমি জোরের সঙ্গেই বলব। সুবিখ্যাত ইংরেজি ছন্দ-তাত্ত্বিক অধ্যাপক Saintsburyর গ্রন্থ আমিও বলতে পারি—

“These rules are not imperative or compulsory precepts, but observed inductions from the practice of Bengali facts. He that can break them with success, let him.”

—*Historical Manual of English Prosody*, p. 30

শ্রীঅরবিন্দের উক্তিতেও ঠিক এই কথাই সমর্থন পাই। ছন্দের নিয়ম imperative কিংবা compulsory নয় বলেই তো কবিরা যুগে যুগে নতুন নতুন ছন্দের উদ্ভাবন করছেন এবং ছন্দোবিৎরাও নতুন নতুন নিয়ম আবিষ্কারে ব্যাপৃত আছেন। ওসব নিয়ম imperative হলেই কবিদের স্বাধীনতা হরণ ঘটত, নতুন ছন্দও উদ্ভাবিত হত না এবং নতুন নিয়মও formulated হতে পারত না।



## ছন্দ-প্রসঙ্গ

বাংলা ছন্দের ধ্বনির 'ইউনিট' বা ব্যাণ্ডি নির্ধারিত হয় তিনটি বিভিন্ন উপায়ে। ধ্বনিব্যাণ্ডি নির্ণয়ের এই তিনটি পদ্ধতির প্রতি লক্ষ রেখে বাংলা ছন্দকে তিনটি প্রধান শ্রেণীতে বিভক্ত করা যায়। যথা— স্বরবৃত্ত (সিলেবিক), মাত্রাবৃত্ত (কোয়ান্টিটেটিভ) এবং যৌগিক বা অক্ষরবৃত্ত। স্বরবৃত্ত ছন্দের প্রত্যেকটি পর্ব (মেজার) ইংরেজি ছন্দের গায় মুখ্যতঃ ধ্বনি বা স্বরের অর্থাৎ সিলেবল্‌এর সংখ্যার উপর নির্ভর করে। মাত্রাবৃত্ত ছন্দের পর্ব নিয়মিত হয় ধ্বনির মাত্রা-পরিমাণ (কোয়ান্টিটি অফ সাউণ্ড)-এর দ্বারা। এ ছন্দে অক্ষরধ্বনিকে লঘু বা একমাত্রক এবং যুগ্মধ্বনিকে গুরু বা দ্বিমাত্রক বলে গণ্য করতে হয়। আর প্রতি পর্বের সীমাসংখ্যা দ্বারাই এ ছন্দের আকৃতি নিঃস্থিত হয়। বাংলার বহু-প্রচলিত মামুলি ছন্দগুলিকে অক্ষরবৃত্ত নাম দিয়েছি, যেহেতু প্রচলিত প্রধায় দৃশ্যমান অক্ষরসংখ্যার দ্বারাই এ ছন্দের পরিমাপ করা হয়ে থাকে। কিন্তু শুধু অক্ষরগণনার উপরে ভিত্তি করে কোনো ছন্দই রচিত হতে পারে না; কারণ ছন্দের মূলতত্ত্ব অক্ষর নয়, ধ্বনি। প্রকৃতপক্ষে বাংলার লিপিপদ্ধতিতে যদি যুক্তবর্ণের ব্যবস্থা না থাকত তবে অক্ষরবৃত্ত ছন্দের উৎপত্তিই হতে পারত না। পক্ষান্তরে যুগ্মস্বর (ডিফ্‌থন্‌)-গুলিকে একাক্ষরের দ্বারা প্রকাশ করার ব্যবস্থা যদি বাংলায় থাকত তা হলেও অক্ষরবৃত্ত ছন্দের রূপ অনেকখানি পরিবর্তিত হয়ে যেত। কিন্তু আপাততঃ অক্ষরগণনার ভিত্তির উপরে প্রতিষ্ঠিত হলেও অক্ষরবৃত্ত ছন্দের মূলেও একটি ধ্বনিতত্ত্ব আছে, নতুবা এ-রকম ছন্দ রচনা করাই সম্ভব হত না। সে তত্ত্বটি এই—এ ছন্দের অন্তর্গত প্রত্যেকটি শব্দই (ওয়ার্ড) শেষাংশে মাত্রাবৃত্তধর্মী এবং পূর্বাংশে স্বরবৃত্তধর্মী। সুতরাং অক্ষরবৃত্ত আসলে মাত্রাবৃত্ত ও স্বরবৃত্তের মিশ্রণজাত একটি যৌগিক ছন্দ।

যৌগিক বা অক্ষরবৃত্ত ছন্দের গতি অত্যন্ত মনোরম ও নিস্তরঙ্গ, এর ধ্বনি একষেয়ে, স্বাভাবিক, এবং পর্ববিভাগ অস্পষ্ট। এরূপ হওয়ার কারণ এই যে, বহু শতাব্দী যাবৎ কবিদেয়-অজ্ঞাতসারেই খাটি প্রাকৃত বাংলার স্বরবৃত্ত ধ্বনি, সংস্কৃত ছন্দের অনুকরণ এবং সংগীতের সুরের মিশ্রণে এ ছন্দের উৎপত্তি হয়েছে। বহু দিনের বহু অভ্যাসের স্তর উদ্ঘাটিত না করলে এ ছন্দের

প্রকৃত স্বরূপ নির্ণয় করা সম্ভবপর নয়। অক্ষরবৃত্ত ছন্দে বাংলা ভাষার স্বার্থ রূপটি চাপা পড়ে গেছে; ভাষার ধ্বনিবৈচিত্র্য এ ছন্দে ফুটিয়ে তোলা সম্ভব নয়, ধ্বনিবৈচিত্র্য হিসেবে এ ছন্দ অত্যন্ত নিস্তরঙ্গ ও একঘেয়ে। অক্ষরবৃত্তের এই ক্রটি সংশোধন করার জন্যে বহুকাল যাবৎ, বিশেষতঃ ভারতচন্দ্রের সময় থেকে, বিশেষ চেষ্টা চলছে। তখনকার কবির সংস্কৃত ছন্দের আশ্রয় নিয়েই বাংলা ছন্দে বৈচিত্র্য সাধনের চেষ্টা করেছেন। কিন্তু সংস্কৃত ছন্দের ধ্বনি বাংলা ভাষার প্রকৃতিবিরুদ্ধ বলে তাঁদের সকল চেষ্টাই বিফল হয়েছে। অবশেষে যখন রবীন্দ্রনাথ বাংলা সাহিত্যে মাত্রাবৃত্ত ও স্বরবৃত্ত ছন্দের প্রবর্তন করলেন তখন থেকেই বাংলা ছন্দে বহু বৈচিত্র্য ঘটিয়ে তোলা সম্ভব হয়েছে। অক্ষরবৃত্ত ছন্দ থেকে কিভাবে স্বরবৃত্ত ও মাত্রাবৃত্ত ছন্দের উৎপত্তি হল, এ প্রবন্ধে তাই দেখাতে চেষ্টা করব।

এ কথা পূর্বেই বলেছি যে, শুধু দৃশ্যমান অক্ষরের সংখ্যা গুনে কোনো সত্যিকারের ছন্দ রচনা করা সম্ভব নয় এবং তথাকথিত ‘অক্ষর’বৃত্ত ছন্দের মূলেও শুধু অক্ষরসংখ্যাটাই আসল তত্ত্ব নয়। যদি বাংলা ভাষার যুক্ত ব্যঞ্জনগুলিকে বিযুক্ত করে লেখা যায়, কিংবা বিযুক্ত যুগ্মস্বরগুলিকে যুক্ত করে লেখা হয় তবেই দেখা যাবে, এ ছন্দে প্রকৃতপক্ষে দৃশ্যমান অক্ষরের সংখ্যাসাম্যই মূল কথা নয়; কারণ তা হলে অক্ষরবৃত্ত ছন্দের সর্বত্রই অক্ষরসংখ্যার বৈষম্য দেখা দেবে অথচ ছন্দ ঠিকই থাকবে। মাত্রাবৃত্ত এবং স্বরবৃত্তও অক্ষরসংখ্যার উপরে নির্ভর করে না; তাই বাংলার যুক্তব্যঞ্জনকে বিযুক্ত করলে কিংবা বিযুক্ত স্বরকে যুক্ত করলেও এ দুই ছন্দে কোনো পরিবর্তন হবে না; এরা যেমন আছে তেমনই থাকবে।

অক্ষরবৃত্ত ছন্দে প্রত্যেক শব্দের প্রথমাংশ স্বরবৃত্তের স্বধর্মী আর শেষাংশ মাত্রাবৃত্তের স্বধর্মী। সুতরাং বলা বাহুল্য যে, এ ছন্দের শব্দগুলির শেষাংশেও যদি ধ্বনি-‘সংখ্যা’র রীতি চালানো যায় তবে আমরা পাব স্বরবৃত্ত ছন্দ; আর শব্দগুলির প্রথমাংশেও যদি ধ্বনি-‘মাত্রা’র রীতি চালানো যায় তবে মাত্রাবৃত্ত ছন্দের উৎপত্তি হবে। আসলেও বাংলা সাহিত্যে এ দুটি ছন্দের আবির্ভাব এভাবেই হয়েছে। দু-একটি দৃষ্টান্ত দিলেই কথাটা স্পষ্ট হবে। রবীন্দ্রনাথের ‘মানসী’র পূর্ব পর্যন্ত বাংলায় শব্দের মধ্যবর্তী যুগ্মধ্বনিকে সর্বদাই এক ‘ইউনিট’ গণনা করা হত। রবীন্দ্রনাথও অল্প বয়সের রচনায় সর্বত্রই শব্দমধ্যবর্তী যুগ্মধ্বনিকে এক ‘ইউনিট’ হিসেবেই গণ্য করেছেন। যথা—

+  
বসন্তবাতাসে আঁখি মুদে আসে,

মৃদু মৃদু বহে শ্বাস,  
গায়ে এসে ঘেন এলায়ে পড়িছে  
কুসুমের মৃদুবাস ।...

+  
আমার ঘোবন-কুসুমকাননে  
ললিত চরণে বেড়াবে না ?  
আমার প্রাণের লতিকা-বাঁধন  
চরণ তাহার জড়াবে না ?

—জাগ্রত স্বপ্ন, ছবি ও গান, রবীন্দ্রনাথ

এ ছন্দটি হচ্ছে ছয়-ছয়-আট ‘অক্ষর’ের সুপরিচিত লঘু ত্রিপদী, শুধু শেষ দুটি পংক্তিতে দুটি করে বেশি অক্ষর আছে। এখানে শব্দের মধ্যবর্তী দুটিমাত্র ধ্বনি (ঢেরা-চিহ্নিত) যুগ্ম অর্থাৎ দ্বিমাত্রক, প্রথমটি (সন্) ব্যঞ্জনান্তিক এবং দ্বিতীয়টি (ষট্) স্বরান্তিক; বাকি সবগুলি ধ্বনিই অযুগ্ম, স্তবরাং একমাত্রক। একটু লক্ষ্য করলেই টের পাওয়া যাবে ওই ঢেরা-চিহ্নিত স্থান-দুটিতেই ছন্দের ধ্বনি ঘেন ঠিক শোনাচ্ছে না; ওই দুটি জায়গাতেই একটু দ্রুত উচ্চারণ করতে হয়, তবু ঐক্যবোধের ত্রুটি ঘটে না। এর কারণ হচ্ছে মাত্রাবুদ্ধি। ওই দুটি পর্বে বা পংক্তিচ্ছেদে এক মাত্রা করে কমিয়ে যদি লেখা হত—

বসন্ত বায়ে | আঁখি মুদে আসে

এবং মম ঘোবন | -কুসুমকাননে

তা হলেই কিন্তু ওই দুটি যুগ্মধ্বনি ঐক্যবোধের ত্রুটি শোনাতে না।

‘মানসী’ রচনার যুগে রবীন্দ্রনাথ আবিষ্কার করলেন, লঘুত্রিপদী-জাতীয় ঘেনব ছন্দের প্রতি পর্বে ছয়ের প্রাধান্য সেসব ছন্দে যুগ্মধ্বনিকে ছ মাত্রার মর্যাদা না দিলে ছন্দ ঠিক থাকে না। তাই ‘মানসী’র যুগ থেকেই রবীন্দ্রনাথ লঘুত্রিপদী-জাতীয় ছন্দে শব্দের মধ্যবর্তী যুগ্মধ্বনিকে এক না ধরে দুই ধরতে আরম্ভ করেন, অর্থাৎ অক্ষরসংখ্যা না গুণে ধ্বনি-‘মাত্রা’র ওজন রক্ষা করে লঘুত্রিপদী-জাতীয় ছন্দ রচনা করতে শুরু করেন। এভাবেই বাংলা সাহিত্যে মাত্রাবৃত্ত ছন্দের আবির্ভাব হয়েছে। ১৮৯৪ সালের বৈশাখ মাসে রচিত ‘ভুল-ভাঙা’ নামক কবিতাটিই প্রকৃতপক্ষে বাংলা সাহিত্যে মাত্রাবৃত্ত ছন্দে রচিত সর্বপ্রথম কবিতা;

কায়ণ এই 'ভুল-ভাঙা' কবিতাটিতেই সর্বপ্রথমে শুধু অক্ষর গুনে ছন্দ রচনার ভুল ভেঙেছে। অক্ষরবৃত্তের শিকল-ভাঙা সর্বপ্রথম বাংলা মাত্রাবৃত্ত ছন্দটির একটু নমুনা দিচ্ছি।—

চেয়ে আছে আঁখি, । নাই ও আঁখিতে

প্রেমের যোর ;

।

বাহুলতা শুধু । বন্ধনপাশ

বাহুতে মোর ।

বসন্ত নাহি । এ ধরায় আর

আগের মতো ;

।

।

জ্যোৎস্নাষামিনী । যৌবনহারী

জীবন হত ।

—ভুলভাঙা, মানসী, রবীন্দ্রনাথ

শব্দের মধ্যবর্তী যুগ্মধ্বনি যেখানে যেখানে দ্বিমাত্রক হয়েছে তা দণ্ডচিহ্নের দ্বারা নির্দেশ করা হল। ওই 'বন্ধন' কথাটিই সর্বপ্রথমে অক্ষর গুনতির বন্ধনপাশ ছিন্ন করেছে।

অরবৃত্ত ছন্দ বহুকাল যাবৎই ছেলে-ভুলানো ছড়া, বাউলের গান প্রভৃতি লোকসাহিত্যে ব্যবহৃত হয়ে আসছিল। কিন্তু প্রকৃত রসসাহিত্যে এ ছন্দ অনেক কাল পর্যন্ত স্থান পায় নি। রামপ্রসাদের গানেই এ ছন্দের সর্বপ্রথম বহুল প্রয়োগ দেখা যায়। তার পরে নিধুবাবুর টপ্পা, ঈশ্বর গুপ্তের ও হেমচন্দ্রের ব্যঙ্গকবিতা এবং মধুসূদনের প্রহসনেও এ ছন্দের সাক্ষাৎ মেলে। কিন্তু এই দৃষ্টান্তগুলিও লোকসাহিত্যেরই অল্পবর্তন মাত্র; বিস্তৃত সাহিত্যে এঁরা এ ছন্দকে সম্বন্ধে বর্জন করেছেন। আর এসব দৃষ্টান্ত অনেক স্থানেই বিস্তৃত অরবৃত্ত ছন্দে রচিত নয়; কোথাও ছড়া-পাঁচালির মতো ভাঙা-ভাঙা, কোথাও সাধু ছন্দের সঙ্গে মিশ্রিত।

অরবৃত্ত ছন্দকেও রবীন্দ্রনাথই সর্বপ্রথমে সাধু সাহিত্যের আসরে অভিনন্দিত করেন। তাঁর পরিণত বয়সের রচনায় এ ছন্দেরই প্রাধান্য দেখা যায়। 'কবিকা'র যুগে তিনি এ ছন্দকে সর্বপ্রথমে কবিতা রচনার একটি বিশিষ্ট

বাহনরূপে ব্যবহার করতে শুরু করেন। সে সময় থেকে এ ছন্দটি কবিসমাজে খ্যাতি বাংলা ছন্দ বলে আদৃত হয়ে আসছে। কিন্তু রবীন্দ্রনাথ যে ক্ষণিকাতেই এ ছন্দের সর্বপ্রথম ব্যবহার করেছেন, তা নয়। ‘ক্ষণিকা’র (১৩০৬ সাল) বহুকাল পূর্বেই ‘ছবি ও গান’-এ (১২২০ সাল) এ ছন্দের সর্বপ্রথম রচনা দেখতে পাই। ‘ছবি ও গান’-এর স্বরবৃত্ত ছন্দের এই একটি বিশেষ মূল্য আছে যে, ওয় থেকেই আমরা বুঝতে পারি স্বরবৃত্ত ছন্দ লোকসাহিত্যের অনিয়মিত আকৃতি পরিত্যাগ করে কিরূপে কাব্যসাহিত্যে ব্যবহারযোগ্য সম্পূর্ণ আকার ধারণ করেছে। একটি দৃষ্টান্ত দিচ্ছি—

একলা পাখি। গাছের সাথে।

+

কাছে তোর। বসে থাকে,।

।

সারা দুপুর। -বেলা শুধু। ডাকে।

+

যেন তার। আর কেহ নাই,।

+

সারাদিন। একলাটি তাই।

।

স্নেহভরে। তোরে নিয়েই। থাকে ॥

—আদরিণী, ছবি ও গান, রবীন্দ্রনাথ

উদ্ধৃত দৃষ্টান্তটি দেখলেই বোঝা যায় যে, ওটি আমাদের সুপরিচিত আট-আট-দশের দীর্ঘ ত্রিপদীর ছাঁচে ঢালা। বাস্তবিক পক্ষে উদ্ধৃত পংক্তিগুলির অনেক স্থলেই, বিশেষভাবে ঢেরা-চিহ্নিত তিনটি স্থলে, অক্ষরবৃত্তের ধ্বনিও রয়েছে। স্বরবৃত্তের দিক্ থেকে দেখতে গেলে ওই তিন জায়গায় ছন্দপতন হয়েছে। এরূপ হবার কারণ এই যে, এখানে কবি আসলে ঠিক স্বরবৃত্ত রচনা করতেই চান নি; তিনি চেয়েছেন প্রচলিত দীর্ঘ ত্রিপদী রচনা করতে। অথচ শব্দাস্থিত কয়েকটি যুগ্মধ্বনিকে (দণ্ড-চিহ্নিত) প্রয়োজনমতো এক ইউনিট বলেও গণ্য করেছেন। তাই এখানে স্বরবৃত্ত ও অক্ষরবৃত্তের একটা মিশ্রণ হয়েছে। ‘ছবি ও গান’-এ এরূপ এবং এর চেয়েও বেশি মিশ্রণের অনেক দৃষ্টান্ত আছে। আর-একটি নমুনা দিচ্ছি—

+

ধীরে ধীরে প্রভাত হল,  
 আঁধার মিলায়ে গেল,  
 উষা হাসে কনকবরনী ;  
 বহুল গাছে য় তলে  
 কুহুম রাশির পরে  
 বসিয়া পড়িল সে রমণী ।  
 আঁখি দিয়ে ঝরঝরে  
 অশ্রুবারি ঝরে পড়ে,  
 ভেঙে যেতে চায় যেন বুক ;  
 +  
 রাঙা রাঙা অধর দুটি  
 কৈপে কৈপে ওঠে কত,  
 করতলে স্কন্ধে মুখ ।

—বিরহ, ছবি ও গান, রবীন্দ্রনাথ

এটি অক্ষরবৃত্ত দীর্ঘ ত্রিপদীর দৃষ্টান্ত সে বিষয়ে সন্দেহ নেই । কিন্তু ঢেঁরা-চিহ্নিত দুটি স্থানে ব্যতিক্রম আছে ; অর্থাৎ স্বরবৃত্তের ত্রায় এ দুটি জায়গায় যুগ্মধ্বনিকে এক ইউনিট ধরা হয়েছে । আসল কথা, অক্ষরবৃত্ত ছন্দে ও শব্দান্তস্থিত যুগ্মধ্বনিকে এক ইউনিট বলে ধরা যায় কি না রবীন্দ্রনাথ তাই পরীক্ষা করছিলেন । এই পরীক্ষাকার্যের ফলেই ‘ছবি ও গান’-এ অক্ষরবৃত্ত ও স্বরবৃত্তের কয়বেশি মিশ্রণের দৃষ্টান্ত পাওয়া যায় । এই পরীক্ষা ও মিশ্রণের ফলেই রবীন্দ্রনাথ অবশেষে স্বরবৃত্ত ছন্দের আসল প্রকৃতির সন্ধান পেয়েছিলেন । ‘ক্ষণিকা’র আমরা তারই পরিচয় পাই । ‘উৎসর্গে’ স্বরবৃত্ত দীর্ঘ ত্রিপদীর পূর্ণাঙ্গ নিদর্শনের সাক্ষাৎ পাওয়া যায় । একটি দৃষ্টান্ত দিচ্ছি—

অতি সুদূর দীর্ঘ পথে  
 আকুল তব আঁচল হতে  
 আঁধারতলে গন্ধরেখা রাখি’  
 জোনাক-আলা বনের শেষে  
 কখন এলে দুয়ারদেশে  
 শিখিল কেশে লগাটখানি ঢাকি ।

—৩৬, উৎসর্গ, রবীন্দ্রনাথ

স্বতরাং দেখা গেল, রবীন্দ্রনাথ মাত্রাবৃত্ত ছন্দের স্বরূপ যেমন অক্ষরবৃত্ত ছন্দের ভিতর থেকেই আবিষ্কার করেছিলেন, স্বরবৃত্ত ছন্দেরও সাহিত্যিক রূপের সন্ধান তেমনি অক্ষরবৃত্তের মধ্যেই পেয়েছিলেন। কারণ অক্ষরবৃত্ত ছন্দে মাত্রাবৃত্ত ও স্বরবৃত্ত উভয়েরই মূলভত্ত্ব পাশাপাশি অবস্থিত আছে।

পঞ্চপুষ্ক ১৩৩৮ বাঘ

## ছন্দোবিশ্লেষ

ছন্দের অস্তরের প্রকৃতি নির্ভর করে অযুগ্ম ও যুগ্ম-বিশেষে ধ্বনি সমাবেশের উপরে, আর ছন্দের আকৃতি অর্থাৎ ছন্দোবদ্ধ নিয়ন্ত্রিত হয় যতিস্থাপন ও পর্বগঠনের রীতির দ্বারা। যতি ও পর্ব খুব ঘনিষ্ঠভাবে সম্বন্ধ; কারণ যতিস্থাপন ও পর্বগঠনের প্রণালী সম্পূর্ণরূপে পরস্পরের উপরে নির্ভর করে। একটু লক্ষ করলেই দেখা যাবে, বাংলা ছন্দের যতি তিন রকমের। একটি দৃষ্টান্ত দিয়ে দেখাচ্ছি।

আপাতত । এই আনন্দে ॥ গর্বে বেড়াই । নেচে,

কালিদাস তো । নামেই আছেন ॥ আমি আছি । বৈচে ।

—সেকাল, কণিকা. রবীন্দ্রনাথ

ছন্দের দিক্ থেকে দেখা যাচ্ছে, এক-একটি সিলেব্‌ল বা ধ্বনিই হচ্ছে এ দৃষ্টান্তটির unit বা ব্যুটি; সুতরাং এ ছন্দটি হচ্ছে স্বরবৃত্ত বা syllabic। আর ছন্দোবদ্ধের দিক্ থেকে দেখা যাচ্ছে, চারটি করে ব্যুটির পরেই ধ্বনির গতি একটু করে বিরত হচ্ছে। ধ্বনিগতির এই বিরামকেই ছন্দের পরিভাষায় বলা হয় যতি (pause), আর ধ্বনিশ্রেণীর যে অংশের পর একটি করে যতি থাকে সে অংশটুকুকে বলা যায় পর্ব (measure) বা গণ (group)। পর্ব ও গণ যদিও একই জিনিস তথাপি তাদের অর্থের মধ্যে একটু পার্থক্য আছে। পর্ব মানে হচ্ছে দুটি ছেদের মধ্যবর্তী অংশ; আর কয়েকটি ব্যুটির সমবায়ে গঠিত একটি অংশকে বলা যায় একটি গণ। যেমন উপরের দৃষ্টান্তটিতে প্রত্যেকটি পংক্তিই চারটি যতি বা ছেদের দ্বারা চারটি পর্বে বিভক্ত হয়েছে; আর চারটি করে সিলেব্‌ল বা ধ্বনির যোগে একটি করে গণ গঠিত হয়েছে। যা হক, ছন্দের আলোচনায় পর্ব ও গণ কার্যতঃ একই জিনিস। 'আমাদের আলোচনায় আরও গণ শব্দের পরিবর্তে পর্ব কথাটাই ব্যবহার করব। উদ্ভূত দৃষ্টান্তটিতে প্রত্যেকটি পর্বে চারটি করে সিলেব্‌ল বা স্বর আছে; সুতরাং এগুলিকে চতুঃস্বর পর্ব (tetrasyllabic measure) নাম দিতে পারি। অতএব ছন্দোবদ্ধের তরক থেকে এ ছন্দটিকে বলব চতুঃস্বরপর্বিক ছন্দ। আবার বেহেতু এখানে প্রতি পংক্তিতেই চারটি করে পর্ব আছে আর শেষ পর্বে দুটি করে স্বর কম আছে সেজন্যে এ ছন্দটির আর-এক পরিচয় হচ্ছে এই যে, এটি অপূর্ণ চৌপর্বিক



( tetrameter catalectic ) ছন্দ । অতএব উদ্যত পংক্তি-দুটি হচ্ছে স্বরবৃত্ত ছন্দের চতুঃস্বর অপূর্ণ চৌপবিক ছন্দোবিন্ধের দৃষ্টান্ত ।

এবার এই পংক্তি-দুটির যতিবিচার করা যাক । একটু লক্ষ্য করলেই টের পাওয়া যাবে যে, এখানে যে চার স্থানে যতি স্থাপিত হয়েছে তার সবগুলিতে ধ্বনির বিরতিকাল সমান নয় । চতুর্থ পর্বের পরবর্তী যতিতে ধ্বনি সম্পূর্ণরূপে বিরত হয়েছে ; সুতরাং এ যতিটিকে বলতে পারি পূর্ণযতি । প্রথম ও তৃতীয় পর্বের পরে ধ্বনির বিরতি অতি অল্পসময় স্থায়ী ; সুতরাং এ দুটি যতিকে ঈষদযতি নাম দেওয়া যায় । দ্বিতীয় পর্বের পরবর্তী যতিটি কিন্তু চতুর্থ যতিটির মতো পূর্ণবিরতি-সূচকও নয়, আবার প্রথম ও তৃতীয় যতি-দুটির মতো ঈষদবিরতি-সূচকও নয় ; এটির স্থায়িত্বকাল মাঝামাঝি রকমের । তাই এ যতিটিকে অর্ধযতি নামে অভিহিত করতে পারি । এ বিষয়ের বিশদতর আলোচনা হুগো 'প্রবাসী' ১৩৩০ চৈত্র, ৭৮২-৮৩ পৃষ্ঠায় । উদ্যত দৃষ্টান্তটিতে ঈষদযতি নির্দেশ করার জন্তে একটি ছেদচিহ্ন এবং অর্ধযতি নির্দেশ করার জন্তে যুগ্মছেদ-চিহ্ন ব্যবহার করেছি ; পূর্ণযতি নির্দেশ করার জন্তে কোনো চিহ্ন ব্যবহার করি নি ।

কালব্যাপ্তির দিক্ থেকে যতির এই প্রকারভেদের বিষয় রবীন্দ্রনাথের উক্তি থেকেও সমর্থিত হয় ।

তক্ষণী । বেয়ে শেষে ॥ এসেছি । ভাঙা ঘাটে

এই পংক্তিটির ছন্দোবিগ্লেষণ উপলক্ষে মাথের 'পরিচয়ে' তি লিখেছেন—  
“সাত মাত্রার পরে একটা করে যতি আছে, কিন্তু বিজোড় অঙ্কের অসাম্য ওই যতিতে পুরো বিরাম পায় না । সেইজন্তে সমস্ত পদটার মধ্যে নিম্নতই একটা অস্থিরতা থাকে, যে পর্যন্ত না পদের শেষে এসে একটা সম্পূর্ণ স্থিতি ঘটে ।”  
অর্থাৎ উদ্যত পংক্তিটির শেষ প্রান্তে একটা 'সম্পূর্ণ স্থিতি' বা পূর্ণ যতি আছে ; আর পংক্তির মধ্যস্থলে যে যতিটি আছে সেটি 'পুরো বিরাম' বা পূর্ণযতি নয়, সেটি হচ্ছে অর্ধযতি । তা ছাড়া প্রথম ও তৃতীয় পর্বের পরে ছেদচিহ্নের দ্বারা যে বিভাগটি নির্দিষ্ট হয়েছে সেখানেও একটি করে ঈষদযতি রয়েছে ।

যতির এই প্রকারভেদের দ্বারা ছন্দোবিন্ধ কিতাবে নিয়ন্ত্রিত হয় এবার তাই দেখাব । একটা দৃষ্টান্ত নেওয়া যাক ।—

হুঃখ সহায় । তপস্তাতেই ॥ হোক বাঙালির । জয়,  
 ভয়কে ধার। । মানে তারাই ॥ জাগিয়ে রাখে । ভয় ।  
 মৃত্যুকে যে । এড়িয়ে চলে ॥ মৃত্যু তারেই । টানে,  
 মৃত্যু ধার। । বুক পেতে লয় ॥ বাঁচতে তারাই । জানে ।

—চিঠি, পুরবী, রবীন্দ্রনাথ

এ ছন্দটির unit বা ব্যাণ্ডি হচ্ছে সিলেব্‌ল বা স্বর । হ্রস্বরাং এটি স্বরবৃত্ত ছন্দ । এখানে প্রত্যেক পংক্তিতে চোদ্দটি করে স্বরব্যাণ্ডি (syllabic unit) আছে এবং আট স্বরের পরে অর্ধঘতি ও পংক্তির শেষ প্রান্তে পূর্ণঘতি রয়েছে । হ্রস্বরাং এটিকে ‘স্বরবৃত্ত পয়ার’ বলতে পারি । পূর্বে বলেছি ঈষদ্ব্যতির দ্বারা বিচ্ছিন্ন ছন্দপংক্তির অংশকে বলা যায় পর্ব । কিন্তু অর্ধঘতির দ্বারা বিভক্ত ছন্দপংক্তির অংশকে কি বলা যাবে ? ওই রকম অংশকেই বলা যায় ছন্দের পদ । ঈষদ্ব্যতি ও অর্ধঘতির বিভাগ অনুসারে ছন্দপংক্তিকে ‘পর্ব’ ও ‘পদ’-এ বিভক্ত করার প্রয়োজনীয়তা আছে । ছন্দের ‘পদ’-বিভাগ আছে বলেই ছন্দোবদ্ধ রচনার নাম হয়েছে ‘পদ্য’ ।

মৃত্যু ধার। । বুক পেতে লয় ॥ মরতে তারাই । জানে  
 এই পংক্তিটিকে ঈষদ্ব্যতি ও পর্ববিভাগের দিক্ থেকে বলব ‘অপূর্ণ চৌপবিক’ ; শেষ পর্বে দুটি স্বর বা সিলেব্‌ল কম আছে । আবার অর্ধঘতি ও পদবিভাগের দিক্ থেকে এই পংক্তিটিকে বলা যায় অপূর্ণ ত্রিপদী ; দ্বিতীয় পদে আটটি স্বর নেই বলে এ পদটি পূর্ণ নয় । অতএব দেখা যাচ্ছে এখানে এক-একটি পদে দুটি করে পর্ব আছে । বাংলা কবিতায় এ-রকম ত্রিপবিক পদই বেশি প্রচলিত । কিন্তু ত্রিপবিক পদও আজকালকার ছন্দে যথেষ্ট পাওয়া যায় ।—

স্বয়ং জাঁতায় । পুরান কাঁদায়, ॥

ফিরি ধনের । গোলকর্ধাধায়, ॥

শুভ্রতারে । সাজাই নানা । সাজে ।

—মাটির ডাক, পুরবী, রবীন্দ্রনাথ

এটি ছন্দ হিসেবে স্বরবৃত্ত এবং ছন্দোবদ্ধ হিসেবে ত্রিপদী । অতএব এটিকে ‘স্বরবৃত্ত ত্রিপদী’ বলতে পারি । প্রথম ও দ্বিতীয় পদের পরে অর্ধঘতি এবং তৃতীয় পদের পরে পূর্ণঘতি রয়েছে । প্রথম দুটি পদে দুটি করে পূর্ণ পর্ব রয়েছে ; এ দুটি ত্রিপবিক পদ । কিন্তু তৃতীয় পদে দুটি পূর্ণ পর্ব ও একটি অর্ধ পর্ব আছে ;

তাই এটিকে অপূর্ণ ত্রিপদিক বা সার্থ ত্রিপদিক পদ বলতে পারি। অর্ধধ্বতির বিভাগ অনুসারে এই শ্লোকাংশটিকে বলা যাবে ত্রিপদী; কিন্তু ঐষদ্ব্যতির বিভাগ অনুসারে এটিকে বলতে হবে অপূর্ণ সম্বন্ধপদিক। এবার একটি স্বরবৃত্ত চৌপদীর দৃষ্টান্ত দিচ্ছি।—

আমার প্রিয়্যার । মুগ্ধ দৃষ্টি ॥

করছে ভুবন । নূতন সৃষ্টি, ॥

মুচকি হাসির । স্খাধার বৃষ্টি ॥

চলছে আজি । জগৎ জুড়ে ।

—অতিবাদ, কণিকা, রবীন্দ্রনাথ

এ দৃষ্টান্তটির চারটি পদেই দুটি করে পদ আছে। হ্রতরাং এটিকে ত্রিপদিক চৌপদী বলে পরিচয় দেওয়া যায়। একটি ত্রিপদিক চৌপদীর দৃষ্টান্ত দিচ্ছি।—

গাফা যে ফল । পড়ল মাটির । টানে ॥

শাখা আবার । চায় কি তাহার । পানে ? ॥

বাতাসেতে । উড়িয়ে-দেওয়া । গানে ॥

তারে কি আর । স্মরণ করে । পাখি ?

—দান, পুরবী, রবীন্দ্রনাথ

এখানে চার পদেই দুটি করে পূর্ণ পদ ও একটি অর্ধ পদ রয়েছে। হ্রতরাং এটিকে অপূর্ণ ত্রিপদিক বা সার্থ ত্রিপদিক চৌপদী বলে অভিহিত করা যায়। মনে রাখা উচিত যে পয়ার ( বা ত্রিপদী ), ত্রিপদী, চৌপদী স্বভূতি ছন্দের নাম নয়, ছন্দোবন্ধের নাম।

আর দৃষ্টান্ত দেওয়া নিম্নয়োজন। আশা করি উদ্ভূত দৃষ্টান্তগুলির বিশ্লেষণ-প্রণালী থেকেই ছন্দপংক্তিকে ঐষদ্ব্যতি ও অর্ধধ্বতির সংস্থানের প্রতি লক্ষ রেখে পদ ও পদে বিভক্ত করার প্রয়োজনীয়তা বোঝা যাবে।

৩

বতির প্রকারভেদ এবং পদ ও পদ বিভাগের উপলক্ষে আমি বহুবার 'ছন্দপংক্তি' কথাটা ব্যবহার করেছি। ছন্দের আলোচনায় 'পংক্তি' বলতে ঠিক কি বোঝায় তা বিবেচনা করে দেখা দরকার।

আমাদের আলোচনা থেকে এ কথা আশা করি বোঝা গেছে যে, এক-একটি ঐষদ্ব্যতির দ্বারা নিয়ন্ত্রিত ধ্বনিসমষ্টির নাম হচ্ছে পদ, অর্ধধ্বতির দ্বারা বিচ্ছিন্ন

ধ্বনিশ্রেণীর অংশকেই বলেছি পদ, আর তেমনি ধ্বনিগতির সূচনা থেকে ওই গতির পূর্ণ বিরতি বা বতি পর্যন্ত যে ধ্বনিশ্রেণী তারই নাম ‘ছন্দপংক্তি’। ‘ছন্দপংক্তি’ কথাটাকে আমি একটা পারিভাষিক অর্থে ব্যবহার করছি; প্রচলিত অর্থের ছত্র বা লাইন শব্দ থেকে পংক্তি কথাটির পার্থক্য রক্ষা করা প্রয়োজন। কারণ পত্নের একটি ধ্বনিশ্রেণীকে দুই বা ততোধিক ‘ছত্রে’ সাজিয়ে লেখা হলেও ছন্দের আলোচনায় তাকে এক ‘পংক্তি’ বলেই গণ্য করতে হবে। গতির আরম্ভ থেকে পূর্ণ বিরতি পর্যন্ত ধ্বনিশ্রেণীটি যদি নাতিদীর্ঘ হয় তবে তাকে এক লাইনেও লেখা যায়, আবার দু-তিন সারে সাজিয়েও লেখা যায়, তা ছাড়া দীর্ঘ ত্রিপদী, চৌপদী প্রভৃতি যেসব ছন্দাবল্কে ওই ধ্বনিশ্রেণীটি অতি দীর্ঘ সেসব স্থলে ওটিকে দুই, তিন কিংবা চার সারে সাজিয়ে লেখা ছাড়া পত্নের চাক্ষুব আকৃতি রক্ষা করা সম্ভব হয় না। কিন্তু যত সার বা ছত্রেই লেখা হক না কেন, গতির আরম্ভ থেকে পূর্ণ বিরতি পর্যন্ত সমগ্র ধ্বনিশ্রেণীটিকে একটি ছন্দপংক্তি বলে গণ্য করাই ছন্দের আলোচনার পক্ষে সংগত ও সুবিধাজনক। একটি দৃষ্টান্ত দিচ্ছি।—

দুঃখের । বরষায় ॥ চক্ষের । জল ঘেই ॥ নামল

—১, গীতালি, রবীন্দ্রনাথ

এই ধ্বনিশ্রেণীটি ঈষদ্ব্যতির দ্বারা পাঁচ ভাগে বিভক্ত হয়েছে; স্তররাস এটি পঞ্চপদিক। আবার অর্ধব্যতির দ্বারা তিন ভাগে বিভক্ত হয়েছে বলে একে ত্রিপদী বলব। এখানে এই ধ্বনিশ্রেণীটিকে এক সারেই লেখা হয়েছে হয়েছে বটে; কিন্তু অর্ধব্যতির বিভাগ অনুসারে এটিকে তিন সারে সাজিয়েও লেখা যায়। কিন্তু যেভাবেই লেখা হক না কেন, এই ধ্বনিশ্রেণীটিকে একটিমাত্র ‘ছন্দপংক্তি’ বলেই অভিহিত করব। পূর্বে স্বরবৃত্ত ত্রিপদীর যে দৃষ্টান্তটি দেওয়া হয়েছে সেটি তিন সারে লিখিত হলেও এক পংক্তি বলেই গণ্য হবে। আর স্বরবৃত্ত চৌপদীর দৃষ্টান্ত-দুটিও চার লাইনে লিখিত হয়েছে; তথাপি ছন্দের আলোচনায় এগুলিকে এক-এক পংক্তি বলেই গণ্য করব।

ছন্দপংক্তির যে সংজ্ঞা দেওয়া গেল তার ব্যতিক্রমগুলির কথাও এ স্থলে বলা প্রয়োজন। অধিকাংশ ছন্দেই পংক্তির শেষ প্রান্তে পূর্ণবতি স্থাপিত হয়। এর দৃষ্টান্ত পূর্বেই দেওয়া হয়েছে। কিন্তু এমন কতকগুলি ছন্দ আছে যাতে ঈষদ্ব্যতি অর্ধব্যতি ও পূর্ণব্যতির স্থাপনরীতি নিয়মিত ও নির্দিষ্ট নয়; এবং এক ছত্রে

সাজানো ধ্বনিশ্রেণীর শেষ প্রান্তে পূর্ণযতি স্থাপিত হওয়া আবশ্যিক নয়, বরং ওই ধরনের ছন্দে লাইন ও ছত্রের শেষে পূর্ণযতি স্থাপন না করাই ও ছন্দের রীতি। এসব ছন্দে ছত্রের শেষ প্রান্তে পূর্ণযতির পরিবর্তে অর্ধযতি এবং এমন কি ঈষদ্যতিও স্থাপিত হতে পারে; আবার ছত্রের মধ্যেও যে-কোনো পর্বের বা পর্বার্থের পরেই অর্ধযতি বা পূর্ণযতি স্থাপিত হতে পারে। এসব ছন্দে ধ্বনির গতি প্রতি ছত্রের নির্দিষ্ট (বা অনির্দিষ্ট) দৈর্ঘ্যকে অতিক্রম করে ছত্রের পর ছত্রে প্রবাহিত হতে থাকে এবং প্রয়োজন অনুসারে ছত্রের প্রান্তে কিংবা মধ্যেও ধ্বনিগতি বিরত হতে পারে। যেসব ছন্দে এভাবে ছত্রের অন্তে পূর্ণযতি থাকা আবশ্যিক নয় সেসব ছন্দকে আমি বলেছি প্রবাহমান ছন্দ। মাঘের ‘পর্যচয়ে’ রবীন্দ্রনাথ থাকে বলেছেন ‘লাইন-ডিভোনে চাল’, তাকেই আমি বলেছি ‘প্রবাহমানতা’। এই প্রবাহমানতা বা ‘লাইন-ডিভোনে চাল’-টাকেই ফরাসি ভাষায় বলা হয় *enjambement*। ও শব্দটার ইংরেজি রূপ হচ্ছে *enjambment*। যা হক, এই প্রবাহমান ছন্দেও যে ধ্বনিশ্রেণী এক ছত্রে সাজানো থাকে তাকেও আমি ‘পংক্তি’ নামেই অভিহিত করব, কেন না প্রবাহমান ছন্দের ছত্রকে ইচ্ছামত ভেঙে-চুরে দু-তিন সারে সাজিয়ে লেখা চলে না, তাই এসব ছন্দের এক-একটি সার বা ছত্রকে এক-এক ‘পংক্তি’ বলে অভিহিত করলে অর্থের বিভ্রাট ঘটার সম্ভাবনা নেই। সুতরাং প্রবাহমান ছন্দের পংক্তিগুলিকে বলতে পারি প্রবাহমান বা ‘অ-যতিপ্রাস্তিক পংক্তি’ (run-on বা unstopt lines); কিন্তু মনে রাখা দরকার যে, এই প্রবাহমান পংক্তির অন্তে পূর্ণযতি থাকা আবশ্যিক না হলেও একটি করে অর্ধ বা ঈষৎ যতি থাকা প্রয়োজন। আর যেসব ছন্দ প্রবাহমান নয় সেসব ছন্দের পংক্তিগুলিকে শুধু ‘পংক্তি’ বা ‘যতি-প্রাস্তিক পংক্তি’ (end-stopt lines) বলতে পারি।

৪

বাংলা ছন্দকে আমি ধ্বনিব্যাপ্তি বা unit-এর প্রকৃতিভেদে স্বরবৃত্ত, মাত্রাবৃত্ত ও যৌগিক ওরফে অক্ষরবৃত্ত, এই তিনটি প্রধান শ্রেণীতে বিভক্ত করেছি। ছন্দের এই তিন ধারার মধ্যে শুধু যৌগিক ও স্বরবৃত্ত ধারাতেই প্রবাহমান ছন্দোবদ্ধ রচনা করা সম্ভব হয়েছে। তার মধ্যে ৩ শুধু দ্বিপদী অর্থাৎ পয়ার-আতীর ছন্দোবদ্ধকেই প্রবাহমান আকার দেওয়া হয়ে থাকে। ইংরেজিতে যেমন শুধু Iambic pentameter এই প্রবাহমান (run-on) ছন্দোবদ্ধ রচনা

করা যায়, বাংলাতে ভেমনি শুধু যৌগিক ও স্বরবৃত্ত পয়ার বা দ্বিপদীকেই প্রবহমান আকার দেওয়া হয়ে থাকে। বাংলা কাব্যসাহিত্যের অধিকাংশ প্রবহমান ছন্দোবদ্ধ চোন্দ ব্যষ্টির যৌগিক পয়ারেই রচিত হয়েছে। চোন্দ unit বা ব্যষ্টির প্রবহমান যৌগিক পয়ারের দৃষ্টান্তস্বরূপ রবীন্দ্রনাথের 'মেঘদূত' (মানসী), 'বহুঙ্করা' (সোনার তরী), 'স্বর্গ হইতে বিদায়' (চিত্রা) প্রভৃতি কবিতার উল্লেখ করতে পারি। এগুলি হচ্ছে সমিল প্রবহমান যৌগিক পয়ারের দৃষ্টান্ত। যদি এসব প্রবহমান পয়ারের পংক্তিপ্রান্তস্থিত মিলটি উঠিয়ে দেওয়া যায় তা হলেই এ ছন্দোবদ্ধ তথাকথিত 'অমিত্রাক্ষর' ছন্দে পরিণত হবে। অর্থাৎ অমিল প্রবহমান যৌগিক পয়ার আর অমিত্রাক্ষর ছন্দ একই জিনিস। আজ পর্যন্ত বাংলায় বৃত্ত অমিত্রাক্ষর ছন্দ রচিত হয়েছে তার সবই চোন্দ ব্যষ্টির অমিল প্রবহমান যৌগিক পয়ার। আঠারো ব্যষ্টির অমিত্রাক্ষর ছন্দ কেউ রচনা করেন নি। কিন্তু আঠারো ব্যষ্টির যৌগিক পয়ারে অর্থাৎ বর্ধিত যৌগিক পয়ারে অতি সুন্দর সমিল প্রবহমান ছন্দোবদ্ধ রচিত হয়েছে। দৃষ্টান্তস্বরূপ রবীন্দ্রনাথের 'সমুদ্রের প্রতি' (সোনার তরী), 'এবার ফিরাও মোরে' (চিত্রা) প্রভৃতি কবিতার নাম করতে পারি। রবীন্দ্রনাথ যাকে বলেছেন, আঠারো 'অক্ষরের' 'দীর্ঘ পয়ার' বা 'বড়ো পয়ার' তাকেই আমি বলেছি 'বর্ধিত যৌগিক পয়ার'।

স্বরবৃত্ত পয়ারেও প্রবহমান ছন্দোবদ্ধ রচনা করা সম্ভব। চোন্দ স্বরের পয়ারে প্রবহমান ছন্দোবদ্ধ কেউ রচনা করেছেন বলে মনে হয় না। আঠারো স্বরের বর্ধিত পয়ারে প্রবহমানতার দৃষ্টান্তও খুব কম আছে। এ-রকম ছন্দোবদ্ধের দৃষ্টান্তস্বরূপ রবীন্দ্রনাথের 'পুরবী' এবং সত্যেন্দ্রনাথের 'সরযু' (বেলাশেষের গান) এ দুটি কবিতার উল্লেখ করতে পারি। সত্যেন্দ্রনাথের 'ইচ্ছামুক্তি' (বেলাশেষের গান) নামক আঠারো স্বরের স্বরবৃত্ত পয়ারে রচিত সনেটটিতেও প্রবহমানতার আভাস পাই; তাঁর 'কবির তিরোধান' (ঐ) নামক কবিতাটিতেও ও-রকম আভাস আছে। যা হক, এ স্থলে বর্ধিত স্বরবৃত্ত পয়ারের প্রবহমানতার দুটি দৃষ্টান্ত দিচ্ছি।—

- ১। যারা আমার সাক্ষ-সকালের গানের দীপে জালিয়ে দিলে আলো  
আপন হিয়ার পরশ দিয়ে; এই জীবনের সকল সাদা কালো  
ষাদের আলো-ছায়ার লীলা; সেই যে আমার আপন মানুষগুলি  
নিজের প্রাণের স্রোতের 'পরে আমার প্রাণের ঝরনা নিল তুলি;

তাদের সাথে একটি ধারায় মিলিয়ে চলে, সেই তো আমার আয়ু,  
নাই সে কেবল দিনগণনার পাজির পাতায়, নয় সে নিশাসবায়ু।

—পুরবী, পুরবী, রবীন্দ্রনাথ

২। ধাত্মী তুমি সন্নাটেদের ; সরিৎ-স্রোতে সাগর-টেউএর ফেনা  
উথলাতে বল ধরে যারা, তেমন ছেলে পুষলে বারম্বারই  
পীযুষদানে। কবির গানে অমর যারা, যারা সবার চেনা,  
মাগুষ হল তোমার স্নেহে, তারা সবাই জৈত্র-ধনুধারী।

—সরযু, বেলাশেষের গান, সত্যেন্দ্রনাথ

যৌগিক বা স্বরবৃত্ত পয়্যারে রচিত প্রবহমান ছন্দোবন্ধকে বলতে পারি ‘সম-পংক্তিক’ প্রবহমান ছন্দ; কেননা, এজাতীয় ছন্দোবন্ধে প্রতি পংক্তির দৈর্ঘ্য অর্থাৎ ব্যুৎসংখ্যা, চোদ্দ বা আঠারো, কবিতার আদ্যন্ত সর্বত্রই সমান থাকে। কিন্তু দ্বিতীয় আর-এক প্রকার প্রবহমান ছন্দোবন্ধ আছে যাতে প্রতি পংক্তির দৈর্ঘ্যের অর্থাৎ ব্যুৎসংখ্যার সমতা রক্ষিত হয় না। এজাতীয় ছন্দোবন্ধকে বলতে পারি অসমপংক্তিক প্রবহমান ছন্দোবন্ধ। এই অসমপংক্তিক প্রবহমান ছন্দোবন্ধকে আমি মুক্তক নামে অভিহিত করেছি। কেননা এজাতীয় ছন্দোবন্ধে স্থনির্দিষ্টরূপে নিয়মিত যতিস্থাপন, পরিমিত পদগঠন এবং পংক্তিদৈর্ঘ্যের বন্ধন থেকে ছন্দের সম্পূর্ণ মুক্তি ঘটেছে। রবীন্দ্রনাথের ‘বলাকা’র যৌগিক মুক্তক এবং তাঁর ‘পলাতক’র স্বরবৃত্ত মুক্তকের প্রবর্তন হয়েছে, এ কথা সকলেই জানেন। ‘বলাকা’র মুক্তকগুলিতে পংক্তিপ্রান্তে মিল রয়েছে। কাজেই এগুলিকে বলব স মিল মুক্তক। অ-মিল মুক্তকের একমাত্র নিদর্শনরূপে রবীন্দ্রনাথের ‘নিফল কামনা’ নামক কবিতাটির (মানসী) উল্লেখ করা যেতে পারে। সমপংক্তিক ও অসমপংক্তিক প্রবহমান ছন্দের বিশদতর আলোচনা দ্রষ্টব্য ‘জয়ন্তী-উৎসর্গ,’ ৮২-৮২ পৃষ্ঠায়।

৫

পঞ্চম ঐষদৃষ্টি, অর্ধযতি ও পূর্ণযতির সঙ্গে গণ্ডের কমা, সেমিকোলন ও দাঁড়ি বা full stop, এই তিনটি বিরামচিহ্নের যথাক্রমে তুলনা করলেই ওই যতি-তিনটির আসল প্রকৃতিটি বোঝা যাবে। গণ্ডের ন্যায় পঞ্চম ও এই বিরাম-চিহ্ন-তিনটি ব্যবহৃত হয়। কিন্তু মনে রাখা উচিত যে, ওই চিহ্ন-তিনটি শুধু ভাবগত যতিকেই নির্দেশ করে, ছন্দোগত যতিকে নয়। ভাব যথানে বিয়ত

হয়, ছন্দের ধ্বনি সেখানে বিরত নাও হতে পারে ; আবার ছন্দের ধ্বনি যেখানে বিরত হয়েছে, ভাবের প্রবাহ সেখানে স্তব্ধ না হতেও পারে । স্তব্ধতা পড়রচনায় কমা, সেমিকোলন ও দাঁড় বধাক্রমে ঐষদ্যতি, অর্ধদ্যতি ও পূর্ণদ্যতির নির্দেশক নয় । ওই চিহ্ন-তিনটি ভাবগত ঐষদ্যতির, অর্ধদ্যতির ও পূর্ণদ্যতিকে নির্দেশ করে । দৃষ্টান্ত দেওয়া যাক ।—

চিন্তা দিতেম । জলাঞ্জলি, ॥ থাকতো নাকো । স্বরা,

মুহু পদে । যেতেম, যেন ॥ নাইকো মৃত্যু । জরা ।

—সেকাল, কণিকা রবীন্দ্রনাথ

এখানে ভাবের ঐষদ্যতির-সূচক তিনটি কমা চিহ্ন আছে । কিন্তু ওই তিন স্থলে ছন্দের ঐষদ্যতি নেই । প্রথম কমাটি যেখানে আছে সেখানে রয়েছে ছন্দের অর্ধদ্যতি ; আর দ্বিতীয় কমাটির স্থানে ছন্দের পূর্ণদ্যতি রয়েছে ; কিন্তু তৃতীয় কমাটির স্থানে ছন্দে কোনো দ্যতি, এমন কি ঐষদ্যতিও নেই । অথচ যেখানে ছন্দোগত ঐষদ্যতি, অর্ধদ্যতি ও পূর্ণদ্যতি ঘটেছে সেসব স্থলে কমা, সেমিকোলন ইত্যাদি নেই ।

কিন্তু মনে রাখা প্রয়োজন যে, এই কথাগুলি শুধু অপ্রবহমান ছন্দের প্রতিই প্রযোজ্য, প্রবহমান ছন্দের প্রতি নয় । প্রবহমান ছন্দোবন্ধে যেসব স্থলে কমা, সেমিকোলন ইত্যাদি চিহ্ন থাকে সেসব স্থলে অধিকাংশ সময়ই ছন্দোগত কোনো একপ্রকার দ্যতি থাকে । • পংক্তির প্রান্তে কিংবা মধ্যে যে-কোনো স্থলেই দাঁড়ি-চিহ্ন থাকে, পূর্ণদ্যতিও সেখানেই থাকে, সেমিকোলনের দ্বারা পূর্ণদ্যতি বা অর্ধদ্যতি সূচিত হয় ; আর কমা চিহ্ন ঐষদ্যতি বা অর্ধদ্যতিকে নির্দেশ করে । এরূপ হবার কারণ এই যে, প্রবহমান পদ্যছন্দ গদ্যছন্দের অনেকটা কাছাকাছি ও সমধর্মী, এবং সেজন্তেই প্রবহমান ছন্দ ধ্বনিপ্রবাহের সঙ্গে সঙ্গে গদ্যধর্মী ভাবপ্রবাহকেও অনুসরণ করে থাকে । এইজন্তেই মহাকাব্যে, বিশেষতঃ নাট্যকাব্যে, প্রবহমান ছন্দের এত উপযোগিতা । দৃষ্টান্ত দেওয়া নিম্নপ্রয়োজন । পক্ষান্তরে প্রবহমান ছন্দ শুধু গদ্যধর্মী ও ভাবানুসারীই নয়, ধ্বনিপ্রবাহের গতি ও দ্যতি রক্ষা করে চলাও তার পক্ষে অত্যাৱশ্যক । তাই এ ছন্দোবন্ধে কমা-সেমিকোলনে ঐষৎ, অর্ধ বা পূর্ণ দ্যতি থাকা যেমন প্রয়োজন, স্থানবিশেষে ওসব চিহ্ন না থাকলেও বতিস্থাপন আবশ্যক । তবে যেসব স্থলে ভাবগত ও ছন্দোগত দ্যতির সমন্বয় ঘটে, সেসব স্থলে একটু বৈচিত্র্য হয় ।—



বলেছিল 'ভুলিব না', হবে তব ছল-ছল আঁখি  
 নীরবে চাহিল মুখে । ক্ষমা করো যদি ভুলে থাকি ।  
 সে যে বহুদিন হল । সে দিনের চুসনের 'পরে  
 কত নববসন্তের মাধবীমঞ্জরী থরে থরে  
 শুকায় পড়িয়া গেছে ; মধ্যাহ্নে কপোতকাকলি  
 তারি 'পরে ক্লান্ত ঘুম চাপা দিয়ে এল গেল চলি  
 কত দিন ফিরে ফিরে ।

—কৃতজ্ঞ, পূরবী, রবীন্দ্রনাথ

এই আঠারো বাষ্টির যৌগিক প্রবহমান পয়ারটিকে যথারীতি আবৃত্তি করে  
 পড়লেই টের পাওয়া যাবে, ধ্বনিপ্রবাহ ও ভাবপ্রবাহ কেমন চমৎকার ভঙ্গিতে  
 সামঞ্জস্য রক্ষা করে পরস্পর পাশাপাশি চলেছে । ধ্বনিপ্রবাহের গতি ও যতির  
 একটা স্বকীয় ভঙ্গি আছে, অথচ সর্বত্রই সে ভাবের গতি ও যতিকে অনুসরণ করে  
 চলেছে, কোথাও তাকে লঙ্ঘন করে চলছে না । অ-প্রবহমান ছন্দে এমন হয়  
 না ; কেননা, সেখানে ধ্বনিরই প্রাধান্য, ভাব ধ্বনির অনুগামী মাত্র ; কাজেই  
 ধ্বনির গতি ও যতি ভাবের গতি ও যতিকে লঙ্ঘন করে যেতে পারে । একটু পূর্বে  
 'ক্ষণিকা' থেকে যে দৃষ্টান্তটি উদ্ধৃত করেছি তাতেই এ কথা প্রমাণিত হয়েছে ।

৬

এবার বাংলা ছন্দের যতি ও পংক্তি বিভাগগুলির সঙ্গে ইংরেজি ও সংস্কৃত  
 ছন্দের যতি ও পংক্তি বিভাগের তুলনা করা যাক । ইংরেজি ছন্দশাস্ত্রে যতি বা  
 pause এর প্রকারভেদ স্বীকার করা হয় । ওই শাস্ত্রে যতিকে অবস্থিতি অনুসারে  
 প্রান্তবর্তী ( final ) ও মধ্যবর্তী ( internal বা middle ), এই দুই শ্রেণীতে  
 বিভক্ত করা হয় । অপ্রবহমান ইংরেজি ছন্দের পংক্তিপ্রান্তবর্তী যতিটি  
 পূর্ণবিরতি-সূচক বলে ওই অস্থিম যতিটিকে অনেক সময় দীর্ঘ যতি বা strong  
 pause বলে অভিহিত করা হয় । পংক্তিমধ্যবর্তী যতির দ্বারা সমগ্র পংক্তিটি  
 খণ্ডিত হয়ে যায় বলে এই মধ্যযতিটিকে অনেক সময় গ্রীক পরিভাষা অনুসরণ  
 করে ছেদযতি বা caesura বলা হয়ে থাকে । কালব্যাপ্তির দিক্ থেকে এই  
 মধ্যযতি বা ছেদযতিটির বিশেষ কোনো নাম নেই । ধ্বনিপ্রবাহের যে ঈষৎ  
 বিরতির দ্বারা পংক্তিপর্ব গঠিত হয় তারও কোনো নাম নেই, এমন কি তাকে  
 যতি বলে গণ্যই করা হয় না । দৃষ্টান্ত দিচ্ছি ।—

Ring out ! the feud || of rich ! and poor,  
Ring in ! re-dress || to all ! man-kind.

—Tennyson

এটি অম্ব্যাক্ষর দ্বিধ্বর চৌপদিক ( Iambic tetrameter ) ছন্দ । এখানে প্রতি পংক্তির শেষেই একটি করে অন্ত্যযতি আছে ; আর দ্বিতীয় পর্বের পরে রয়েছে মধ্যযতি বা ছেদযতি । প্রথম-দ্বিতীয় কিংবা তৃতীয়-চতুর্থ পর্বের মধ্যে ধ্বনিপ্রবাহের যে ছেদ রয়েছে তাকে ইংরেজিতে যতি বলে গণ্য করা হয় না ; বাংলার পদ্ধতিতে এটিকে আমরা ঈষৎ যতি বা weak pause বলতে পারি । অন্ত্যযতিটিকে কালব্যাপ্তির দিক থেকে দীর্ঘ যতি বা strong pause বলা হয় ; অর্থাৎ এটি হচ্ছে আমাদের কথিত পূর্ণযতির স্থানীয় । কিন্তু মধ্যযতিটিকে কালব্যাপ্তির দিক থেকে কিছু বলা হয় না । আমরা এটিকে কালব্যাপ্তির দিক থেকেও মধ্যযতি ( medial pause ) বলতে পারি, কারণ কালপরিমাণ হিসেবে এটি ঈষদ্যতি ও দীর্ঘযতির মধ্যবর্তী ।

ইংরেজি ছন্দশাস্ত্রে এক-একটি পর্বকে বলা হয়, measure বা ‘প্রমাণ’, কারণ ওই পর্বের দ্বারাই সমগ্র পংক্তিটা ‘প্রমিত’ হয়ে থাকে । বস্তুতঃ ওই পর্বের সাহায্যে পরিমাপ করা হয় বলেই ছন্দের নাম হয়েছে metre । ওই measure বা পর্বেরই আর-একটি নাম হচ্ছে foot অর্থাৎ পদ । কিন্তু লাইনের মধ্যবর্তী ছেদযতির ( caesura ) দ্বারা বিচ্ছিন্ন পংক্তিখণ্ডকে ইংরেজি ছন্দশাস্ত্রে কোনো নাম দেওয়া হয় না । কারণ ইংরেজি ছন্দে ওই ছেদযতিটির অবস্থানের কোনো নির্দিষ্ট রীতি নেই ; এটি পংক্তির মধ্যস্থল কিংবা অন্য যে-কোনো পর্বের মধ্যে কিংবা প্রান্তে স্থাপিত হতে পারে । তাই ছেদযতির দ্বারা বিচ্ছিন্ন পংক্তিখণ্ডের কোনো নির্দিষ্ট আয়তন নেই ; ফলে ছন্দশাস্ত্রে ওরকম পংক্তি-খণ্ডের বিশেষ নামকরণের প্রয়োজনীয়তা অনুভূত হয় না । কিন্তু বাংলার অর্থযতিটির অবস্থান নির্দিষ্ট এবং তাই ওটির দ্বারা বিচ্ছিন্ন পংক্তিখণ্ডটি পরিমিত ও স্থনির্দিষ্ট । বস্তুতঃ ওরকম পংক্তিখণ্ডের দ্বারাই বাংলা ছন্দপংক্তি গঠিত ও প্রমিত হয়ে থাকে ; তাই ওই পংক্তিখণ্ডকে একটি বিশেষ নাম দেওয়া প্রয়োজন । অর্থযতির দ্বারা খণ্ডিত পংক্তিচ্ছেদকে ‘পদ’ বলা হয়েছে । আর তাতেই ছন্দপংক্তিকে ত্রিপদী, চৌপদী প্রভৃতি আখ্যা দেওয়ার সার্বিকতা । বাংলা

ছন্দের আলোচনায় 'পদ'কে measure এবং 'পদ'কে foot বলে ও-দুটি শব্দের পার্থক্য রক্ষা করা বাঞ্ছনীয়।

৭

সংস্কৃত ছন্দশাস্ত্রে এক-একটি শ্লোককে চারটি 'পদ', পাদ বা চরণে বিভক্ত করা হয়। ছন্দশাস্ত্রকার গঙ্গাদাস তাই 'পদ্য চতুষ্পদী' (ছন্দোমঞ্জরী ৩৪), এই কথা বলে গ্রহণরস্ত্র করেছেন। সংস্কৃত ভাষায় পদ বা পাদ শব্দে যেমন 'চরণ' বোঝায়, তেমনি ওই শব্দের দ্বারা কোনো পদার্থের চতুর্থাংশকেও বোঝায়। তাই শ্লোকের পদ বা পাদ বলতে যেমন ছন্দের চরণ বুঝি তেমনি শ্লোকের চতুর্থাংশও বুঝি। বাংলায় 'পদ' শব্দে শ্লোকাংশ বোঝায় বটে, কিন্তু শ্লোকের চতুর্থাংশই বোঝায় না। শুধু তাই নয়, সংস্কৃত ও বাংলা 'পদ' শব্দের পার্থক্য আরও বেশি। বাংলায় 'ছন্দপংক্তি'র যে সংজ্ঞা দিয়েছি, সংস্কৃত ছন্দে 'পদ' শব্দের সেই সংজ্ঞা। অর্থাৎ উভয়ত্রই গতির প্রারম্ভ থেকে পূর্ণ বিরতি পর্যন্ত সমগ্র ধ্বনিশ্রেণীটাকেই বোঝায়। তফাত এই যে, বাংলা ছন্দপংক্তিকে অবস্থাবিশেষে ভেঙে দুই বা ততোধিক ছত্রে সাজিয়ে লেখা চলে; আর সংস্কৃত ছন্দে অবস্থাবিশেষে দুটি পদকে এক ছত্রে লেখা হয়ে থাকে, বিশেষত অষ্টষ্টপ্, ত্রিষ্টপ্ প্রভৃতি যেসব ছন্দে পদের দৈর্ঘ্য বেশি নয়।

সংস্কৃত ছন্দশাস্ত্রে জিহ্বার অভীষ্ট বিরামস্থানকেই 'যতি' বলা হয়। 'যতি-জিহ্বেষ্টবিশ্রামস্থানম্' (ছন্দোমঞ্জরী ১১৮), 'রসজ্ঞাবিরতিস্থানং কবির্ভবিষ্কৃত্যতে' (ঋতবোধ ৪)। কিন্তু কোথায় রসনার বিরতি ঘটবে সে কথা ও বহু ছন্দোবিগ্লেষের সংজ্ঞার মধ্যেই নির্দিষ্ট আছে। সংস্কৃত ছন্দশাস্ত্রে কালব্যাপ্তি অল্প রে যতির প্রকারভেদ স্পষ্টতঃ স্বীকৃত হয় না। কিন্তু সংস্কৃত ছন্দেও যে কালব্যাপ্তি অল্পসারে যতির তারতম্য আছে তার আভাস পাওয়া যায় পিঙ্গলচ্ছন্দহৃত্তম্-এর টীকাকার হলায়ুধের 'টীকায় উদ্গত একটি শ্লোক থেকে। সে শ্লোকটি হচ্ছে এই—

১ বাংলা দেশের প্রচলিত বিশ্বাস অনুসারে পিঙ্গলচ্ছন্দহৃত্তম্-এর টীকাকার হলায়ুধ এবং লক্ষ্মণসেনের (খ্রী ১১৭২-১২০৭) সভাপণ্ডিত ও 'ব্রাহ্মসংঘ' প্রভৃতি গণ্যেব প্রণেতা হলায়ুধ একই ব্যক্তি। কিন্তু আধুনিক পণ্ডিতদের ধারণা অল্প বকম। তাঁদের মতে পিঙ্গলচ্ছন্দহৃত্তম্-এর টীকাকার হলায়ুধ ছিলেন দাক্ষিণাত্যের রাষ্ট্রপুটরাজ তৃতীয় কৃষ্ণের (খ্রী ৮-৬২) সমসাময়িক। এং হলায়ুধ ছিলেন একজন বৈয়াকরণ ও কবি, তাঁর কাব্যের নাম 'কবিরহস্ত'। 'অভিধানরত্নমালা' নামে তাঁর একখানি শব্দকোষও পাওয়া গেছে।

যতি: সর্বত্র পাদান্তে শ্লোকার্থে চ বিশেষত: ।

সমুদ্রাদিপদান্তে চ ব্যক্তাব্যক্তবিভক্তিকে ॥

—পিঙ্গলছন্দসূত্রম্ ৩১:

এই বিধানটি থেকে মনে হয় শ্লোকের, বিশেষত: অমুঠুপ্ ছন্দের, প্রথম পদের পরবর্তী যতিটির চেয়ে দ্বিতীয় পদের পরবর্তী যতিটি অধিকতর স্থায়ী। দৃষ্টান্ত দিচ্ছি। —

মা নিষাদ প্রতীষ্ঠাং ভূম্ । অগম: শাস্তী: সমা: ।

যৎ ক্রৌঞ্চমিথুনাদ্ একম্ । অবধী: কামমোহিতম্ ॥

এই অমুঠুপ্ শ্লোকটির দুটি করে পদ এক লাইনে সাজানো হয়েছে। একটু লক্ষ করলেই টের পাওয়া যাবে যে, প্রথম পদের পরবর্তী যতিটির স্থিতিকাল দ্বিতীয় পদের পরবর্তী যতিটির চেয়ে কম। অর্থাৎ প্রথমটি অর্ধযতি, দ্বিতীয়টি পূর্ণযতি। অমুঠুপ্ ছন্দে পদমধ্যবর্তী যতি অর্থাৎ ছেদযতি নেই। অন্ত্যস্থ সংস্কৃত ছন্দে মধ্যযতি বা ছেদযতির বহুল প্রয়োগ আছে। যথা—

কষ্টৈকাস্তং । সুখমূপনতং । দু:খমেকাস্ততো বা,

নীচৈর্গচ্ছ- । ত্যুপরি চ দশা । চক্রনৈমিক্রমেণ ।

—মেঘদূত, উত্তরমেঘ

এটি হচ্ছে সতেরো ‘অক্ষর’ অর্থাৎ সিলেবল্-এর মন্দাক্রান্তা ছন্দের দুটি পদ। শাস্ত্রানুসারে এ ছন্দের প্রতি পদে যথাক্রমে চার, ছয় এবং সাত অক্ষরের পরে যতি স্থাপিত হয়। উক্ত দৃষ্টান্তের প্রত্যেকটি পদ তিনটি যতির দ্বারা তিন ভাগে বিভক্ত হয়েছে। লক্ষ করলে টের পাওয়া যাবে যে, প্রথম দুটি যতির চেয়ে তৃতীয় যতিটির স্থিতিকাল দীর্ঘতর। অর্থাৎ মধ্য বা ছেদযতি-দুটিকে যদি বলি ‘লঘুযতি’, তবে অন্ত্য যতিটিকে বলতে পারি ‘গুরুযতি’। যা হক, এই যতি-তিনটির দ্বারা বিচ্ছিন্ন পদের বিভাগ-তিনটিকে কি নাম দেওয়া যায়? সংস্কৃত ছন্দোবিৎরা কোনো নাম দেন নি। এক-একটি ছত্রের সমগ্র ধ্বনিশ্রেণীটাকেই যখন পদ বলা হয়েছে তখন ওই বিভাগগুলিকে আর ‘পদ’ বলা সংগত নয়। আমাদের অবলম্বিত পদ্ধতি অনুসারে ওই বিভাগগুলিকে ‘পর্ব’ আখ্যা দিতে পারি। তা হলেই মন্দাক্রান্তা ছন্দের প্রত্যেকটি পদকে ত্রিপর্বক পদ এবং সমগ্র শ্লোকটাকে ত্রিপর্বক চোপদী বলতে পারি। মন্দাক্রান্তা ছন্দে প্রতি পদের পর্বগুলি অক্ষর অর্থাৎ সিলেবল্-সংখ্যা হিসেবে সমান দীর্ঘ নয়; হস্তরাং

এ ছন্দের পদগুলিকে অসমপৰ্বিক পদ বলা যায়। একটা সমপৰ্বিক পদওয়ালা ছন্দের দৃষ্টান্ত দিচ্ছি।—

ঐবাত্তজাভিরাং । মুহুরমুপততি- । শ্রুদনে দন্তদৃষ্টিঃ

পশ্চাৰ্ধেন প্রবিষ্টঃ । শরপতনভয়াদ্ । ভূয়সা পূর্বকায়ম্ ।

—অভিজ্ঞানশকুন্তলম্, প্রথম অঙ্ক

এটি হচ্ছে একুশ 'অক্ষর' বা সিলেবল্-এর শুধুরা ছন্দ। এ ছন্দের পদগুলিও মন্দাক্রান্তার পদের মত ত্রিপৰ্বিক। তবে মন্দাক্রান্তার পদগুলি অসমপৰ্বিক; আর এর পদগুলি সমপৰ্বিক, কেননা এখানে সাত সাত অক্ষরের পর যতি রয়েছে। একটু লক্ষ করলেই বোঝা যাবে যে, মন্দাক্রান্তার অসমান পৰ্বগুলিকে সমান করেই শুধুরা ছন্দের উৎপত্তি হয়েছে। মন্দাক্রান্তার শেষ পৰ্বে আছে সাত অক্ষর, শুধুরাতেও তাই; শুধু তাই নয়, উভয়ত্রই লঘুগুরুবিশেষে ধ্বনিসন্নিবেশলগ্নানী অবিকল একরকম। মন্দাক্রান্তার দ্বিতীয় পৰ্বে আর-একটি লঘুবর্গ বসালেই শুধুরার দ্বিতীয় পৰ্ব তৈরি হয়। মন্দাক্রান্তার প্রথম পৰ্ব ও শুধুরার প্রথম চারটি 'অক্ষর' অবিকল এক জিনিস; বস্তুতঃ মন্দাক্রান্তার প্রথম পৰ্বে একটি লঘু ও দুটি গুরুধ্বনি যোগ করলেই শুধুরার প্রথম পৰ্ব পাওয়া যায়। অতএব দেখা গেল, মন্দাক্রান্তার প্রথম পৰ্বে তিনটি অক্ষর এবং দ্বিতীয় পৰ্বে একটি অক্ষর যোগে তিনটি অসমান পৰ্বকে সমান করেই শুধুরার সৃষ্টি হয়েছে। যা হক, আমাদের অবলম্বিত প্রণালীতে বিশ্লেষণ করলে বলা যায় যে, শুধুরাও মন্দাক্রান্তার মত ত্রিপৰ্বিক চোপদী ছন্দ; শুধু পৰ্বগঠনের মধ্যে কিছু পার্থক্য আছে।\*

৮

ছন্দের বিশ্লেষণপ্রসঙ্গে যতি ও পৰ্বের ব্যবহারবৈচিত্র্য সম্বন্ধে আলোচনা করার বিশেষ প্রয়োজনীয়তা আছে। ইংরেজি ছন্দের প্রতি পংক্তিতে এবং সংস্কৃত ছন্দের প্রতি পদে যতি থাকতেই হবে এমন কোনো নিয়ম নেই; এ-রকম পংক্তি বা পদ যদি হ্রস্ব হয় তবে তা যতিহীন হয়। কিন্তু দীর্ঘ পংক্তি বা পদে এক বা একাধিক মধ্যযতি অর্থাৎ ছেদযতি থাকাই বিধি। পংক্তিপ্রাস্তিক যতি অবশ্য দীর্ঘ হ্রস্ব সকল প্রকার পংক্তি বা পদেই থাকবে। বাংলা ছন্দেও পংক্তিমধ্যযতি

অর্ধঘটি থাকে অবশ্যসম্ভাবী নয়। যদি এক পংক্তিতে দু'এর অধিক পর্ব থাকে তবে দ্বিতীয় পর্বের পর অর্ধঘটি থাকে; যদি পংক্তিতে দুটিমাত্র পর্ব থাকে তবে তাদের মধ্যে একটি ঈষদ্বঘটি থাকে এবং পংক্তিপ্রান্তে থাকে পূর্ণঘটি, অর্ধঘটি কোথাও থাকে না; আর যদি পংক্তিতে একটিমাত্র পর্ব থাকে তবে ঈষদ্বঘটি ও অর্ধঘটি থাকে না, একেবারে প্রান্তিক পূর্ণঘটি থাকে। দৃষ্টান্ত দিচ্ছি।—

১। গগন-তলে

আগুন জলে।

সুতক গায়ে

আতুল গায়ে

যাচ্ছে কারা

রোদ্রে সারা!

—পালকির গান, কুহ ও কেকা, সত্যেন্দ্রনাথ

২। শব্দচিলের। সঙ্গে, যেচে—

পাল্লা দিয়ে। মেঘ চলেছে।

—ঐ ঐ ঐ

৩। মিথ্যে তুমি। গাঁথলে মালা ॥

নবীন ফুলে,

ভেবেছ কি। কণ্ঠে আমার ॥

দেবে তুলে?

—উৎকৃষ্ট, কণিকা, রবীন্দ্রনাথ

প্রথম দৃষ্টান্তটি একপর্বিক, তাই ওতে ঈষদ্বঘটি বা অর্ধঘটি নেই। দ্বিতীয়টি ত্রিপর্বিক; তাই পংক্তিমাধ্যে একটি করে ঈষদ্বঘটি রয়েছে, কিন্তু অর্ধঘটি নেই। তৃতীয়টি ত্রিপর্বিক; এখানে প্রথম পর্বের পরে ঈষদ্বঘটি ও দ্বিতীয় পর্বের পরে অর্ধঘটি রয়েছে। প্রত্যেক দৃষ্টান্তেই পংক্তিপ্রান্তে পূর্ণঘটি রয়েছে।

বাংলা ছন্দের প্রতি পংক্তিতে একটি, দুটি বা তিনটি অর্ধঘটি থাকতে পারে। যেসব পংক্তিতে একটি অর্ধঘটি থাকে তাকেই ত্রিপদী (বা পয়ার) বলা হয়ে থাকে। দুটি অর্ধঘটিওয়ালার পংক্তিকে ত্রিপদী আর তিনটি অর্ধঘটিওয়ালার পংক্তিকে চৌপদী বলা হয়। ত্রিপদী (বা পয়ার), ত্রিপদী ও চৌপদীর দৃষ্টান্ত পূর্বেই দেওয়া হয়েছে। বাংলা ছন্দপংক্তিতে তিনের অধিক অর্ধঘটি থাকতে

পারে না, অর্থাৎ বাংলায় বহুপদী পংক্তি রচনা করা যায় না। হেমচন্দ্র বহুপদী পংক্তি রচনা করেছেন। কিন্তু তাঁর সে প্রয়াস সফল হয়েছে এ কথা বলা যায় না।

ইংরেজি ছন্দের ছেদযতি ( caesura ) পর্বের প্রান্তে বা মধ্যে স্থাপিত হতে পারে। বাংলায় কিন্তু অর্ধযতি সর্বদাই পর্বের প্রান্তে স্থাপিত হয়। পক্ষান্তরে ইংরেজি ও বাংলা উভয় ছন্দেই ঈষদ্যতিটি শব্দের মধ্যেও স্থাপিত হতে পারে অর্থাৎ উভয় ছন্দেই শব্দের মধ্যে পর্ব বিভক্ত হতে পারে। বাংলার দৃষ্টান্ত দিচ্ছি।—

১। বিচ্ছেদও হু। -দীর্ঘ হত, ॥

অশ্রুজলের। নদীর মতো ॥

মন্দগতি। চলত রচি ॥

দীর্ঘ করণ। গাথা।

—সকাল, ক্ষণিকা, রবীন্দ্রনাথ

২। কীতিকে কেউ। ভালো বলে, ॥ মন্দ বলে। কেহ,

বিশ্বাসে কেউ। কাছে আসে, ॥ কেউ করে সন্। -দেহ।

—আশা, পূরবী, রবীন্দ্রনাথ

এখানে ‘হুদীর্ঘ’ ও ‘সন্দেহ’ কথা-দুটিতে শব্দের মধ্যেই পর্ববিভাগ ঘটেছে অর্থাৎ ঈষদ্যতি স্থাপিত হয়েছে। আমাদের প্রাচীন পদাবলী সাহিত্যে এভাবে শব্দের মধ্যে পর্ববিভাগের প্রচলন খুব বেশি ছিল। যা হক, বাংলায় শব্দের মধ্যে পর্ববিভাগ করার অর্থাৎ ঈষদ্যতি স্থাপন করার ব্যবস্থা ঋগ্বেদেও শব্দের মধ্যে পদবিভাগ করার অর্থাৎ অর্ধযতি স্থাপন করার ব্যবস্থা নেই। সংস্কৃত ছন্দে কিন্তু অবস্থাবিশেষে শব্দের মধ্যেও ছেদযতি স্থাপিত হতে পারে।

বাংলা ছন্দের ঈষদ্যতির আর-একটি বিশেষত্ব এই যে, কবি ইচ্ছে করলে এটিকে স্পষ্টতর করে অর্ধযতিতে পরিণত করতে পারেন। কিন্তু এই স্পষ্টতাকে অর্থাৎ ঈষদ্যতির এই পদোন্নতিটিকে কানের কাছে প্রকটিত করার উদ্দেশ্যে একটি করে অধিকতর মিল দিতে হয়। কারণ কানের সম্মতি না পেলে ধ্বনির গতি কিংবা যতি সমস্তই ব্যর্থ হয়। দৃষ্টান্ত দিলেই কথাটা বিশদ হবে।—

১। কোথায় গেছে। সে দিন আজি। যে দিন মম

ভরণ কালে। জীবন ছিল। মুকুলসম ;

সকল শোভা । সকল মধু । গন্ধ বত  
বন্ধোমাঝে । বন্ধ ছিল । বন্দী মতো ।

—উৎকট, ক্ষণিকা, রবীন্দ্রনাথ

২। তোমার তরে । সবাই মোরে । করছে দোষী,  
হে প্রেমসী !

বলছে— কবি । তোমার ছবি । আঁকছে গানে,  
প্রণয়গীতি । গাচ্ছে নিতি । তোমার কানে ;  
নেশায় মেতে । ছন্দে গেঁথে । তুচ্ছ কথা  
ঢাকছে শেষে । বাংলা দেশে । উচ্চ কথা ।

—কতিপূরণ, ক্ষণিকা, রবীন্দ্রনাথ

এ দুটিই স্বরবৃত্ত ত্রিপদিক ছন্দ । কিন্তু প্রথমটির চেয়ে দ্বিতীয়টির পর্ববিভাগগুলিকে তথা ছন্দবর্তিগুলিকে স্পষ্টতর করা কবির অভিপ্রায় । তাই দ্বিতীয়টিতে পর্বে পর্বে একটি অধিক মিলের সমাবেশ হয়েছে । প্রকৃত পক্ষে এটি একপদিক ত্রিপদীর ভঙ্গিতেই রচিত হয়েছে । ইংরেজিতে থাকে line rhyme বলা হয়, এই দ্বিতীয় দৃষ্টান্তের মিলগুলি ঠিক সে প্রকৃতির নয় । আমাদের ত্রিপদী ছন্দোবন্ধে যে রকম মিলের ব্যবস্থা আছে, এ মিলগুলি সেই প্রকৃতির । অর্থাৎ এ দৃষ্টান্তটির আসল রূপ হচ্ছে এই।—

তোমার তরে      সবাই মোরে  
করছে দোষী,  
হে প্রেমসী !  
বলছে— কবি      তোমার ছবি  
আঁকছে গানে,  
প্রণয়গীতি      গাচ্ছে নিতি  
তোমার কানে ।

উপরের দৃষ্টান্ত-দুটির স্বরবৃত্ত ছন্দে রচিত । এ ছন্দের পর্ববিভাগগুলি সর্বদাই খুব স্পষ্ট থাকে ; তাই ঐক্যবর্তির স্থায়িত্বের ভারতম্য খুব বেশি হতে পারে না । কিন্তু ষোড়শিক ছন্দে ঐক্যবর্তিটিকে অস্পষ্টও রাখা যায়, আবার খুব স্পষ্ট করেও তোলা যায়।—



বেণীবন্ধ । তরঙ্গিত ॥ কোন্ ছন্দ । নিয়া,  
স্বর্গবীণা । গুঞ্জরিছে ॥ তাই সন্ধা । -নিয়া ।

—পরিচয় ১৩৩৮ মাঘ, রবীন্দ্রনাথ

এটি চোন্দ ব্যষ্টির যৌগিক পয়ার । এটির প্রতি পংক্তিতে প্রথম ও তৃতীয় পর্বের পর ঈষদ্ব্যতি এবং দ্বিতীয় পর্বের পরে অর্ধদ্ব্যতি রয়েছে । প্রথম ঈষদ্ব্যতিটিকে যদি আরও স্পষ্ট করে তুলে অর্ধদ্ব্যতিতে পরিণত করা যায় তা হলে এটির কি রূপ হবে দেখা যাক ।—

দেখ দ্বিজ ॥ মনসিজ ॥ জিনিয়া য়ু । -রতি,  
পদ্মপত্র ॥ যুগ্মনেত্র ॥ পরশয়ে । শ্রুতি ।  
অহুপম ॥ তরু শ্রাম ॥ নীলোৎপল । আভা  
মুখরুচি ॥ কত শুচি ॥ করিয়াছে । শোভা ।

—মহাভারত, কালীদাস দাস

এখানে প্রথম ঈষদ্ব্যতিটি অর্ধদ্ব্যতিতে এবং প্রথম পর্ব-দুটি দুটি পদে পরিণত হয়েছে । সুতরাং এ ছন্দটিকে ‘ত্রিপদী পয়ার’ বলতে পারি । এ ছন্দের প্রাচীন নাম হচ্ছে ‘তরল পয়ার’ । যদি এ ছন্দের তৃতীয় পর্বের পরবর্তী ঈষদ্ব্যতিটিকেও অর্ধদ্ব্যতির শ্রেণীতে প্রোমোশন দেওয়া যায় তা হলে এ ছন্দের আকৃতি হবে একুপ ।—

কি রূপসী, ॥ অঙ্গে বসি, ॥ অঙ্গ খসি ॥ পড়ে ।  
প্রাণ দহে, ॥ কত সহে, ॥ নাহি রহে ॥ ধড়ে ॥

—বিদ্যাহর, বিরজন রামপ্রসাদ

এটিকে বলতে পারি ‘চৌপদী পয়ার’ । এ ছন্দের প্রাচীন নাম হচ্ছে ‘মালঝাঁপ’ ।

পাঠক হয়তো লক্ষ করে থাকবেন পয়ারের অন্তর্গত ঈষদ্ব্যতিগুলিকে যতই স্পষ্ট করে তোলা হচ্ছে ধ্বনির গতিবেগ ততই খরতর হচ্ছে । এর কারণটি হচ্ছে এই । যৌগিক পয়ারে ধ্বনির সাধারণ গতিক্রম হচ্ছে খুব দীর্ঘ, তাই তার তাল এবং লয় খুব বিলম্বিত । কিন্তু যদি এ ছন্দের ঈষদ্ব্যতিগুলিকে অর্থাৎ পদের ছন্দগুলিকে স্পষ্ট করে তোলা যায় তা হলে ধ্বনির গতিক্রম হ্রস্ব হয়ে পড়ে, তাই তার তাল এবং লয়টাও খুব দ্রুত হয় । সুতরাং যৌগিক পয়ারের ধ্বনিকে যদি গাতীর্থ ও ধীরগতি দান করতে হয় তা হলে তার ঈষদ্ব্যতি ও পর্ববিভাগগুলিকে খুব অস্পষ্ট কিংবা বিলুপ্ত করে দিতে হয় ।

যৌগিক অর্থাৎ তথাকথিত 'অক্ষরবৃত্ত' ছন্দের বিশেষত্বই হচ্ছে এই যে, এ ছন্দে অতি সহজেই পর্ববিভাজক ঈষদৃষতিগুলিকে বিলুপ্ত করে দিয়ে দুটি পর্বকে পরস্পরের সঙ্গে যুক্ত করে দেওয়া যায়। এই তত্ত্বটির উপরেই যৌগিক ছন্দের প্রকৃতি ও বৈশিষ্ট্য অনেকটা নির্ভর করে। সুতরাং এ তত্ত্বটিকে ভালো করে বোঝা দরকার।

যৌগিক ছন্দে, বিশেষতঃ পয়ারে, ধ্বনিবিচ্ছিন্নতার স্বচ্ছন্দতা সম্বন্ধে রবীন্দ্রনাথ বলেছেন—“দুই মাত্রার লয় তার একমাত্র কারণ নয়। পয়ারের পদগুলিতে তার ধ্বনিবিভাগের বৈচিত্র্য একটা মন্ত কথা। ...এই ছেদের বৈচিত্র্য থাকতেই প্রয়োজন হলে সে পদ্য হলেও গানের অবলম্বিত গতি অনেকটা অমুকরণ করতে পারে।” রবীন্দ্রনাথের এ কথা খুবই সত্য। যৌগিক ছন্দের এই ছেদবৈচিত্র্যের হেতু কি তার সন্ধান করা প্রয়োজন। যৌগিক ছন্দের গণ্যপ্রকৃতি ও-ছন্দের একটা মন্ত কথা। এই গণ্যপ্রকৃতির ফলে ও-ছন্দের ধ্বনিগত ব্যবহারে লক্ষ করার মতো করেকটি বৈশিষ্ট্য আছে। প্রথমতঃ, এ ছন্দের প্রত্যেকটি শব্দ (word) সর্বদাই পরবর্তী শব্দ থেকে নিজের পার্থক্য রক্ষা করে চলে, স্বরবৃত্ত ছন্দের মতো দুটি পৃথক শব্দ কখনও পরস্পর সংলগ্ন হয়ে যায় না। শব্দের প্রান্তবর্তী যুগ্মধ্বনির বিল্লিষ্ট উচ্চারণই সে শব্দটিকে পরবর্তী শব্দ থেকে পৃথক করে রাখে। দ্বিতীয়তঃ, যৌগিক ছন্দের উচ্চারণের গণ্যপ্রকৃতি রক্ষার জগ্রে ও-ছন্দে শব্দমধ্যবর্তী যুগ্মধ্বনির উচ্চারণ গণ্যপ্রথায় প্রায় সর্বদাই সংল্লিষ্ট, মাত্রাবৃত্ত ছন্দের ভঙ্গিতে বিল্লিষ্ট হয় না। সুতরাং দেখা গেল যৌগিক ছন্দের প্রত্যেকটি শব্দই গানের ভঙ্গিতে উচ্চারিত হয়। যৌগিক ছন্দের এই গণ্যপ্রকৃতি রক্ষার তৃতীয় প্রণালী হচ্ছে শব্দের মধ্যে ষতিস্থাপন-রিমুক্ততা। আয়তন পূর্বে দেখেছি স্বরবৃত্ত ছন্দে শব্দের মধ্যে অতি সহজেই পর্ববিভাগ অর্থাৎ ঈষদৃষতিস্থাপন চলতে পারে। কিন্তু যৌগিক ছন্দে এমনটি হবার জো নেই। অথচ যৌগিক ছন্দেও স্বরবৃত্তের স্তায় প্রতি পর্বের পরিমাণ হচ্ছে চার ব্যষ্টি। সুতরাং যদি এমন হয় যে, চার ব্যষ্টির একটি পর্ববিভাগ করতে হলে কোনো একটি শব্দের মধ্যেই ঈষদৃষতি বা ছেদ স্থাপন করতে হয় তা হলে ওই ঈষদৃষতিটিকে বিলুপ্ত করে দিয়ে দুটি পর্বকে একত্র জুড়ে একটি মোড়া পর্ব অর্থাৎ যুক্তপর্ব গঠন করতে হবে। কিন্তু যৌগিক ছন্দেও পংক্তিমধ্যবর্তী অর্ধদৃষতি কখনও বিলুপ্ত হয় না। দৃষ্টান্ত দিলেই কথাটি সহজবোধ্য হবে।—

সুরাজনা । নন্দনের ॥ নিকুঞ্জ প্রাঙ্ । -গণে

মন্দার মঞ্জ্ । -জরী তোলে ॥ চঞ্চল কঙ্ । -কণে ।

বেণীবন্ধ । তরঙ্গিত ॥ কোন্ ছন্দ । নিয়া,

স্বর্গবীণা । গুঞ্জরিছে ॥ তাই সন্ধা । -নিয়া ।

এ দৃষ্টান্তটির তৃতীয় পংক্তিতেই যৌগিক পয়ারের প্রকৃত রূপটি স্পষ্টভাবে আছে, অর্থাৎ চার ব্যষ্টির তিনটি পূর্ণপর্ব ও একটি অর্ধপর্ব এবং মধ্যবর্তী ঐষদ্ব্যতিগুলি স্বব্যক্ত রয়েছে। প্রথম পংক্তির দ্বিতীয় ঐষদ্ব্যতিটি শব্দের মধ্যে পড়েছে, এ-রকম শব্দমধ্যবর্তী ঐষদ্ব্যতি যৌগিক ছন্দের প্রকৃতিবিরোধী; তাই এ ছন্দে ওই ঐষদ্ব্যতিকে অস্বীকার করে তৃতীয় ও চতুর্থ পর্বটিকে একটি ষতিবিহীন যুক্তপর্ব বলেই গণ্য করা সংগত। উপরের দৃষ্টান্তটির দ্বিতীয় পংক্তির প্রথম-দ্বিতীয় এবং তৃতীয়-চতুর্থ পর্বকেও তেমনি ষতিহীন যুক্তপর্ব বলেই ধরা উচিত। দুটি পূর্ণপর্ব যুক্ত হলে তাকে 'পূর্ণ যুক্তপর্ব' বা শুধু যুক্তপর্ব বলব; আর, একটি পূর্ণপর্ব ও একটি অর্ধপর্ব যুক্ত হলে তাকে 'খণ্ডিত যুক্তপর্ব' বা সর্ধপর্ব বলা যাবে। কিন্তু মনে রাখা উচিত, বাংলা ছন্দে প্রায় সর্বদাই দুটি পর্বের পরেই অর্ধব্যতি স্থাপিত হয় অর্থাৎ প্রায়শঃই দুই পর্বে একটি পদ গঠিত হয়, বিশেষতঃ যৌগিক ছন্দে। সুতরাং যৌগিক ছন্দের যুক্তপর্ব আর পূর্ণপদ একই জিনিস; আর সার্দপর্বকে 'খণ্ডিত পদ' নামে অভিহিত করতে পারি। সুতরাং পূর্বোদ্ধৃত দৃষ্টান্তটির প্রকৃত রূপ হচ্ছে এই।—

সুরাজনা । নন্দনের ॥ নিকুঞ্জ প্রাঙ্গণে

মন্দার মঞ্জরী তোলে ॥ চঞ্চল কঙ্কণে ।

বেণীবন্ধ । তরঙ্গিত ॥ কোন্ ছন্দ । নিয়া,

স্বর্গবীণা । গুঞ্জরিছে ॥ তাই সন্ধানিয়া ।

অর্থাৎ এখানে প্রথম পংক্তির প্রথম পদে আছে দুটি পূর্ণপর্ব আর দ্বিতীয় পদে একটি সার্দপর্ব; দ্বিতীয় পংক্তির প্রথম পদে একটি যুক্তপর্ব, দ্বিতীয় পদে একটি সার্দপর্ব; তৃতীয় পংক্তির প্রথম পদে দুটি পূর্ণপর্ব, দ্বিতীয় পদে একটি পূর্ণ ও একটি অর্ধ পর্ব; চতুর্থ পংক্তির প্রথম পদে দুটি পূর্ণপর্ব, দ্বিতীয় পদে একটি সার্দপর্ব।

প্রকৃত পক্ষে এই পূর্ণ, অর্ধ, যুক্ত এবং সার্দপর্বের দ্বারাই সমস্ত যৌগিক ছন্দ, অর্থাৎ যৌগিক পয়ার, জিপদী, চৌপদী, প্রবহমান পয়ার, যুক্তক প্রভৃতি সমস্ত

ছন্দোবদ্ধই গঠিত হয়ে থাকে। যৌগিক ছন্দের রচনাপ্রণালীর প্রতি লক্ষ রাখলেই এ কথার সত্যতা বোঝা যাবে। দ্রষ্টব্য জয়ন্তী-উৎসর্গ, পৃ ৮২-৮৩।

সুতরাং দেখা গেল যৌগিক পয়ারের আসল বা বিযুক্ত রূপ হচ্ছে ৪।৪।৪।২ ; আর তার যুক্ত রূপ হচ্ছে ৮।৬। যৌগিক ছন্দের যুক্তপর্ব এবং সার্বপর্ব গঠন করার প্রণালীটাও দেখা দরকার। যুক্তপর্ব গঠিত হতে পারে দু'রকমে—যথা  $৩+৩+২=৮$  অথবা  $২+৪+২=৮$  ; তার মধ্যে প্রথম প্রণালীটাই সাধারণতঃ বেশি চলে। আর সার্বপর্ব গঠনের প্রণালীও দু'রকম—যথা  $৩+৩=৬$  অথবা  $২+৪=৬$  ; এ ক্ষেত্রেও প্রথম প্রণালীটাই বেশি প্রচলিত। সুতরাং যৌগিক পয়ারের যুক্তরূপের বিশ্লেষণ হচ্ছে এই— $৩+৩+২$ । $৩+৩$  অথবা  $২+৪+২$ ।  $২+৪$ । যৌগিক পয়ারের আসল বা বিযুক্ত রূপের দৃষ্টান্ত দিচ্ছি।—

শীর্ণ শাস্ত । সাধু ভব ॥ পুত্রদেয় । ধরে

দাও সবে । গৃহছাড়া ॥ লক্ষ্মীছাড়া । করে ।

—বঙ্গমাতা, চৈতালি, রবীন্দ্রনাথ

যৌগিক পয়ারের সাধারণ যুক্তরূপেরও একটি দৃষ্টান্ত দিচ্ছি।—

পড়েছে তোমার 'পরে ॥ প্রদীপ্ত বাসনা,

অর্ধেক মানবী তুমি ॥ অর্ধেক কল্লনা ।

—মানসী, চৈতালি, রবীন্দ্রনাথ

আমি বলেছি যৌগিক ছন্দের বিযুক্ত পর্বের গঠনবিধি হচ্ছে চার-চার ; আর যুক্তপর্ব গঠনের সাধারণ বিধি হচ্ছে তিন-তিন-দুই। দুই-তিন-তিন কিংবা তিন-দুই-তিন এই পর্বাংশে 'অক্ষর' অর্থাৎ ব্যাষ্টি বিভাগ করা সংগত নয়, তাতে ঐতিকটুতা দোষ ঘটে। তাই মধুসূদনের 'বাড়ায় মাত্র আঁধার' কিংবা 'মাংসর্ষ বিষদর্শন' প্রভৃতি পদগুলি নির্দোষ নয়। (দ্রষ্টব্য জয়ন্তী-উৎসর্গ, পৃ ৭৫)। তার কারণ—

বাড়ায় মা । -ত্র আঁধার

কিংবা মাংসর্ষ বি । -বদর্শন

এভাবে পর্ববিভাগ করলে ঐক্যবোধের উভয় পার্শ্বে একটি করে ব্যাষ্টি থাকে এবং তা কানে ভালো শোনায় না। এ নিয়মটি যে শুধু বাংলাতেই খাটে তা নয়, পিঙ্গলছন্দসুত্র-এর টীকাকার হলায়ুধও এ নিয়মের উল্লেখ করেছেন—

পূর্বোত্তরভাগয়োরে কাক্ষরস্তে দু (পদমধ্যে) ঐতিহ্যভিত্তি,

এবং এই শব্দমধবর্তী পর্ববিভাগদোষের দৃষ্টান্তরূপ এই পংক্তিটি উদ্ধৃত করেছেন—

এতস্তা গ- । ওতলমমলং । গাহতে চন্দ্রকক্ষম্ । —মন্দাক্রান্তা।

চোন্দ্র ব্যাষ্টির যৌগিক পয়ার সম্বন্ধে যে কথাগুলি বলা হল সেসব কথা সাধারণভাবে সমস্ত যৌগিক ছন্দ সম্বন্ধেই খাটে। দৃষ্টান্তযোগে তা এখানে দেখাবার প্রয়োজন নেই। শুধু আঠার ব্যাষ্টির যৌগিক পয়ারের বিশ্লেষণ-প্রণালীটা একটু দেখাব। এ ছন্দের আসল অর্থাৎ বিযুক্ত রূপ হচ্ছে এ-রকম—  
৪।৪॥৪।৪।২ ; আর এ ছন্দের যুক্ত রূপটি হচ্ছে আসলে এ-রকম—৮॥৪।৬ ; কিন্তু কখনও কখনও এটি ৮॥৬।৪-এর আকারও ধারণ করে। এই বর্ধিত পয়ারে দ্বিতীয় পদে প্রথম পর্বের পরে একটা ঈষৎ ছেদ থাকলেই ছন্দের ধ্বনিটা একটু বেশি শ্রুতিমধুর হয়। এ ছন্দের যুক্ত রূপের সাধারণ বিশ্লেষণপ্রণালী হচ্ছে এই—  
৩+৩+২॥৪।৩+৩। চোন্দ্র ব্যাষ্টির যৌগিক পয়ারের অল্প বিশ্লেষণগুলিও এর পক্ষে খাটে। যা হক, এই বর্ধিত যৌগিক পয়ারের আসল বা বিযুক্ত রূপের একটি দৃষ্টান্ত দিচ্ছি।—

হিমাদ্রির । ধ্যানে যাহা ॥ স্তব্ধ হয়ে । ছিল রাজি । দিন

সম্ভবির । দৃষ্টিতলে ॥ বাক্যহীন । স্তব্ধতায় । লীন ।

—পর্যায় : ৩৩৮ মাঘ, রবীন্দ্রনাথ

এ ছন্দেরই যুক্ত রূপেরও একটি দৃষ্টান্ত দিচ্ছি।—

ছিল যা প্রদীপ্তরূপে ॥ নানা ছন্দে । বিচিত্র চকল

আজ অন্ধ । তরঙ্গের ॥ কম্পনে হানিছে । শূন্যতল

—সমুদ্র, পূর্ববী, রবীন্দ্রনাথ

এখানে প্রথম পংক্তিটা এ ছন্দের আসল যুক্ত রূপ এবং এটিই দ্বিতীয় প্রকার যুক্ত রূপের চেয়ে ভালো শোনায়। এ ছন্দের দ্বিতীয় পদের চার-ছয় রূপটিই ছয়-চার রূপের চেয়ে অধিকতর শ্রুতিমধুর। এ কথা বলা অনাবশ্যক যে, এই ছোটো বা বড়ো পয়ারকে যখন প্রবহমান (enjambéd) আকারে রচনা করা যায় তখন এর মধ্যে ঈষৎ, অর্ধ বা পূর্ণ যতি স্থাপনের বহু বৈচিত্র্য ঘটে এবং ফলে পংক্তির অন্তরের গঠনের মধ্যেও নানা প্রকারভেদ দেখা যায়। কিন্তু তথাপি ওই প্রবহমান অবস্থাতেও পূর্বোক্ত বিশ্লেষণপ্রণালী অধিকাংশ স্থলে প্রযোজ্য হয়ে থাকে। রবীন্দ্রনাথের ‘বহুচ্ছরা’ (সোনার তরী) প্রভৃতি চোন্দ্র ব্যাষ্টির ন-মিল

প্রবহমান (enjambéd) পয়ার, 'এবার ফিরাও মোরে' (চিড়া) প্রভৃতি আঠার ব্যষ্টির স-মিল প্রবহমান পয়ার, 'চিড়াঙ্গদা' প্রভৃতি নাট্যকাব্যের চোদ্দ ব্যষ্টির অ-মিল প্রবহমান পয়ার, 'ছবি' ও 'শা-জাহান' (বলাকা) প্রভৃতি স-মিল মুক্তক এবং 'নিফল কামনা' (মানসী) নামক অ-মিল মুক্তক ইত্যাদি কবিতার রচনাপদ্ধতির প্রতি লক্ষ্য করলেই এ কথার সত্যতা প্রতিপন্ন হবে। আঠার ব্যষ্টির অ-মিল প্রবহমান পয়ার এবং অ-মিল মুক্তকের দৃষ্টান্তস্বরূপ বুদ্ধদেবের 'কোনো বন্ধুর প্রতি' ও 'শাপভ্রষ্ট' (বন্দীর বন্দনা) প্রভৃতি কবিতার উল্লেখ করা যায়।

২

বৌগিক অর্থাৎ অক্ষরবৃত্ত ছন্দে পর্বের বিযুক্ত রূপের চেয়ে যুক্ত রূপের ব্যবহার বেশি। এ ছন্দের ধ্বনিগাঙ্গীর্ষ, ধীরবিলম্বিত গতিক্রম এবং গুরুগঙ্গীর বিষয়ের বাহন হবার উপযোগিতা, এ তিনটি বিশেষ গুণের প্রধান কারণই হচ্ছে ওর পর্বের যুক্ত রূপ। যদি এ ছন্দকে লঘু ভাবের বাহন করার প্রয়োজন হয় তবে পর্বগুলির যুক্ত রূপের পরিবর্তে বিযুক্ত রূপের ব্যবহারের দ্বারা এর ধ্বনিটাকে লঘু এবং গতিটাকে দ্রুত করে নেবার প্রয়োজন হয়। রবীন্দ্রনাথ এ কথাটিকেই অন্তর্ভাবে প্রকাশ করেছেন।—

“আট মাত্রকে দুখানা করিয়া চার মাত্রায় ভাগ করা চলে, কিন্তু সেটাতে পয়ারের চাল খাটো হয়। বস্তুত লম্বা নিশ্বাসের মন্দগতি চালেই পয়ারের পদমর্ধাদা।” —সবুজপত্র ১৩২১ শ্রাবণ, পৃ ২২৮।

ভাবটা লঘু না হলেও এ ছন্দে বিযুক্ত পর্বের ব্যবহার চলে; কিন্তু নিরবচ্ছিন্নভাবে শুধু বিযুক্ত পর্বের ব্যবহারে এ ছন্দের চাল খাটো হয়, সে কথা অস্বীকার করা যায় না। পূর্বোদ্ধৃত ‘হরাননা নন্দনের’ ইত্যাদি পংক্তিগুলির প্রতি মনোযোগ দিলেই এ কথার সার্থকতা বোঝা যাবে।

বৌগিক ছন্দে বিযুক্ত পর্বের চেয়ে যুক্ত পর্বের ব্যবহারই বেশি বটে; কিন্তু চতুঃশর স্বরবৃত্ত এবং চতুঃমাত্রক মাত্রাবৃত্ত ছন্দে অর্থাৎ স্বরবৃত্ত পয়ার এবং মাত্রিক পয়ারে যুক্ত পর্বের চেয়ে বিযুক্ত পর্বেরই ব্যবহার বেশি। চতুঃশর এবং চতুঃমাত্রক ছন্দে যুক্ত পর্বের চাল অর্থাৎ ‘লম্বা নিশ্বাসের মন্দগতি চাল’-টা বেশি খাপ খায় না। এক্ষেত্রে এ দুটি ছন্দকে বৌগিক ছন্দের মতো খুব গুরুগঙ্গীর চালের উপযোগী করা যায় না। এ কথা মাত্রাবৃত্তের চেয়েও স্বরবৃত্তের পক্ষে বেশি খাটে। স্বরবৃত্ত

ছন্দের প্রবণতাই হচ্ছে চার-চার স্বরের পরে ঈষদৃষতিকে আশ্রয় করে পর্বে পর্বে বিভক্ত হয়ে পড়ায় প্রতি ; যুক্ত পর্বের চালে এ ছন্দের ধ্বনি যেন পীড়িত হয় । দৃষ্টান্ত—

কর গো হতশ্রী ধরায় ॥ রূপের পূজা । প্রবর্তন ;

কত যুগ আর । চলবে অলীক ॥ পরীর রূপের । শবসাধন ?

—কবর-ই-নূরজাহান, অত্র-আবীর, সত্যেন্দ্রনাথ

বলা বাহুল্য, এটি চতুঃস্বর চৌপবিক ছন্দ । এখানে প্রথম পংক্তির প্রথম পদটি ছাড়া অগ্র সর্বত্রই পর্ববিভাগ অতি স্পষ্ট । কিন্তু ওই প্রথম পদটিতে ‘হতশ্রী’ শব্দের হ-এর পরে ঈষদৃষতি অর্থাৎ পর্ববিভাগের ছেদ থাকার কথা । যৌগিক ছন্দে এমন অবস্থায় ও জায়গায় ঈষদৃষতিটি বিলুপ্ত হয়ে যুক্তপর্বের সৃষ্টি হয় এবং তাতেই ও-ছন্দের বৈশিষ্ট্য ও পদমর্যাদা ; কেননা তাতেই ধ্বনিগাঙ্গীরের সঙ্গে সঙ্গে ভাবও অব্যাহত থাকে । কিন্তু স্বরবৃত্ত ছন্দে ওই জায়গায় ঈষদৃষতি ও পর্ববিভাগের ব্যবস্থা না করলে ধ্বনি পীড়িত হয় ; আবার ওখানে পর্ববিভাগ করলে ভাবটা খণ্ডিত হয়ে যায় । ওই স্বরবৃত্ত পদটার এই সমস্যাটি লক্ষ করার বিষয় ।

চতুর্মাত্রক ছন্দে যুক্ত পর্বের চাল চতুর্বাষ্টক যৌগিক ছন্দের চেয়ে কম সহ্য হলেও চতুঃস্বর স্বরবৃত্তের চেয়ে বেশি সহ্য হয় । চতুর্মাত্রক ছন্দ রচনার সময় তাই খুব বিবেচনার সহিত সামঞ্জস্য রক্ষা করে যুক্ত ও অযুক্ত পর্বের পরিবেশন করতে হয় । মোটের উপর এ ছন্দে যুক্ত পর্বের চেয়ে অযুক্ত পর্বেরই ব্যবহার বেশি, এ কথাটি মনে রাখা প্রয়োজন । একটি দৃষ্টান্ত দিচ্ছি ।—

ললিতগমনা কে গো ॥ তরঙ্গ । -ভঙ্গা !

জয়তু যমুনা জয়, ॥ জয় জয় । গঙ্গা !

... ..

কালীয় নাগের কালো ॥ নির্মোক । পরে কে !

হরজটা । ভুজগেরে ॥ ভুজতটে । ধরে কে !

—যুক্তবেণী, বেলাশেখের গান, সত্যেন্দ্রনাথ

এখানে প্রথম, দ্বিতীয় ও তৃতীয় পংক্তির প্রথম পদটি যুক্তপবিক, কেননা ঈষদৃষতি ও পর্ববিভাগ শব্দের মধ্যে পড়েছে । অগ্র সর্বত্রই পদই বিযুক্তপবিক ।

চতুর্মাত্রক ছন্দ প্রায় সর্ব বিষয়েই চতুর্বাষ্টক যৌগিক ছন্দের অনুরূপ ; যে-যে বাক্যের ধ্বনিবিস্তার যৌগিক ছন্দের প্রকৃতিবিরোধী সেগুলি চতুর্মাত্রক ছন্দেরও

প্রকৃতিবিরোধী। কেবল দুটি বিষয়ে এদের পার্থক্য লক্ষ করা উচিত। প্রথমতঃ, চতুর্মাত্রক ছন্দে শেষ পর্বে অসমসংখ্যক মাত্রা বেশ ভালো শোনায়; উপরের দৃষ্টান্তটিতেই তার প্রমাণ রয়েছে। কিন্তু পনের ব্যষ্টির যৌগিক পয়ার নিত্যস্ত ঐতিকটু হবে। তের বা এগার ব্যষ্টির খণ্ডিত পয়ারও ভালো শোনায় না, কিন্তু তের বা এগার মাত্রার খণ্ডিত পয়ার খুব ঐতিমধুর হয়। দৃষ্টান্ত দিচ্ছি।—

গগনে গরজে মেঘ, ॥ ঘন বরষা,  
কূলে একা। বসে আছি ॥ নাহি ভরসা।

... ...

শুষ্ক নদীর তীরে ॥ রহিল পড়ি',  
যাহা ছিল। নিয়ে গেল ॥ সোনার তরী।

—সোনার তরী, রবীন্দ্রনাথ

এটা চতুর্মাত্রক অপূর্ণ চৌপবিক ছন্দ; প্রতি পংক্তিতে তের মাত্রা (morae) আছে। প্রতি পংক্তির শেষ পদটি এবং প্রথম ও তৃতীয় পংক্তির প্রথম পদটি যুক্তপবিক। যদি তথাকথিত অক্ষরবৃত্ত অর্থাৎ যৌগিক ছন্দে এটি রচিত হত তা হলে তার ঐতিমাদুর্ঘ্য রক্ষা করা সম্ভব হত না। অর্থাৎ অক্ষরসংখ্যা ঠিক রেখে তের অক্ষরের খণ্ডিত পয়ার ভালো শোনাত না। এ দৃষ্টান্তটিতে যুগ্মধ্বনির বিরলতা লক্ষ করার বিষয়। যুগ্মধ্বনির বাহুল্যে এ ছন্দটি কেমন ভরস্কিত হয়ে ওঠে দেখা যাক।—

পথপাশে। মল্লিকা ॥ দাঁড়াল আসি;  
বাতাসে স্ন। -গন্ধের ॥ বাজাল বাঁশ।

... ...

কিংকর। কুসুমের ॥ বসিল সেজে,  
ধরণীর। কিস্কিনী ॥ উঠিল বেজে।

—বরষাত্রা, মহয়া, রবীন্দ্রনাথ

পূর্বের দৃষ্টান্তটির মতো এটিও তের মাত্রার খণ্ডিত পয়ার। এ-রকম তের ব্যষ্টির খণ্ডিত যৌগিক পয়ার রচনা করতে গেলেই দেখা যাবে তাতে ধ্বনির সমতা রক্ষা করা অত্যন্ত কঠিন বা অসম্ভব।

চতুর্ব্যষ্টিক যৌগিক ছন্দের সঙ্গে চতুর্মাত্রক ছন্দের দ্বিতীয় পার্থক্য এই। যৌগিক ছন্দের পদ সাধারণতঃ যুক্তপবিক, বিযুক্তপবিক পদ বিরলতর; আর



মাত্রিক ছন্দের পদ সাধারণতঃ বিযুক্তপবিক, যুক্তপবিক পদ বিরলতর। অর্থাৎ যৌগিক পয়ারের সাধারণ বিজ্ঞেয়রূপ হচ্ছে— ৩+৩+২॥৩+৩; আর চতুর্মাত্রিক পয়ারের সাধারণ রূপ হচ্ছে—৪।৪॥৪।২। তাই যৌগিক পয়ারকে মাত্রিক পয়ারে রূপান্তরিত করতে হলে এই পার্থক্যটির প্রতি লক্ষ করা প্রয়োজন। দৃষ্টান্ত দিচ্ছি।—

নিম্নে যমুনা বহে ॥ স্বচ্ছ শীতল ;  
উর্ধ্বে পাবাতণ্ট, ॥ শ্রাম শিলাতল ।  
মাঝে গহ্বর, তাহে ॥ পশি জলধার  
ছল ছল করতালি ॥ দেয় অনিবার ।

—নিফল উপহার, মানসী, রবীন্দ্রনাথ

এই কবিতাটিতে রবীন্দ্রনাথ যৌগিক পয়ারকে মাত্রিক পয়ারে রূপান্তরিত করতে চেষ্টা করেছিলেন। কিন্তু মাত্রিক পয়ারের চতুর্মাত্রপবিক প্রকৃতিটির প্রতি লক্ষ না থাকাতে তিনি ওই মাত্রিক পয়ারে সন্তুষ্ট হতে পারেন নি। তাই পরবর্তী কালে তিনি এই মাত্রিক পয়ারটিকে যৌগিক আকার দিয়েছিলেন। যথা—

নিম্নে আবর্তিয়া ছুটে ॥ যমুনার জল ;  
ছুই তীরে গিরিতট, ॥ উচ্চ শিলাতল ।  
সংকীর্ণ গুহার পথে ॥ মুছি জলধার  
উন্নত প্রলাপে গর্জি ॥ উঠে অনিবার ।

—নিফল কামনা, কথা ও কাহিনী, রবীন্দ্রনাথ

কিন্তু আমার মনে হয় এরূপ করার প্রয়োজন ছিল না। কেননা, মাত্রাবৃত্ত ছন্দের চতুর্মাত্রপবিক প্রকৃতিটির প্রতি লক্ষ রাখলে মাত্রিক পয়ারের ধ্বনিতেও একটা বৈচিত্র্য ও বৈশিষ্ট্য আনা যায়। ওই ‘নিফল কামনা’ কবিতাটিতেই যেসব স্থলে পর্বগুলির চতুর্মাত্রিক আকার রক্ষিত হয়েছে সেখানে ধ্বনিমধুর অব্যাহতই আছে। যথা—

বরষার । নিঝরে ॥ অক্ষিত । কায়  
ছুই তীরে । গিরিমালা ॥ কতদূর । যায় !  
...                      ...                      ...  
আগ্রহে । যেন তার ॥ শ্রাণ মন । কায়  
একখানি । বাহু হয়ে ॥ ধরিবারে । যায় ।

—মানসী, রবীন্দ্রনাথ

‘এলায়ে জটিল বক্র নিব্বরের বেণী’ (কথা ও কাহিনী), এই যৌগিক পংক্তিটিরও যেমন একটি বৈশিষ্ট্য আছে, ‘বরষার নিব্বরে অঙ্কিত কায়’ এই মাত্ৰিক পংক্তিটিরও তেমনি একটি বৈশিষ্ট্য আছে। আমরা কোনোটিকেই বিসর্জন দিতে ইচ্ছুক নই। পয়ারের যৌগিক ও মাত্ৰিক, এই দ্বিবিধ রূপের প্রতিই আমার কানের আকর্ষণ। সুতরাং রবীন্দ্রনাথের ভাষায় বলতে পারি, ‘বোঁ কর্তব্যো’।

পয়ারের সম্বন্ধে ষাঁ বলা হল, খণ্ডিত পয়ারের সম্বন্ধেও তা খাটে। দৃষ্টান্ত দিচ্ছি।—

হেথা কেন । দাঁড়ায়েছ, । কবি,

যেন কাষ্ঠপুস্তল । -ছবি ?

... ..

প্রাস্তি লুকাতে চাও । আসে,

কণ্ঠ শুক হয়ে । আসে ।

—কবির প্রতি নিবেদন, মানসী, রবীন্দ্রনাথ

এটি হচ্ছে দশ মাত্রার খণ্ডিত মাত্ৰিক পয়ার, চার মাত্রার একটি পর্ব খণ্ডিত হয়েছে। কিন্তু উদ্যত দৃষ্টান্তটিতে খণ্ডিত মাত্ৰিক পয়ার রচনার চেষ্টা সফল হয় নি; এই পংক্তিগুলির ধ্বনি কানের দ্বারা সমর্থিত হচ্ছে না। তার কারণ এই—যেসব স্থলে যুগ্মধ্বনির ব্যবহার হয়েছে সেখানেই পর্বগুলি যুক্ত আকার ধারণ করেছে, অথচ এ ছন্দে যুক্ত পর্বের চেয়ে বিযুক্ত পর্বেরই প্রাধান্য। ‘কণ্ঠ শুক হয়ে’ পদটিতে দুটি পর্ব এমন ভাবে যুক্ত হয়েছে যে, শব্দের মধ্যেও পর্ববিভাগ করা সম্ভব নয়। ‘যেন কাষ্ঠপুস্তল’ পদটিতে ধ্বনিসমাবেশ হচ্ছে দুই-তিন-তিন এই পর্যায়ে, অথচ যৌগিক বা মাত্ৰিক কোনো পয়ারেই এই পর্যায় স্বীকৃত হয় না। তাই এই পংক্তি-ক’টির ধ্বনি কানকে খুশি করতে পারছে না। কিন্তু যদি এই বাধাগুলিকে পরিহার করা যায় তবে বেশ সুন্দর খণ্ডিত মাত্ৰিক পয়ার রচনা করা সম্ভব, এ কথা রবীন্দ্রনাথের পরবর্তী কালের রচনা থেকেই প্রমাণিত হয়েছে।—

সুন্দরী । ওগো শুক । -তারা,

রাজি না । যেতে এসো । তূর্ণ ।

অপ্নে যে । বাগী হল । সারা

জাগরণে । করো তারে । পূর্ণ ।

—শুকতারা, মহা, রবীন্দ্রনাথ

খণ্ডিত মাত্রিক পয়ারের স্থায় পূর্ণ মাত্রিক পয়ারও পরবর্তী কালেই রবীন্দ্রনাথের হাতে পরিণতি লাভ করেছে। এ স্থলে একটি দৃষ্টান্ত দিচ্ছি। 'মানসী'র যুগেই কি করে তার স্তব্ধপাত হয়েছিল তা আগেই দেখানো হয়েছে।—

আমি তব । জীবনের ॥ লক্ষ্য তো । নহি,  
ভুলিতে ভুলিতে যাবে, ॥ হে চিরবিরহী ।

... ...

মার্জনা । করো যদি ॥ পাবে তবে । বল,  
করণা করিলে নাহি ॥ ঘোচে আঁখি । -জল ।

—দায়নোচন. মহায়া, রবীন্দ্রনাথ

এখানে যুক্তপর্বিক পদ রয়েছে মাত্র দুটি। আর যেসব স্থলে যুগ্মধ্বনি আছে সেসব স্থলের পদগুলি বিযুক্ত আছে। তাই এই মাত্রিক পয়ারটির ধ্বনি কোথাও ব্যাহত হয় নি। মাঘের 'পরিচয়ে' রবীন্দ্রনাথের রচিত চতুর্ভাষিক ছন্দের একটি অতি সুন্দর নিদর্শন আছে। এখানে গ্রেটি থেকেও কয়েকটি পংক্তি উদ্ধৃত করে দিচ্ছি।—

চম্পক । তরু মোরে ॥ প্রিয় সখা । জানে যে,  
গন্ধের । ইজিতে ॥ কাছে তাই । টানে যে ।  
মধুসর । -বান্ধিত ॥ নন্দিত । সহকার  
মুকুলিত । নতশাখে ॥ মুখে চাহে । কহ কার ।

... ...

পুষ্পচয়িনী বধু ॥ করুণ । -কণিতা,  
অকথিতা । বাণী তার ॥ কার সুরে । ধ্বনিতা ॥

—মাঘের আবাস

এটি হচ্ছে মাত্রাবৃত্ত চৌপর্বিক বা ত্রিপদী ছন্দ। এই পংক্তি-ক'টির সবগুলি পদই বিযুক্তপর্বিক ; কেবল পঞ্চম পংক্তির প্রথম পদটি যুক্তপর্বিক।

মাত্রিক পয়ার বা ত্রিপদী সম্বন্ধে যে কথাগুলি বলা হল মাত্রিক ত্রিপদী সম্বন্ধেও সেগুলি অবিকল খাটে। এ স্থলে আমি আট মাত্রার দীর্ঘ ত্রিপদীর কথাই বলছি, ছ মাত্রার লঘু ত্রিপদীর কথা নয়। দৃষ্টান্ত দেওয়া যাক।—

তোমারে ঘেরিয়া ফেলি ॥

কোথা সেই করে কোঁল ॥

কল্পনা, মুক্ত পবন ?

বহিরা নৃতন প্রাণ ॥

বহিরা পড়ে না গান ॥

উর্ধ্বনয়ন এ ভুবনে ।

—কবির প্রতি নিবেদন. মানসী, রবীন্দ্রনাথ

এখানে ষৌগিক ত্রিপদীকে মাত্রিক আকারে রূপান্তরিত করার চেষ্টা রয়েছে । তাই মাত্রাবৃত্তের চতুর্মাত্রপর্বিক প্রকৃতিটির প্রতি লক্ষ্য দেখা যায় না ; ষৌগিক ত্রিপদীর ভঙ্গিতেই সর্বত্র যুক্তপর্বিক পদের ব্যবহার হয়েছে । কিন্তু এটা মাত্রাবৃত্তের প্রকৃতিবিরোধী । সেজন্যেই এই পংক্তি-ক'টিতে মাত্রাবৃত্তের ঠিক ধ্বনিটি ধরা পড়ে নি । এর ধ্বনিটা কানকে সন্তুষ্ট করতে পারছে না । তাই রবীন্দ্রনাথ ষৌগিক ত্রিপদীকে মাত্রিক আকৃতিতে রূপান্তরিত করার প্রয়াস ত্যাগ করেছিলেন । কিন্তু পরবর্তী কালে যখন মাত্রাবৃত্তের বিযুক্তপর্বিক প্রকৃতিটি তাঁর কাছে ধরা পড়ল তখন তিনি মাত্রিক ত্রিপদী ছন্দে অতি সুন্দর কবিতা রচনা করেছেন । এ বিষয়ে অধিকতর আলোচনা করার স্থান এটা নয় । তাই এ স্থলে শুধু দু-একটি দৃষ্টান্ত দিয়েই এ প্রসঙ্গ সমাপ্ত করছি ।—

১। ইন্দ্রিতে সংগীতে

নৃত্যের ভঙ্গীতে

নিখিল তরঙ্গিত উৎসবে যে ।

—বরযাত্রা, মহা, রবীন্দ্রনাথ

২। এনেছি বসন্তের

অঞ্জলি গন্ধের,

পলাশের কুসুম, টাঙ্গিনীর চন্দন ।

... ...

তব আখিপল্লবে

দিয়ো আঁকি বল্লভে

গগনের নবনীল স্বপনের অঙ্গন ।

—বৃক্ষমঙ্গল, প্রবাসী ১৩৩১ ভা.৩, রবীন্দ্রনাথ

## বাংলা ছন্দের ধ্বনি ও মাত্রা

ছন্দ রচনা একটি ধ্বনিশিল্প। কি কি উপায়ে ধ্বনিকে কাজে লাগানো যায় তার উপরেই ছন্দের প্রকৃতি নির্ভর করে। আর ধ্বনির মূল্য নির্ণয়ের বিভিন্ন পদ্ধতি থেকেই ছন্দের বিভিন্ন ধারার উৎপত্তি হয়। সংস্কৃত ছন্দশাস্ত্রেও তাই দেখা যায় প্রথমেই ধ্বনির মূল্য বা পরিমাণ নির্ণয়ের ব্যবস্থা করা হয়েছে। বিশেষ লক্ষ করার বিষয় এই যে, আমাদের প্রাচীন ছন্দশাস্ত্রকাররা ধ্বনির পরিমাণ নির্ণয় উপলক্ষে শুধু স্বরধ্বনিরই পরিমাপ করেছেন, ব্যঞ্জনধ্বনিকে গণ্য করেন নি। যেমন, নদী শব্দের ঙ্গে-কেই তাঁরা গুরু বা দ্বিমাত্রক বলে গণ্য করেছেন : দ্-কে তাঁরা গ্রাহ্য করেন নি। তাতে ধ্বনি নির্ণয়ের কোনো ব্যাঘাত হয় না। কেননা দ্ আর ঙ্গে যুগপৎ উচ্চারিত হচ্ছে ; সুতরাং ঙ্গে উচ্চারণের যা মূল্য দী উচ্চারণেরও সেই মূল্য। আর-একটি দৃষ্টান্ত ধরা যাক। যেমন দিব্য এবং দীপ। সংস্কৃত শাস্ত্রমতে দিব্য শব্দের ই-কার গুরু বা দ্বিমাত্রক, কেননা ই-কারের পরে ব্য এই যুক্তবর্ণটি রয়েছে। আর দীপ শব্দের ঙ্গে তো গুরু বা দ্বিমাত্রক বটেই, কেননা এটি স্বভাবদীর্ঘ। সুতরাং সংস্কৃত শাস্ত্রমতে দিব্য শব্দের ই এবং দীপ শব্দের ঙ্গে ধ্বনিপরিমাণের মর্যাদায় সমান। কিন্তু এখানে স্বভাবতঃই একটি প্রশ্ন মনে আসে, আমরা দিব্য শব্দের ই-কে দীর্ঘ করে অর্থাৎ দীপ শব্দের দীর্ঘ ঙ্গে-র সমান করে উচ্চারণ করি কি না ; শিলা এবং দীক্ষা শব্দে ই এবং ঙ্গে উচ্চারণে সমান কি না। যদি দিব্য এবং দীপ শব্দের ই এবং ঙ্গে উচ্চারণে সমান না হয় তবে প্রাচীন ছন্দশাস্ত্রকাররা ধ্বনির পরিমাণে এদের সমান মর্যাদা দিলেন কিরূপে ? এ প্রশ্নের একটি উত্তর এই হতে পারে, দিব্য শব্দের ই উচ্চারণের আকারে হ্রস্বই বটে, কিন্তু পরবর্তী যুক্তবর্ণ ব্য-এর অন্তর্গত হসন্ত ব্যঞ্জনটির ভার পড়াতে ই-কারের গুরুত্ব অর্থাৎ ওজনবৃদ্ধি হয়েছে। কিন্তু এই উত্তরটিও সন্তোষজনক মনে হয় না। কেননা দিব্য শব্দের ই-কার উচ্চারণের আকারে হ্রস্বই আছে অথচ আর-একটি ব্যঞ্জনের ভার বহন করতে হচ্ছে বলে এর গুরুত্ব বা ওজনবৃদ্ধি হল কিরূপে, তা স্পষ্ট বোঝা যায় না। আমরা মনে করি দীপ শব্দের ঙ্গে এবং দিব্য শব্দের ই-র মধ্যে তুলনা ঘটানোই ঠিক নয়। আমার মনে হয় দীপ শব্দের ঙ্গে এবং দিব্য শব্দের ইব্, এ দুটি ধ্বনির পরিমাণ বা গুরুত্ব সমান অর্থাৎ

ঈ এবং ইব্ এ দুটি ধ্বনির উচ্চারণকাল সমান এ কথা বললেই ঠিক হয়। কেননা দুটি একজাতীয় ব্রহ্ম ধ্বনির ( ব্রহ্ম ই ) যোগেই ঈ-র উৎপত্তি হয়, আর ইব্ও হচ্ছে দুটি স্বতন্ত্র ধ্বনির সমবায়। সুতরাং এদের উচ্চারণকাল সমান এ কথা বলা যেতে পারে।

কিন্তু এ স্থলেই বলা সংগত, এই যে উচ্চারণকালের কথা বলা হ'ল সে কাল হচ্ছে একটা conventional বা রূঢ় কাল। কারণ ঈ এবং ইব্ উচ্চারণ করতে বস্তুতঃই সমান কাল লাগে কি না, এ দুটি ধ্বনির উচ্চারণের আয়তন সকলের মুখেই সমান হবে কি না, এ সব প্রশ্ন উঠতে পারে। কিন্তু কাল কথাটিকে conventional বা রূঢ় অর্থে ব্যবহার করলে ওসব প্রশ্ন আর উঠতেই পারবে না। কেননা কাল কথাটির রূঢ়ার্থই হচ্ছে এই যে, ঈ এবং ইব্-কে যে যেভাবেই উচ্চারণ করুক না কেন, ছন্দে ও-দুটি ধ্বনির উচ্চারণকাল সমান বলেই গ্রাহ্য হয়ে থাকে। আর সে কারণেই ছন্দের বিচারে দীপ এবং দীপ্ত শব্দের ঈ এবং ঈপ্-কেও সমমাত্রক অর্থাৎ সমকালব্যাপী বলেই গ্রহণ করা হয়; ঈ এবং ঈপ্-এর উচ্চারণকালের মধ্যে কোনো পার্থক্য স্বীকার করা হয় না।

যা হক, আমরা দেখলুম যে, সংস্কৃত শাস্ত্রের পদ্ধতিতে নদী শব্দের অ-কে এক মাত্রা এবং ঈ-কে দু মাত্রা বলেই ধরা হয়। কিন্তু ন-কে এক মাত্রা এবং দী-কে দু মাত্রা ধরলেও ক্ষতি নেই। আমরা আমাদের আলোচনায় এই দ্বিতীয় প্রণালীই অবলম্বন করব। আর দিব্য শব্দের ই এবং দীপ ও দীপ্ত এই উভয় শব্দের ঈ, এই তিনটি ধ্বনি সংস্কৃত প্রণায় সমমাত্রক বা সমকালব্যাপী। আমাদের অবলম্বিত প্রণালীতে আমরা বলব, ওই তিনটি শব্দের দিব্, দী এবং দীপ্ এই তিনটি ধ্বনি সমকালব্যাপী বা সমমাত্রক।

এখন দেখা যাক বাংলা ছন্দের ধ্বনিবিচারে এই প্রণালী কতখানি প্রযোজ্য। বাংলা ভাষায় স্বরবর্ণ অর্থাৎ স্বরধ্বনি কি কি বিভিন্ন অবস্থায় অবস্থিত থাকে সেটাই আগে আলোচনা করা প্রয়োজন। এ কথা সকলেই জানে যে, বাংলায় কার্যতঃ দীর্ঘ স্বর নেই এবং কোনো বাংলা ছন্দই স্বাভাবিক ভাবে স্বরবর্ণের দীর্ঘতাকে স্বীকার করে না। অবশ্য কোনো কোনো অবস্থাবিশেষে বাংলা ছন্দেও স্বরবর্ণ কদাচিৎ দীর্ঘতা লাভ করে; কিন্তু সেটা সাধারণ নিয়ম নয়, সাধারণ নিয়মের ব্যতিক্রম মাত্র। বাংলায় স্বরবর্ণের স্বাভাবিক দীর্ঘতা না থাকলেও গুরুতা আছে প্রচুর পরিমাণেই। স্বরবর্ণের দীর্ঘতা ও গুরুতার মধ্যে পার্থক্য কি,

তা বোঝা প্রয়োজন। আ, ঈ, উ প্রভৃতি দীর্ঘ স্বরের স্বরূপ কি, তা সকলেই জানে এবং এসব বর্ণের উচ্চারণদীর্ঘতাই সংস্কৃত ছন্দের মাদুর্ঘ্যের একটি মূল কারণ। কিন্তু এই স্বভাবদীর্ঘ স্বরবর্ণগুলি বাংলায় তাদের প্রকৃতিগত ধ্বনিরূপটিকে বিসর্জন দিয়ে হ্রস্ব লাভ করেছে; এইজন্যই বাংলায় সংস্কৃত ছন্দের ধ্বনিমাদুর্ঘ্য অব্যাহত রাখা সম্ভব নয়। সংস্কৃত ছন্দে স্বরের দীর্ঘতা যেমন আছে, গুরুতাও তেমনি আছে। দীর্ঘ স্বর তো গুরু বলে গণ্য হয়ই; তা ছাড়া পরে যদি অমুস্বার, বিসর্গ এবং সংযুক্ত বর্ণ থাকে তবে তৎপূর্ববর্তী হ্রস্ব স্বরটিও গুরু লাভ করে। একটি দৃষ্টান্ত দিচ্ছি।—

।      ×      × × × । ।  
কশ্চিৎ কাস্ত্যাবিরহগুরুণা স্বাধিকারপ্রমত্তঃ

এখানে ঢেরা (×)-চিহ্নিত স্বরগুলি স্বভাবতঃই দীর্ঘ, তাই গুরুও বটে। কিন্তু দণ্ড (।)-চিহ্নিত তিনটি স্বর স্বভাবতঃ হ্রস্ব হলেও এ স্থলে যুক্তবর্ণের পূর্বে অবস্থিত আছে বলে গুরুত্ব অর্জন করেছে। তেমনি ‘প্রমত্তঃ’ শব্দের অন্ত্য অকারটিকে পরবর্তী বিসর্গের ভার বহন করতে হচ্ছে বলে এটিও গুরুত্ব লাভ করেছে। ‘কাস্ত্য’ শব্দের দ্বিতীয় অকারটি স্বভাবদীর্ঘ, অতএব গুরু; কিন্তু প্রথম অকারটি স্বভাবতঃ দীর্ঘ তো বটেই, সংযুক্তপূর্বও বটে। অতএব এটি উভয় কারণেই গুরু। তাই ছন্দশাস্ত্রকার নিয়ম করেছেন—

সাহস্বারশ্চ দীর্ঘশ্চ বিসর্গী চ গুরুত্বং

বর্ণঃ সংযোগপূর্বশ্চ ।

—গঙ্গাদাস, ছন্দোমঞ্জরী ১১১

বাংলায় স্বরবর্ণের গুরুত্বের ষথার্থ প্রকৃতি বুঝতে হলে উদ্ভূত ৩ টি বিধানটির আনও বিশ্লেষণ করা প্রয়োজন। দৃষ্টান্তের সাহায্য নিয়েই বোঝাবার চেষ্টা করছি। পূর্বোক্ত ‘কশ্চিৎ’ শব্দের অ-কারটি ‘বর্ণঃ সংযোগপূর্বঃ’ বলে গুরু হয়েছে; কিন্তু উদ্ভূত বিধানমতে ‘চিৎ’-এর ই-কারটিকে লঘু ধরব, না গুরু ধরব? শাস্ত্রকার বলবেন পরবর্তী ‘কাস্ত্য’ শব্দের ক-কারের সঙ্গে ষাও ৭-কে সংযুক্ত বলে গণ্য করে ইকারকে গুরু বলে ধরতে হবে; সংস্কৃত ভাষায় অসংযুক্ত হ্রস্ব বর্ণ প্রায় স্বীকৃত হয় না, বিশেষতঃ বাক্যের মধ্যস্থলে। এটা না হয় মেনে নেওয়া গেল। কিন্তু—

×  
১। দিঙ্নাগানান্ । পথি পরিহরন্ । স্থণ্ণ-স্তাবলোপান্ ।

×  
২। রঘুণামময়ং বক্ষ্যে । তল্লাবগ্-বিভবোহপি সন্ ।

এ ছ জায়গায় পরিহরন্-এর অন্ত্য অকার এবং সন্-এর অকারকে লঘু বলব, না গুরু বলব ? উভয় শব্দের পরেই যতি রয়েছে, স্ততরাং ন্-কে পরবর্তী বর্ণের সঙ্গে যুক্ত করার উপায় নেই। অথচ স্পষ্টই দেখতে পাওয়া যাচ্ছে উভয় জায়গাতেই ছন্দের নিয়ম অনুসারে অকারকে গুরু বলে ধরা হয়েছে। সংস্কৃত কাব্য থেকে এ-রকম অসংখ্য দৃষ্টান্ত দেওয়া যেতে পারে। স্ততরাং দেখা গেল হসন্ত বর্ণ পরে থাকলেও পূর্ববর্তী হ্রস্ব স্বর গুরু বলে গণ্য হয়ে থাকে। ছন্দশাস্ত্রকার পিন্ধাচার্য কিন্তু সংযোগান্ত, সাহস্বার, উয়াস্ত (অর্থাৎ বিসর্গান্ত) বর্ণের ত্রায় ব্যঞ্জনান্ত বর্ণকেও গুরু সংজ্ঞা দিয়েছেন ( ছন্দঃসূত্রম্ ১।৭ )।

কিন্তু আসল কথা এই যে, ব্যঞ্জনান্ত স্বরবর্ণকে যদি গুরু বলে স্বীকার করা যায় তবে সংযোগ, অহস্বার ও বিসর্গের যোগে গুরুত্ব বিধানের কোনো প্রয়োজনীয়তা আর থাকে না, কারণ ওই তিনটি ব্যাপারের মূলেও ওই হসন্ত ব্যঞ্জনের কথাই রয়েছে। যথা—কচ্চিৎ, এই শব্দের অকারকে যুক্তান্ত আর ইকারকে ব্যঞ্জনান্ত বলার কোনো মার্থকতা নেই। কারণ ওই কথাটি আসলে কচ্চিৎ; স্ততরাং অকার ও ইকার উভয়ই ব্যঞ্জনান্ত বলেই গুরু, এই গুরুত্ব বিধানের জন্য কোনো ছুটি ব্যঞ্জনের সংযুক্ত হওয়ার কোনো আবশ্যিকতা নেই। একথা ভুলে যাওয়া উচিত নয় যে, ভারতীয় লিপিপদ্ধতিতে সংযুক্ত বর্ণের আবির্ভাব একটা আকস্মিক ব্যাপার, আবশ্যিক নয়। ধরনির রাজ্যে যুক্তাক্ষর বলে কোনো একটা বিশেষ ব্যাপার নেই; আছে শুধু ব্যঞ্জনান্ত ধরনির অস্তিত্ব। ছন্দশাস্ত্র ধরনিবিজ্ঞানেরই একটা বিশেষ প্রকাশ; স্ততরাং ছন্দের আলোচনা শুধু ধরনির দিক থেকেই হওয়া উচিত, ধরনিপ্রতীক অর্থাৎ বর্ণলিপির চাক্ষুষ রূপের দ্বারা ওই আলোচনাকে বিকল করা সংগত নয়। ধরনিবিজ্ঞান বা ছন্দশাস্ত্রের আলোচনায় সংযুক্তাক্ষর প্রভৃতি সংজ্ঞা অবৈজ্ঞানিক, স্ততরাং বর্জনীয়। আমরা চিরার্জিত চোখের অভ্যাসবশতঃই ভ্রম করে ছন্দের আলোচনায় যুক্তবর্ণ প্রভৃতি সংজ্ঞা ব্যবহার করে থাকি। তবেই দেখতে পাচ্ছি স্বরবর্ণের গুরুত্ব বিবয়ে যুক্তবর্ণের কোনো প্রভাব নেই, আছে যুক্তবর্ণের অন্তর্ভুক্ত হসন্ত বর্ণের প্রভাব। কচ্চিৎ শব্দে অকারের গুরুত্ব হয়েছে ক্-এর কৃপায় নয়, শ্-এর কৃপায়; তেমনি খণ্ড-ই ইকারকে গুরুত্ব দান করেছে।

ঠিক এই একই কারণে অহস্বার ও বিসর্গের পূর্বস্থিত হ্রস্ব স্বরকেও গুরু বলে গণ্য করা হয়। কারণটি হচ্ছে এই যে, অহস্বার ও বিসর্গ উভয়ই আসলে



এক-একটি হসন্ত বর্ণের রূপান্তর মাত্র। বিসর্গ তো প্রকৃত পক্ষে হসন্ত হ্-এর থেকে অভিন্ন। কাজেই প্রমত্তঃ আর প্রমত্তহ্ একই কথা ধ্বনির দিক থেকে ; সুতরাং এখানেও অন্ত্য অকার ব্যঞ্জনান্ত বলেই গুরু। অল্পস্বরকেও একটি হসন্ত বর্ণের সমান বলেই ধরা উচিত এবং প্রকৃত পক্ষে অনেক স্থলে অল্পস্বরকে হসন্ত বর্ণে রূপান্তরিতও করা যায় ; যথা পংক্তি ও পঙক্তি, সংখ্যা ও সঙ্খ্যা একই কথা ; বঙ্, অঙ্ লেখার দৃষ্টান্তও পাওয়া যায় ; আর বাংলা ও বাঙলা তো আমাদের অতি পরিচিত। বিসর্গের রূপান্তরের দৃষ্টান্তও অভাব নেই। দুখ্‌ই বলা যাক, আর দুখ্‌ই বলা যাক, বিসর্গও হসন্ত ব্যঞ্জনের তুল্যমূল্য তাতে সন্দেহ থাকে না ; আর সন্ধির স্বত্র অল্পস্বরে বিসর্গ যে অবস্থাবিশেষে শ্, ষ্, বা স্ তে পরিণত হতে পারে তা পাঠশালার বালকরাও জানে।

সুতরাং ছন্দে স্বরবর্ণের গুরুত্ববিষয়ে সংস্কৃত শাস্ত্রকারদের বিধানের নিষ্কর্ষ হচ্ছে এই। দীর্ঘ স্বর তো গুরু বলে গণ্য হবেই, হ্রস্ব স্বরের পরে যদি হসন্ত বর্ণ থাকে তবে সেই হ্রস্ব স্বরও গুরুত্ব প্রাপ্ত হবে এবং এ ক্ষেত্রে বিসর্গ আর অল্পস্বরকেও হসন্ত বর্ণ বলেই গণ্য করতে হবে।

এখানে আর-একটি কথা বুঝে রাখা দরকার। কেউ প্রশ্ন করতে পারেন কশিৎ, চঞ্চল, বহ্নন্ প্রভৃতি শব্দে আদি স্বরের এবং অন্ত্য স্বরের গুরুত্ব কি সম্পূর্ণ সমান, তাদের গুরুত্বের মধ্যে কি কিছুমাত্র তারতম্য নেই? অর্থাৎ এই তিনটি শব্দে স্বরবর্ণের ব্যবধানের অভাবে দুটি করে ব্যঞ্জনধ্বনির মধ্যে যে সংঘাত উপস্থিত হয়েছে তার কি কোনো মূল্য নেই? এর উত্তর হচ্ছে এই যে, এ স্থলে স্বরব্যবধানের অভাবে যে ব্যঞ্জনধ্বনির সংঘাত উপস্থিত হয়েছে তার যথেষ্ট মূল্য আছে, কারণ ওই সংঘাতের ফলে যথেষ্ট ধ্বনিবৈচিত্র্যের সৃষ্টি হয়েছে ও তাতেই শ্রুতিমধুর উৎপন্ন হয়েছে ; কিন্তু এই ধ্বনিসংঘাতের ফলে তৎপূর্ববর্তী স্বরবর্ণগুলির গুরুত্বলাভের পক্ষে কিছুমাত্র অতিরিক্ত সহায়তা হয় নি। অর্থাৎ চঞ্চল শব্দের আদি ও অন্ত্য অকারের গুরুত্ব সম্পূর্ণ সমান ; তবে অস্তিত্বিত হসন্ত লকার একক থাকতে ও পরবর্তী কোনো ব্যঞ্জনের সঙ্গে সংহত হতে না পারাতে ঙ্-এর মতো ধ্বনিবৈচিত্র্য সৃষ্টি করতে পারে নি, এই মাত্র পার্থক্য।

এই প্রসঙ্গেই আর-একটি প্রশ্নের আলোচনা করা প্রয়োজন। সংস্কৃত ছন্দশাস্ত্র-মতে লঘু স্বরকে একমাত্রক এবং গুরু স্বরকে দ্বিমাত্রক বলে ধরা হয়। যথা—

।  
মা কুরু । ধনজন । -ঘোবন । -গর্বম্

এখানে প্রতি পংক্তিতে চারটি করে মাত্রা আছে। দ্বিতীয় ছেদে চারটিই লঘু মাত্রা, প্রথম ছেদে একটি স্বভাবগুরু ও দুটি লঘু, চতুর্থ ছেদে দুটি হ্রস্ব স্বর ব্যঞ্জনান্ত বলে গুরুত্ব অর্থাৎ দ্বিমাত্রকত্ব লাভ করেছে। তৃতীয় পর্বের ঔকারটিকেও দ্বিমাত্রক বলে গণ্য করা হয়েছে। কিন্তু কেন? ঔকার তো স্বভাবদীর্ঘ স্বর নয়, অর্থাৎ কোনো একটি মৌলিক স্বরকে দ্বিগুণ বা দীর্ঘ করে ঔকার হয় না, কারণ ঔ হচ্ছে আসলে অউ, অ আর উ এই দুটি ভিন্নজাতীয় স্বতন্ত্র স্বরের সংযোগে উৎপন্ন যুগ্মস্বর বা diphthong। দুটি স্বজাতীয় হ্রস্ব স্বরের যোগে তজ্জাতীয় একটি দীর্ঘ স্বর উৎপন্ন হয়। যথা—ই+ই=ঐ, উ+উ=ঊ। কিন্তু ঐ=অ+ই, ঔ=অ+উ। দুটি ভিন্নজাতীয় স্বরের সংযোগে উৎপন্ন স্বরকে দীর্ঘস্বর বলা যায় না, বলা যায় যুগ্মস্বর বা diphthong। কিন্তু ‘ঐ’ কিংবা ‘ঔ’-কে যুগ্মস্বর বলা যায় না। কারণ এ-কার অ এবং ই-র যোগে উৎপন্ন দ্বিরূপাকারপ্রকৃতি-সম্পন্ন স্বর নয়, এটি অ এবং ই-র মিশ্রণে উৎপন্ন একটি সম্পূর্ণ নতুন স্বর, তেমনি ঔ-কারও অ এবং উ-র মিশ্রণে উৎপন্ন নতুন স্বর। এ এবং ঔ উভয়ই স্বভাব-দীর্ঘ। কিন্তু ঐ এবং ঔ উচ্চারণ করলেই এদের অই্ এবং অউ্, এই যুগ্মস্বর বা দ্বিরূপাকার প্রকৃতি ধরা পড়ে যায়। অথচ এরা অ-ই কিংবা অ-উ, একরূপ স্বতন্ত্রোচ্চারিত দুটি ভিন্ন স্বরের একত্র সমাবেশমাত্রও নয়, তাই ঐ এবং ঔ -কে যুগ্মস্বর বা জোড়াস্বর বলে অভিহিত করলুম। কারণ এখানে দুটি স্বতন্ত্র স্বর পরস্পরের সঙ্গে ঘনিষ্ঠভাবে সংলগ্ন হয়ে আছে, অথচ এ-কার এবং ঔ-কারের মতো কেউ কারও মধ্যে বিলীন হয়ে যায় নি।

যা হক, দেখতে পাচ্ছি সংস্কৃত ছন্দে ঐ এবং ঔ দ্বিমাত্রক অর্থাৎ গুরু স্বর বলে গণ্য হয়েছে। এর ভিতরকার তত্ত্বটা একটু লক্ষ করা যাক। অউ্ এবং অই্ অর্থাৎ ঔ এবং ঐ, এই জোড়াস্বরগুলির অন্তরে যে দুটি করে স্বর আছে তারা স্বতন্ত্র নয়, একটি আর-একটির উপর নির্ভর করছে। এখানে পূর্বস্থিত স্বরটি সম্পূর্ণ উচ্চারিত হচ্ছে, এটি হচ্ছে আশ্রয়দাতা; আর পরস্থিত স্বরটি অর্ধোচ্চারিত মাত্র হচ্ছে, এটি আশ্রিত স্বর। এই আশ্রিত স্বরটির উচ্চারণের সমস্তটা ঝুঁকি নিতে হচ্ছে পূর্ববর্তী আশ্রয়দাতা স্বরটিকে এবং পরবর্তী স্বরটির সমস্ত ভার বহন করতে হচ্ছে বলেই এটির গুরুত্ব। অই্, অউ্, এখানে ই্ এবং উ্ অকারের উপরে সম্পূর্ণ নির্ভর করছে বলেই অকারটির গুরুত্ব হয়েছে।

আমরা পূর্বে দেখেছি, হ্রস্ব ব্যঞ্জন ( অহ্রস্বার-বিসর্গও তারই শামিল ) বর্ণকে



এখানেও দেড় মাত্রা ধরা সংগত নয় ; কারণ এখানে অকারকে গুরু বলেই ধরি আর সমস্তটাকে একটি যুগ্মধ্বনি বলেই গণ্য করি, উভয়তঃই এখানে দু মাত্রাই গণনা করতে হবে ; নতুবা গর্বম্ শব্দে চার মাত্রা ধরা সম্ভব হত না । আসল কথা এই যে, অনাপ্রতিত হসন্ত বর্ণের উচ্চারণও সম্ভব নয়, তার মাত্রা হিসাব করাও অযৌক্তিক ।

বাংলা ছন্দের আলোচনায় যুগ্ম ধ্বনি সম্বন্ধে আরও দু একটি কথা বলা প্রয়োজন । ঈ, উ প্রভৃতি দীর্ঘ ধ্বনি এবং ঐ, ঔ, অৱ, অং, অঃ প্রভৃতি যুগ্ম ধ্বনির ব্যবহারগত একটা পার্থক্য আছে যা ছন্দের মাদুর্ঘ্যবিচারে উপেক্ষণীয় নয় । দীর্ঘ ধ্বনিগুলি হচ্ছে ধ্বনির বিস্তৃত রূপ ; ওদের ভিতরকার কথাটি হচ্ছে দ্বিত্ব, কারণ ঈ, উ প্রভৃতিকে দ্বিগুনীকৃত করেই ওদের উদ্ভব । কাজেই ঈ, উ প্রভৃতি দীর্ঘ স্বরগুলি উচ্চারণ করলেই ধ্বনির এমনি একটি বিস্তৃত রূপের আবির্ভাব হয় যা কানে সংগীতের সুরমাধুর্যের আভাস দিতে থাকে , এজন্যই সংস্কৃত ছন্দে দীর্ঘ স্বরগুলির সাহায্যে প্রীতি পদেই আমাদের চিরপরিচিত ও চিরপ্রিয় দরাজ আওয়াজের উদ্ভব হতে থাকে । কিন্তু বাংলা ভাষায় দীর্ঘ স্বরগুলি দ্বিত্বপ্রকৃতি হারিয়ে ফেলে হ্রস্ব লাভ করেছে বলে বাংলা ছন্দে ওই দরাজ আওয়াজের সাক্ষাৎ মেলে না । পক্ষান্তরে যুগ্মধ্বনিগুলি ধ্বনির বিস্তৃত রূপ নয়, এরা ধ্বনিসংহতি মাত্র ; এদের আওয়াজ দরাজ নয়, কিন্তু সে আওয়াজে বৈচিত্র্য আছে এবং এদের শেবাংশস্থিত আলাগা ধ্বনিগুলি পরবর্তী ধ্বনির গায়ে আঘাত করে যে ঝংকারের সৃষ্টি করে তার মাদুর্ঘ্য কম নয় । যথা—ফাল্গুন, ফুলবন, মন্থর্ ইত্যাদি শব্দে হসন্ত বর্ণের ধ্বনি পরবর্তী ধ্বনির উপরে আঘাত করে চমৎকার একটি ঝংকারের ও বৈচিত্র্যের সৃষ্টি করে , তা ছাড়া হসন্ত বর্ণগুলি উচ্চারণ করার সময় পূর্ববর্তী স্বরের উপরে খুব খানিকটা ঝাঁক পড়ে এবং ওই ঝাঁকের ফলে স্বরধ্বনিটা তরঙ্গিত হয়ে ওঠে । এক কথায় দীর্ঘ স্বরের আওয়াজ দীর্ঘায়ত ও দরাজ আর যুগ্মধ্বনির আওয়াজ বিচিত্র, ঝংকৃত ও তরঙ্গিত , ছন্দের ক্ষেত্রে এদের কারও মর্যাদা কম নয় ।

সংস্কৃত ভাষায় দীর্ঘ ধ্বনির ব্যবহার প্রচুর, ব্যঞ্জনাস্তিক যুগ্মধ্বনিও যথেষ্ট আছে ; কিন্তু ঐ এবং ঔ ব্যতীত স্বরাস্তিক যুগ্মধ্বনি নেই । পক্ষান্তরে বাংলায় দীর্ঘ অর্থাৎ দ্বিগুনীকৃত ধ্বনি প্রায় নেই বললেই হয়, অস্ততঃ ছন্দ ব্যবহারের কার্যে দীর্ঘ ধ্বনির প্রয়োগ খুবই কম । বাংলায় হসন্ত বর্ণের বহুল প্রয়োগহেতু ব্যঞ্জনাস্তিক যুগ্মধ্বনির খুব প্রাচুর্য ; এর একটি প্রধান কারণ এই যে, সংস্কৃত

যেসব শব্দের অকার্যস্বত্ব উচ্চারণ, বাংলায় সেসব শব্দ হসন্তাস্ত হয়ে গেছে। যথা—ফল, জল ইত্যাদি। এর আর-একটি কারণ বাংলায় পদাস্তাস্থিত হসন্ত বর্ণ পরবর্তী স্বরবর্ণের সঙ্গেও 'সংযুক্ত'ই হয়, তাতে বিলীন হয়ে যায় না। দৃষ্টান্ত দিচ্ছি।—

তারূ রূপ্ । তাত্ দীন্ । ক্রত্রেব্ । দক্ষিণ্ ।

মূর্তির্ । কব্ আজ্ । কব্ জয়্ । গান্ ।

—জয়ধ্বনি, ভারতী ১৩২৫ বৈশাখ, সত্যেন্দ্রনাথ

এখানে এতগুলি হসন্ত বর্ণের সমাবেশ হয়েছে যা সংস্কৃত ভাষায় কখনও পাওয়া সম্ভব নয়। এখানে তিনটি মাত্র যুক্তবর্ণ আছে; বাকি সবগুলিই হসন্ত আকারে আছে, পরবর্তী বর্ণে যুক্ত করে দেওয়া হয় নি। এখানে বিশেষভাবে লক্ষ করার বিষয় 'কব্ আজ্' কথা দুটি; সংস্কৃত আইন অনুসারে এ-দুটি কথা দাঁড়াত 'করাজ্' এই আকারে। কিন্তু বাংলায় এর প্রকৃত রূপ হচ্ছে 'ক'অ'জ্'। স্বরবর্ণের মাধ্যম রেফ চিহ্ন দেওয়াতে বিস্থিত হবার কারণ নেই; সংস্কৃতেও তার নজির আছে, যথা—নৈঋত্, নৈয়ত্ নয়। বাংলা ছন্দের হসন্ত বর্ণ যে পরবর্তী স্বরবর্ণে বিলীন হয়ে যায় না, একটু লক্ষ রেখে পড়লেই বাংলা সাহিত্যে তার অসংখ্য দৃষ্টান্ত মিলবে। আর-একটি দৃষ্টান্ত দিচ্ছি।—

তরুণী আশারে । সঙ্গী কব্ ।

আজ্ আবার, । মন্ রে মন্ ।

—প্রণাম, বেলাশেবের গান, সত্যেন্দ্রনাথ

এখানেও তৃতীয় পর্বে হসন্ত জ্ পরবর্তী আকারের সঙ্গে মিলিত হয়ে যায় নি।

কিন্তু সংস্কৃত ভাষার সঙ্গে বাংলা ভাষার সব চেয়ে বড় পার্থক্য (অবশ্য ছন্দবিচারের তরফ থেকে) হচ্ছে এই যে, সংস্কৃত ভাষায় ঐ আর ও ছাড়া স্বরাস্তিক যুগ্মধ্বনি নেই, আর বাংলা ভাষায় যুগ্মস্বরের সংখ্যা বহু। যথা—অই, অউ, অও, আই, আউ, আও ইত্যাদি। তার প্রমাণ বই, বউ, লও, যাই, লাউ, খাও ইত্যাদি। খাটি বাংলায় স্বরসন্ধির ব্যবস্থা নেই বলে এসব যুগ্মস্বর বাংলা ছন্দে এমন একটি তরঙ্গায়িত লীলার সৃষ্টি করে যার সাক্ষাৎ সংস্কৃত ছন্দে খুব কমই পাওয়া যায়।

আগিয়া, মাগিয়া । লও আশিস্, ।

গাও নবীন । ছন্দে গান ।

—প্রণাম, বেলাশেবের গান, সত্যেন্দ্রনাথ

এখানে দ্বিতীয় ও তৃতীয় পর্বে ( লঙ্ আশিস্, গাঙ্ নবীন্ ) অঙ্ এবং আঙ্ এ দুটি যুগ্মস্বর যে ধ্বনিতরঙ্গের সৃষ্টি করেছে তার সঙ্গে তাল রাখতে পারে এমন যুগ্মস্বর সংস্কৃতে মাত্র দুটি, ঐ আর ঔ । 'লঙ্ আশিস্' কথার সঙ্গে তাল রাখতে পারে 'যৌবনম্' ; কিন্তু সংস্কৃত বিধান অনুসারে যদি 'লঙ্ আশিস্' কথা-দুটির মধ্যে সন্ধি হয়ে যেত, তবে বাংলা ভাষা তার একটি বিশেষত্ব থেকে বঞ্চিত হত । বাংলা 'ছন্দে গান'-এর সঙ্গে সংস্কৃত 'ছন্দ-বিৎ' পাল্লা দিতে পারেন ; কিন্তু বাংলার যুগ্মস্বরের সঙ্গে পাল্লা দিতে পারে সংস্কৃত ভাষার এমন শক্তি নেই । যুগ্মধ্বনির প্রাচুর্যবিষয়ে বাংলার সঙ্গে ইংরেজির তুলনা চলতে পারে । ইংরেজি উচ্চারণে যে accent বা ঝাঁক থাকে তার সঙ্গে এই যুগ্মধ্বনিবাহুল্যের একটা নিকট সম্বন্ধ আছে । সন্ধান করলে প্রাকৃত বা চলতি বাংলায় যুগ্মধ্বনিবাহুল্যের মূলেও ওই accent বা উচ্চারণের ঝাঁকেরই সাক্ষাৎ পাওয়া যায় । আর এই-জন্যই বাংলা স্বরবৃত্ত ছন্দ এবং ইংরেজি ছন্দের মধ্যে কতকটা সাদৃশ্য দেখা যায় ।

## বাংলা ছন্দের শ্রেণীবিভাগ

সমস্ত বৈজ্ঞানিক আলোচনাতেই পারিভাষিক শব্দগুলির একটা বিশেষ নির্দিষ্ট অর্থ থাকে এবং আলোচনার আগাগোড়া সর্বত্রই ওই নির্দিষ্ট অর্থটিকে বজায় রাখা চাই। পারিভাষিক শব্দগুলির অর্থ যদি নির্দিষ্ট এবং সর্বত্র সমান না থাকে তবে অনেক সময়েই অর্থবিভ্রাট ঘটানো সম্ভব। মাঘের 'পরিচয়ে' রবীন্দ্রনাথের 'ছন্দের হসন্ত-হলন্ত' প্রবন্ধটি পড়ে পারিভাষিক শব্দগুলির অর্থ সম্বন্ধে কিছু সংশয় থেকে যায়। একটা দৃষ্টান্ত দিচ্ছি। উক্ত প্রবন্ধে তিনি 'যুক্ত অক্ষর', 'যুগ্মধ্বনি', 'যুগ্মস্বর' এবং 'যুগ্মবর্ণ'—এই চারটি শব্দকে একই অর্থে ব্যবহার করেছেন। আমি কিন্তু এ শব্দ-চারটিকে এক অর্থে ব্যবহার করি নে। যুক্তাক্ষর এবং যুগ্মবর্ণ এক হতে পারে, কিন্তু যুক্তাক্ষর এবং যুগ্মধ্বনি এক জিনিস নয়। যেমন 'প্রতি' শব্দের 'প্র' যুক্তাক্ষর বটে, কিন্তু যুগ্মধ্বনি নয়। 'ছন্দ' শব্দের 'ন্দ'-কে যুক্তাক্ষর বলব, কিন্তু যুগ্মধ্বনি বলব না। 'ছন্দ' শব্দে যে যুগ্মধ্বনি আছে সেটা আমার পরিভাষায় 'ন্দ'-এর মধ্যে নয়, 'ছন্'-এর মধ্যে; 'ছন্দ' শব্দের 'ছন্' যুগ্মধ্বনি, 'দ' অযুগ্ম ধ্বনি। এ বিষয়ে অত্র বিস্তৃত আলোচনা করেছি; এ স্থলে অধিকতর আলোচনা নিম্নয়োজন। যুগ্মধ্বনি এবং যুগ্মস্বরও সম্পূর্ণরূপে এক জিনিস নয়। যুগ্মস্বরমাত্রকেই যুগ্মধ্বনি বলতে পারি; কিন্তু যুগ্মধ্বনিমাত্রকেই যুগ্মস্বর বলতে পারি নে। পূর্বোক্ত 'ছন্দ' শব্দের 'ছন্' যুগ্মধ্বনি বটে, কিন্তু যুগ্মস্বর নয়। যেসব যুগ্মধ্বনির অন্তর্গত আশ্রিতা ও আশ্রিত উভয়ই স্বরবর্ণ সেসব যুগ্মধ্বনিকেই যুগ্মস্বর বা diphthong বলেছি। যেমন—অই, আই, অউ, আউ, ইউ, এউ, অও, আও, এও, ইত্যাদি যুগ্মধ্বনিগুলিকে যুগ্মস্বরও বলতে পারি; কেননা এখানে অ, আ, ই, এ, এই আশ্রিতা ধ্বনিগুলিও স্বর এবং ই, উ, ও, এই আশ্রিত ধ্বনিগুলিও স্বর।

ছন্দের আলোচনায় আমি 'অক্ষর' শব্দটিকে বর্জন করতে চাই। কারণ ছন্দ তো অক্ষর নিয়ে কারবার করে না; অক্ষর যে ধ্বনির প্রতীক, ছন্দের কারবার সেই ধ্বনিটাকে নিয়ে, অক্ষরটাকে নিয়ে নয়। তা ছাড়া ভারতবর্ষীয় লিপিশব্দভিত্তি অক্ষরগুলি সব সময় ষথার্থরূপে ধ্বনির প্রতিনিধিত্ব করে না। কারণ এক-একটি অযুক্ত অক্ষর অনেক সময়েই এক-একটি অযুগ্ম ধ্বনি বা সিলেবল-এর

প্রতিনিধি হলেও এক-একটি যুক্তাক্ষরকে কখনও এক-একটি যুগ্মধ্বনির প্রতিনিধি বলা যায় না। যেমন ‘প্রতি’ শব্দের ‘প্র’ এবং ‘ছন্দ’ শব্দের ‘ন্দ’ যুক্তাক্ষর বটে, কিন্তু যুগ্মধ্বনি নয়। পক্ষান্তরে ‘ছন্দ’ শব্দের ‘হন্’-কে যুগ্মধ্বনি বলব, কিন্তু যুক্তাক্ষর বলা যায় না। এজ্ঞাত্রে আমি বিশেষভাবে যুক্তাক্ষর, যুক্তবর্ণ প্রভৃতি শব্দকে ছন্দের আলোচনা থেকে সম্পূর্ণরূপে বর্জন করার পক্ষপাতী। আর এজ্ঞাত্রেই সংস্কৃত ছন্দের আলোচনাতেও আমি সংস্কৃত ছন্দশাস্ত্রকারদের থেকে একটু পৃথক্ প্রণালী অবলম্বন করতে চাই। যেমন, ‘কশ্চিংকাস্তা’ কথাটাকে সংস্কৃত ছন্দশাস্ত্রমতে বিশ্লেষণ করা হয় এ ভাবে—ক-শ্চি-ংকা-স্তা; কারণ সংস্কৃত ছন্দশাস্ত্রে সংযুক্তাক্ষর কথাটার ব্যবহার আছে, যুগ্মধ্বনি কথাটির ব্যবহার নেই। কিন্তু আমি ওই জিনিসটাকে বিশ্লেষণ করতে চাই এভাবে—কশ্-চিং-কান্-তা; কারণ আমি যুক্তাক্ষর কথাটি ব্যবহারের বিরোধী এবং যুগ্মধ্বনি শব্দটি ব্যবহারের পক্ষপাতী।

পূর্বেই বলেছি ‘অক্ষর’ শব্দটিকেই ছন্দের আলোচনায় ব্যবহার করা উচিত নয়। কিন্তু বাংলা ছন্দের আলোচনায় ‘অক্ষর’ শব্দটা এত বেশি প্রচলিত হয়ে গেছে যে, ও শব্দটাকে সম্পূর্ণরূপে বর্জন করা কঠিন। যা হক, বাংলা ছন্দের আলোচনায় ও শব্দটাকে যদি ব্যবহার করতেই হয় তবে এই শব্দটার প্রকৃত অর্থ সম্বন্ধে সব সময়েই সচেতন থাকা প্রয়োজন। অক্ষর শব্দটার তিনটি অর্থ আছে। এর বৈয়াকরণিক অর্থ বর্ণমালার বর্ণ অর্থাৎ letter। সংস্কৃত ছন্দশাস্ত্রে অক্ষর শব্দে এক-একটি পূর্ণ ধ্বনি বা syllable বোঝায়। কিন্তু বাংলা ছন্দের আলোচনায় ‘অক্ষর’ শব্দের অর্থের স্থিরতা নেই; বাংলা ছন্দে অক্ষর শব্দ দ্বারা কখনও letter, কখনও syllable বোঝায়। যেমন—বিদ্যাং, মহৎ শব্দ বাংলা ছন্দে তিন অক্ষরের শব্দ; প্রথম দুটি অক্ষরে দুটি সিলেবল্ ( বি, দ্যা এবং ম, হ ) বোঝাচ্ছে, কিন্তু তৃতীয় অক্ষরটি একটি letter ( থঙ-ং ) বোঝাচ্ছে। কিন্তু সংস্কৃত ছন্দশাস্ত্রে ও-দুটি দুই অক্ষর অর্থাৎ দুই সিলেবল্-এর বেশি মর্গদ্বা পাবে না, যদিও মাত্রা হিসেবে বিদ্যাং শব্দে চার মাত্রা এবং মহৎ শব্দে তিন মাত্রা। তেমনি পুণ্যবান্, শক্তিমান্ প্রভৃতি শব্দ সংস্কৃত ছন্দে তিন অক্ষর বলে গণ্য হলেও বাংলা ছন্দে এগুলি চার অক্ষরের শব্দ বলেই গৃহীত হয়, কারণ হসন্ত ন্-কেও বাংলা ছন্দের প্রচলিত হিসাবে এক অক্ষর বলেই ধরা হয়। বাংলার প্রচলিত অর্থে ‘মুকিল’ শব্দে তিন অক্ষর বটে; কিন্তু যদি লিখি ‘মুশকিল’ তা হলে চার অক্ষর বলল ধরা হবে। যা হক, অক্ষর শব্দের পারিভাষিক অর্থ নিয়ে এ স্থলে



আর-অধিক আলোচনা করার প্রয়োজন নেই।

ছন্দের 'আলোচনায়' 'মাত্রা' কথাটির ব্যবহার সম্বন্ধেও একটু সতর্ক হওয়া প্রয়োজন। কারণ সংগীতের পরিভাষায় মাত্রা শব্দটি যে অর্থে ব্যবহৃত হয় ছন্দশাস্ত্রে মাত্রা কথাটি অবিকল সে অর্থে ব্যবহৃত হয় না। সংগীতে সর্বত্রই এবং সর্বদাই ধ্বনিপরিমাণ (quantity) নিখুঁতভাবে অক্ষর রাখতে হয়, অর্থাৎ সংগীত জিনিসটা সর্বদাই quantitative বা মাত্রিক; কাজেই সংগীতে, ধ্বনিপরিমাণের unit বা ব্যাপ্তিও সর্বদাই quantitative। আর ধ্বনিপরিমাণ বা quantityর যে unit তারই পারিভাষিক নাম 'মাত্রা'। সুতরাং সংগীতের unit বা ব্যাপ্তিকে সর্বদাই 'মাত্রা' বলা চলে। কিন্তু ছন্দ আর সংগীত এক জিনিস নয়। ছন্দমাত্রই মুখ্যতঃ ধ্বনিপরিমাণের ভিত্তির উপরে প্রতিষ্ঠিত নয় অর্থাৎ সমস্ত ছন্দই quantitative নয়। এমন অনেক ছন্দ আছে যা গোণতঃ quantitative হলেও ধ্বনিপরিমাণ বা quantity যার মুখ্য বা মূল কথা নয়।

ইংরেজি ছন্দগুলি আসলে quantitative বা মাত্রাধর্মী কি না, এ বিষয়ে ছন্দোবিৎসমূহে প্রচুর তর্ক হয়ে গেছে। এ স্থলে ইংরেজি ছন্দের স্বরূপ নিয়ে আলোচনা আমাদের আলোচ্য বিষয়ের পক্ষে অবাস্তব।

কিন্তু সংস্কৃত ছন্দের প্রকৃতি সম্বন্ধে দু'একটি কথা উত্থাপন করা অপ্ৰাসঙ্গিক হবে না। 'সংস্কৃত ছন্দমাত্রই মূলে quantitative বা মাত্রিক নয়, এ বিষয়ে সমস্ত সংস্কৃত ছন্দোবিৎসমূহ একমত। ছন্দশাস্ত্রকার গঙ্গাদাস সংস্কৃত ছন্দগুলিকে দু'টি প্রধান ভাগে বিভক্ত করেছেন। যথা—

পৃথং চতুষ্পদী তচ্চ বৃত্তং জ্ঞাতিরিতি ত্রিধা।

বৃত্তমক্ষরসংখ্যাতং জ্ঞাতির্মাত্রাকৃত্য ভবেৎ ॥ —ছন্দোমঞ্জরী ১।৪

এই উক্তিটি থেকে স্পষ্টই বোঝা যাচ্ছে, যে ছন্দগুলি 'জ্ঞাতি' শ্রেণীর অন্তর্গত শুধু সেগুলিই 'মাত্রাকৃত' বা quantitative, আর যে ছন্দগুলি অক্ষর অর্থাৎ সিলেবল-সংখ্যাত সেগুলি মুখ্যতঃ মাত্রাকৃত বা quantitative নয়, এ কথা বলাই উক্ত ছন্দশাস্ত্রকারের অভিপ্রায়। অত্যাশ্চর্য্য ছন্দশাস্ত্রকাররাও এ বিষয়ে গঙ্গাদাসের সঙ্গে একমত। এ স্থলে প্রসঙ্গক্রমে বলে রাখা দরকার যে, 'জ্ঞাতি' ছন্দগুলি 'মাত্রাকৃত' বলে ছন্দশাস্ত্রে এগুলিকে অনেক সময় 'মাত্রাবৃত্ত' নামেও অভিহিত করা হয়; আর অক্ষরসংখ্যাত 'বৃত্ত' ছন্দগুলিকেও ওই একই কারণে 'অক্ষরবৃত্ত' বা 'বর্ণবৃত্ত' নামও দেওয়া হয়ে থাকে। যা হক আমরা দেখলুম যে,

সংস্কৃত ছন্দোবিৎদের মতে একমাত্র জাতি বা মাত্রাবৃত্ত ছন্দগুলিই মাত্রাকৃত অর্থাৎ quantitative; এসব ছন্দের unit বা একক হচ্ছে ‘মাত্রা’। কিন্তু অক্ষরবৃত্ত ছন্দগুলি মাত্রাকৃত বা quantitative নয়; কারণ এসব ছন্দের unit মাত্রা নয়, এসব ছন্দের unit হচ্ছে ‘অক্ষর’।

‘মাত্রা’ ও ‘অক্ষর’, এ দুটি পারিভাষিক শব্দের ইংরেজি প্রতিশব্দ দিলে বিষয়টা অনেকের পক্ষে সহজ হবে। সংস্কৃত ছন্দশাস্ত্রের ‘অক্ষর’ আর ইংরেজি সিলেবল একই জিনিস; ও শাস্ত্রে অক্ষর বলতে ব্যাকরণের বর্ণ অর্থাৎ letter বা হরফ বোঝায় না। আর ‘মাত্রা’ শব্দকে অর্থাৎ ধনিপরিমাণ বা quantityর unitকে ইংরেজিতে বলতে পারি metrical moment বা instant। কোলব্রুক সাহেবও সংস্কৃত ও প্রাকৃত ছন্দের আলোচনায় ‘মাত্রা’ কথার ইংরেজি প্রতিশব্দরূপে moment এবং instant শব্দ ব্যবহার করেছেন। (দ্রষ্টব্য H. T. Colebrooke, *Miscellaneous Essays*, vol. II, পৃ ৬২-১৪৬।) সংস্কৃত ছন্দশাস্ত্রে মাত্রা কথার প্রতিশব্দরূপে স্থলবিশেষে ‘কলা’ কথাটিও ব্যবহৃত হয়। এই ‘কলা’কে ইংরেজিতে metrical digit বলতে পারি। ছন্দপরিভাষার ‘মাত্রা’ বা ‘কলা’র আর-একটি প্রতিশব্দ হচ্ছে mora (দ্রষ্টব্য A. B. Keith, *History of Sanskrit Literature*, পৃ ১৮৩ ও ৪১৮।) Metrical moment, instant বা digit শব্দের পরিবর্তে mora কথাটি ব্যবহার করাই সুবিধে। হতব্রাং আমাদের আলোচনায় সংস্কৃত মাত্রা বা কলা কথার প্রতিশব্দরূপে mora কথাটিই ব্যবহার করব।

২

বাংলা ছন্দের শ্রেণীবিভাগ উপলক্ষে সংস্কৃত ছন্দের শ্রেণীবিভাগের আলোচনা করার সার্থকতা আছে। এ স্থলে সে বিষয়ে সংক্ষেপে দু’একটি কথা বলা প্রয়োজন। পিজলছন্দসূত্রের টীকাকার হলায়ুধ সমস্ত সংস্কৃত ছন্দকে গণচ্ছন্দ, মাত্রাচ্ছন্দ ও অক্ষরচ্ছন্দ, এই তিন ভাগে বিভক্ত করেছেন (ছন্দঃসূত্রম্ ৪।১১, টীকা)। কিন্তু পরবর্তী কালে কেদারভট্ট- (বৃত্তরত্নাকর-প্রণেতা), গঙ্গাদাস (ছন্দোমঞ্জরী-প্রণেতা) প্রমুখ ছন্দোবিৎরা সংস্কৃত ছন্দকে মাত্রাবৃত্ত (বা জাতি) এবং অক্ষরবৃত্ত, এই দুটিমাত্র শ্রেণীতে বিভক্ত করেছেন; গণচ্ছন্দগুলিও আসলে মাত্রাকৃত বা quantitative বলে তাঁরা এ ছন্দগুলিকেও মাত্রাবৃত্ত বা জাতি ছন্দের অন্তর্গত বলেই গণ্য করেছেন।

কিন্তু আমার মনে হয় এই দু-রকম শ্রেণীবিভাগের কোনোটিই নির্দোষ নয়। আমার বিবেচনায় সমস্ত সংস্কৃত ছন্দকে মাত্রিক, আক্ষরিক এবং অক্ষরমাত্রিক এই তিন শ্রেণীতে বিভক্ত করা ই সংগত। যেসমস্ত ছন্দ শুধু ধ্বনিপরিমাণ বা quantityর উপরে প্রতিষ্ঠিত সেগুলিকে বলা যায় মাত্রিক অর্থাৎ quantitative ছন্দ; যথা বৈতালীয়, ঔপছন্দসিক, মাত্রাসমক, আর্ধা ইত্যাদি। যেসমস্ত ছন্দ শুধু অক্ষর বা সিলেবল্-এর সংখ্যার উপরে প্রতিষ্ঠিত সেগুলিকে বলা যায় আক্ষরিক অর্থাৎ syllabic ছন্দ; যথা অহুর্হুপ্ শ্লোক। গায়ত্রী, ত্রিহুপ্ প্রভৃতি সমস্ত বৈদিক ছন্দই এই আক্ষরিক বা syllabic শ্রেণীর অন্তর্গত; তখনতে পাই অব্যস্তার সমস্ত ছন্দই নাকি সম্পূর্ণরূপে আক্ষরিক প্রকৃতির। আর যেসমস্ত সংস্কৃত ছন্দে যুগপৎ অক্ষরসংখ্যা এবং ধ্বনিপরিমাণ (syllable and quantity) সুনির্দিষ্ট থাকে সেসব ছন্দকে অক্ষরমাত্রিক (syllabic-quantitative) নামে অভিহিত করা যায়। যেসমস্ত লৌকিক ছন্দকে শাস্ত্রকাররা বৃত্ত বা অক্ষরবৃত্ত নামে অভিহিত করে থাকেন, একমাত্র অহুর্হুপ্ শ্লোক ছাড়া সেসমস্ত ছন্দ আসলে এই অক্ষরমাত্রিক শ্রেণীর অন্তর্গত; ইন্দ্রবজ্রা, মালিনী, মন্দাকিনী প্রভৃতি সমস্ত হুপরিচিত ছন্দই আসলে অক্ষরমাত্রিক, এ কথা সংস্কৃত কাব্যপাঠ্যকে বলা নিম্নয়োজন। আর বৈদিক ছন্দগুলি আক্ষরিক (syllabic) বটে কিন্তু অক্ষরমাত্রিক নয়, আশা করি এ কথাও বলা বাহুল্য।

এবার অক্ষর (syllable) ও ধ্বনিপরিমাণ (quantity), এই দুই তত্ত্বকে অবলম্বন করে বাংলা ছন্দগুলিকে কয় শ্রেণীতে বিভক্ত করা যাবে তা দেখা যাক। পূর্বেই বলেছি যে, বাংলায় অক্ষর বলতে হরফ বা letter বোঝায়, সিলেবল্ বোঝায় না। তাই বাংলা ছন্দের আলোচনায় আমি সিলেবল্ কথার প্রতিশব্দ হিসেবে কোথাও 'ধ্বনি' (যথা—যুগ্মধ্বনি, অযুগ্মধ্বনি) এবং কোথাও 'অক্ষর' (যথা—অক্ষরবৃত্ত, অক্ষরমাত্রিক), এ শব্দ-দুটি ব্যবহার করেছি, কারণ সিলেবল্-এর অন্তরের তত্ত্বই হচ্ছে একটি অক্ষর বা ধ্বনির অস্তিত্ব। কাজেই দেখা যাচ্ছে সংস্কৃত ছন্দের আলোচনায় থাকে বলা হয় 'অক্ষর' বাংলা ছন্দের আলোচনায় আমি তাকেই বলেছি 'অক্ষর'। সুতরাং সংস্কৃত অক্ষরবৃত্ত এবং বাংলা অক্ষরবৃত্ত এ কথা-দুটি আসলে অভিন্নার্থক। অর্থাৎ সংস্কৃত পরিভাষায় থাকে বলেছি আক্ষরিক বা অক্ষরমাত্রিক ছন্দ বাংলা পরিভাষায় তাকে অক্ষরবৃত্ত ছন্দও বলতে পারি; আর অক্ষরমাত্রিক এবং অক্ষরমাত্রিক, এ শব্দ-দুটিও একার্থবাচক। আমার

দেখেছি syllable ও quantity এই দুই তত্ত্বের উপরে নির্ভর করে সংস্কৃত ছন্দকে আক্ষরিক (syllabic), মাত্রিক (quantitative) এবং অক্ষরমাত্রিক (syllabic-quantitative) এই তিন শ্রেণীতে বিভক্ত করা যায়। ঠিক এই প্রণালী অবলম্বন করে বাংলা ছন্দকে নিম্নলিখিত চার শ্রেণীতে বিভক্ত করতে পারি।

১। মাত্রাবৃত্ত (quantitative) ২। অক্ষরবৃত্ত (syllabic)

৩। মিশ্রিক (mixed) ৪। অক্ষরমাত্রিক (syllabic-quantitative)

৩

বাংলা ছন্দের এই চার শ্রেণীর ইতিহাসটাও সংক্ষেপে বলা প্রয়োজন। বাংলার সাহিত্যিক ইতিহাসের আদি যুগে ‘মাত্রাবৃত্ত’ ছন্দেরই প্রচলন দেখতে পাই; প্রমাণ চর্চাচর্চাবিনিশ্চয়। সংস্কৃত সাহিত্যের ইতিহাসের শেষ যুগে অক্ষরমাত্রিক ছন্দের চেয়ে মাত্রাবৃত্ত ছন্দেরই অধিকতর প্রচলন একটি লক্ষ্য করার বিষয়। এই উক্তিটি যে বাংলা দেশের পক্ষে বিশেষভাবে খাটে তার প্রমাণস্বরূপ লক্ষণসেনের (১১৭২-১২০৭) সভাকবি জয়দেবের গীতগোবিন্দ এবং আচার্য গোবর্ধনের আর্ষাসপ্তশতী এই দুখানি কাব্যের উল্লেখ করতে পারি। সংস্কৃত যুগের পরবর্তী কালের প্রাকৃত কাব্যসাহিত্যেও মাত্রাবৃত্তেরই খুব বেশি প্রাধান্য দেখা যায়। হতরাং প্রাকৃত থেকে উদ্ভূত আধুনিক প্রাদেশিক ভাষাগুলির আদি যুগে স্বভাবতঃই মাত্রাবৃত্ত ছন্দ কাব্যের প্রধান বাহন হয়েছিল। কাজেই চর্চাচর্চাবিনিশ্চয়ে মাত্রিক ছন্দের ব্যবহারে বিশ্বয়ের কোনো কারণ নেই। বাংলা সাহিত্যের মধ্য যুগেও বৈষ্ণব পদাবলীগুলিতে ওই মাত্রিক ছন্দেরই প্রাধান্য। কিন্তু আদি যুগের বৌদ্ধ পদাবলী এবং মধ্য যুগের বৈষ্ণব পদাবলী, উভয়ই সংস্কৃত ও প্রাকৃত উচ্চারণপদ্ধতি অবলম্বন করেই ধর্মনির মাত্রাপরিমাণ স্থির করার প্রয়াস দেখা যায়। অথচ ওই উচ্চারণপদ্ধতি আধুনিক ভাষার প্রকৃতিবিরোধী। তাই আমাদের প্রাচীন কাব্যসাহিত্যে সংস্কৃত উচ্চারণপদ্ধতি এবং বাংলার স্বাভাবিক উচ্চারণপদ্ধতির একটা দ্বন্দ্ব দেখতে পাই এবং সেজগ্রে আমাদের প্রাচীন সাহিত্যে ছন্দপতনের এতটা প্রাচুর্য দেখা যায়। ফলে বৈষ্ণব পদাবলীর পরবর্তী যুগে বাংলা সাহিত্য থেকে মাত্রিক ছন্দ একেবারে বিলুপ্ত হয়ে যায়। আধুনিক যুগে স্বাভাবিক বৈষ্ণব কবিত্বের অগ্রকরণে ‘ভাঙ্গসিংহের পদাবলী’তে প্রাচীন পদ্ধতির মাত্রাবৃত্ত ছন্দের ব্যবহার করেছিলেন। তার পরে তিনি ‘মানসী’র যুগেই সর্বপ্রথমে বাংলার স্বাভাবিক

উচ্চারণটিকে অব্যাহত রেখে মাত্রাবৃত্ত ছন্দের প্রবর্তন করেছেন। তখন থেকেই একাত্তীয় ছন্দ বাংলা কাব্যের, বিশেষতঃ গীতিকবিতার, একটি প্রধান বাহনে পরিণত হয়েছে।

বাংলা ‘স্বরবৃত্ত’ ছন্দের ইতিহাসও কম ঔৎসুক্যকর নয়। চণ্ডীদাসের শ্রীকৃষ্ণকীর্তন, রামাই পণ্ডিতের শূন্যপুরাণ, কালীরাম দাসের মহাত্ম্যরত এবং এমন কি গোবিন্দদাসের পদাবলীতেও স্বরবৃত্ত ছন্দের আভাস পাওয়া যায়। স্বরবৃত্ত হচ্ছে বাংলা ভাষার স্বাভাবিক ছন্দ। কিন্তু আমাদের প্রাচীন কবিরা যেসব ছন্দে কাব্য রচনা করতেন সেগুলি ছিল কৃত্রিম ছন্দ, তার ফলে আমাদের প্রাচীন কাব্যের সর্বত্রই ওই স্বাভাবিক ও কৃত্রিম ছন্দগুলির একটা চিরন্তন দ্বন্দ্বের প্রচুর নিদর্শন পাওয়া যায়। প্রাচীন কাব্যে যেসব স্থলে আমরা সাধারণতঃ ছন্দপতন ঘটেছে মনে করে থাকি সেসব স্থলেই ওই দ্বন্দ্বের পরিচয় রয়ে গেছে। আর প্রাচীন কবিদের কৃত্রিম ছন্দের বিরুদ্ধে বাংলার সহজ ও স্বাভাবিক ছন্দের বিজ্রোহের ফলেই ওই দ্বন্দ্বের উৎপত্তি হয়েছিল। তাই যেসব স্থলে ছন্দপতনের আকারে ওই দ্বন্দ্বের পরিচয় রয়েছে তার মধ্যে সাধারণতঃ প্রাচীন কৃত্রিম ছন্দের বিরুদ্ধে বাংলার স্বাভাবিক নবীন স্বরবৃত্ত ছন্দেরই জয়ের আভাস দেখতে পাওয়া যায়। বাংলা ছন্দের প্রাচীন ও নবীন ধারার এই দ্বন্দ্বের ইতিহাসটি বাস্তবিকই খুব বিস্ময়কর। যা হক, বাংলার এই স্বাভাবিক স্বরবৃত্ত ছন্দটি সর্বপ্রথমে রামপ্রসাদের গানেই বিশেষভাবে আত্মপ্রকাশ করেছে। কিন্তু তথাপি তখনকার দিনের কবিরা এ ছন্দের স্বরূপ ও মর্যাদা উপলব্ধি করতে পারেননি। তারতন্ত্র থেকে হেমচন্দ্র পর্যন্ত অনেক কবির রচনাতেই এ ছন্দের অল্পবিস্তর সাক্ষাৎ পাওয়া যায়। কিন্তু কারও হাতেই তার যথোচিত মর্যাদা রক্ষিত হয় নি; সর্বত্রই তার অনাদর ঘটেছে। অবশেষে রবীন্দ্রনাথ এ ছন্দের প্রকৃত মূল্য বুঝে তাকে বাংলা কাব্যের ছন্দভাণ্ডারে সযত্নে অভিনন্দিত করেছেন। ‘ছবি ও গান’-এই তিনি সর্বপ্রথমে এ ছন্দের স্বার্থ প্রকৃতিটি আবিষ্কারের চেষ্টা করেন। তাঁর এ চেষ্টা পরিশেষে ‘ক্ষণিকার’ যুগে সফল্য লাভ করেছে। এ ছন্দটির স্বার্থ মর্যাদা আবিষ্কারের দ্বারা রবীন্দ্রনাথ বঙ্গভারতীয় বীণায় যে একটি নবতন সুরী যোজনা করতে সমর্থ হয়েছেন, তার ধ্বনিমার্ধু্য অস্ত্র কোনো ছন্দের চেয়ে কম নয়।

কিন্তু সব চেয়ে জটিল ইতিহাস হচ্ছে বাংলা ‘ঘোঁগিক’ ছন্দের। এ ছন্দটিই হচ্ছে আমাদের বাংলা কাব্যসাহিত্যের প্রধান বাহন। কৃত্তিবাসের রামায়ণ,

কাশীরাম দাসের মহাভারত, কবিকঙ্কণ মুকুন্দরামের চণ্ডীমঙ্গল কাব্য এ ছন্দেই রচিত। কিন্তু তাঁদের কাব্যে এ ছন্দের প্রকৃত মূর্তি স্পষ্ট হয়ে ওঠে নি। এ ছন্দের উৎপত্তি কিরূপে হল, আমার মনে হয় বাংলা ছন্দের ইতিহাসে এটি একটি গুরুত্বপূর্ণ সমস্যা। সে সমস্যা সম্বন্ধে আলোচনা করার স্থান এটা নয়। শুধু এটুকু বললেই যথেষ্ট হবে যে, এ ছন্দটির প্রকৃত স্বরূপ আবিষ্কার করতে বাংলার কবিদের বহু শতাব্দী সময় লেগেছে।—মধ্য যুগে এ ছন্দটিকে এক দিকে প্রাচীন পদ্ধতির রাজ্যবৃত্ত অপর দিকে বাংলার আভাবিক স্বরবৃত্ত এ ছুটি ছন্দের আকর্ষণে একটি অনিশ্চয়তা ও অস্থিরতার মধ্যে দোলায়মান দেখা যায়। তার উপরে সংস্কৃতজ্ঞ কবিদের হাতে সংস্কৃত ছন্দের প্রভাব, ফারসি-নবিস কবিদের হাতে ফারসি ছন্দের প্রভাব এবং সমস্ত কবিতাকেই গানের ভঙ্গিতে রূপ করে পড়ার প্রচলিত অভ্যাস, এ সমস্তের ফলে এ ছন্দটি কোনো স্থম্পষ্ট আকার ধারণ করে উঠতে পারে নি। এই অনিশ্চয়তা ও অস্থম্পষ্টতার বহু পরিচয় আমাদের প্রাচীন কাব্যে পাওয়া যায়। কিন্তু এইসমস্ত বিভিন্ন প্রভাবের ফলে আমাদের কাব্যসাহিত্যের প্রধান বাহনটি যে একটি যৌগিক ছন্দের আকার ধারণ করছিল সে বিষয়ে কোনো সন্দেহ নেই। অবশেষে অষ্টাদশ শতাব্দীর মধ্যভাগে ভারতচন্দ্রের হাতে এ ছন্দটি একটি নতুন ধরনের ‘অক্ষর’-বৃত্তের আকার ধারণ করে, অর্থাৎ সে সময় থেকে শুধু অক্ষরের সংখ্যার সংগতি রক্ষা করে ছন্দরচনার প্রথা দেখা দেয়। কিন্তু এই ‘অক্ষর’ জিনিসটা সিলেব্‌লও নয়, letterও নয়, স্থলবিশেষে সিলেব্‌ল, স্থলবিশেষে letter বা বর্ণ। এইটেই ‘অক্ষর’ শব্দের বাংলায় প্রচলিত অর্থ। কিন্তু এই অনিশ্চিতার্থক ‘অক্ষর’ কখনও নিঃসন্দ্বিগ্নরূপে ধ্বনির প্রতিনিধিত্ব করতে পারে না। অথচ ধ্বনিই ছন্দের মূল তত্ত্ব অক্ষর নয়, এ কথা বলাই বাহুল্য। যা হক, যখন থেকে এই অক্ষর আমাদের কাব্যছন্দের মূল তত্ত্বের স্থান দখল করল তখন থেকে আমাদের ছন্দে এক নতুন রকমের ক্রটি দেখা গেল। সে বিষয়ে বিস্তৃত আলোচনার স্থান এটা নয়। শুধু এটুকু বললেই যথেষ্ট হবে যে, ভারতচন্দ্রের সময় থেকে ঊনবিংশ শতকের শেষ পর্যন্ত আমাদের কাব্যছন্দের রাজ্যে ওই অনিশ্চিত প্রকৃতির অক্ষরেরই একাধিপত্য চলেছে। মেঘনাদবধের ছন্দবিচার করলে দেখা যাবে ওই কাব্যখানির আগাগোড়া প্রত্যেকটি পংক্তি চোক্ষ ‘অক্ষর’ গাঁথা। সর্বত্রই চোক্ষ অক্ষরের প্রয়োগ হয়েছে; কোথাও ধ্বনিব্যষ্টির (metrical unitএর) প্রতি লক্ষ নেই। আর অক্ষরই

যে ওই ধ্বনিব্যাষ্টির কাজ সর্বত্র চালাতে পারে না এ কথা পূর্বেই বলেছি। এই ধ্বনিবিচারহীন অক্ষরসংখ্যার সাম্যরক্ষা ছন্দের পক্ষে অস্বাভাবিক বলেই আমি মনে করি।

অবশেষে রবীন্দ্রনাথের সহজ ছন্দপ্রতিভার স্পর্শে এই ‘অক্ষর’বৃত্ত ছন্দের যৌগিক প্রকৃতিটি আবিষ্কৃত হল। তাঁরই রচনা থেকে সর্বপ্রথমে দেখা গেল যে, অক্ষরসংখ্যার সাম্যরক্ষা ছন্দের পক্ষে অস্বাভাবিক; ধ্বনিসাম্যই ছন্দরচনার মূল কথা। তাই তিনি শুধু ধ্বনিসাম্য রক্ষা করেই ছন্দরচনা করেছেন, অক্ষরসংখ্যার বৈষম্যে সংকুচিত বা বিচলিত হন নি। অবশ্য তাঁরও অল্পবয়সের রচনায় অক্ষরসাম্যই দেখা যায়; কিন্তু পরিণত বয়সের রচনায় তিনি ধ্বনিসাম্য অক্ষর-রেখে অক্ষরসাম্যকে অগ্রাহ করেছেন। এভাবে স্বরবৃত্ত এবং মাত্রাবৃত্ত ছন্দের স্থায় আমাদের যৌগিক ছন্দটিও রবীন্দ্রনাথের হাতেই পরিণতি লাভ করেছে। [এ বিষয়ের বিস্তৃততর আলোচনা ‘জয়ন্তী-উৎসর্গে’র ‘বাংলা ছন্দে রবীন্দ্রনাথের দান’ নামক প্রবন্ধে ৬৭-৭২ পৃষ্ঠায় দ্রষ্টব্য]। আমাদের এই তথাকথিত ‘অক্ষর’-বৃত্ত ছন্দটি যে আসলে একটি যৌগিক প্রকৃতির ছন্দ সে বিষয়ে আরও আলোচনা হওয়া প্রয়োজন। কারণ এ ছন্দের এই যৌগিক প্রকৃতিটি আধুনিক কালেও যথোচিতরূপে স্বীকৃত হয়েছে বলে মনে হয় না।

আমাদের স্বরবৃত্ত ছন্দটিকে বলতে পারি বাংলার বৈদিক ছন্দ। আর আমাদের মাত্রাবৃত্ত ছন্দটি হচ্ছে সংস্কৃতের ‘মাত্রাকৃত’ জাতি ও গণচ্ছন্দের প্রতিনিধি। কিন্তু আমাদের যৌগিক ছন্দের অমুরূপ কোনো ছন্দ সংস্কৃতে নেই, এটি একটি বিশেষভাবে লক্ষ করার বিষয়। পক্ষান্তরে সংস্কৃত অক্ষর-মাত্রিক ছন্দের অমুরূপ কোনো ছন্দ বাংলায় ছিল না। স্বর্গীয় কবি সত্যেন্দ্রনাথই সর্বপ্রথমে আবিষ্কার করেন যে, বাংলাভেও সংস্কৃত অক্ষরমাত্রিক ছন্দের অমুরূপ ছন্দ রচনা করা যায়। তাঁর রচিত এই নতুন-জাতীয় ছন্দকে আমি নাম দিয়েছি ‘স্বরমাত্রিক’ ছন্দ।

এখানে বলা প্রয়োজন যে, মাত্রাবৃত্ত, স্বরবৃত্ত ও যৌগিক এই তিন শ্রেণীর ছন্দই আধুনিক বাংলা কাব্যসাহিত্যের প্রধান বাহন। আর বাংলা ছন্দের ওই তিনটি শ্রেণীই রবীন্দ্রনাথের হাতে পরিণতি লাভ করেছে, তা ছাড়া ওই তিন ছন্দেই তিনি এত বিচিত্র রকমের ছন্দোবদ্ধের উদ্ভাবন করেছেন বা সত্যই বিশ্বয়কর। সত্যেন্দ্রনাথের উদ্ভাবিত স্বরমাত্রিক নামে যে চতুর্থ শ্রেণীর ছন্দের উল্লেখ করেছি,

বাংলা কাব্যসাহিত্যে তার পরিসর এখনও অতি সংকীর্ণ; এ ছন্দে রচিত বাংলা কবিতার সংখ্যাও খুবই কম। এ ছন্দ রচনায় খুব শূন্য ধ্বনিবিচারের প্রয়োজন; কারণ এ ছন্দ রচনায় ধ্বনিশিল্পের খুব শূন্য কারুকার্যের দরকার হয়। তাই এই ছন্দে কবিতা রচনা করতে হলে কবির খুব তীক্ষ্ণ ধ্বনিবোধ এবং নিপুণ শিল্পপ্রতিভা থাকা আবশ্যিক। কিন্তু শূন্য বিচার অনেক সময়ই কাব্যরচনার পক্ষে অন্তরায় হয়ে দাঁড়ায়। কাজেই এই ছন্দে রচিত কবিতার সংখ্যা খুব কম হওয়াই স্বাভাবিক। কিন্তু তা হলেও এ ছন্দের একটি বিশিষ্ট রূপ আছে এবং এর সম্ভাব্যতার ক্ষেত্রও স্বল্পপরিসর বলে মনে হয় না। তাই স্বরমাত্রিক ছন্দটিকেও বাংলা ছন্দের একটি স্বতন্ত্র শ্রেণী বলে গণ্য করেছি।

৪

বাংলা ছন্দের যে চার ধারার কথা উল্লেখ করলুম এবার দৃষ্টান্তযোগে তাদের পরিচয় দিতে চেষ্টা করা যাক।—

। । । ।    ॥    ॥            । । । ।    ॥  
 আহা আহা । চীৎকার    ॥    করি রঘু । নাথ  
 ঝাঁপায়ে প । -ড়িল জলে ॥    বাড়ায়ে ছু । হাত ।  
 আগ্রহে । বেন তার ॥ প্রাণমন । কায়  
 একখানি । বাহু হয়ে ॥ ধরিবারে । যায় !

—নিফল উপহার, মানসী, রবীন্দ্রনাথ

এ ছন্দটির unit বা ব্যাপ্তি দিলেব্ বা স্বর নয়; হ্রস্বাং এটিকে syllabic বা স্বরবৃত্ত ছন্দ বলতে পারি নে। এর unit হচ্ছে মাত্রা বা mora, অতএব এ ছন্দটিকে বলব ‘মাত্রাবৃত্ত’ বা quantitative ছন্দ। কেননা মাত্রা বা mora হচ্ছে ধ্বনিপরিমাণ বা quantityরই unit; আর এ ছন্দটিকে ধ্বনির পরিমাণ বা quantityর উপরেই প্রতিষ্ঠিত করা হয়েছে। একটু লক্ষ করলেই দেখা যাবে যে, এখানে অধুগ্ধধ্বনিকে এক unit বা mora বলে ধরা হয়েছে আর যুগ্মধ্বনিকে ধরা হয়েছে তার দ্বিগুণ অর্থাৎ দুই মাত্রা বা mora। অধুগ্ধধ্বনের দ্বারা একমাত্রিক অধুগ্ধধ্বনি আর যুগ্মধ্বনের দ্বারা দ্বিমাত্রিক যুগ্মধ্বনি নির্দেশ করা গেল। এ দৃষ্টান্তটিতে প্রতি পংক্তিপূর্বে চার মাত্রা বা mora রয়েছে, তাই এ ছন্দের পূর্ণতর পরিচয়সূচক নাম হচ্ছে চতুর্মাত্রপর্বিক ছন্দ।

চতুর্মাত্রপর্বিক ছন্দের আর-একটি দৃষ্টান্ত দিচ্ছি।—



আমাদের । ছোটো নদী ॥ চলে বাকে । বাকে,  
বৈশাখ । মালে তার ॥ হাঁটুজল । থাকে ।

...

...

...

তুই কুলে । বনে বনে ॥ পড়ে যায় । সাড়া,  
বরষার । উৎসবে ॥ জেগে উঠে । পাড়া ।

—ছোটো নদী, সহজপাঠ ১ম ভাগ, রবীন্দ্রনাথ

এ দৃষ্টান্ত-ছটিতে চীৎকার, আগ্রহে, বৈশাখ এবং উৎসবে এই চারটি শব্দেই মাত্রাবৃত্ত ছন্দের প্রকৃতিটি বিশেষভাবে প্রকাশ পেয়েছে। কারণ শব্দমধ্যবর্তী যুগ্মধ্বনিতেই সমস্ত বাংলা ছন্দেরই বিশেষ প্রকাশটি ধরা দেয়।

এবার বাংলা ছন্দের দ্বিতীয় ধারার একটি দৃষ্টান্ত দিচ্ছি।—

। । । । । । । । । । । ।  
পাষাণ-গাঁথা । প্রানাদ-পরে ॥ আছেন ভাগ্য । -বস্ত,  
মেহাগিনির । মঞ্চ জুড়ি ॥ পঞ্চ হাজার । গ্রন্থ—  
সোনার জলে । দাগ পড়ে না, ॥ খোলে না কেউ । পাতা,  
অস্বাদিত । মধু যেমন ॥ যুথী অনা । -জ্বাতা ।

—ঘণাস্থান, কণিকা, রবীন্দ্রনাথ

এ ছন্দের unit বা ব্যুষ্টি হচ্ছে সিলেবল বা স্বর; সুতরাং এটিকে বলব ‘স্বরবৃত্ত’ বা syllabic ছন্দ। এ দৃষ্টান্তটির প্রতি পংক্তিপূর্বে চারটি করে স্বর আছে; তাই চতুঃস্বরপবিক স্বরবৃত্ত ছন্দ বললেই এটির পূর্ণতর পরিচয় দেওয়া হয়। লক্ষ করার বিষয় এ দৃষ্টান্তটিতে অযুগ্মযুগ্মভেদে ধ্বনি অর্থাৎ সিলেবল-এর মাত্রা বা quantityর মুখ্যতঃ কোনো পরিমাপ করা হয় নি। তাই এ ছন্দকে মাত্রিক বা quantitative বলে নির্দেশ করার কোনো প্রয়োজন নেই।

এবার বাংলা ছন্দের তৃতীয় ধারার একটি দৃষ্টান্ত দিচ্ছি।—

॥ । । । । । । । ॥ । ।  
প্রাণ দিগে, । হুঃখ স’য়ে, ॥ আপনার । হাতে  
সংগ্রাম ক । -সিতে দাও ॥ ভালোমন্দ । সাধে ।  
শীর্ণ শাস্ত । সাধু তব ॥ গুজরেন । ধরে  
দাও সবে । গৃহছাড়া ॥ লক্ষীছাড়া । করে ।

—বঙ্গমাতা, চৈতালি, রবীন্দ্রনাথ

এ ছন্দের unit বা ব্যাঙি মাত্রা অর্থাৎ moraও নয়, স্বর বা syllableও নয়। একটু লক্ষ করলেই দেখা যাবে এ ছন্দের unit কোথাও syllable, কোথাও mora। অযুগ্মধ্বনি সর্বত্রই এক unit বটে; কিন্তু যুগ্মধ্বনি শব্দের মধ্যে থাকলে এক unit আর শব্দের অন্তে থাকলে দুই unit বা দুই mora। তাই এ ছন্দটিকে ‘যৌগিক’ ছন্দ নামে অভিহিত করেছি; কারণ এ ছন্দের প্রকৃতি একই শব্দের একাংশে স্বরমূলক বা syllabic এবং অন্টাংশে মাত্রামূলক বা quantitative। এ বিষয়ে অন্ততঃ বিস্তৃত আলোচনা করেছি; হুতরাং এ স্থলে পুনরাবলোচনা করা নিম্নয়োজন। উদ্ভূত দৃষ্টান্তটিতে প্রতি পংক্তিপর্বে চারটি করে unit বা ব্যাঙি আছে; হুতরাং এ ছন্দটিকে চতুর্ব্যাঙিপবিক যৌগিক ছন্দ বলতে পারি।

এ স্থলে এ কথা বলা দরকার যে, উদ্ভূত দৃষ্টান্তগুলির ছন্দ বিভিন্ন হলেও ছন্দোবদ্ধ হিসেবে এগুলি বিভিন্ন নয়। লক্ষ করলেই টের পাওয়া যাবে যে, উপরের সবগুলি দৃষ্টান্তেই প্রতি পংক্তিতে চোদ্দটি করে unit বা ব্যাঙি আছে এবং সর্বত্রই আট unit-এর পরে একটি করে ছেদযতি আছে। অর্থাৎ সবগুলি দৃষ্টান্তেই প্রতি পংক্তি আট এবং ছয় unit-এর দুই পদে বিভক্ত হয়েছে। আর এ কথা সকলেই জানে যে, যেসব ছন্দোবদ্ধ পংক্তিগুলি আট এবং ছয় unit-এর দুই ভাগে বিভক্ত সেসব ছন্দোবদ্ধেরই নাম ‘পয়ার’। হুতরাং উপরের দৃষ্টান্তগুলি ছন্দ হিসেবে বিভিন্ন হলেও ছন্দোবদ্ধ হিসেবে অভিন্ন, কেননা ছন্দোবদ্ধ হিসেবে এদের সবগুলিই পয়ার। প্রথম দৃষ্টান্তটি হচ্ছে মাত্রিক (quantitative) পয়ার, দ্বিতীয়টি স্বরবৃত্ত (syllabic) পয়ার, আর তৃতীয়টি যৌগিক (mixed) পয়ার। ছন্দ নির্ভর করে ধ্বনির unit-এর প্রকৃতির উপরে, আর ছন্দোবদ্ধ নিরঞ্চিত হয় ওই unit-এর সমাবেশপ্রণালী অর্থাৎ পর্ব ও পদ বিভাগপ্রণালীর দ্বারা।

এবার বাংলা ছন্দের চতুর্থ ধারার একটি দৃষ্টান্ত দিচ্ছি।—

তুহিনলীন । কোন্‌ মূনির ॥ ছিলাম কোন্‌ । অপ্নেতে !  
অন্ন জ্বার । কোন্‌ চোখের ॥ কটাক্ষের । সঙ্কেতে !  
কোন্‌ গিরির । হিমল্যাট ॥ যাম্ল মোর । উদ্ভবে,  
কোন্‌ পরীর । টুটল হার ॥ কোন্‌ নাচের । উৎসবে !

এ দৃষ্টান্তটির প্রতি পংক্তিপূর্বে স্বরসংখ্যা (syllables) এবং মাত্রাসংখ্যা (morae) যুগপৎ স্থির আছে; কেননা প্রতি পূর্বেই তিনটি করে স্বর বা সিলেব্‌ল্‌ এবং পাঁচটি করে মাত্রা বা mora আছে। তাই এ ছন্দকে ‘স্বরমাত্রিক’ (syllabic-quantitative) আখ্যা দেওয়া যায়। এ ছন্দটির বিশেষ পরিচয় দিতে হলে বলব এটি ত্রিস্বরপঞ্চমাত্র-পবিক ছন্দ।

পরিচয় ১৩৩২ বৈশাখ

## ছন্দ ও ছন্দোবদ্ধ

বাংলা ছন্দের আলোচনায় সর্বপ্রথমেই অযুক্ত ও যুক্তধ্বনির ব্যবহারবৈশিষ্ট্যের প্রতি লক্ষ করা প্রয়োজন। রবীন্দ্রনাথ বলেছেন, “ছন্দের প্রধান সম্পদ যুক্তধ্বনি, অথচ...পয়ারসম্প্রদায়ের বাইরে নির্বিচারে যুক্তধ্বনির পরিবেষণ চলে না।” —পরিচয় ১৩৩৮ মাঘ। যুক্তধ্বনিই যে ছন্দের প্রধান সম্পদ, এ কথা খুবই সত্য এবং যুক্তধ্বনিকে যে ছন্দের মধ্যে ‘নির্বিচারে’ ব্যবহার করা যায় না, এ কথাও সত্য। আসলে ওই যুক্তধ্বনি ব্যবহারের বিভিন্ন প্রণালীর উপরেই ছন্দের শ্রেণীবিভাগ সম্পূর্ণরূপে নির্ভর করে। অযুক্তধ্বনির ব্যবহারের মধ্যে কোনো বৈচিত্র্য নেই; সকল ছন্দেই এর মূল্য সমান। কিন্তু স্বলবিশেষে যুক্তধ্বনির মূল্য তারতম্য ঘটে। প্রকৃত পক্ষে আমি যুক্তধ্বনির মূল্য নির্ণয়ের তিনটি বিভিন্ন পদ্ধতির প্রতি লক্ষ রেখেই বাংলা ছন্দকে প্রধানতঃ তিন ভাগে বিভক্ত করেছি। একটি প্রণালী হচ্ছে অযুক্তযুক্ত-নির্বিশেষে শুধু ধ্বনি বা সিলেবল্-এর সংখ্যার হিসাব ঠিক রেখে ছন্দ রচনা করা। এই ধ্বনিসংখ্যাত ছন্দের নাম দিয়েছি **স্বরবৃত্ত**, কেননা প্রত্যেকটি ধ্বনি বা সিলেবল্-এর ভিতরকার তত্ত্ব হচ্ছে একটি করে অযুক্ত (single) বা যুক্ত (diphthong) স্বর অর্থাৎ vowel-এর অস্তিত্ব। সুতরাং ধ্বনিসংখ্যা স্বর থাকলে স্বরসংখ্যাও স্বতঃই স্থির থাকে। যুক্তধ্বনির মূল্য নির্ণয়ের দ্বিতীয় পদ্ধতি হচ্ছে ধ্বনিকে উচ্চারণকালের ব্যাপ্তি বা পরিমাণের (duration বা quantityর) দিক থেকে বিচার করে যুক্তধ্বনিকে অযুক্তধ্বনির ত্রিগুণ মর্যাদা দেওয়া। একটি অযুক্তধ্বনির উচ্চারণ করতে যে সময় লাগে তার নাম হচ্ছে এক মাত্রা (mora, metrical moment বা instant); কাজেই কালব্যাপ্তির দিক থেকে যুক্তধ্বনিকে দু মাত্রার মর্যাদা দেওয়া হয়ে থাকে। অযুক্ত ও যুক্ত ধ্বনির উচ্চারণকালের পরিমাণ বা ব্যাপ্তির বিচারকেই ছন্দের মাত্রাবিচার বলতে পারি। কাজেই ছন্দরচনার দ্বিতীয় প্রণালী হচ্ছে অযুক্ত ও যুক্ত ধ্বনির মাত্রাসংখ্যার হিসাব রক্ষা করে চলা। এই মাত্রাসংখ্যাত ছন্দকেই **মাত্রাবৃত্ত** আখ্যা দেওয়া যায়। বাংলা ছন্দরচনার তৃতীয় প্রণালীটি হচ্ছে উৎকৃষ্ট দুটি পদ্ধতির যোগে উৎপন্ন একটি বৌদ্ধিক প্রণালী। এই বৌদ্ধিক

প্রণালীতে রচিত ছন্দকে বলতে পারি যৌগিক ছন্দ। এই যৌগিক ছন্দে যুগ্মধ্বনিগুলি একটা নির্দিষ্ট প্রণালীতে স্থানবিশেষে স্বরবৃত্তের কায়দায় এক unit-এর মর্যাদা পায় এবং অত্র মাত্রাবৃত্তের কায়দায় দুই unit-এর মর্যাদা পেয়ে থাকে। রবীন্দ্রনাথ যে ছন্দগুলিকে ‘পরায়সম্প্রদায়’ বলে অভিহিত করেছেন সেগুলিকেই আমি যৌগিক ছন্দ নাম দিয়েছি। গোড়ায় অক্ষরসংখ্যার হিসাব রক্ষা করে রচনা করার প্রথা থেকেই এ ছন্দগুলি ক্রমে ক্রমে বর্তমান আকৃতি লাভ করেছে এবং বর্তমান সময়েও এসব ছন্দ অক্ষরের সংখ্যা মোটামুটি তাবে স্থির রাখা হয়। তাই এই যৌগিক ছন্দগুলিকে বিকল্পে ‘অক্ষর’-বৃত্ত নামও দেওয়া যায়। কিন্তু এ কথা বিশেষভাবে মনে রাখা প্রয়োজন যে, অক্ষর-সংখ্যা কখনও কোনো ছন্দের মূলতত্ত্ব হতে পারে না; ধ্বনিসাম্যই সমস্ত ছন্দের মূল কথা। অক্ষরসংখ্যার স্থিরতা না থাকলেও ধ্বনিসাম্য রক্ষিত হওয়া সম্ভব; আবার অক্ষরসংখ্যার স্থিরতা রক্ষিত হলেও ধ্বনিসাম্য বজায় না থাকতে পারে। সুতরাং বাংলা যৌগিক অর্থাৎ তথাকথিত অক্ষরবৃত্ত ছন্দও আসলে অক্ষরসংখ্যার উপরে মোটেই নির্ভর করে না, ধ্বনির সমতার উপরেই নির্ভর করে।

বোধ করি রায়গুণাকর ভারতচন্দ্রই সর্বপ্রথমে এই অক্ষরসংখ্যার হিসাব স্থির রেখে ছন্দরচনার প্রথাটিকে প্রতিষ্ঠিত করেন, অর্থাৎ তিনিই বাংলা ছন্দকে অক্ষরসংখ্যার গতির মধ্যে কঠিনরূপে বেঁধে দিয়েছিলেন। অক্ষর গোনায় এই অঙ্ক প্রথাটা বাংলা কাব্যজগতের উপরে একশো বছরের উপর আধিপত্য করেছে। অবশেষে রবীন্দ্রনাথের হাতে এসেই বাংলা ছন্দের অক্ষরসংখ্যার বন্ধনমোচন ঘটেছে।

প্রশ্ন হতে পারে স্বরবৃত্ত, মাত্রাবৃত্ত ও অক্ষরবৃত্ত প্রভৃতি শব্দের ‘বৃত্ত’ কথাটির মানে কি। এ প্রশ্নের উত্তর এই যে, যাকে আশ্রয় করে ‘বর্তমান’ থাকা যায় তাকেই বলা যায় বৃত্ত বা বৃত্তি। এ শব্দটার গৌণ অর্থ হচ্ছে ধর্ম, আচরণ, জীবিকা ইত্যাদি—যথা দুর্বৃত্ত, চৌর্যবৃত্তি। কাজেই যে ছন্দ ‘মাত্রা’কে আশ্রয় করেই বর্তমান থাকে অর্থাৎ যে ছন্দ ‘মাত্রা’-ধর্মী তাকেই মাত্রাবৃত্ত বলা যায়, তেমনি ‘স্বর’-ধর্মী ছন্দকে নাম দেওয়া যায় স্বরবৃত্ত।

আমি বাংলা ছন্দের ধ্বনিকে যুগ্ম ও অযুগ্ম এই দুটিমাত্র শ্রেণীতে বিভক্ত করেছি। আর যুগ্মধ্বনির তিন প্রকার বিভিন্ন আচরণের উপরে নির্ভর করে সমস্ত বাংলা ছন্দকে স্বরবৃত্ত, মাত্রাবৃত্ত এবং যৌগিক বা তথাকথিত ‘অক্ষর’বৃত্ত, এই

তিনটি প্রধান শ্রেণীতে বিভক্ত করতে চাই। আমি ছন্দ সম্বন্ধে বড় আলোচনা করেছি তার সমস্তই সম্পূর্ণরূপে এই শ্রেণীবিভাগের উপরে প্রতিষ্ঠিত। সুতরাং এই শ্রেণীবিভাগকেই যদি স্বীকার করা না যায় তবে আমার সমস্ত আলোচনাই দুর্বোধ্য হয়ে উঠবে। শ্রীযুক্ত হনীতি বাবু এবং অন্যান্য কেউ কেউ এই শ্রেণী-বিভাগ স্বীকার করেছেন। রবীন্দ্রনাথ এই শ্রেণীবিভাগ সম্বন্ধে কি মনে করেন তা স্পষ্টরূপে বোঝা যায় নি। কিন্তু প্রকারান্তরে বেশ বোঝা যায় যে, তিনিও ওইরকম শ্রেণীবিভাগের প্রয়োজনীয়তা অস্বত্ত্ব করেন। কেননা, তিনি প্রথমতঃ প্রাকৃত ছন্দ বা প্রাকৃত বাংলার ছন্দ এবং সাধু ছন্দ বা সাধু বাংলার ছন্দ, এ দুটি শ্রেণীর অস্তিত্ব স্বীকার করেন; তার পর আবার সাধু ছন্দের মধ্যে ‘পর্যায়জাতীয় বৈমাত্রিক’ বা ‘সমমাত্রিক’ এবং ‘জৈমাত্রিক’ বা ‘অসমমাত্রিক’ এই দুটি স্বতন্ত্র বিভাগ স্বীকার করেন। সুতরাং তাঁর মতেও বাংলা ছন্দে ‘প্রাকৃত’, ‘বৈমাত্রিক’ সাধু এবং ‘জৈমাত্রিক’ সাধু— এই তিনটি স্বতন্ত্র ধারা আছে। কিন্তু সাধু ছন্দ ও প্রাকৃত ছন্দ এই নামকরণটি নির্দোষ নয়; কেননা সাধু ও প্রাকৃত হচ্ছে বাংলার দুটি স্বতন্ত্র ভাবারচনারীতির নাম। কিন্তু ছন্দের প্রকৃতি ভাবারীতির উপরে নির্ভর করে না, ছন্দপ্রকৃতি নির্ভর করে ধ্বনির ব্যবহারপ্রণালীর উপরে। সুতরাং ধ্বনিব্যবহারের বৈচিত্র্যের প্রতি লক্ষ রেখেই ছন্দের শ্রেণীবিভাগ ও নামকরণ করা উচিত। যা হক, রবীন্দ্রনাথ যাকে প্রাকৃত ছন্দ বলেন তাকেই আমি স্বরবৃত্ত নাম দিয়েছি। তাঁর কবিত ‘বৈমাত্রিক’ সাধু-ছন্দ অর্থাৎ পর্যায়সম্প্রদায় আর আমার কবিত বৌগিক বা অক্ষরবৃত্ত ছন্দ অস্তিত্ব। আর রবীন্দ্রনাথ ‘তিনমাত্রা’-মূলক অসমমাত্রার ছন্দ আমার কবিত মাত্রাবৃত্ত ছন্দের এলাকার মধ্যে পড়ে। একটু পরেই দৃষ্টান্তের সাহায্যে এই শ্রেণীবিভাগের প্রয়োজনীয়তাটা স্পষ্ট করতে চেষ্টা করব।

২

ছন্দ এবং ছন্দোবদ্ধ এক জিনিস নয়; ও দুটি সম্পূর্ণরূপে স্বতন্ত্র জিনিস। ও দুটি শব্দের মধ্যে পার্থক্য কোথায় তা ভালো করে বোঝা প্রয়োজন। প্রকৃতি ও আকৃতির মধ্যে যে প্রভেদ ছন্দ ও ছন্দোবদ্ধের মধ্যে সেই প্রভেদ। ছন্দ নির্ভর করে ধ্বনির প্রকৃতি বা ব্যবহারবৈশিষ্ট্যের উপরে; আর ধ্বনিসমবায়ের বহির্গঠনকৌশলের দ্বারা ছন্দের বাহ্য আকৃতি অর্থাৎ ছন্দোবদ্ধ নিরূপিত হয়। বাংলা ছন্দের বৌগিক শ্রেণী তিনটি, স্বরবৃত্ত, মাত্রাবৃত্ত এবং বৌগিক ওয়কে

অক্ষরবৃত্ত। কিন্তু বাংলার ছন্দোবদ্ধ অর্থাৎ ছন্দের বাহ্য আকৃতি বা বহির্গঠন বহু প্রকারের হতে পারে—পয়ার, ত্রিপদী, চৌপদী ইত্যাদি। একই ছন্দে বহু রকমের ছন্দোবদ্ধ হতে পারে। আবার তিনটি বিভিন্ন ছন্দের বাহ্য আকৃতি অর্থাৎ ছন্দোবদ্ধ একই হতে পারে। দৃষ্টান্ত দিলেই বিষয়টা স্পষ্ট হবে।—

- । । । । । । । । । । । । । । । ।  
১। আমি যদি । জন্ম নিতেম্ ॥ কালিদাসেব্ । কালে  
দৈবে হতেম্ । দশম্ রত্ন ॥ নবরত্নেব্ । মালে ।

—সেকাল, ক্ষণিকা, রবীন্দ্রনাথ

- । । ॥ ॥ । । ॥ । । ॥ । ।  
২। বরষাব্ । নিব্বায়ে ॥ অঙ্কিত । কাষ্  
ছই তীরে । গিরিমালা ॥ কত দূব্ । যায়্ !

—নিফল উপহার, মানসী, রবীন্দ্রনাথ ।

- । । । । ॥ । । । । ॥ । । । ।  
৩। এলায়ে অ । -টিল্ বক্র ॥ নিব্বায়েব্ । বেণী  
নীলাভ দি । -গন্তে ধায়্ ॥ নীল্ গিরি । -শ্রেণী ।

—নিফল উপহার, কথা ও কাহিনী, রবীন্দ্রনাথ

এই দৃষ্টান্ত-তিনটির অন্তঃপ্রকৃতির প্রতি লক্ষ করলে দেখা যাবে প্রত্যেকটি দৃষ্টান্ত এক-এক জাতীয় স্বতন্ত্র ছন্দে রচিত। আবার এদের বাহ্য আকৃতির প্রতি লক্ষ করলে দেখা যাবে ওই তিনটি দৃষ্টান্তই বহির্গঠনের দিক্ ৩০ ১ সম্পূর্ণরূপে এক। এদের অন্তরের গঠন বিভিন্ন, কিন্তু বাইরের গঠন অভিন্ন; এরা আকৃতিতে সদৃশ হলেও প্রকৃতিতে বিসদৃশ। অর্থাৎ এদের ছন্দোবদ্ধ এক হলেও ছন্দ স্বতন্ত্র।

প্রথমেই দেখা যাক উক্ত দৃষ্টান্ত-তিনটির প্রকৃতিগত পার্থক্য কোথায়। যে ধ্বনিসমাবেশের দ্বারা ছন্দ রচিত হয় সে ধ্বনির unit-এর প্রকৃতির উপরেই ছন্দের প্রকৃতি সম্পূর্ণ নির্ভর করে। অর্থাৎ যেরকম unit নিয়ে ছন্দ রচনায় প্রবৃত্ত হব ছন্দের প্রকৃতি সে unit-এর দ্বারা নিয়ন্ত্রিত হবে। unit শব্দের প্রতিশব্দ হিসাবে আমি ‘একক’ বা ‘ধ্বনিব্যাপ্তি’ কথা ব্যবহার করব। এখন দেখা যাক উদ্ভূত দৃষ্টান্তগুলিতে ধ্বনির unit বা ১ টির প্রকৃতিগত পার্থক্য কি।

প্রথম দৃষ্টান্তটির প্রতি পংক্তিতে যুগ্ম-অযুগ্ম-নির্বিশেষে চোদ্দটি ধ্বনি বা সিলেবল আছে। শুধু তাই নয়, এর প্রতি পংক্তিপূর্বেও ধ্বনিসংখ্যার সমতা রয়েছে;

কেননা এর প্রতি পর্বে চারটি করে ধ্বনি বা স্বর আছে, কেবল শেষ পর্বে দুটি করে। স্তত্রায় দেখা গেল এ ছন্দের unit বা ব্যুটি হচ্ছে ধ্বনি, স্বর বা সিলেবল্-এর সংখ্যাগত সমতার দ্বারাই এ ছন্দ নিয়ন্ত্রিত হচ্ছে। স্তত্রায় এ ছন্দকে ধ্বনিসংখ্যাত বা স্বরসংখ্যাত ছন্দ বলতে পারি; সেজন্যেই এ ছন্দের নাম ‘স্বরবৃত্ত’। ব্যর্থতার আশঙ্কা রয়েছে বলেই ‘ধ্বনিবৃত্ত’ নাম দেওয়া নির্দোষ হবে না।

এবার দ্বিতীয় দৃষ্টান্তটির unit বা ধ্বনিব্যুটির প্রকৃতি নির্ণয় করা যাক। এ দৃষ্টান্তটিতে কিন্তু ধ্বনি বা সিলেবল্কে ছন্দের unit বা ব্যুটি বলে ধরা যায় না; কারণ এ দৃষ্টান্তটির পর্বে পর্বে কিংবা পংক্তিতে পংক্তিতে ধ্বনিসংখ্যার সমতা নেই। কিন্তু কোনো কিছুর সমতা নিশ্চয়ই আছে, নতুবা এ ছন্দই হতে পারত না। যে তত্ত্বের সমতার উপরে নির্ভর করে এ ছন্দ বর্তমান আছে তাকেই এ ছন্দের unit বলব। সে unitটি কি তাই দেখা প্রয়োজন। প্রথম দৃষ্টান্তটির মতো এ ছন্দে ধ্বনিগুলিকে যুগ্ম-অযুগ্ম-নির্বিশেষে গ্রহণ করা হয় নি। এ ছন্দে যুগ্মধ্বনিকে অযুগ্মধ্বনির দ্বিগুণ মূল্য দেওয়া হয়েছে, কারণ যুগ্মধ্বনির উচ্চারণে অযুগ্মধ্বনির দ্বিগুণ সময় লাগে। অর্থাৎ এ ছন্দে অযুগ্মধ্বনি এক unit এবং যুগ্মধ্বনি দুই unit। সংস্কৃত ছন্দশাস্ত্রমতে এই unit-এর নাম হচ্ছে ‘মাত্রা’। এই ‘মাত্রা’ কথাটির প্রতিশব্দ হিসেবে *mora* কথাটা ব্যবহার করতে পারি। সংস্কৃত ছন্দশাস্ত্রে এই unit বা মাত্রার অন্য নাম হচ্ছে ‘কলা’। এই ‘কলা’কে ইংরেজিতে বলতে পারি *metrical digit*। এ দিক থেকে বিচার করলে দেখা যাবে যে, দ্বিতীয় দৃষ্টান্তটির প্রতি পংক্তিতে মাত্রা বা কলা আছে চোদ্দটি করে। শুধু তাই নয়, এর প্রতি পংক্তিপর্বেও মাত্রাসংখ্যার সমতা আছে; কেননা এর প্রতিপর্বেই চারটি করে মাত্রা আছে, কেবল শেষ পর্বে দুটি করে। স্তত্রায় দেখা গেল এ ছন্দের unit বা ব্যুটি হচ্ছে মাত্রা বা কলা। মাত্রা বা কলার সংখ্যাগত সমতার দ্বারাই এ ছন্দ নিয়ন্ত্রিত হচ্ছে। স্তত্রায় এ ছন্দকে মাত্রাসংখ্যাত বা কলাসংখ্যাত ছন্দ বলতে পারি। মাত্রাসংখ্যাকে আশ্রয় করে বর্তমান বলে এর নাম ‘মাত্রাবৃত্ত’।

আমরা দেখলুম যে, প্রথম দৃষ্টান্তটির ছন্দ হচ্ছে স্বরবৃত্ত। এর প্রকৃতি হচ্ছে স্বরসংখ্যক বা *syllabic*। এ ছন্দকে ইংরেজিতে বলা যায় *syllabic metro*। কিন্তু দ্বিতীয় দৃষ্টান্তটি স্বরসংখ্যক নয়, এটির প্রকৃতি হচ্ছে মাত্রিক।



অর্থাৎ এ ছন্দের প্রকৃতিবিচার করতে হবে ধ্বনির উচ্চারণকালের ব্যাপ্তি (duration) বা পরিমাণের (quantity) দিক থেকে। সুতরাং এই মাত্রিক ছন্দকে ইংরেজিতে বলতে পারি quantitative metre।

এবার তৃতীয় দৃষ্টান্তটির ছন্দবিচার করা যাক। এ ছন্দ পুরোপুরি ধ্বনিসংখ্যক (syllabic) নয়, মাত্রিক (quantitative) নয়। এ ছন্দের unit বা ব্যাপ্তি কি তাই আগে দেখা প্রয়োজন। যদি শুধু ধ্বনিসংখ্যার unit অর্থাৎ সিলেবল্ এর হিসাব রাখা যায় তা হলে এ ছন্দের সমতা পাওয়া যায় না। আবার যদি শুধু ধ্বনিপরিমাণ বা quantityর unit অর্থাৎ মাত্রার হিসাব রাখা যায় তা হলেও এ ছন্দের সমতাতত্ত্বের সম্ভাবন মিলবে না। কিন্তু কোথাও সমতা আছে নিশ্চয়ই অর্থাৎ কোনো একটা তত্ত্বের unitকে আশ্রয় করে এ ছন্দ বর্তমান রয়েছে। সকলেই জানেন যে, এ দৃষ্টান্তটি ‘পর্যায়’ ছন্দে রচিত অর্থাৎ এ ছন্দের প্রতি পংক্তিতে চোদ্দটি করে unit আছে। কিন্তু সেই unitগুলি কি ও কোন্ তত্ত্বের, সেইটেই হচ্ছে প্রশ্ন। উক্ত দৃষ্টান্তটির প্রতি পংক্তিতে চোদ্দটি সিলেবল্ নেই; সুতরাং সিলেবল্ এ ছন্দের unit নয়। অযুগ্মধ্বনিকে এক মাত্রা (mora) এবং যুগ্মধ্বনিকে দুই মাত্রা ধরে এ ছন্দের প্রতি পংক্তিতে চোদ্দ মাত্রাও পাওয়া যাবে না। সুতরাং মাত্রাও এ ছন্দের unit নয়। লক্ষ করলে দেখা যাবে যে, এ ছন্দে শব্দমধ্যবর্তী যুগ্মধ্বনি এক unit, কিন্তু শব্দের প্রান্তবর্তী যুগ্মধ্বনি দুই unit বলে গণ্য হয়েছে; একস্বর (monosyllabic) শব্দের যুগ্মধ্বনিও দুই unit। এইটেই ছন্দে এ ছন্দের কায়দা। অর্থাৎ এ ছন্দে শব্দের মধ্যবর্তী যুগ্মধ্বনি স্বরবৃত্তধর্মী এবং শব্দের প্রান্তবর্তী যুগ্মধ্বনি মাত্রাবৃত্তধর্মী। এই হিসেবে দেখা যাবে, প্রত্যেক পর্বে চার unit এবং শেষ পর্বে দুই unit করে প্রতি পংক্তিতে চোদ্দ unit ঠিক আছে। অতএব এ ছন্দকে বলতে পারি ‘যৌগিক’ ছন্দ, কেননা স্বরবৃত্তের প্রকৃতি ও মাত্রাবৃত্তের প্রকৃতির যোগে এ ছন্দের উৎপত্তি। স্বরবৃত্তের unit হচ্ছে স্বর বা সিলেবল্, মাত্রাবৃত্তের unit হচ্ছে মাত্রা (mora) বা কলা। কিন্তু এই যৌগিক ছন্দের unitকে কি বলা যাবে? কিছুই বলা যায় না, কারণ যে জিনিসটা আসলেই দুটি বিভিন্ন পদার্থের যোগে উৎপন্ন তার মূল উপাদানকে তো কোনো একটি বিশেষ নাম দেওয়া যায় না। কিন্তু তবু একটা নাম দেওয়া চাই, কেননা তা না হলে এ ছন্দের unit নিয়ে পরস্পরের সঙ্গে আলোচনা চলবে কি

করে? তাই এই বৌগিক ছন্দের unitকে নাম দেওয়া যাক ‘অক্ষর’; কেননা লৌকিক কার্যকার্য এই পয়ার ছন্দকে চোদ্দ ‘অক্ষর’ের ছন্দই বলা হয়ে থাকে। কিন্তু মনে রাখা উচিত যে, এই ‘অক্ষর’ জিনিসটা ব্যাকরণের বর্ণ বা letter নয়, সংস্কৃত ছন্দশাস্ত্রের ‘অক্ষর’ বা সিলেব্লও নয়। এটি হচ্ছে বাংলার প্রচলিত অর্থের একটা অদ্ভুত জিনিস—কখনও letter, কখনও syllable। যেমন ‘জটিল’ শব্দের জ এবং টি এই দুটি সিলেব্লও এক-একটি অক্ষর আর হসন্ত ল্-ও একটি অক্ষর। আরও মনে রাখা প্রয়োজন যে, এই বৌগিক পয়ার ছন্দে চোদ্দ ‘অক্ষর’ না থাকলেও চোদ্দ unit ঠিক থাকতে পারে এবং চোদ্দ ‘অক্ষর’ ঠিক থাকলেও চোদ্দ unit-এর ব্যতিক্রম ঘটতে পারে। কারণ এক-একটি অক্ষর সকল সময় এক-একটি unit-এর প্রতীক নয়। এ বিষয়ে অন্তর্জ্ঞ আলোচনা করেছি ( বিচিত্রা, মাঘ ) ; এ স্থলে পুনরুক্তি নিম্নপ্রয়োজন। যা হক, প্রচলিত প্রথায় অক্ষরসংখ্যার দ্বারাই ‘পয়ারজাতীয়’ ছন্দের হিসাব রাখা হয় বলে এইসব বৌগিক ছন্দকে বিকল্পে ‘অক্ষরবৃত্ত’ নামেও অভিহিত করা যায়।

৩

এবার উদ্ভূত দৃষ্টান্ত-তিনটিতে যুগ্মধ্বনিগুলির উচ্চারণপ্রকৃতির প্রতি লক্ষ করা যাক। প্রথম অর্থাৎ স্বরবৃত্তের দৃষ্টান্তটিতে যুগ্মধ্বনিগুলির উচ্চারণ আয়ত্ত নয়, অর্থাৎ এদের উচ্চারণকাল অযুগ্মধ্বনিগুলির দ্বিগুণ নয়। কেননা স্বরবৃত্ত ছন্দে যুগ্মধ্বনিকে একটু টেনে উচ্চারণ করে অযুগ্মধ্বনির প্রায় সমান করে দেওয়া হয়। তাই এ ছন্দে মোটের উপর যুগ্ম ও অযুগ্মধ্বনিকে প্রায় সমান মর্দাদা দেওয়া হয়ে থাকে। কিন্তু মাত্রাবৃত্তে যুগ্মধ্বনির উচ্চারণ আয়ত্ত এবং ব্যাপ্তি বা পরিমাণের দিক থেকে অযুগ্মধ্বনির দ্বিগুণ। তাই এ ছন্দে যুগ্মধ্বনিকে সব সময়ই একটু টেনে উচ্চারণ করতে হয়। একটি দৃষ্টান্ত দিলেই বিষয়টা স্পষ্ট হবে।—

তখন তাদের । চতুর্দিকেই ॥ রাজিবেলার । প্রহর যত

সপ্তে-চলার । পথিক-মতো

মন্দগমন । ছন্দে লুটার ॥ মন্থর কোন্ । ক্রান্ত ব্যারে ,

বিহবলান । শান্ত তখন ॥ অস্ত রাতের । পক্ষছায়ে ।

—বিজয়ী, পূরবী, রবীন্দ্রনাথ

এটিকে কি ছন্দ বলব? এ দৃষ্টান্তটির প্রত্যেক পর্বেরই দুটি করে যুগ্মধ্বনি আছে, কেবল প্রতি পংক্তির অন্তিম পর্বগুলিতে যুগ্মধ্বনি আছে একটি করে।

যদি এই যুগ্মধ্বনিগুলিকে স্বরবৃত্তের কায়দায় একটু ঠেসে সংক্ষিপ্ত করে উচ্চারণ করি তা হলে এটি হবে চতুঃস্বরপর্বিক স্বরবৃত্ত ছন্দ। কিন্তু ইচ্ছে করলে আমরা এই যুগ্মধ্বনিগুলিকে মাত্রাবৃত্তের কায়দায় একটু টেনে আয়তভাবেও উচ্চারণ করতে পারি; তা হলে কিন্তু এটিকে আর স্বরবৃত্ত ছন্দ বলা যাবে না; তখন এটিকে বলতে হবে ষণ্মাত্রপর্বিক মাত্রাবৃত্ত ছন্দ। যেসব ছন্দকে এমনি করে স্বরবৃত্ত ও মাত্রাবৃত্ত উভয় কায়দাতেই পড়া যায় অর্থাৎ যেসব ছন্দে স্বরবৃত্ত ও মাত্রাবৃত্ত উভয় প্রকৃতিই যুগপৎ বিস্তারিত থাকে সেসব ছন্দকে আমি স্বরমাত্রিক নামে অভিহিত করেছি। উদ্ভূত দৃষ্টান্তটিকেও তাই স্বরমাত্রিক ছন্দের দৃষ্টান্ত বলে গণ্য করতে পারি। তা হলে এ ছন্দটির নাম হবে চতুঃস্বরষণ্মাত্র-পর্বিক ছন্দ। যা হক, বর্তমান প্রসঙ্গে স্বরমাত্রিক ছন্দ আমাদের আলোচ্য বিষয় নয়। বাংলা ছন্দের তিনটি প্রধান ধারায় যুগ্মধ্বনির উচ্চারণবৈশিষ্ট্যের কথা আলোচনা করছিলাম। আমরা দেখেছি স্বরবৃত্ত ছন্দে যুগ্মধ্বনির উচ্চারণ সংক্ষিপ্ত, মাত্রাবৃত্ত ছন্দে যুগ্মধ্বনির উচ্চারণ আয়ত। ষৌগিক অর্থাৎ অক্ষরবৃত্ত ছন্দে যুগ্মধ্বনির উচ্চারণ কিরূপ তা লক্ষ করলেই এ ছন্দের ষথার্থ প্রকৃতিটি বোঝা যাবে। পূর্বেই দেখেছি, এ ছন্দে প্রত্যেক শব্দের (word-এর) শেষ ধ্বনিটি মাত্রিক (quantitative) প্রকৃতির, আর অন্ত অংশের ধ্বনিগুলি স্বরবৃত্ত (syllabic) প্রকৃতির। কাজেই এ ছন্দে প্রত্যেক শব্দের প্রান্তবর্তী যুগ্মধ্বনিকে মাত্রাবৃত্তের কায়দায় টেনে আয়তভাবে উচ্চারণ করতে হয়; আর শব্দের মধ্যবর্তী যুগ্মধ্বনিকে স্বরবৃত্তের ভঙ্গিতে ঠেসে সংক্ষিপ্ত করে উচ্চারণ করতে হয়। তাহেই এ ছন্দে ধ্বনির সমতা রক্ষা হয়। নতুবা, অর্থাৎ এই ষৌগিক ওরফে অক্ষরবৃত্ত ছন্দের সমস্ত যুগ্মধ্বনিকেই যদি একই কায়দায় আয়ত বা সংক্ষিপ্ত করে উচ্চারণ করা হয়, তা হলে এ ছন্দের ধ্বনিসাম্য রক্ষিত হবে না। দৃষ্টান্ত দিচ্ছি।—

। । ॥                      । ॥ ॥

তধু বৈকুণ্ঠে তরে । বৈকুণ্ঠে গান্ ?

—বৈকুণ্ঠ কবিতা, সোনার তরী, রবীন্দ্রনাথ

এই 'পয়ারে'র পংক্তিটিতে ধ্বনি (syllable) আছে সবস্থল এগারটি। তার মধ্যে অযুগ্মধ্বনি পাঁচটি, কোনো চিহ্নের স্বাক্ষর এরা নির্দিষ্ট নয়। আর বাকি ছ'টি ধ্বনিই যুগ্ম; ষথা—বৈ, কুণ্, ঠেব্, বৈব্, বেব্ এবং গান্। কিন্তু এ ছন্দে এই ছ'টি যুগ্মধ্বনির উচ্চারণপ্রকৃতি ও মর্যাদা সমান নয়। যদি স্বরবৃত্তের

পদ্ধতিতে যুগ্মধ্বনিগুলিকে ঠেলে সংক্ষিপ্ত উচ্চারণ করে এক-এক unit বলে গণ্য করা যায় তবে এ পংক্তিটিতে মোট এগারটির বেশি unit বা ব্যটি পাওয়া যাবে না। আবার যদি এগুলোকে মাত্রাবৃত্তের স্বীতিতে টেনে আয়ত উচ্চারণ করা যায় অর্থাৎ যদি যুগ্মধ্বনিগুলিকে দুই মাত্রার মর্যাদা দেওয়া হয় তা হলে এ পংক্তিটিতে unit-এর সংখ্যা বেড়ে সতের হয়ে যাবে। অর্থাৎ স্বরবৃত্ত বা মাত্রাবৃত্ত কোনো পদ্ধতিতেই এ পংক্তিটিতে পয়্যারের চোদ্দ unit পাওয়া যাবে না। আসল কথা এই যে, এখানে শব্দের মধ্যবর্তী তিনটি যুগ্মধ্বনিকে (বৈ, কুণ্ এবং বৈব্) স্বরবৃত্তের প্রথায় ঠেলে সংক্ষিপ্ত উচ্চারণ করে এক unit বলে গণ্য করা হয়েছে। আর শব্দের প্রান্তবর্তী তিনটি যুগ্মধ্বনিকে (ঠেব্, বেব্ এবং গান্) মাত্রাবৃত্তের প্রথায় টেনে আয়ত উচ্চারণ করে দুই unit বলে ধরা হয়েছে। তাই এ পংক্তিটিতে সবমুদ্র ৫ (অযুগ্ম) + ৩ (শব্দমধ্যবর্তী যুগ্ম) +  $৩ \times ২$  (শব্দপ্রান্তবর্তী যুগ্ম) = ১৪ unit আছে। তাই এ পংক্তির ধ্বনিসমতা ও ছন্দ অব্যাহত আছে, এ পংক্তিটিতে চোদ্দটি তথাকথিত 'অক্ষর' আছে বলেই নয়। যুগ্মধ্বনির স্বরবৃত্ত ও মাত্রাবৃত্ত এই দুটি বিভিন্ন প্রকৃতির যোগে গঠিত বলেই এ ছন্দকে 'যৌগিক' ছন্দ বলেছি। এ ছন্দে শব্দের প্রান্তবর্তী যুগ্মধ্বনির যে আয়ত বা দ্বিমাত্রক উচ্চারণ, তার প্রমাণ 'বৈকুণ্ঠের তরে' কথাটার মধ্যে 'কুণ্' এবং 'ঠেব্' অংশ দুটির তুলনা করলেই পাওয়া যায়। 'কুণ্' অংশটাকে আর্মরা সংশ্লিষ্টভাবে উচ্চারণ করি; আর 'ঠেব্' অংশটাকে উচ্চারণ করি বিস্লিষ্টভাবে, যেন 'বৈকুণ্ঠের' এবং 'তরে' এই দুটি স্বতন্ত্র শব্দের স্বাভাবিক বিচ্ছিন্নতা অব্যাহত থাকে। আবার যৌগিক ছন্দে শব্দের মধ্যবর্তী যুগ্মধ্বনিকে যে ঠেলে সংক্ষিপ্ত করে উচ্চারণ করা হয়, নীচের পংক্তিটিকে বিশ্লেষণ করলেই তার প্রমাণ পাওয়া যাবে।—

কুলশুভ্র নয়কান্তি ॥ হরেন্দ্রবদিতা

—উর্ধ্বাঙ্গী, চিত্রা, রবীন্দ্রনাথ

এই পংক্তিটিকে আবৃত্তি করার ধ্বনি অর্থাৎ এর পরায়জাতীয় ধ্বনি সকলেরই পরিচিত। পংক্তিটিতে যুগ্মধ্বনি আছে মোট ছ'টি। যথা—কুণ্, শুভ্, নগ্, কান্, রেন্ এবং বন্। আর এই সবগুলিই শব্দের মধ্যবর্তী। এই ছ'টি যুগ্মধ্বনিকেই যে আর্মরা পরায়ের স্বাভাবিক প্রথায় ঠেলে সংক্ষিপ্ত করে উচ্চারণ করি এবং একটিমাত্র unit-এর মর্যাদা দিই তার প্রমাণ এই যে, যদি এই ছ'টি যুগ্মধ্বনিকে

আমরা আরওভাবে উচ্চারণ করে দুই unit-এর মূল্য দিভূম তা হলে এ ছন্দ আর পয়ারই থাকত না ; সম্পূর্ণ অন্ত প্রকৃতির ছন্দে পরিণত হত । এই ছ'টি যুগ্মধ্বনিকে দ্বিমাত্রক বলে গণ্য করলে এ ছন্দটার প্রকৃতি হত এ-রকম ।—

|| || | || | | || | |

কুন্দ ওজ । নয়কান্তি ॥ স্বরেন্দ্রবন্ । -দিতা

অর্থাৎ তা হলে এ ছন্দটি আর চোদ্দ unit-এর পয়ার না থেকে ৬+৬+৬+২ মাত্রার মাত্রাবৃত্ত ছন্দ হয়ে দাঁড়াত । সুতরাং দেখতে পাচ্ছি উচ্চারণভঙ্গির উপরে ছন্দ বিশেষভাবে নির্ভর করে । এক ভঙ্গিতে পড়লে উদ্ভূত পংক্তিটির ছন্দ হবে বৌগিক ; অন্য ভঙ্গিতে পড়লে তার ছন্দ হবে মাত্রিক ।

রবীন্দ্রনাথ লিখেছেন, পয়ারসম্প্রদায়ের বাইরে নির্বিচারে যুগ্মধ্বনির পরিবেষণ চলে না । আমাদের আলোচনার দ্বারা প্রমাণিত হল যে, 'পয়ার'-সম্প্রদায়ের মধ্যেও যুগ্মধ্বনির পরিবেষণ 'নির্বিচার' নয় । পয়ারসম্প্রদায়ের মধ্যেও যুগ্মধ্বনি ব্যবহারের একটা সুনির্দিষ্ট নিয়ম আছে এবং কবিগণ স্বাভাবিক ছন্দবোধের দ্বারা চালিত হয়ে একপ্রকার অজ্ঞাতসারেই ওই নিয়ম পালন করে থাকেন । অর্থাৎ এই নিয়মটি তাঁদের কাছে স্পষ্টভাবে জ্ঞাত না হলেও তাঁদের রচনার মধ্যে ওই নিয়মটি নিগূঢ়ভাবে প্রচ্ছন্ন থাকে ।

আশা করি বাংলা ছন্দের তিনটি প্রধান ধারার প্রকৃতিগত পার্থক্য কোথায় তা পাঠকের নিকট স্পষ্ট হয়েছে । ধ্বনির দুই রকমের unit নিয়ে দুই রকম ছন্দ ( স্বরবৃত্ত ও মাত্রাবৃত্ত ) গঠিত হয় এবং ওই দুই রকম unit-এর বিশেষ একপ্রকার সমাবেশের দ্বারা আর-একটি যৌগিক ছন্দ উৎপন্ন হয় । আরও স্পষ্ট করে বলা যায় যে, যুগ্মধ্বনির সংশ্লিষ্ট উচ্চারণের উপরে স্বরবৃত্ত প্রতিষ্ঠিত এবং মাত্রাবৃত্ত নিয়ন্ত্রিত হয় যুগ্মধ্বনির বিস্ত্রিষ্ট উচ্চারণের দ্বারা । আর যুগ্মধ্বনির সংশ্লিষ্ট ও বিস্ত্রিষ্ট, এই দুই রকমের উচ্চারণের একটি বিশেষ সমাবেশের দ্বারা বাংলা ছন্দের তৃতীয় ধারার অর্থাৎ বৌগিক বা তথাকথিত অক্ষরবৃত্ত ছন্দ গঠিত হয় ।

| || | || | |

বাক্য তার । অনর্গল ॥ মঙ্গলজ্ঞা । শালী ।

| | | || | |

ভর্তুকি । উগ্র তেজ, ॥ শেষ যুক্তি । গালি ।

এই পংক্তি-দুটি সম্বন্ধে রবীন্দ্রনাথ বলেছেন—“যেখানে সেখানে নানাপ্রকার অসমান ভার নিরেও পয়ারের পদস্থলন হয় না, এই তত্ত্বটির মধ্যে অসামান্ততা আছে। অস্ত্র কোনো ভাষায় কোনো ছন্দে এ-রকম স্বচ্ছন্দতা এতটা পরিমাণে আছে বলে আমি তো জানি নে।”—পর্যায় ১৩৩৮ মাঘ। তাঁর এই উক্তি সম্পূর্ণ সত্য। কিন্তু এই যে অসামান্ততা, এর কোশলটা কোন্‌খানে এ বিষয়ে আলোচনা করা প্রয়োজন। তিনি বলেন যতিস্থাপনের বৈশিষ্ট্যের দ্বারাই এ ছন্দের ভারসাম্যশূন্য হয়ে থাকে। এ ছন্দে যতিস্থাপনের একটা বৈশিষ্ট্য আছে দ্বার দ্বারা এর প্রকৃতি অস্ত্র ছন্দের থেকে স্বতন্ত্র হয়ে উঠেছে, সে বিষয়ে কোনো সন্দেহ নেই। কিন্তু যতিস্থাপনের বৈশিষ্ট্যের দ্বারা এর ভার-সাম্যশূন্য রক্ষিত হয় না; সে সাম্যশূন্য রক্ষিত হয় যুগ্মধ্বনির বিচিত্র ব্যবহারের দ্বারা। উপরের দৃষ্টান্তটির প্রতি মনোযোগ দিলেই এ কথাটি বোঝা যাবে। এখানে যুগ্মধ্বনি আছে বারটি—আটটি শব্দ মধ্যবর্তী (অযুগ্মদণ্ড চিহ্নে দ্বারা নির্দিষ্ট), এবং চারটি শব্দপ্রান্তবর্তী (যুগ্মদণ্ড চিহ্নে দ্বারা নির্দিষ্ট)। ওই আটটি যুগ্মধ্বনিকে আমরা সংশ্লিষ্টভাবে উচ্চারণ করি এবং বাকি চারটি যুগ্মধ্বনিকে আমরা বিস্লিষ্টভাবে উচ্চারণ করে পরবর্তী শব্দ থেকে পূর্ববর্তী শব্দের বিচ্ছিন্নতা রক্ষা করে থাকি। তাই পয়ার ছন্দ অসমান ভার বহন করেও সাম্যশূন্যহীন হয়ে পড়ে না।

৪

পূর্বেই বলেছি বাংলা ছন্দের তিনটি প্রধান ধারা প্রকৃতিতে পৃথক্ হলেও আকৃতিতে সদৃশ হতে পারে। অর্থাৎ তিনটি স্বতন্ত্র রচনা ছন্দপ্রকৃতির দিক্ থেকে সম্পূর্ণ স্বতন্ত্র হলেও ছন্দোবন্ধের দিক্ থেকে সম্পূর্ণরূপে এক বা সদৃশ হতে পারে। পূর্বে (পৃ ৩৮১) যে তিনটি দৃষ্টান্ত উদ্ভূত করেছি সেগুলির বাহ্য আকৃতি অর্থাৎ বহির্গঠনের প্রতি লক্ষ্য করলেই এ কথার সত্যতা উপলব্ধি হবে। আরও দৃষ্টান্ত দিচ্ছি।—

- ১। দূর প্রবাসে । সন্ধ্যাবেলায় ॥ বাসায় ফিরে । এহু,  
হঠাৎ যেন । বাজল কোথায় ॥ ফুলের বুকের । বেণু ।

—চিঠি, পূর্ববী. রবীন্দ্রনাথ

- ২। আমি তব । জীবনের ॥ লক্ষ্য তো । নহি,  
ভুলিতে তু । -লিতে যাবে, ॥ হে চির বি । -রহী ।

...

...

...

মার্জনা । করো যদি ॥ পাব তবে । বল,  
করণা ক । -রিলে নাহি ॥ ঘোঁচে আঁখি । -জল ।

—দায়মোচন, মহয়া রবীন্দ্রনাথ

৩। প্রাণ দিয়ে, । দুঃখ সয়ে, ॥ আপনার । হাতে  
সংগ্রাম ক । -রিতে দাও ॥ ভালোমন্দ । -সাথে ।

—বঙ্গমাতা, চৈতালি, রবীন্দ্রনাথ

এই দৃষ্টান্ত-তিনটি স্বতন্ত্র ছন্দে রচিত । কেননা তিনটি দৃষ্টান্তে ধ্বনির unit বিভিন্ন রকমের । প্রথমটির ছন্দ স্বরবৃত্ত, এখানে যুগ্মধ্বনির উচ্চারণ সর্বত্রই সংশ্লিষ্ট । দ্বিতীয়টির ছন্দ মাত্রাবৃত্ত, এখানে যুগ্মধ্বনির উচ্চারণ সর্বত্রই বিস্লিষ্ট । তৃতীয়টির ছন্দ যৌগিক, কেননা এখানে যুগ্মধ্বনির উচ্চারণ কোথাও সংশ্লিষ্ট কোথাও বিস্লিষ্ট । এই তিনটি দৃষ্টান্তের unitএর ধ্বনিপ্রকৃতি সম্পূর্ণ বিভিন্ন ধরণের ; সুতরাং এদের ছন্দপ্রকৃতিও বিভিন্ন ।

ধ্বনির অন্তঃপ্রকৃতির তরফ থেকে উক্ত দৃষ্টান্তগুলির ছন্দ সম্পূর্ণ পৃথক বটে, কিন্তু ধ্বনিসম্মিলনের বাহ্য আকৃতি বা বহির্গঠনের তরফ থেকে এই দৃষ্টান্তগুলি সম্পূর্ণরূপেই এক ধরণের । কারণ প্রত্যেকটি দৃষ্টান্তেই প্রতি পংক্তির ব্যষ্টি-সংখ্যা চোদ্দ । এদের মধ্যে যে শুধু পংক্তিগঠনেরই সাদৃশ্য আছে তা নয় ; প্রতি পর্বের আকৃতি এবং গঠন বিষয়েও এদের মধ্যে সম্পূর্ণ সাদৃশ্য আছে । কারণ প্রত্যেকটি দৃষ্টান্তের প্রতি পর্বে চারটি করে ধ্বনিব্যষ্টি বা unit আছে, কেবল শেষ পর্বে দুটি করে । ছন্দগঠনের এই বাহ্য আকৃতিকে বলেছি, ছন্দোবদ্ধ । সুতরাং দেখা গেল এ দৃষ্টান্তগুলির ছন্দের প্রকৃতি পৃথক হলেও আকৃতি একই । অর্থাৎ এদের ছন্দ বিভিন্ন হলেও ছন্দোবদ্ধ অভিন্ন ।

যে ছন্দোবদ্ধে প্রথম তিন পর্বে চারটি করে ব্যষ্টি এবং শেষ পর্বে দুটি ব্যষ্টি থাকে, সে ছন্দোবদ্ধকে প্রচলিত প্রধায় বলা হয় 'পয়ার' । সুতরাং ছন্দোবদ্ধ হিসেবে উপরের তিনটি দৃষ্টান্তকেই 'পয়ার' বলতে পারি । কিন্তু ছন্দ হিসেবে এরা বিভিন্ন প্রকৃতির । সুতরাং ছন্দ ও ছন্দোবদ্ধ উভয় দিক থেকে এ দৃষ্টান্তগুলির নাম হবে যথাক্রমে—স্বরবৃত্ত পয়ার, মাত্রাবৃত্ত পয়ার এবং যৌগিক পয়ার । এই যৌগিক পয়ারকেই প্রচলিত প্রধায় শুধু পয়ার বঃ হয়ে থাকে । রবীন্দ্রনাথের ভাবায় বলতে গেলে স্বরবৃত্ত পয়ারকে 'প্রাকৃত পয়ার' এবং যৌগিক পয়ারকে 'শাধু পয়ার' বলতে পারি । কিন্তু মাত্রাবৃত্ত পয়ার বা মাত্রিক পয়ারকে তিনি কি

বলবেন জানি নে। ইংরেজিতে এই তিনজাতীয় পদ্যকে যথাক্রমে syllabic (স্বরসংখ্যক), quantitative (মাত্রিক) এবং mixed (বৌগিক) পদ্য বলতে পারি।

শুধু পদ্য নয়, প্রায় সব ছন্দোবদ্ধের তরফ থেকে এই তিনটি ছন্দ বাহ্য আকৃতিতে সদৃশ হতে পারে। আরও দৃষ্টান্ত দিচ্ছি।—

১। তেমনি করে। যখন কভু ॥ আমার পানে। চাবে

মর্মভেদী। কোতুহলের। আখি,

বিধাতা যা নুকান লাজে দেখতে যে তাই পাবে

মোর রচনায় যা আছে তাঁর বাকি।

—ছায়ালোক, মহরা, রবীন্দ্রনাথ

২। বকু, তো। -মায় পথ ॥ সম্মুখে। জানি,

পশ্চাতে। আমি আছি। বাঁধা।

অশ্রুধারনে বৃথা শিরে কর হানি

রাজায় নাহি দিব বাধা।

—দায়মোচন, ঐ, ঐ

৩। তোমার আ। -পন কোণে ॥ স্তব্ধ করি। যবে

পূর্ণরূপে। দেখি না তো। -মায়,

মোর রক্ততরঙ্গের মস্ত কলরবে

বাণী তব মিশে ভেসে যায়।

—মুক্তরূপ, ঐ, ঐ

এই দৃষ্টান্ত-তিনটি যে তিনটি স্বতন্ত্র ছন্দে রচিত তা আবৃত্তি করার সময় এদের উচ্চারণবৈশিষ্ট্যের প্রতি এবং বিশেষ করে এদের যুগধ্বনিগুলির তিনটি বিভিন্ন ব্যবহারের প্রতি লক্ষ্য করলে অতি অনায়াসেই টের পাওয়া যাবে। কিন্তু অন্তরের প্রকৃতিতে স্বতন্ত্র হলেও বাইরের গঠনপ্রণালীতে অর্থাৎ ছন্দোবদ্ধ হিসেবে এরা সম্পূর্ণরূপে অভিন্ন। ছন্দ হিসেবে দৃষ্টান্ত-তিনটি যথাক্রমে স্বরবৃত্ত, মাত্রাবৃত্ত ও বৌগিক ছন্দে রচিত। কিন্তু ছন্দোবদ্ধ হিসেবে প্রত্যেকটি দৃষ্টান্তেরই প্রথম ও তৃতীয় পংক্তি পদ্যের আর বিত্তীয় ও চতুর্থ পংক্তি খণ্ডিত বা একোনপর্বিক পদ্য। কারণ প্রত্যেক দৃষ্টান্তেই প্রথম ও তৃতীয় পংক্তিতে তিনটি পূর্ণপর্ব ও একটি অর্ধপর্ব আছে; আর বিত্তীয় ও চতুর্থ পংক্তিতে দুটি



পূর্ণপর্ব ও একটি অর্ধপর্ব আছে। পর্বগঠনের প্রণালীতেও ওই তিনটি দৃষ্টান্তের ছন্দোবদ্ধ অভিন্ন; কেননা তিনটিতেই প্রতি পর্বে চারটি করে ধ্বনিব্যাষ্টি বা 'unit' আছে। কিন্তু তিনটি দৃষ্টান্তের এই unit বা ধ্বনিব্যাষ্টি তিনটি স্বতন্ত্র প্রকৃতির এ কথা বলাই বাহুল্য। কারণ ধ্বনিব্যাষ্টির প্রকৃতি স্বতন্ত্র বলেই তো ওই তিনটি শ্লোককে তিনটি ছন্দের দৃষ্টান্তস্বরূপ উদ্ধৃত করা হয়েছে।

আরও দৃষ্টান্ত দেওয়া যাক।—

- ১। আজকে নবীন চৈত্রমাসে  
পুরাতনের বাতাস আসে,  
খুলে গেছে যুগান্তরের সেতু।  
ত্রিখ্যা আজি কাজের কথা,  
আজ জেগেছে যেসব বাধা  
এই জীবনে নাইকো তাহার হেতু।

—৩৮, উৎসর্গ, রবীন্দ্রনাথ

- ২। বুঝিয়াছি অল্পভবে  
বনমর্মর-রবে  
সে তার গোপন হাসি হেসেছে।  
অদেখার পরশেতে  
আঁধার উঠেছে মেতে,  
মন জানে, এসেছে সে এসেছে।

—অদেখা, রবীন্দ্রনাথ

- ৩। বসন্তের জয়রবে  
দিগন্ত কাঁপিল যবে  
মাধবী করিল তার সজ্জা।  
মুকুলের বন্ধ টুটে  
বাহিরে আসিল ছুটে,  
ছুটিল সকল তার লজ্জা।

—মাধবী, মহরা রবীন্দ্রনাথ

এই দৃষ্টান্ত-তিনটির বিশ্লেষণ করা অনাবশ্যক। শুধু এইটুকু বললেই যথেষ্ট হবে যে, ছন্দ হিসেবে এগুলি পৃথক্ বটে, কিন্তু ছন্দোবদ্ধ হিসেবে এক। ছন্দের দিক

থেকে এই দৃষ্টান্তগুলি যথাক্রমে স্বরবৃত্ত, মাত্রাবৃত্ত এবং ষোণিক ছন্দে রচিত, কিন্তু ছন্দোবন্ধের দিক থেকে এরা সকলেই দীর্ঘ ত্রিপদী। প্রত্যেকটি দৃষ্টান্তেরই তিনটি ‘পদে’ যথাক্রমে আট, আট ও দশটি করে ধ্বনিব্যাঙ্কি বা unit আছে, শুধু মাত্রাবৃত্তের দৃষ্টান্তটির তৃতীয় পদে একটি করে ব্যাঙ্কি বেশি আছে। বা হক, এই দৃষ্টান্ত-তিনটিকে যথাক্রমে স্বরবৃত্ত ত্রিপদী, মাত্রাবৃত্ত ত্রিপদী ও ষোণিক ত্রিপদী নামে অভিহিত করতে পারি।

আর দৃষ্টান্ত দেওয়া নিম্নপ্রয়োজন। কারণ যে দৃষ্টান্তগুলি দেওয়া হয়েছে আশা করি তার থেকেই এ কথা স্পষ্ট হয়েছে যে, বাংলা পদের ছন্দ পৃথক্ হলেও ছন্দোবন্ধ একই রকম হতে পারে। বাংলা পদের ছন্দ প্রধানতঃ ত্রিবিধ এবং ছন্দোবন্ধব হবিধ। কিন্তু ওই বহুবিধ ছন্দোবন্ধের প্রায় প্রত্যেকটিকেই ওই ত্রিবিধ ছন্দেই প্রয়োগ করা যায়।

৫

এখানে প্রসঙ্গক্রমে একটি কথা বলা প্রয়োজন মনে করি। ষোণিক ত্রিপদী ছন্দ বাংলা সাহিত্যে বহুকাল যাবৎই প্রচলিত আছে। বাংলা কাব্যসাহিত্যে স্বরবৃত্ত ত্রিপদী ছন্দের প্রবর্তন করেছেন রবীন্দ্রনাথ, আর তাঁরই হাতে এ ছন্দটি চরম পরিণতি লাভ করেছে। কিন্তু আধুনিক বাংলা কাব্যসাহিত্যে মাত্রাবৃত্ত ত্রিপদী ছন্দের অভাবটা খুব বেশি অসুভব করি। আমাদের আধুনিক কবিতায় এ ছন্দের বিরলতাটা বিশেষ লক্ষ করার বিষয়। রবীন্দ্রনাথের বিপুল কাব্য-সাহিত্যের মধ্যেও এজাতীয় ছন্দের প্রয়োগের দৃষ্টান্ত খুব কম। রবীন্দ্রনাথের রচনা থেকে মাত্রাবৃত্ত দীর্ঘ ত্রিপদীর আর-একটি দৃষ্টান্ত এখানে উদ্ধৃত করছি।—

যেখানে সে বুড়া বট

নামারে দিয়েছে জট,

ঝিল্লি ডাকিছে দিনে দুপুরে,

যেখানে বনের কাছে

বনদেবতার নাচে

টানিনিতে ঝন্ডঝন্ড নৃপ্তরে।

—দুর্গাচরণ, শিশু, রবীন্দ্রনাথ

এ দৃষ্টান্তটিতে শব্দমধ্যবর্তী যুক্তধ্বনি অর্থাৎ যুক্তবর্ণ আছে মাত্র একটি। কিন্তু

যুগ্মধ্বনির প্রাচুর্যের দ্বারা এ ছন্দে ধ্বনির যে চমৎকার বৈচিত্র্য সৃষ্টি করা যায় তার একটি দৃষ্টান্ত দিচ্ছি।—

ওগো বধু স্নন্দরী  
নব মধু স্নন্দরী  
সাত ভাই চম্পার লহ অভিনন্দন,—  
পর্ণের পাত্রে  
ফাস্তন পাত্রে  
স্বর্ণের বর্ণের ছন্দের বন্ধন।

—ব মঙ্গল, প্রবাসী ১৩৩১ ভাদ্র, রবীন্দ্রনাথ

এ রচনাটি ‘মহয়া’তে স্থান পায় নি কেন বুঝতে পারলুম না। যা হক, আমার বিশ্বাস যৌগিক ত্রিপদী ছন্দ যেমন গুরুগম্ভীর বিষয়ের উপযোগী, মাত্রিক ত্রিপদী ছন্দ তেমনি গীতিকবিতার অতি সুন্দর বাহন।

আর বাংলায় মাত্রিক ত্রিপদী ছন্দ রচনা করাও কিছু শক্ত নয়, এমন কি যৌগিক ত্রিপদীতে যেসব কবিতা রচিত হয়েছে সেগুলিকেও অতি অনায়াসেই মাত্রিক ত্রিপদীতে রূপান্তরিত করা যায়। একটি দৃষ্টান্ত দিলেই কথাটা স্পষ্ট হবে। একটু পূর্বে ‘মহয়া’ থেকে যে যৌগিক ত্রিপদীটি উদ্ধৃত করেছি সেটিকে অতি সহজেই নিম্নলিখিতরূপে মাত্রিক আকারে পরিবর্তিত করা যায়।—

বসন্ত-জয়রবে  
দিগন্ত কাঁপে যবে  
মাধবী করিল তার সজ্জা।  
মুকুলবদ্ধ টুটে  
বাহিরে আসিল ছুটে,  
টুটিল সকল তার লজ্জা।

পাঠক ‘মহয়া’র যৌগিক ত্রিপদীটির উচ্চারণধ্বনির সঙ্গে এই পংক্তি-ক’টির তুলনা করলেই বুঝতে পাববেন, একটির ধ্বনি গুরুগম্ভীর আর-একটির ধ্বনিতে রয়েছে গীতিকবিতার স্বর। বস্তুতঃ বাংলা কাব্যসাহিত্যের ইতিহাসে আদি ও মধ্য যুগে এ ছন্দটিই ছিল আমাদের গীতিকবিতার প্রধান বাহন। কিন্তু আধুনিক যুগের প্রথম দিকে এ ছন্দটি আমাদের কাব্যসাহিত্য থেকে একেবারেই বিলুপ্ত হয়ে গিয়েছিল। কিন্তু স্বথের বিষয় আমাদের আজকালকার কবিতা

আবার এ ছন্দটিকে আদয় করতে শুরু করেছেন এবং তার কলে এ ছন্দটি আবার নবতনরূপে ও বিচিত্র ভঙ্গিতে আমাদের সাহিত্যে দেখা দিয়েছে। এ স্থলে আমরা সে আলোচনায় প্রবৃত্ত হব না। রবীন্দ্রনাথের চতুর্মাত্রপবিক ছন্দ অর্থাৎ মাত্রিক (quantitative) পয়ার, ত্রিপদী প্রভৃতি ছন্দের আলোচনা-প্রসঙ্গে বাধ্যভাবে এ বিষয়ের বিশদ ও বিস্তৃত আলোচনা করা যাবে।

৬

বাংলা ছন্দের ইতিহাসে এই মাত্রিক ত্রিপদী ছন্দটির উৎপত্তি ও পরিণতির ধারাটি অতি বিচিত্র ও ঔৎসুক্যজনক। বাংলা ছন্দের ইতিহাস যখন লিখিত হবে তখন এ ছন্দটি বিশেষভাবে মনোযোগ আকর্ষণ করবে। সে আলোচনার স্থান এটা নয়। এ স্থলে আমি এ ছন্দটির গীতিকবিতার উপযোগিতা সম্বন্ধে আর একটিমাত্র প্রশঙ্গ উপাধন করব। পূর্বেই বলেছি বাংলা কাব্যের আদি ও মধ্য যুগে এ ছন্দটি ছিল গীতিকবিতার একটি প্রধান বাহন এবং প্রাচীন বাঙালি কবিদের একটি বিশেষ আদরের বস্তু। তার প্রথম পরিচয় পাই জয়দেবের গীতগোবিন্দ কাব্যে। যথা—

চন্দন । -চর্চিত ॥ -নীলক । -লেবর ॥ -পীতব । -সনবন । -মালী ।

কেলিচ । -লগ্নবি ॥ -কুণ্ডল । -মণ্ডিত ॥ -গণ্ডযু । -গম্বিত । -শালী ॥

—গীতগোবিন্দ, প্রথম সর্গ, চতুর্থ গীত

এ ছন্দটি আসলে চার মাত্রার সাতটি পর্বের যোগে উৎপন্ন হয়েছে। প্রতি পর্বে চার মাত্রা করে সাত পর্বে মোট আটশ মাত্রা আছে। তাই অনেক সময় এ ছন্দকে আটশ মাত্রার ছন্দও বলা হয়। কিন্তু শুধু আটশ মাত্রার ছন্দ বললে এ ছন্দের আসল রূপটির কথাই বলা হয় না। এর আসল রূপটি নির্ভর করছে এর পর্ববিভাগ ও যতিস্থাপনরীতির উপরে। একটু লক্ষ করলেই টের পাওয়া যাবে, উক্ত পংক্তিতেই প্রতি পর্বের পরেই একটি করে ঈষদ্ব্যতি রয়েছে; কিন্তু দ্বিতীয় ও চতুর্থ পর্বের পর যতিটা একটু অধিকতর স্থায়ী, আর পংক্তির শেষের যতিটা পূর্ণবিরামসূচক। এই তিন স্বকম যতিকে যথাক্রমে ঈষদ্ব্যতি, অর্ধব্যতি ও পূর্ণব্যতি বলতে পারি। একটি ছেদচিহ্নের দ্বারা ঈষদ্ব্যতি আর যুগ্ম ছেদচিহ্নের দ্বারা অর্ধব্যতির নির্দেশ করেছি। ঈষদ্ব্যতির দ্বারা নির্দিষ্ট এক-একটি অংশকে বলব এক-একটি ‘পর্ব’; আর অর্ধব্যতির দ্বারা বিচ্ছিন্ন অংশকে বলব এক-একটি ‘পদ’। উদ্যুক্ত শ্লোকটিতে

এ-রকম পদ আছে তিনটি, প্রথম ও দ্বিতীয় পদে পর্ব আছে ছুটি করে এবং তৃতীয় পদে পর্ব আছে তিনটি। স্বতরাং ঐধর্ম্যতির বিভাগের দিক থেকে এ ছন্দকে বলব সপ্তপর্বিক। আর অর্ধর্ম্যতির বিভাগের তরফ থেকে এ ছন্দ হচ্ছে ত্রিপদী। যদি একটি করে অতিরিক্ত মিল দিয়ে প্রাতি পংক্তির অর্ধর্ম্যতি-ছুটিকে কানের কাছে আরও স্পষ্ট করে তোলা যায় তা হলেই এ ছন্দের ত্রিপদী রূপটি আরও স্পষ্ট হয়ে উঠবে। এ-রকম পদে পদে মিল দেওয়া স্পষ্ট ত্রিপদীর দৃষ্টান্তও গীতগোবিন্দে আছে। যথা—

মুখরমধীরং

তাজ মঞ্জীরং

রিপুমিব কেলিষ্ লোলম্।

চল সখি কুঞ্জং

সতিমিরপুঞ্জং

শীলয় নীলনিচোলম্ ॥

—গীতগোবিন্দ, পঞ্চমসর্গ, একাদশ শ্লোক

বাংলা কাব্য রচনার প্রাচীনতম নিদর্শন চর্য্যচর্য্যবিনিস্করের গানগুলিতেও এই মাত্রিক ত্রিপদী ছন্দের নিদর্শন পাওয়া যায়।—

রাউতু ভগই কট ॥ তুহু কু ভগই কট ॥ সজলা আইস সহাব ।

জই তো মুটা ॥ অচ্ছসি ভাস্তী ॥ পুচ্ছ তু সদগুরু-পাব ॥

—চর্য্যচর্য্যবিনিস্কর ৪১

বাংলা সাহিত্যের মধ্যযুগে বৈষ্ণব কবিদের পদাবলীতেও এ ছন্দের প্রচুর নিদর্শন আছে। তাঁদের কাছে এ ছন্দটি খুবই আদর পেয়েছিল। গোবিন্দদাসের পদাবলী থেকে একটি দৃষ্টান্ত দিচ্ছি।—

গৌরবরণ তহুঁ ॥ শোহন মোহন ॥ হৃন্দর মধুর হঠাম ।

অনুপম অরুণকি ॥ -রণ জিনি অঘর ॥ হৃন্দর চাক বদান ॥

ভাবহি ভোর ॥ ঘোর ছহ লোচন ॥ মোচন ভবনধ-বন্ধ ।

নব নব প্রেমভর ॥ বরতহু হৃন্দর ॥ উয়ল ভকতজন-সঙ্গ ॥

রবীন্দ্রনাথের 'ভাঙ্গুসিংহের পদাবলীতে'ও এ ছন্দের দৃষ্টান্ত আছে। লক্ষ্য করার বিষয় আদিক্যুগের বৌদ্ধ পদাবলী এবং মধ্যযুগের বৈষ্ণব পদাবলীতে যে মাত্রিক ত্রিপদী ছন্দ ব্যবহৃত হয়েছে তাতে গীতগোবিন্দের ত্রিপদীর অনুরণন করে

সংস্কৃত পদ্ধতিতে স্বরের দৃষ্টদীর্ঘতা রক্ষার চেষ্টা করা হয়েছে, কিন্তু সর্বত্র সে চেষ্টা সফল হয় নি। উপরের দৃষ্টান্ত-দুটি আমি এমনভাবে বেছে উদ্ভূত করেছি যেন এ দুটিতে সংস্কৃত উচ্চারণপদ্ধতি যথাসম্ভব কম লজ্জিত হয়। এ হিসাবে সম্পূর্ণ নিখুঁত মাত্রিক ছন্দের দৃষ্টান্ত আদি ও মধ্য যুগের কাব্যসাহিত্যে খুঁজে পাওয়া দুষ্কর। আমাদের প্রাচীন সাহিত্যের অধিকাংশ মাত্রিক ছন্দেই সংস্কৃত উচ্চারণপদ্ধতি বিশেষভাবে বাহত হয়েছে; ছন্দরক্ষা করে আবৃত্তি করতে গেলে কোথাও হ্রস্বকে দীর্ঘ আর কোথাও দীর্ঘকে হ্রস্ব উচ্চারণ করতে হয়। এরূপ হবার কারণ এই যে, বাংলায় সংস্কৃতপদ্ধতির হ্রস্ব দীর্ঘ উচ্চারণ চালাবার চেষ্টাই কৃত্রিম ও অস্বাভাবিক। বাংলা ভাষার ধনিপ্রকৃতি সংস্কৃত উচ্চারণের বিরুদ্ধধর্মী; বাংলার ধাতুতে সংস্কৃত উচ্চারণ বরদাস্ত হয় না। তাই দেখতে পাই পদাবলী সাহিত্যে সংস্কৃতির উচ্চারণরীতি এত ঘন ঘন খণ্ডিত হচ্ছে। তার মানে এই যে, ওই সাহিত্যে সংস্কৃত পদ্ধতি ও বাংলার স্বকীয় পদ্ধতির মধ্যে একটা বিরোধ চলছে এবং বহু স্থলেই বাংলা পদ্ধতি সংস্কৃতকে অতিক্রম করে আপন প্রাধান্ত ঘোষণা করছে। তার পরে ক্রমে যখন বাংলা উচ্চারণের নিকট সংস্কৃত সম্পূর্ণরূপে পরাভূত হল তখন বাংলা সাহিত্যে মাত্রিক ত্রিপদী বিলুপ্ত হয়ে গেল এবং তার স্থানে যৌগিক বা তথাকথিত দীর্ঘ ত্রিপদী দেখা দিল, অর্থাৎ তখন আট-আট-বার মাত্রার ত্রিপদীর স্থলে আট-আট-দশ ‘অক্ষরের’ ত্রিপদীর প্রচলন হল। বোধ করি ‘মাত্রিক’ ত্রিপদীর এই ‘আক্ষরিক’ রূপান্তর অষ্টাদশ শতকের মধ্যভাগে ভারতচন্দ্রের হাতে পূর্ণতা লাভ করেছিল। সে সময় থেকে ঊনবিংশ শতকের শেষ পাদ পর্যন্ত বাংলা সাহিত্যে আক্ষরিক দীর্ঘ ত্রিপদীরই একাধিপত্য চলল। অবশেষে বাংলা ছন্দে রেনেসাঁস-এর প্রবর্তক ছন্দজ্ঞা রবীন্দ্রনাথ ‘মানসী’র যুগে আবার বাংলায় মাত্রিক ত্রিপদীর প্রবর্তনের চেষ্টা করেন (১৮৮৮)। যথা—

তোমায়ে ঘেরিয়া ফেলি

কোথা সেই করে কেলি

কল্পনা, মুক্ত পবন ?

—কবির প্রতি নিবেদন, মানসী, রবীন্দ্রনাথ

মানসীর যুগেই তিনি খাটি বাংলা পদ্ধতিতে ‘আক্ষরিক’ ত্রিপদীকে ‘মাত্রিক’ রূপ দেবার চেষ্টা করেন; কিন্তু তাঁর এই প্রথম প্রয়াস সফল হয় নি। কেন

হয় নি এবং অবশেষে কিরূপে বহু পরীক্ষার পর বাংলার প্রাচীনতম মাত্রিক ত্রিপদীটি বিংশ শতাব্দীর ছন্দবৈজ্ঞানিক-এর ফলে আবার নবতন রূপ ধারণ করেছে, সে কথা বারাস্তরে বিশদরূপে দেখাতে চেষ্টা করব। বর্তমান কালে এই মাত্রিক ত্রিপদীর নবীনতম ও খাঁটি বাংলা রূপ কেমন হয়েছে, দুটি দৃষ্টান্তযোগে তা দেখিয়েই এ প্রসঙ্গ সমাপ্ত করব।—

১। অশোক রোমাঞ্চিত মঞ্জরিয়া

দিল তার সঞ্চয় অঞ্জলিয়া।

মধুকরগুঞ্জিত

কিশলয়গুঞ্জিত

উঠিল বনাঞ্চল চঞ্চলিয়া ॥

—বরযাত্রা, মহরা, রবীন্দ্রনাথ

২। মধুকরপদভর ॥ -কম্পিত চম্পক ॥ অন্ধনে ফোটে নি কি আঞ্জো ?...

বন্দনসংগীত ॥ -গুঞ্জনমুখরিত ॥ নন্দনকুঞ্জে বিরাজো ॥

—প্রত্যাশা ২৫, প্রবাহিণী, রবীন্দ্রনাথ

## স্বরবৃত্ত ছন্দের আইন-কানুন

বাংলা ছন্দের তিনটি প্রধান ধারার মধ্যে স্বরবৃত্ত অন্ততম এবং যদিও এ ছন্দটির উৎপত্তি অতি প্রাচীন কালেই হয়েছিল তথাপি বাংলা কাব্যসাহিত্যের আসরে এর আবির্ভাব হয়েছে সকলের শেষে। হালকা ভাবের কবিতার বাহন হিসেবে এর ব্যবহার ঈশ্বর গুপ্ত, মধুসূদন, হেমচন্দ্র প্রভৃতির রচনায় দেখা যায়। তার আগেও রামপ্রসাদের গানে এর যথেষ্ট প্রয়োগ হয়েছে। রবীন্দ্রনাথও প্রথমে শুধু ছড়াভাষায় কবিতায় এ ছন্দ ব্যবহার করতেন। ‘ক্ষণিকা’র যুগেই তিনি এ ছন্দটিকে নানা ভঙ্গিতে প্রয়োগ করে এর স্বার্থ শক্তি আবিষ্কার করেন। তার পর ‘উৎসর্গে’ এবং অন্তান্ত কাব্যগ্রন্থে তিনি এটিকে অতি উচ্চ ভাবের কবিতায় ও গানে বহুল রূপে ব্যবহার করেছেন এবং এ ছন্দটিকে কত বিবিধ ভঙ্গিতে রূপান্তরিত করা যায় তাও দেখিয়েছেন।

রবীন্দ্রনাথের পরে ঝিক্কেললাল, বিজয়চন্দ্র এবং সত্যেন্দ্রনাথের হাতে এ ছন্দটি বিশেষ সমাদর লাভ করেছে। আর, এই তিন জনই দেখিয়েছেন এ ছন্দের প্রকৃতিটি আসলে হচ্ছে syllabic ; অর্থাৎ সিলেব্‌ল বা স্বরই এ ছন্দের মূল উপাদান। ঝিক্কেললালের ‘আলেখ্য’ গ্রন্থের ভূমিকা ( ১৩১৪ ), বিজয়চন্দ্রের ‘কবিতার ভাষা ও ছন্দ’ ( প্রবাসী ১৩২২ অগ্রহায়ণ ) এবং সত্যেন্দ্রনাথের ‘ছন্দসরস্বতী’ ( ভারতী ১৩২৫ বৈশাখ ) দ্রষ্টব্য। তাঁরা আরও স্বীকার করেছেন যে, এই ছন্দটিতেই বাংলা ভাষার উচ্চারণরূপ সম্পূর্ণ অবিকৃত আছে। বাংলা ছন্দের অপর দুই ধারায় অর্থাৎ মাত্রাবৃত্ত এবং যৌগিক ( অর্থাৎ তথাকথিত ‘অক্ষর’-বৃত্ত ) ছন্দে বাংলা ভাষার স্বার্থ উচ্চারণরূপটি বজায় থাকে না। বোধ করি রবীন্দ্রনাথই সর্বপ্রথমে এ বিষয়ে সকলের দৃষ্টি আকর্ষণ করেছিলেন।  
—সবুজপত্র ১৩২১ জ্যৈষ্ঠ, প্রাবণ।

স্বরবৃত্ত ছন্দটি যে আসলে syllabic অর্থাৎ সিলেব্‌ল-সংখ্যার উপরেই নির্ভর করে সে বিষয়ে সন্দেহ করা চলে না। —বিচিত্রা ১৩৩৯ ভাদ্র। ইংরেজি ছন্দও প্রধানতঃ সিলেব্‌ল নিয়েই গঠিত। কাজেই এ স্থলে ইংরেজি ছন্দের সঙ্গে বাংলা স্বরবৃত্ত ছন্দের তুলনা করা অপ্রাসঙ্গিক হবে না। ইংরেজি ছন্দও আসলে



syllabic কিনা সে বিষয়ে পণ্ডিতদের মধ্যে মতভেদ আছে। কারও মতে ও ছন্দ আসলে accentual, অর্থাৎ উচ্চারণের accent মানে ঝাঁক নিয়েই ও ছন্দের স্বরূপ; আবার অগ্র মতে ইংরেজি ছন্দ মূলতঃ quantitative বা মাত্রিক। বাংলা ছন্দের স্বরূপ নিয়েও এরূপ মতবৈধ দেখা দিয়েছে।

পূর্বেই বলেছি ‘দ্বিজেন্দ্রলাল, বিজয়চন্দ্র, সত্যেন্দ্রনাথ প্রভৃতির মতে এ ছন্দটি সিলেব্-এর ভিত্তির উপরেই প্রতিষ্ঠিত। রবীন্দ্রনাথ কিন্তু এ ছন্দেরও মাত্রিক দিকটাকেই মুখ্য বলে মনে করেন। আবার তৃতীয় মতে এক্সেন্ট বা উচ্চারণের ঝাঁকই এ ছন্দের মূল কথা। আমি দেখাতে চেষ্টা করেছি যে, এ ছন্দের syllabic প্রকৃতিটাই এর মুখ্য কথা এবং এর মাত্রিক দিকটা গোণ হলেও একেবারে উপেক্ষণীয় নয়। আর মাত্রাবৃত্ত এবং যৌগিক ছন্দের চেয়ে যে এ ছন্দে accent-এর রূপটি অধিকতর আত্মপ্রকাশ করেছে সে বিষয়েও সন্দেহ করা চলে না।

ইংরেজি ছন্দ বিশ্লেষণ করলে দেখা যায় যে, শুধু syllable-কে আশ্রয় করে ও ছন্দের মূল প্রকৃতির সাক্ষাৎ মেলে না; শুধু accent-এর প্রতি লক্ষ রেখেও সর্বদা বা সর্বত্র ও ছন্দের বিশ্লেষণ করা সম্ভব নয়। আর, মাত্রা বা quantityর প্রতি লক্ষ রেখে ও ছন্দের বিশ্লেষণ করতে গেলে মাত্রার একটি স্থির মূল্য বন্ধা করা যায় না। বাংলা স্বরবৃত্ত ছন্দ সম্বন্ধেও এ কথা অনেকটা খাটে। স্বরবৃত্ত ছন্দে প্রতি পর্বের সিলেব্-সংখ্যা সর্বত্র সমান নয়, এ ছন্দের প্রতি পর্বেরই accent পাওয়া যায় না; আর মাত্রিক সমতাও এ ছন্দে নেই। সত্যেন্দ্রনাথ এবং রবীন্দ্রনাথ উভয়েই এ ছন্দের মাত্রানির্ণয় করতে চেষ্টা করেছেন। কিন্তু তাঁদের এ চেষ্টা সফল হয়েছে বলা যায় না।

যা হক, ইংরেজি ছন্দের সঙ্গে বাংলা স্বরবৃত্তের পার্থক্য দুটি বিষয়ে খুবই বেশি। ইংরেজি ছন্দের প্রতি পর্বে সিলেব্-সংখ্যা সাধারণতঃ দুই, তবে তিন সিলেব্-এর ছন্দও ইংরেজিতে যথেষ্ট আছে। বাংলায় সাধারণতঃ প্রতি পর্বে সিলেব্- থাকে চারটি করে; তিন সিলেব্ এবং দুই সিলেব্-এর ছন্দও বাংলায় রচিত হয়েছে, যদিও তাদের সংখ্যা খুবই কম। দ্বিতীয়তঃ, ইংরেজিতে পর্বের আদি, মধ্য এবং অন্তে accent-এর অবস্থানভেদে ছন্দের প্রকারভেদ ঘটে। কিন্তু বাংলায় তা হবার জো নেই; বাংলায় যেখানে accent থাকে সেখানে তা পর্বের প্রথম সিলেব্-এর উপরেই থাকে, অগ্রজ থাকে না। কাজেই accent-এর অবস্থানভেদে ছন্দের প্রকারভেদ বাংলায় হয় না।

এবার স্ববৃত্ত ছন্দের কয়েকটি নিয়মের সংক্ষিপ্ত উল্লেখ করা যাক ।—

১। সাধারণতঃ এ ছন্দের প্রতি পর্বে চারটি করে সিলেব্ল থাকে । কিন্তু স্থানে স্থানে দু-এক পর্বে তিনটি করেও সিলেব্ল থাকতে পারে ; এরূপ ক্ষেত্রে তিনটি ( অস্তুতঃ দুটি ) সিলেব্ল যুগ্মধ্বনি হওয়া চাই । যথা—

আমার মা না । হয়ে তুমি ॥ আর কারও মা । হলে

ভাবছো তোমায় । চিন্তেম না, ॥ যেতেম না ঐ । কোলে ?

—অন্ত্ মা. শিশু ভোলানাথ. রবীন্দ্রনাথ

দ্বিতীয় পংক্তির দ্বিতীয় পর্বে তিনটি সিলেব্ল আছে এবং তার প্রথম দুটি যুগ্মধ্বনি ।

২। কখনো কখনো এক পর্বে দুটিমাত্র সিলেব্ল থাকতে পারে । কিন্তু এই ব্যতিক্রমের সংখ্যা খুবই কম । যথা—

বাইরে কেবল । জলের শব্দ ॥ বুপ্. বুপ্. । বুপ্.—

দৃষ্টি ছেলে । গল্প শোনে ॥ একেবারে । চূপ ।

—বিষ্টি পড়ে টাপুর টুপুর, কড়ি ও কোমল, রবীন্দ্রনাথ

এখানে প্রথম পংক্তির তৃতীয় পর্বে মাত্র দুটি সিলেব্ল । কিন্তু ওই সিলেব্ল-দুটিকে টেনে পড়ে ধ্বনির অভাবে পূরণ করতে হচ্ছে ।

৩। এ ছন্দে প্রতি পর্বের মাত্রাপরিমাণ পাঁচ বা ছয় হওয়াই সাধারণ নিয়ম । কিন্তু কোনো কোনো স্থলে চার মাত্রাও দেখা যায় । কিন্তু সেসব স্থলে সচরাচর প্রথম সিলেব্লটির উপরে accent থাকায় সে সিলেব্লটি অপেক্ষাকৃত দীর্ঘ শোনায় এবং তাতেই এক মাত্রার অভাব পূরণ হয়ে যায় । যথা—

মরব না ভাই, । নিপুণিকা ॥ চতুরিকায় । শোকে,

তীরা সবাই । অন্ত নামে ॥ আছেন মর্ত্য । -লোকে ।

—সেকাল, কণিকা, রবীন্দ্রনাথ

এই পংক্তি-দুটি ঠিক মতো আবৃত্তি করলেই দেখা যাবে, এর প্রতি পর্বের প্রথম ধ্বনিটির উপরে accent রয়েছে । আর ওই accent-এর অন্তর্গত প্রথম পংক্তির দ্বিতীয় পর্বের মাত্রার অভাবটা বোধ হয় না ।

৪। এ ছন্দের মাত্রাবিচার করলে দেখা যাবে যে, এটি আসলে একটি যাদ্ধাত্মিক ছন্দ । কোনো কোনো পর্বে প্রকৃত্ততঃই ছয় মাত্রা থাকে ; অন্ততঃ দু-এক মাত্রার ফাঁক থাকে । উপরের দুটো উদাহরণে ‘মরব না ভাই’ এবং ‘আছেন মর্ত্য’,

এই দুই পর্বে পূর্ণ ছয় মাত্রা আছে। অত্র পূর্ণ ছয় মাত্রা নেই। দু-এক মাত্রার যে ফাঁক থাকে তার মধ্যে দুটি তত্ব বর্তমান। পর্বের প্রথম ধ্বনিটি অযুগ্ম হলেও তার উপরে accent থাকার দরুন সেটি কতকটা যুগ্মধ্বনির মর্যাদা প্রাপ্ত হয়, তাতেই এক মাত্রার অভাব পূরণ হয়। উপরের দৃষ্টান্তটিতে ‘নিপুণিকা’, ‘চতুরিকার’, ‘তারা সবাই’ প্রভৃতি পর্বের প্রথম ধ্বনিটি অযুগ্ম হলেও accent থাকার দরুন কতকটা যুগ্মধ্বনির মর্যাদা পেয়েছে; তাতেই এক মাত্রার অভাবও পূরণ হয়েছে। ফাঁকের দ্বিতীয় তত্বটি হচ্ছে এই। পর্বের শেষ ধ্বনিটি অযুগ্ম হলেও তার প্রকৃতিও বৈমাত্রিক। কারণ ওই ধ্বনিটির পরেই অবকাশ থাকায় ওই অবকাশের মধ্যেই এক মাত্রার স্থান থাকে। উপরের দৃষ্টান্তটির প্রতি বিশেষভাবে লক্ষ করলেই দেখা যাবে যে, ‘চতুরিকার’ এই পর্বটির পরে ধ্বনির অবকাশ যতটা ‘নিপুণিকা’ পর্বের পরবর্তী ধ্বনির অবকাশ তার চেয়ে বেশি; অর্থাৎ ‘নিপুণিকা’ শব্দের শেষ অযুগ্ম ধ্বনিটির পরে আর-একটি আশ্রিত বর্ণের অবকাশ রয়েছে, ‘অত্র নামে’ এই পর্বটির পরেও তেমনি একটি আশ্রিত বর্ণের অবকাশ আছে। সুতরাং accentএর এক মাত্রা এবং অবকাশের এক মাত্রা, এই দুই মাত্রার হিসাব সহ ‘নিপুণিকা’ শব্দেও ছয় মাত্রার সন্ধান মিলবে। এই হিসাবে দেখা যাবে উপরের দৃষ্টান্তটির প্রতি পর্বেই ছয় মাত্রা আছে।

কিন্তু একটি বিষয়ে একটু সাবধান হওয়া দরকার। accentএর প্রভাবে ধ্বনির কতকটা দীর্ঘতা হয় বলে ‘মরব না ভাই’ এবং ‘আছেন মর্তা’ এই দুই পর্বে সাত মাত্রা গণনা করার প্রয়োজন নেই। পর্বের প্রথম ধ্বনিটি যদি যুগ্ম হয় তা হলে তার উপর accent থাকাতে ওই ধ্বনির মাত্রাবৃদ্ধি হয় না, কিন্তু তার তীক্ষ্ণতা বৃদ্ধি হয়; এবং সেজন্যই পর্বের প্রথম ধ্বনিটি যুগ্ম হলে ছন্দের তরঙ্গায়িত ভঙ্গিটি খরতর হয়ে ওঠে। যথা—

রিক্ত ষারা সর্বহারা

সর্বজয়ী বিশ্বে তারা ;

গর্বময়ী ভাগ্যদেবীর

নয়কো তারা ত্রি-তদাস ।

—হতভাগ্যের গান, কল্পনা, রবীন্দ্রনাথ

দ্বিতীয়তঃ, ‘আছেন মর্তা’ এই পর্বটিতে প্রথম ধ্বনিটি অযুগ্ম এবং তার উপরে

একটু বৃহৎ accentও আছে। কিন্তু তা হলেও এই পর্বে সাত মাত্রা নেই। কারণ যেসব স্থলে পর্বের দ্বিতীয় ধ্বনিটি যুগ্ম অর্থাৎ দ্বিমাত্রিক হয় সেসব স্থলে accentএর দ্বারা ধ্বনির তীব্রতাই হয়, দীর্ঘতা হয় না। এখানেও ‘আছেন’ এর আ-এর উপর accent থাকে। সত্ত্বেও এই ধ্বনিটি দীর্ঘত্ব লাভ করে নি, কিন্তু তীব্রতা লাভ করেছে। পক্ষান্তরে লক্ষ করলে টের পাওয়া যাবে ‘নিপুণিকা’ এবং ‘চতুরিকার’ পর্বে নি এবং চ ঙ্গৎ দীর্ঘ শোনায়।

বাংলা স্বরবৃত্ত ছন্দের মাত্রানির্ণয় এবং তার আইন-কানুন সম্বন্ধে বিস্তৃততর আলোচনা করার প্রয়োজন আছে। কিন্তু বর্তমান প্রবন্ধে স্থানান্তাব। সুতরাং এ ছন্দের কয়েকটি মাত্র নিয়মের প্রতি ইঙ্গিত করেই এ প্রসঙ্গ সমাপ্ত করছি।

ଅ ହ ସ ଜ



## পাঠপরিচয়

এই গ্রন্থে সংকলিত প্রবন্ধগুলি রচনাকাল অল্পসারে দুই পর্বে বিভক্ত। প্রথম পর্বে (১৩২৯-৩০) আছে মোট তিনটি প্রবন্ধ, দ্বিতীয় পর্বের (১৩৩৮-৩৯) প্রবন্ধসংখ্যা ষোল। দুই পর্বের কালগত ব্যবধান প্রায় আট বৎসর। দুই পর্বের রচনাগুলির প্রকৃতিগত পার্থক্যও কম নয়। তাই এই দুই পর্বের রচনাগুলির পরিচয়ও দুই ভাগে দেওয়া গেল।

### প্রথম পর্ব

আমি যখন ছন্দ আলোচনায় প্রবৃত্ত হই তখনও আমাদের সাহিত্যে প্রণালী-বদ্ধ ছন্দ-ব্যাকরণ রচনার সূত্রপাত হয় নি। তার আগে অবশ্য শশাঙ্কমোহন সেন, রবীন্দ্রনাথ ঠাকুর, বিজয়চন্দ্র মজুমদার ও সত্যেন্দ্রনাথ দত্ত, এই চার কবির কয়েকটি প্রবন্ধে বাংলা ছন্দের উপরে নানা দিক থেকে আলোকপাতের প্রয়াস দেখা যায়। কিন্তু কোনোটিতেই সুনির্দিষ্ট পদ্ধতিতে বাংলা ছন্দের সামগ্রিক পরিচয় দেবার অভিপ্রায় লক্ষিত হয় নি। এই অভূতপূর্ব আমাকে প্রণালীবদ্ধ ছন্দ-ব্যাকরণ রচনার প্রবর্তনা দান করে। তার ফলেই রচিত হয় ‘বাংলা ছন্দ’ ও ‘ছন্দের শ্রেণীবিভাগ’ নামে দুই ভাগে বিভক্ত একটি দীর্ঘ প্রবন্ধ। রচনাকাল ১৩২৮ সালের ফাল্গুন মাস। চৈত্র মাসের প্রথম সপ্তাহে পরিমার্জিত হয়ে এটি প্রবাসী পত্রিকায় প্রেরিত হয়। আট মাস পরে এটি ওই পত্রিকার ১৮৮ গুটি সংখ্যায় ধারাবাহিকভাবে প্রকাশিত হয় (প্রবাসী ১৩২৯ পৌষ-চৈত্র এবং ১৩-০ বৈশাখ) বিভিন্ন নামে। ‘বাংলা ছন্দ’ অংশ খণ্ডিত হয়েছিল তিন ভাগে আর ‘ছন্দের শ্রেণী বিভাগ’ খণ্ডিত হয়েছিল দুই ভাগে। ধারাবাহিক ভাবে প্রকাশকালে উক্ত পাঁচটি ভাগকে কার্যতঃ পাঁচটি স্বতন্ত্র প্রবন্ধের রূপ দেওয়া হয় এবং মূল প্রবন্ধের কোনো কোনো অংশের উপনামকে মুখ্য নামের মর্যাদা দেওয়া হয়। এই দ্বিধাবিভক্ত প্রবন্ধটি প্রবাসীতে যে পাঁচ নামে প্রকাশিত হয়েছিল, তা নিয়ে তালিকা-আকারে দেখানো হল।—

১ বাংলা ছন্দ	৩২৯ পৌষ
২ স্বরবৃত্ত ছন্দ	১৩২৯ মাঘ
৩ স্বরবৃত্ত ছন্দের বিশেষত্ব	১৩২৯ ফাল্গুন

৪ ছন্দের শ্রেণীবিভাগ

১৩২২ চৈত্র

৫ মাত্রাবৃত্ত ছন্দ

১৩৩০ বৈশাখ

প্রথম ও চতুর্থ নাম দুটি ছিল মূলপ্রবন্ধের প্রধান দুই ভাগের শিরোনাম। বাকি তিনটিই ছিল ওই দুই ভাগের কোনো কোনো অপ্রধান অংশের উপনাম, পত্রিকায় প্রকাশকালে সম্পাদকীয় ব্যবস্থাপনায় মুখ্যত্ব প্রাপ্ত। প্রবন্ধটির উভয় ভাগের সামগ্রিক ভাবসংগতি রক্ষার প্রয়োজনে বর্তমান সংকলনে এগুলিকে আবার উপনামে পরিণত করে পূর্বমর্ধাদায় প্রতিষ্ঠিত করা গেল।

সম্পাদনাকালে প্রবন্ধটি সর্বত্র ঠিক যথাস্থানে খণ্ডিত হয় নি বলে দু-একটি স্থানে কিছু ক্রটি ঘটেছিল। মাসিক পত্রিকার স্বল্পায়ত দুই স্তম্ভে মুদ্রিত হওয়াতে দৃষ্টান্ত হিসাবে উদ্ধৃত কবিতাংশগুলির অভিপ্রেত পঙ্ক্তিসম্ভাও সর্বত্র রক্ষা করা যায় নি। তাছাড়া পারিভাষিক চিহ্ন-স্থাপনে, বানানে ও অল্প কোনো কোনো বিষয়ে বহু মূত্রণ-প্রমাদ ঘটেছিল। বর্তমান সংকলনে এইসব ক্রটিমোচনে যথাসাধ্য চেষ্টা করা হয়েছে।

প্রবন্ধ রচনাকালে বিভিন্ন ছন্দের দৃষ্টান্ত হিসাবে উদ্ধৃত পদ্যাংশগুলির পূর্ণ পরিচয় দেওয়া ছিল। কিন্তু পত্রিকায় প্রকাশকালে সম্পাদকের বিবেচনায় অনাবশ্যক বোধ হওয়াতে উদ্ধৃত দৃষ্টান্তগুলির পরিচয়-অংশ প্রথম দু'তিন মাস সম্পূর্ণ বর্জিত হয়। আমি তখন সম্পাদককে পত্রযোগে অত্নরোধ করি ওই পরিচয় অংশগুলি ঘেন বর্জিত না হয়। তারপর থেকে গুণ্ডলি বর্জিত হল না বটে, কিন্তু সংক্ষিপ্ত হল। কিন্তু লেখক ও পাঠক, সকলের পক্ষেই দৃষ্টান্তগুলির পরিচয় জানা প্রয়োজন। নতুবা আলোচনাধীন ছন্দের রূপ ও রীতির সত্যতা যাচাই করা সহজ হয় না। তাই গ্রন্থভুল করার সময়ে দৃষ্টান্তগুলির পূর্ণ পরিচয় দেবার চেষ্টা করা গিয়েছে। প্রবন্ধ রচনাকালে কায় কোন্ রচনা থেকে দৃষ্টান্তগুলি সংগ্রহ করেছিলাম, তা পঞ্চাশ বৎসরের অধিক কাল পরে সর্বাংশে স্মরণে আনা কঠিন। তথাপি ছুটিমাত্র বাদে বাকি সব দৃষ্টান্তেরই পরিচয় দেওয়া সম্ভব হয়েছে। যে দুটির পরিচয় দেওয়া যায় নি তার মধ্যে একটির সন্ধান পাওয়া গিয়েছে মূত্রণ সমাপ্তির পরে। এই দৃষ্টান্তটির ( পৃ ২০ ) প্রথম পঙ্ক্তি এই—

কাছে যাই যার | দেখিতে দেখিতে | চলে যায় সেই | দূরে

এই অংশটুকু উদ্ধৃত হয়েছে রবীন্দ্রনাথের 'উৎসর্গ' গ্রন্থের 'আকাশ-সিদ্ধ মাঝে এক ঠাই' ইত্যাদি ১৫ সংখ্যক কবিতার দ্বিতীয় স্তবক থেকে। কিন্তু



দুধ দেবে, | ছানা দেবে, | কীর দেবে | আর

ইত্যাদি দ্বিতীয় দৃষ্টান্তটির ( পৃ ২৩-২৪ ) উৎস-নিরূপণ এখনও সম্ভব হয় নি। কোনো মহাদয় পাঠক যদি এটির সন্ধান দেন তাহলে উপকৃত হব।

অনেকগুলি দৃষ্টান্ত সংকলিত হয়েছিল সাময়িক পত্রে প্রকাশিত কবিতা থেকে। এসব কবিতা পরে কবিদের বিভিন্ন গ্রন্থে স্থান পায়। পাঠকের সুবিধার কথা মনে রেখে এসব ক্ষেত্রে পত্রিকার বৎসর মাস নির্দেশ না বরে যথাসম্ভব গ্রন্থ ও কবিতার নামই উল্লিখিত হল। অন্তের রচিত দৃষ্টান্তের অভাবে বর্তমান লেখককেই কতকগুলি দৃষ্টান্ত রচনা করে দিতে হয়েছিল। প্রবন্ধ রচনার সময়ে এসব ক্ষেত্রে রচয়িতার নাম উদ্ধৃত রাখা হয়েছিল। পরবর্তী কালে দেখা গেল তাতে কারও কারও মনে কিছু ভ্রান্ত ধারণার সৃষ্টি হয়েছে। কেউ কেউ এগুলিকে সত্যেন্দ্রনাথ বা অশ্রু কোনো কবির রচনা বলে ধরে নিয়েছিলেন। একটা দৃষ্টান্ত দিচ্ছি। যতদূর মনে পড়েছে কবি সুনীল বসু তাঁর ‘ছন্দেব গোপন কথা’ বইটিতে সংস্কৃত ভূজঙ্গপ্রয়াত ছন্দের দৃষ্টান্ত হিসাবে বর্তমান গ্রন্থের (পৃ ৪৫)

সমুদ্রের তরঙ্গের গভীর তাল ভয়ংকর

ইত্যাদি দৃষ্টান্তটি উদ্ধৃত করেন। এটির রচয়িতার নাম কারও জানা ছিল না। তাই তিনিও স্বভাবতঃই এটির নাম উল্লেখ করেন নি। কিন্তু দেখা গেল অনেকেরই ধারণা এটি কবি সুনীল বসুরই রচনা। অল্পরূপ ভ্রান্তি নিরসনের অভিপ্রায়ে এসব দৃষ্টান্ত লেখকের রচনা বলেই চিহ্নিত হল।

ইংরেজি দৃষ্টান্তগুলির অধিকাংশই F. T. Palgrave : Golden Treasury থেকে সংকলিত। সেকালে এটি ছিল আমার প্রিয় বই। ইংরেজি কবিতার শুধু ভাবরস নয়, ছন্দরসের প্রতি আমি প্রথম আকৃষ্ট হই প্রধানতঃ এই বই পড়েই। সে সময়ে যেসব কবিতা থেকে ছন্দের দৃষ্টান্ত উদ্ধৃত করেছিলাম তার সবগুলি এ বই-এর আধুনিক সংস্করণে পাওয়া যায় না। কারণ এ বই-এর বিভিন্ন সংস্করণে কিছু পূর্বতন কবিতা বর্জন করে তার স্থলে নূতন কবিতা গ্রহণ করা হয়। উদ্ধৃত দৃষ্টান্তের উৎস-নির্দেশ করার সময় বাহুল্য বোধে Golden Treasury বই-এর সংস্করণ উল্লেখ করা হয় নি। আগ্রহী পাঠক এ বই-এর বিভিন্ন সংস্করণ দেখে নিতে পারেন।

প্রবাসীতে প্রকাশকালে কোনো পাদটীকা ছিল না। গ্রন্থে গ্রহণকালে কয়েকটি পাদটীকাও যোগ করা হল। প্রবন্ধ রচনাকালে কয়েকটি দৃষ্টান্ত

সংকলিত হয়েছিল দীনেশচন্দ্র সেনের ‘বঙ্গভাষা ও সাহিত্য’ গ্রন্থের চতুর্থ সংস্করণ থেকে। সেগুলির পূর্ব পরিচয়ও দেওয়া গেল পাদটীকাতেই।

প্রথম পর্বের তৃতীয় প্রবন্ধটি প্রবাসীতে প্রকাশিত হয় (১৩৩০ মাঘ-চৈত্র) তিন ভাগে বিভক্ত হয়ে। কিন্তু তিন ভাগেই ‘বাংলা ছন্দ ও সংগীত’ নাম অপরিবর্তিত থাকে। তিন ভাগের জন্ত তিন নাম স্বীকৃত হয় নি। সুতরাং এটির বেলায় কোনো অংশের নাম পরিবর্তনের প্রয়োজন হয় নি। প্রথম দুই প্রবন্ধের গ্রন্থ এটিতেও মুদ্রণগত ত্রুটিশোধন, বানানের সমতাবিধান, অল্পচ্ছেদের পুনর্বিজ্ঞাস, বাঁহরঙ্গের প্রসাধন ছাড়া মূল বক্তব্যের কোনো পরিবর্তন করা হয় নি। পরবর্তী কালে যেসব মত বা পরিভাষা পরিত্যক্ত হয়েছে, ইতিহাস রক্ষার প্রয়োজনে তাও যথাযথভাবে রক্ষিত হয়েছে। একটি শব্দও বদলানো হয় নি।

প্রথম দুই প্রবন্ধ প্রবাসীতে প্রকাশের পরে তাতে কিছু ত্রুটি ও অপূর্ণতা (বিশেষতঃ যতির তারতম্য ও যতিলোপ সম্পর্কে) লক্ষিত হয়। ফলে এই তৃতীয় প্রবন্ধটিতে সেসব ত্রুটি ও অপূর্ণতা নিরসনের প্রয়াস করা গিয়েছিল। তাই এটিকে অনেকাংশে প্রথম দুই প্রবন্ধের পরিপূরক বলে গণ্য করা যেতে পারে।

সংযোজন

‘ছন্দ-পরিক্রমা’র নিবেদনে জানিয়েছি, ছন্দ-প্রবন্ধ রচনায় হাত দেবার পূর্বে দীর্ঘকাল ধরে ছন্দ-রচনায় হাত পাকাতে হয়েছিল। তার ফসলের পরিমাণও কম হয় নি। কিন্তু সেগুলি সব মরসুমী, প্রয়োজনের ঋতুর সঙ্গে সঙ্গেই সেগুলির আয়ুষ্কাল নিঃশেষ হয়েছে। তবে বিভিন্ন সময়ে প্রকাশিত ছন্দ-প্রবন্ধগুলিতে সেগুলির কোনো কোনো অংশ ছন্দের দৃষ্টান্ত হিসাবে উদ্ধৃত হওয়াতে বিলুপ্তির হাত থেকে রক্ষা পেয়ে গেছে। ছন্দ-জিজ্ঞাসার প্রথম দুটি প্রবন্ধেই তার কিছু নিদর্শন পাওয়া যাবে। এসব নিদর্শন জাতুঘরে রক্ষিত প্রাপ্ত নিদর্শন মাত্র। তার বেশি মূল্য এগুলির প্রাপ্য নয়।

গ্রন্থের সম্পূর্ণতার প্রয়োজনে প্রথম পর্বের তিনটি প্রবন্ধের পরে নিশীথে, যৌবন-বোধন ও স্মৃতিযজ্ঞ নামে তিনটি পঞ্চরচনা যুক্ত করা গেল। এই তিনটি রচনাকে কেন বিশ্বস্তির হাত থেকে উদ্ধার করে আধুনিক কালের হাতে অর্পণ করা হল, তার একটু কৈফিয়ত দেওয়া কর্তব্য। প্রথমেই বলা উচিত যে, শুধু ইতিহাস-রক্ষাই এই তিনটি রচনা পুনঃপ্রকাশের উদ্দেশ্য নয়। এগুলিকে এ গ্রন্থে স্থান

দেবার আসল উদ্দেশ্য ছন্দগত। এই ছন্দগত অভিপ্রায়টা কি, তা একটু বুঝিয়ে বলা দরকার।

‘নিশীথে’ রচনাটি পূর্বোক্ত হাত পাকাবার অভ্যাসেরই ফল। ছন্দ-প্রবন্ধ প্রকাশের পাঁচ-ছয় বছর আগেকার রচনা এটি। ওই জাতীয় আরও বহু রচনার জায় এটিও কোথাও প্রকাশ করবার অভিপ্রায় আমার ছিল না। কবিবন্ধু কাজী নজরুল ইসলামের বিশেষ আগ্রহে এটি প্রকাশিত হয় ‘মোসলেম ভারত’ পত্রিকায় (১৩২৮ অগ্রহায়ণ)। তাই, যে ছন্দ উদ্ভাবনার প্রেরণায় এটি রচিত হয়েছিল সে প্রেরণার কথাটুকু আজও মনে রয়ে গেছে। নতুবা বিশ্বস্তির অন্ধকারে তলিয়ে যেত। অনেকদিন যাবৎ আমার মনে প্রশ্ন ছিল স্বরবৃত্ত (আধুনিক পরিভাষায় দলবৃত্ত) ছন্দ কি শুধু লঘু ভাবের বাহন হবারই যোগ্য? ইংরেজি ছন্দের মতো এই বাংলা সিলেবিক ছন্দেও কি ধ্বনিগাঙ্গীর্ষ ছুটিয়ে তোলা যায় না বা এ ছন্দকে গুরুগঙ্গীর কাশ্মীরবাহন বাহন করা যায় না? আমার বিশ্বাস ছিল, যায়। তাই দীর্ঘকাল নানাভাবে পরীক্ষা চালিয়েছি। সে পরীক্ষারই ফল এই ‘নিশীথে’ রচনাটি। বাংলা গুরুগঙ্গীর কবিতাটির প্রধান বাহন অক্ষরবৃত্ত (আধুনিক পরিভাষায় মিশ্রকলাবৃত্ত) ছন্দ। আর অক্ষরবৃত্ত ছন্দের নানা বন্ধের মধ্যে ৮+১০+১০ মাত্রার দীর্ঘায়ত মহাত্রিপদী বন্ধ হচ্ছে গঙ্গীরতার ভাব প্রকাশের যোগ্যতম বাহন। এই মহাত্রিপদীর একটি শ্রেষ্ঠ নিদর্শন রবীন্দ্রনাথের ‘কল্পনা’ কাব্যের ‘রাত্রি’ কবিতাটি। এই কবিতাটির প্রথম দুই পঙক্তি এই—

মোরে কর সভাকবি ধ্যানমৌন তোমার সভায়

হে শর্বরী, হে অবগুপ্তিতা!

তোমার আকাঁশ জুড়ি যুগে যুগে জপিছে যাহারা

বিরচিত তাহাদের গীতা।

আমার চেষ্টা হল এই অক্ষরবৃত্ত মহাত্রিপদীকে স্বরবৃত্ত (syllabic) রূপ দেওয়া। এই চেষ্টার ফলেই রচিত হল ‘নিশীথে’ পদ্যপ্রলাপটি। দুর্বল কল্পনা ও কাঁচা হাতের রচনা এটি। তবু নানা পরীক্ষার ফলে আমার মনে দৃঢ় বিশ্বাস হয়েছিল যে, স্বরবৃত্ত ছন্দে দৃঢ়সংবদ্ধ ধ্বনিগাঙ্গীর্ষ আসা যেমন সম্ভব, এ ছন্দকে উচ্চতম কাব্যভাবের বাহন করাও তেমন সম্ভব। আমার এঁহু দৃঢ় বিশ্বাসটাই পরবর্তীকালে প্রকাশ পেয়েছে নানা ছন্দ-প্রবন্ধে। প্রথম পর্বের প্রথম ও তৃতীয় প্রবন্ধেই (পৃ ৩৭-৩৮ এবং পৃ ৭৮-৭৯) তার নিদর্শন পাওয়া যাবে।

ছন্দ-প্রবন্ধ লেখার উদ্যোগপূর্বে শুধু যে বাংলা ছন্দেই হাত পাকাতে হয়েছিল তা নয়, কোনো কোনো সংস্কৃত এবং আরবি ছন্দকেও বাংলায় আনবার চেষ্টা করতে হয়েছিল। তার কিছু নিদর্শন পাওয়া যাবে প্রথম দুই প্রবন্ধেই। তা ছাড়া আরও দুটি সংস্কৃত ছন্দের কথা এখানে বলা প্রয়োজন—একটি পুষ্পিতাগ্রা, আর একটি শাদুলবিজ্রীড়িত। দুটিই কঠিন এবং জটিল ছন্দ। সত্যেন্দ্রনাথ প্রথমটিকে বাংলা রূপ দিতে চেষ্টা করেন নি। তখন পর্যন্ত আর কেউ করেছিলেন কিনা জানা ছিল না, পরেও জানতে পারি নি। সত্যেন্দ্রনাথ শাদুল-বিজ্রীড়িত ছন্দকে বাংলায় আনবার যে চেষ্টা করেছিলেন তা সফল হয় নি বলেই আমার ধারণা হয়েছিল। তাই আমি ওই দুটি ছন্দকেই বাংলায় রূপান্তরিত করতে প্রয়াসী হয়েছিলাম। তার মধ্যে পুষ্পিতাগ্রা ছন্দের রচনাটি চার বন্দোপাধ্যায় মহাশয়ের আগ্রহে প্রবাসী পত্রিকায় ( ১৩৩০ ভাদ্র ) প্রকাশিত হয় ‘বোবনবোধন’ নামে। আর শাদুলবিজ্রীড়িত ছন্দের রচনাটি বহু বৎসর পরে ‘স্বত্বিক্স’ নামে উদয়ন পত্রিকায ( ১৩৪১ শ্রাবণ ) প্রকাশিত হয় কবিবন্ধু প্যারীমোহন সেনগুপ্তের আগ্রহে। এ রচনা দুটির প্রকাশকালের মধ্যে দীর্ঘ ব্যবধান থাকলেও রচনাকালের হিসাবে কিন্তু এ দুটির মধ্যে প্রায় কোনো ব্যবধানই ছিল না। দুটিই রচিত হয় প্রথম ছন্দ-প্রবন্ধ রচনার সমকালেই। অর্থাৎ জন্মস্থলে এই তিনটি রচনা ( প্রথম ছন্দ-প্রবন্ধ ও দুটি পদ্যরচনা ) পরস্পরের সঙ্গে ঘনিষ্ঠভাবে যুক্ত। তাই এ-দুটি পদ্যরচনাকেও ছন্দের দৃষ্টান্ত হিসাবে প্রথম পর্বের ‘সংযোজন’ বিভাগে গ্রহণ করা গেল এবং এদের স্থান নির্দিষ্ট হল পূর্বোক্ত ‘নিশীথে’ রচনাটির পাশেই।

প্রসঙ্গক্রমে বলা যেতে পারে যে, কিছুকাল পরে ( ১৩৩১ শ্রাবণ ) কবিবন্ধু নজরুল ইসলামও বাংলায় শাদুলবিজ্রীড়িত ছন্দ নিয়ে পরীক্ষা করেছিলেন। কিন্তু সত্যেন্দ্রনাথের ত্রায় তাঁর প্রয়াসও নিষ্ফল হয়েছে বলেই মনে করি।<sup>১</sup> কৌতূহলী পাঠকের অবগতির জন্ত এখানে বলা উচিত যে, দীর্ঘকাল পরে ‘ছন্দবোতুক’ নামে এক প্রবন্ধে ( পূর্বাংশ ১৩৭০ চৈত্র ) আমি আবার শাদুলবিজ্রীড়িত ও শ্রদ্ধা

১ সত্যেন্দ্রনাথের রচনাটির নাম ‘বিদ্যুৎ-বিলাস’। তাঁর ‘বেলাশয়ের গান’ কাব্যে সংকলিত। কবি নজরুলের ‘পূর্বের হাওয়া’ কবিতার ( ছায়ানট কাব্য ) একটি অংশ শাদুলবিজ্রীড়িত ছন্দে রচিত। এ প্রসঙ্গে ত্রৈলোক্য রবীন্দ্রনাথের ‘ছন্দ’ গ্রন্থের ( ১৯৩২ ) পাঠনির্ণয় বিভাগ, পৃ ৫২৪-২৬।

ছন্দকে বাংলায় আনবার কৌশল নিয়ে পরীক্ষা করেছিলাম। যদি সুযোগ পাই তবে ভবিষ্যতে অল্প কোনো গ্রন্থে ওই প্রবন্ধটি সংকলন করার অভিপ্রায় আছে।

উক্ত তিনটি পদ্ম রচনা ছাড়া 'সংযোজন' বিভাগে 'চঞ্চল' নামে আরও একটি কবিতা সংকলিত হয়েছে। এই কবিতাটি যখন 'প্রবাসী' পত্রিকায় (১:২৫ চৈত্র) প্রকাশিত হয় তখনই এটির ছন্দ-সৌন্দর্যের প্রতি আকৃষ্ট হয়েছিলাম। তিন বৎসর পরে যখন প্রথম ছন্দ-প্রবন্ধ রচনায় প্রবৃত্ত হলাম তখন এই কবিতা থেকেও দুটি পঙ্ক্তি উদ্ধৃত করি ছন্দের দৃষ্টান্ত হিসাবে (পৃ ৫৩)। আমার প্রবন্ধ প্রকাশের আনুমানিক কুড়ি-একুশ বৎসর পরে আকস্মিকভাবে কলিকাতায় কবি সতীশচন্দ্র রায়ের সঙ্গে আমার পরিচয় হয়। তাঁর সঙ্গে এই আমার প্রথম ও শেষ দেখা। প্রথম সাক্ষাতেই তিনি আত্মপরিচয় দিলেন 'ফাস্তুন চঞ্চল, কোটা ফুল রয় না' ইত্যাদি আমার উদ্ধৃত পঙ্ক্তি দুটির কথা উল্লেখ করে। তার পরে তিনি জানানেন যে, কবিতাটি রচনা করে তিনি সেটি দেখিয়েছিলেন রবীন্দ্রনাথকে। রবীন্দ্রনাথ এটির উপরে কলম চালিয়ে তার ভাষা ও ছন্দকে প্রায় সম্পূর্ণ বদলে বর্তমান রূপ দেন। মূল রচনার ভাবটুকু মাত্র মোটামুটি বজায় রইল। আর রবীন্দ্রনাথই এটি পাঠিয়েছিলেন প্রবাসীতে। আসল কথা, কবিতাটির বর্তমান ছন্দরূপ রবীন্দ্রনাথেরই দেওয়া। এই তথ্যটুকুর গুরুত্বের কথা স্মরণ করেই 'চঞ্চল' কবিতাটিকে প্রথম পর্বের 'সংযোজন' অংশে পুনর্মুদ্রিত করা গেল। এর দ্বিতীয় উদ্দেশ্য এই কবিতার মূল রচয়িতা কবি সতীশচন্দ্রের স্মৃতির প্রতি শ্রদ্ধা-জ্ঞাপন।

ইচ্ছা ছিল এই কবিতাটির নবজন্ম লাভ সম্পর্কে সতীশচন্দ্রের চাছ থেকে একটি লিখিত বিবরণ সংগ্রহ করে সেটাই এখানে প্রকাশ করে দেব। কিন্তু তাঁর জীবনকালে কিছুতেই তাঁর সঙ্গে যোগাযোগ স্থাপন করতে পারি নি। তার পরে তিনি নাগালের বাইরে চলে গেলেন। তাই ওই কাহিনীটুকু নিজের ভাষাতেই বিবৃত করতে হল।

#### দ্বিতীয় পর্ব

প্রথম পর্ব ও দ্বিতীয় পর্বের মধ্যে কালগত ব্যবধান প্রায় আট বৎসর। কিন্তু ভাবগত ব্যবধান খুবই কম। একটু তলিয়ে দেখলে বোঝা যাবে দ্বিতীয় পর্বের চিন্তাধারা প্রথম পর্বের চিন্তাধারার অন্তর্ভুক্তি মাত্র, যে দ্বিতীয় পর্বে ওই চিন্তা অনেকখানি এগিয়েছে ও অনেকখানি পরিণত রূপ লাভ করেছে। দুই ধারার মধ্যে বস্তুতঃ কোন ছেদ নেই। এই দুই পর্বের প্রবন্ধাবলী পরস্পরের পরিপূরক

রূপেই গ্রহণীয়।<sup>১</sup> প্রথম পর্বের প্রবন্ধ তিনটি অধিগত না করে দ্বিতীয় পর্বের প্রবন্ধগুলি ষথাযথভাবে অল্পধাবন করা যাবে না। আবার দ্বিতীয় পর্বের চিন্তা-ধারার সঙ্গে পরিচয় না ঘটলে প্রথম ধারার তাৎপর্য গ্রহণ অসম্পূর্ণ থেকে যাবে। এইজন্যই দুই পর্বের প্রবন্ধাবলী একত্র গ্রথিত করা গেল।

দ্বিতীয় পর্বের মোট প্রবন্ধসংখ্যা ষোল। তার মধ্যে একটি প্রবন্ধ (‘ছন্দোবিশ্লেষ’) প্রবাসীতে প্রকাশিত হয়েছিল দুই ভাগে। ঠিক দুই বৎসরের মধ্যেই এই ষোলটি রচনা প্রকাশিত হয়েছিল সাহিত্য-পরিষৎ পত্রিকা, বিচিত্রা, পঞ্চপুষ্প, প্রবাসী, পরিচয়, উত্তরা ও পূর্বাশা, এই কয়খানি পত্রিকায় এবং জয়ন্তী-উৎসর্গ (১৩৩৮ পৌষ) গ্রন্থে। এই ষোলটি প্রবন্ধকে দুটি মূল ধারায় ভাগ করা যায়। একটি ধারা বিতর্ক-পর্যায়ভুক্ত, অল্প ধারাটি বিতর্ক-নিরপেক্ষ। ‘বাংলা অক্ষরবৃত্ত ছন্দের স্বরূপ’ প্রকাশের (বিচিত্রা ১৩৩৮ অগ্রহায়ণ) পর দীর্ঘকাল ধরে বিভিন্ন পত্রিকায় ছন্দ-নিয়ে মহা তর্কবিতর্ক চলতে থাকে। এই ছন্দ-বিতর্কে অনেকেই জড়িত হয়েছিলেন। এঁদের মধ্যে প্রধান রবীন্দ্রনাথ। উক্ত ‘বাংলা অক্ষরবৃত্ত ছন্দের স্বরূপ’ প্রবন্ধের তীব্র প্রতিবাদ করে তিনিই এই বিতর্কের সূত্রপাত করেন। ইতিহাস হয়তো বলবে যে, আমার ‘বাংলা অক্ষরবৃত্ত ছন্দের স্বরূপ’ প্রবন্ধের মধ্যেই বিতর্কের বীজ নিহিত ছিল, তার দ্বারাই বিতর্কের সূচনা হয়; রবীন্দ্রনাথের প্রতিবাদের দ্বারা তাতে বেগ সঞ্চারিত হয় মাত্র। আমি একমাত্র রবীন্দ্রনাথ ছাড়া আর কারও সঙ্গে তর্কে প্রবৃত্ত হই নি। ব্যতিক্রম শুধু অনিল-বরণ রায়। তার কারণ তিনিও রবীন্দ্রনাথের পক্ষ নিয়েই তর্কে অবতীর্ণ হয়েছিলেন এবং তাঁর লেখাটি আমাকে পাঠিয়ে দিয়েছিলেন আমার অভিমতের জন্য। দ্বিতীয় পর্বের ষোলটি প্রবন্ধের মধ্যে সাতটিই এই বিতর্ক পর্যায়ভুক্ত। কিন্তু মনে রাখা উচিত প্রায় একই সঙ্গে আরও নয়টি প্রবন্ধ দ্রুতপর্যায় প্রকাশিত হচ্ছিল বিভিন্ন পত্রিকায়। সেগুলি ছিল বিতর্ক-নিরপেক্ষ, সেগুলি নিয়ে কেউ কোনো তর্ক উত্থাপন করেন নি সে সময়ে। নিয়ে এই ষোলটি প্রবন্ধের কালানুক্রমিক তালিকা দেওয়া গেল। বিতর্ক পর্যায়ের সাতটি প্রবন্ধ নির্দিষ্ট হল তারকাচিহ্নে ষোণে \*।

১৩৩৮

১। বাংলা ছন্দের বিবর্তন সাহিত্য-পরিষৎ পত্রিকা ভাদ্র

\* ২। বাংলা অক্ষরবৃত্ত ছন্দের স্বরূপ বিচিত্রা অগ্রহায়ণ

৩।	বাংলা ছন্দে ধ্বনিভরঙ্গ	বিচিত্রা	পৌষ
৪।	বাংলা ছন্দে রবীন্দ্রনাথের দান	'জয়ন্তী-উৎসর্গ'	পৌষ ১১
* ৫।	ছন্দজিজ্ঞাসা ১	বিচিত্রা	মাঘ
৬।	ছন্দপ্রসঙ্গ	পঞ্চপুষ্প	মাঘ
* ৭।	ছন্দজিজ্ঞাসা ২	বিচিত্রা	ফাল্গুন
৮।	ছন্দোবিশ্লেষ ১-২	প্রবাসী	ফাল্গুন, চৈত্র
৯।	বাংলা ছন্দের ধ্বনি ও মাত্রা	বিচিত্রা	চৈত্র

১৩৩৯

১০।	ছন্দজিজ্ঞাসা ৩	বিচিত্রা	বৈশাখ
১১।	বাংলা ছন্দের শ্রেণীবিভাগ	পরিচয়	বৈশাখ
* ১২।	ছন্দবিচার	বিচিত্রা	জ্যৈষ্ঠ
১৩।	ছন্দ ও ছন্দোবন্ধ	বিচিত্রা	শ্রাবণ
* ১৪।	বাংলা স্বরবৃত্ত ছন্দের স্বরূপ	বিচিত্রা	ভাদ্র
* ১৫।	ছন্দসংকট	উত্তরা	ভাদ্র
১৬।	স্বরবৃত্ত ছন্দের আইন কানুন	পূর্বাশা	আশ্বিন

ছন্দ-জিজ্ঞাসা গ্রন্থের দ্বিতীয় পর্বে এই ষোলটি প্রবন্ধ কালক্রমে অনুসারে বিস্তৃত হয় নি। রচনাকাল, চিন্তার পর্যায়ক্রম এবং পাঠকের অহুধাবন সৌকর্যের কথা মনে রেখে এই ষোলটি প্রবন্ধকে তিন গুচ্ছে ভাগ করা হয়েছে। বিতর্ক পর্যায়ের সাতটি প্রবন্ধকে স্থাপন করা হয়েছে মধ্যভাগে অর্থাৎ দ্বিতীয় গুচ্ছে। বাকি নয়টির মধ্যে যে তিনটি বিতর্কযুগের পূর্বে রচিত বা পরিকল্পিত সেগুলি স্থাপিত হয়েছে পুরোভাগে অর্থাৎ প্রথম গুচ্ছে। আর যেগুলি বিতর্কের সমকালে রচিত ও প্রকাশিত সেগুলি স্থান পেয়েছে সকলের শেষে তৃতীয় গুচ্ছে। এবার কয়েকটি উল্লেখযোগ্য প্রবন্ধের সংক্ষিপ্ত পরিচয় দিচ্ছি পর্যায়ক্রমে।

**বাংলা ছন্দের বিবর্তন**—১৩৩৮ ভাদ্র ১৩ ( ১৯৩১ আগস্ট ৩০ ) তারিখে অমূল্যচরণ বিজ্ঞানভূষণ মহাশয়ের সভাপতিত্বে বঙ্গীয় সাহিত্য-পরিষদের দ্বিতীয় মাসিক অধিবেশনে প্রদত্ত ভাষণ। পরিষৎ-কর্তৃপক্ষের অনুরোধে বক্তা-কর্তৃক সংক্ষিপ্ত আকারে সাধুভাষায় অঙ্কলিখিত ও সাহি ৪৭-পরিষৎ পত্রিকায় প্রকাশিত ( ৩৮শ বর্ষ, ৩য় সংখ্যা, কার্যবিবরণ, পৃ ২২-২৩ )। প্রবন্ধের নামটি নবপ্রদত্ত। পত্রিকায় কোনো নাম ছিল না। গ্রন্থে গ্রহণকালে এটির মূল সাধু ভাষাকে

চলিত ভাষায় রূপান্তরিত করা হয় অল্প সব প্রবন্ধের সঙ্গে সমতা রাখার প্রয়োজনে। তা ছাড়া অল্প কোনো পরিবর্তন করা হয় নি।

বাংলা অক্ষরবৃত্ত ছন্দের স্বরূপ—রচনাকাল ১৩৩৮ ভাদ্র। এটি আসলে প্রথম গুচ্ছেরই অন্তর্গত। যেহেতু এটি উপলক্ষ করেই বিতর্কের সূত্রপাত হয় সেজন্য এটিকে বিতর্ক-গুচ্ছের প্রথমেই স্থাপন করা গেল। এই প্রবন্ধের প্রতিবাদে প্রকাশিত হয় ‘বাংলা ছন্দ’ (বিচিত্রা ১৩৩৮ পৌষ) এবং ‘ছন্দের হসন্ত-হলন্ত’ (পরিচয় ১৩৩৮ মাঘ) নামে রবীন্দ্রনাথের দুটি প্রবন্ধ। এই প্রতিবাদের উত্তর প্রকাশিত হয় লেখকের ‘ছন্দজিজ্ঞাসা’ নামক তিন প্রবন্ধে। এই উপলক্ষে বাংলা সাহিত্যে বেশ কিছুকাল ধরে যে ছন্দবিতর্ক দেখা দেয়, তার কিছু পরিচয় পাওয়া যাবে এই তিন গ্রন্থে—

১। রবীন্দ্রনাথের ‘ছন্দ’, প্রবোধচন্দ্র সেন সম্পাদিত দ্বিতীয় সংস্করণ, ১৩৬২ কার্তিক, পৃ ৩৮১-৪১৩। পরিমার্জিত তৃতীয় সংস্করণ মুদ্রণাধীন।

২। দিলীপকুমার রায় প্রণীত ‘স্মৃতিচারণ’, দ্বিতীয় খণ্ড, (শক ১৮৮৪। বাংলা ১৩৬২ আষাঢ়) পৃ ১৪২-৪৬।

৩। উপেন্দ্রনাথ গঙ্গোপাধ্যায় প্রণীত ‘বিগত দিন’ (১৩৬৪ ভাদ্র), সপ্তম ও অষ্টম পরিচ্ছেদ, পৃ ৩০-৪০।

বাংলা ছন্দে রবীন্দ্রনাথের দ্বান—১৩৩৮ কার্তিক ২০ (ইং ১৯৩১ নভেম্বর ৬) তারিখে রচিত এবং পরবর্তী ৯ অগ্রহায়ণ তারিখে প্রক্ষ দেখার সময়ে ঈষৎ পরিবর্তিত ও পরিমার্জিত। ‘জয়ন্তী-উৎসর্গ’ নামক সংকলন গ্রন্থখানি রবীন্দ্র-পরিচয় সভা ও বিশ্বভারতীর যুক্ত উদ্যোগে প্রকাশিত হয় রবীন্দ্রনাথের সপ্ততিতম জয়ন্তী-উৎসব দিবসে (১৩৩৮ পৌষ ১১, ইং ১৯৩১ ডিসেম্বর ২৭, রবিবার)। উক্ত প্রবন্ধটি এই গ্রন্থের জন্য রচিত হয়েছিল জয়ন্তী-উৎসবের প্রধান উদ্যোক্তা অমল হোম মহাশয়ের অনুরোধে।

জয়ন্তী-উৎসর্গের জন্য রচিত এই প্রবন্ধটির মূদ্রণকার্য শেষ হয়ে যাবার পরে মুদ্রিত ফর্ম আবার কিছু পরিমার্জিত হয়ে স্বতন্ত্র পুস্তিকাকারে পুনর্মুদ্রিত হয় এবং উৎসবের কিছুকাল পরে বিশ্বভারতীর সম্মতিক্রমে প্রকাশিত হয়। ‘জয়ন্তী-উৎসর্গে’ প্রবন্ধের শেষে পরিবর্তন ও পরিমার্জনার তারিখটি রাখা হয় নি। পুস্তিকার শেষ পৃষ্ঠায় এই তারিখটি (১৩৩৮ অগ্রহায়ণ ৯) ছাপা হয়। মুদ্রিত ফর্মায় শেষ পরিমার্জনার তারিখ এবং পুস্তিকাকারে প্রকাশের তারিখ ছাপা হয় নি।



‘বাংলা ছন্দে রবীন্দ্রনাথের দান’ প্রবন্ধের পুস্তিকায় প্রকাশিত শেষ রূপটিই ‘ছন্দজিজ্ঞাসা’ গ্রন্থে সংকলিত হল সম্পূর্ণ অপরিবর্তিতরূপে। কিন্তু এবারও অনবধানতাবশতঃ প্রবন্ধের শেষে ‘৯ই অগ্রহায়ণ ১৩৩৮’ তারিখটি ছাপা হয় নি। তা ছাড়া, এই প্রবন্ধের শেষে উদ্ধৃত ‘উদয়রবি যে রাজা রঙে রাজায়’ ইত্যাদি কবিতাংশটির উৎস-নির্দেশটি পাদটীকারূপে মূত্রিত না হয়ে অস্থানে মূত্রিত হয়েছে, আর তাও হয়েছে খণ্ডিতরূপে। এই কবিতাংশটি সংকলিত হয়েছিল ‘নটরাজ-অতুরঙ্গশালা’ গ্রন্থের ( ১৩৩৮ আশ্বিন ) ‘উৎসব’ কবিতাটি থেকে।

এখানে বলা উচিত যে, এ প্রবন্ধের এক স্থানে ( পৃ ১৫৪ ) Collins-এর Ode to Evening কবিতার ছন্দ সম্বন্ধে মন্তব্য করা হয়েছিল স্মৃতির উপরে নির্ভর করে। Palgrave-এর Golden Treasury বইখানি হাতের কাছে ছিল না। পরে দেখা গেল উক্ত মন্তব্যটি সম্পূর্ণ সত্য নয়। এ কবিতার ছন্দোবদ্ধ অমিল বটে, কিন্তু তাকে মূলক বলা চলে না।

**বাংলা ছন্দের শ্রেণীবিভাগ**—এই প্রবন্ধটি কবি স্বধীন্দ্রনাথ দত্তের অমরোদয়ে লিখিত ও তাঁর সম্পাদিত ‘পরিচয়’ পত্রিকায় ( ১৩৩৯ বৈশাখ ) প্রকাশিত হয়েছিল।

**ছন্দ-বিচার**—রবীন্দ্রনাথের প্রতিবাদের উত্তরে ‘ছন্দজিজ্ঞাসা’ তিন পর্ব প্রকাশের পরে তাঁকে এ বিষয়ে পত্র লিখি। তার উত্তরে তিনি আমাকে শান্তিনিকেতনে গিয়ে সাক্ষাতে আলোচনার আমন্ত্রণ জানান। সেখানে কয়েক-বার সাক্ষাতে যে আলোচনা হয়, এই প্রবন্ধটি তারই অমূল্যলিপি। প্রকাশের পূর্বে এটি কবির কাছে পাঠানো হয় তাঁর অমুমোদনের জন্ত। আহুপূর্বব দেখে ও কিছু অংশ সংযোজন করে কবি অমুমোদন করেন ও আবার সাক্ষাতের আমন্ত্রণ জানান। কেননা তখনও মতভেদের কিছু অবকাশ ছিল। এবার আলোচনা হল কলকাতায় মহর্ষিভবনে ‘বিচিত্রা’ সম্পাদক উপেন্দ্রনাথ গঙ্গোপাধ্যায়ের উপস্থিতিতে। এই আলোচনার ফলে কবি তাঁর অভিমত সংক্ষেপে লিখে দিলেন। এই নবলিখিত অংশটুকু মূল প্রবন্ধের পরিশিষ্টরূপে একসঙ্গেই প্রকাশিত হল। মূল প্রবন্ধের ‘ছন্দ-বিচার’ নামটি কবিরই দেওয়া। আর পরিশিষ্ট অংশের নাম হল ‘কবির পুনশ্চ বক্তব্য’।

‘ছন্দ-বিচার’ প্রবন্ধটি লেখকের ‘ছন্দোঙ্কর রবীন্দ্রনাথ’ গ্রন্থে ( ১৩৫২ আষাঢ় ) পুনর্মুদ্রিত হয় ‘কবির পুনশ্চ বক্তব্য’-সহ। তা ছাড়া, ‘কবির পুনশ্চ বক্তব্য’

অংশের বিস্তৃত আলোচনাও প্রকাশিত হয় ওই গ্রন্থেই ‘ছান্দসিকের নিবেদন’ নামে।

**বাংলা স্বরবৃত্ত ছন্দের স্বরূপ**—রবীন্দ্রনাথের সঙ্গে দ্বিতীয়বার সাক্ষাতে আলোচনার ফলেও মতভেদ সম্পূর্ণ নিরস্ত হয় নি। ‘কবির পুনশ্চ বক্তব্য’ অংশে সে পার্থক্য আরও প্রকট হয়ে ওঠে। এই পার্থক্য নিরসনের অভিপ্রায়েই লিখিত হয় ‘বাংলা স্বরবৃত্ত ছন্দের স্বরূপ’ প্রবন্ধটি।

**ছন্দ-সংকট**—এ প্রবন্ধের উৎপত্তির ইতিহাস বর্ণিত হয়েছে প্রবন্ধের গোড়াতেই। এ লেখাটির উদ্দেশ্য অক্ষরবৃত্ত বা যৌগিক ছন্দের গঠনপ্রণালীর পুনর্বিচার। বস্তুতঃ এটিকে ‘বাংলা অক্ষরবৃত্ত ছন্দের স্বরূপ’ প্রবন্ধের পরিপূরক এবং ‘ছন্দজিজ্ঞাসা’ তিন পর্বের অন্তর্ভুক্তি বলে গণ্য করা যেতে পারে।

তৎকালীন ছন্দ-বিতর্কের দুটি ধারা—এক ধারা অক্ষরবৃত্ত (বা যৌগিক) ছন্দের গঠনপ্রণালী নিয়ে আর অষ্টা ধারা স্বরবৃত্ত ছন্দের গঠনপ্রণালী নিয়ে। বলা যেতে পারে, অন্ততঃ তখনকার মতো প্রথম ধারার বিতর্কের পরিসমাপ্তি হয় এই ‘ছন্দ-সংকট’ প্রবন্ধের দ্বারা আর দ্বিতীয় ধারার বিতর্কের পরিসমাপ্তি হয় ‘বাংলা স্বরবৃত্ত ছন্দের স্বরূপ’ প্রবন্ধের ‘অনুলেখ’ অংশে (পৃ ৩০০)।

শে ষ ক খা

এই গ্রন্থের প্রবন্ধাবলীতে লেখকের ছন্দজিজ্ঞাসা ও ছন্দচিন্তা দুই পর্যায় মাত্র অতিক্রম করেছে। সে জিজ্ঞাসা ও চিন্তা এখনও নিবৃত্ত হয় নি। লেখকের জিজ্ঞাসা ও চিন্তার বর্তমান পরিণতির পরিপ্রেক্ষিতে বিচার না করলে এই গ্রন্থের প্রবন্ধাবলীর যথার্থ তাৎপর্য নিরূপণ সম্ভব নয় বলেই আমার বিশ্বাস। ছন্দচিন্তার দুই দিক—এক দিক ছন্দের বিশ্লেষণগত, দ্বিতীয় দিক পরিভাষাগত। এই দুই দিকেই লেখকের পরিণত চিন্তার মোটামুটি পরিচয় পাওয়া যাবে তাঁর ‘ছন্দপরিক্রমা’ গ্রন্থের (১৯৬৫) প্রথম ও তৃতীয় অধ্যায়ে। পরিভাষা নিয়েই মতভেদ দেখা যায় বেশি। ছন্দপরিক্রমা প্রকাশের পরেও ওই গ্রন্থে ব্যবহৃত পরিভাষা সম্পর্কে সকলের সংশয় প্রশমিত হয় নি। তাই এখানে পরিভাষা সম্পর্কে সংক্ষেপে কিছু বলা দরকার।

## পরিভাষা-পরিচয়

কোনো বস্তু বা বিষয়ের পারিভাষিক নামের মধ্যেই সংহত থাকে তার অন্তঃপ্রকৃতির স্বার্থ পরিচয়। বস্তু বা বিষয়ের অন্তঃপ্রকৃতি সম্বন্ধে মানুষের চিন্তা যতই স্বচ্ছ ও পরিচ্ছন্ন হতে থাকে তার পারিভাষিক নামও ততই সূষ্ঠ রূপ ধারণ করতে থাকে। পরিভাষা তো চিন্তারই প্রতিরূপ। তাই চিন্তার অগ্রগতির সঙ্গে সঙ্গে পরিভাষা-রচনারও অগ্রগতি হয়। ছন্দ-জিজ্ঞাসা গ্রন্থের প্রবন্ধাবলীতেও এই অগ্রগতি লক্ষিত হবে। এখানে তার বিশদ পরিচয় দেওয়া সম্ভব নয়, বোধ করি তার প্রয়োজনও নেই। নিবিষ্ট পাঠকের কাছে তা সহজেই ধরা পড়বে। তবু কয়েকটি পারিভাষিক শব্দ সম্পর্কে আমার চিন্তা-বিবর্তনের একটু পরিচয় দেওয়া সংগত মনে করি। আশা করি তাতে পাঠকের সহায়তাই হবে।

**মাত্রা (Unit of measure)**—ছন্দবিজ্ঞেয় আসলে ধ্বনিপরিমাপের ব্যাপার। পরিমাপের জন্য চাই একটি unit। কিন্তু ইংরেজি unit-এর কি বাংলা করা যায়, তাই নিয়ে আমাকে মুশকিলে পড়তে হয়েছে। কখনও বলেছি ‘একক’ আবার কখনও বলেছি ‘ব্যাপ্তি’। কিন্তু এ দুটি শব্দ নিয়ে কাজ চালানো কঠিন, বিশেষতঃ সমাস গঠনের ক্ষেত্রে। তাই অনেক সময় ইংরেজি unit শব্দটাকেই বহাল রেখেছি। তাতে মনের কথা বোঝানো সহজ হয়। কিন্তু তাকে নিয়ে ঘর করা চলে না। অবশেষে ‘মাত্রা’ শব্দটাকেই মেনে নিঃ য unit অর্থে। তাতে ছন্দবাখ্যার কাজ অনেক সহজ হল। এই শব্দটার ব্যুৎপত্তিগত তথ্য আভিধানিক অর্থও বজায় রইল। রবীন্দ্রনাথও মাত্রা শব্দটিকে তার ধাতুগত অর্থে ব্যবহার করেন।

**কলা (mora)**—মাত্রা শব্দকে unit অর্থে গ্রহণ করার ফলে তার অর্থব্যাপ্তি ঘটল। কিন্তু তার পারিভাষিক তাৎপর্যের ক্ষেত্রে শূন্যতা দেখা দিল। মাত্রা যদি হয় unit, তবে mora অর্থাৎ উচ্চারিত ধ্বনির ক্ষুদ্রতম অংশ বোঝাবার জন্য নূতন শব্দ চাই। সংস্কৃত ও প্রাকৃত ছন্দশাস্ত্রে মাত্রা ও কলা এই দুটি শব্দই ব্যবহৃত হয় mora অর্থে। দ্রষ্টব্য ‘ছন্দ-জিজ্ঞাসা’ দ্বিতীয় পর্ব, পৃ ২১১ এবং ‘বাংলা ছন্দের শ্রেণীবিভাগ’ পৃ ৩৬৮। ‘ছন্দোগুরু রবীন্দ্রনাথ’ গ্রন্থেও (১৩৫২) কলা শব্দের উল্লেখ আছে মাত্রার প্রতিশব্দ হিসাবে। পরবর্তী

কালে মাত্রা শব্দকে তার ধাতুগত অর্থে ব্যবহার করার ফলে mora অর্থে কলা শব্দ প্রয়োগে কোনো বাধা থাকল না। তাই মাত্রাবৃত্তের স্থান দখল করল কলাবৃত্ত। কলা ও মাত্রা শব্দকে দুই পারিভাষিক অর্থে গ্রহণ করার ফলে 'কলামাত্রিক' শব্দ রচনা করাও সহজ হল। পাঠকের কাছেও সহজবোধ্য হল।

**দল (syllable)**—সবচেয়ে মুশকিল হয়েছিল ইংরেজি syllable শব্দ নিয়ে। এই শব্দটার বাংলা প্রতিশব্দ কি হতে পারে তা নিয়ে আমাদের ভাবতে হয়েছে ছন্দ-আলোচনার প্রথম পর্ব থেকেই। প্রথম চালারাম 'স্বর' শব্দটি বিশেষ পারিভাষিক অর্থে। ফলে syllable অর্থে রচিত হল 'স্বরবৃত্ত'। দেখতে দেখতে এ শব্দটা বহুপ্রচলিত হয়ে গেল। আজও সে তার দখল ছাড়তে রাজি হচ্ছে না। কিন্তু সবাই শব্দটা মেনে নিলেন একরকম রুঢ়ার্থে। ফলে লেখকের উদ্দিষ্ট অর্থ অনেকের কাছেই অস্পষ্ট থেকে গেল। তাছাড়া কেউ কেউ এ শব্দটা নিজের অভিপ্রেত অর্থেও গ্রহণ করলেন। যেমন, কেউ কেউ 'স্বরবৃত্ত' কথাটাকে ইংরেজি stressed কথার প্রতিশব্দ বলে ধরে নিলেন, তাঁদের কাছে স্বরবৃত্ত ছন্দ মানে হল stressed metre। অথচ লেখকের কাছে স্বরবৃত্ত মানে syllabic। প্রচলিত শব্দকে পারিভাষিক অর্থে ব্যবহারের এই বিপদ। যারা সিলেব্ল্ অর্থে 'অক্ষর' শব্দ ব্যবহার করেন তাঁদেরও এই বিপদ। মেঘদূত, জয়দেব, মসজিদ, আফগান প্রভৃতি শব্দকে দুই অক্ষরের শব্দ বললে পাঠকের ধাঁধা লাগে। অক্ষর-পরিচয় বললে কি সিলেব্ল্-পরিচয় বোঝাবে? নিরক্ষর বললে কি বোঝাবে? এসব কারণে সিলেব্ল্ অর্থে অক্ষর শব্দ আমি কখনও ব্যবহার করিনি। 'স্বর' শব্দটাও বিভ্রান্তিকর। কিছুদিন 'ধ্বনি' শব্দটাকেই আশ্রয় করলাম সিলেব্ল্ অর্থে। Open syllable ও closed syllable হল যথাক্রমে অযুগ্মধ্বনি ও যুগ্মধ্বনি। কিন্তু মন প্রসন্ন হয় নি। কারণ ছন্দের আলোচনায় ধ্বনি শব্দ তার স্বাভাবিক অর্থেও ব্যবহৃত হয়। কোনো শব্দকে একই রচনায় পারিভাষিক ও অপারিভাষিক দুই অর্থে ব্যবহার করা সমীচীন নয়। তাছাড়া কেউ কেউ মনে করলেন যুগ্মধ্বনি মানে যুক্তাক্ষর, অযুগ্মধ্বনি মানে অযুক্তাক্ষর। ফলে ধ্বনি শব্দটাও ছাড়তে হল।

অবশেষে সিলেব্ল্ অর্থে বেছে নিলাম 'দল' শব্দটি। শব্দটি আমার মনে জমা ছিল দীর্ঘকাল ধরে। 'দু' এক বার ব্যবহারও করেছি কোনো কোনো প্রবন্ধে। ঐষ্টব্য 'বাংলা ছন্দে রবীন্দ্রনাথের দান', পৃ ১৫৫ এবং 'ছন্দবিচার', পৃ ২৭৩।

শব্দটা রবীন্দ্রনাথেরও অল্পমোদন লাভ করেছিল। তবু দীর্ঘকাল এ শব্দটাকে ব্যাপকভাবে ব্যবহার করার মতো সাহস হয় নি মনে। অবশেষে যখন শব্দটাকে ব্যাপকভাবে চালানো শুরু হল তখন কিন্তু এটি অনেকের কাছে, বিশেষতঃ তরুণদের কাছে সহজেই স্বীকৃতি পেল। প্রবীণদের মধ্যে কালিদাস রায় এবং দিলীপকুমার রায় এই নূতন পারিভাষিক শব্দটিকে সাগ্রহে স্বীকার করে নিয়েছেন। কিন্তু অত্র কারও কারও মনে এখনও সিলেবল্ অর্থে দল শব্দ প্রয়োগের সমীচীনতা সম্বন্ধে যথেষ্ট সন্দেহ রয়ে গেছে। তাই পরবর্তী ‘অল্পযঙ্গ’ অংশে এ সম্বন্ধে বিশদ আলোচনা করা গেল।

যতি (pause)—এই শব্দটি নিয়ে সাধারণভাবে কোনো বিতর্ক নেই। বিতর্ক আছে যতির প্রকৃতি, তারতম্য ও অবস্থিতি সম্পর্কে। ‘বাংলা ছন্দ ও সংগীত’ প্রবন্ধের ‘যতি ও তাল’ বিভাগে যতির বৈচিত্র্য নিয়ে আলোচনার সূত্রপাত হয়। ভাবগত যতি, ছন্দোগত যতি, পূর্ণযতি, অর্ধযতি, দ্বৈধযতি, এসব পারিভাষিক শব্দের প্রয়োগও দেখা দেয় ওই অংশেই। পরবর্তীকালে ‘দ্বৈধযতি’ শব্দের স্থলে আসে ‘লঘুযতি’। বলা বাহুল্য, দ্বিতীয় শব্দটা আপন লঘুতাগুণেই বেশি সচল হতে পেরেছে। পরবর্তীকালে ‘উপযতি’ নামে লঘুতর প্রকৃতির আর এক শ্রেণীর যতির কথাও স্বীকৃত হয় নানা রচনায়।

যতির তারতম্যের হ্রাস যতিলোপের প্রভাবও কম নয় ছন্দের বৈচিত্র্য সৃষ্টিতে। যতিলোপ প্রসঙ্গেরও প্রথম আভাস পাওয়া যায়, ওই ‘যতি ও তাল’ শীর্ষক উপবিভাগেই। পরবর্তীকালে যতির তারতম্য ও যতিলোপ, এই দুটি বিষয় বর্তমান লেখকের চিন্তার ক্রমেই অধিকতর গুরুত্ব লাভ করে, ফলে তাঁর নানা প্রবন্ধে বিশদতর রূপে আলোচিত হয়।

পূর্ব (foot)—আমি যখন প্রথম ছন্দ আলোচনায় প্রবৃত্ত হই তখন আমার মনে ছিল ইংরেজি ছন্দশাস্ত্রের আদর্শ। বাংলা ছন্দশাস্ত্রকে যথাসম্ভব ইংরেজি আদর্শে গড়ে তোলাই ছিল আমার লক্ষ্য। বর্তমান গ্রন্থের প্রথম দুটি প্রবন্ধ পড়লেই বোঝা যাবে আমার মনে ইংরেজি ছন্দশাস্ত্রের প্রভাব কত প্রবল ছিল। সংস্কৃত ছন্দশাস্ত্রের সঙ্গেও আমার যথেষ্ট পরিচয় ছিল। তার প্রমাণও পাওয়া যাবে ওই দুই প্রবন্ধে। কিন্তু সংস্কৃত ছন্দশাস্ত্রে আদর্শ বলে গ্রহণ করতে পারি নি। কারণ আমি তখনই বুঝতে পেরেছিলাম সংস্কৃত ছন্দশাস্ত্রে বৈজ্ঞানিক শৃঙ্খলা নেই, সে শাস্ত্র যুক্তিবিচারের উপরে প্রতিষ্ঠিত নয়। সে শাস্ত্র বস্তুতঃ

কতকগুলি বিচ্ছিন্ন ছন্দের লক্ষণসংগ্রহ মাত্র। তাতে ছন্দের শ্রেণীবিভাগের বা যুক্তিসম্মত পরিভাষা-রচনার প্রয়াসমাত্রও নেই। তাই বাংলাছন্দের শ্রেণীবিভাগে ও পরিভাষা রচনায় ইংরেজি ছন্দশাস্ত্রের আদর্শকে অহুসবণ করতে চেষ্টিত হই। কিন্তু ছন্দ-আলোচনার ভাষা ও পরিভাষা রচনার ক্ষেত্রে সংস্কৃত ব্যাকরণের নিয়ম-পদ্ধতিকে উপেক্ষা করি নি। কারণ সংস্কৃত ভাষা ও নিয়ম-পদ্ধতি সম্পর্কে আমি চিরকালই অজ্ঞাধিত। নূতন নূতন শব্দ রচনায় সংস্কৃত ব্যাকরণের আশ্রয় নেওয়া ছাড়া গতাস্তরও নেই।

এই মনোভাব নিয়েই বাংলা ছন্দ ব্যাকরণ রচনায় প্রবৃত্ত হই। ফলে বাংলা ছন্দের যতি-বিভাগকে ইংরেজি ছন্দের foot-এর প্রতিরূপ বলেই আমাব মনে হয়েছিল। তাই foot-এর বাংলা প্রতিশব্দ হিসাবে ‘পদ’ শব্দকেই বাংলা যতিবিভাগের পারিভাষিক নাম বলে স্বীকার করে নিই। আর যেহেতু পদ, পাদ ও চরণ অভিন্নার্থক শব্দ সেজন্য ছন্দের যতিবিভাগকে প্রয়োজন মতো এই তিন নামের যে-কোনো নামেই অভিহিত করেছি। এই বই-এর প্রথম দুই প্রবন্ধেই তার প্রমাণ পাওয়া যাবে। লক্ষ কবার বিষয় এই যে সংস্কৃত ছন্দশাস্ত্রের অহুসরণে শ্লোকের চতুর্থাংশকে বা পূর্ণযতির বিভাগকে আমি পদ, পাদ বা চরণ বলি নি। কবি সত্যেন্দ্রনাথ যে ছন্দের যতিবিভাগকে পর্ব বলতেন তাও আমাব জ্ঞান ছিল। কিন্তু আমি ওই যতিবিভাগকে পর্ব না বলে পদ, পাদ বা চরণ বলাই সমীচীনতর বলে মনে করেছিলাম। তাতেও ইংরেজি পরিভাষার প্রতি আমার বিশেষ অহুসরণের পরিচয় পাওয়া যায়।

কিন্তু পরবর্তীকালে যখন আমার চিন্তায় যতির তারতম্যবোধ স্পষ্টতর হয় তখন অর্ধযতি ও লঘুযতির বিভাগের জ্ঞান দুটি পারিভাষিক শব্দের প্রয়োজন বোধ করি। আগে বাংলা ত্রিপদী, চৌপদী প্রভৃতি শব্দকে পূর্বাগত পারিভাষিক অর্থে ব্যবহার করাও নিস্প্রয়োজন মনে করতাম। পরে বোঝা গেল এসব নামের সার্থকতা আছে। দেখা গেল বাংলায় সাধারণতঃ অর্ধযতির বিভাগকেই বলা হয় ‘পদ’, লঘুযতির বিভাগের কোনো নাম নেই। আমি তখন বাংলা পদ শব্দটি অর্ধযতির বিজ্ঞাগ অর্থে স্বীকার করে নিয়ে লঘুযতির বিভাগকে ‘পর্ব’ বলাই সমীচীন মনে করলাম। যেমন—

নদীতীরে। বৃন্দাবনে ॥

সনাতন। একমনে ॥

অপিছেন। নাম।

এই ছন্দ পঙ্ক্তিটিতে আছে তিনটি পদ ( অর্ধযতির বিভাগ ), আর প্রতি পদে দুই পর্ব ( লঘুযতির বিভাগ )। লঘুযতি = ৥ অর্ধযতি = ॥

পূর্ণযতির বিভাগকে পারিভাষিক অর্থে 'পঙ্ক্তি' বলাই সংগত মনে করি। কারণ অর্ধযতির বিভাগকেই পদ বা চরণ বলে স্বীকার করে নিয়েছি। মুদ্রিত বা লিখিত বিভাগকে ছত্র ( line ) বললে ভ্রান্তির কোনো সম্ভাবনা থাকে না।

উত্তরকালীন এসব পরিভাষার কথা মনে রেখে এই গ্রন্থের প্রবন্ধগুলি অম্লসরণ করলে পাঠকের মনে কোনো সংশয় বা ভ্রান্তির অবকাশ থাকবে না বলেই আশা করি। উত্তরকালীন পরিভাষার পূর্ণতর পরিচয় পাওয়া যাবে 'ছন্দপরিক্রমা'র প্রথম ও তৃতীয় অধ্যায়ে। তার পরেও কোনো কোনো পরিভাষার ( বিশেষতঃ 'দল' শব্দের ) সমীচীনতা সম্বন্ধে কেউ কেউ সংশয় প্রকাশ করেছেন। তাই নীচে কয়েকটি পারিভাষিক শব্দের সমীচীনতা সম্বন্ধে একটু বিশদ আলোচনা করা গেল।

#### অ নু ব ঙ্গ

পর্ব, দল ও কলা, এই তিন শব্দেই বোঝায় অংশ। কিন্তু এই তিন শব্দ পরস্পরের প্রতিশব্দ নয়। ফেননা, এগুলির অর্থের ছোটনায় কিছু পার্থক্য আছে। তাই ছন্দ-পরিভাষাতেও এই তিন শব্দে তিন ভিন্ন বস্তু বোঝায়।

পর্ব শব্দের আসল অর্থ গ্রন্থি বা অম্লরূপ কোনো-কিছুর দ্বারা নির্দিষ্ট অংশ বা খণ্ড, part, period, division ( মহাভারতের বনপর্ব, ইতিহাসের মৌর্যপর্ব, অঙ্গুলিপর্ব, বংশপর্ব, ইক্ষুপর্ব )। ছন্দ-পরিভাষায় পর্ব শব্দের অর্থ হল লঘুযতির দ্বারা নির্দিষ্ট পঙ্ক্তিখণ্ড ( foot )। এই অর্থে পর্ব শব্দের প্রথম প্রয়োগ দেখা যায় সত্যেন্দ্রনাথের 'ছন্দ-সরস্বতী' প্রবন্ধে ( ভারতী ১৩২৫ বৈশাখ )। এখন তা সকলেই মেনে নিয়েছেন। পর্ব শব্দের তন্তব রূপ পাব, পাবড়া, পাবড়ি, পাপড়ি ( রূপকার্থে )।

কলা শব্দের আসল অর্থ অংশ ( part ), সাধারণতঃ অতি ক্ষুদ্র ( minute ) অংশ বা কণা ( particle )। ছন্দ-পরিভাষায় উচ্চারিত ধ্বনির ক্ষুদ্রতম অংশ (mora)। সংস্কৃত, প্রাকৃত ও হিন্দী ছন্দশাস্ত্রে এই অর্থে কলা শব্দের বহুল প্রয়োগ দেখা যায়। দ্রষ্টব্য বৃহৎসাকর ১৮ এবং ২১০. ছন্দোমঞ্জরী ( *Caucutta Sanskrit Series No. XIV* ) ১১০ এবং ৩১৩; প্রাকৃতপৈঙ্গলম্ ১১২, ১৫-৩০; এবং 'ছন্দোপ্রভাকর' প্রভৃতি হিন্দী ছন্দগ্রন্থ। বিখ্যাত

প্রাচ্যতত্ত্ববিৎ H. T Colebrooke ১৮০৮ সালে *Asiatic Researches* পত্রিকায় *On Sanskrit and Prakrit Poetry* নামক তথ্যবহুল প্রবন্ধে বহুলভাবে ‘কলা’ শব্দ এবং তার সাংকেতিক চিহ্ন হিসাবে *k* অক্ষর ব্যবহার করেছেন—যেমন চার, পাঁচ, ছয় কলা বোঝাতে লিখেছেন *4k*, *5k*, *6k*। প্রবন্ধটি সংকলিত হয়েছে তাঁর *Miscellaneous Essays* গ্রন্থের দ্বিতীয় খণ্ডে। দ্রব্য এই গ্রন্থের E. B. Cowell-সম্পাদিত দ্বিতীয় সংস্করণ (১৮৭৩), পৃ ৫৭-১০৭। বাংলায় ‘কলা’ শব্দের প্রথম প্রয়োগ দেখা যায় নরহরি চক্রবর্তীর (অষ্টাদশ শতকের প্রথমার্ধ) ‘ছন্দঃসমুদ্র’ গ্রন্থে। আধুনিক কালে বোধ করি আমিহঁ এ শব্দটি চালাই কোনো কোনো প্রবন্ধে এবং ‘ছন্দোগুরু রবীন্দ্রনাথ’ গ্রন্থে (১৩৫২ আষাঢ়)। তারপর থেকে আমি সর্বদাই এ শব্দটি ব্যবহার করছি। হিন্দী অঞ্চলে বিদ্যালয়ের ছাত্রদের কাছেও এ শব্দটি সুপরিচিত। বাংলায় এটিকে অচল মনে করার কোনো হেতু দেখি না বরং সংস্কৃত, প্রাকৃত ও হিন্দীর চেয়ে বাংলাতেই এ শব্দটি চালাবার প্রয়োজন বেশি। সে কথা ‘মাত্রা’ শব্দের পরিচয় প্রসঙ্গে বলা যাবে।

অংশ অর্থে ‘কলা’ শব্দের অপরিভাষিক প্রয়োগ দেখা যায় সাধারণতঃ চন্দ্রকলা সকল ও বিকল এই তিনটি মাত্র শব্দে। আর রবীন্দ্রনাথের ‘ছন্দের মাত্রা’ (দ্বিতীয় পর্যায়) প্রবন্ধে পর্ব বা উপপর্ব অর্থে অংশবোধক ‘কলা’ শব্দের প্রয়োগ দেখা যায়। কলা শব্দকে পর্ব বা উপপর্বের স্থলবর্তী পরিভাষা রূপে গ্রহণের আবশ্যিকতা আছে বলে মনে করি না।

দল শব্দের মূখ্যার্থ অর্থাৎ ধাতুগত তথা আভিধানিক অর্থ অংশ, খণ্ড, বিভাগ *part, piece, division*। ছন্দ-পরিভাষায় একপ্রযোজ্যাকারিত শব্দাংশ (*syllable*)। সিলেব্-এর প্রতিশব্দ হিসাবে আমি ‘দল’ শব্দ প্রয়োগ করছি দীর্ঘকাল যাবৎ। দুই, তিন ও চার সিলেব্-এর শব্দকে যথাক্রমে বলি দ্বিদল, ত্রিদল ও চতুর্দল শব্দ। ‘জয়ন্তী-উৎসর্গ’ গ্রন্থে (১৩৩৮ পৌষ) প্রকাশিত ‘বাংলা ছন্দে রবীন্দ্রনাথের দান’ প্রবন্ধে আছে সিলেব্-বোধক ‘দল’ শব্দের প্রথম প্রয়োগ। রবীন্দ্রনাথের সঙ্গে মৌখিক আলোচনাকালে এ শব্দটি তাঁরও অম্লমোদন পেয়েছিল। দ্রষ্টব্য ‘ছন্দ-বিচার’ প্রবন্ধ, বিচিত্রা ১৩৩২ জ্যৈষ্ঠ।

সিলেব্ অর্থে ‘দল’ শব্দ প্রয়োগের বৌদ্ধিকতা সন্দেহে কেউ কেউ সন্দিহান। তাঁরা মনে করেন ‘অক্ষর’-ই সিলেব্-এর যথার্থ প্রতিশব্দ। সংস্কৃত ও প্রাকৃত



ছন্দশাস্ত্রে অক্ষর ও বর্ণ সমার্থক শব্দ। অক্ষরবৃত্ত ও বর্ণবৃত্ত অভিন্নার্থক। হিন্দীতেও তাই। প্রাকৃত ও হিন্দী ছন্দশাস্ত্রে অক্ষরের চেয়ে বর্ণ শব্দেরই প্রয়োগ বেশি। সংস্কৃত, প্রাকৃত ও হিন্দী ছন্দশাস্ত্রের বর্ণ বা অক্ষর আর ইংরেজি সিলেবল এক বস্তু নয়। কেননা সিলেবল মানে শব্দের উচ্চারণবিভাগ, আর অক্ষর হচ্ছে শব্দের লিপিবিভাগ। অর্থাৎ একটি হল উচ্চারিত শব্দাংশের ক্ষুদ্ররূপ, অপরটি লিখিত শব্দাংশের দৃষ্টরূপ। এই দুই বস্তু সব সময় এক হয় না। যেমন ‘সুপ্তি’ শব্দের সিলেবল-বিভাগ হল সুপ্-তি, আর অক্ষরবিভাগ সু-প্তি। এই দু-রকম বিভাগ যে অভিন্ন নয় তা বলাই বাহুল্য। তা ছাড়া ‘ঘুম’ শব্দে দুই বর্ণে এক ‘অক্ষর’, কিংবা man শব্দে তিন বর্ণে এক ‘অক্ষর’ বললে খটকা লাগে। পক্ষান্তরে ‘ঘুম’ শব্দে দুই অক্ষরে এক সিলেবল কিংবা man শব্দে তিন অক্ষরে এক সিলেবল বললে কোনো খটকা লাগে না। তাই অক্ষর-কে সিলেবল-এর প্রতিশব্দ বলে বলে গ্রহণ করা যায় না। আসল কথা, যে কারণেই হোক ভারতীয় মনে পাশ্চাত্য সিলেবল-এর ধারণাই ছিল না, তাই ভারতীয় ভাষাতেও সিলেবল-বোধক কোনো শব্দ রচিত হয় নি। আর পাশ্চাত্য ভাষাতেও ভারতীয় ধাঁচের অক্ষর-বোধক কোনো শব্দ নেই। তাই পাশ্চাত্য পণ্ডিতরা অগত্যা সিলেবলকেই ভারতীয় ছন্দশাস্ত্রের অক্ষর তথা বর্ণ শব্দের প্রতিরূপ বলে মেনে নিতে বাধ্য হয়েছেন।<sup>১</sup> কিন্তু মনে রাখা দরকার যে, অক্ষর বা বর্ণ শব্দের দ্বারা open syllable বোঝালেও কখনও closed syllable বোঝায় না। যুক্তাক্ষর বা যুক্তবর্ণের স্বীকৃতিই তার প্রমাণ। যুক্ত সিলেবল বলে কোনো বস্তু নেই। ‘কচ্চিৎ কাস্তা’ অংশের অক্ষর- বা বর্ণ-বিভাগ হল ক-চ্চিৎ-কা-স্তা। এর প্রত্যেকটিই open syllable। অথচ ওই অংশের ক্ষতিসম্মত সিলেবল-বিভাগ হল কচ্-চিৎ-কান্-তা। এর প্রথম তিনটি closed, শেষটি open।

অক্ষর আর সিলেবল যে এক বস্তু নয়, এ কথাটি প্রথম বুঝেছিলেন রামমোহন রায়। আধুনিক কালে দ্বিজেন্দ্রলাল রায়, বিজয়চন্দ্র মজুমদার, রাখালরাজ রায়, সত্যেন্দ্রনাথ দত্ত, কালিদাস রায় এবং রবীন্দ্রনাথ-প্রমুখ অনেকেই স্পষ্ট ভাষায় এ

১. দ্রষ্টব্য N. B. Halhed প্রণীত A Grammar of the Bengali Language গ্রন্থের (১৭৭৮) ছন্দ-প্রকরণ, পৃ ১২৬-২০৭ এবং H. T. Colebrooke-এর Miscellaneous Essays দ্বিতীয় খণ্ড, পৃ ৮৭ ও ১৪১।

কথা বলেছেন। কিন্তু সিলেবল্-এর বাংলা কি হবে, সে বিষয়ে তাঁদের মতসাম্য নেই। রামমোহন বলেছেন ‘ধ্বন্যঘাত’, সত্যেন্দ্রনাথ চালিয়েছেন ‘শব্দ-পাপড়ি’, দ্বিজেন্দ্রলাল ও রবীন্দ্রনাথ ‘মাত্রা’ শব্দকেই এ কাজে লাগিয়েছেন। বলা বাহুল্য, ধ্বন্যঘাত ও শব্দ-পাপড়ি পারিভাষিক শব্দরূপে ব্যবহারযোগ্য নয়। ছন্দ-আলোচনায় ‘মাত্রা’ শব্দ চলে অত্র অর্থে, তাই ওই একই শব্দ দিয়ে সিলেবল্ বোঝাতে গেলে বিভ্রান্তি ঘটে। কোনো বিশেষ আলোচনায় একই শব্দকে দুই অর্থে চালানো বিভ্রান্তিকর। তাই সিলেবল্-এর অত্র প্রতিশব্দ প্রয়োজন।

কিছুকাল আমি সিলেবল্ অর্থে ‘ধ্বনি’ এবং closed syllable ও open syllable অর্থে ‘যুগ্মধ্বনি’ ও ‘অযুগ্মধ্বনি’, এই তিনটি শব্দ ব্যবহার করেছি। কিন্তু মন প্রসন্ন ছিল না। কারণ ছন্দ-আলোচনাতেই ধ্বনি শব্দের অত্রবিধ প্রয়োগ অনিবার্য,—যেমন ধ্বনিগাত্তীর্ষ, ধ্বনিমাদুর্ষ। তাই রাজশেখর বসু মহাশয়ের সঙ্গে পত্রালাপ করি সিলেবল্-এর স্তূত্বের প্রতিশব্দের জ্ঞাত। তিনি জানানেন অক্ষর ও ধ্বনি সম্বন্ধে তিনি আমার সঙ্গে একমত, তার জ্ঞাত নূতন শব্দ চাই; তবে সন্তোষজনক প্রতিশব্দ না পাওয়া পর্যন্ত ‘ধ্বনি’-ই চলুক। পরবর্তীকালে তিনি ‘বাংলা ছন্দের শ্রেণী’ নামে এক প্রবন্ধে (পরিচয় ১৩৫২ কার্তিক) এই অভিমতই ব্যক্ত করেন। এখানে ওই প্রবন্ধের একটা অংশ উদ্ধৃত করি।—

“সংস্কৃত ‘অক্ষর’ শব্দে সিলেবল্ ও হরফ দুই-ই বোঝায়। তা ছাড়া ইংরেজি ও সংস্কৃতের syllable একই উপায়ে নিরূপিত হয় না। এই গোলযোগের জ্ঞাত অত্র প্রতিশব্দ দরকার। প্রবোধবাবু ‘ধ্বনি’ চালিয়েছেন কিন্তু এই সংজ্ঞাটিতে কিছু আপত্তি করবার আছে।...নূতন পরিভাষা স্থির করবার সময় যথাসম্ভব দ্ব্যর্থ পরিহার বাঞ্ছনীয়। বহুকাল পূর্বে কোনও প্রবন্ধে syllable-এর প্রতিশব্দ ‘শব্দাঙ্গ’ দেখেছিলাম। এই সংজ্ঞায় দ্ব্যর্থের আশঙ্কা নেই, কিন্তু ঐতিকটু। সেজন্য এখন প্রবোধবাবুর ‘ধ্বনি’ই মেনে নিচ্ছি। আশা করি পরে আরও ভাল সংজ্ঞা উদ্ভাবিত হবে।”

এই প্রবন্ধটি পরে রাজশেখরের ‘লঘুগুরু’ গ্রন্থে সংকলিত হয়।—দ্রষ্টব্য ‘পরশুরাম গ্রন্থাবলী’, প্রথম খণ্ড (১৩৭৬ পৃ ৫১০)। সিলেবল্ অর্থে শব্দাংশ, শব্দাণু শব্দের প্রয়োগও দেখেছি। কিন্তু শব্দাঙ্গের স্থায় এ দুটি ভারী শব্দও চালানো কঠিন। কালিদাস রায় চালিয়েছেন ‘পদাংশ’ বা ‘পাদক’। এ শব্দটি দুর্বল নয়, তাই অচলও নয়। দেখা যাচ্ছে ‘অক্ষর’ যে সিলেবল্ নয়, এ ধারণা

বহুব্যাপক, রামমোহন থেকে রাজশেখর পর্যন্ত বহু চিন্তাশীল ব্যক্তিই এই ধারণা পোষণ করেন এবং এই ধারণা দৃঢ় ভিত্তির উপরেই প্রতিষ্ঠিত।

‘পাদক’ শব্দটি অচল নয়। কিন্তু এটির অর্থ স্থম্পষ্ট নয়। তা ছাড়া হৃদশাস্ত্রে প্রচলিত ‘পাদ’ শব্দের রূপভেদ বলে মনে সংশয়ও দেখা দিতে পারে। তাই ‘দল’ শব্দ সূহৃৎর বলে মনে করি। দল্ ধাতুর অর্থ খণ্ডিত করা, বিভক্ত করা, বিদীর্ণ করা, to divide, to split। তাই ‘দল’ শব্দের ধাতুগত অর্থ খণ্ড, ভাগ। বাংলায় এই অর্থ স্থপ্রচলিত নয়। তবে তার পরোক্ষ প্রয়োগ আছে। যেমন সেনাদল মানে *division of an army*। একই সজ্জা ভেঙে নানা খণ্ডে বিভক্ত হলে এক-এক খণ্ডকে বলি ‘দল’, আর বিভিন্ন দলের কলহকে বলি ‘দলাদলি’। মুগ-জাতীয় দ্বিদল শস্য যখন অখণ্ডিত অবস্থায় থাকে তখন তাকে বলি মুগ, ছোলা ইত্যাদি, যখন ভেঙে দ্বিধাবিভক্ত করা হয় তখন বলি মুগের ‘দাল’, ছোলার ‘দাল’ ইত্যাদি, রূপান্তরে ‘ডাল’। দ্রষ্টব্য জ্ঞানেন্দ্রমোহন দাসের বাঙ্গালা ভাষার অভিধানে দাল ও ডাল শব্দ। দাল (দাইল) ‘দ্বিদল’ শব্দ থেকে উদ্ভূত কিনা তা বিশেষজ্ঞদের বিচার্য বিষয়। হিন্দীতে দল্ ধাতুজাত শব্দের চল অপেক্ষাকৃত বেশি। ‘হিন্দী শব্দার্থ-পারিজাত’ অভিধান থেকে কয়েকটি শব্দের অর্থ উদ্ধৃত করছি। দল—খণ্ড, টুকড়া, আধা; দলদার—মোটো দল-ওয়ালা; দলন—টুকড়ে টুকড়ে করনা; দলনা—দাল বনানা, দো টুক করনা, দাল অলগ অলগ করনা; দলিয়া—অধকুটো, মোটা পীসা ছয়া অন্ন (খণ্ড খণ্ড করা গম, গমের খুদ); দলী—দলিত, দো টুক কী গঙ্গি; দাল—দলা ছয়া চনা অরহর মুগ আদি। সংস্কৃত ‘হৃদোমঙ্করী’ গ্রন্থের (Calcutta Sanskrit Series, No. XII) ষষ্ঠ স্তবকের চতুর্থ, ষষ্ঠ ও সপ্তম সূত্রে আছে ‘দল’ আর পঞ্চম সূত্রে আছে ‘শকল’। দল ও শকল শব্দ সমার্থক। টীকাতে আছে ‘দলয়োঃ খণ্ডয়োঃ, শকলয়োঃ খণ্ডয়োঃ’। স্পষ্টতঃই দল ও শকল শব্দ সাধারণভাবেই শ্লোকখণ্ড অর্থে প্রযুক্ত হয়েছে, কোনো বিশেষ পারিভাষিক অর্থে নয়। প্রাকৃতপৈঙ্গলে ‘দল’ শব্দের প্রয়োগ দেখা যায় গন্ধাপ, উল্লাল, বুল্লণা, খল্লণ, দণ্ডকল প্রভৃতি ছন্দের লক্ষণ-নির্দেশ-প্রসঙ্গে। সর্বত্রই এ-শব্দটি প্রযুক্ত হয়েছে শ্লোকাংশ (অর্ধাংশ বা চতুর্থাংশ) অর্থে, কোনো বিশেষ পারিভাষিক অর্থে নয়।

অতএব বাংলায় এক-প্রয়াসে উচ্চারিত শব্দাংশ, এই নির্দিষ্ট পারিভাষিক অর্থে ‘দল’ শব্দ ব্যবহারের বিরুদ্ধে কোনো যুক্তিসংগত কারণ দেখি না। ইংরেজি

সিলেবল্ শব্দের দ্বারা এক-এক বারে উচ্চাৰ্শ শব্দাংশ ( part of a word ) বোঝায়। তাই বাংলায় অল্পরূপ অর্থ বোঝাবার জন্য অংশবোধক 'দল' শব্দের নির্বাচন সর্বতোভাবেই সমীচীন মনে করি। কারণ 'দল' শব্দের এই অর্থ নিঃসন্দেহে ব্যাকরণ ও অভিধান-সম্মত। অধিকন্তু শব্দটি ছোট, সহজবোধ্য ও সহজগ্রাহ্য। তাই দল, মুক্তদল ( open syllable ) ও বন্ধদল ( closed syllable ), এই শব্দ তিনটি অতি অল্প সময়ের মধ্যেই অপরিচয়ের বাধা কাটিয়ে বহু পাঠকের অমুমোদন লাভে সমর্থ হয়েছে। পরবর্তীকালে প্রবীণ ছান্দসিক কালিদাস রায় এবং দিলীপকুমার রায় সিলেবল্ অর্থে দল শব্দ-প্রয়োগের সমীচীনতা স্বীকার করেছেন।<sup>১</sup> বর্তমানে অল্প ছান্দসিকদের মধ্যেও, বিশেষতঃ তরুণ ছান্দসিকদের মধ্যে, এই তিন পরিভাষা ব্যবহারে মনের দ্বিধা ও সংশয় ক্রমশঃ কেটে যাচ্ছে।

দল শব্দের ধাতুগত মূল অর্থ খণ্ড, অংশ। ইংরেজি part ধাতু থেকে উৎপন্ন party শব্দও মূলতঃ অংশ ( part )-সূচক। তাই party শব্দের ষথার্থ প্রতিশব্দ দল। দল শব্দের গৌণার্থ বা রূপকার্থ পাপড়ি ( ব্রিদল, চতুর্দল বা পঞ্চদল পুষ্প, শতদল কমল ) বা পাতা ( দুর্বাদল, বিষদল, নলিনী-দলগত-জলমতিতরলম্ )। এই অর্থ প্রত্যক্ষতঃ দল্ ধাতু থেকে উৎপন্ন নয়।

মাত্রা শব্দের মৌলিক অর্থাৎ ধাতুগত অর্থ পরিমাপের উপকরণ, সে উপকরণের সংখ্যা-অনুসারে কোনো কিছুর পরিমাণ নিরূপণ করা হয়, unit of measure। বস্তুভেদে তার মাত্রাও অর্থাৎ unit of measureও বিভিন্ন হয়। যেমন কঠিন বা তরল বস্তুর, দৈর্ঘ্যের, কালের, তাপের মাত্রা। আবার পরিমেষ বস্তুর আয়তনভেদেও মাত্রা বিভিন্ন হয়। যেমন গজ, ফুট, ইঞ্চি; বৎসর, মাস, দিন, ঘণ্টা, মিনিট, সেকেন্ড। ঘণ্টার মাত্রা মিনিট, মিনিটের মাত্রা সেকেন্ড। ছন্দের বেলাতেও তাই। পঙ্ক্তির মাত্রা পদ, পদের মাত্রা পর্ব, পর্বের মাত্রা কলা বা দল।<sup>২</sup> রবীন্দ্রনাথ মাত্রা শব্দটিকে সর্বদাই এই মৌলিক অর্থেই ব্যবহার করেছেন।

১. প্রটো যথাক্রমে 'নবপ্রবেশিকা ব্যাকরণ' ( ১৯৩৭ খ্রিঃ ), ছন্দ-জিজ্ঞাসা, ২৭-২৮ পৃ.  
'ছান্দসিকা' ( দ্বিতীয় সং ১৯৬৮ ), প্রথম অধ্যায়, পৃ ২১-২৩ ও পরিশিষ্ট-খ, পৃ ২৮৮-৮৯।

২. ইংরেজিতে pentameter ও hexameter মানে পঞ্চমাত্রক ও ষষ্ঠমাত্রক ছন্দপঙ্ক্তি। এসব স্থলে এক-একটি পর্বই ( foot ) পঙ্ক্তির মাত্রা ( metros বা metron ) বলে স্বীকৃত।

দ্রষ্টব্য তাঁর ‘ছন্দ’ গ্রন্থ ( ১৯৬২ সং ), পৃ ৩৪-৩৫ এবং ২৬৯-৭৮ । তিনি যখন বলেন, ‘কল’ শব্দ ছড়ার ছন্দে এক মাত্রা, অথচ সাধু ছন্দে দুই মাত্রা তখন স্পষ্টই বোঝা যায় তাঁর মতে ছড়ার ছন্দে এক সিলেবল্ অর্থাৎ এক দলই এক মাত্রা আর সাধু ছন্দে ওই দলের অর্ধাংশ অর্থাৎ এক কলাই এক মাত্রা । সংস্কৃত ও প্রাকৃত ছন্দে শুধু কলা-ই ছন্দের মাত্রা রূপে গণ্য হত । তাই কলা ও মাত্রা শব্দকে অভিন্নার্থক বলে মনে করা হত । বাংলায় দু-রকম মাত্রাই ( unit of measure ) চলে, তাই কলা ও মাত্রাকে সমার্থক মনে করা সংগত নয় । কলামাত্রা ও দলমাত্রা, এ দু-রকম মাত্রা স্বীকার করাই যুক্তিসংগত ।

পর্ব, কলা, দল ও মাত্রা, এই চারটি পরিভাষার ব্যাখ্যা-প্রসঙ্গে দ্রষ্টব্য লেখকের ‘ছন্দ-পরিক্রমা’ গ্রন্থের ( ১৯৬৫ ) ‘পরিভাষা-পরিচয়’ অধ্যায় এবং দিলীপকুমার রায় প্রণীত ‘ছান্দসিকী’ গ্রন্থের ( দ্বিতীয় সং ১৯৬৮ ) ‘পরিশিষ্ট-ক’ অংশ ।\*

\* এই ‘অনুসঙ্গ’ অংশটুকু ‘ভাষা’ পত্রিকা ( প্রথম বর্ষ, তৃতীয় প্রকাশ ) থেকে পুনর্মুদ্রিত ।

# বাংলা ছন্দের পরিভাষা .

দিলীপকুমার-প্রবোধচন্দ্র-পত্রসংলাপ

উত্তরপক্ষ

১

‘কুচিরা’

শান্তিনিকেতন

১৭ বৈশাখ ১৩৭৩

শ্রীদিলীপকুমার রায়

স্বস্ত্যবরেষু

আপনার পত্র যথাসময়েই পেয়েছি স্নেহভাজন ছাত্র শ্রীমান্ নীলরতনের মধ্যস্থতায়। কিন্তু কর্মচক্রের আবর্তনে এমনই বিভ্রান্ত হয়ে ছিলাম যে, যথাসময়ে উত্তর দেওয়া সম্ভব হয় নি। নীলরতনের কাছে যে সময় প্রার্থনা করে রেখেছিলাম তার মেয়াদও ফুরিয়ে এল। তাই আর কালহরণ না করে উত্তর লিখতে বসেছি। কিন্তু বসেও তেমন উৎসাহ পাচ্ছি নে কেন? দেখলাম তার উত্তরটা আপনিই দিয়ে রেখেছেন।—“সত্তর বৎসর বয়স হল তো। কবে ডাক আসে কে জানে?...এখন ছন্দবিতর্কে রসও পাই না তেমন।”

আপনাতে ও আমাতে বয়সের তফাত তো মাত্র তিনচার মাসের। এই ১৫ই বৈশাখ সত্তরে পা দিলাম। এখন কি আর কোনো বিতর্কেই রস পাওয়া যায়? তবু তর্কের জবাব দিতে বসলাম কেন? তারও উত্তর দিচ্ছি আপনার ভাষাতেই।—“আমি সত্যজিজ্ঞাসু। তর্কের জগ্রে তর্ক করি না।”

সারাজীবন ধরে তর্ক তো আমি কম করি নি। কিন্তু মজা এই যে, অন্তরে সঙ্কে যত না তর্ক করেছি, তার চেয়ে ঢের বেশি তর্ক করেছি নিজের সঙ্কে। নিজের মত খণ্ডন করতে করতে, নিজের চিন্তার আবরণ মোচন করতে করতেই এগিয়ে চলেছি। জানি না এগোবার আর কোনো উপায় আছে কি না। রবীন্দ্রনাথ বলেছেন, পূর্বজন্ম সত্য হলে

“আমায় হয়তো করতে হবে

আমার লেখা সমালোচন।”

আমার তো মনে হয় নিত্য নব নব জন্মলাভ করেই চলেছি, ফলে নিত্যই নিজের

লেখার সমালোচনাও করতে হচ্ছে। তাই নিজের সঙ্গে নিজের তর্কেরও বিরাম নেই। এটাই বোধ হয় জীবনের নীতি। আপনার সঙ্গে যে তর্ক করতে বসেছি, সেটাও তো আসলে নিজের সঙ্গেই তর্ক। যারা সহৃদয়তার সঙ্গে আমার চিন্তাকে উদ্বুদ্ধ করেন, আমার তর্কবুদ্ধিকে সজাগ করে রাখেন, তাঁদের আমি পরমাত্মীয় বলেই মনে করি। আপনার সবরকম লেখার মধ্যেই আমি একটা গভীর হৃদয়বস্তুর স্বাদ পাই। যারা নিছক তार्কিক, নীরস তार्কিক, তর্কের খাতিরেই তর্ক করেন, তাঁদের প্রতি আমার শ্রদ্ধা নেই। আমার বিশ্বাস আপনি জীবনে জ্ঞানকে বুদ্ধিকে একান্ত করে দেখেন না, হৃদয়কে প্রেমকেই আপনি বড় বলে জানেন। আপনি তর্ক তুললেও তাতে প্রীতির রস থাকে। তাই আপনার প্রশ্নের উত্তর দিতে আগ্রহের অভাব হয় নি। নইলে তর্ককৃষ্টির আখড়ার ধারও আমি মাজাতাম না। তবু বলে রাখছি আমি খুব সংক্ষেপেই জবাব দিতে চেষ্টা করব। অন্ত্যকে বোঝাতে হলে হয়তো অনেক কথা দরকার। আপনাকে বেশি কথা বলা বোকামি মাত্র। সে বোকামি করব না। আপনি ভাবগ্রাহী। যদি আমার কথার মধ্যে কোনো ফাঁক থাকে, আপনি হৃদয় দিয়ে তা পূরণ করে নেবেন।

আমার ‘ছন্দপদিক্রম’ বইখানির আলোচনা-প্রসঙ্গেই আপনি কিছু প্রশ্ন তুলেছেন। প্রশ্নগুলি প্রায় সবই পরিভাষাবিৎসক। আমার কয়েকটি পরিভাষার প্রয়োজনীয়তা বা সূচুতা সম্বন্ধে আপনার মনে সন্দেহ দেখা দিয়েছে। সে সম্বন্ধে আমার বক্তব্য পেশ করছি। কিন্তু তারও আগে কবুল করছি যে, আপনার কোনো কোনো উক্তি বা মন্তব্য আমি পুরোপুরি মেনে থাকি।

১. আপনি বলেছেন ছন্দে ‘গণনার যুনিটকেই আমি মাত্রা নাম দিতে চাচ্ছি’। এ বিষয়ে কোনো মতভেদ নেই। তবে কি না বিভিন্ন রীতির ছন্দে তো বিভিন্ন রকম যুনিট থাকতে পারে। যেমন মাত্রাবৃত্ত (quantitative) রীতির ছন্দের যুনিট ও দলবৃত্ত (syllabic) রীতির ছন্দের যুনিট এক নয়। দলবৃত্ত মানে ‘দলমাত্রিক’, অর্থাৎ সেই ছন্দোরীতি যে রীতিতে প্রত্যেকটি দলই (syllable) এক যুনিট বলে গণনীয় হয়। এই রীতিতে দলই মাত্রা। তা হলে মাত্রাবৃত্ত মানে হয় ‘মাত্রামাত্রিক’। অর্থাৎ এই রীতিতে মাত্রাই মাত্রা। আরও পরিষ্কার করে বলতে চেষ্টা করি। ইংরেজি ‘যুনিট’ শব্দের বাংলা প্রতিশব্দ ‘মাত্রা’। বিভিন্ন বস্তুর পরিমাণে বিভিন্ন রকম যুনিট বা মাত্রার প্রয়োগ হয়। এই যুনিটভেদ বা মাত্রাভেদ প্রকৃতিগতও হতে পারে, আয়তনগতও হতে পারে।

যেমন—কোনো জিনিষের মাপের যুনিট (মাত্রা) হল মিটার, আর-এক রকম জিনিস মাপার মাত্রা হল লিটার। এই পার্থক্য প্রকৃতিগত। এগুলিরই আয়তনগত পার্থক্য বোঝাতে কিলোমিটার, মিলিমিটার প্রভৃতি মাত্রানাম ব্যবহার করতে হয়। ছন্দের বেলাতেও তাই। একজাতীয় ছন্দের যুনিট বা মাত্রা হল ‘দল’—এই জাতীয় ছন্দকে বলা যায় ‘দলমাত্রিক’ বা ‘দলবৃত্ত’, আর-এক জাতীয় ছন্দের যুনিট বা মাত্রা হল ‘কলা’—এইজাতীয় ছন্দকে বলা যায় ‘কলামাত্রিক’ বা ‘কলাবৃত্ত’। অর্থাৎ ক্ষেত্রবিশেষে দলই মাত্রা, আর অন্য ক্ষেত্রে কলাই মাত্রা। দল, কলা এগুলি মাত্রার নাম। মনে রাখতে হবে পর্ব, পদ, পংক্তি এগুলিও মাত্রানাম। শ্লোক বা স্ট্যানজার মাত্রা পংক্তি, তাই বলি এই শ্লোকে চার পংক্তি, ওই স্ট্যানজায় দশ পংক্তি পংক্তির মাপের যুনিট বা মাত্রা পদ—ত্রিপদী, চৌপদী পংক্তি বললে ‘পদ’কেই মাত্রা বলে ধরা হয়। যখন বলি চৌপদিক বা পঞ্চপদিক পংক্তি তখন পর্বকেই মাপের মাত্রা ধরা হয়। যখন বলি চার দলের পর্ব তখন দলকেই পর্বমাপের মাত্রা (যুনিট) বলে ধরা হয়। আবার যখন বলি পাঁচ কলার পর্ব তখন কলাই হয় মাত্রা বা যুনিট। দলমাত্রিক, কলামাত্রিক নামের দ্বারা বিশেষ বিশেষ রীতির ছন্দের মাত্রাপ্রকৃতি সূচিত হয়। বলাবাহুল্য, কলা বলতে বুঝি কলাগত মাত্রা বা যুনিট, একটি হ্রস্ব বর্ণের উচ্চারণকাল। এই কালগত যুনিটকে যদি বলি ‘মাত্রা’, তাহলে quantitative ছন্দকে বলতে হয় ‘মাত্রামাত্রিক’। এই নাম চলতে পারে না, আর তাহলে ‘দলমাত্রিক’ নামটাও হবে নিরর্থক। আর-এক ভাবে বলি। যেমন দিনের মাত্রা ঘণ্টা, ঘণ্টার মাত্রা মিনিট, মিনিটের মাত্রা সেকেন্ড, তেমনি শ্লোকের মাত্রা পংক্তি, পংক্তির মাত্রা পদ, পদের মাত্রা পর্ব, পর্বের মাত্রা দল অথবা কলা—কোনো রীতিতে কলা, কোনো রীতিতে দল। এই বাক্যটিতে মাত্রা শব্দের স্থলে ইংরেজি যুনিট কথাটা বসিয়ে যান কিংবা সমস্ত বাক্যটিতে ইংরেজিতে অহুবাদ করুন তাহলেই আশা করি ‘কলা’ শব্দ প্রয়োগের সার্থকতা বোঝা যাবে। মাত্রা বলতে যদি শুধু time unitই বোঝাত তাহলে উক্ত বাংলা বাক্যটির কোনো মানে হত না এবং ডাক্তার যদি ছয় মাত্রা ওষুধ ব্যবস্থা করে যান তাহলে ছন্দোবিৎ রোগী ভাববেন যে, ডাক্তারেরই মানসিক ব্যাধির চিকিৎসা আশু প্রয়োজন। বস্তুতঃ মাত্রা বলতে যে-কোনো রকম যুনিটই বোঝায়, শুধু time unit নয়। তাহলেই প্রত্যেক রকম যুনিটের জন্য আলাদা আলাদা নাম দরকার। আমাদের ভাষায় ছন্দের time unit-এর কোনো ‘বিশেষ’



নাম নেই, সাধারণ unit-সূচক ‘মাত্রা’ শব্দটি দিয়েই কাজ চালানো হয়। কিন্তু স্থলবিশেষে বিজ্ঞানসম্মত আলোচনায় ওরকম নাম থাকা বিশেষ প্রয়োজন, এমন কি অত্যাবশ্যক। তাই আমাকে ‘কলা’ শব্দটা চালাতে হয়েছে।

এই তর্কটা বিস্তৃত লজিকের তর্ক। জানি না এখনও আমার মনোগত যুক্তিটাকে পরিষ্কার করে বোঝাতে পেরেছি পেরেছি কিনা।

এখানে বলা উচিত যে, ‘কলা’ শব্দটি আমি নিয়েছি সংস্কৃত ও প্রাকৃত ছন্দশাস্ত্র থেকেই। ওটা আমার বানানো নয়। ওই শাস্ত্রে চার কলার বা পাঁচ কলার পর্ব বলতে প্রায়শই ‘চতুঃকলগণঃ’, ‘পঞ্চকলগণঃ’ প্রভৃতি শব্দ ব্যবহৃত হয়ে থাকে।

কলা শব্দের ইংরেজি mora কথাটাও আপনার ভালো লাগে না। ইংরেজিতে মাত্রাবৃত্ত বা কলাবৃত্ত ছন্দের আলোচনায় ও শব্দটার প্রয়োজন হয় না। এক সময়ে কোলত্রক সাহেব সংস্কৃত ও প্রাকৃত মাত্রাবৃত্ত (Quantitative) ছন্দের যুনিট বোঝাতে ইংরেজিতে metrical moment বা instant ব্যবহার করতেন। বলা বাহুল্য, ওরকম নাম চালানো কঠিন, তার প্রকৃতিও ঠিক পারিভাষিক নয়। পারিভাষিক নাম হওয়া চাই সংক্ষিপ্ত, কিছু পরিমাণে সাংকেতিক এবং নির্দিষ্টার্থক বা রূঢ়ার্থক। Mora শব্দটা এই হিসাবে বেশ ভালোই বলতে হবে। পারিভাষিক শব্দের রূপভেদ ঘটানোও সহজসাধ্য হওয়া চাই। Mora থেকে বিশেষণ moric সহজেই হয়। কিন্তু moment, instant বা beat শব্দকে এভাবে রূপান্তরিত করা যায় না। মাত্রাবৃত্ত ছন্দের পরিচয়প্রসঙ্গে ইংরেজিতেও mora শব্দের প্রয়োগ বিরল নয়। একটা দৃষ্টান্ত দিই। হুদিত্যুত সংস্কৃতজ্ঞ পণ্ডিত A. B. Keith তাঁর *History of Sanskrit Literature* গ্রন্থে ( ১৯২৮ ) The Metres of Classical Poetry নামক উপচ্ছেদে সংস্কৃত মাত্রাছন্দ-প্রসঙ্গে লিখেছেন ( পৃ ৪১৮ )—

“Probably from popular poetry, there come to be used metres in which only the sum total of *morae* was absolutely fixed, there being indeed certain restrictions as to the mode in which these *morae* could be made up, but such restrictions allowing a variation in the number of syllables, the *Matrachandas*.”

অত্যাচার আছে—

“More complex is the case of the Arya, which is recognised by metrical treatises as *Ganacchandas*, the number of *morae* and the number of feet ( *gana* ) being fixed. Thus the ordinary form of the Arya has  $7\frac{1}{2}$  feet to the half-verse with 4 *morae* in each, 30 in all.”

*Morae* শব্দগুলির বক্তৃতা গ্রন্থকারের নয়, বর্তমান লেখকের। আশা করি ইংরেজিতে *mora* শব্দের প্রয়োগ সম্বন্ধে আর সন্দেহ নেই। এখানে এ কথাও বলা উচিত যে, সংস্কৃত ও প্রাকৃত ছন্দশাস্ত্রে এই মাত্রাছন্দ ও গণচ্ছন্দের প্রসঙ্গেই ‘কলা’, ‘চতুষ্কলগণঃ’ প্রভৃতি শব্দের বহুল প্রয়োগ দেখা যায়।

২. ‘মাত্রা’ শব্দের দ্বারা সর্বকম যুনিটই বোঝায়। বিশেষভাবে *time unit* বোঝাবার মতো কোনো শব্দ আমাদের ছন্দশাস্ত্রে নেই। তাই কলামাত্রা বোঝাবার জন্য ‘কলা’ শব্দটি *reserve* করে রাখতে হয়েছে। তেমনি অক্ষর বা বর্ণ শব্দের দ্বারা *letter* বোঝায়, পরোক্ষে *syllable*ও বোঝায়। কিন্তু বিশেষভাবে সিলেব্ল বোঝাবার মতো কোনো শব্দ আমাদের ভাষায় নেই। তাই সিলেব্ল বোঝাবার জন্য ‘দল’ শব্দটিকে *reserve* করতে হয়েছে। বলা উচিত যে, ‘দল’ কথাটিও নিয়েছি আমাদের ছন্দশাস্ত্র থেকেই। সে শাস্ত্রে ‘দল’ কথাটি ব্যবহৃত হয় সাধারণভাবে ‘খণ্ড’ অর্থে। তাছাড়া ওটা বিশেষ পারিভাষিক অর্থেও স্বীকৃত নয়। আমি ‘দল’ কথাটিকে বিশেষভাবে ‘শব্দখণ্ড’ অর্থাৎ সিলেব্ল অর্থে নূতন পরিভাষা হিসাবে স্বীকার করে নিয়েছি। সূত্রের বিষয়, সিলেব্ল অর্থে দল কথাটি অনেকেরই পছন্দ হয়েছে। আপনারও হয়েছে। এটা আমার পক্ষে বিশেষ আনন্দের বিষয়। আপনি লিখেছেন—

“আপনার মুক্তদল ও বন্ধদল চমৎকার নাম হয়েছে, দলকে *syllable*-এর প্রতিশব্দ ধরে।”

পরিভাষা হিসাবে ‘দলবৃত্ত’ শব্দটিও আপনি সমর্থন করেছেন, ব্যবহারও করেছেন। সূত্রাং দাঁড়াল এই।—দল (*syllable*), মুক্তদল (*open syllable*), বন্ধদল (*closed syllable*) দলবৃত্ত (*syllabic*) এই কয়টি পারিভাষিক শব্দপ্রয়োগে আপনার পূর্ণ সম্মতি আছে। এটা আমার পক্ষে পরম আনন্দের বিষয়। কেননা, অল্প অনেকের চেয়ে আপনার সম্মতির মূল্য অনেক বেশি বলেই আমি মনে করি।

৩. অক্ষরবৃত্ত প্রভৃতি পারিভাষিক শব্দের প্রসঙ্গে আপনি বলেছেন—  
“আমার বক্তব্য এই যে, possession শুধু যে nine-tenths in law তাই নয়, ছন্দেও তাই।” আপনার এ কথার সত্যতা অস্বীকার করি না, করা যায় না। তার পরে আপনি আরও স্পষ্ট করে বলেছেন—“অবশ্য বলতে পারেন অক্ষরবৃত্ত মাত্রাবৃত্ত তো মাত্র সেদিনের নামকরণ—(আপনিঃ করেছিলেন না?)—হক। কিন্তু এ নামগুলি চলে গেছে iambic, anapaest, trochee, dactyl-এর মতন।”

‘এখন কেউ এদের পদব্রষ্ট করে’ অজ্ঞ নাম চালাবার চেষ্টা করুক, তা আপনি চান না। আপনার মনোভাবেও যথেষ্ট জোর আছে এবং আমিও তা একেবারে উড়িয়ে দিতে চাই না। কিন্তু তার পরেই আপনি বলেছেন—“আমি বলি মাত্রাবৃত্ত অক্ষরবৃত্ত ও দলবৃত্ত এই নামই থাক—সঙ্গে সঙ্গে ব্যাখ্যা থাক এদের প্রকৃতির, যে ব্যাখ্যায় আপনি অধিষ্ঠিত।”

তথাস্তু। আমি আপত্তি করব না। কিন্তু ‘স্বরবৃত্ত’ গেল কোথায়? ‘স্বরবৃত্ত’ শব্দটাও অক্ষরবৃত্ত-মাত্রাবৃত্তের মতো দখলদার পবিভাষা। কিন্তু আপনি তার দখলী স্বত্ব অস্বীকার করে সে স্বত্ব তুলে দিতে চাইছেন ‘দলবৃত্ত’ের হাতে। কেননা, possession nine-tenths in law হলেও সবটা নয়, one-tenth-এর আইনসম্মত ফাঁক থাকে। সেই ফাঁকেই তো আপনি ‘স্বরবৃত্ত’কে স্বত্বচ্যুত করে সে স্বত্ব দিতে চান ‘দলবৃত্ত’কে। আমিও তাই চাই, আপত্তি করি না। কিন্তু অক্ষরবৃত্ত-মাত্রাবৃত্তের গায়ে আইনের আঁচড় এতবারেই লাগতে পারে না, তাও নয়।

কিন্তু আমি নির্মম নই। অক্ষরবৃত্ত, মাত্রাবৃত্ত, স্বরবৃত্ত এই তিনটি নাম তো আমিই চালু করেছিলাম প্রায় চুয়াল্লিশ বৎসর আগে (১৯২২ সালে)। স্মরণ্য এগুলির প্রতি আমার মমতা আছে, থাকা স্বাভাবিক, কেননা আমার পক্ষে তো এরা ‘মামকাঃ’। তার উপরে প্রায় অর্ধশতাব্দীর স্বত্বাধিকারী। এই অবস্থায় ভিন্ন পরিভাষারূপী পাণ্ডবরা যদি অক্ষরবৃত্ত মাত্রাবৃত্ত প্রভৃতি মামকদের রাজ্যচ্যুত করতে উদ্বৃত্ত হয় তবে ধৃতরাষ্ট্রের পক্ষে কি উদাসীন থাকা সম্ভব? কিন্তু অন্তঃপুংবাসিনী গান্ধারী যে বলেছেন, ত্যাগ কর, ত্যাগ কর দুষ্টপরিভাষাগণে’।

এই উভয়সংকটে আমি কি করি বলুন তো? শ্রাম ও ক্ল, দুই দিক্ বজায়

রাখি কি করে? কেউ কেউ বলছেন, অক্ষরবৃত্ত মাত্রাবৃত্ত স্বরবৃত্ত এরা নিখুঁত না হতে পারে, কিন্তু তাই বলে এদের বর্জন করতে হবে কেন—যেমন আপনি বলেন। অনবত্ত পরিভাষা কি কোথাও আছে? তা ছাড়া আপনি সম্ভান সর্বাঙ্গসুন্দর না হলেই কি ত্যাগ করতে হয়? ‘বিষবৃক্ষোহপি সংবর্ধা স্বয়ং ছেতুং অসাম্প্রতম্’—এই চিরাগত উক্তির তাৎপর্যটাও তো উপেক্ষণীয় নয়। কিন্তু আর এক পক্ষ বলছেন, অক্ষরবৃত্ত প্রভৃতি ত্রুটিপূর্ণ পরিভাষা চালু থাকলে ছন্দ সম্বন্ধে সাধারণের ভ্রান্ত সংস্কার কখনও দূর হবে না, ভ্রান্তিগুলিই ক্রমে দৃঢ়তর হবে—অতএব এক শ্রেণীর আপত্তি সম্বন্ধে কলাবৃত্ত, দলবৃত্ত প্রভৃতি নূতন পরিভাষা চালাবার চেষ্টা থেকে নিরস্ত হওয়া উচিত নয়। ভ্রান্ত সংস্কার দূর করা দুঃসাধ্য ও সময়সাপেক্ষ, তা বলে যে তাকে পোষণ করতে হবে এমন কথা মানা যায় না। এই হল দুই পক্ষের মত। এই অবস্থায় আমার কর্তব্য কি?

এবার আমার মনের আসল কথাটা খুলে বলি। আমি মনে করি চালু পরিভাষা নিরর্থক হলেও কিংবা সামান্য খুঁত থাকলেও সর্বথা বর্জনীয় নয়। এগুলিকে কটাক্ষ নাম হিসাবে রক্ষা করাই বাঞ্ছনীয়। তাতে কোনো ক্ষতি নেই, অথচ লোকের তাতে সুবিধা হয়। যেমন—‘পয়ার’। এই নামটার ব্যুৎপত্তিগত কোনো তাৎপর্য নেই, অর্থাৎ নাম শুনেই তার আকৃতি-প্রকৃতি সম্বন্ধে স্পষ্ট ধারণা কবাব কোনো উপায় নেই। অথচ ‘পয়ার’ নামটার একটা রূঢ়ার্থ আছে, অর্থাৎ পয়ার কাকে বলে তা সকলেরই জানা আছে। এরকম পরিভাষা বর্জন করবার কোনো আবশ্যিকতা নেই। কিন্তু বৈজ্ঞানিক আলোচনায় এই ছন্দের পূর্ণপরিচায়ক একটা স্পষ্টার্থক নাম থাকাও আবশ্যিক। তাই বলতে হয়, ‘আট-ছয় মাত্রার অপূর্ণ দ্বিপদী’রই প্রচলিত নাম ‘পয়ার’। আর-একটা প্রচলিত নাম ‘অমিত্রাক্ষর’। সকলেই জানেন এই নামটাও ছন্দের প্রকৃতিপরিচায়ক নয় অর্থাৎ, নামটাতে যথেষ্ট খুঁত আছে, অথচ অমিত্রাক্ষর কাকে বলে তাও সকলেই জানেন অর্থাৎ এ নামটা রূঢ়ার্থক। সুতরাং এই নামটাও বর্জনীয় নয়। কিন্তু তার একটা বিশুদ্ধ পারিভাষিক নাম থাকাও দরকার। তাই অমিত্রাক্ষরকে বলতে হয় ‘অমিল প্রবহমান অপূর্ণ দ্বিপদী’। তা ছাড়া উপায় নেই। উদ্ভিদ বা প্রাণী-বিজ্ঞানের ক্ষেত্রেও প্রচলিত নাম ও পারিভাষিক নাম পাশাপাশি চলে। যেমন প্রচলিত ভাষায় থাকে বলা হয় *banana*, তারই পারিভাষিক নাম *Musa paradisiaca* ( বা *sapientum* )।

এই দুই নামের কোনোটাই ছাড়া যায় না। একটা নাম আটপৌরে, আর একটা পোশাকি। ছুটোরই দরকার আছে। যেমন, আপনার ঘরোয়া নাম ‘মণ্টু’, অনেকের কাছে এই নামটারই আদর বেশি। কিন্তু আপনার সামাজিক নাম ‘দিলীপকুমার’, ক্ষেত্রবিশেষে একমাত্র এই নামটাই স্বীকার্য, অগ্ৰাট নয়।

আমি তাই বলি অক্ষরবৃত্ত প্রভৃতি চলতি নাম চলুক, তার সঙ্গে থাকবে সেগুলির উন্নততর পারিভাষিক নাম। এই উভয়বিধ নামের সঙ্গে সেগুলির ব্যাখ্যা তো অবশ্যই থাকবে। আমার কোনো কোনো বন্ধু ‘স্বরবৃত্ত’ নামটা ছাড়তে রাজি নন, ‘দলবৃত্ত’ নামটা তাঁদের পছন্দ নয়। আপনার অনুরাগ কিন্তু দলবৃত্তের প্রতি, স্বরবৃত্তের প্রতি নয়। এইজগ্ৰই আমি পারিভাষিক নাম হিসাবে ‘দলবৃত্ত’ নামটাই ব্যবহার করি, কিন্তু চলতি ‘স্বরবৃত্ত’ নামটাও উল্লেখ করে থাকি। তেমনি অক্ষরবৃত্ত, মাত্রাবৃত্ত নাম-দুটোকেও দেশছাড়া করতে চাই না।

৪. “কলাবৃত্ত ছন্দকে মাত্রাবৃত্ত ছন্দ বললে ক্ষতি হয় কোথায় অনেক চেষ্টা করেও বুঝতে পারি নি।”—আপনার এ কথার উত্তর আগেই দেওয়া হয়েছে পরোক্ষভাবে। এবার প্রত্যক্ষভাবে বোঝাতে চেষ্টা করি। syllabic ছন্দের যুনিট বা ‘মাত্রা’ হল সিলেবল্। যেমন—ফরাসি ছন্দের মাত্রা (যুনিট) হল দল বা সিলেবল্। এখন প্রশ্ন—quantitative ছন্দের (ধরুন পঙ্খটিকা) মাত্রা বা যুনিট কি?

মা কুরু ধনজনযৌবনগর্বম্।

হরতি নিমেঘাৎ কালঃ সর্বম্॥

এটা তো quantitative ছন্দ। এই quantity-র unit বা মাত্রা কি? ‘মাত্রা’ই এর মাত্রা, এরকম কথা তো বলা চলে না। আমি বলি এর প্রতি পংক্তিতে আছে ষোল কলা, ষোল কলায় ষোল মাত্রা। কলার ইংরেজি যদি হয় mora তবে বলতে হয় mora-ই এক unit এবং ষোল mora-তে ষোল unit। অর্থাৎ কোনো ক্ষেত্রে এক দলে এক যুনিট, অগ্ৰা এক কলায় এক যুনিট (মাত্রা)। এবার বোঝাতে পেরেছি?

৫. ‘পয়ার’ নামটা আপনার অপছন্দ কেন? এ নামটা তো শত শত বৎসর যাবৎ চালু আছে। এটা বাঙালির মনে এমন বন্ধমূল হয়েছে যে, একে স্থানচ্যুত করার সাধ্য কারও নেই। এর স্বরূপও নির্দিষ্ট হয়ে আছে শত শত

বৎসর ধরে। কবি-ছান্দসিক সত্যেন্দ্রনাথ পয়ারের বর্ণনা দিয়েছেন এরকম।—

“আট-ছয় আট-ছয়,

পয়ারের ছাঁদ কয়।”

অর্থাৎ পয়ার ছন্দের দুই পংক্তিতেই আট-ছয় হিসাবে চোদ্দ মাত্রা থাকে। পয়ারের এই আকৃতিটাই চিরকালের পরিচিত। কিন্তু ইদানীং শ্রীবুদ্ধদেব বহুর কয়েকটা উক্তির ফলে পয়ার সম্বন্ধে একটা নূতন ভ্রান্ত ধারণা বেশ ব্যাপক হয়েছে। জানি না এ বিষয়ে আপনার ধারণা কি। তবে এক জায়গায় ‘পয়ারজাতীয়’ কথাটা দেখে সন্দেহ হয়, আপনিও হয়তো এ বিষয়ে বুদ্ধদেবকে সমর্থন করেন। এখানে এ প্রসঙ্গ নিয়ে আলোচনা করতে চাই না। আমার ‘ছন্দপরিক্রমা’ বইএর দ্বিতীয় অধ্যায়ের নাম ‘পয়ারপরিচয়’। তাতে এ বিষয়ে বিস্তৃত আলোচনা আছে। ওই অধ্যায়ের ‘পয়ার নামের অপপ্রয়োগ’ উপচ্ছেদটার (পৃ ২২-২৮) প্রতি আপনার দৃষ্টি বিশেষভাবে আকর্ষণ করতে চাই।

৬. “গানে একটিমাত্র যুনিট আছে।...তাল কাটে মাত্রাসাম্য না হলেই। ...আমরা সুরে যেভাবে মাত্রা গুণে তাল বজায় রাখি, কাব্যোপ সেইভাবে মাত্রা গুণে তাল রাখি।”—এ বিষয়ে কোনো সন্দেহ নেই, থাকতে পারে না। এ বিষয়ে আমার বক্তব্য এই যে, গান যেহেতু মুখ্যতঃ কালাত্রয়ী শিল্প তাই তার মাত্রা স্বভাবতঃই কালগত, অর্থাৎ time unitই গানের একমাত্র unit। গান অনেক সময় বাক্যরীতির অনুবর্তন করে বটে, কিন্তু তাহলেও গান মুখ্যতঃ বাক্শিল্প নয়। তার প্রমাণ যন্ত্রসংগীত। কিন্তু কবিতার ছন্দ মুখ্যতঃ বাক্শিল্প, গৌণতঃ কালাত্রয়ী। তাই সব রীতির ছন্দকেই সবসময় কালগত যুনিট অর্থাৎ কালমাত্রা বা কলা-সংখ্যার উপরে নির্ভর করতে হয় না। যেমন ফরাসি syllabic ছন্দ বা বাংলা দলবৃত্ত ছন্দ। কিন্তু এসব ছন্দও যখন গানের রাজ্যে প্রবেশ করে তখন তাকে কালমাত্রা (time unit) মেনে চলতে হয়। যে রাজ্যের যে আইন তা মানতে হবেই তো। আপনি লিখেছেন যে, অক্ষরবৃত্ত ও মাত্রাবৃত্ত রীতির ছন্দে রচিত গানের সুরে ও তালে ‘কাব্যের উচ্চারণ বজায় থাকে’—‘সচরাচর’ বা ‘প্রায়ই’। ‘কেবল দলবৃত্তে যথেষ্ট বৈচিত্র্যের অবকাশ আছে।’ আপনার মতো গায়ক-ছান্দসিকের এই মন্তব্যের মূল্য খুবই বেশি সন্দেহ নেই। এ বিষয়ে আমার মতো গীতানভিজ্ঞ শুধু এটুকুই বলতে পারে যে, দলবৃত্ত ছন্দ যেহেতু মুখ্যতঃ কালাত্রয়ী নয় (মুখ্যতঃ দলসংখ্যাত), সেজগুই দলবৃত্ত ছন্দের গানে ‘যথেষ্ট বৈচিত্র্যের অবকাশ’ থাকে।

অন্ত দুই রীতির ছন্দ মূখ্যতঃ কালার্যয়ী (তাই আমি ছটোকেই কলাবৃত্ত বলি), তাই ওই অক্ষরবৃত্ত ও মাত্রাবৃত্ত ছন্দের গানে ‘যথেষ্ট’ বৈচিত্র্যের অবকাশ থাকে না। তবু কিছু বৈচিত্র্য অনেক সময় থাকে। আপনাকে বলা আমার পক্ষে হুঃসাহসিকতা। তবু দু-একটা দৃষ্টান্ত দিচ্ছি নিজ মতের সত্যতা যাচাই করবার জন্তে।—

ঐ আসে ঐ | অতি ভৈরব | হরষে

জলসিক্ত | ক্ষিতি সৌরভ | রভসে।

কবিতায় অর্থাৎ বাক্যরীতিতে এটা ছয়মাত্রা পর্বের ছন্দ, কিন্তু গানে অর্থাৎ গীতরীতিতে চারমাত্রা পর্বের। যেমন—

ঐ আসে | ঐ অতি | ভৈরব | হরষে

জলসিক্ত | চিত্ত ক্ষিতি | সৌরভ | রভসে।

বলা বাহুল্য, এই গানের ছন্দে বাক্যরীতি পদে পদেই খণ্ডিত হয়েছে। তবে রুদ্রদলের দ্বিমাত্রকতা গানেও বজায় আছে। কারণ এটা তো মাত্রাবৃত্ত ওরফে কলাবৃত্ত রীতির ছন্দ। আর একটা দৃষ্টান্ত—

তোমারি রাগিণী | জীবনকুঞ্জে |

বাজে যেন সদা | বাজে গো।

এটা মূলতঃ গান। কিন্তু কবিতা হিসাবে পড়তে হবে ছয়মাত্রা পর্বের তালে। গানে হবে সাতমাত্রার তেওরা তাল। ছন্দ বিশ্লেষণের কায়দায় এর মাত্রাবিভাগ অর্থাৎ তালবিভাগ হবে এরকম—

তোমারি রা-গিণী | জীবনকুঞ্জে |

বা-জে যেন সদা | বা-জে গো...।

ঠিক হল তো? যা হক, একটিমাত্র রুদ্রদল আছে এটিতে। সে দলটির দ্বিমাত্রকতা বজায় আছে। মনে রাখতে হবে এটাও মাত্রাবৃত্ত রীতিতে লেখা। কিন্তু অনেক স্থলেই মূলদলের মাত্রাবৃত্তি ঘটানো হয়েছে গীতরীতির খাতিরে। তাতে বাক্যরীতি লজ্জিত হয় প্রত্যেক পর্বেই। কিন্তু গান তো বাক্যরীতির কাছে দাসত্ব লিখে দেয় নি।

গানের কথা বলতে গিয়ে কিছু বেফাঁস বলি নি তো? ভুল হয়ে থাকলে শুধরে দেবেন। এ বিষয়ে আরও কিছু বলা যেত। কিন্তু সাহস হল না।

৭. বিজ্ঞেয়লালের ছন্দ সম্বন্ধে যেসব কথা বলেছেন তাতে বেশি কথা বলার অবকাশ নেই, প্রয়োজনও নেই। এ বিষয়ে বহুকাল পূর্বে ‘উদয়ন’ পত্রিকায় দীর্ঘ

প্রবন্ধ লিখেছিলাম আপনাই অল্পরোধে। তার পরেও নানা প্রবন্ধে দ্বিজেন্দ্রলালের ছন্দোবৈশিষ্ট্য ( বিশেষতঃ তাঁর দলবৃত্ত ) সম্বন্ধে কিছু কিছু আলোচনা করেছি। আপনি ‘দ্বিজেন্দ্রলালের কাব্যসংগ্ৰহ’ গ্রন্থে এ বিষয়ে বিস্তৃত আলোচনা ( পূর্বে ‘বন্ধুধারা’ পত্রিকায় প্রকাশিত ) করেছেন। ভবিষ্যতে এ বিষয়ে আরও কিছু বলবার ইচ্ছা আছে। সুতরাং আজ এ প্রসঙ্গ থেকে নিরন্তর রইলাম।

৮. আপনার প্রথম পত্রের শেষ কথা এই।—“দোহাই ধর্ম, সংকোচক প্রসারক দলমাত্রিক বা সরল কলামাত্রিক বিশিষ্ট কলামাত্রিক-জাতীয় পারিভাষিক মঞ্জুর করবেন না। অকরণ হবেন না মাদৃশ অভাজন অথচ কাব্যপ্রিয় ছন্দানুরাগীর প্রতি।”

অকরণ আমি হতে চাই না। নিজের ও অপরের জ্ঞান ও কানকে তুষ্ট করাই তো আমার কাজ। ‘বিশিষ্টকলামাত্রিক’-এর মতো ইষ্টক ছুঁড়ে মেরে যে পাঠককে জখম করা যায়, হৃদয় জয় করা যায় না, তা আমি জানি। আর পাঠকের হৃদয় যদি জয় করতে না পারি তবে তো লেখকজীবনের কোনো সার্থকতাই থাকে না। আমাকে আর যা-ই মনে করেন হৃদয়হীন মনে করবেন না। ‘সংকোচক’ লিখতেও সংকোচ বোধ করি। আর ‘প্রসারক’ পরিভাষাটাও কেমন ‘প্রহারক’-এর মতো শোনায়। তাই দেখবেন ‘ছন্দ পরিক্রমা’ বইটাতে এসব প্রহারক শব্দ যথাসম্ভব বর্জন করতেই চেষ্টা করেছি। আপনার মতো সহৃদয় ছন্দরসিক পাঠকদের রসানুভূতির প্রতি দৃষ্টি রেখে সম্ভব হলে ভবিষ্যতে এসব পারিভাষিক শব্দগুলিকে আরও মোলায়েম করতে সচেষ্ট হব।\*

প্রীতিমুখ

প্রবোধচন্দ্র সেন

\*চতুষ্কোণ, ১৩৭৩ আশ্বিন

শ্রীপ্রবোধচন্দ্র সেন

আপনার ১৭ই বৈশাখের চমৎকার চিঠিটি আজ পেয়েই উত্তর দিচ্ছি। ভালো করে আরও দু’ চার বার পড়ে ফের লিখব।

আপনার সঙ্গে মৌলিক ( fundamental ) কোনও মতভেদই যে আমার



নেই, আপনি তা ভাল করেই জানেন। বলতে কি, ছন্দ সম্বন্ধে আপনিই যে আমাদের সকলেরই শিক্ষক এ কথা প্রথম থেকেই সক্রিয়ভাবেই মেনে নিয়েছি আমি—এও আপনার অজানা নেই। ‘কলা’ সম্বন্ধে আপনি যা লিখেছেন প্রাণপণ চেষ্টা করে বোধ হয় বুঝবার কিনারায় এসেছি। এখানে শুধু বলে রাখি কলাকে মাত্রা বলে মেনে নেবার কোনো আপত্তিই আমার নেই—যদি কলা বাছল্য হয় তা হলেও। কেন বলি সংক্ষেপে। সম্প্রতি কটক থেকে এক ছান্দসিক (নামটা মনে পড়ছে না) একটা ছন্দব্যাকরণ পাঠিয়েছিলেন। তাঁকে আমি লিখেছি যে, আমরা প্রত্যেকে স্ব স্ব প্রধান হয়ে নতুন নতুন পরিভাষা গড়ার স্বাধীন (?) চেষ্টা করলে এ চর্চায় একান্ত পরাধীন থাকতে হবে—অর্থাৎ অসহায়। সবাইকেই এখন ত্রীপ্রবোধচন্দ্র সেনের পরিভাষা মেনে নিতে হবে—না নিলে হবে বিশৃঙ্খলা—chaos... ইত্যাদি। তিনি রাগ করে উত্তর দেন নি আমার পত্রের।

এই নীতি মেনে আমি চাই আমার ‘ছান্দসিকী’তে আপনার পরিভাষা মেনে নিতে। আরো এই জগ্গে যে, কোনো মৌলিক মতভেদ খুঁজে পাচ্ছি না। পরিভাষা নিয়ে একটু আধটু grumbling (গুঞ্জন এর বাংলা নয়, গোঙানি বলাও সুশ্রাব্য নয়, এসত্যও বটে), এতে কার কী ক্ষতি? তাই আমি আপনার অন্তিমতি চাই এ চিঠিটি ‘ছান্দসিকী’র দ্বিতীয় সংস্করণের পরিশিষ্টে ছাপিয়ে সই করব—‘তথাস্তু’। এ সইয়ের দরকার আছে। সংস্কৃতে বলেছে—তৃণৈর্গুণত্বমাপনৈ বধ্যতে মত্তদণ্ডিনঃ—বিরুদ্ধ ছান্দসিক কোন্ ছার। আমায় তাই অন্ততম তৃণ বলে স্বীকার করে আপনার মূল ছন্দরজুতে জড়িয়ে নেবেন। হলান্ বা তৃণ—জুড়লে তো তার শক্তি বাড়ে একটুও অস্বতঃ।

আপনার এ পত্রটির ছত্রে ছত্রে রসিকতা ফুটে উঠেছে চমৎকার। আপনি বয়সে আমার চেয়ে দেখছি তিন মাসের ছোট। তাই হুয়ামি চ পুনঃপুনঃ সহসা আপনার রসিকতার তৃণাঞ্চল দেখে। আপনার পাষণদুর্ভেদ যুক্তিদুর্গে এ তৃণের আবির্ভাব বড়ই উপাদেয়। আমি বরাবরই আপনার সঙ্গে তর্ক করবার সময়ে মনে মনে ভয়ে ভয়ে বলেছি—“এ রাম মহুয়া নয়”। আপনার আকস্মিক হাশাসরসতায় আমার সে ধারণা আরো পুষ্ট হল।

কিন্তু ঠাট্টা না। সত্যিই সময় আ ছ ছন্দপরিভাষা চালু করবার। আপনিও সংকোচক-প্রসারকের প্রশ্রয় দিতে চান না জেনে বিপুল হর্ষ আমায় পেয়ে বসেছে।

পরে আপনার পত্রের বড় করে উত্তর দেবার ইচ্ছা রইল, কিন্তু হয়ে উঠবে কিনা বলতে পারি না। তাই আরো ঝটিতি অভিনন্দন জানাচ্ছি যে, আপনার রসিকতা যাকে বলে disarming—আপনার কোনো পত্রেই এর আগে রসিকতার আমেজ পাই নি। আমি আমার পিতার ধর্মী তো, তাই আরো পুলকিত হয়েছি।

যাই হোক, আপনি আশা করি অল্পমতি দেবেন এ পত্রটি ছাপতে। ‘ছান্দসিকী’ আজো প্রকাশিত হয় নি। ‘মহানুভব দ্বিজেন্দ্রলাল’ বেরিয়েছে। এটি আপনাকে পাঠাচ্ছি। ‘ছান্দসিকী’ বেরুতে দেরি হয়ে ভালোই হয়েছে। “ঠাকুর যা করেন মঙ্গলের জন্তে” ঘরোয়া প্রবচনটি সত্যভিত্তিক বৈকি। কারণ ছান্দসিকী আগে বেরিয়ে গেলে আপনার পত্রটি পরিশিষ্টে জুড়ে দেওয়া অসম্ভব হত।

আপনার শরীর ভাল যাচ্ছে না শুনে চিন্তিত হই মাঝে মাঝে। আপনার কাজ এখনো ফুরায় নি। শতায়ু হোন—এই প্রার্থনা। কেবল আমাকে ও শুভেচ্ছাটি ফিরিয়ে দেবেন না to return the compliment। ইতি

শতায়ুসম্ভাবনাতন্ত্র গুণগ্রাহী

দিলীপ

৩

১৭ জ্যৈষ্ঠ, ১৩৭৩

শ্রীপ্রবোধচন্দ্র সেন

ছন্দোবিশারদেষু

আপনার ১৭ই বৈশাখের পত্রটি পেয়ে বিশেষ আনন্দ পেয়েছি। খুব মন দিয়েই পড়েছি দু-দুবার। ফলে আমার মনের মধ্যে অনেক ঝাপসা ধারণার কুয়াশা কেটে গেছে আপনার স্বচ্ছ ভাষাকিরণে।

আমি আপনার ‘ছন্দপরিক্রমা’র পথে আবার পা পা করে চলতে গিয়ে অবশেষে ‘কলা’-কে কেন আপনি আবাহন করেছেন বোধ হয় বুঝতে পেরেছি। কিন্তু যা বুঝেছি তা আর বোঝাতে যাওয়া বিড়ম্বনা বলে আপনার চিঠিটিকেই আমার ‘ছান্দসিকী’ গ্রন্থে বিলুপ্ত করে প্রকাশ্যভাবে স্বীকার করতে চাই যে, সব জড়িয়ে আপনি যে তিনটি পারিভাষিক নাম তথা ব্যাখ্যা দিয়েছেন আমাদের ছন্দের মূল ত্রিধারার, সে ব্যাখ্যা ও বিশ্লেষণ আমাদের সকলেরই সাদরে স্বীকার করা কর্তব্য, নৈলে প্রত্যেকেই স্ব স্ব প্রধান হয়ে এক এক অনিবার্চিত পরিভাষা গড়ে তুলতে চাইলে সেটা হয়ে দাঁড়াবে—যাকে বলে : **Confusion grown worse confounded**।

তা ছাড়া আপনি তো এমন কিছু বলেন নি যা মানতে বাধে। আমার শুধু বুঝতে বেগ পেতে হয়েছিল ঠিক কী জন্তে আপনি ‘বাহুল্য’ কলাদেবীকে বাহাল করেছেন মাত্রাদেবী হাজির থাকা সত্ত্বেও। কিন্তু আপনার ‘ছন্দপরিক্রমা’ তথা এ প্রাঞ্জল পত্রটির প্রসাদে আমার অনেক ভ্রান্ত ধারণার নিরাকরণ হয়েছে। ফলে আমার মনে হয়েছে যে, স্বরবৃত্ত (ওরফে দলবৃত্তের) যুনিট ‘দল’ আর মাত্রাবৃত্ত (ওরফে কলাবৃত্তের) যুনিট ‘কলা’, এ ভেদজ্ঞানের প্রয়োজন আছে। অক্ষরবৃত্ত ছন্দেরও আপনার নব নামকরণ ‘মিশ্রকলাবৃত্ত’কেও অভিনন্দন না করার কোনোই হেতু নেই। আপনাকে বহু ধন্যবাদ যে, এ ছন্দটির যুনিট হিসেবে ‘ব্যষ্টি’ রূপ দ্রবগাহ তথা ঐতিকটু শব্দকে তলব করার আর প্রয়োজন বোধ করেন নি।

আমার মনে হয়, এখন আমাদের সকলেরই স্বীকার করার সময় এসেছে যে, বাংলা ছন্দের ধারা ও প্রগতি বুঝতে হলে সব আগে দরকার দুটি জিনিষ। এক, সর্বগ্রাহ্য ঐতিমধুর পারিভাষিক (সরল কলামাত্রিক, বিশিষ্ট কলামাত্রিক, সংকোচক, প্রসারক-বর্গীয় ভয়াবহ নামকরণ নয়)। দুই, ‘রুদ্ধদল’-এর (closed syllable) হাতেই যে বাংলা ছন্দের বোধিমহলের চাবিকাঠি এই স্বীকার। এ চাবিকাঠিটির মর্ম আপনিই সব প্রথম প্রাঞ্জল ব্যাখ্যায় আমাদের বুঝিয়ে দিয়েছেন আপনার পঞ্চাশ বৎসরের ছন্দবিচারে, ব্যাখ্যায়, গণনায়। পরিশেষে, আমি যে আপনার সঙ্গে এ যাবৎ তর্কের জন্তেই তর্ক করি নি, বুঝতে চেয়েই আপনাকে জেরা করেছি—এ কথাই জাঙ্জল্যমান প্রমাণস্বরূপ আপনার পত্রটির শেষে আমার এ পত্রটি আভুগত্যা-অঙ্গীকারের দলিল হিসাবেই পেশ করে আপনাকে সন্তোষে আবার অভিনন্দন জানিয়ে শান্তিপাঠ করতে চাই :

হে অনন্ত অভিনব পথিকৃৎ ! ফাবোর কাননে

অশঙ্ক চরণপাতে, অবাস্তবের নির্বাসনে,

বহুজ্ঞ অপরাঙ্কেয় অর্ধশতকের সাধনায়,

ঐতিধর বিশ্লেষণে, অক্লান্ত প্রবুদ্ধ জিজ্ঞাসায়,

কাঁটা দলি ছন্দফুল ফোটার আর ভ্রান্তিজয়ী দিশা

ঝরালে প্রতিভাবলে তোমার—পোহাল তাই নিশা।

ইতি

প্রতিভামুগ্ধ

শ্রীদিলীপকুমার রায়

পুনশ্চ—কেবল একটি ক্ষেত্রে মতভেদ রইল। ‘লঘুগুরু’ ছন্দ সম্বন্ধে। বাংলা কাব্যকাননের বিশেষ করে গীতিকুঞ্জে এটি একটি অপরূপ ফুল বলে আমি মনে করি যে, কমণীয় বলেই বরণীয়। আপনি মনে করেন—বর্জনীয়, নয় কি? না, আপনাকে ভুল বুঝেছি?

৪

শ্রীদিলীপকুমার রায়

পরমপ্রীতিনির্লয়েষু

আপনি যাকে বলেন ‘লঘুগুরু’ ছন্দ, সাধারণ ভাষায় আমি তাকে বলি ‘জয়দেবী’ ছন্দ। পারিভাষিক নাম প্রভু (অর্থাৎ ক্লাসিক্যাল) কলাবৃত্ত বা মাত্রাবৃত্ত। জয়দেবের গানগুলির ছন্দে যে ক্লাসিক্যাল আভিজাত্য ও শোভনতা আছে তার মর্যাদা আমি সন্ত্রমসহকারে ও নতমস্তকে স্বীকার করি। এ ছন্দের পরিমণ্ডলের মধ্যে কোথাও অর্বাচীন কালের ইতরতার লেশমাত্র নেই। এই ক্লাসিক্যাল ছন্দের মধ্যে যে একটি উদাত্ত মহিমা আছে, কোনো নব্য ছন্দে সে মহিমা সঞ্চার করা সম্ভব বলেও মনে করি না। সূত্রাং বলা বাহুল্য, ও ছন্দকে আমি অবশ্যই ‘বর্জনীয়’ মনে করি না, বরং আপনার মতোই ‘কমণীয়’ ও ‘বরণীয়’ বলে মনে করি। শুধু তাই নয়, বালকবয়সে যখন প্রথম এ ছন্দের সাক্ষাৎ পাই তখনই এ ছন্দের বিশেষ রসের প্রতি আমি আকৃষ্ট হই, সে অম্লরাগ আজও সমভাবেই প্রবল আছে। আমি যে সংস্কৃত ছন্দের ভক্ত। আমি কি এ ছন্দের প্রতি বিরূপ বা উদাসীন হতে পারি?

কিন্তু বর্তমান যুগটা যে সেই ক্লাসিক্যাল মহিমা থেকে ভ্রষ্ট হয়েছে, আমরাও বর্তমানের ইতরতার মধ্যে নির্বাসিত। তাই নিত্যপ্রয়োজনের কাজে ওই মহিমময় ছন্দকে প্রয়োগ করবার শক্তি আমরা হারিয়েছি। আমাদের আটপৌরে উচ্চারণে সে মহিমা পদে পদেই কুণ্ঠিত ও লাক্ষিত হয়। তাই ‘তে হি নো দিবস গতাঃ’ বলে বিগত দিনের কথা স্মরণ করে দীর্ঘশ্বাস ফেলা ছাড়া আমাদের আর গতি নেই। গতি কি একেবারেই নেই? আছে। এতখানি হতভাগ্য আমরা এখনও হই নি। আমরা যুগভ্রষ্ট হয়েছি বটে, কিন্তু স্মৃতিভ্রষ্ট হই নি। মাহুষ স্বর্গভ্রষ্ট হলেও দেবতার কংকণভ্রষ্ট হয় না, দেবতা তার পুনরুদ্ধারের উপায় নির্দেশ করে দেন। আমরা জয়দেবের যুগ ছেড়ে এসেছি বহুদিন পূর্বে। কিন্তু সে যুগে

ফিরে যাবার পথ দেবতা একেবারে রুদ্ধ করে দেন নি। আমাদের আটপৌরে কাজে আমরা যখন-তখন জয়দেবকে তলব করে নামিয়ে আনতে পারি না বটে, কিন্তু যখনই আমাদের চিত্ত ভাবের উৎসর্গে উন্নীত হয় তখনই সে জয়দেবী ছন্দের দ্বারপ্রান্তে পৌঁছে যায়। বিজ্ঞাপতি, গোবিন্দদাস-প্রমুখ বৈষ্ণব কবিদের কথা ছেড়েই দিলাম। অষ্টাদশ শতকে দেখি ভারতচন্দ্র, যিনি ‘ধাবনীমিশাল’ ভাষা প্রয়োগের প্রয়োজনীয়তা সগর্বে ঘোষণা করেছিলেন তিনিও দেববন্দনার ক্ষেত্রে জয়দেবী ছন্দ ও তদুপযোগী ভাষা ব্যবহার করতে কুণ্ঠিত হন নি। আর যে রামপ্রসাদ তাঁর সাধনসংগীতগুলির আটপৌরে ভাষা ও ছন্দে বাঙালি জাতির হৃদয় জয় করে নিয়েছিলেন তাঁকেও রণরঙ্গিণী কালিকার বর্ণনায় অনেকাংশেই জয়দেবী ছন্দ ও তার উপযোগী ভাষার আশ্রয় নিতে হয়েছিল।

আধুনিক কালে ঈশ্বর গুপ্ত এবং হেমচন্দ্রও কোনো কোনো ক্ষেত্রে যখনই রচনাগত অন্তরায় মাহিমা আবোপের প্রয়োজন বোধ করেছেন তখনই জয়দেবী ছন্দের শরণ নিয়েছেন। এমন কি, মধুসূদনও তাঁর ‘পদ্মাবতী’ নাটকে (১৮৬০) এটি রাজবন্দনাগীতিকে রাজোচিত মহিমা-দানের অভিপ্রায়ে ওই জয়দেবী ছন্দেই দ্বারস্থ হয়েছিলেন। কেননা, নাট্য পন্থা বিঘ্নে। এ প্রসঙ্গে স্মরণ করা যেতে পারে যে, রবীন্দ্রনাথের ‘সমর্জন’ ও ‘শারদোৎসব’ নাটকের রাজবন্দনাগুলিতেও এই জয়দেবী ছন্দই ব্যবহৃত হয়েছে।

কিন্তু রাজবন্দনার যুগ আর নেই। একমাত্র নাটকেই তার স্থান। দেববন্দনা ও দেশবন্দনার স্থান তার অনেক উপরে। জাতীয় জীবনের যবেদীতে তার অধিষ্ঠান। এ জাতীয় বন্দনাগীতি রচনায় সার্থকতার পরাকাষ্ঠা দেখিয়েছেন রবীন্দ্রনাথ ও দ্বিজেন্দ্রলাল।

ভুবনেশ্বর হে—

সমুখে তব দীপ্ত দীপ তুলিয়া ধব হে

এই প্রার্থনাগীতিটিকে যে দেবমহিমার তুঙ্গতায় তুলে ধরা হয়েছে, জয়দেবী ছন্দ ছাড়া আর কোন ছন্দ এই রচনাটিকে সেই তুঙ্গতায় তুলে ধরতে পারত? কিংবা—

নীলসিন্ধুজল-ধৌতচরণল,

অনিলবিকম্পিত-শ্যামল-অঞ্চল,

অম্বরচুম্বিত-ভালহিমাচল

ইত্যাদি রচনায় যে উদাত্ত গান্ধীর্ষ ধ্বনিত হয়েছে, অল্প কোনো ছন্দে কি সে গান্ধীর্ষের একাংশও আনা যেত? মনে রাখতে হবে ছন্দ কবিতার প্রাণেরই প্রকাশ, কৃত্রিম অলংকরণমাত্র নয়।

দ্বিজেন্দ্রলালের গঙ্গাস্তবটি একাধারে দেববন্দনা ও দেশবন্দনা। কেননা, গঙ্গার জলস্রোতের মধ্যেই ভারতের প্রাণস্রোত চিরকাল প্রবাহিত হয়েছে ইতিহাসের পতন-অভ্যুদয়-বন্ধুর পথ পেয়ে। এই দ্বৈত মহিমা কি প্রকাশ করা সম্ভব হত বাংলার কোনো ঘরোয়া ছন্দে? সেইজন্যই তো যে কবি ‘আষাঢ়ে’, ‘আলেখ্য’, ‘ত্রিবেণী’ প্রভৃতি কাব্যে সগর্বে চলতি ভাষা ও ছন্দ প্রয়োগ ও তার জয়ঘোষণা করেছেন, এই গঙ্গাস্তবক রচনাকালে তাঁকেও স্মরণ করতে হয়েছে জয়দেবকেই। আর যিনি ‘ক্ষণিকা’ থেকে শুরু করে বহু কাব্যে অজস্রধারায় ‘প্রাকৃত ছন্দ’ প্রয়োগ করেছেন এবং যিনি এ ছন্দের গুণকীর্তনে কখনও ক্লান্তি বোধ করেন নি, ভারতবিধাতার প্রশস্তিরচনায় তাঁকেও শরণ নিতে হয়েছে ওই জয়দেবের কাছেই। ‘আমার সোনার বাংলা, আমি তোমায় ভালোবাসি’, এ গান রচনায় প্রাকৃত ছন্দ চলে—শুধু চলে না, সবচেয়ে ভালো চলে। কিন্তু ভারতবিধাতার প্রশস্তিতে চাই সংস্কৃত ছন্দের ক্লাসিক্যাল মহিমা। গঙ্গাস্তবেও তাই। বঙ্কিমচন্দ্রও তাই বুঝেছিলেন। তাই তিনি দেশবন্দনা রচনায় সংস্কৃত ভাষারই আশ্রয় নিয়েছিলেন—যদিও সর্বত্র তা রক্ষিত হয় নি। তারই ফলে ‘বন্দে মাতরম্’ গানটি এমন অমোঘ মন্ত্রশক্তিতে শক্তিমান হতে পেরেছে।

এবার মূল প্রশ্নে ফিরে আসা যাক। জয়দেবের—

চন্দনচর্চিত নীলকলেবর পীতবসন বন -মালী

ইত্যাদি রচনাটির সঙ্গে দ্বিজেন্দ্রলালের—

কত নগনগরী তীর্থ হইল তব চুধি চরণযুগ মাই,

কত নরনারী ধৃত হইল মা তব সলিলে অব -গাহি

বহিছ জননি এ ভারতবর্ষে কত শত যুগযুগ বাহি

এবং রবীন্দ্রনাথের—

পতন-অভ্যুদয় -বন্ধুর পঙ্খা যুগযুগ ধাবিত যাত্রী,

হে চিরসারথি, তব রথচক্রে মুখরিত পথ দিন -রাত্রি।

এই অংশগুলির তুলনা করলে নিঃসন্দেহে বোঝা যাবে যে, দ্বিজেন্দ্রলালের ‘গঙ্গাস্তব’ এবং রবীন্দ্রনাথের ‘ভারতবিধাতা’ জয়দেবের আদর্শেই রচিত, তিনের

ছন্দ একই ছাঁচে ঢালা। বোকা যাচ্ছে জয়দেব আজও বেঁচেই আছেন। তিনি চিরজীবী হোন। আমি তাঁর ছন্দের জয়ধ্বনি করি।

কিন্তু সব ক্ষেত্রে নয়। আমাদের নিতাপ্রয়োজনের কাজে সে ছন্দকে টেনে এনে তার মহিমা খর্ব করতে চাই নে। পূজামণ্ডপেই মন্ত্র আবৃত্তি শোভা পায়, হাটেবাজারে বা রাস্তাঘাটে নয়। “বগুরা বনে সুন্দর, শিশুরা মাতৃকোড়ে” —ঠিক তেমনি।

আরও একটা কথা মনে রাখা প্রয়োজন। সুরের রাজ্যেই জয়দেবী ছন্দের মহিমা প্রকাশ পায়, অ-সুরের নয়। অ-সুরের হাতে তার লাঞ্ছনা। আর বর্তমান ছাপাখানাশাসিত যুগে অ-সুরেরই আধিপত্য, কবিকণ্ঠে সুর নিরস্ত। তাই জয়দেবী ছন্দও অনেকাংশেই যেন ‘শাপেনাস্তং-গমিতমহিমা’। কিন্তু যেখানে সুরের প্রকাশ অব্যাহত, সেখানে এই সুরবিহারী ছন্দের লীলাও অতুলনীয়। রবীন্দ্র-দ্বিজেন্দ্রের অনেক গানেই সে লীলা আমাদের হৃদয়মনকে নিয়ে যায় ইন্দ্রিয়বোধের সীমার বাইরে। কেননা,

দাঁড়িয়ে আছ তুমি আমার গানের ওপারে,

আমার সুরগুলি পায় চরণ, আমি পাশে তোমারে।

কিন্তু হায়! আমাদের দেশে এখন সুরসাধক কবিরা গেলেন কোথায়? ‘চণ্ডীদাসের রামপ্রসাদের কণ্ঠ কোথায় বাজে রে!’ সে দিন তো বিগত হয়েছে বহু পূর্বে। রবীন্দ্র-দ্বিজেন্দ্র-প্রমুখ কবিদের কণ্ঠ নীরব হবার পরে আর তো কোনো কবির কণ্ঠই সুরে বিলসিত হয় না। (অ- আপনার কথা বাদে।) তাই বলছিলাম জয়দেবী ছন্দ যেন আজ ‘শাপেনাস্তং-গমিতমহিমা’।

তবে এ কথাও বলা প্রয়োজন যে, তালমানলয়যোগে সুরের ক্ষেত্রে এ ছন্দের লীলা ও মহিমার পূর্ণ প্রকাশ হলেও ছন্দোন্ময় কণ্ঠের আবৃত্তিতেও এর লীলা-মাধুর্য সম্পূর্ণ অপ্রকাশ থাকে না। তবে সে ক্ষেত্রে ছন্দের পূর্ববিভাগ বাক্যপর্বের অনুযায়ী হওয়া চাই। নতুবা ছন্দের প্রাণবন্তটাই মারা পড়ে। গানের তাল, ছন্দপর্ব তথা বাক্যপর্ব-অনুযায়ী না হলেও চলে। যুরোপে কোনো জনসভায় একবার একটি স্বরচিত কবিতা আবৃত্তির জন্ত অল্পাধিক হয়ে রবীন্দ্রনাথ আবৃত্তি করেছিলেন আমাদের জাতীয় সংগীত ‘জনগণমন’ রচনাটি। কবে কোথায় এখন মনে নেই। এখানে রবীন্দ্রভবনে তার সবাক্ চলচ্চিত্র রক্ষিত আছে। তার

থেকে আমি কবিকণ্ঠে 'জনগণমন' রচনার আবৃত্তি শুনেছি এবং লক্ষ্য করেছি যে, তাঁর অভিজ্ঞ ও অভ্যস্ত কণ্ঠের আবৃত্তিতে ওই রচনাটির প্রত্যাশিত ছন্দোমাদুর্ঘ্য অতি স্বন্দরভাবেই প্রকাশ পেয়েছে। আমি অনুভব করেছি যে, অনুকূলভাবে রবীন্দ্রনাথের হিংসায় উন্নত পৃথ্বী, দেশ দেশ নন্দিত করি, মাতৃমন্দির-পুণ্য-অঙ্গন, বিজেন্দ্রলালের পতিতোদ্ধারিণি গঙ্গে প্রভৃতি বহু রচনাই স্থানীয়কৃত কণ্ঠের আবৃত্তিতে জয়দেবী ছন্দের লীলামাদুর্ঘ্যে স্বতাবিলসিত হয়ে ওঠে। আমি গীত-রসমুগ্ধ শ্রোতা, কিন্তু আমার কণ্ঠে স্থর নেই। তাই ছেলেবেলা থেকেই শ্রুতি-স্বথের প্রেরণায় আমি ওসব রচনা পুনঃপুনঃ আবৃত্তি করে নিজের কানের রায় নিয়েছি। সে রায় সর্বদাই আবৃত্তির অনুকূলে গিয়েছে। অর্থাৎ ওসব রচনার গীতরসের স্রাব আবৃত্তিরসেও আমি মুগ্ধ। কিন্তু শুধু ভাবগ্রহণের জন্ত এসব রচনা নীরবে পড়া যায় না। ওরকম নীরব পাঠ বীণাযন্ত্রের ঝংকার না শুনে তার রূপসৌন্দর্যে মুগ্ধ হবার মতোই নিরর্থক। কেন না, এসব রচনার ভাবরস ও ছন্দোরস বাগর্থ্যবিব সম্পৃক্তো।

ভেবেছিলাম সংক্ষেপেই কাজ সারব। কিন্তু অবাধ্য লেখনী লাগামছেঁড়া টাট্টুর মতো যথেষ্ট ছুটতে শুরু করেছে। তাই এবার তাকে তর্জনী-সংকেতে নিরস্ত করতে হল।

আমাকে দীর্ঘকাল আসামীর কাঠগড়ায় দাঁড় করিয়ে রেখেছেন। প্রতিপক্ষের স্থতীক্স সওয়াল শুনেছি অনেকবার। এ বিচারে হাকিমও নেই, উকিলও নেই। তাই আসামীকেই যথাসাধ্য জবাব দিতে হল। এখন স্বয়ং ফরিয়াদীর রায় শোনার জন্ত দূর দূর হৃদয়ে প্রতীক্ষায় রইলাম।\*

প্রীতিরসপিপাসু

প্রবোধচন্দ্র সেন



## পত্রধারা ১

ছন্দ প্রসঙ্গ

রবীন্দ্রনাথ

১

RETREAT,  
SHAHIBAG,  
AHMEDABAD.

৪ এপ্রিল ১৯২৩

কল্যাণীয়েষু

ছন্দ সংস্কৃত তোমার প্রবন্ধগুলি আমি পূর্বেই প্রবাসীতে পড়েছি এবং পড়ে খুসি হয়েছি। তোমার বয়স অল্প কিন্তু তোমার লেখার মধ্যে প্রবীণতা আছে। তোমার লেখাটি নিয়ে সবিস্তারে আলোচনা করি এমন সময় আমার নেই—বদি তোমার সঙ্গে কখনো দেখা হয় তবে এ বিষয়ে আমার যা বলবার কথা তা বলতে পারব।

নানা স্থানে ভ্রমণ করে বেড়াচ্ছিলেন বলে তোমার চিঠি পেতে বিলম্ব হল। আগামী বৎসরের আরম্ভে দেশে ফিরব।

শ্রীরবীন্দ্রনাথ ঠাকুর

খামের উপরে কবির হাতে লেখা ঠিকানা ছিল এরকম—

Babu Prabodhchandra Sen

c/o Dr B. K. Nandi

Jail Road

Sylhet Bengal

আমার দেওয়া ঠিকানায় ছিল Assam। কিন্তু কবি লিখলেন Bengal। এটুকু তখন অনেকেই দৃষ্টি আকর্ষণ করেছিল। প্রেরণাস্থানের পোস্টমার্ক অস্পষ্ট, অপাঠ্য। প্রাপ্তিস্থানের পোস্টমার্ক—Sylhet, DELI. 9 APR 23, 11:30 A. M.

এই চিঠিখানির লক্ষ্য প্রবাসীতে ধারাবাহিকভাবে প্রকাশিত ( ১৩২৯ পৌষ-চৈত্র ) ‘বাংলা ছন্দ’ ও ‘ছন্দের শ্রেণীবিভাগ’ নামে আমার দুটি প্রবন্ধ। প্রবাসী থেকে আমার প্রবন্ধাংশ সংকলন করে কবির কাছে পাঠিয়ে দিয়েছিলাম শান্তিনিকেতনের ঠিকানায়। একই সঙ্গে স্বতন্ত্র খামে একখানি চিঠিও তাকে দিয়েছিলাম। কবি তখন শান্তিনিকেতনে ছিলেন না। তাই আমার পত্র ও প্রবন্ধ পেতে বিলম্ব হয়েছিল। আমার প্রবন্ধের শেষ কিস্তি ( ১৩৩০ বৈশাখ ) তখনও প্রকাশিত হয় নি।

কবির লেখা ‘আগামী বৎসর’ মানে বাংলা বৎসর ১৩৩০। আর ‘দেশ’ মানে বাংলাদেশ ( তৎকালীন )। কবির সঙ্গে আমার প্রথম দেখা হয় পরের বৎসর ( ১৩৩১ ) গ্রীষ্মকালের পরে কোনো সময়, জোড়াসাঁকো মহর্ষিভবনে বিধুশেখর শাস্ত্রী মহাশয়ের উপস্থিতিতে। আমার সঙ্গে গিয়েছিলেন আমার ঘনিষ্ঠতম বন্ধু নীহাররঞ্জন রায়। তখন আমার ‘বাংলা ছন্দ ও সংগীত’ প্রবন্ধটিও প্রবাসীতে প্রকাশিত হয়ে গিয়েছিল ( ১৩৩০ মাঘ-চৈত্র )। এই প্রবন্ধ পড়েও কবি খুশি হয়েছিলেন। দেখা হওয়া মাত্র প্রথমেই জানালেন সে কথা। আগের প্রবন্ধগুলির কথাও তাঁর মনে ছিল। এই সবগুলি প্রবন্ধ সংকলন করে অবিলম্বে গ্রন্থাকারে প্রকাশ করা উচিত, এই ছিল কবির প্রধান বক্তব্য। আমি সবিনয়ে জানিয়েছিলাম, প্রকাশের পূর্বে এগুলিকে কিছু পরিমার্জন ও পরিবর্ধন করতে হবে, সে কাজ একটু সময়সাপেক্ষ। সেদিন ছন্দ নিয়ে আর বেশি আলোচনা হতে পারে নি। কারণ শাস্ত্রী মহাশয়ের সঙ্গে অল্প প্রসঙ্গে কথা হচ্ছিল। তা ছাড়া একটু পরেই কয়েকজন মহিলা কবির দর্শনপ্রার্থী হলেন। তাই প্রণাম করে বিদায় নিতে হল।

3/2, Heysham Road  
Calcutta

সবিনয় নমস্কার নিবেদন,

আপনার চিঠির জবাব দিতে দেরী হয়ে গেলো—আশা করি অরবোধ নেবেন না। কবির অভিমতপত্র যে আপনার কাজে লেগেছে তাতে ভারি খুশি হয়েছি।



18  
Ruba Prabha Chandra Sen

Dr B. K. Nandi

Jail Road

Lytle

Original



ଆମେ ମଧ୍ୟ ଏହି ସିଦ୍ଧି ପାଇବା  
ହୁଏ। ସିଦ୍ଧି ପାଇବା, ତାହା ଆମେ  
ହୁଏ। ସିଦ୍ଧି ପାଇବା, ତାହା ଆମେ

ଦୁଇ-ପାଦ ମଧ୍ୟରେ ଥିବା ଶରୀର ଆମ  
 ଆଗରେ ରହି ଗଲେ । ଦୁଇଟି ବିଷୟ  
 ଯାହା ଆମ ଗିରଫରେ - ଶିଶୁଙ୍କୁ  
 ଯାହା ଯାହା ଯାହା ଆମ ଗିରଫରେ  
 ଶିଶୁ ଆଗରେ ଥିବା ଯାହା ଶିଶୁ  
 ଦୁଇଟି ଯାହା ଥିବା ଯାହା - ଯାହା ଯାହା  
 ଯାହା ଯାହା ଯାହା ଯାହା ଯାହା  
 ଯାହା ଯାହା ଯାହା ଯାହା ଯାହା

२. (अष्टम) १७९४  
 अष्टम १७९४

98  
शुभं  
श्रीगुरुभ्यो नमः

আমি কাল শান্তিনিকেতন থেকে ফিরেছি। কবি আপনার sensibility-র খুব স্বখ্যাতি করছিলেন। বলছিলেন যে আপনার কাছ থেকে বাঙলা সাহিত্যের সম্পদবৃদ্ধি তিনি আশা করছেন। ইতি ২ই আশ্বিন ১৩৩৫।

ভবদীয়

শ্রীঅপূর্বকুমার চন্দ

৩

১লা মে ১৯৩১

বিনয়সম্ভাষণপূর্বক নিবেদন,

আপনার চিঠিখানি পেয়ে আনন্দিত হলাম। আপনার রচনাটি রবীন্দ্রনাথ দেখেচেন, তাঁর চান্দ্র তালো লেগেচে আপনাকে জানাতে বললেন। প্যারীবাবুর মেঘদূত অনুবাদগ্রন্থে ছন্দ মন্থকে আপনি যা লিখেচেন তা পড়ে রবীন্দ্রনাথের বিশেষরকম আনন্দ হয়েছে। এ বিষয়ে তিনি পূর্বেই প্যারীবাবুকে লিখেচেন। চিঠিখানি আমি নিজের হাতে পোষ্ট করি—এখনো কি সেটা প্যারীবাবু পান নি? ভাগ্যক্রমে সে চিঠিখানির একটা কপি আমি রাখি—যদি প্যারীবাবু না পেয়ে থাকেন তাঁকে সেই কপি পাঠিয়ে দিতে পারি। এ বিষয়ে অনুগ্রহ করে আপনি প্যারীবাবুর কাছে অনুসন্ধান করে জানাবেন?

মেঘদূতের অনুবাদ কবির বিশেষ পছন্দ হয় নি। তা ছাড়া ‘প্যারীবাবুর ছন্দকে রবীন্দ্রনাথ মন্দাক্রান্তা বলে মানতে রাজি নন। উনি উদাহরণ দিয়ে কথাটা বুঝিয়ে দিয়েছিলেন।

আপনি আমার প্রীতিনমস্কার জানবেন।

ভবদীয়

শ্রীঅমিয়চন্দ্র চক্রবর্তী

প্যারীবাবুর ‘মেঘদূত’ অনুবাদগ্রন্থে ছন্দ বিষয়ে আমি যা লিখেছিলাম তা আমার ‘ভারতাত্মা কবি কালিদাস’ গ্রন্থে ( ১৩৭৯ পৃষ্ঠা ) সংকলিত হয়েছে। তাই ‘ছন্দ-জিজ্ঞাসা’ গ্রন্থে গৃহীত হল না।

৪

উত্তরায়ণ  
শান্তিনিকেতন

কল্যাণীয়েষু

জয়ন্তীতে আমার ছন্দ সম্বন্ধে যে প্রবন্ধ লিখেচ তা পড়ে খুশী হয়েছি। দেখা হলে এ সম্বন্ধে আলোচনা করব। পারস্তে যাবার পথে মার্চ মাসের শেষ ভাগে কলকাতায় যাব। ইতি ৩০ ফাল্গুন ১৩৩৮।

শুভাকাজ্ঞী

শ্রীরবীন্দ্রনাথ ঠাকুর

কবি যেদিন পারস্ত যাত্রা করেন সেদিনই কলকাতায় বিচিত্রা-ভবনে তাঁর সঙ্গে দেখা হয়। সেদিন ছন্দ-আলোচনা হয় নি। বিষয়ান্তরে সামান্য কথা হয়েছিল।

৫

ও

শান্তিনিকেতন

কল্যাণীয়েষু

ব্যস্ত আছি এবং ক্লান্ত আছি। তাই তোমার চিঠির বিস্তারিত উত্তর দেওয়া আমার পক্ষে দুঃসাধ্য। যদি তোমার অবকাশ থাকে তবে শান্তিনিকেতনে এসো। তা হলে ছন্দ সম্বন্ধে মোকাবিলায় আলোচনা করতে পারব। কলকাতার চেয়ে এখানে আলাপ করবার সুযোগ সহজ হবে। ছন্দটা কানের জিনিষ। তাই লেখনীর চেয়ে কণ্ঠ এই তর্কের পক্ষে বেশী উপযোগী। ইতি ৩ চৈত্র ১৩৩৮।

শুভাকাজ্ঞী

শ্রীরবীন্দ্রনাথ ঠাকুর

৬

উত্তরায়ণ  
শান্তিনিকেতন

২২/৩/৩২

প্রিয়বরেষু

আপনি শনিবারে এখানে আসলে রবীন্দ্রনাথ আনন্দিত হবেন। Guest House-এ থবর দিয়ে রাখচি—আপনাদের সব আয়োজন প্রস্তুত থাকবে।



রবীন্দ্রনাথ হয়তো সোমবার নাগাদ কলকাতা যাবেন। যদি কোনো কারণে এখন আপনাদের না আসা হয় তা হলে জানানবেন। আশা করছি শীঘ্রই দেখা হবে।

প্রীতিনমস্কারান্তে

ভবদীয়

শ্রীঅমিয়চন্দ্র চক্রবর্তী

৭

শান্তিনিকেতন

কল্যাণীয়েষু

বুদ্ধির দোষে, শিক্ষার অভাবে এবং মনোযোগের দুর্বলতায় এমন অনেক ভুল ক'রে থাকি যার স্বপক্ষে কোনো কথাই চলে না। তাতে এইমাত্র প্রমাণ হয় আমি অপ্রাস্ত নই। ত্রুটি যারা মার্জনা করেন ঔদার্য তাঁদেরই, যারা না করেন তাঁদের দোষ দেওয়া যায় না। অনতিকাল পূর্বে আমার একটি প্রবন্ধে “ব্যঞ্জনান্ত” শব্দের স্থলে “হলন্ত” শব্দ ব্যবহার করেছিলুম। প্রবোধচন্দ্র তাঁর পত্রে আমার এই ভুল স্মরণ করিয়ে দিয়েছেন কিন্তু তিনি উল্লাস বা অবজ্ঞা প্রকাশ করেন নি। আমি সেজন্তে কৃতজ্ঞ। সবুজপত্রে আমার লিখিত কোনো প্রবন্ধে ঠিক এই ভুলটিই দেখা যায় তার থেকে প্রমাণ হয় এটার কারণ অগ্ৰমনস্কতা নয়, ব্যাকরণের পারিভাষিকে আমার অজ্ঞতা। ইতি ২১ জুলাই ১৯৩২

স্বাক্ষর

রবীন্দ্রনাথ ঠাকুর

বিচিত্রা-পরিচালক শ্রীহৃদীলচন্দ্র মিত্রকে লেখা পত্র (অংশ)।

বিচিত্রা, ১৯৩২ ভাদ্র, পৃ ১৬৭

৮

ও

উত্তরায়ণ

কল্যাণীয়েষু

শান্তিনিকেতন

ভুল হয়েছে। হলন্ত শব্দের স্থলে ব্যঞ্জনান্ত ব্যবহার করা উচিত ছিল। কোনো কালে ব্যাকরণ পড়ি নি। পারিভাষিক শব্দ সম্বন্ধে আমার কোনো জ্ঞান

নেই। যেটুকু ছিল বয়সের ধৰ্মে ভুলে এসেছি। লেখাতেও অন্তমনস্কতা প্রবেশ করেছে। সময় হয়েছে লেখা বন্ধ করা। ইতি ২৬ জুলাই ১৯৩২

শুভাকাজী

শ্রীরবীন্দ্রনাথ ঠাকুর

২

পূজ্যপাদেষু

ভাষ্যের বিচিত্রায় দেখলুম প্রদোষ শব্দের আলোচনা প্রসঙ্গে আপনি আমার পত্রখানির সম্বন্ধে উল্লেখ করেছেন, তাতে আমি নিজেকে খুবই অমুগ্ধহীত মনে করছি। এই পত্রে সে প্রসঙ্গের পুনরুত্থাপন করার উদ্দেশ্য এই।—বিচিত্রায় আপনি “ব্যঞ্জনাস্ত” ও “হলস্ত” এই শব্দ দুটির কথা যে-ভাবে উল্লেখ করেছেন তাতে পাঠকের মনে কিছু ভ্রান্তি থেকে যাবার আশঙ্কা আছে। “হলস্ত” ও “ব্যঞ্জনাস্ত” এই দুটি শব্দের একই অর্থ। সুতরাং “ব্যঞ্জনাস্ত” শব্দের স্থলে “হলস্ত” শব্দ ব্যবহার করা ভুল নয়। শ্রাবণের “পরিচয়ে” “ছন্দবিতর্ক” প্রবন্ধে আপনি স্বরাস্ত অর্থে “হলস্ত” শব্দটি প্রয়োগ করেছেন। তাতেই আমার মনে কিছু সংশয় উপস্থিত হয়েছিল। কারণ “হলস্ত” মানে “স্বরাস্ত” নয়, “হলস্ত” মানে “ব্যঞ্জনাস্ত”। সুতরাং “ছন্দবিতর্ক” প্রবন্ধটির আলোচ্য অংশে “হলস্ত” শব্দটির পরিবর্তে “স্বরাস্ত” শব্দটি প্রয়োগ করাই সঙ্গত কিনা, আমি তাই আপনার কাছে জানতে চেয়েছিলুম। আপনার প্রতি ও আপনার রচনার প্রতি আমি যে আন্তরিক শ্রদ্ধা পোষণ করি, আমার পত্রযোগে আপনার নিকট তা নিবেদন করতে সমর্থ হয়েছি জেনে নিজেকে কৃতার্থ মনে করছি।

শ্রদ্ধাবনত স্নেহার্থী

প্রবোধচন্দ্র সেন

রবীন্দ্রনাথকে লেখা প্রবোধচন্দ্র সেনের পত্র (অংশ)—বিচিত্রা, ১৩৩৯ আশ্বিন, পৃ ৪২৯। মূলপত্র (২১, ৮, ১৯৩২) বিশ্বভারতী রবীন্দ্রভবনে রক্ষিত।

১০

কল্যাণীয়েষু

আবার একটা ভুল করেছি। এ ভুলটা অজ্ঞানকৃত নয়, অনবধানবশত। অর্থাৎ আমার যে ভুল ধরিয়ে দিয়েছিল সেটা স্বীকার করবার সময় ভুল করেছি। কুষ্টির প্রমাণের চেয়ে এতে জোর প্রমাণ পাওয়া যায় যে, আমার বয়স সত্তর পেরিয়েছে।...২৩ অগাস্ট ১৯৩২

শুভাকাঙ্ক্ষী

রবীন্দ্রনাথ ঠাকুর

প্রবোধচন্দ্র সেনকে লেখা পত্র ( অংশ )। বিচিত্রা ১৩৩২ আখিন পৃ ৪২৯।

এই পত্রের সঙ্গে ছিল শ্রীমুখীরচন্দ্র করের এই সংক্ষিপ্ত পত্র ( ৯ ভাদ্র ১৩৩২ ) “কবির উত্তর এই সঙ্গে পাঠাইলাম। আপনার পত্র এবং এই উত্তরটি একসঙ্গে ‘বিচিত্রা’য় পাঠানো হইল কবির নির্দেশে।”

১১

দৌলতপুর

২১. ৮. ১৯৩২

পূজ্যপাদেষু

ভাদ্রের বিচিত্রা ও প্রবাসীতে ‘জরতী’ ও ‘ভীকু’ কবিতার অমিল মুক্তক ছন্দ এবং ‘মানবপুত্র’ রচনার গদ্যচ্ছন্দ দেখে আমি যে কতখানি উল্লসিত হয়েছি তা আপনাকে না জানিয়ে পারি নে। এই রচনাগুলি বাংলা কাব্যসাধিত্যে একটি নোতুন পদ্ধতির সূচনা করেছে। যথাসময়ে এসব ছন্দের আলোচনা করার ইচ্ছা পোষণ করছি। ‘ভীকু’ কবিতায় জ্ঞানত, বলত, ধ্বল, ইক্ল ও ভূতি হসন্তমধ্য প্রাকৃত জিন্সাপদের প্রয়োগ আমার মনোযোগ বিশেষভাবে আকর্ষণ করেছে। এই প্রয়োগের মধ্যে এমন একটি বৈশিষ্ট্য ও অভিনবতা আছে যে, তার প্রতি লক্ষ্য না করে থাকা যায় না। কিন্তু চিঠিতে সে আলোচনা করা সম্ভব নয়।

আমার সশ্রদ্ধ প্রণাম গ্রহণ করুন। ইতি ৫ই ভাদ্র, ১৩৩২

শ্রদ্ধাবনত স্নেহার্পী

প্রবোধচন্দ্র সেন

১৩৩২ আখিন সংখ্যা বিচিত্রায় প্রকাশিত পত্রের শেষাংশ ( অপ্রকাশিত )। মূলপত্র বিষয়ভারতী রবীন্দ্রভবনে রক্ষিত।

কল্যাণীয়েষু

যুগ্মস্বরবর্ণ অথবা স্বরবর্ণের সঙ্গে যুক্ত ব্যঞ্জনবর্ণ বাংলা ছন্দে মাত্রাগণনার বিকল্পে এক বা দুই মাত্রার পরিমাণ পেয়ে থাকে। ‘আইহন’, ‘হইল’, ‘আইলা’, ‘তুইও’ শব্দে এই নিয়ম। হসন্ত ব্যঞ্জনবর্ণের সঙ্গে ব্যঞ্জনবর্ণের যোগেও এই বিকল্পের উদ্ভব হয়। যথা ‘ভেবেছিলাম তুমি’। যাকে আমরা সবাই সাধু ভাষা বলি সে হসন্ত শব্দের দাবী মানতে চায় না—হসন্তের আদর চলতি ভাষায়। শাস্ত্রাচার ও লোকাচারের ভেদে একই ভাষায় দু রকমের প্রথা চলচে।

‘নিষ্ফল কামনা’র স্থলে ‘নিষ্ফল প্রয়াস’ ব্যবহার করেছি সে আমার জরাগ্রস্ত মস্তিষ্কের প্রমাদবশত।

মাত্রাগণনার বাঁধা নিয়ম বাংলা ছন্দবিচারে চলে না, তার স্থিতিস্থাপকতা বিচার করতে হয়।

ছন্দতত্ত্ব সম্বন্ধে তর্ক করতে আর আমার রুচি নেই। ছন্দের নিয়মটা জানবার যোগ্য বিষয় বটে—কিন্তু ছন্দ ব্যবহার করবার কালে আরো বেশি কিছু আবশ্যক হয়। সেটা কাউকে বুঝিয়ে দেওয়া যায় না—এর বেলাও খাটে ‘ন মেধয়া ন বহুনা শ্রুতেন’। নিরতিশয় ব্যস্ত আছি। ইতি ২ সেপ্টেম্বর ১৯৩৪

স্বভার্থা

রবীন্দ্রনাথ ঠাকুর

প্রবোধচন্দ্রকে লেখা পত্র ( অপ্রকাশিত )।

নমস্কার নিবেদন,

আপনার চিঠি খানিক আগে পেয়েছি—আমার ধন্যবাদ জানবেন।

ত্রৈমাসিকের সম্পাদক শ্রীযুক্ত কুপালিনীকে আমিই আপনার কথা বলেছিলাম—তাঁর কাছে লেখা আপনার চিঠিও দেখেছি। বাংলা ছন্দ সম্বন্ধে ইংরেজীতে প্রবন্ধ লেখা প্রায় ‘সোনার পাখরবাটি’ সমতুল্য। তবুও যদি সহজবোধ্য ভাষায় মোটামুটিভাবে তাঁর কৃতিত্ব সম্বন্ধে কিছু লিখতে পারেন ভালো হয়।

জন্মসংখ্যা ত্রৈমাসিকে তাঁর একটা সম্পূর্ণ ছবি তোলবার ইচ্ছা আমাদের—ছন্দকে বাদ দিলে চলবে কেন ? আর আপনি ছাড়া কে এই কাজ করবেন ?...

সশ্রদ্ধ নমস্কার ।

ভবদীয়

শ্রীঅনিলকুমার চন্দ

এই অমরোদয়ের ফলেই রচিত হয় Rabindranath and Bengali Prosody নামে ইংরেজি প্রবন্ধ । এটি প্রকাশিত হয় রবীন্দ্রনাথের অশীতিবর্ষ পূর্তি উপলক্ষে প্রকাশিত Visvabharati Quarterly-র বিশেষ সংখ্যায় ( 1941 May-October ) এই ইংরেজি ত্রৈমাসিকের সম্পাদক ছিলেন শ্রীযুক্ত কৃষ্ণ কৃপালানি ।

১৪

Daulatpur College,  
Dist. Khulna

20th June, 1941.

শ্রীযুক্ত রবীন্দ্রনাথ ঠাকুর

বরেণ্যপাদেষু

আমি বাংলা ছন্দের উপর একখানি বই লিখছি । অনেকখানি লেখা হয়েছে । লিখতে লিখতে মনে অনেক প্রশ্ন জাগছে । পত্র লিখে আপনার কাছে আমার জিজ্ঞাসা নিবেদন করার দুর্নিবার ইচ্ছা হয় । আপনার বর্তমান স্বাস্থ্যের কথা ভেবে অনেকবার সে ইচ্ছাকে সংযত করেছি । পৌষ উৎসব উপলক্ষ্যে যখন শান্তিনিকেতনে গিয়েছিলুম তখনও প্রশ্ন জিজ্ঞাসা করে আপনার মানসিক বিশ্রামের বিষয় জন্মাতে ইচ্ছে হয় নি ।

আশা করি বর্তমানে আপনার স্বাস্থ্য অপেক্ষাকৃত ভালো আছে । তাই এই পত্রখানি লিখতে সাহস করছি । আপনার স্বাস্থ্য যদি অমূল্য থাকে তা'হলেই আপনার কাছ থেকে উত্তর পেলে উপকৃত হ'বো । স্বাস্থ্য অমূল্য না হ'লে পত্রের উত্তর না পেলেও ক্ষণ হ'বো না ।

এ পত্রে একটি-মাত্র প্রশ্ন করবো । কিন্তু প্রশ্নের চাইতেও আরেকটা জরুরি বিষয় আছে । আপনার অজস্র কবিতা থেকে নানা রকম ছন্দের আদর্শ খুঁজে

বের করছি। করতে গিয়ে কোনো কোনো রকমের ছন্দের অপ্রয়োগ বা অতি অল্প প্রয়োগ লক্ষ্য করছি। আমি ক্রমে এ বিষয়ে আপনার দৃষ্টি আকর্ষণ করতে চাই। আপনি যদি সঙ্গত বোধ করেন এবং বিভিন্ন ধরনের কয়েকটি ছন্দের আদর্শ রচনা করেন তা'হলে আমি অল্পগৃহীত হ'বো, কারণ আমার পুস্তকে ব্যবহার করার নূতন আদর্শ পাব। তা-ছাড়া, বাংলা সাহিত্যেও, বিশেষ ক'রে তার ছন্দোবিভাগ, তাতে সমৃদ্ধ হ'য়ে উঠবে সন্দেহ নেই।

অনেকখানি ভূমিকা ক'রে ফেলেছি। এখন আসল প্রসঙ্গের অবতারণা করছি।—

(১) 'পুণ্যবান্' ও 'পুণ্যবতী'—এ দুটি বাংলা শব্দেই 'মাত্রা' আছে পাঁচটি করে; অর্থাৎ ও দুটি শব্দই 'পঞ্চমাত্রক'। বিদেশী পরিভাষায় 'মাত্রা' কথাটিকে *mora* এবং 'পঞ্চমাত্রক' শব্দটিকে *Pentamoric* ব'লে অনুবাদ করা চলে। আরেক হিসাবে 'পুণ্যবান্' শব্দে আছে তিন সিলেব্‌ল, কিন্তু 'পুণ্যবতী' শব্দে চার সিলেব্‌ল; অর্থাৎ 'পুণ্যবান্' *trisyllabic* এবং 'পুণ্যবতী' *tetrasyllabic*।

'মাত্রা' শব্দ নিয়ে কোনো অসুবিধে নেই। অসুবিধে হচ্ছে 'সিলেব্‌ল' কথাটি নিয়ে। প্রশ্ন হচ্ছে *syllable*, *syllabic*, *trisyllabic*, *tetrasyllabic* প্রভৃতি শব্দের বাংলা প্রতিশব্দ কি হ'তে পারে? অনেকেই এগুলির বাংলা প্রতিশব্দ রচনা করতে প্রয়াস পেয়েছেন। কিন্তু কারও চেষ্টাই সফল হয়েছে বলা যায় না। কেউ কেউ বলেন *syllable*-এর বাংলা হচ্ছে 'অক্ষর' কিন্তু 'উৎসব' শব্দে দুই অক্ষর এবং 'পুণ্যবান্' শব্দে তিন অক্ষর বললে বাঙালির খট্কা লাগে। আমি বলি 'উৎসব' শব্দ দ্বিস্বর (অর্থাৎ *dissyllabic*), 'পুণ্যবান্' শব্দ *trisyllabic* বা ত্রিস্বর।

এ বিষয়ে আপনার মতামত জানালে অল্পগৃহীত হ'বো।

(২) আমার দ্বিতীয় কথা পরিভাষা-বিষয়ক নয়। ছন্দের প্রয়োগ-বিষয়ক। সাধু পয়ার ছন্দে প্রবহমানতা প্রথম আনেন মধুসূদন। কিন্তু সে প্রবহমান ছন্দ সমপংক্তিক ও অমিল। আপনার রচনাতে ওই প্রবহমান ছন্দ বহু বিচিত্র রূপ ধারণ করেছে। সমিল ('মেঘদূত', 'বহুক্ষরা'), অমিল ('বিসর্জন'), সমপংক্তিক, অসমপংক্তিক (শাজাহান), চৌদ্দ মাত্রার আদর্শ, আঠারো মাত্রার আদর্শ ইত্যাদি প্রবহমান ছন্দের সমস্ত রকম সম্ভবপর রূপই আপনার রচনাতে ধরা দিয়েছে। একটাও বাদ পড়ে নি।

কিন্তু প্রাকৃত বাংলা ছন্দে প্রবহমানতার কতকগুলি রূপ আপনার রচনায় বাদ পড়েছে ; অতএব বাংলা সাহিত্যেই বাদ পড়েছে, এ কথা বলাই বাহুল্য। কেন না, যে ছন্দ আপনি ব্যবহার করেন নি সে ছন্দ অল্প কারও রচনায় এখনও দেখা দেয় নি এবং সে সম্ভাবনাও দেখছি নে। যাক, সে কথা।

আপনার ‘ছন্দ’ নামক বইখানির ৫৩-৪ পৃষ্ঠায় আছে—“এই প্রাকৃত বাংলাতেই ‘মেঘনাদ বধ’ কাব্য লিখলে যে বাঙালিকে লজ্জা দেওয়া হোত সে কথা স্বীকার করব না। কাব্যটা এমন ভাবে আরম্ভ করা যেত—

যুদ্ধ তখন সান্ন হোলো বীরবাহু বীর যবে  
বিপুল বীর্য দেখিয়ে হঠাৎ গেলেন মৃত্যুপুরে  
যৌবনকাল পার না হোতেই। ইত্যাদি

( বাহুল্যবোধে সবটুকু উদ্ধৃত করলুম না। ) এতে গান্ধীধ্বের ত্রুটি ঘটেছে এ কথা মানব না। এই যে-বাংলা বাঙালির দিনরাত্রির ভাষা এর একটি মস্ত গুণ—এ ভাষা প্রাণবান।”

আপনার এই উক্তির সার্থকতা আমি সম্পূর্ণ স্বীকার করি। প্রায় কুড়ি বছর আগে ‘প্রবাসী’তে একটি প্রবন্ধে আমি ঠিক এই কথাই বলেছিলাম। আমি বিশ্বাস করি প্রাকৃত বাংলায় মেঘনাদবধের অমিত্রাক্ষর অর্থাৎ প্রবহমান ছন্দ রচনা করা যেতে পারে। শুধু যে পারে তা নয়, প্রাকৃত বাংলায় অতি সুন্দর প্রবহমান ছন্দই রচিত হতে পারে বলে আমি মনে করি। অমিল, সমিল, সমপংক্তিক, অসমপংক্তিক প্রভৃতি সাধু প্রবহমান ছন্দের সমস্ত রূপই প্রাকৃত বাংলায় প্রতিকলিত হ’তে পারে। ‘বলাকা’-র ‘শা-জাহান’, ‘ছা- প্রভৃতির ছন্দ কি প্রাকৃত বাংলায় রচিত হতে পারে না ?

আপনার উদ্ধৃত উক্তিতেই স্বীকৃত হয়েছে যে, পারে। কিন্তু দুঃখের বিষয় দৃষ্টান্ত-স্বরূপ সাধু প্রবহমান ছন্দের ওই কয় পংক্তির প্রাকৃত তর্জমা ছাড়া ওই সম্ভাব্যতার আর কোনো নিদর্শন বাংলায় নেই। আপনি নিজেরও কোথাও ‘বহুধারা’, ‘মানসী’, ‘স্বর্ণ হইতে বিদায়’, ‘এবার ফিরাও মোরে’ প্রভৃতি কবিতার সাধু প্রবহমান ছন্দের অল্পরূপ ছন্দ প্রাকৃত বাংলায় রচনা করেন নি। তার ফলে পূর্বোক্ত তর্জমার দৃষ্টান্তটুকুকে উপলক্ষ্য করে কারও কারও পক্ষে উপহাস-রসিকতা করার সুযোগ ঘটেছে। সাধু বাংলায় প্রবহমান ছন্দ রচনা করতে গিয়ে মধুসূদনকে যে উপহাসের সম্মুখীন হতে হয়েছিল বহুকাল হ’লো তার নিরসন

ঘটেছে। কিন্তু প্রাকৃত বাংলায় প্রবহমান ছন্দের যে অঙ্কুরটুকু দেখা দিয়েছে আপনার রচিত উদ্ধৃত অংশটিতে, তার উপলক্ষ্যে যে উপহাস-রসিকতা করা হয়েছে, তাকে নিরস্ত করার দায়িত্ব আপনারই।

যা হোক ‘বসুন্ধরা’, ‘এবার ফিরাও মোরে’, ‘শা-জাহান’ ইত্যাদি কবিতার আদর্শে যদি প্রাকৃত বাংলার প্রবহমান ছন্দে কয়েকটি কবিতা রচিত হয়, তা হ’লে বাংলা সাহিত্যের একটি মস্ত অভাব মোচন হয় এবং প্রাকৃত-বাংলার প্রকাশ-শক্তির যথার্থ পরিচয়ও ঘটে—এইটুকু মাত্র আমার নিবেদন।

দুটি-মাত্র প্রসঙ্গেই পত্রখানি অপ্রত্যাশিত ভাবে দীর্ঘ হয়ে পড়াতে কুষ্ঠা বোধ করছি। অতএব এখানেই নিরস্ত হচ্ছি।

আমার আন্তরিক শ্রদ্ধা ও প্রণতি গ্রহণ করুন। ইতি ৫ই আষাঢ়, ১৩৪৮।

স্নেহার্থী

প্রবোধচন্দ্র সেন

মূলপত্র রক্ষিত আছে রবীন্দ্রভবনে। তার গায়ে ইংরেজিতে লেখা আছে :

R 24/6/41—keep for future reference.

রবীন্দ্রনাথকে লেখা এটিই আমার শেষ চিঠি। তিনি এ চিঠির উত্তর দিতে পারেন নি। এ চিঠির প্রাপ্তিসংবাদ জানিয়েছিলেন অনিলকুমার চন্দ মহাশয়।

১৫

২৪।৬।৪১

শ্রদ্ধাঙ্গদেবু

গুরুদেব আপনার চিঠি পেয়েছেন। তাঁর শরীর আবার বেশ একটু ভেঙেছে, জোর চিকিৎসা চলেছে। চিকিৎসা খুব কড়া রকমের—অস্থির চাইতে বোধ হয় ওষুধের প্রতাপ ও অত্যাচারই বেশী। অস্থির পাল্লা গেছে, বর্তমানে ওষুধের ক্রিয়া-উপক্রিয়া চলেছে।

আপনার চিঠি তাই আপাতত cold storage-এ রইল। অবশিষ্ট তাঁকে পড়ে শুনিয়েছি। কিন্তু দীর্ঘকাল উত্তর পাবেন না। তাই জানিয়ে রাখলুম।

আমার সশ্রদ্ধ নমস্কার জানবেন। ইতি—

বিনীত

শ্রীঅনিলকুমার চন্দ



## প্রমথ চৌধুরী

২০, মেফেরার

বালিগঞ্জ

২১।১।৩২

কল্যাণীয়েষু

তোমার ছন্দ-বিচার সম্বন্ধে রবীন্দ্রনাথের প্রবন্ধ পড়লুম। বিচিত্রায় তোমার কৈফিয়ত অবশ্যই পড়ব। আমি এ বিষয়ে যে কোন মতামত প্রকাশ করতে ইতস্ততঃ করি, তার কারণ ছন্দ সম্বন্ধে আমার কোনও বিশেষ জ্ঞান নেই। আমি পড়াও লিখেছি, কিন্তু সে শুধু একমাত্র কানের উপর ভরসা রেখে অর্থাৎ যে সাহসে আমি গড়াও লিখি।

শ্রীপ্রমথনাথ চৌধুরী

এর পর আমি প্রমথ চৌধুরীকে যে চিঠি ( ২৫।১।৩২ ) লিখি তার প্রাসঙ্গিক অংশ এখানে উদ্ধৃত করা প্রয়োজন।—

“মাঘের বিচিত্রায় আমার ছন্দ-বিচারের কৈফিয়ত নিশ্চয়ই পড়েছেন। আমার ছন্দ-আলোচনা সম্বন্ধে রবীন্দ্রনাথ পৌষের বিচিত্রায় যে প্রবন্ধ লিখেছেন তাতে আমি সন্তুষ্ট হতে পারি নি, কারণ ছন্দ সম্বন্ধে আমি যে সমস্ত প্রশ্ন তুলেছি তার একটারও উত্তর ওই প্রবন্ধে নেই, অথচ কয়েকটি অবাস্তব বিষয় নিয়ে নিরর্থক তর্ক উঠেছে। কিন্তু এ বিষয়ে একটা স্মৃতি আছে। আমার মনে হয় পৌষের প্রবন্ধে যে আমার আসল কথাই উত্তর দেওয়া হয় নি, তা কথা রবীন্দ্রনাথ যখন সময়েই অর্থাৎ আমার কৈফিয়ত পাওয়ার পূর্বেই বুঝতে পেয়ে গেলেন। তাই মাঘের ‘পরিচয়ে’ আবার আমার প্রশ্নগুলির উত্তর দিয়েছেন। মাঘের ‘পরিচয়ে’ তাঁর ‘ছন্দের হসন্ত-হলন্ত’ পড়ে আমি খুবই খুশি হয়েছি, তাঁর কাছ থেকে আমি ওরকম জিনিষেরই প্রত্যাশা করেছিলুম। তা ছাড়া, আমি রবীন্দ্রনাথের ছন্দ সম্বন্ধে এমন কতগুলি কথা ‘জয়ন্তী-উৎসর্গে’ লিখেছি যা আমাকে শুধু তাঁর কাব্যগুলি থেকেই অহুমান করে নিতে হয়েছিল। মাঘের ‘পরিচয়ে’ রবীন্দ্রনাথের নিজের কাছ থেকেই সেসব কথার স্পষ্ট সমর্থন পেয়ে আমি যে কত খুশি হয়েছি তা বলতে পারি নে। যা হক, ‘পরিচয়ে’ নি আমার প্রশ্নগুলির যে উত্তর দিয়েছেন তার পরেও আমার আরও কয়েকটি জিজ্ঞাস্য বিষয় রয়ে গেছে। আর-এক প্রবন্ধে আমি আবার সে কথাগুলি তুলব মনে করেছি। আমার

বিশ্বাস আবার যদি আমি বাকি বিষয়গুলির উত্থাপন করি তবে রবীন্দ্রনাথ আমার উপর আরও সন্তুষ্ট হবেন। ও-রকম প্রশ্ন দেখে তিনি খুশি না হয়ে পারবেন না বলেই আমি মনে করি। আমার ইচ্ছা ছিল এ মাসের 'বিচিত্রায়'ই ও-বিষয়ে লিখব। কিন্তু পরিচয়ের প্রবন্ধে রবীন্দ্রনাথ শ্রীযুক্ত দিলীপবাবুর নিকট তাঁর নিম্নেরই লেখা একটি চিঠির উল্লেখ করেছেন। ওই চিঠি আশ্বিনের উত্তরায় প্রকাশিত হয়েছে। আশ্বিনের উত্তরা আমি দেখি নি বলে ফাল্গুনের বিচিত্রায় জ্ঞান ও-বিষয়ে লিখতে পারলুম না। যা হক, দুদিন হল আমি আশ্বিনের উত্তরা সংগ্রহ করেছি। তাতে রবীন্দ্রনাথের চিঠি পড়ে মনে হল যদি তা আমি আগেই দেখতে পেতুম তা হলে বড়ই ভাল হত। কেন না, তা হলে রবীন্দ্রনাথের সঙ্গে যে আমার মতের কোনো পার্থক্য নেই তা অতি সহজেই দেখাতে পারতুম। যা হক, সামনের মাসেই তা দেখাব। আশ্বিনের উত্তরায় দিলীপবাবু যে প্রশ্ন করেছেন তাতে খুবই খুশি হয়েছি। কারণ আমিও কার্যতঃ ওই প্রশ্নই তুলেছি। তবে আমার প্রশ্নটা ছিল আরও ব্যাপক। তিনিও আমারই মতো ছন্দ-জিজ্ঞাসু, তা দেখে স্বভাবতঃই খুশি হয়েছি। তিনি যে প্রশ্ন তুলেছেন সে সম্বন্ধে 'ছন্দো-নিপুণদের রায় জ্ঞানার ইচ্ছা' প্রকাশ করেছেন। এ বিষয়ে আমি কি মনে করি তা তিনি আগামী মাসেই জানতে পারবেন আশা করি।”

বলা উচিত যে, এ সময়ে দিলীপকুমারের সঙ্গে আমার কিছুমাত্র যোগাযোগ ছিল না। তাঁর সঙ্গে আমার পত্রালাপ শুরু আরও দীর্ঘকাল পরে। যা হক, আমার এ চিঠির উত্তরে ( ২৬।১।৩২ ) প্রমথ চৌধুরী মহাশয় আমাকে লেখেন—

“বিচিত্রায় তোমার ছন্দ সম্বন্ধে প্রবন্ধ পড়লুম। ও-প্রবন্ধে যা আমার সব চাইতে ভাল লেগেছে সে হচ্ছে তার tone। রবীন্দ্রনাথের মত লেখকের প্রতিবাদ করতে হলে সে প্রতিবাদের ভিতর তাঁর প্রতি শ্রদ্ধার স্বরটি খুব স্পষ্ট হয়ে ওঠা দরকার। এবং তোমার লেখাটি আগাগোড়া শ্রদ্ধা। আমি বহুকাল পূর্বে ষিঙ্গেল্লল রায়-কর্তৃক রবীন্দ্রনাথের উপর আক্রমণের প্রতিবাদ করে যে প্রবন্ধটি লিখি তাতেও এই মত প্রকাশ করি। সে প্রতিবাদটি বীরবলের হাল-খাতায় ‘সাহিত্যে চাবুক’ এই নামে প্রকাশিত হয়েছে। সে যা-ই হোক। রবীন্দ্রনাথ এখন খড়দহে আছেন। এরি মধ্যে একদিন তাঁর সঙ্গে দেখা করতে যাব ও তোমার চিঠিখানি তাঁকে পড়তে দেব। আমার বিশ্বাস এ চিঠি পড়ে তিনি খুসী হবেন।

আমি তোমাকে 'পূর্বেই' লিখেছি, ছন্দ সম্বন্ধে আলোচনায় আমি কেন যোগ দিই নে। তবে তোমাদের পাঁচজনের আলোচনা পড়ে এ বিষয়ে দু' কথা বলবার আমারও লোভ হচ্ছে।"

দিলীপকুমার

১

৩০/১২/৩১

ভাই অমিয়,

আজ কবির ছন্দালোচনা ( প্রবোধ সেন মহাশয়ের উত্তরে ) বিচিত্রায় পড়ে এত উপভোগ করেছি যে বলতে পারি না। সেন মহাশয়ের যুক্তি আমার ওরিজিনাল লেগেছিল বটে, কিন্তু ওরিজিনাল কিছু বলতে হবে এই রোখ করে লেখা যেন। কবির ঠাণ্ডা বিদ্রূপগুলি অত্যন্ত মর্মস্পর্শী ( সেন মহাশয়ের পক্ষেও )। দেখি তিনি কি জবাব খুঁজে পান এর উত্তরে। অক্ষর গুণে গুণে চলাটা আমার কোনো দিন ভালো লাগে নি। বরাবরই মনে হয়েছে সত্য অল্পভূতি তার ছন্দের স্বরের বেগ আপনিই সৃষ্টি করে, কান চোখ প্রভৃতি ইন্ড্রিয়ের রসবোধের সহজ প্রণালী দিয়ে চলে। ভাষার ও ছন্দের পরিণতি এই জাগতিক সত্যেরই একটা অল্পতম প্রমাণ মাত্র।...

দিলীপ

অমিয় চক্রবর্তীকে লেখা দিলীপকুমারের পত্র ( অংশ )। মূলপত্র বিশ্বভারতী রবীন্দ্রভবনে রক্ষিত।

২

৩১/৩২

পূজনীয়েষু

অত্যন্ত অপ্ৰত্যাশিত ব'লে 'পরিশেষে' আপনার নাম লেখা—( তা আগেকার মতন স্নেহভাবে নাই হোক ) দেখে বড় খুঁসি হয়েছে ও কৃতজ্ঞ। আমি ভেবেছিলাম—এখনও যে ভাবি না তা নয়—যে এ ধরনের উপহার স্মারকচিহ্ন প্রভৃতি আর আমি আশা করতে পারি না...তার উপর আমি সম্প্রতি কয়েকটি

প্রবন্ধ লিখেছি, তাতে প্রবোধচক্রের nomenclature ও ছন্দোবিশ্লেষণের পূর্ণ সমর্থন জানাতে বাধ্য হয়েছি। কারণ আমার দৃঢ় ও আন্তরিক বিশ্বাস জন্মেছে এসব ক্ষেত্রে প্রবোধচক্রই ঠিক বলেছেন (যথা প্রাকৃত বা স্বরবৃত্ত ছন্দ syllabic, মাত্রিক নয়, ও চারের ছন্দ, তিনের না)।...পরিচয়েও আপনি একটু বিরক্ত মনে হল। আমি কিন্তু convinced নই, কাজেই আপনার মতামতের প্রতিবাদ করব, যথাসাধ্য নম্রভাবেই করবার চেষ্টা করেছি, কিন্তু সংগীত স্বরলিপি প্রভৃতির analogy থেকে খুব জোর করেই বলেছি যে, ছন্দ গোনা প্রভৃতিরও একটা মূল্য আছে, তার সঙ্গে শোনার অহিনকুল সম্বন্ধ নেই।...

প্রণত

মণ্ট

রবীন্দ্রনাথকে লেখা দিলীপকুমারের পত্র (অংশ)। মূলপত্র রবীন্দ্রভবনে রক্ষিত।

৩

শান্তিনিকেতন

১০ সেপ্টেম্বর [ ১৯৩২ ]

কল্যাণীয়েষু

“পরিশেষ” বই দুই খণ্ড আমার হাতে আসবামাত্র প্রথম খণ্ড তোমার কাছে পাঠিয়েছি, দ্বিতীয়টা আমার নিজের জন্ত। আমার নিকট-আত্মীয় ও বন্ধুদের আমি নিরলঙ্ঘনভাবে কেবলমাত্র পরস্পরের নাম লিখে বই পাঠাই, তার চেয়ে বেশি কিছু বলিনে, বললে সম্ভাবণের মূল্য কমে যায়।

দ্বিতীয় কথা, তুমি প্রবোধ সেনের সমর্থন করে কিছু লিখেচ সে কথা আমি জানিই নে। \* অনেকদিন থেকে কাগজপত্র পড়া প্রায় ছেড়ে দিয়েছি, মনকে নিরাবিল রাখবার জন্ত। স্বয়ং প্রবোধ সেনের সঙ্গে মত নিয়ে আমার কোন ব্যবহারের বিকৃতি হয়নি—তিনি দেখাসাক্ষাৎ করে থাকেন এবং চিঠিপত্রও লেখেন। তুমি তাঁর মতকে স্বীকার করেচ বলে তোমাকে অপরাধী করব এ

বয়সে সে ছেলেমানুষী মার্জনীয় নয়।...আগামী সংখ্যক পরিচয়ে ছন্দ সম্বন্ধে একটা প্রবন্ধ বেরবে—সেটা কিছুকাল পূর্বের লেখা।

তোমাদের  
রবীন্দ্রনাথ ঠাকুর

দিলীপকুমার রায়কে লেখা রবীন্দ্রনাথের পত্র (অংশ)। প্রতিলিপি বিখ্যাত রবীন্দ্রভবনে রক্ষিত।

৪

শ্রীপ্রবোধচন্দ্র সেনের কাছে বাংলা ছন্দবিৎদের ঋণ কম নয়। তাঁর মতন শৃঙ্গ কান, ভূয়োদর্শন, অভিনিবেশ ও প্রাঞ্জল ভাষায় ছন্দের জটিল তত্ত্বাদির রহস্য উদ্ঘাটিত করার ক্ষমতা যে-কোনো দেশের ছান্দসিকদের মধ্যেই বিরল বই কি। বাংলা ছন্দের কত ঝাপসা জিনিষ যে তিনি তাঁর সাফমাথা দিয়ে ভেবে ও তীক্ষ্ণ বিশ্লেষণের আলো ফেলে পরিষ্কার করে দিয়েছেন তা হয়ত আজকের দিনে সর্ববাদিসম্মত হবে না কিন্তু দুদিন বাদে হবেই হবে। এক হিসেবে কিন্তু তার আলোচনাদির বিরুদ্ধে এত প্রতিবাদের মাড়া পড়ে যাওয়াটা ভালোই। পুরাতনের একটা জড়িম।—inertia—আছে যা নিত্যই নূতন সত্য নূতন তত্ত্ব নূতন দৃষ্টিভঙ্গিকে প্রাণপণে বাধা দেয়। এই-ই তার ধর্ম। কিন্তু এই বাধার বাঁধে প্রতিহত হয়েই আবার নূতনের বেগ, অনাগতের শ্রোত শক্তিসঞ্চয় করে থাকে।

...

...

...

প্রবোধচন্দ্রের বিশ্লেষণ ও যুক্তি আমার মনে হয়—invulnerable—অনবশ্য। তিনিই সব প্রথম বাংলা ছন্দকে ‘বৈজ্ঞানিক’ পদ্ধতিতে বিশ্লেষণ করে যথাযথভাবে প্রতি ছন্দের স্বরূপটি দেখিয়েছেন। শুনেছি ওয়েল্‌স্ সাহেব কোন্ এক লেখকের সম্বন্ধে বলেছিলেন,—‘Take your hats off, men!—a great genius at last!’ আমরাও আজ বলি প্রবোধচন্দ্রকে অভিনন্দন করে : ‘Take your hats off, metrists! a great prosodist at last—and at long last!’

3, SUKIAS ROW

Calcutta

3, December 1923

শ্রীযুক্ত প্রবোধচন্দ্র সেন

সমীপেষু

সবিনয় নিবেদন,

আপনার পত্র পেয়ে বিশেষ আনন্দিত হলাম। 'প্রবাসী'তে আপনার প্রবন্ধ যখন প্রথম প্রকাশিত হয়, তখন পড়ে আমি অত্যন্ত খুশী হই, আর আগ্রহের সঙ্গে প্রতি মাসে মুদ্রিত অংশের জন্ত অপেক্ষা করতে থাকি। আপনার সঙ্গে পরিচয় আর আলাপ করতে বড়ই ইচ্ছা হয়। আর শ্রীযুক্ত চারুবাবুকে আপনার কথা জিজ্ঞাসা করি। মনে করেছিলুম, আপনাকে অভিনন্দন আর ধন্যবাদ জানিয়ে চিঠি লিখবো, কিন্তু পরে স্থির করলুম, চারুবাবুর মারফৎ আপনার সঙ্গে পরিচিত হয়ে পত্র-ব্যবহার করবো। আপনার প্রবন্ধগুলিতে যে রীতিতে বাঙলা ছন্দের প্রকৃতি আলোচিত হয়েছে তা আমার খুবই ভাল লেগেছে। বাঙলা ছন্দের প্রকৃতি, আর তার পর্যায় আর শ্রেণীবিভাগ এইরকম যথার্থ বিচারের সঙ্গে, 'বিজ্ঞানসম্মত-প্রণালীতে' : এই ভয় দেখানো শব্দসমষ্টি ব্যবহার করলুম!) আপনার পূর্বে আর কেউ তো করেন নি। আপনার প্রবন্ধের কথা আমি অল্পসঙ্কিৎসু ছাত্র আর বন্ধুদের মধ্যে কয়েছি। চারুবাবুর কাছে শুনলুম, আপনি ঐ বিষয়ে আরও কতকগুলি প্রবন্ধ লিখেছেন, আর লিখেছেনও বোধ হয়। সেগুলি প্রকাশিত হবার আশায় রইলুম। সবগুলি বার হয়ে গেলে পর, একত্র করে, আরও বেশী বেশী উদাহরণ দিয়ে (বাছা বাছা উদাহরণের থেকে দু-এক কোঁটা বস পেয়ে অনেকেই মূল কবিতাগুলির দিকে যেতে চায়), বই করে প্রকাশ করা চাই; কারণ এই রকম একখানি বইয়ের আবশ্যক আছে। বাঙালা ছন্দ সম্বন্ধে দু-একটা কথা আমারও মনে হয়েছিল,—এমন কিছু গভীর কথা নয়—ইচ্ছা ছিল আপনার প্রবন্ধাবলীর উপযোগিতা সম্বন্ধে একটু আলোচনা করতে করতে সে বিষয়ে কিছু লিখবো—কিন্তু নেহাৎ সময়ান্ধা বলে তা ঘটে উঠল না।

আপনি যে কোঁতুংল আর জিজ্ঞাসা নিয়ে আলোচনার কাজে নেমেছেন, তাতে শিক্ষার্থী আর জিজ্ঞাসু আমার, আর আমার মত আর সকলকারই

আন্তরিক সহানুভূতি আছে। আমরা সকলেই এক পথের যাত্রী। আমার নিজের চর্চা আর জ্ঞান দুইই অতি অল্প—গুরুর আসন নিতে আমার লজ্জা বোধ হয়, যদিও বাইরের দিক থেকে দেখতে গেলে আমি দু-এক বিষয়ে পড়িয়ে যাচ্ছি। কার্যক্ষেত্রে এসে দেখছি, বাইরের আদর্শের সঙ্গে মিলিয়ে দেখছি, যে পুঁজি কত কম। তবুও, যদি আমার দ্বারা আপনার জিজ্ঞাস্তা কোনও বিষয়ের কিছুমাত্র সমাধান হতে সাহায্য মেলে, আমি সানন্দে যথাসক্তি আপনাকে সে সাহায্য করবো। আপনি কোনও দ্বিধা না করে আমায় প্রশ্ন করবেন। আমি নিজেও শিখবার আশা আর ইচ্ছা রাখি।

চারুবাবুর কাছে শুনলুম, আপনি এখন কলেজের ছাত্র। এখন কি করছেন, কোন বিষয়ে পড়াশুনা আপনার ভাল লাগে, ইত্যাদি বিষয়ে খবর পেলে খুসী হবো।

উপস্থিত আমি আমার বই ছাপাচ্ছি—বিশ্ববিদ্যালয়ের ছাপাখানায় ছাপানো হচ্ছে—The Origin & Development of the Bengali Language, লগুনে D. Lit. পরীক্ষার জন্য যে thesis দিয়েছিলুম, তাকেই পরিবর্তিত ও পরিবর্তিত করে এই বই। প্রায় ৮০০ পাতা দাঁড়াবে। বইখানা তিন খণ্ডে লিখেছি—(১) Introduction—এতে ভারতে আর্য ভাষার প্রগতি, বাংলাভাষার উৎপত্তি, অন্যান্য আর্য ভাষার সঙ্গে সঙ্গে বাঙলার সম্বন্ধ, বাঙলার শব্দমাখন প্রভৃতি বিষয় আছে। এই অংশ (২৩৫ পাতা) ছাপা হয়ে গিয়েছে। (২) Phonology—ছাপা শুরু হয়েছে—এতে প্রাচীন আর মধ্যযুগের আর্যভাষার তথা বাঙলার ধ্বনিতত্ত্ব আর ধ্বনিগুলির ইতিহাস আলোচিত হয়েছে প্রসঙ্গতঃ এতে বাঙলা ছন্দের সম্বন্ধে দু-একটি কথা বলেছি—আর আপনার প্রবন্ধগুলির উপযোগিতা আর মূল্যবত্বও উল্লেখ করেছি। (৩) Morphology—এতে বাঙলার প্রত্যয়, কৃৎ-তদ্ধিত সূপ্তিভেদের ইতিহাস আর উৎপত্তি-নির্ণয়ের চেষ্টা আছে। বইটা ১৯২৪ সালের মে-জুনের আগে বার হবে, এমন ভরসা হয় না।

আপনি মাঝে মাঝে কলকাতায় নিশ্চয়ই আসেন,—এইবার এলে পরে আশা করি আপনার সঙ্গে সাক্ষাৎ আলাপের সুযোগ পাবে। কোন সময়ে আসছেন, আশা করি আমায় জানাবেন। সিলেটে আমার দুই একটি বন্ধু আর পরিচিত আছেন, তাঁদের আপনি নিশ্চয়ই চেনেন—যেমন ত্রীযুক্ত ক্ষিতীশচন্দ্র গ্রাম—

উকীল—কলকাতায় আর শিলঙে এর মোটরকারের যন্ত্রপাতির দোকান আছে আর শ্রীযুক্ত কীদোদচন্দ্র দেব, যিনি M. L. C. নির্বাচিত হলেন।

শনিবারদিন আমার একটি ছোট পুস্তিকা—A Brief Sketch of Bengali Phonetics—পাঠিয়েছি, বোধ হয় পেয়েছেন।

ভাষাতত্ত্বসংক্রান্ত বিষয়ের প্রব্লেব অবতারণা করে মাঝে মাঝে চিঠি লিখলে বিশেষ আনন্দিত হবো। আমাদের ভাষার অন্তর্নিহিত ব্যাপারগুলির আলোচনার পক্ষে আমাদের পরস্পরের মধ্যে এইরূপ জিজ্ঞাসাবাদ দরকার। এ বিষয়ে যোগ্য লোক দেশে নিতান্ত বিরল। আপনার প্রবন্ধ পড়ে, আপনাকে একজন উপযুক্ত অহুমস্কিংস্ ব'লে পেয়ে আমাদের আনন্দ।

আশা করি কুশলে আছেন। ইতি

বশংবদ

শ্রীস্বনীতিকুমার চট্টোপাধ্যায়

এই চিঠিখানি আমাকে লেখা স্বনীতিকুমারের দ্বিতীয় পত্র। প্রথম চিঠিখানি দীর্ঘকাল যাবৎ নিরুদ্ভিষ্ট। সেখানি ছিল সংক্ষিপ্ত। সে চিঠিতে তিনি আমার প্রবন্ধে উদ্ভূত 'লজ্জি এ সিন্ধুরে প্রলয়ের নৃত্যে' প্রভৃতি কতকগুলি দৃষ্টান্ত কার লেখা কোন্ কবিতা থেকে সংকলিত ইত্যাদি কয়েকটি বিষয় জানতে চেয়েছিলেন। আমি সব প্রশ্নের যথাযথ উত্তর দিয়েছিলাম। তার পরেই তাঁর এই দীর্ঘ চিঠি।

স্বনীতিকুমারের সঙ্গে তাঁর বাড়ীতেই আমার প্রথম দেখা হয় প্রায় দেড় বৎসর পরে, আনুমানিক ১৩৩১ সালের বৈশাখ মাসে। তখনও তাঁর O. D. B. L. বই ছাপা শেষ হয় নি। তবে তার ছন্দ অংশ ছাপা হয়ে গিয়েছিল। সেটুকু আমাকে পড়তে দিলেন আমার মতামতের জন্ত। কোনো কোনো বিষয়ে আমার মনে যথেষ্ট সংশয় দেখা দিলেও তখনই মতভেদ জানানো সংগত মনে হয় নি। তবে 'মুক্তবেণীর গঙ্গা বেধায়' ইত্যাদি কবিতাংশকে 'স্বরবৃত্ত' বলা ঠিক হয় নি, আর প্রাকৃতপৈঙ্গলের যে সূত্রটির নজির দেখানো হয়েছে তাও এখানে প্রযোজ্য নয়, একথা স্পষ্ট করেই জানালাম। তারপরে ওই কবিতাংশটুকু দুজনেই আবৃত্তি করা গেল। দুজনের আবৃত্তিভঙ্গি হল দু-রকম। স্থির হল তিনি শিশিরকুমার ভাট্টার আবৃত্তি শুনে শেষ সিদ্ধান্ত করবেন। তৃতীয় দিনে রায় আমার অহুমস্কেই গিয়েছে। এই সংশোধনটুকু তখনই টুকে রাখলেন। ইদানীং



প্রকাশিত O. D. B. L. গ্রন্থের তৃতীয় খণ্ডে ( ১৯৭২, পৃ ৪৮ ) এই সংশোধনের উল্লেখ আছে ।

O. D. B. L. গ্রন্থ প্রথম প্রকাশিত হয় ১৯২৬ সালের শেষার্ধ্বে । প্রবাসীতে প্রকাশিত ছন্দ প্রবন্ধাবলী সম্পর্কে এই গ্রন্থে পৃ ( ২৮৯ পাদটীকা ১ ) নিম্নলিখিত মন্তব্য করা হয় ।—

“The most systematic study of Bengali versification hitherto published, is by Prabodhchandra Sen, in a recent series of articles to the Pravasi, which clearly distinguishes between the three types of metre in Bengali, and classifies them on a scientific basis. Some of the examples quoted from Mr. Sen's articles.”

O. D. B. L. প্রকাশের প্রায় পাঁচ বৎসর পরেও কবি প্যারীমোহন সেনগুপ্তের ‘মেঘদূত’ বই-এর সমালোচনা উপলক্ষে আমার লিখিত ভূমিকা সম্পর্কে সুনীতিকুমার প্রসঙ্গক্রমে বলেন—

“প্রবোধবাবু প্রাচীন ভারতের ইতিহাস আলোচনা অতি কৃতিত্বের সঙ্গে করিতেছেন ; ওদিকে ছন্দ সম্বন্ধে তাঁহার লেখাগুলি এতাবৎ এবিষয়ে যত আলোচনা হইয়াছে, তাহাদের নীৰ্ব্বাহে বিরাজ করিতেছে ।”

—অমূল্যচরণ বিজ্ঞানভূষণ সম্পাদিত ‘পঞ্চপুষ্প’, ১৩৩৮ বৈশাখ, পৃ ৮৮

মোহিতলাল

২৭ বাহুড়বাগান লেন

কলিকাতা

১১ এপ্রিল, ’২৪

প্রীতিভাজনেষু

.....তোমার ক্রমশঃ প্রকাশিত প্রবন্ধটি তোমার সম্বন্ধে সংবাদের মত আমাকে নিশ্চিত রেখেছিল । ঐ প্রবন্ধ তোমার একটা খুব বড় কীর্তি হয়ে রইল—তুমি যশস্বী হয়েছ । আমি বড় আনন্দিত হয়েছি । প্রবন্ধ বোধ হয়

শেষ হল? খুব পরিভ্রম, পাণ্ডিত্য ও নৈপুণ্যের পরিচয় ওতে আছে। এর পর, ছন্দ ও কাব্যের ঘনিষ্ঠ সম্বন্ধ কতখানি ও কিরূপ এইরকম একটা আলোচনা করলে মন্দ হয় না। ‘ছন্দশাস্ত্র’র আলোচনা বোধ হয় খুব সম্পূর্ণ রকমেরই করেছে।...

আমি প্রবন্ধ লিখছি না, চিঠি লিখছি—যেমন মনে এল যা তা লিখলাম—তোমার মত ছন্দবিদের কাছে হয়ত হাস্যাস্পদ হব। সত্যি তোমার ছন্দশাস্ত্র রচনা খুব বিজ্ঞানসম্মত হয়েছে—এটা তোমার একটা কীর্তি হয়ে রইল।’

শ্রীমোহিতলাল মজুমদার

এই চিঠি যখন লেখা হয় তখন প্রবাসীর আট সংখ্যায় ‘ছন্দ-জিজ্ঞাসা’র প্রথম পর্বের তিনটি প্রবন্ধই (বাংলা ছন্দ, ছন্দের শ্রেণীবিভাগ, বাংলা ছন্দ ও সংগীত) শেষ হয়ে গিয়েছিল। মোহিতলালের মন্তব্য ওই তিন প্রবন্ধের সামগ্রিক পূর্ণতা সম্পর্কে। পরবর্তীকালেও তিনি তাঁর ‘বাংলা কবিতার ছন্দ’ গ্রন্থের (১৩৫২ প্রাবণ) ভূমিকায় এই প্রবন্ধাবলি সম্পর্কে অনুরূপ অভিমত প্রকাশ করেন।—

“একদা প্রবাসীতে প্রকাশিত প্রবোধচন্দ্র সেন মহাশয়ের কয়েকটি প্রবন্ধ আমার কৌতুহল উদ্বিগ্ন করিয়াছিল; ঐ প্রবন্ধগুলিতে একটা বাংলা prosody রচনার উত্তম লক্ষ্য করিয়াছিলাম, এবং তাহা আমাকে আশাধিত করিয়াছিল। ...বৈজ্ঞানিক বুদ্ধির সহিত রসজ্ঞান একমাত্র তাঁহার মধ্যেই লক্ষ্য করিয়াছিলাম।”

এস্থলে বলা উচিত যে, আমার দ্বিতীয় পর্ধ্যায়ের ছন্দ-প্রবন্ধগুলি মোহিতলালকে সন্তুষ্ট করতে পারে নি। উক্ত ভূমিকাতেই তিনি সেগুলি সম্পর্কে যথেষ্ট বিরূপ মন্তব্য প্রকাশ করেন। তার কারণ বোধ হয় এ সময়কার কতকগুলি প্রবন্ধে ব্যাকরণ বিশ্লেষণের প্রাধান্য ও যথেষ্ট সাহিত্যগুণের অভাব। আর বোধ করি এই সাহিত্যগুণের দ্বারা আকৃষ্ট হয়েই এই দ্বিতীয় পর্ধ্যায়েরই একটি বই সম্পর্কে তিনি আন্তরিক অনুরূপতা প্রকাশ করেন। তিনি বলেন—“সত্তা প্রকাশিত তাঁহার এক গ্রন্থে (‘ছন্দোক্ত রবীন্দ্রনাথ’) আমি তাঁহার আলোচনার ভাষা ও ভঙ্গিতে মুগ্ধ হইয়াছি।”

১ এই চিঠিখানির পূর্ণ রূপ ঐষ্টব্য আজহারউদ্দীন খান ও ভবতোষ দত্ত সম্পাদিত ‘মোহিতলালের পত্রাবলি’ গ্রন্থে (১৩৭৩ আদ্বিন) পৃ ২-১৪।

কল্পণানিধান

১০ চৌধুরী লেন, কলকাতা

২৫।৩।১৯৩২

শ্রদ্ধাম্পাদেষু

‘বাংলা ছন্দে রবীন্দ্রনাথের দান’ প্রবন্ধটি পাইয়া অন্তরে আনন্দিত হইলাম। বাংলা ছন্দোবিজ্ঞানে আপনার অসাধারণ অধিকার। আপনি যদি বাংলা ছন্দ সম্বন্ধে একখানি বহি প্রকাশ করেন তাহা হইলে ভাল হয়। প্রবাসীতে প্রকাশিত লেখাগুলি ও মেঘদূতের ভূমিকাটি এবং নূতন যাহা কিছু লিখিতেছেন—সবগুলিই একত্র প্রকাশিত করা দরকার। পরিচয়ে রবীন্দ্রনাথের ‘হলন্ত ও হসন্ত’ সম্বন্ধে নূতন কিছু লিখিতেছেন কি? যদি ইতিমধ্যে কলিকাতায় আসেন, দয়া করিয়া আমার সহিত একবার দেখা করিবেন। বাংলা ছন্দ সম্বন্ধে আপনার সহিত আলোচনা করা যাইবে। আশা করি কুশলে আছেন। ইতি—

ভবদীয়

শ্রীকল্পণানিধান বন্দ্যোপাধ্যায়

চারু বন্দ্যোপাধ্যায়

ঢাকা-হল, রমনা, ঢাকা।

২১।৩।১৯৩২

প্রীতিভাজনেষু সবিনয় নিবেদন,

আপনার উপহার-পুস্তিকা [ বাংলা ছন্দে রবীন্দ্রনাথের দান ] মার পত্র পেয়ে আনন্দিত হলাম।...আপনার সব প্রবন্ধই আমি বিশেষ মনোযোগে দিয়ে পড়ি, আর অনেক কিছু শিখি। আপনার সমস্ত প্রবন্ধের একত্র সংগ্রহ দেখবার জন্য অনেকদিন থেকে অত্যন্ত উৎসুক হয়ে আছি, শীঘ্রই বইখানি প্রকাশ করে ফেলুন। আপনার সঙ্গে কবিগুরুর ছন্দ-যুদ্ধ আমি কৌতূকের সঙ্গে পড়ছি, এবং এই উপলক্ষ্যে যে তাঁর আর আপনার কতকগুলি প্রবন্ধ লেখা হয়ে যাচ্ছে তাতে সমগ্র বাংলা দেশেরই লাভ হচ্ছে। আমি বরাবর আপনার লেখার প্রশংসমান পাঠক। আপনার অক্ষয় ষশ কামনা করি। আপনি বঙ্গসাহিত্যে নূতন অলঙ্কার দান করছেন।

ভবদীয় শুণমুদ্র

চারু বন্দ্যোপাধ্যায়

University of Dacca  
Dacca Hall, Ramna, Dacca  
৪ঠা অক্টোবর, ১৯৩২

পরমপ্রীতিভাজন,

আপনার পত্র পেয়ে আনন্দিত ও গৌরবান্বিত ছুই-ই হয়েছি। কিন্তু আপনারা আমাকে যে-রকম শক্তিমান মনে করেন, তা আমি মোটেই নই। আমি আমার অক্ষমতায় বড় সঙ্কুচিত থাকি। এককালে মনের আনন্দে সাহিত্যচর্চায় মন দিয়েছিলাম। নিজে স্বন্দর সৃষ্টি করতে না পারলেও, যারা স্বন্দর কিছু রচনা করেছেন তাঁদের সমাদর করেছি, মন খুলে তাঁদের অভ্যাস কামনা করেছি। আজ আমার এই আনন্দ জীবনশেষের পাথেয় হয়ে রয়েছে যে, আজ যারা বাংলা সাহিত্য-ক্ষেত্রে যশস্বী গৌরবান্বিত তাঁদের অনেককে আমিই প্রথম অভিনন্দন করেছিলাম। সত্যেন্দ্রনাথের ছন্দসরস্বতী প্রকাশিত হওয়ার পরে আপনার ছন্দ সম্বন্ধে প্রবন্ধগুলি যখন প্রবাসীতে প্রকাশের জন্ত পাই তখন কী আনন্দে যে আমি সেই সংবাদ সত্যেন্দ্রকে বলেছিলাম তা আর কী বলব! সত্যেন্দ্রকে আমি বলেছিলাম যে, তোমার ছন্দ সম্বন্ধে মত অনেক বদলাতে হবে অথবা তোমাকে জবাব দিতে হবে। তাতে সত্যেন্দ্র বলেন যে, আগে সবগুলো ছাপা হোক তারপর দেখব, এখন আমার শরীরটা ভালো নেই। তখন কে জানত যে, তাঁকে কালব্যাপি আক্রমণ করেছে। আমার সঙ্গে ঐ কথা হওয়ার পরেই তিনি কার্বাঙ্কল রোগে শয্যাশায়ী হলেন ও আট দিন পরেই মারা গেলেন। তিনি বেঁচে থাকলে আপনার সমাদর তিনি করতেন। পরে সুনীতিবাবু তাঁর বিখ্যাত পুস্তকে যে আপনার কৃতিত্ব স্বীকার করেছেন তাতে আমি অত্যন্ত আনন্দিত হয়েছি।

...আপনার লেখায় আমি সাহিত্যরস পাই, তাই আমার আপনার লেখা ভালো লাগে। কিন্তু আমি জানি না, অঙ্ক কষায় আপনি কোথাও তুল করেছেন কি না।

...আমি ছন্দশাস্ত্রের কি-ই বা জানি। না আমি কবি, আর না আমি আঙ্গিক। কবিগুরু রবীন্দ্রনাথ আমাকে ভালোবাসেন তাঁর কবিতার রসগ্রাহী

ব'লে, কিন্তু সমালোচনার বিশ্লেষণের শক্তি আমার নেই। আপনার সঙ্গে কবির যে উত্তর-প্রত্যুত্তর হয়েছিল, সেগুলি আমি উপভোগ করেছি।.....

আপনি যেসব শব্দের প্রতিশব্দ চেয়েছেন, সেগুলি কবিগুরুকে পাঠালে তিনি অনায়াসে চমৎকার শব্দ সৃষ্টি করে দিতে পারেন। তাঁর এতে অসাধারণ শক্তি আছে।

...আপনি নিশ্চিন্ত মনে সাহিত্য-সাধনায় ব্যাপৃত থাকুন। আপনার অভ্যুদয় আমি সানন্দে অভ্যর্থনা করেছিলাম, এবং এখনো অনেক কিছু আপনার কাছ থেকে বাংলা ভাষা ও সাহিত্য পাবে এ আশা আমার আছে। ভগবান আপনার মঙ্গল করুন।

\* \* \* \*

আপনার নব নব রচনা পড়বার প্রতীক্ষায় রইলাম। একখানি পুস্তকে সব প্রবন্ধগুলি সংগ্রহ করলে লোকের উপকার হয়। এ অনুরোধ আমি অনেকদিন থেকে করছি। এইবার সব সমাপ্ত কবে বই ছাপুন।

ভবদীয় গুণমুগ্ধ

চারু বন্দ্যোপাধ্যায়

অমূল্যধন

Carmichael College, Rangpur

13. 4. 1932

প্রিয়বরেষু

আপনার অল্পগ্রহলিপি ও প্রবন্ধ পাইলাম। ‘জয়ন্তী-উৎসর্গে’ আপনার প্রবন্ধটি কিছুদিন পূর্বে পাঠ করিয়াছিলাম, তখন হইতেই প্রবন্ধটি সংগ্রহ করার ইচ্ছা ছিল। উপরূত প্রবন্ধটির জন্ত আপনার নিকট কৃতজ্ঞ রইলাম।

বিগত ২৫শে বৈশাখ কবির জন্মতিথি উপলক্ষে যখন বোলপুরে যাই, তখন তাঁহার ছন্দ সম্বন্ধে একটি বিস্তৃত আলোচনা প্রকাশ করার প্রতিশ্রুতি কবিকে দিয়াছিলাম। ‘জয়ন্তী’ উপলক্ষে সেইটি প্রকাশের ইচ্ছা ছিল। কিন্তু কর্মবাহুলা এবং দীর্ঘকালব্যাপী পীড়ার দরুণ আমার প্রবন্ধের কিয়দংশ রচনা করার পর আর অগ্রসর হইতে পারি নাই। বাহা হউক, আপনার প্রবন্ধেই আমার বক্তব্য

অনেক কথা লেখা হইয়াছে, সুতরাং কবির ছন্দ সম্পর্কে উপযুক্ত প্রবন্ধের অভাবে উৎসর্গ-গ্রন্থ অপূর্ণ রহে নাই।

আপনার প্রবন্ধ সম্বন্ধে আমার মতামত বিস্তারিতভাবে লিখিতে গেলে প্রায় একটি অঙ্কুরূপ প্রবন্ধ হইয়া দাঁড়াইবে। বর্তমানে এত সময়মাত্র যে বাংলা প্রবন্ধাদি লেখার কিছুমাত্র অবসর হয়ও না। জীবিকার জন্তু নিত্য ও নৈমিত্তিক কর্মভারে এতদূর প্রপীড়িত থাকি যে, ইচ্ছা সত্ত্বেও “মাতৃকোষে রতনের রাজি”র সন্ধানের সময় পাই না। আগামী গ্রীষ্মাবকাশে যদি আপনার সহিত সাক্ষাতের সুযোগ হয় তবে সকল কথার আলোচনা হইতে পারে। সপ্তাহ দুই পরে বোধ হয় এখান হইতে বাড়ী ( বাশবেড়িয়া পোঃ—জগলী ) যাইব। সে সময় ছন্দ সম্পর্কে আলোচনা করার ইচ্ছা রহিল। আশা করি উপযুক্ত আলোচনার দ্বারা যে যে স্থানে আমাদের মতবৈধ আছে তথায় পরস্পরের সন্দেহভঞ্জন হইয়া যাইবে।

আপনার সহিত সাক্ষাৎ পরিচয় ও আলাপের সৌভাগ্য এ পর্যন্ত হয় নাই। তত্রাচ প্রিয়জনমধ্যে যে আমাকে স্থান দিয়াছেন তজ্জগৎ পুনশ্চ কৃতজ্ঞতা জ্ঞাপন করিতেছি। ইতি

ভবদীয়

শ্রীঅমূল্যধন মুখোপাধ্যায়

## পত্রধারা ২ পরিভাষা-প্রসঙ্গ

১

২৪, চৌরঙ্গী রোড

কলিকাতা-১৩

ইং ১২।৩।৪২

প্রকাশ্যদেয়

আপনার 'ছন্দের পরিভাষা' পড়িয়াছি—খুব আগ্রহের সহিত পড়িয়াছি। পড়িয়া একটি কথাই মনে হইয়াছে, আপনি সত্যই নির্ভার সহিত, এবং সত্যকার জিজ্ঞাসা লইয়া এই বিষয়টি পর্যালোচনা করিতেছেন, আজও আপনি শ্রান্তি বোধ করেন নাই। আমার মনে হয়, এই বস্তুকে আর কেহ এমন ভালবাসে নাই—এই আত্ম-নিষ্কলিতের সহায় হইবে। আপনার গবেষণা ও বিচারপ্রণালী দুই-ই উচ্চাঙ্গের, সে বিষয়ে কিছুমাত্র সন্দেহ নাই। পরিভাষা-নির্মাণের আপনি যে নজির ও যে যুক্তি প্রদর্শন করিয়াছেন, তাহা খণ্ডন করা দুঃসাধ্য। সম্ভবতঃ উহার চেয়ে ভালো কিছু উদ্ভাবন করা যাইবে না। কিন্তু আমার, তৎসঙ্গেও, নামগুলি খুব স্বল্প বলিয়া মনে হয় না, তার কারণ আমার মনোভঙ্গি আরো বৈজ্ঞানিক নয়—আমার 'ছন্দ-বিচার'-পদ্ধতি হইতে তাহা নিশ্চয় বৃদ্ধিতে পারিয়াছেন; অতএব এ বিষয়ে আমার মতামত গ্রাহ্য হইতে পারে না। আপনি সেজ্ঞা কিছুমাত্র ক্ষুণ্ণ হইবেন না। তবে, আপনার ঐ প্রবন্ধটি যে মূল্যবান—কু বুঝিবার মত বুদ্ধি আমার আছে। আমি আমার আপত্তির কারণ কিছু লিখিতে পারিতাম, কিন্তু আমার সে সময় নাই। কিন্তু সে আপত্তি সাহিত্যিক আপত্তি—তাহার কোন বৈজ্ঞানিক মূল্য নাই। আসল কথা, ঐ শব্দগুলির পারিভাষিক প্রয়োগ অপরিহার্য হইলেও—অর্থ অতটা দৃঢ় করিবার দিকে দৃষ্টি না রাখিলে, এবং একটু শিথিলার্থ করিয়া দোষ্টবের বুদ্ধি করিলে ভালো হইত। কিন্তু সেগুলির পারিভাষিক প্রয়োগ যাহাতে দোষশূন্য হয়, আপনি সেই দিকে যেরূপ সাবধান হইয়াছেন, হয় তো তাহাই আরো যুক্তিযুক্ত। তবু আমার মনে হয়, পরিভাষা সৃষ্টিতেও ভাষার একটু পরিচিত রূপ রক্ষা করিতে পারিলে কাজটি অতিশয় সুলভ হয়, কিন্তু উহা আমার ব্যক্তিগত পছন্দের কথা। আর যেসকল বিষয়ে

মতভেদ আছে, তাহা থাকিবেই—তাহার কারণ দৃষ্টিভঙ্গির পার্থক্য। মোটের উপর আপনার এই গবেষণা যে মূল্যবান হইয়াছে, তাহা স্বীকার করি।

প্রীতিমুখ্য

শ্রীমোহিতলাল মজুমদার

এই চিঠিখানি ‘মোহিতলালের পত্রগুচ্ছ’ গ্রন্থে (১৩৭৬ আশ্বিন) সংকলিত হয় নি। যথাসময়ে এটির সম্বন্ধান পাওয়া যায় নি। দ্রষ্টব্য উক্ত গ্রন্থের ভবতোষ দস্ত-লিখিত ভূমিকা, পৃ ৪২। এখানে এটির প্রাসঙ্গিক অংশটুকু মাত্র মুদ্রিত হল।

৭২, বহুলবাগান রোড, কলিকাতা

১৮-২-৪২

প্রকাশ্যদেষু

আপনার ২৫ মার্চের পত্র ও ‘ছন্দপরিভাষা’ যথাসময়ে পেয়েছি উত্তর দিতে দেবী হল, মার্জনা করবেন। এই প্রবন্ধ ‘পূর্বাশা’ পত্রিকায় পূর্বেই পড়েছি। আমাকে যে কপি পাঠিয়েছেন তা দুর্গামোহন ভট্টাচার্য মহাশয়কে দিয়েছি। তিনি সম্প্রতি নূতন বাড়িতে গেছেন, ঠিকানা জেনে নিতে ভুলে গেছি; এবারে দেখা হলে জেনে নেব। আপনার নূতন পরিভাষা মোটের উপর ভালই মনে হল।

বিনীত

রাজশেখর বসু

৩

প্রেসিডেন্সি কলেজ

২৭-১১-৪৫

বিদগ্ধবরেষু

আপনার চিঠি ও ‘ছন্দপরিভাষা’ পেলাম। আপনার প্রীতি ও পাণ্ডিত্যের এই ছুটি নিদর্শন স্বতই আমাকে মুগ্ধ করেছে।

আমাদের অধ্যাপনার প্রথম পর্ব থেকেই আপনার জ্ঞান-গবেষণার খ্যাতিয় নকে সৌভাগ্যক্রমে আমার পরিচয় ঘটেছে। ছন্দোব্যাখ্যাতা রূপে আপনি শুধু



ছান্দলিকদিগের নহে, কাব্যরসিক ও অধ্যাপককর্মীরও আচার্যস্থানীয়।  
ছন্দোধ্যাত্যানে আপনি পথিকৃৎ, এতে সন্দেহ নেই।

শুশুমু  
জনার্দন চক্রবর্তী

৪

Ashutosh Building  
Calcutta-7  
৭ ৩/৪২

প্রিয়বরেষু

আপনার প্রবন্ধের অফ্‌প্রিন্ট দুখানি পেয়েছি। বেশ হয়েছে। ছন্দের  
পরিভাষা বেঁধে দিতে আপনার উদ্যোগ সময়োপযোগী হয়েছে। আমি আপনার  
দৃগ্‌ভঙ্গি সঙ্গর্গন করি। এ বিষয়ে আমার যৎসামান্য বক্তব্য পরে জানানো।  
আপাতত একটু ব্যস্ত আছি।

আশা করি আপনাদের সব কুশল।

আপনার  
স্বকুমার সেন

98/4, : ussa Road,  
Calcutta-20  
8. 2. 49.

শ্রদ্ধাঙ্গদেষু

আপনার 'ছন্দ-পরিভাষা' ভাল করিয়া পড়িলাম। আমার নিকট নিশ্চয়ই  
কোন জজের মত আশা করেন না ; এ-বিষয়ে আমার 'জুরি'র মত দিতেছি।

মোটামুটি আপনার পরিভাষা আমার ভালই লাগিল। শুধু দু-এক জায়গায়  
দু-একটা কথা মনে হইয়াছে। তাহা অবশ্য অতি অকিঞ্চিৎকর, তথাপি  
লিখিতেছি।

১। দ্বল—'একপ্রযত্নোচ্চারিত শব্দাংশের নাম দ্বল'। ইহা কি কোন প্রাচীন

সংস্কৃত গ্রন্থ হইতে উদ্ধৃত সংজ্ঞা? যদি তাহা হয় তবেই ভাল হয়। নতুবা বাংলায় দল শব্দটি অংশার্থ অপেক্ষা সমূহার্থই গ্রহণ করে বেশী, সুতরাং বাংলায় সাধারণতঃ ‘শব্দদল’ শব্দের অংশ না বুঝাইয়া শব্দের সমূহও বুঝাইতে পারে। অবশ্য পারিভাষিক অর্থে চালু হইয়া গেলে বোধ হয় এই দ্ব্যর্থতার গোলমাল নাও থাকিতে পারে।

২। আশ্রিত স্বরের চিহ্ন ‘্’ না করিয়া অণু কিছু করিলে ভাল হয়। ‘্’-এর হস্চিহ্ন বুঝাইবার প্রসিদ্ধি খুব বেশী, অতএব গোলমাল এড়াইয়া চলাই বোধ হয় ভাল।

৩। Accent-এর অর্থ ‘প্রাঙ্গণ’ করিয়াছেন। ‘প্র’ উপসর্গের ভিতরে এখানে একটা superiority-র অর্থ আছে, আপনি ইংরেজি নজীর দ্বারা এই superiority বা প্রাঙ্গণতার অর্থকেই সমর্থন করিয়াছেন। কিন্তু stress accent-এর ক্ষেত্রে একটি বিশেষ স্বরের যে ‘বল-জনিত’ প্রাধান্য তাহা কি সর্বত্র তাহার প্রাঙ্গণতারও পরিচায়ক? অর্থাৎ বলের দ্বারাই necessarily qualitative superiority লাভ হয় কি না?

৪। ‘জটিল কলামাত্রিক’ নামটি আমার ভাল লাগে নাই। ‘জটিলতা’ কোন বস্তুর স্বরূপ লক্ষণ নহে; সুতরাং সংজ্ঞানির্দেশের ক্ষেত্রে শুধু ‘জটিল’ বলিয়া ছাড়িয়া দেওয়া উচিত মনে হয় নাই। উহার স্বরূপ-লক্ষণ-জ্ঞাপক অণু কোন শব্দ দিতে পারিলে ভাল হয়।

৫। পূর্ণিমা চন্দ্রের ॥ জ্যোৎস্না ধারায়

সাক্ষ্য বসুন্ধরা ॥ তন্দ্রা হারায়।

ইহাকে ‘সরল কলামাত্রিক পয়ার’ বলিয়াছেন। উপরের পংক্তি দুটিকে যদি সামান্য একটু বদল করিয়া দি—

পূর্ণিমা চন্দ্রের ॥ জ্যোৎস্নাধারা

সাক্ষ্য বসুন্ধরা ॥ তন্দ্রাহারা।

ইহাতে চন্দ্রের pattern-টি কি একেবারে বদলিয়া যাইবে? যদি একেবারে না বদলায়, তবে ইহার নাম কি দিবেন?

জুরির মতামতে হয়ত হাসিবেন; তবু গুরুগম্ভীরভাবেই লিখিলাম।

আপনাদের

শশিভূষণ দাশগুপ্ত

**মন্তব্য—১।** পরিভাষা রচনার সময় আমি সর্বদাই তার প্রাদেশিকতার চেয়ে ভারতীয়তার দিকেই বেশি নজর রাখি। অর্থাৎ সর্বভারতে একই পরিভাষা প্রচলিত হওয়া কাম্য মনে করি। তাই যথাসম্ভব সংস্কৃত ভাষার আশ্রয় নিতে হয়। সংস্কৃতে ‘দল’ শব্দে অংশ বা খণ্ড বোঝায়, সমূহ বোঝায় না। বাংলাতেও দল শব্দের মূল বা আসল অর্থ খণ্ড। ‘দল’ শব্দেই তা স্পষ্ট। ডেলা, টেলা ও ঢিল শব্দ দল বা দলা শব্দের রূপান্তর কিনা তা বলার অধিকার আমার নেই। যদি তা হয় তবে এগুলির দ্বারাও দল শব্দের মৌলিক খণ্ডার্থই সূচিত হয়। দল শব্দের সমূহার্থ এসেছে পরোক্ষে, এ শব্দটির অর্থান্তর প্রাপ্তির ফলে।

২। আশ্রিত স্বর ও আশ্রিত ব্যঞ্জনের জন্ত দু-রকম চিহ্ন ব্যবহারেই বেশি বিভ্রান্তির আশঙ্কা। রবীন্দ্রনাথ ও সত্যেন্দ্রনাথ উভয়েই আশ্রিত স্বর ও আশ্রিত ব্যঞ্জনকে একই পর্যায়ভুক্ত করতেন।

৩। ‘প্রস্বর’ শব্দটি শুধু ইংবেজির নজিরে রচিত নয়। এ শব্দের দ্বারা সব ভাষার সব রকম accent-ই বোঝানো যায়। প্রকর্ষ বা superiority শব্দ এখানে ধ্বনির গুণবোধক অর্থাৎ quality-বোধক নয়, বিশিষ্টতাবোধক মাত্র।

৪। ব্যাকরণের ইংরেজি complex sentence-কে বাংলায় বলা হয় ‘জটিল বাক্য’ তাতে কাবও আপত্তি হ’ না। সে নজিরেই ‘জটিল কলামাত্রিক’ নাম বচিত হয়েছিল। কিন্তু দেখা গেল তাতে পাঠকের মনে হয়েছে ‘জটিল’ মানে ‘গোলমালে’। তাই এ নামটি পরিত্যক্ত হয়েছে। এখন বলি ‘মিশ্র কলারবৃত্ত’, সংক্ষেপে ‘মিশ্রবৃত্ত’ (composite)। তাতে বিভ্রান্তি ঘটেছে বলে শুনি নি।

৫। দুটি দৃষ্টান্তই ‘বলারবৃত্ত পয়ার’। প্রথমটি পূর্ণ, দ্বিতীয়টি অপূর্ণ। রবীন্দ্রনাথও তাই মনে করতেন।

৬

‘বাসন্তী’

রবীন্দ্রনাথ ঠাকুর রোড, কৃষ্ণনগর, নদীয়া

২২ মার্চ, ১৯৪৯

শ্রীচরণেশু

আপনার প্রবন্ধটি ভালো করে পড়লাম। প্রবন্ধটি পড়বার আগে কলকাতায় কোনো অধ্যাপকের কাছে এর সপ্রশংস উল্লেখ শুনেছিলাম। তিনি আপনার

বৈজ্ঞানিক বিশ্লেষণ-নিষ্ঠা এবং স্বচ্ছতার উচ্চসিত প্রশংসা করেছিলেন। আপনার প্রেরিত প্রবন্ধটি পড়ে তাঁর অসুস্থ উপস্থিতির কারণ বুঝলাম। বাংলা ছন্দকে এমন স্থানীয়মিত বিশ্লেষণ আর কেউ যথার্থভাবে করতে পেরেছেন কিনা সন্দেহ। আপনার ‘ছন্দোগুরু’ বইখানা পড়ে আমার এই ধারণা জন্মে। সঙ্গী হিসাবে আমি যে কয়খানা বই এখানে এনেছি, ও বইখানা তার অন্ততম। এই প্রবন্ধে আপনার মত যা ব্যক্ত হয়েছে, ছন্দোগুরুতে ব্যক্ত মত থেকে তার বৈলক্ষণ্য মৌলিক নয়। প্রবন্ধটি পড়বার সময় আমি এই জন্ত ভালো করে বুঝে নেবার জন্ত বইখানাও পাশাপাশি মিলিয়ে গেছি। মৌলিক ছন্দ-তত্ত্ব সন্দেহে আমার বলবার কিছু নেই। কেবল নূতন পরিভাষা সম্পর্কে আমার কয়েকটি কথা মনে হয়েছে, সসঙ্কে তাই আপনাকে জানাব। আমার বোঝবার তুল হওয়া কিছুমাত্র অসম্ভব নয়। সেক্ষেত্রে আমার বাচালতার জন্তে প্রথমেই আপনার ক্ষমা চেয়ে রাখি।

প্রথমত, ‘অক্ষর’ শব্দটি। আপনি বলেছেন, অক্ষর মানে সিলেব্ল হতে পারে না। “প্রাচীন শাস্ত্রকারেরা অক্ষর ও বর্ণ উভয়কেই শব্দাংশ অর্থে ব্যবহার করেছেন, কিন্তু একটু তলিয়ে দেখলেই বোঝা যাবে এই শব্দাংশ ঠিক সিলেব্ল নয়।”

কিন্তু ছান্দসিক যখন বলেন, সংযোগপূর্ব বর্ণ গুরু, স্তত্রাং দ্বিমাত্রা হবে তখন তাঁরা কি বর্ণকে শব্দাংশ অর্থে ব্যবহার করেন? তাঁদের মতে সংস্কৃত ছন্দোবৃত্তিতে ‘ধর্মক্ষেত্রে’ এই শব্দটিতে সংযোগপূর্ব বর্ণ ‘ধ’ দুইমাত্রা এবং ‘র্ম’ একমাত্রা। আমার মনে হয় এক্ষেত্রে যদি তাঁরা শুধু একক ‘ধ’-কেই বর্ণ ( = শব্দাংশ ) বলে ধরতেন, তাহলে নিশ্চয়ই এর দ্বৈমাত্রক মূল্য নির্ধারণ করতেন না। আসলে ‘সংযোগপূর্বঃ বর্ণঃ’ বলতে তাঁরা ধর্ম শব্দের ‘ধর্’ সিলেব্ল কিংবা ছন্দ শব্দের ‘ছন্’ সিলেব্ল, কশ্চিৎ শব্দের ‘কশ্’ সিলেব্ল প্রভৃতি বুঝছেন। শ্রুতবোধ থেকে উদ্ধৃত শ্লোকেও ‘সংযুক্তাত্মং অক্ষরং গুরু’ বলতেও শাস্ত্রকার অক্ষর মানে সিলেব্ল ধরছেন। অবশ্য শ্রীযুক্ত রাজশেখর বহুর প্রবন্ধ আমার পড়া নেই। বাংলায় ‘অক্ষর’ শব্দটির অর্থ-বিজ্ঞাটের জন্ত আপনাকে যে আপত্তি উত্থাপিত করেছেন, তা আমার যুক্তিযুক্তই মনে হয়। তবে আধুনিক কালে কেউ কেউ অক্ষরকে যে সিলেব্ল অর্থে ব্যবহার করেছেন তার একটা ঐতিহ্য পাওয়া যায়, যদি ওপরে আমি যা বললাম তাতে তুল না হয়।

আধুনিক বাংলায় সিলেবলের প্রতিশব্দ ‘অক্ষর’ যদি বাদ দিতে হয়, তবে ব্যবহারোপযোগী ( handy ) বলে ‘দল’ শব্দটি সুন্দর। শব্দটি ছোটো, শুনতেও ভালো। এর সম্বন্ধে আপত্তি শুধু এই হতে পারে : শব্দটি direct নয়। এটার ব্যবহার হচ্ছে রূপকার্থে ( figurative )। এবং সেজন্য দল শব্দটিতে এ বস্তুটার যথার্থ বৈশিষ্ট্য পাওয়া শক্ত। এটা যে সত্যোক্ত্যনাথের ‘পাপড়ি’ শব্দেরই সাধুরূপ তাও স্বরণীয়। স্বরবৃত্ত বলার চাইতে দলবৃত্ত বা দলমাত্রিক বলায় স্বধর্ম অধিকন্তর প্রকাশিত হয় বলে মনে হয় না। এই প্রসঙ্গে বলে দেওয়া প্রয়োজন যে, ‘ধ্বনি’ শব্দে আপনার যে আপত্তি সেটাও অযথার্থ নয়।

ছন্দোবিভাগে আপনি কলা ও মাত্রার যে স্বল্প প্রভেদ নির্ণয় করেছেন, সেটা বিশেষ কার্যকরী হবে বলে মনে হয়। যৌগিক ছন্দে আপনি কলাগণনার বিশিষ্ট প্রণালীটি দেখিয়েছেন—শব্দের আদি বা মধ্যবর্তী রুদ্ধদল এককলা এবং প্রান্তবর্তী রুদ্ধদল দুই কলা। যৌগিক এবং কলাবৃত্ত ( মাত্রাবৃত্ত ) ছন্দে রুদ্ধদলের কলাগণনার বেলক্ষণ্যাহেতু আপনার এই উক্তি অতিশয় যথার্থ : বাংলা ছন্দে রীতিভেদে মাত্রা বিভিন্ন হয়। এই জন্য mora অর্থে ‘কলা’ এবং unit অর্থে ‘মাত্রা’ ব্যবহারের প্রয়োজনীয়তা অবগতস্বীকার্য।

সাধারণভাবে বলব, আপনার পরিভাষা রচনা বিস্ময়কররূপে সুন্দর ও সুস্থ হয়েছে। যা উপরে বললাম, তাতে আমার বোঝবার ভুল হওয়া খুবই স্বাভাবিক। সেজন্য আমি আবার আপনার মার্জনা ভিক্ষা করি।

ভবতোষ দত্ত

অক্ষর ও দল শব্দের পারিভাষিক যোগ্যতা সম্পর্কে বিশদ আলোচনা করা হয়েছে ‘পরিভাষা-পরিচয়’ বিভাগের ‘অনুসঙ্গ’ অংশে। এখানে মন্তব্য নিম্নপ্রয়োজন। তবে বলা উচিত যে, ‘দল’ শব্দের ধাতুগত অর্থ খণ্ড। তাই ‘দল’ শব্দকে তার মৌলিক অর্থেই syllable-এর প্রতিশব্দ হিসাবে গ্রহণ করা সমীচীন, রূপকার্থে ( অর্থাৎ পাপড়ি বা পাতা অর্থে ) নয়।

## বাঙ্গলার ছন্দ ও তাল

( দশম বঙ্গীয় সাহিত্য-সম্মিলনে পঠিত )

কর্ণ ও মনকে পরিতৃপ্ত করিবার জন্ত পরিমিত বর্ণ যোজনায় নাম ছন্দ । লৌকিক সংস্কৃতে দুই জাতীয় ছন্দ আছে, বৃত্ত ও মাত্রাবৃত্ত । বৃত্তছন্দে প্রতি চরণে একটা নির্দিষ্ট সংখ্যক স্বর থাকে এবং মাত্রাবৃত্ত ছন্দে গুরুস্বরকে দুই মাত্রা ও লঘু-স্বরকে এক মাত্রা ধরিয়া প্রতি চরণে সমসংখ্যক মাত্রা থাকে । ইহাতে স্বরের সংখ্যা অসমান হইতে পারে কিন্তু বৃত্তছন্দে সাধারণতঃ স্বরসংখ্যা ও মাত্রা উভয়ই প্রতি চরণে সমান থাকে ।

বাঙ্গলায় এখন তিন প্রকারের ছন্দ চলিয়াছে । প্রথম—অক্ষর গণনা করিয়া অর্থাৎ স্বরের উচ্চারণ হউক আর নাই হউক মোট অক্ষর প্রতি চরণে সমান থাকা চাই যথা—পয়ার, পূর্বের ত্রিপদী চতুষ্পদী প্রভৃতি । ২য় প্রকার—মাত্রা গণনা করিয়া । বাঙ্গলার মাত্রা গণনায় সংস্কৃতের সহিত কিঞ্চিৎ পার্থক্য আছে, বাঙ্গলায় আ দীর্ঘ ঙ দীর্ঘ উ এ ও, এই পাঁচ স্বরকে এক মাত্রা গণনা করা হয়, সংস্কৃতে এগুলি দুই মাত্রা । বাঙ্গলায় ঐ ও যুক্ত স্বর বলিয়া দুই মাত্রা এবং সংস্কৃতের ন্যায় বিসর্গ অহস্বার ও যুক্তাক্ষরের পূর্ব বর্ণ দুই মাত্রা গণনা করা হয়, আর একপ্রকার ছন্দ খনার বচন, ছেলে ভুলান ছড়া, মেয়েলী ছড়ায় আবদ্ধ হইল । ব্যঙ্গ কবিতায় স্বর্গীয় রাজকৃষ্ণ রায় এবং স্বর্গীয় কবি হেমচন্দ্র এই ছন্দ ব্যবহার করিয়াছিলেন । এখন কবির স্মার রবীন্দ্রনাথ ও বিজয়চন্দ্র প্রভৃতি অনেকেই উচ্চাঙ্গের কবিতায় ইহার ব্যবহার করিতেছেন ।

প্রথম প্রকার ছন্দের ‘অক্ষরমাত্রিক’ ২য় প্রকারের ‘মাত্রাবৃত্ত’ এবং ৩য় প্রকারের ‘স্বরমাত্রিক’ বা ‘ছড়ার ছন্দ’ নাম দেওয়া যাইতে পারে । ছন্দের মাত্রা ও তালের মাত্রা একই জাতীয়, কারণ কতকগুলি মাত্রার সমষ্টিকেই তাল বলে । সমপরিমিত সময়ে স্বরসহযোগে পদ্য আবৃত্তি করিলেই গীত হয়, আর সমপরিমিত সময়ে এক এক মাত্রা কবিতা আবৃত্তি করিলেই ছন্দোবদ্ধ পদ্য হয় ।

যে সকল তালে এক এক পদে সমান মাত্রা থাকে, সাধারণ লোকে সে সকল তাল বা তাহার অল্পরূপ তাল সহজেই বুঝিতে পারে ; যেহেতু মানুষ সমপরিমিত সময়ে সমসংখ্যক অঙ্গ সঞ্চালন করিতেই স্বভাবতঃ আনন্দ অহুভব করে ।

একাধিক লোকে একত্র কার্য করিতে গেলেই এইরূপ তালের দিকে দৃষ্টি রাখিয়া কার্য না করিলে তাহা স্বাভাবিকভাবে হইতে পারে না। নূতন ঘরের ছাদ পিটিতে মজুরেরা একসঙ্গে পিটনা পিটায়, তাহারও একটা তাল আছে। সৈনিকেরা কুচকাওয়াজ করে একটা তালের দিকে মন রাখিয়া। একটা বৃহৎ দ্রব্য উঠাইতে বা ঠেলিতে হইলে যখন বহু মজুরে একসঙ্গে বলিয়া ওঠে ‘মার ঠালা হাঁইয়ো’, আর কথার শেষে একত্র বল প্রয়োগ করে। পাঙ্কীবাহকেরাও তালে তালে পদক্ষেপ করে আর সঙ্গে সঙ্গে কতকগুলি দ্রবোধ শব্দ আবৃত্তি করে। এই সকল স্থলেই মাত্রার ব্যবহার আছে।

সংস্কৃতে সাধারণতঃ দুই বা চারি পাদে এক চরণ ও দুই চরণে এক শ্লোক হয়। বাঙ্গলার পয়ার, ত্রিপদী, চতুষ্পদী প্রভৃতিতেও চারি পাদ ও দুই চরণ আছে। পয়ারের প্রথম আট অক্ষরের পরে যতি, সেই পর্যন্ত প্রথম পাদ তৎপরে ৬ অক্ষরে ২য় পাদ। গাঁহার সুর করিয়া রামায়ণ পাঠ করিয়াছেন তাঁহারাই জানেন এই ৬ অক্ষরের পদে দুই অক্ষর-কাল সুরটা টানিয়া রাখিতে হয়। এইরূপে চার পাদেই সম সময়ে পঠিত হয়। মধ্যযুগে যেমন অক্ষরের বাঁধাবাধি হইয়াছিল প্রথমে পয়ারের অক্ষর সম্বন্ধে সেরূপ নিয়ম ছিল না। ৮ মাত্রা ও ৬ মাত্রা কালের মধ্যে যতগুলি অক্ষর উচ্চারণ করা যাইত তাহাই পয়ারের অন্তর্গত হইত। পরিষদ গ্রন্থাবলীর উত্তরকাণ্ড রামায়ণে দেখিতে পাই—

মনের সুখে সুখী রেণুকা পুত্রে দিল বর।

সূর্য সমান তেজ হৈছে তোমার কলেবর ॥

কৃত্তিবাস, ১৭, উত্তরকাণ্ড

ইহাতে উভয় চরণেই ১৬ অক্ষর আছে। অথচ ইহা খাটি পয়ার। স্বরমাত্রিক ছড়ার ছন্দে ইহার অগ্র উদাহরণ পাওয়া যায়।

ত্রিপদীতে প্রথম দুই পাদে সমান সমান অক্ষর থাকে, তৃতীয় পাদে তাহা অপেক্ষা কিছু অধিক থাকে। যথা লঘুত্রিপদীতে ৬+৬+৮ অক্ষর ও দীর্ঘ ত্রিপদীতে সাধারণতঃ ৮+৮+১০ অক্ষর থাকে। লঘু বা দীর্ঘ ত্রিপদীর তৃতীয় পাদের প্রথম ৬ বা ৮ অক্ষরকে তৃতীয় পাদ ধরিলেই অবশিষ্ট দুইটি অক্ষরকে টানিয়া লইয়া ৪র্থ পাদ করিলেই চলে, সুতরাং ত্রিপদী ও চতুষ্পদীতে মাত্রাগত ভেদ নাই; ভেদ মিলের। চতুষ্পদীতে তিন পাদেই মিল থাকে, ত্রিপদীতে প্রথম দুই পাদে মিল থাকে। আবার পয়ারের প্রথম ৮ অক্ষর যদি ৪ অক্ষর

৪ অক্ষর করিয়া ভাগ করা থাকে তবে তাহাকে ত্রিপদীয় সদৃশ গঠন বলা যায়।  
ইহার প্রথম দুই পাদে মিল থাকিলে নাম ত্বরল পয়ার যথা—

দেখ বিজ, মনসিজ, জিনিয়া মুরতি ।

পদ্মপত্র, সমনেত্র, পরশয়ে শ্রুতি ॥

—কাশীরাম দাস, মহাভারত

প্রথম ও দ্বিতীয় পাদে মিল না থাকিলে কবি হেমচন্দ্র সেরূপ ছন্দের নাম দিয়াছেন ত্রিপদী পয়ার যথা—

মহাদেব মহাবেশ ক্ষণকালে ধরিল

ভীমরূপ ব্যোমকেশ পরকাশ করিল ।

—হেমচন্দ্র, দশমহাবিছা, শিবকর্তৃক সৃষ্টি-আচ্ছাদন অপসারিত

প্রথম পাদে ৮ অক্ষর ও ২য় পাদে ৭ অক্ষর থাকিলে কেহ কেহ তাহাকে মালতী ছন্দ বলেন। কবি হেমচন্দ্র সেরূপ ছন্দকে লঘু ভঙ্গ পয়ার ও ললিত পয়ার উভয়ই বলিয়াছেন।

পয়ারের ৪ পাদে দুই চরণ ধরিলে সংস্কৃত অনুষ্টুভ ছন্দের সহিত ইহার সম্পূর্ণ সাদৃশ্য দেখা যায়। বৃত্ত ছন্দের প্রায় সকলগুলিতেই স্বর ও মাত্রা নির্দিষ্ট থাকে কিন্তু অনুষ্টুভে স্বর অর্থাৎ বাঙ্গলার অক্ষর নির্দিষ্ট আছে কিন্তু মাত্রা ঠিক নাই অথচ মানবের প্রকৃতিই এই যে, সে সম সময়ে এক এক পাদ উচ্চারণ করিবে অর্থাৎ মোট মাত্রা বা তালটা ঠিক থাকিবে। সুতরাং একটা নির্দিষ্ট সময়ে অধিক মাত্রার ও অল্প মাত্রার পাদ উচ্চারণ করিতে গেলেই হ্রস্বদীর্ঘ ভেদ উঠিয়া যায়। যথা,—শারদি বিমলাকাশে, চন্দ্র নক্ষত্র ভূষণৈঃ—একটি অনুষ্টুভের দুই পাদ। ইহার প্রথম পাদে ১১ মাত্রা কিন্তু ২য় পাদে ১৩ মাত্রা। হ্রস্বদীর্ঘ ভেদ উঠিয়া গেলে আর বাঙ্গলার পয়ারের শেষে দুই মাত্রাকাল টান রাখিতে হয়, ইহা মনে রাখিলেই বুঝা যাইবে যে অনুষ্টুভ হইতেই পয়ারের জন্ম।

এইবার পয়ারের সহিত তালের সম্বন্ধ নির্ণয় করিব। বাঙ্গলার পয়ার যখন প্রথম রচিত হয়, তখন গানের জন্তাই রচিত হইত একথা বলা বাহুল্য। সুতরাং মাত্রার দিকে লক্ষ্য রাখিয়া অর্থাৎ তাল মনে রাখিয়া রচয়িতা পয়ার লিখিতেন। তৎকাল যে অক্ষর বেশী কম হইবে ইহা পূর্বেই উল্লিখিত হইয়াছে।

সাধারণ তালের মধ্যে ৩ ও ৪ মাত্রার তালই অধিক। একতালী, খেমটা, আড়খেমটা, দাদরা, কাশ্মীর খেমটা প্রভৃতি ৩ মাত্রার তাল এবং কাওয়ালী,



তেতালা, ঠুংরি, ছেপ্কা প্রভৃতি ৪ মাত্রার তাল। প্রতি তালেই ২টি বা ৪টি পাদ থাকে। এই এক পাদের মধ্যে ৩টি সমান সময়সূচক আঘাত করিলেই ত্রিমাত্রিক তালের তাল থাকিবে। আর ঐ সময়ে ৪টি আঘাত করিলে চতুর্মাত্রিক তালের তাল থাকিবে। পর্যায়ে ১৪ অক্ষর ও দুই মাত্রা-কাল টান থাকে বলিয়া ১৬ মাত্রা আব কাওয়ালীর প্রতি পাদে ৪ মাত্রা করিয়া মোট ১৬ মাত্রা। সুতরাং পয়ারকে চতুর্মাত্রিক কাওয়ালীর তালের ছন্দ বলা চলে।

সুতরাং যে সকল ছন্দের প্রতি পাদে ৮ অক্ষর থাকে তাহাই পয়ারের স্তায় কাওয়ালী তালের ছন্দ। নিম্নলিখিত বিভিন্ন ছন্দ ইহার অন্তর্গত।

(১) সাধারণ পয়াব, তরল পয়ার, মালতী ছন্দ, লঘুভঙ্গ পয়ার।

(২) দীর্ঘ ত্রিপদী—

ভাকিতে জীবন গেল,

শক্তি ফুরায়ে এল

ভক্তি পড়িয়া বল পিছে।

—বঙ্কিমচন্দ্র মিত্র আকিঞ্চন, মর্মগীতি

তেমনি কি আসে উবা,

সে সোনালী সুখমায়

সাজায়ে শ্রামল দেহ শরতের।

—বিক্রমচন্দ্র মজুমদার, হৈয়ালি, সঙ্কট

আনন্দে হৃদয় ভরি

দেব ঋষি বীণা গরি

তারে তারে মিলাইয়া ঝঙ্কার তুলিল।

—হেমচন্দ্র, ৪শমহাবিভা

এই তিনটি দীর্ঘ ত্রিপদীর মধ্যে প্রথমটির শেষে ১০, ২য়টির শেষে ১২ এবং ৩য়টির শেষে ১৪ অক্ষর আছে। কিন্তু তালের ব্যত্যয় হইবে না কারণ যাহাতে অক্ষর কম তাহাতে টান দিয়া অভাব পূরণ করিতে হইবে।

(৩) চতুস্পদী—

তরিবারে পরিণাম,

হব জপে হরিনাম,

হরি ভক্তি পূর্ণকাম, কমলজ রে।

এখানে ত্রিপদী ও চতুস্পদীর মধ্যে প্রভেদ কেবল মিলের, মাত্রার নহে।

(৪) ষোড়শাঙ্করা বৃন্তি পয়ার—

ভাল করে বুঝিলি নে,      হল তোমি পরাজয়,  
কি আর ভাবিতেছিস্      জয়মাণ হা হৃদয় ।

—রবীন্দ্রনাথ, সন্ধ্যাসঙ্গীত, পরাজয়সঙ্গীত

(৫) কুসুম মালিকা ছন্দ—

যথা, দুখী দেখে দ্রবীণ প্রবীণ চিত হয়,  
যথা, হরষিত তুষিত স্তম্ভীত পেয়ে পয় ।

এই ছন্দের শেষের টানের স্থানে প্রথম দুই অক্ষর পঠিত হইবে। এই উভয় ছন্দেই তালে বিশ্রামের স্থান নাই।

(৬) একাদশাক্ষরা বৃত্তি—

গগনে গরজে মেঘ, ঘন বরষা  
কূলে একা বসে আছি, নাহি ভরসা ।

—রবীন্দ্রনাথ, সোনার তরী, সোনার তরী

মাত্রাবৃত্ত ছন্দের ও স্বরমাত্রিক বা ছড়ার ছন্দের যে সকল উদাহরণ ইহার অন্তর্গত তাহা পরে প্রদত্ত হইবে। এইবার ত্রিমাত্রিক তালের ছন্দের বিষয় বলিব। সাধারণতঃ ইহার এক এক পাদে ৩-এর দ্বিগুণ ছটি করিয়া মাত্রা থাকে। নিম্নে ছন্দগুলির নাম প্রদত্ত হইল,—

(১) লঘু ত্রিপদী—

নবীনে হেরিয়া,      ফিরে চেয়ে চেয়ে  
অতীতে মিলিতে চায় ।

—হেমচন্দ্র, বিবিধ কবিতা, নববর্ষ

সুখ দুঃখ ফেলে,      আপনাকে ফেলে  
তোমার সকাশে আসিব ।

হিরণ বরণ      তরুণ অরুণ  
কিরণ তরুর মধুর গায় ।

—বসন্তকুমার চট্টোপাধ্যায়, মঙ্গিরা, বাণীর প্রতি

ইহার প্রথমটির ৩য় পাদে ৮, দ্বিতীয়ে ৯ এবং তৃতীয়ে ১১টি অক্ষর আছে। এই

—হেমচন্দ্র, বীরবাহু

—হেমচন্দ্র

—**दाशरथि राम**

এখানে ৩য় পাদের ‘মোরে হর’ এই ৪টি অক্ষর আছে। বর্তমান বাঙ্গলার মাত্রাবৃত্ত ছন্দের কথা বলিবার পূর্বে বাঙ্গলায় সংস্কৃত ছন্দের কথা বলিব। ভারতচন্দ্রই সর্বপ্রথমে এ পথের পথিক। ঝাঁকিপুরের স্বর্গীয় কবি বলদেব পালিত মহাশয় তাঁহার ১২৭২ সালে মুদ্রিত ভর্তৃহরি কাব্যের ভূমিকায় লিখিয়াছিলেন, ‘ভারতচন্দ্র অসাধারণ রচনাশক্তি সত্ত্বেও কেবল ভূজঙ্গপ্রয়াত, তুণক, তোটক, পঙ্কঝটিকা, গীতিকা, পঞ্চচামর প্রভৃতি কতিপয় সামান্য অত্যাংকুষ্ট ছন্দ লিখিয়াই নিশ্চিত [ নিশ্চিত ? ] রহিলেন।...বঙ্গভাষায় আদিকবির ( বিদ্যাপতি, চণ্ডীদাস, গোবিন্দদাস ইত্যাদি ) সংস্কৃত ছন্দে লিখিবার চেষ্টা করিয়াছিলেন। কিন্তু দুর্ভাগ্যবশতঃ তাঁহারা পূর্বতন মহাকবিদের মনোনীত ছন্দ সমুদায় আয়াসজনক বোধে, হিন্দি ভাষার সরল ও সহজ প্রণালী অবলম্বন করিয়া কিংবা কবির জয়দেবের মধুর কান্ত পদাবলীর অনুকরণে প্রবৃত্ত হইয়া পঙ্কঝটিকা প্রভৃতি কতকগুলি মাত্রাবৃত্ত মাত্র লিখিয়া গিয়াছেন। তথাপি যদি তাঁহাদের পশ্চাদবর্তী করিয়া সেই সকল মাত্রাবৃত্তও জীবিত রাখিতেন, তাহা হইলেও বাঙ্গলা কবিতার যথেষ্ট উপকার হইত সন্দেহ নাই।

জয়দেব ও বিদ্যাপতি প্রায় সমসাময়িক। জয়দেব [ জয়দেবের ? ] সমস্ত গীতগুলিই মাত্রাবৃত্ত ছন্দে রচিত। ইহাতে প্রধানতঃ পঙ্কঝটিকা ও মাত্রাবৃত্ত ত্রিপদী ব্যবহৃত হইয়াছে। ইহাতে যতি, রূপক, একতালী—সে কালের এই ত্রিবিধ তাল থাকিলেও আধুনিক চতুর্মাত্রিক কাওয়ালী তালেই মিলিয়া যায়।

পঙ্কঝটিকার উদাহরণ—

নয়ননলিনমিব, বিদলিত নালম্।

—জয়দেব, গীতগোবিন্দ, গীত ২।৪

ইহার সহিত বিদ্যাপতির—শৈশব যৌবন, দুহুঁ মিলি গেল—তুলিত হইতে পারে। তবে দুহুদীর্ঘ উদাহরণে বিশেষ পার্থক্য আছে—জয়দেব সংস্কৃতে গীত রচনা করিয়াছেন তিনি সংস্কৃত নিয়মই মানিয়া চলিয়াছেন। কিন্তু বিদ্যাপতি ও বাঙ্গলার অন্যান্য পদাবলীকার—গোবিন্দদাস, জ্ঞানদাস, ঘনশ্যাম দাস, রাধামোহন ঠাকুর, বাহুদেব ঘোষ, বলরাম দাস, যতুনন্দন, কবিশেখর, বজ্রদাস ব্রজবুলিতে গান রচনা করিবার সময় সংস্কৃতের এই নিয়ম অনুসরণ করেন নাই। এই পদকর্তাগণের ব্রজবুলির পদগুলি প্রায় সমস্তই চতুর্মাত্রিক কাওয়ালী তালে গেল এক দীর্ঘ ত্রিপদী ছন্দে রচিত। যেখানে অক্ষর কম না থাকে সেখানে

দীর্ঘস্বরকেও হ্রস্ব করিয়া উচ্চারণ করিতে হয় কিন্তু অক্ষর কম থাকিলে কোন একটি দীর্ঘস্বরকে দুই মাত্রা উচ্চারণ করিলেই চলে।\* তবে সাধারণতঃ শব্দের প্রথম দীর্ঘ স্বর দুই মাত্রা উচ্চারণ করিতে পারিলে দ্বিতীয় স্বর দীর্ঘ উচ্চারণ করিতে হয় না। আবার ৮ মাত্রার মধ্যে প্রথম ৪ মাত্রা প্রথমে হ্রস্ব উচ্চারণ করিয়া পূর্ণ হইয়া গেলে, ২য় চার মাত্রা পূর্ণ করিবার সময় অবশিষ্ট দীর্ঘস্বর বর্ণগুলির মধ্যে কোন একটাকে দুই মাত্রা উচ্চারণ করিতে হয়। স্থানে স্থানে এরূপ দৃষ্টান্তও দেখা যায় যেখানে প্রথম পাদে দীর্ঘ উচ্চারণ করিয়া এক মাত্রা কম থাকিয়া যায় তখন ২য় পাদ হইতে ১টি মাত্রা লইয়া তাল ঠিক রাখিতে হয় যথা,—

সব জন কাহ্ন

কাহ্ন করি ঝুয়ে

সো তুয়া ভাবে বিভোর।

—বিজ্ঞাপতি, পদাবলী

এখানে প্রথম পাদে ৬টি অক্ষর ‘সব জন কাহ্ন’ তন্মধ্যে মাত্র একটি দীর্ঘস্বর ইহাকে দীর্ঘ উচ্চারণ করিলেও ৭ মাত্রা হয় অর্থাৎ এক মাত্রা কম থাকে আর ২য় পাদে ৭টি বর্ণ তন্মধ্যে ‘কাহ্ন’র আকার দীর্ঘ উচ্চারণ করিলে ১ মাত্রা পূর্ব পাদের অভাব পূরণ করিল। তখন দুই মাত্রা অবশিষ্ট থাকিলে ইহার সহিত ‘করি’র দুই মাত্রা মিলিলে ৪ মাত্রা ঠিক হইল এখন অবশিষ্ট ৪ মাত্রার জন্য একটি কথা থাকিল ‘ঝুয়ে’। এ স্থানে ত্রিপদী ছন্দের চরণের শেষ নহে সুতরাং ইহার শেষে টান হইতে পারে না তাই ‘ঝু’র উপরে টান দিয়া অর্থাৎ ‘ঝু’কে দুই মাত্রা উচ্চারণ করিয়া ৪ মাত্রা ঠিক রাখিতে হইবে। ব্রজবুলীতে ব্রজ—পদাবলী পাঠের নিয়ম এইরূপ কঠিন বলিয়া প্রথম পাঠের সময় স্থানবিশেষে তালভঙ্গ হইয়া যায়। ২য় পাদটি দেখিলে তখন ঠিক হয়, প্রথম পাদের কোনটিকে দীর্ঘ করিতে হইবে। আবার স্থানবিশেষে দুইরূপ পাঠও চলে। যথা,—

কত যে কলাবতি

যুবতি সুমুরতি

নিবসতি গোকুল মাহ।

—গোবিন্দদাস, পদাবলী

\* হিন্দি কবি তুলসীদাসের চৌপাই সংস্কৃতের পঞ্চাটকা। ইহাতে ঠিক সংস্কৃতের স্তায় ত্রুতদীর্ঘ উচ্চারণ করিবার প্রথা—

বহ্নি লখন সিয় ত্রীতি বখানী।

শোক মনে হান্—গণ যুনি জ্ঞানী।

প্রথম পাদের 'কত যে' এই ৩ অক্ষরে যদি ৪ মাত্রা শেষ করিতে চাহি তবে 'যে' দীর্ঘ হইবে আর যদি 'কত যে ক——' পর্যন্ত লইয়া ৪ মাত্রা শেষ করি, 'তবে 'লাবতি'-র 'লা' দীর্ঘ করিয়া ২য় ৪ মাত্রা শেষ করিতে হইবে। আমার কানে ২য় রূপ পাঠাই মিষ্ট বলিয়া বোধ হয়।

জয়দেবের ২য় ছন্দ—মাত্রাবৃত্ত ত্রিপদীতে—৮+৮+১২ মাত্রা থাকে। পদকর্তাদিগের দীর্ঘ ত্রিপদীতেও ঠিক তাই। যথা—

জয়দেব—চন্দন চর্চিত, নীল কলেবর, পীত বসন বনমালী।

—গীতগোবিন্দ, গীত ৪।১

বিজ্ঞাপতি—কনকলতা অব-লম্বনে উরল, হরিণী হীন হিম যামা। —পদাবলী

গোবিন্দদাস—অভিনব হেম-কল্পতরু সঞ্চর সুরধুনী তীরে উজোর। —পদাবলী

এখন জয়দেবের ছুটি নূতন তালের কথা বলিব। একটির নাম নিঃসার তাল, অপরটির নাম অষ্টতাল। নিঃসার তাল ত্রিমাত্রিক অর্থাৎ প্রতিপাদ [ প্রতিপাদে ] তিনের দ্বিগুণ ৬ মাত্রা আছে। কিন্তু মোট পাঁচটি পাদ, ইহার সহিত ধুয়া ২ মাত্রা মিলাইলে ৭ পাদ হয়। কিন্তু আধুনিক একতালয় ৪টি পাদ থাকে সুতরাং একতালার সহিত ঠিক মিলে না।—নিঃসার তাল—

কালিয় বিষ-ধরগঞ্জন, জনরঞ্জন, যদুকুল নলি-ন দিনেশ।

জয় জয় দেব হরে ॥

—জয়দেব, গীতগোবিন্দ, গীত ২।৩

শ্রীযুক্ত বিজয়চন্দ্র মজুমদার মহাশয় তাঁহার 'ফুলশর' ও আধুনিক 'হৈয়ালিতে' এই ছন্দে একটি কবিতা মুদ্রিত করিয়াছেন—

নব কিশলয় দল শোভিল      যুহু দোলিল  
বনলতিকা তরু সঙ্কে  
নন্দন বন ফুল-গঞ্জন      বন রঞ্জন  
ফুটিল কুসুম শত অঙ্গে।

—বিজয়চন্দ্র মজুমদার, হৈয়ালি, বসন্ত

জয়দেবের অষ্টতালে প্রতি পাদে ৫ মাত্রা, সুতরাং আধুনিক কাঁপতালের তুল্য। যথা,—

স্বরগরল খণ্ডন      মম শিরসি মণ্ডন  
দেহি পদপল্লবমুদারম্।

—গীতগোবিন্দ, গীত, ১২।৭

আধুনিক যুগে স্বর্ণীয় কবি হেমচন্দ্র, পূর্ববঙ্গের ৬হরিশচন্দ্র মিত্র, বাঁকীপুরের ৬বলদেবী পালিত, এবং ( বলদেববাবুর মতে ) ৬রাজকৃষ্ণ মুখোপাধ্যায় মহাশয়গণ ও জীবিত গ্রন্থকারগণের মধ্যে শ্রীহরগোবিন্দ লস্কর চৌধুরী ও শ্রীবিজয়চন্দ্র মজুমদার মহাশয় বহুবিধ সংস্কৃত ছন্দে বাঙ্গলা কবিতা লিখিয়াছেন। শ্রীকালিদাস রায় ও শ্রীবৈদ্যনাথ কাব্যাতীর্থের মালিনী ছন্দে রচিত বাঙ্গলা কবিতাও মাসিক পত্রে দেখিয়াছি। কিন্তু বলদেব বাবুর গ্রন্থ এত অধিক সংখ্যক ছন্দে কেহ কবিতা লিখিয়াছেন বলিয়া মনে হয় না। তাঁহার গ্রন্থমধ্যে নিম্নলিখিত ছন্দগুলির ব্যবহার আছে—আর্য্য, উপজাতি, উপেন্দ্রবজ্রা, একাবলী ( বাঙ্গলার নহে, সংস্কৃতের ) করিং ( হিন্দির সংস্কৃতাম্বারী ছন্দ ), কুসুমবিচিত্রা, গজগতি, গীতিকা, জলোদ্ধতগতি, তামরস, তোটক, অরিতগতি, দোধকবৃত্ত, দ্রুত বিলম্বিত, পঞ্চচামর, পৃথ্বী, ভুজঙ্গপ্রয়াত, মদিরা, মধুমালতী, মন্দাক্রাস্তা, মাত্রাবৃত্ত ত্রিপদী, মালিনী, পঙ্কবাটিকা, সাধাধাতা, বংশস্ববিল, বসন্ততিলক, বিয়োগিনী, শাদুল-বিক্রীড়িত, শিখরিণী, স্বাগতা, স্রবরা ও হরিণী মোট ৩২টি। ইহার মধ্যে ১২টি ছন্দে সাধারণ তালের মাত্রা পাইয়াছি—৮টি চতুর্মাত্রিক কাওয়ালী, ১টি ত্রিমাত্রিক একতালা ও ৩টি পঞ্চমাত্রিক ঝাপতাল। কবি বলদেবের ছন্দের উদাহরণের সহিত কবি বিজয়চন্দ্রেরও কবিতা মধ্যে মধ্যে উদ্ধৃত করিব।

কাওয়ালী—

- (১) অপরু | প বিলা | স বিলো | কি বনে,  
কবি 'তো | টক' বু | ত্ত সকা | ম ভণে।

—বলদেব, গীতিকাবিতাবলী ?

- (২) কাম বি | মোহিত | লোলুপ | চিন্তে  
গান র | মাপ্রিয় | 'দোধক' | বৃত্তে।

বলদেব, ললিতকবিতাবলী ?

- (২ ক) নিদ্রিত চন্দ্র স্ননির্মল নীরে  
স্বপ্ত বনান্তে শ্রামল তীরে।

—বিজয়চন্দ্র, হৈয়ালি, শরদে

- (৩) হত যত | ছুঃখ | প্রিয় সহ | যুক্তা  
কুসুম বি | চিত্রা | কবির | উক্তা।

বলদেব, ললিতকবিতাবলী ?

- (৪) গোপ নি | তষ ব | তী গণ | ভাষণ | বৃষ্টি ক | রে অমি | য়া শ্রব | গে  
কৃষ্ণ হৃদে ধরি হৃষ্ট মনে কবি কেলিকলা মদিরায় ভণে ।

—বলদেব, ললিতকবিতাবলী ?

- (৫) উপরের ‘মদিরা’ ছন্দ ও নিম্নের হিন্দি ‘করিং’ ছন্দে পার্থক্য যৎসামান্য,  
করিং ছন্দে একেবারে শেষে একটির পরিবর্তে দুইটি দীর্ঘ মাত্রা । যথা,—  
সিদ্ধুনের তটে বসুধাধিপ শাসি সমস্ত বিজাতি দুঃস্থে—  
দুর্জয় দুর্গ বিনির্মিতা করিলে নিজ কীর্তিবিকাশ দিগন্তে ।

—বলদেব, ভর্তুহর কাব্য, ভাটকৃত বল্লনা

- (৬) মাত্রাবৃত্ত ত্রিপদী—

কিশলয় বিরচিত, চন্দন চর্চিত, যুবজন মান সহায়ী ।  
কোমল তলে, রতিরস কলে বসিলা বিপিনবিহারী ।

—বলদেব, ললিতকবিতাবলী, শ্রীরাধার অভিসার ও রাসলীলা বর্ণন

অঞ্জনরঞ্জিত নীলগগন পট, দীপ্ত রবির করজ্বালে ।  
শ্রামল তৃণ শোভিত তটিনীতট, বেষ্টিত তাল তমালে ॥

—বিজয়চন্দ্র, হৈয়ালি, শরদে

- (৭) প্রাতর্বর্ণন পরমানন্দে ।  
করিছে কবি ‘পঙ্কটিকা’ ছন্দে ।

- (৮) তব মুখ | তামর | সাসব | আশে,  
স্বললিত ‘তামরসে’ কবি ভাষে ।

—বলদেব, ললিতকবিতাবলী

ঐপতাল—

- (১) ‘ভুজঙ্গপ্রয়াতে’ কবি প্রীতি ভাষে ।  
বলে গোপবালে চল শ্রামপাশে ।

—বলদেব, ললিতকবিতাবলী, শ্রীরাধার অভিসার ও রাসলীলা বর্ণন

- (২) গজগতি—

ঘন ঘটা দরশনে যত স্থখী হয় শিখী ।  
স্বমিলনে হরি সনে তত স্থখী শশিমুখী ।

—বলদেব, ললিতকবিতাবলী, শ্রীরাধার অভিসার ও রাসলীলা বর্ণন



- (৩) মানবতি মান হর রাখ পতি ভারতী ।  
 প্রীতি অভিলষি কবি গায় 'মধুমালতী' ।

—বলদেব, ললিতকবিতাবলী ?

- (৩ ক) ফুটিল নব পুষ্পবন শপ্পদল ছাইয়া,  
 সুরভি মৃদু পবন অতি | তাহে ।  
 বিহগ কত কুসুম নত বায়ু পরিচালিত,  
 শ্রাম তরু শাখ পর | গাহে ॥

—বিজয়চন্দ্র, হৈয়ালি, ঘনাগমে

একতারা—

- (১) হরিতগতি ছন্দ—  
 হরির সনে সুখ মিলনে ।  
 : লিল ধনী প্রমোদ বনে ॥

—বলদেব, ললিতকবিতাবলী, শ্রীরাধার অভিসার ও রাসলীলা বর্ণন

- (ক) মাত্রাবৃত্ত লঘু ত্রিপদী—  
 তব পঞ্চপুষ্প রচিত কান্তি  
 মিশিতকুসুম চাপে  
 সিত ইন্দুকিরণ রঞ্জিত তমু  
 অতমু ভরিল তাপে ।

—বিজয়চন্দ্র হৈয়ালি, ফুলগর

কবি বিজয়চন্দ্র বহুদিন হইল সংস্কৃত ছন্দে বাঙ্গলা কবিতা লেখা ছাড়িয়া দিয়াছেন। কবি বলদেব ৩২ প্রকারের সংস্কৃত ছন্দ বাঙ্গলায় চালাইতে চেষ্টা করিয়া শেষে কর্ণাজুঁ কাব্যের ভূমিকায় লিখিয়াছেন 'সংস্কৃত কাব্যে যে সমস্ত সুললিত ছন্দ ব্যবহৃত হইয়া থাকে বাঙ্গলা পক্ষে সেই সমস্ত ছন্দ প্রয়োগ করিতে পারিলে অবশ্যই তাহার কিছু না কিছু সৌন্দর্য বৃদ্ধি হইতে পারে; কিন্তু এতদ্ব্যতীত স্বরবর্ণের লঘুত্ব বা গুরুত্বের প্রতি লক্ষ্য রাখিয়া পাঠ করিবার প্রথা না থাকায়, ঐ সকল ছন্দ সর্বসাধারণের নিকট সমাদৃত হয় না। আমার ভর্তুহরি তাহার দৃষ্টান্তস্থল। সেই কারণবশতঃ আমি ঐ প্রকার রচনায় আর প্রবৃত্ত হইতে সাহসী হইলাম না।' তিনি তাহার ভর্তুহরি কাব্যের ভূমিকাতেও বাঙ্গলা উচ্চারণের এই ক্রটি লক্ষ্য করিয়া বলিয়াছিলেন, "বঙ্গভাষায় সংস্কৃত ছন্দ লিখিতে হইলে

প্রত্যেক শব্দের প্রত্যেক বর্ণের লঘু বা গুরুত্ব নিরূপণ করা আবশ্যিক। যে সকল শব্দ সংস্কৃতমূলক তাহাদের উচ্চারণে কোন সংশয় উপস্থিত হইতে পারে না। কিন্তু 'যেন' 'হেন' 'কোন' 'কেন' 'আমি' প্রভৃতি আরও অনেক শব্দ আছে যাহাদিগকে সংস্কৃত ভাষার নিয়মামুসারে উচ্চারণ করিতে হইলে সূত্রাব্য হয় না। কারণ আমরা উক্ত 'এ'কার 'আ'কার 'ও'কার হ্রস্ব উচ্চারণ করিয়া থাকি।... শব্দের অন্তে যে 'ও'কার সংস্কৃত 'অপি'র অর্থে প্রয়োগ হয় (যেমন, তাহাও) তাহা হ্রস্ব বলিয়া গণনা করিয়াছি। এরূপ না করিলে অত্যন্ত শ্রুতিকটু হয়।”

কবি হেমচন্দ্র সংস্কৃতের গ্রায় হ্রস্বদীর্ঘ ভেদ রাখিয়া 'দশমহাবিজ্ঞা'র অনেকগুলি কবিতা রচনা করিয়াছিলেন কিন্তু ব্রজভাষার পদ রচয়িতাদিগের গ্রায় দীর্ঘস্বরের সর্বত্র দুই মাত্রা উচ্চারণ ধরেন নাই। তজ্জগত তাঁহাকে দুই মাত্রা উচ্চারিত দীর্ঘস্বরের উপর চিহ্ন দিয়া পুস্তক মুদ্রিত করিতে হইয়াছিল। একটি উদাহরণ দিতেছি—

সেহ যোগ সাধন,                      কি হেতু ঘুচাইলি  
ভিক্ষুকে বসাইলি ঘরে।  
কি হেতু তেয়াগিলি                      কেনই সমাপিলি  
সে সাধ এতদিন পরে ॥

—হেমচন্দ্র, দশমহাবিজ্ঞা, মহাদেবের বিলাপ

এখানে 'সেহ' 'হেতু' 'সাধ' প্রভৃতির স্বর দীর্ঘ উচ্চারিত হয় নাই। কবির দশমহাবিজ্ঞায় বহুবিধ ছন্দ প্রয়োগ করিয়াছেন কিন্তু বিশ্লেষণ করিলে দেখা যায় এগুলি পয়ার ও ত্রিপদীর প্রকার ভেদ মাত্র। লঘু ও দীর্ঘ ত্রিপদী উভয়ই আছে। সংস্কৃতের মাত্রাবৃত্ত ত্রিপদীতে ৮+৮+১২ মাত্রা থাকে। কবির সেরূপ ছন্দের নাম দিয়াছেন দীর্ঘভঙ্গ ত্রিপদী। তন্নিম্ন তাঁহার আর এক প্রকার ছন্দ আছে তাহাতে ৮+৮+১৫ মাত্রা আছে। এগুলির নাম ধীর ললিত ত্রিপদী, ঘনদ্রুত-পদী ছন্দ, ধীর ঘনপদী ছন্দ ও ললিত দীর্ঘত্রিপদী। তিনি পাঁচ প্রকারের পয়ার প্রয়োগ করিয়াছেন তাহার মধ্যে ৪টিতে ৮+৭ মাত্রা এবং একটিতে ৮+৮ মাত্রা। নিম্নে তাঁহার ভঙ্গপদী পয়ারের একটি শ্লোক উদ্ধৃত করিতেছি,—

স্বয়লোক মোহিত মোহন কুহকে।

স্তম্ভিত বীণাপানি স্বরতাল পুলকে ॥

—হেমচন্দ্র, দশমহাবিজ্ঞা, নারদের বীণাবাদন

জীবিত কবিগণের মধ্যে সম্ভবতঃ কবির আর রবীন্দ্রনাথ বাঙ্গলায় মাত্রাবৃত্ত ছন্দ চালাইবার প্রয়াস করিয়া পয়ারে ইহার প্রথম প্রয়োগ করিয়াছিলেন—

নিম্নে যমুনা বহে স্বচ্ছ শীতল

উর্দ্ধে পাষাণতট শ্রাম শিলাতল ।

—রবীন্দ্রনাথ, মানসী, নিষ্কল উপহার

পরে তিনি পয়ার বা দীর্ঘ ত্রিপদীতে ইহার ব্যবহার পরিত্যাগ করিয়াছেন এবং লঘু ত্রিপদীতে বা ত্রিমাত্রিক একতালার ছন্দেও সম্ভবতঃ অগ্রত্বেও ইহার প্রয়োগ সীমাবদ্ধ করিয়াছেন। শ্রীকালিদাস রায় তাঁহার ‘ব্রজবেণু’তে মাত্রাবৃত্ত পয়ারের দৃষ্টান্ত দিয়াছেন—

হুলিছে যমুনা ঐ কূলে কূলে পুলকে ।

দামিনী হুলিছে হাসি, স্বর্লোকে ভুলোকে ।

—কালিদাস রায়, ব্রজবেণু

ইহা চতুর্মাত্রিক কাওয়ালী তালে মিলিবে। ব্রজবেণুতে কাওয়ালী তালের আর এক প্রকার মাত্রাবৃত্ত ছন্দ আছে,—

যদি—বচন দুটি কহ—উঠিবে ফুটি

ঘোর—ব্যাপ্ত বিনাশি’ তব দণ্ড ভাস্তি ।

—কালিদাস রায়, ব্রজবেণু

এখানে ‘বচন দুটি’র সহিত ১ মাত্রা টান রাখিয়া পর পাদের ‘সহ’ [‘কহ’?] যোগ করিলে ৮ মাত্রা হইবে। কবি শ্রীসত্যেন্দ্রনাথ দত্তের ‘তীর্থবেণু’তে কাওয়ালী তালের একটি ছন্দের দৃষ্টান্ত আছে—

ইংলণ্ড্ ইংলণ্ড্ সিন্ধুর প্রহরী

রাষ্ট্রের স্রষ্টা মানুষ্যের ধাত্রী ।

—সত্যেন্দ্রনাথ দত্ত, তীর্থবেণু, সঙ্গীত-মন্ত্রী নিবেদন

আধুনিক বাঙ্গলার মাত্রাবৃত্ত ছন্দে ত্রিমাত্রিক তালের ব্যবহারই অধিক। কেহ কেহ কচিং পঞ্চমাত্রিক ঝাপতাল ও সপ্তমাত্রিক তেওরা তালের ছন্দও ব্যবহার করেন। কবি শ্রীবসন্তকুমার চট্টোপাধ্যায়ের ‘সপ্তস্বর’ হইতে ইহার বিভিন্ন প্রকার উদাহরণ উদ্ধৃত করিতেছি,—

(১) লঘু ত্রিপদী—

কুঞ্জে, কুঞ্জে, বিহরে পুলকে, পুষ্পবীথিকা দলি

চরণ পীড়নে, নবীন জীবনে, ফুটে উঠে ফুলকলি । (৬+৬+৮)

—বসন্তকুমার চট্টোপাধ্যায়, সপ্তম্বর

চির শোভা শ্রাম, হরিংশল্প পুষ্প আলোকে উজলি

বিরাজে স্থৈর্য কল্পনালোক, কল্পনা স্বর বিজলি । (৬+৬+৯)

—বসন্তকুমার চট্টোপাধ্যায়, সপ্তম্বর

(২) লঘু চৌপদী—দ্রুত ললিত পয়ারের বা দীর্ঘ একাবলীর তুল্য—

হাজার তোরণ কাহার দেউল মাঙ্গলি ফুল গন্ধ লিপ্ত

কোন সে পুরীর ভিতর নিত্য রত্ন প্রদীপ উজল দীপ্ত ? (৬+৬+৬+৬)

—বসন্তকুমার চট্টোপাধ্যায়, সপ্তম্বর

এই মাত্রাবৃত্ত ছন্দে বাঙ্গলার হসন্ত উচ্চারণ বজায় রাখিয়া ‘হাজার তোরণ’ করা যায় তখন উপাত্ত্য বর্ণটি দীর্ঘ উচ্চারণ করিতে হইবে। আবাব হসন্ত না করিয়া ‘হা জা-র তো-র-ণ’ করিয়া প্রত্যেক বর্ণে সমান মাত্রা দেওয়া চলে। স্বর্গীয় কবি দ্বিজেন্দ্রলালের প্রায় সমস্ত গানগুলি এই ছন্দে রচিত। আবার ত্রিমাত্রিক তালের বিভিন্ন চরণে বিভিন্ন সংখ্যক মাত্রা যোজনা দ্বারা ছন্দের নানা রূপ হইয়া থাকে। কোন চরণের প্রারম্ভে একটি অধিক শব্দ যোজনা করা হয় অথবা অন্তে—মাত্রা কম থাকে, তখন টানিয়া মাত্রা পূরণ করিতে হয় যথা,—

সেখা, | মন্ত ভ্রমর | গুঞ্জরে.....

নৃত্য পুলকে | তটিনী.....

নিত্য আদরে | মুঞ্জরে.....

কুসুমোৎসবে ধরণী.....

এখানে প্রথম ও তৃতীয় চরণে দুই মাত্রা করিয়া এবং ২য় ও ৪র্থ চরণে ৩ মাত্রা করিয়া কম আছে বলিয়া ততখানি টানিয়া রাখিতে হয়।

পঞ্চমাত্রিক ঝাঁপতালের উদাহরণ—

নন্দপুর | চন্দ্র বিনা | বৃন্দাবন | অন্ধকার

বহে না চল | মন্দানিল | লুটিয়া ফুল | গন্ধভার ।

—কালিদাস রায়, পর্ণপুট, বৃন্দাবন অন্ধকার

সপ্তমাত্রিক জেওরা তালের উদাহরণ,—

তোমারি নিবন্ধনে,                      ভাবনা আনমনে

তোমারি সাধনা,                      শীতল সৌরভ ।

—রজনীকান্ত, বাপী, তোমারি

সংস্কৃতের যে সকল ছন্দের প্রতি গণে (ইংরাজী ফুট্) এক প্রকারের যথা ভোটক, দোধক, ভূজঙ্গপ্রয়াত বা মধুমালতী, তাহাতে পাঠক একবার লঘুগুরু উচ্চারণের ক্রমবৃত্তিতে পারিলে আর ভাবনা থাকে না, তালে তালে আপনি লঘুগুরু উচ্চারণ হইয়া যায় তখন 'রাম' বা 'যাদব' অকারান্ত উচ্চারণ করা কঠিন হয় না কিন্তু 'যাও' 'খাও' 'আমার' 'নাই' শব্দগুলি স্বরাস্ত উচ্চারণ করা দুরূহ কার্য, সেইজন্ত এখন যাহারা বাঙ্গলায় মাত্রাবৃত্ত ছন্দে কবিতা লিখিতেছেন তাঁহারা সংস্কৃত শব্দের অধিক ব্যবহার করিতেছেন এবং যাহারা ছড়ার ছন্দ ব্যবহার করিতেছেন তাঁহারা খাঁটি বাঙ্গলা শব্দ অধিক ব্যবহার করিতেছেন। ছড়ার ছন্দে বাঙ্গলার খাঁটি উচ্চারণ বজায় থাকে ইহাতে কেবলমাত্র উচ্চারিত স্বরগুলি গণনা করিয়া মাত্রা নির্ণীত হয়।

ছড়ার ছন্দে প্রতি পাদে দুয়ের দ্বিগুণ ৪ মাত্রা করিয়া থাকে। ইহা চতুর্মাত্রিক কাণ্ড্যালী তালের অন্তর্গত। যেখানে একটি স্বর অল্প থাকে সেখানে পূর্ব বা পরের স্বরে টান দিয়া মাত্রা পূরণ করিতে হয়। যথা—

খাটে খাটায়্ | লাভের গাঁতি  
তার অধেক | কাঁধে ছাতি।

—খনা

ছেলেভুলান বা মেয়েলী ছড়ায় সাধারণতঃ ৪+৪+৬ মাত্রা থাকে। সেই হিসাবে ইহাকে আক্ষরিক মাত্রার তরল পয়্যারের [ সহিত ] তুলনা করা যাইতে পারে,—

তরল পয়্যার—দেখ দ্বিজ, মনসিজ জিনিয়া মুরতি

—কাশীরাম দাস, মহা:

ছড়ার ছন্দ—বুদ্ধারা সব জপের মালা তুললো হাতের পরে।

—বসন্তকুমার চট্টোপাধ্যায়, সপ্তস্বরী

কিংবা ইহাকে লঘু ত্রিপিদী বলা যাইতে পারে। স্বকবি বিজয়চন্দ্র তাঁহার 'হৈয়ালী'তে ছড়ার ছন্দের নানা রূপ দেখাইয়াছেন,—

(১) তাজা শোকের চেয়ে কাল

ঘন দুঃখ হতে গভীর

একি আঁধার তুমি ঢাল।

ও গো জড়ার [জরার] বাড়ি স্ববির ?

—বিজয়চন্দ্র হৈয়ালি, কোতো

(২) রক্তরূপে তীব্র দুঃখ যদি আসে নেমে

বুক ফুলিয়ে দাঁড়াস

আকাশ যদি বজ্র নিয়ে মাথায় পড়ে ভেঙে

উড়ে দু'হাত বাড়াস ।

—বিজয়চন্দ্র, হৈয়ালি, লক্ষ্যপথে

(৩) সংসারটা ফাঁকি রে, যেন ভোজের বাজী

জীবাশ্মাটা পাখী রে, উড়ে পালায় পাজী ।

—বিজয়চন্দ্র, হৈয়ালি, ঔষধ

এখন বাঙ্গলার ছন্দ সম্বন্ধে সাধারণভাবে ২।৪ কথা বলিব। মানব যখন প্রথম গান করিত তখন সুর ছিল, হয়ত তাল ছিল না, তার পরে কবিতা হইল কিন্তু ছন্দের বাধাবাধি নিয়ম ছিল না। যখন প্রথম ছন্দ বা তাল হইল তখন এই নূতন ব্যবস্থায় সকলেই আনন্দ বোধ করিত। কিন্তু ইহাতে স্বাধীনতায় হস্তক্ষেপ করা হয় বলিয়া মানব আবার বন্ধনমুক্ত হইতে চাহিল। সে তালের বন্ধন ছাড়িয়া শুধুই সুর ভাঁজিতে লাগিল তাহার নাম রাগরাগিণীর আলাপ। বাঙ্গলা কবিতার মধ্যে অমিত্রাক্ষর ছন্দ ও রবীন্দ্রনাথের নূতন অসম ছন্দ এই শ্রেণীর উদাহরণ। মধুসূদন দত্ত অমিত্রাক্ষর ছন্দ চালাইলেন, রাজকৃষ্ণ রায় বা গিরিশচন্দ্র ঘোষ প্রতি পংক্তিতে মধুসূদনের গায় চতুর্দশ অক্ষর না রাখিয়া অসমান সংখ্যক অক্ষর রাখিলেন তখন ইহার নাম হইল গৈরিশ ছন্দ, জনৈক মুসলমান কবি ইহা গড়ের গায় সাজাইয়া নাম রাখিলেন হোসেনী ছন্দ। রবীন্দ্রনাথ এই উভয় প্রকার ছন্দেই মিল রাখিয়া আবার স্বাধীনতার উপর একটা বন্ধন জুড়িয়া দিলেন। ইহাদের নাম হইয়াছে মিত্রাক্ষর পয়ার ও মিত্রাক্ষর অসম ছন্দ। এগুলি মিলের দাসত্ব করিলেও তালের অধীনতা পাশ হইতে মুক্ত হইয়াছে। কবিতায় মিল কোথা হইতে আসিল ইহা লইয়া আলোচনা করিতে গিয়া শ্রীবিজয়চন্দ্র মজুমদার প্রবাসী পত্রিকায় লিখিয়াছিলেন, 'জয়দেবের ললিতকান্ত পদাবলীর অল্পকরণেই যে বাঙ্গলায় মিত্রাক্ষরের প্রচলন হইয়াছে একথা মনে হয় না কারণ ডাক ও খনার বচনের মিল তাহার বহু পূর্ব হইতেই প্রচলন ছিল। সুর সহযোগে কবিতা আবৃত্তি করিলেই গান, আর গানের সঙ্গে তাল থাকিলেই মিলের প্রয়োজন। অমিত্রাক্ষর শব্দ শুনিতে শুনিতে যখন মনে বিরক্তির উদয় হয় তখন মিত্রাক্ষর শুনিলে মনে একটা সাড়া পড়ে এবং আমরা পূর্বের চরণের

সঙ্গে মিলাই বা তুলনা করি। প্রায় সর্বদেশেই কবিতায় মিল আছে। কে কাহার নিকট ধার করিয়াছে বলা কঠিন।’

ঐজ্ঞানার্হর পদকর্তাগণ গানের মুখে হ্রস্ব দীর্ঘ উচ্চারণ করিতেন স্তত্রাং তাঁহারা সর্বত্র সংস্কৃতের উচ্চারণ মানেন নাই। কবিবর হেমচন্দ্রও সর্বত্র সে নিয়ম পালন করেন নাই। স্বর্গীয় কবি দ্বিজেন্দ্রলাল তাঁহার ‘পতিতোদ্ধারিণী গঙ্গে’ নামক গানে সংস্কৃতের হ্রস্ব দীর্ঘ উচ্চারণ মানিয়া চলিয়াছেন কিন্তু ২।১ স্থলে তাঁহার ছন্দ পতন হইয়াছে। আধুনিক মাত্রাবৃত্ত ছন্দে যাহারা কবিতা লিখিয়াছেন যথা শ্রীর ববীন্দ্রনাথ, বিজয়চন্দ্র, সত্যেন্দ্রনাথ দত্ত, বসন্তকুমার, কালিদাস, কুমুদরঞ্জন, করুণানিধান, ভূজঙ্গধর, তাঁহারা বেশ কটা নিয়ম মানিয়া চলিতেছেন, কিন্তু মাসিকপত্রের লেখকগণের মধ্যে অনেকেই এখনও বাঙ্গলার আধুনিক মাত্রাবৃত্ত ছন্দ বুঝিতে পারেন নাই। ভারতবর্ষ ও মালঞ্চ পত্রে মাঝে মাঝে তাহার দৃষ্টান্ত পাই! তালজ্ঞানের অভাবেই তাঁহাদের ছন্দপতন হইতেছে।

বাঙ্গলার যে সকল ছন্দ তালের আমলে আইসে না, উপসংহারে তাহাদের কথা বলিয়া লই। গায়ক রাগিণী আলাপ করিবার সময় যেরূপ তালের বন্ধনে থাকে না, কবিও সেইরূপ তালের বন্ধন ছাড়াইয়া অমিত্রাক্ষর ছন্দের প্রচলন করিয়াছেন। ইহাতে যতিপতনের কোন স্থান নির্দেশ নাই। যতিপতনের স্থান নির্দেশ থাকে না বলিয়া অমিত্রাক্ষর ছন্দে মিল থাকিলেও তালের মধ্যে ধরা পড়ে না। ববীন্দ্রনাথের অসমছন্দ ও তালহীন ছন্দ এবং তালহীন অসমছন্দ।\*

শ্রীরাখালরাজ রায়।

পরিচায়িকা [ নবপর্ষায় ] সম্পাদিকা . রাগী নিরুপমা দেবী

প্রথম বর্ষ। ৭ম সংখ্যা। জ্যৈষ্ঠ, ১৩২৪। পৃ ৪১৭ ৪৬৭

\*এই প্রবন্ধের দৃষ্টান্তগুলির উৎস-নিরূপণ করেছেন শ্রীশঙ্ক ঘোষ। মূল প্রবন্ধে তা ছিল না।—গ্রন্থকার

## পরিশেষ

ক। বাংলা ছন্দ-চিন্তার ক্রমবিকাশ

উপক্রম-পর্ব : ১৩০৭-১৩৬০

বিহারীলাল গোস্বামী ( ১৮৭১-১৯৩১ )

কবিতায় ছন্দ ও মিল তারতী ১৩০৭ কার্তিক

ছন্দ ও মিলের খুঁটিনাটি ভারতী ১৩০৭ মাঘ

ত্রিনিবাস বন্দ্যোপাধ্যায়

রবিবাবুর কবিতার ছন্দ সাহিত্য ১৩০৮ চৈত্র

হরগোবিন্দ লঙ্কর

বাংলায় সংস্কৃত ছন্দ : বিজ্ঞাপন \*দশাননবধ কাব্য ১৩১০ ...

রমেশচন্দ্র বসু

পয়ার ছন্দের উৎপত্তি সাহিত্য-পরিষৎ পত্রিকা ১৩১১ কার্তিক-পৌষ

রবীন্দ্রনাথ ঠাকুর ( ১৮৬১-১৯৪১ )

জাপানি ছন্দ : জাপানের প্রতি ভাণ্ডার ১৩১২ আষাঢ়

দ্বিজেন্দ্রলাল রায় ( ১৮৬৩-১৯১৩ )

স্বাভাবিক বাংলা ছন্দ : ভূমিকা \*আলেখ্য ( কাব্য ) ১৩১৪ বৈশাখ

রবীন্দ্রনাথ ঠাকুর

সঙ্ক্যাসংগীতের ছন্দ : সঙ্ক্যাসংগীত প্রবাসী ১৩১৯ বৈশাখ

দ্বিজেন্দ্রলাল রায়

মাত্রিক ( syllabic ) ছন্দ : ভূমিকা \*ত্রিবেণী ( কাব্য ) ১৩১৯ শ্রাবণ

আন্ততঃ্য চট্টোপাধ্যায়

বঙ্গভাষায় সংস্কৃত ছন্দ প্রবাসী ১৩২০ বৈশাখ

ললিতকুমার বন্দ্যোপাধ্যায় ( ১৮৬৮-১৯২৯ )

'বঙ্গভাষায় সংস্কৃত ছন্দ' ( আলোচনা-১ ) প্রবাসী ১৩২০ জ্যৈষ্ঠ

সত্যেন্দ্রনাথ দত্ত ( ১৮৮৮-১৯২২ )

সনেটের ছন্দ : 'সনেট পঞ্চাশৎ' ভারতী ১৩২০ শ্রাবণ



প্রিয়নাথ সেন ( ১৮৫৪-১৯১৯ )

সন্দেশের ছন্দ : 'সনেট পঞ্চাশৎ'

সাহিত্য

১৩২০ শ্রাবণ

প্রমথ চৌধুরী ( ১৮৬৮-১৯৪৬ )

সনেট কেন চতুর্দশপদী

ভারতী

১৩২০ ভাদ্র

শরৎচন্দ্র ঘোষাল

'বঙ্গভাষায় সংস্কৃত ছন্দ' ( আলোচনা-২ ) প্রবাসী

১৩২০ কার্তিক

রবীন্দ্রনাথ ঠাকুর

বাংলা ছন্দ-১ ( পত্রপ্রবন্ধ )

সবুজপত্র

১৩২১ জ্যৈষ্ঠ

শশাঙ্কমোহন সেন ( ১৮৭৩-১৯২৮ )

বাঙ্গালা ছন্দ

প্রবাসী

১৩২১ আষাঢ়

রবীন্দ্রনাথ ঠাকুর

বাংলা ছন্দ-২ ( পত্রপ্রবন্ধ )

সবুজপত্র

১৩২১ শ্রাবণ

বিজয়চন্দ্র মজুমদার ( ১৮৬১-১৯৪২ )

কবিতার ভাষা ও ছন্দ

প্রবাসী

১৩২২ অগ্রহায়ণ

রবীন্দ্রনাথ ঠাকুর

বাংলা বানান ও ছন্দ : বাংলা বানান

প্রবাসী

১৩২৩ বৈশাখ

রাখালরাজ রায়

বাংলার ছন্দ ও তাল

পরিচারিকা

১৩২৪ জ্যৈষ্ঠ

রবীন্দ্রনাথ ঠাকুর

সংগীত ও ছন্দ : সংগীতের মুক্তি

সবুজপত্র

১৩২৪ ভাদ্র

ছন্দের অর্থ-১ : ছন্দ

সবুজপত্র

১৩২৪ চৈত্র

সত্যেন্দ্রনাথ দত্ত

ছন্দ-সরস্বতী

ভারতী

১৩২৫ বৈশাখ

অজিতকুমার চক্রবর্তী ( ১৮৭৬-১৯১৮ )

বিষম ছন্দ : 'বিজয়ী' ( সমালোচনা )

ভারতী

১৩২৫ বৈশাখ

কবিতার ছন্দ : মাসকাবারি

ভাৱ

১৩২৫ জ্যৈষ্ঠ

প্রমথ চৌধুরী

পয়ার ( সত্যেন্দ্রনাথকে লেখা পত্র )

সবুজপত্র

১৩২৫ ভাদ্র

যাদবেশ্বর তর্করত্ন

রবীন্দ্রনাথের ভাব ও ছন্দ	নারায়ণ	১৩২৬ মাঘ
কাজী নজরুল ইসলাম ( ১৮৯৯ মে ২৫ )		
আরবী ছন্দ	প্রবাসী	১৩২৮ চৈত্র
বসন্তকুমার চট্টোপাধ্যায় ( ১৮৯০-১৯৫২ )		
রবীন্দ্রনাথের ছন্দ ( ধারাবাহিক ১-৩ )	মানসী ও মর্মবাণী	১৩২৯ শ্রাবণ,
প্রবোধচন্দ্র সেন ( ১৮৯৭ এপ্রিল ২৭ )		ভাদ্র, কার্তিক
বাংলা ছন্দ ( ধারাবাহিক ১-৫ )	প্রবাসী	১৩২৯ পৌষ-১৩৩০ বৈশাখ
বাংলা ছন্দ ও সংগীত ( ধারাবাহিক ১-৩ )	প্রবাসী	১৩৩০ মাঘ-চৈত্র



বাঙালির সাহিত্যসাধনার ইতিহাস গৌরবময়। এই সাধনার একটি বিশেষ দিক ছন্দসাধনা। প্রাচীন ৬ মধ্য যুগের বাংলা সাহিত্যে মুন্দরাম, গোবিন্দদাস, ভারতচন্দ্র প্রমুখ কবিগণ, আধুনিক কালের কাব্য সাহিত্যে রবীন্দ্রনাথ থেকে শুরু করে বিভিন্ন কবি বাংলা ছন্দে বৈচিত্র্য সৃষ্টি করেছেন।

অথচ বাংলা ছন্দ-ব্যাকরণ সম্পর্কে আলোচনা শুরু হয়েছে অপেক্ষাকৃত সম্প্রতিকালে এবং প্রশংসীবদ্ধভাবে এ আলোচনার সূত্রপাত করেছেন ছন্দচার্য শ্রী প্রবোধচন্দ্র সেন মহাশয়। ‘ছন্দ-জিজ্ঞাসা’ গ্রন্থখানি তাঁর অর্থশতাব্দীরও অধিক কালের তপস্কার ফল। এ গ্রন্থ বাংলা ছন্দশাস্ত্র আলোচনার পূর্বাঙ্গ এবং একমাত্র ইতিহাস।

‘ছন্দ-জিজ্ঞাসা’র মুখ্য অবলম্বন ১৩২৯-৩০ এবং ১৩৩৮-৩৯ এই দুই পর্বে প্রবাসী, বিচিত্রা, পূর্বাঙ্গা প্রভৃতি পত্রিকায় লেখকের ছন্দ-সম্পর্কিত প্রবন্ধাবলি। এই সূত্রে লেখকের সঙ্গে রবীন্দ্রনাথ, প্রমথ চৌধুরী, সুনীতিকুমার চট্টোপাধ্যায়, দিলীপকুমার রায় প্রমুখ ব্যক্তিদের সঙ্গে ছন্দবিহ্বকের ধারাবাহিক ইতিহাস তথ্য প্রমাণসহ গ্রন্থখানিতে সন্নিবিষ্ট হয়েছে। ‘ছন্দ-জিজ্ঞাসা’ বাংলা সাহিত্যের দীর্ঘ দিনের অভাব মোচন করল।



মূল্য : ত্রিশ টাকা